



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.


We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search


Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Lv 18. 345.



Aug. 28, 1863.

39-64
38



10

©
P. VIRGILI MARONIS

C A R M I N A

BREVITER ENARRAVIT

Heriberto
PHILIPPUS WAGNER

EDITIO TERTIA

SUPERIORIBUS MULTO PRAESTABILIOR

LIPSIAE

IN LIBRARIA HAHNIANA

MDCCCLXI

Ln 18. 345

HARVARD COLLEGE LIBRARY

1863, Aug. 28.

\$1.86

Salisbury Fund.

VIRO VENERABILI

CAROLO GODOFREDO BEER

ANTISTITI SACRORUM APUD NIEDERAVIENSES

OPTIME PROMERENTI

HANC TERTIAM EDITIONEM

SACRAM ESSE VOLUIT

AMICISSIMUS EDITOR.

LUSTRA DECEM IUNCTI TRANSEGIMUS, OPTIME BEERI;

HIC QUOQUE IUNCTA FERAT NOMINA NOSTRA LIBER!

39-66
88

PRAEFATIO

TERTIAE EDITIONIS.

~~~~~

Ex quo ego et P. Hofman Peerlkamp, Vir Venerabilis, carmina Virgiliana edidimus, multorum studia incensa sunt ad eadem vel emendanda vel explicanda. Multa uterque temptavimus, alius alia via, si non persuadendi spe, tamen quo aliorum ingenia excitarentur ad invenienda veriora. Unde hunc fructum rettulimus, ut ea quoque, quae aliis ex sententia successerunt, ex aliqua parte pro nostris habere possemus. Eodem tempore, quo mea editio sub prelo sudabat, coepta erat typis exprimi editio Aeneidos a Carolo Thiel curata. De huius viri laude nunc multa praedicare supervacaneum est, quandoquidem omnes, qui in his studiis versantur, quanta eius fuerit eruditio, quantum acumen, quam subactum ad poetas interpretandos iudicium, quanta denique cum Virgilio quasi familiaritas, satis cognitum habere existimo. Praeterea laudabilem operam in enarrando Virgilio posuerunt Car. Fr. Süpfle, Car. Anthon, Neo-Eboracensis (1846), God. G. Gossrau, Fr. Dübner, Archib. Ham. Bryce, Edinburgensis (1857). Prima editio Io. Chr. Iahnii, cui multum Virgilius, multum ego debeo, aliquot annis ante meam in manus studiosorum venerat.

Vossii Thielique vestigia maxime pressit Theodorus Ladewig, nec me vellem saepius ab his discessisse, quam oportuit, in superioribus editionibus. Ipse quae melius exposuit, quam ceteri, lubens in meas chartulas derivavi, nec id

eum indigne laturum cum alias ob causas confido, tum quod, quae mea erant, si ipsi probarentur, in suam editionem transtulit, speroque etiam in hac mea tertia editione inventurum, quibus vel ad emendandam vel ad locupletandam suam uti possit.

Parum mihi temporis a festinante typographo datur ad praefandum nec otium relinquitur ad habendum multis viris doctissimis meritum honorem, qui in singulis rebus verbisque enucleandis feliciter elaboraverunt. Itaque et his omnibus gratias ago debitas, et potissimum iis, qui, quae ediderunt, mihi mittere benigne voluerunt, C. H. Muellero, Laur. Lerschio, Io. Freudenbergio, Io. Siebelisio, Theod. Ladewigio, C. Fr. Ameisio, qui et in censura secundae editionis Iahnii Annalibus inserta et in commentatione scholastica ao. 1851 ed. multa egregie disseruit, tum A. Haeckermannno, denique R. Dietschio, cuius *Theologumena Vergikiana* lumen adhibuerunt rebus obscurissimis. Ceterum si quid praeteritum est in hac editione commode ab aliis disputatum, nolim id mihi vitio verti; sunt enim nonnulli ex hoc genere libelli, quos nancisci non potui.

Neque hic sua laude defraudandi sunt physici clarissimi H. G. L. Reichenbach, Dresdanus, cum eruditissimo filio, professore Lipsiensi, et G. F. H. Küchenmeister, nunc item Dresdanus, qui suae doctrinae copiam mihi fecerunt in rebus quibusdam ad ipsorum artem spectantibus.

Restat, ut paucis commemorem, quid praestitum sit in hac tertia editione. Qui vel unam alteramque paginam commentariorum inspicere voluerit, facile animadvertet et emendatiores multo esse, quam antea, et auctiores. Etsi brevitati maxime studendum mihi censueram, tamen et exemplo et monitu aliorum motus multa, quae in superioribus editionibus desiderabantur, addenda duxi, multa, quae paucis attigeram, copiosius tractanda; quo certe id me consecutum esse spero, ut mihi non verendum

sit, ne diligentia mea desideretur. Quae protuli nova, gratum mihi erit, si viris doctis non displicuerint; ut vera sint et recta, quae scripsi, sedulo operam dedi. Aeneidem magistrorum maxime gratia, ut facilius decernere possint, quas partes in scholis potius narrandas (I. A. Ernesti exemplo Praefat. ad Ovid. a Fischero ed. p. XIII sqq.) quam enarrandas sibi sumant, in minutas quasdam particulas dispescui. Quid aptum, venustum, egregium quoque loco sit aut contra, explicare ut pro modulo talis editionis saepe longum est, ita vel iudicio legentis vel magistri vivae voci relinquendum; idem censet G. Schrader in Mützellii Annalibus rei gymnasiasticae 1853 p. 723; quare meum de eiusmodi rebus iudicium raro interposui, idque quam fieri potuit verbis paucissimis. Interpunctionis omnis ratio duplex est, vel ea, quam cuiusque linguae ingenium commendat, vel ea, quae tamquam imago est et vicaria recitationis. Ut illa non sine damno sententiae pervertitur, ita haec non caret proprio quodam commodo; atque ut illa adolescentulis legentibus variam obicit difficultatem moramque, ita haec, tamquam audias aliquem scite recitantem, discreta distinguendo, coniuncta copulando efficit, ut sensus facilius se aperiant; illa rariores admittit interpunctiones, haec crebriores postulat. Sed haec indicasse hoc loco sufficit, latius exponere non est operae; gaudebo, si eam viam tenuisse visus ero, quae tali, qualis haec est, editioni maxime conveniat. Nec segreganda fuit a meo consilio res critica; quamquam, quae huc pertinent quaestiones, alii tempori alique loco reservandae erunt, nec poterunt ante absolutam editionem ab Ottone Ribbeckio inchoatam ex omni parte absolvi. Interim providi, quantum potui, ut sua Virgilio integritas constaret; ac ne nunc quidem meae recensiois paenitet. Mauricii Hauptii opera Virgilio navata, quae omnibus grata esse debuit, non potuit mihi non esse gratissima. Multa in novam disceptationem vocavi in *Lectionibus Vergilianis* Philologo ab E. de Leutsch edito insertis Supplement. Vol. I. fasc. 3,

ubi (p. 314) etiam *Hic* G. 3, 202 defendi, quod in hac editione perperam in *Hinc* mutavi.\*) — Denique huic editioni indicem rerum verborumque in commentariis explicatorum adieci, in hac quoque re ea brevitate usus, quae hanc appendicem non sineret in magnum corpus crescere.

His ita actis neminem spero tam iniquum fore, qui me id fideliter egisse neget, ut haec tertia superioribus multo evaderet praestabilior; et tamen quando sat Troiae Priamoque datum esse gloriabimur?

Scr. Dresdae mense Iunio 1861.

---

\*) Cum commentarios meos iam typographo Lipsiensi tradidissem, misi, dum operae exercentur, nonnihil supplementorum; hoc modo factum est, ut iis, quae scripseram Aen. 6, 585, adversentur, quae statim subsequuntur. Itaque priora illa „dum interdum ... obsequimur“ sublata malim. — Aen. 1, 3 sq. quae scripsi „dum conderet ... 800,“ aut omnia deleantur, aut certe haec „G. 4, 457“ auctore Eman. Hofmanno „*Die Construction der lateinischen Zeitpartikeln*“ pag. penult., quo libello res multa variaque cum contentione agitatae feliciter compositae videntur. — Ad Aen. 5, 620: *Mari* nomen nunc a me restitutum est Aen. 9, 685. — Aen. 8, 108 *tacitis* imprudens reliqui pro *tacitos*; hoc ipsum tacere insidiosum videri poterat. — Aen. 2, 430 tollenda est notula, item Aen. 12, 273 verba „qua — 54.“



EX EPISTOLA

AD VIRUM SUMME REVERENDUM

HENR. CAR. ABR. EICHSTAEDT

PRIMAE EDITIONI PRAEMISSA.

Nosti, VIR PRAESTANTISSIME, dudum a me parari editionem carminum Virgilii talem, qualem maxime desiderare videantur ii, qui aut primum ad ea legenda accedant, aut, postquam pueri in scholis particulam aliquam cognoverint, egressi ea aetate, deficiente ad volvendos ampliores commentarios otio, perpetua celerique lectione eos libros complecti cupiant. Itaque primum brevitati maxime studendum putavi. Huius autem brevitatis duplex est ratio, quarum altera in verbis atque oratione cernitur, altera in certo quodam modo interpretationis definiendo. De hoc primum dicam. Nihil putavi mihi illustrandum esse, quod, qui leget ea carmina, modo ne sit nimis a scientia aut ingenii sollertia destitutus, ipse expedire posse mihi videretur. Omnino enim illud teneri velim, non ignavis atque inertibus me scripsisse, sed iis, qui et velint et possint aliquid e lectione Virgilii proficere. Primum autem officium interpretis hoc esse consentiunt omnes, ut et rerum et verborum obscuritas, si qua est, tollatur. Itaque et eas res, quas aliquammultos ex eo, quod animo finxi, genere lectorum ignorare suspicarer, enucleandas censui, et ea verba enodanda mihi sumsi, quorum sententia paulo esset impeditior. Quod si quis haerebit, ubi tacui, eum iubeo a lexico petere auxilium; quamquam non pauca, quae lexici ope inveniri possunt, non iudicavi mihi praetermittenda; si viderentur quaerentem diutius esse remoratura. Sed qui veteres scriptores accurate legere sibi proposuerit (ac debet hoc sibi quisque proponere, qui operae pretium facere et cum fructu in ea re versari vult), praeter cuiusque verbi notitiam cognitae habeat necesse est leges grammaticas. Ad hanc igitur quoque partem explanandam laborem meum mihi dirigendum esse statui, verum non ita, ut communia et vulgaria persequeretur, tamquam qui poetam non potius sua quam grammaticas causa tractandum existimarem, sed ut, quae ad ipsum poetam recte intelligendum etiam iis, qui non omnino rudes essent in hac ratione, necessaria viderentur, ea dumtaxat exponerem. Ac neque hac in re, neque

in ceteris relegavi lēctores ad libros magna ex parte sibi ignotos; nullos omnino laudavi, nisi ipsos scriptores veteres Graecos ac Latinos, eorumquē ipsa verba, ubi opus videretur, posui, maxime quorum libros non existimarem in omnium manibus esse. Sed nihil addo amplius de hac parte mei instituti, cum, quae possum addere, facile videat quisvis lector non plane imperitus.

Ad orationem ut veniam, in ea quoque, ut paulo ante significavi, maxime secutus sum brevitatem, sed eam, quae non esset a perspicuitate seiuncta; ut nec deesset, quod iure desideraretur, nec redundaret quidquam, sedulo curavi. Praeterea usus sum, ubicumque fieri potuit, notis communibusque verbis. Illud etiam operam dedi, ut recta ubique esset et pura oratio; non abhorruui tamen, ipsius brevitatē causa, ab eiusmodi verbis vocabulisque, quae, si non proba, tamen grammaticorum usu trita sunt.

Et qui legent hos commentarios, fortasse opinabuntur nihil potuisse scribi facilius, et maius prope in ea re manus ac digitorum fuisse, quam mentis ingeniiue negotium. Utinam vero ita credant! argumento id mihi fuerit, non male cessisse, quam suscepi, operam. Sed dicam, quod sentio: malo equidem librum aliquem veterem in usum doctiorum illustrare, quam talem, qualis haec est, editionem parare. IPSE non ignoras, VIR AMICISSIME, quanta temporis, quanta laboris impensa mihi constiterit tenuissimus hic libellus. Nam plerisque fere locis, antequam ullam litterulam chartae mandarem, cogitandum erat, aut videreturne omnino opus esse aliqua explicatione, aut quid potissimum dicerem, aut quam idem et breviter et plane apteque exprimerem; quae cogitatio fieri non potuit quin multo plus temporis absumeret, quam ipsa scriptio. Quare qui vere recteque de hac editione iudicare voluerit, ubique debebit quaerere, quae mihi aut dicendi aliquid aut tacendi causae fuisse videantur. Sed cum varia sit doctrina nec idem ingenium eorum, qui me duce Virgilium cognoscere cupient, erit et qui saepius haereat et qui facilius mentem poetae perspiciat. Illorum, qui fortasse plures erunt, aequum erat me potissimum rationem ducere, his, qui aut plus valent ingenio aut paratiores sunt a doctrina, auctor sum, ut, si, quae legerint, sua sponte intellexerint, ne inspiciant quidem notas nec requirant ducem, nisi ubi periculum esse senserint, ne destituti duce aberrant a vero.

Textum, quem vocant, exhibui fere talem, qualis est in maiore editione, a quo cum ceteris in rebus raro mihi discedendum putarem, illud tamen laboravi, ut iam aequabilior et constantior esset verborum scribendorum ratio, quam orthographiam appellant. Atque etsi verecundatus sum omnia revocare ad antiquam in hoc genere consuetudinem, restituenda tamen visa sunt ea, ad quae neminem fore existimarem qui magnopere offenderet. Participiorum et Adiectivorum teritiae declinationis, non item Substantivorum omnium, Accusativos in ...is terminavi. Indicem verborum aliter, ac vulgo fit, scriptorum infra adiiciam. Causas harum mutationum qui cupit cognoscere, aut

ex quinto Volumine maioris editionis, quod etiam separatim venditur\*), petet, aut, si utetur idoneo magistro, ab eo quaeret. Erit autem, qui me reprehendat, quod ipse in commentariis non ubique posuerim easdem, quas in textu, verborum formas. Factum hoc est eo consilio, ut, si qua paulo inusitatiora videri possent, ea commutarem cum tritis et usu receptis\*\*).

Nec in interpungenda oratione ex omni parte mihi satisfeci; gratum mihi erit, si satisfecero iis, quorum in usum adornata est haec editio. Non libet singula persequi; illud admonere non fuerit supervacaneum, tantum me in hac quoque re perspicuitati tribuisse, ut aliquando non curarem constantiam.

Criticis quaestionibus nihil hic loci relictum erat. Itaque satis habui commemorare quasdam insigniores lectionum, quas vocant, varietates, quarum rationes, si visum fuerit, aut ipsi lectores ingenii exercendi causa disceptent, aut a magistris sciscitentur, aut in maiore editione expositas introspiciant. Notavi has varietates adiecto nomine *Alii*, puta *legunt*.

In hac igitur editione, VIR EXCELLENTISSIME, solas interpretis partes suscipiendas duxi, idque munus mihi videor ita administrasse, ut nullam difficultatem, quae multae sunt et magnae, subterfugerim. Non pauca hic videbis emendata, quae in maiore editione deliqueram, complura explicata, quae in illa neglecta erant. Quo factum est, ut haec editio pro Supplemento maioris haberi ipsisque etiam magistris usui esse possit.

---

\*) Publi Vergili Maronis Carmina ad pristinam Orthographiam revocata ed. Ph. Wagner. Accedit Orthographia Vergiliana. Lips. 1841.

\*\*) Vehementer autem probro, quod Viri Doctissimi, postquam *Vergilium*, non *Virgilium*, audisse hunc poetam ostendi, illa nominis huius forma uti coeperunt; ipse in hac quidem editione uti non sum ausus, circumspecto prudentissimi Redemptoris iudicio obsecutus. Ceterum probabili ratione ductus Chr. Guil. Glück („Die bei C. Iulius Caesar vorkommenden Celtischen Namen. München. 1857.“ pag. 132) nominis Vergiliani originem repetit a Celtico vocabulo *vergo*, quod Germanice dicitur *Werk*, Latine *opus*; quare Vergilius dictus videbitur, qui opus rusticum facit.

# PROLEGOMENA

## DE VITA CARMINIBUSQUE VIRGILII.

§. 1. De vita Virgilii nec multa tradita sunt, nec ex omni parte certa. Nimirum accidit Virgilio idem, quod plerisque, qui apud Graecos Romanosque vel rerum gestarum gloria vel litterarum suarum monumentis clari facti sunt. Non multum illi veteres curabant suam cuiusque vitam resque domesticas; quam quisque in commune utilitatem attulisset, quaerebant; cetera ad se aut nihil aut parum attinere arbitrabantur; unde factum est, ut vitas singulorum hominum scriptitare non ante sublatam publicam libertatem instituerint.

Natus est P. Virgilius Maro in pago, qui Andes dictus, anno p. u. c. 684 Idib. Octobr. Is pagus (hodie, ut creditur, Pietola) non longe distabat a Mantua; quare fuerunt, qui hunc poetam appellarent Mantuanum. Humili loco ortus patrem habuit Virgilium Maronem, colonum Andinum (figulum quidam vel mercenarium fuisse dicunt), matrem Maïam vel Pollam. Pater erat ita a re familiari instructus, ut filium primum Cremonam, deinde Mediolanum, illas Insubrium quasi Athenas, discendi causa deduceret. Postea, sumpta toga virili, Virgilius Neapolim se contulit ibique a Parthenio poeta et grammatico, Graeco homine, eruditus est; hinc Romam venit, ubi se in Syronis, philosophi Epicurei, disciplinam traderet. Putabimus igitur Virgilium omnibus, quibus tum iuventus Romana impertiri solebat, liberalibus artibus imbutum fuisse, quo pertinent etiam mathematica et physica. Erant autem veteres et Graeci et Romani in ea opinione, ut bonum poetam plurima scire oportere existimarent; nec potuerunt aliter statuere, qui Musas ipsas, quarum nomine humanitatem ac doctrinam contineri scribit Cicero Tusc. 5, 23, *πολυμαθεστάτας* esse nossent.

Cum revertisset ex Urbe Virgilius, cum aliis, ut videtur, studiis, tum rei rusticae dedit operam et poesi. Has ad res ut eum sua natura rapiebat, ita ratio valetudinis, infirmæ fere atque inconstantis, abstraherat a gerenda sive domi sive foris republica. Primam sibi famam peperisse videtur eo carmine, quod Culex inscriptum erat, scripto anno 709 vel 710; quod quo plus laudatur a veteribus,

eo minus credere licet Virgillii esse miserum illud carmen, quod adhuc nomen Culicis prae se fert. Praeterea tribuuntur a Grammaticis Virgilio Priapeia, Epigrammata, Moretum, Catalecta, Dirae, Ciris, Copa, Aetna, quae si essent omnia ab hoc poeta profecta, certe ex parte his proximisque annis scripta videri possent; sed Moretum et Copa etsi plane digna sunt talis poetae ingenio illoque, talium elegantiarum parente, saeculo, tamen a Virgilio videntur abiudicanda; cetera quoque, praeter partem Catalectorum, iniuria pro Virgilianis venditantur. Anno 712—716 Virgilius scripsit pastoricia carmina, Bucolica; nam ita ab ipso poeta nuncupata esse pro certo haberi potest; \*) postea Eclogae vocari coeptae sunt, quo nomine significabantur carmina minora varii argumenti. Inciderunt hi anni in illos motus, qui tum Italiam concusserunt. Quae eo tempore fuerit poetae fortuna, his ipsis carminibus relatum legimus; ac ne bis eadem mihi dicenda sint, remitto lectorem ad prooemia singulis praemissa, in quibus quandam quasi historiam istorum temporum contextam invenies, modo illud teneas, non eo, quo nunc collocata sunt, ordine ea carmina scripta esse, sed illo, qui indicatus est ad Ecl. I. Partim his carminibus, partim fortasse etiam ante editis effectum est, ut Virgilius se in amicitiam ac familiaritatem clarorum potentiumque virorum insinuaret, ut C. Asinii Pollionis (v. Prooem. ad Ecl. I. II. IV. VIII.), boni et oratoris et poetae et historici et imperatoris, Alfeni Varii (v. Prooem. ad Ecl. VI.), poetarum Cornelii Galli (Ecl. X.), L. Varii atque Horatii, denique Maecenatis, qui plurimum apud Octavianum poterat, ipsiusque etiam Octaviani. Annis 717—724, ut aiunt Grammatici, aut, si ipsi Virgilio (Ge. IV, 559 sqq.) credimus, annis 723—725 scripta sunt Georgica, sive carmen de re rustica. Post aggressus est epicum carmen, Aeneidem, in quod annos impendit undecim, 725—735, ita tamen, ut complura in eo poemate emendanda, limanda, expolienda sibi relinqueret. „Anno aetatis quinquagesimo secundo, ait Donatus Vit. Virgil. § 51, ut ultimam manum Aeneidi imponeret, statuit in Graeciam et Asiam decedere triennioque continuo omnem operam limationi dare, ut reliqua vita tantum philosophiae vacaret. Sed cum ingressus iter Athenis occurrisset Augusto ab Oriente Romam revertenti, una cum eo redire statuit. Ac cum Megara, vicinum Athenis oppidum, visendi gratia peteret, languorem nactus est, quem non intermissa navigatio auxit ita, ut gravior in dies tandem Brundisium adventarit, ubi diebus paucis obiit“ anno 735 a. d. X. Kal. Octobr.; sepultus est ad viam Puteolanam prope Neapolim.

§. 2. Insignis dicitur in Virgilio fuisse lenitas, mansuetudo, pudor candorque pectoris. Ingenio fuit acri sollertique, inprimis ad narrandas describendasque res apto;—animo ut ad magna magno ore

\*) Servius in prooemio Georgicis praemisso: „cuius [libri Hesiodici] titulum transferre noluit, sicut Bucolicorum [a Theocrito] transtulit“ Virgilius.

sonanda forti, ita molli ad teneriores affectus et facile concipiendos et feliciter exprimendos \*). Sermonis tanta usus est copia, varietate, elegantia, gravitate, ut nullus poeta Romanus hac ex parte adaequaverit Virgilium, nedum superaverit. Itaque non est mirum, quod Itali maxime et Francogalli, his virtutibus Virgilianae dictionis inprimis delectati, hunc poetam omnibus poetis praetulerunt. Similiter olim vulgo Germani. Sed ex quo nostri homines ad Graecarum litterarum studia toto animo incubuerunt, fastidiri a multis ac prope contemni coeptus est Virgilius tamquam purus putus, ut aiunt, neque is optimus, imitator Graecorum. In tanta igitur opinionum discrepantia dispiciamus primum aliquam rationem necesse est, ad quam nostrum iudicium dirigamus. Plurimis veterum scriptorum, eorumque maxime idoneorum, testimoniis compertum est ab ipsis Romanis Virgilium principem Latinorum poetarum habitum esse. Itaque, si aequi volumus esse iudices, non tam illud in ea causa quaeremus, quid nobis placeat, quam quid placuerit Romanis. Romanum induat animum sensumque oportet, qui Virgilium recte legere iustaque aestimatione dignari decreverit.

Vita Romanorum principio fere in negotiis ad rem rusticam, forensem, senatoriam, bellicam spectantibus continebatur; artes ad doctrinam politiolemque humanitatem pertinentes negligebantur, ad quas tum demum otium suppetere coepit, cum Italia victa subactaque hostes de imperio cum Romanis certantes fracti prostratique sunt. Quamquam autem non deerat ingenium Romanis ad has quoque complectendas, tamen ita eorum animos suarum rerum, maxime imperii, cura tenebat, ut nihil ea potius haberent. Itaque cum artes litterasque Graecorum cognoscerent, has sibi in loco grati quidem ac iucundi, sed non necessarij, ornamenti ponendas censuerunt, quaeque in eo genere a Graecis iam parata essent, ea, quemadmodum reliquam praedam, in suum usum transferenda existimarunt. Coeperunt igitur Graecorum libros latine vertere aut imitando exprimere. A rudibus principiis profecti paulatim fingere et expolire orationem omnemque sermonem instituerunt. Nam ipsius orationis cum multus apud eos esset usus in republica magnaue in omni negotio vis, ad hanc excolendam, ornandam varieque locupletandam omne studium conferendum putarunt. Atque ita hoc consecuti sunt, ut, quae a Graecis sumpsissent, re quidem essent peregrina, verbis autem et sententiis tota latina et domestica esse viderentur; idque diu arbitrabantur satis esse ad laudem boni scriptoris; quamquam fieri non potuit, quin existerent, qui etiam res domi natas persequerentur et ad similitudinem Graecorum exigerent. Ac de Homeri Theocritique imitatione, quali usus sit Virgilius, infra singillatim dicetur. Sed ne in posterum iustis Virgilij laudibus officiat comparatio cum Theocrito atque Homero, imitatus quidem ille

---

\*) Copiosius de ingenio moribusque Virgilii nuper exposuit Sainte-Beuve, *Moniteur Universel* 1855 no. 351. 365. et 1856 no. 14. 28. 42. 49. 63. 77.

est utrumque, contendere certe cum iis noluit, ac ne id voluisse videretur, eo cavit, quod (etsi Orpheum et Musaeum libro Aeneidos sexto cum multo verborum honore commemoravit) illorum ne nomina quidem in carminibus suis usquam posuit, Ascræum carmen Georgica sua, prope nimis modeste, appellare contentus G. 2, 176.

§. 3. Maximas res antiquissimis temporibus gesserant Graeci, celebratas illas a magnis epicis poetis. Idem populus cum natura ad discendum quaerendumque esset factus, mature delectabatur semperque delectatus est didacticis carminibus. Cum autem divina virtute ac fortitudine libertatem suam a barbaris defendissent, extulit sese tragœdia, quae quasi in lucem vitamque restitueret heroas illos, quorum posteros se esse Graeci iam non solum verbis ferebant, sed etiam factis probant. Sed idem saeculum (quintum a. Ch. n.), quod res Graecorum ab omni parte viderat florentissimas, primas peperit causas magnae, quae insecuta est, conversionis. Nocebat ipsa securitas tutumque otium; tum mercatura Graecos, inprimis Athenienses, locupletaverat; ex divitiis nata luxuria, e luxuria licentia et morum corruptela, ex hac amissio libertatis; ea autem sublata exaruit uberrima illa vena ingenii, ex qua, tamquam ex inexhausto fonte, profluxerant illa divinitus scripta, quae omnibus saeculis admirationi fuerunt. Eo tempore longe inter aequales suos excellens prodiit Theocritus Syracusanus, qui floruit saeculo III. a. Chr. nat., ultimus e numero magnorum poetarum Graeciae. Is cum cetera carminum argumenta a superioribus poetis occupata videret, ipse autem ruris amoenitatibus ac pastoriciae vitae iucunditate inprimis delectaretur, carmen pastorale, antea inconditum et agreste, in artis formam redegit atque ita perfecit, ut neminem invenerit, qui cum ipso comparari posset; adeo ille veram vitam, verum sermonem, veros mores pastorum imitando effinxit\*). Theocriti exemplum secutus Virgilius primus Romanorum bucolica scribere instituit, sed, ut supra dictum est §. 2, non ita, ut in certamen laudis cum illo venire in animum induxerit. Satis habuit, pauca ex Theocrito integra imitando exprimere; formam magis quamdam carminis bucolici, quam argumentum, ab eo petiit. Pleraque nec imitationis causa, nec quod hoc genus inprimis amaret, scripsit Virgilius, iussus, ut ait ipse Ecl. 8, 11 sq., ab Asinio Pollione, sed quia, cum res moneret, ut se suasque rationes commendaret aut gratias ageret amico alicui potenti, optime hoc ita fieri posse vidit, si ipse, rusticanus homo, qua erat modestia, tenuem postoris personam

\*) Quae scripseram hoc loco in secunda editione, iis proluit quodammodo A. F. Naekius Opusc. Vol. I. p. 162: „Has vitae pastoriciae descriptiones non ad priscorum hominum ingenium sensumque factas, sed aevo proprias esse in peiorem partem converso luxuriaque diffluenti, cum homines saepe aliquo abundantiae voluptatisque taedio capti aliunde imaginem simplicitatis revocare et repraesentare sibi eoque titillare suos animos student, et alii dudum, si recte memini, senserunt et ego ita persuasum habeo, vix ut potuisse ante Theocriti saeculum excogitari talem poesin putem.“

susciperet, nec desiderantis multa nec nimis magna petentis. Hinc nata est illa allegoria in his Virgilii carminibus, a multis paulo iniquius vituperata; hinc illud quoque factum, id quod item multi iniuria, ut opinor, reprehendant, ut multo tersior ornatiorque, a nativa illa pastoricii carminis simplicitate remotior, etiam doctior interdum videatur Virgilius, quam Theocritus. Tantum abest autem, ut omnia a Virgilio scripta, quia sint scripta a Virgilio, plena manu laudanda indicem, ut facile largiar accidere his carminibus, quod solet accidere toti huic generi certis temporibus hominibusque in propria poetae causa tributo, ut iis maxime placeant, quorum aliquo modo interest ut scripta sint, minus placeant iis, qui ab his temporibus remoti sunt aut quorum alia est vita, alii mores, aliae rationes. Quae cum ita sint, aliud apparet genus esse bucolicorum Theocriti, aliud Virgilii; tertium invenit Sal. Gessner, popularis noster, pariter ut Virgilius iniquiores censores expertus. Ac de Gessnero quidem verissima mihi videntur quae pronuntiavit A. Th. H. Fritzsche Theocr. a se ed. p. 19 et 20, quae nolim a iuvenibus nostris, qui in his studiis versantur, praeteriri ac negligi; quod quidem ne fiat, ita, quantum ego possum, cavebo, ut ipsa verba viri praestantissimi subiiciam: „Nennen wir ihn (Gessner) immerhin den Dichter des idealisirten Naturlebens, und preisen den glücklich, der noch die geistige Unschuld hat, sich daran zu laben. Ja kehrt die Zeit wieder, wo die, welche Gebildete sein wollen, die Alten wieder lesen mit der Absicht, in welcher Melanchthon sie las, nemlich um sich zu bessern und ihren Geschmack zu veredeln — und sie wird wieder kommen — so wird der klassische Werth der jetzt bespöttelten Dichtungen auch wieder anerkannt werden und das Entzücken sich erneuern, mit welchem die Väter unsrer Väter sprachen: ja, Gessners Idyllen sind doch schön!“ Sed ad Virgilii bucolica ut redeam, id quidem iam nemo est qui neget, durum et horridum prae caeteris sermonem in his carminibus primum commutatum esse cum molli cultoque, asperos numeros cum lenibus vel potius cum talibus, qui ipsis sententiis optime responderent; nec desunt, quae commode inventa et tractata sint, quae hominum, morum, rerum varietate delectent suaeque suavitate ac lepore animum alliciant. Quare ut Georgicis et Aeneidi, sic his quoque carminibus aeternitatem auguratur Ovidius:

Tityrus ac segetes Aeneidae arma legentur,  
Roma triumphati dum caput orbis erit.

Ipse tamen Virgilius de hac operae suae parte ita modeste loquitur, ut iuvenilem quandam audaciam excuset G. 4, 565 sq.

§. 4. Ad Georgica scribenda poetam et studium ipsius rei quae incunditas invitavit, et auctoritas Maecenatis (Ge. 3, 41), et otium pace confirmatum, fortasse etiam neglecta inter bella civilia omninoque pristino honore destituta cultura agrorum Italiae. Rem ipsam, quam hoc carmine persecutus est, si spectas, non hoc agendum est didactico



poetae (si poetae nomen retinere vult, non nauseam creare legentibus), ut omnia complectatur, quaecumque in ea, quam explicaturus est, arte continentur, piaculumque fecisse censeatur, si quam vel minimam partem transierit; debet is summas rerum attingere eaque potissimum ex ceteris seligere, quae maxime admittunt ornatum, alia leviter perstringere, quaedam a poetica dictione abhorrentia omittere. Quadripartita est totius operis distributio, resque monebat ipsa, ut primus locus agrorum, secundus arborum culturae daretur, tertius rei pecuariae, quartus apiariae. Ut autem in deligendis rebus elegantissimo iudicio usus est Virgilius, ita plane divinus est in exornandia. Quod eo maioris fuit ingenii, quo tenuiora atque exiliora sunt pleraque ad rem rusticam pertinentia. Id ipsum cum sentiret Virgilius, ne languescerent studia legentium, hoc instituit, ut praeclaris quibusdam episodiis distingueret hoc carmen eoque fessum legendo animum quasi reficeret. Vultis optima quaeque et splendidissima hic a me percenseri? Nihil non nitet in hoc carmine, omnia sunt summo ingenio digna. Videritis ipsi, num quid in hoc genere perfectius aut esse aut cogitari possit. Longus fui, cum praefabar bucolicis carminibus; quo breviori mihi esse hic licuit; nemo hic melius quam poeta suam ipse causam tuebitur. Sed antequam ad alia progrediamur, restat, de quo dicatur, nodus ad expediendum difficillimus. Exordium libri tertii hoc est „*Te quoque, magna Pales, et te memorande canemus Pastor ab Amphryso, vos, silvae amnesque Lycæi.*“ Poeta postquam his binis versibus declaravit, de quo scribere sibi proposuerit, repente deflectit ad rem ab eo proposito prorsus abhorrentem: „*Cetera, inquit, quas vacuas tenuissent carmina mentes, Omnia iam volgata: quis aut Eurysthea durum, Aut inlaudati nescit Busiridis aras?*“ etc. Quod quare fecisse videatur, haud ineptum fuerit quaerere. Primum autem velim attendas ad duos versus extremos superioris libri:

Sed nos immensum spatiis confecimus aequor,  
Et iam tempus equum fumantia solvere colla,

qui, nisi fallor, ita comparati sunt, ut poetam magis totum opus hic terminare voluisse censeas, quam partem tantum operis. Immensum aequor se confecisse ait tempusque esse finem labori facere. Ita qui scribit, videtur indicare exactum esse infinitum illum, quem susceperit, laborem; nihil iam esse, quod velit addere; confecto negotio otium paratum esse. Id veteres quoque sensisse testis est Servius, qui ad l. II. vs. 541 ita scribit „Plerique volunt ideo eum dixisse hoc loco carmini georgico finem se esse facturum, quod duo sequentes libri pastorales sunt, non georgici;“ quam quidem causam etsi Servius ipse reiicit, repudiata etiam a Vossio vol. III. p. 461, tamen hoc manet, multos fuisse, qui finem Georgicon illis verbis indicari statuerent. Neque vero intelligitur, quare operam in uno libro haud ita longo consumptam poeta appellet immensam; feremus hoc, si ad duos minimum libros relatum fuerit; sic hic labor comparatus cum mino-

ribus, quae ante in lucem emisit, carminibus recte immensus dici potuit. Ex his consequitur Virgilium principio noluisse ultra primum et secundum librum procedere. Sed his ad finem perductis Maecenas ad alia poetam vocavit, et partem rei rusticae restare admonens et multa in mythis esse, ut labores Herculis, quae Romana poesis nondum attigerit. Sic demum intelligitur, quod praeterea intelligi vix potest, quomodo ea in hoc libro locum invenire potuerint, quae vs. 3—8 (*Cetera-Acer equis*) leguntur. Ergo hoc dicit Virgilius, nolle se materiam carminis a rebus dudum tractatis ducere, sed scribere, quae Graeci poetae intemptata reliquerint. Eius autem generis sunt ea, quae de re pecuaria et apiaria compositurus est. Itaque quae iam sequuntur *temptanda via est* usque ad vs. 45 non, ut quidam faciunt, in quibus Vossius\*), ad Aeneidos condendae referes consilium, sed ad propositum primis binis versibus indicatum, quod ipsi poetae multo plus difficultatis, quam libri superiores, habere visum est (*haud mollia iussa* Maecenatis vs. 41 appellat), simul vero ad suam gloriam efficacius esse et illustrius; nam primus Romanorum (consulto enim praetereo Lucilium) in argumento elaborare ausus est a Graecis poetis praetermisso; hinc „intacti saltus“ vs. 41; atque haec est illa, quam vs. 9 et 17 sibi promittit, victoria; hanc ab ipsa Graecia sibi, Romano homini, concessum unaque concelebratum iri confidit vs. 19 sq. Sed praeter ea, quae supra memoravimus, Maecenas etiam ut res Caesaris Octaviani carmine extolleret, hortatus erat, id quod ostendunt vs. 46—48, quibus versibus Aeneidem significari vix persuadebitur ei, qui *ardentes Caesaris pugnas* ad tale argumentum, quale in Aeneide persecutus est poeta, trahi posse negaverit. Ita qui loquitur, summam eius carminis ad laudes bellicas Caesaris redituram esse testatur; at in Aeneide, si exceperis, quae universe dicta sunt l. 1, 286 sqq., nihil eo pertinet praeter pugnam Actiacam l. 8, 675 sqq. adumbratam. Verum ut tamen aliquo modo voluntati Maecenatis Caesarisque honori statim satisfaceret, interposuit ea, quae vs. 13—39 comprehenduntur. Sed hic nova suboritur dubitatio, quam obicit tempus, quo scriptum videatur hoc exordium. Res ab omni parte pensitata non uno tempore omnia haec scripta esse evincit. Illud primum dubitari non potest, quin poeta, cum inchoaret hunc librum, nihil prius sibi faciendum existimaverit, quam ut propositum suum declararet; unde apparet aliquo modo, quando exarati sint versus primus et secundus. Cum hac propositi notatione coniungenda erat, quam hodie appellant, dedicatio libri; quem cum, ut ceteros, poeta Maecenati missurus esset, non licebat, quae ille hortatus erat (qua de re supra diximus) silentio praeterire. Illud quoque supra expositum est, quo vinculo haec particula (*Cetera-Acer equis*) colligata sit cum versibus subsequentibus. Ergo et primos versus 25 et vs. 40—48 uno eodemque tempore scriptos iudicabimus. Contra ipsarum rerum ratio indicat versus 26—39 non

\*) Apud Servium eius rei nec vola nec vestigium.

ante annum 724 atteri potuisse. Sed quamvis probabiliter haec, si per se spectaveris, disputata videantur, tamen iure opponetur huic opinioni exordium libri primi Georgicon, quo poeta non solum *bipos* priores libros, sed omnes quattuor complectitur. Paratum est, quod ad haec respondeamus. Cum iam non, ut prius instituerat poeta, duobus libris absolvisset Georgica, sed alteros duos adiecisset, non potuit facere, quin mutato, quod ad illos solos pertineret, exordio horum quoque mentionem faceret, qua in re, ut fit, accidit imprudenti, ut intactam relinqueret, quae et ipsa mutanda erat, clausulam libri secundi.

§. 5. Post Georgica coepit Virgilius, iussus a Caesare Octaviano, ut refert Servius, Aeneidem scribere. Facile credemus Caesarem Virgilio auctorem fuisse, ut carmen epicum componeret, cui rei fidem afferunt, quae legimus G. 3, 46 sqq. „Mox tamen ardentis accingar dicere pugnas Caesaris etc.“, quamquam ex his verbis hoc tantum recte colligitur, Virgilium morem gerere Caesari eiusque res gestas carmine epico persequi voluisse, Aeneides condendae consilium tum, cum ista scribebat, nondum videri cepisse. Summa huius poematis est adventus Aeneae cum parva suorum manu in Italiam, multis ille quidem magnisque impedimentis retardatus, et initia rei Romanae ab eodem posita. In quo quis non videt illud admiratione, quam omne carmen epicum excitare propositum habet, dignissimum esse, quod homo ex patria incensa profugus fatis ducentibus per immensa ignotaque maria vectus in alieno solo atque in terra a bellicosissimis hominibus habitata acerrimeque defensa novum regnum condit, idque aliquando omnium, quae umquam exstiterunt, maximum futurum maximeque diuturnum? Descripsit poeta hoc argumentum in duodecim libros. Primo libro Aeneas relictā, quo delatus fuerat, Sicilia petens Italiam foeda tempestate correptus aufertur ad Africae eam partem, qua tūm Karthaginem a Didone constitui finxit (si ipse finxit) poeta. Disiecta classe ibi opperiri, donec socios amissos reciperet, Didonisque auxilium ad eam rem implorare statuit. Dido benigne exceptum cum aliis ducibus classis Troianae epulis adhibet et, cum finis esset convivandi, iubet excidium Troiae fugaeque ipsorum fata exponere; id quod fit secundo tertioque libro. Sed Dido, dolo Veneris circumventa, amore Aeneae incenditur speratque illum sibi coniugem futurum; de eo amore funestoque exitu Didonis exponitur l. IV. Aeneas relictā Africa iterum ad Siciliam classem appellit, utitur ibi cum suis hospitio Acestae, Troiani hominis, eoque die, quo superiore anno funus duxerat patri Anchisae, parentat editque ludos funebres. Interim mulieres Troianae, dum solae sedent in litore, pertaesae itineris incendunt classem; perimuntur igne quattuor naves; iam Aeneas, mulieribus, senibus et quidquid invalidorum erat in castris, apud Acestam relictis, cum solo robore iuventutis pergit in Italiam; haec continentur l. V. Liber sextus haec habet: Accedit Aeneas ad eam partem Italiae, ubi posteriore tempore Cumae sunt conditae; Sibylla Cumana deducit eum ad inferos, quo

descendere pater eum iusserat, docetque omnem rationem istorum locorum; addit Anchises, quae illa praeterierat, idemque evolvit fata posterorum Aeneae absolvitque quandam quasi historiam imperii Romani. Ita aucto animo reversus Aeneas classe vehitur Caietam. Lib. VII.: Praetervectus insulam Circes tandem adfertur in Latium. Ibi regnum Laurenti tenebat Latinus, qui destitutus virili prole unicum habebat filiam, Laviniam, regni heredem futuram. Hanc sibi Turnus, iuvenis fortissimus, rex Rutulorum, populi Latini, in matrimonium petebat annuente matre virginis, patre abnuente, quia varia portenta et responsa vatum ipsiusque Fauni, avi Laviniae paterni, qui post mortem pro deo fatidico colebatur, vetuerant eam Latino homini nubere; externo regi reservandam esse. Interea Aeneas, cum certis signis cognosset venisse se eo, quo deorum iussu intendisset, castra fieri ad similitudinem urbis iubet, quam Troiam appellat; tum pacis causa legatos mittit ad Latinum, qui placide acceptos donis instruit Aeneaeque filiam suam in matrimonium promittit. Tum vero exardescit ira Turni ac Rutulorum; ipsi, qui Latino parebant, Latini rustici, infelici casu a Troianis offensi, arma capiunt adversus advenas. Postremo enumerantur copiae Turni cum suis ducibus. Lib. VIII.: Nocturno viso monitus Aeneas opem petit ab Euandro, qui ex Arcadia cum manu Arcadum advectus eo loco, quo postea Roma fuit, parvum regnum condiderat. Facile promittit Euander. Interim Venus impetrat a Vulcano, ut Aeneae in tantum bellum eunti arma faciat; in his inprimis fuit memorabilis clipeus, in quo maximae res a Romanis, ipso inprimis Augusto, gestae mira arte expressae erant. Lib. IX.: Dum abest Aeneas, Turnus accedit cum exercitu ad castra Troianorum; qui cum non procedant ad pugnam, classem conatur incendere; at singulae naves intercedente Cybele mutantur in singulas deas marinas. Nocte subsecuta dum consultant duces in castris relictis, quid agant aut quomodo Aeneam de tanto discrimine certiore faciant, ultro offert operam suam iuvenis Nisus cum amico Euryalo paene puero; promittunt se beneficio noctis per media Rutulorum castra evasuros ad arcessendum Aeneam. Collaudati a ducibus egrediuntur atque invitante ipsa opportunitate quam plurimos possunt hostes somno sopitos interficiunt. Quod cum bene successisset, incidunt in turmam equitum Latinorum nocturno itinere ad Turnum tendentium, a quibus, et fuga et pugna frustra tentata, interimuntur. Orto proximo die Turnus summa vi adoritur castra. Lib. X.: Vocato deorum concilio altercatio Veneris et Iunonis praeciditur ab Iove ita, ut vetet quemquam deorum alterutri parti in pugna adesse. Rutuli pergunt acerrime oppugnare castra. Interim Aeneas ab Euandro admonitus ad Tarchonem regem Etruscum se contulerat factoque cum eo foedere firmum Etruscorum exercitum mari Tyrrheno subvehebat; huius quoque recens agitur a poeta. Arcades equites duce Ballante, Euandri filio, terrestri itinere adventant. Iam venit ad manus. Varia editur pugna. Pallantem rem strenue gerentem interficit Turnus; pugnam ea re prope

inclinatam instaurat Aeneas, clausique castris qui fuerant Troiani eruptione facta urgent hostem. Interim Iuno Turnum, sollicita de eius vita, e pugna subducere decernit; fingit igitur inanem imaginem in similitudinem Aeneae; ea, instante Turno, coniecit se in navem Etruscam; quo cum secutus esset Turnus, abrumpit Iuno retinacula abactumque in altum restituit in patriam. Sustentat aciem interea fortitudine sua Mezentius, exsul Etruscus, ob crudelitatem regno pulsus; sed ab Aenea graviter vulneratus excedit proelio. Tum vero Aeneas fertur in Lausum, filium illius, praestantissimum iuvenem, unum patri solatium relictum; quo interfecto redit in pugnam Mezentius et ipse quoque ab Aenea confoditur. Lib. XI.: Tropaeum statuitur ab Aenea. Funus ducitur Pallanti; factisque induciis utrique suos, qui in pugna ceciderant, sepeliunt. Laurenti ingens pavor; accedunt responsa Diomedis, qui tum rex erat Arporum, in societatem armorum a Latinis vocati, bellum dissuadentia. Contrariis sententiis in concilio procerum certant Drances et Turnus. Sed allato nuntio de Aenea cum instructo exercitu adventante dirimitur consilium et ad arma discurritur. Turnus partitur omnem curam belli cum Camilla, regina Volscorum, fortissima virgine; ipse saltum propinquum insidet Aeneam insidiis excepturus; Camillam in campo hostibus occurrere iubet. Pugnatur acerrime; Camilla cum multa egregia facinora edidisset, dolo Arruntis interficitur. Tum effusa fuga Volsci Rutulique ad urbem feruntur. Ea res excitat etiam Turnum ex faucibus, quas obsederat, monetque, ut urbi succurrat. Sequitur Aeneas. Sed nox intercipit proelium. Lib. XII.: Turnus statuit ita bello finem facere, ut solus cum solo Aenea depugnet. Latinus ea causa sollemni ritu cum Aenea foedus peragit. Quod dum fit, Iuturna Nympha, soror Turni, sumta specie Camertis perturbat omnia, hastam in adversos Arcadas iaculata. Quo facto cum et Arcades et Laurentes procurrissent ad pugnandum, mox omnibus partibus manus conseruntur, ipse Aeneas vulneratur. Tum vero Turnus magnam edit stragem. Interea Aeneas divina ope sanatus quaerit Turnum toto campo; quem ubi non invenit, tum demum oblatum sibi quemque hostium obtruncat. Sed quo rem citius conficiat, ad ipsam urbem Laurentum ducit exercitum. Iam flammae inde relucet trepidusque nuntius venit ad Turnum, obsecrans, ne urbem perire sinat. Tum omni reliqua spe abiecta Turnus se ipse offert Aeneae ad decertandum. Interea Iuppiter maerentem Iunonem ita consolatur, ut genti Latinae cum Troianis commixtae et nomen et sermonem et mores mansuros integros polliceatur, sacra Troianorum sacris Latinorum accessura dicat. Ipso certamine vincitur Turnus et occiditur.

§. 6. Intelligitur vel ex his ita breviter decursis, quanta sit in hoc poemate et ubertas rerum et varietas, quamque apte haec omnia sint inter se coniuncta. Accedit copiosa, omnis generis luminibus distincta, in summo ornatu nusquam tumida, gravis et ad quamque rem accommodata oratio; denique tanta in ipsis versibus componendis ars, ut nihil aut mollius suaviusque aut fortius vehementiusque esse

possit versu Virgiliano. Itaque vel has ob causas non mirabimur valde placuisse Romanis hoc poema. Verum non illud solum, quod modo attigimus, intelligitur ex ea expositione, sed sponte etiam apparet, quanta sit rerum ab Homero tractatarum cum his similitudo. Ac de universa imitatione, quali et ceteri poetae Latini et ipse Virgilius usus sit, supra diximus. In Aeneide autem licet distinguere et necessariam quandam et voluntariam imitationem. Et illam quidem nemo debet esse ita iniquus ut reprehendat, hanc prudentissimus poeta ita videtur instituisse, ut eam certe popularibus suis probaverit. Proposuerat sibi Virgilius quodammodo totam populi Romani historiam perpetuo carmine complecti; nam dum scribit res ac fata Aeneae, scite interposuit variis locis (maxime l. 6, 756—883 et 9, 626—728) ea, quae a summis viris, alio alia aetate, gesta sunt; quae res uti non potuit non maxime grata esse Romanis, ita hanc habebat commoditatem, ut Iuliae gentis, maxime autem ipsius Octaviani gloria ei carmini intexi posset. Nam Italia diu misere vexata ac vastata victo ao. 723 Antonio sedatisque turbis omnibus ea temporum felicitate utebatur, ut Romani iacturam libertatis, quam amplius tueri non possent, aequo animo ferrent atque Octavianum, cui hanc tranquillitatem pacatumque rerum statum deberent, in astra laudibus tollerent et tamquam praesentem in terris deum colerent. Itaque Octavianus ab omnibus poetis, qui tum fuerunt, splendidissime ornatus est. Ubi autem virtus tanti viri populo commendari melius poterat, quam in eo carmine, quod totum ad praedicandam eius populi gloriam spectaret? At dices periculum esse, ne nostris pueris adölescentulisque id carmen legentibus videatur servitus commendari? Nihil est, quod ea causa trepides. Vides enim homines nostri saeculi liberrimos eosque, qui libertate dignissimos se praestiterunt, Anglos, plurimum illud lectitare atque ipsis, quae in eo proposita sunt, honestissimis exemplis alere spiritum illum verae ingenuaeque libertatis. Sed redeamus eo, unde defleximus. Tantam igitur rem cum animo concepisset Virgilius, neminem potuit invenire, cuius persona esset ad tale consilium exsequendum aptior, quam Aeneam, et primum rei Romanae conditorem, et virum iis virtutibus excellentem, quae in Romano homine maxime laudabiles viderentur, et ipsius gentis Iuliae, in quam a Divo Iulio Caesare adscitus erat Octavianus, auctorem. Fuerat autem Aeneas e numero ducum Troianorum adversus Graecos pugnantium; is eversa Troia profugit novamque patriam quaesivit, eam vero ipsam, cum pacis artibus non posset, armis obtinuit. Haec necessario magnam habent cum Homeri carminibus similitudinem, partim cum Iliade, partim cum Odyssea; itaque priores sex libri Aeneidos iure cum Odyssea, posteriores cum Iliade comparantur. Cum autem mores, instituta, genus pugnandi, ceteraque, quae maxime propria illius erant aetatis, ex Homero cognita essent, non potuit non in ea re Romanus poeta totus pendere e Graeco. Nam ut haec apud antiquissimos homines Italiae diversa fuerint (ac puto fuisse diversa), nulli tamen

exstiterant scriptores, qui, qualia fuissent, posteritati proderent; aut si quid ex eo genere ad eam propagatum esset, poterat id tantum Italis hominibus tribui, non Aeneae huiusque sociis. Itaque haec, quae plurima sunt atque maxima, et quaedam alia pertinent ad eam, quam diximus necessariam, imitationem. Alia posita vel sunt vel certe videri possunt in voluntaria. Huc fortasse multi referent crebras deorum intercessionem; sed quamquam Virgilium ea re minus feliciter (praeterquam l. XII.) usum esse concedo, quam Homerum, tamen, cum ea aetate, qua illae res actae sunt, deos saepe suam operam humanis rebus praesentes interponere vulgo crederent ipsiusque etiam Aeneae mater dea esset, non videtur interventu deorum carere potuisse poema Virgilii. Praetereo alia. Catalogum quoque copiarum Turni (l. VII. extr.) ex eo genere esse fortasse erunt qui opinentur; at ea enumeratio etsi simillima est alteri parti libri II. Iliadis, tamen, cum Virgilius primordia rei Romanae, quae maxime coniuncta erant cum prisco statu Latii, hoc carmine explicare statuisset, prope necessaria videri debet. Voluntaria imitatione includes cum alia multa, tum amorem Didonis l. IV., quem conferes cum amore Calypsus et Circes; ludos l. V. factos; descensum ad inferos l. VI.; Aeneae profectionem ad Euandrum l. VIII., qua effectum est, ut Troianorum fortuna in discrimen adduceretur, quemadmodum ira Achillem arcens a pugnando exitialis videbatur Graecis futura; tum arma Aeneae atque in his maxime clipeum operibus quibusdam insignem a Vulcano facta; porro consultationem ducum Troianorum nocturnam l. IX. Nisique cum Euryalo commune consilium simile nocturnae excursioni Diomedis atque Ulixis; fortasse etiam Turni multis rebus probatam, antequam cum eo congrediretur Aeneas, fortitudinem; imaginem Aeneae ab Iunone ad Turnum decipiendum effectam l. X., illi similem, qua decepit Diomedem Aeneae instantem Apollo; adde, si placet, altercationem Drancis et Turni l. XI.; denique foedus a Latino atque Aenea ante ineundum certamen singulare factum idemque vulnerato ex insidiis Aenea turbatum l. XII. Praeterea ea imitatio cernitur in multis partibus orationis; quis nescit, ut hoc unum afferam, plurimas comparationes ex Homero translatae? Denique etiam numeri versuum interdum ad similitudinem Homeri sunt compositi. Verum gravissimi erroris culpam sustineat, qui Virgilium unum esse existimet ex iis, quos his verbis ridet Horatius: „O imitatores, servum pecus!“ Nempe multa quidem ille mutuatus est ab Homero, sed ita, ut eadem novo aliquo modo eoque, qui Romanis maxime placere posset, tractaret multumque variaret. Compares velim particulam eorum, quae supra posui, cum Homericis, unde sumpta sunt, ac facile ita esse fatebere. Miramur iure divinam illam simplicitatem Homeri; tamen hanc si aemulari planeque exprimere voluisset Virgilius, profecto ea, quam abstulit, palma alii acutiori fuisset relinquenda. Quippe mores cum ipsa etiam oratione Homeri quidem tempore iidem fere fuerunt, qui Troicis temporibus; longe autem aliter sentiebant ac loquebantur

Romani eo, quo Virgilius erat, quam illo, quo Aeneas fuit, tempore, i. e. eo, quo ne fuerunt quidem ulli Romani. Mollior delicatiorque ab omni parte cultus Romanorum, urbanitas morum perpolitioque sermonis nihil iam ferebant durum, asperum, horridum; orationis erat ea et copia et elegantia, ut, cum Cicero omnes, qui soluto usi erant sermone, sua praestantia vicisset, non liceret poetae epicum genus tractanti inferiorem esse his virtutibus. Itaque vides Homeri simplicitatem a Virgilio cum ubere et copiosa, eademque et in rebus et in sentiis et in verbis elucente, exornatione commutatam esse atque adeo, si, quod omnes poetae volunt, placere suis vellet, commutari debuisset. Possunt de ea re multa dici; nobis hic satis est quasi digitum ad eam intendisse. Unum hoc adiicio: res quidem, quas attigit Virgilius, magna ex parte sunt alienae ac peregrinae; mens et oratio in toto carmine spirat Romana. Ergo qui id carmen recte leget, sentiet sibi accidere idem, quod accidit T. Livio historiam Romanam scribenti, ut suus sibi animus videatur fieri antiquus, i. e. gravitatis, fidei, constantiae, fortitudinis, pietatis illius antiquae plenus. Ac nescio, an id ipsum egerit Virgilius, ut degeneres Romanos pristinae laudis admoneret ad maiorumque virtutem exsuscitaret revocaretque. Vere enim dici potest hunc poetam esse praeceptorem et quasi speculum virtutum Romanarum, eundemque et ei, qui rempublicam capessere populumque dicendo flectere dandisque consiliis regere, et illi, qui omnino vitam sapienter instituere et cum gravitate ac dignitate degere velit, longe utilissimum.

§. 7. Accedebat alia res, quae Aeneidem Romanis commendaret. Explicantur enim in hoc carmine antiquissimae res Italiae multorumque origines morum institutorumque, etiam sacrorum atque gentium Romanarum. Haec omnia ad venerabilem illam vetustatem relata non potuerunt non ipsa multo venerabiliora et quasi augustiora videri, idque eo magis, quod videbant Virgilium peritissimum esse Romanae antiquitatis istasque res a vulgari scientia longe remotas studiosissime cognosse magnaue cum fide tradidisse. Perspexit nostro tempore hanc laudem Virgilii optime homo perspicacissimus, B. G. Niebuhr, quo nuper fortasse nemo fuit qui verius eruditiusque iudicaret de hoc poeta (Roem. Gesch. I. p. 218 sp. ed. tert., adde p. 112 not. 317.). Ita enim se res habet: magni homines magnorum hominum praestantiam et facillime vident et agnoscunt libentissime. Res igitur in Aeneide tractatae magna ex parte vetusta et pro vera a Romanis credita fama continebantur; hinc talia, quale *Fama est, Prisca fides facto, si rite audita recorder, Hunc genitum accipimus*, adde 5, 300—302; poetae opera versabatur fere in componendis illis atque exornandis. Dixi: magna ex parte; nam quis credat theatra, nautichias, et quae sunt his similia, iam prisca illa aetate fuisse instituta? Quae sunt qui parum scite a poeta in carmen suum illata dicant. Sed falluntur illi meo quidem iudicio; pertinent enim haec quoque ad illustrandam, quae postea fuit, magnificentiam rerum Ro-



manarum, qua illo tempore homines delectabantur. Denique nihil fere est magnum et memorabile gestum ab hoc populo, quod Virgilius non interposuerit huic carmini iisque, quibus solet omnia, luminibus verborum illuminaverit. Et mirabimur tantopere probatum fuisse Virgilium popularibus suis maximisque, quibus poterant, laudibus celebratum? Quid est igitur, quare idem nobis placeat parum? Immo agite, optimi iuvenes, intuemini libenter magnorum hominum magnique populi virtutes in illustri monumento positas, accensique talibus exemplis, huic tempori inprimis salubribus et necessariis, facite ea, quae et vobis et vestra patria digna sint quaeque ipsa simili praeconio aliquando condecorari mereantur! (Aen. 9, 451 sqq.)

At dicet aliquis, qui principes in Iliade et Aeneide personas inter se contulerit, longe meliorem esse causam Achillis, quam Aeneae; illum insigni iniuria affectum iure iratum fuisse Graecis, post autem occiso, quem aequae ac semet ipsum amasset, amico exarsisse iustissimo proptereaque implacabili odio adversus Hectorem, inimicissimum suum; ea ita esse comparata, ut nemo sit qui non probeat; contra Aeneam nulla re a quoquam offensum insonti Turno et sponsam et imperium Latii praereptum ire; durum id et execrabile videri. At non ita visum est Romanis, cavitque prudentissimus poeta, ne ita videri posset. Cum enim duabus maxime rebus ab initio niteretur res Romana, fortitudine et deorum religione, binique haberentur imperii conditores, Romulus, qui armis primo rem fundasset, et Numa, qui pietate eandem in perpetuum stabilisset, sapientissime fecit Virgilius, ut utriusque partes in uno Aenea coniunctas eumque exemplum omnis Romanae virtutis esse vellet et quasi archetypum. Itaque nulla sua cupiditate incensum, sed deorum voluntate actum facit venire in Italiam. Nam cum Troia consideret in cineres, non illud, quod plerumque fit in tali casu, potissimum Aeneas agendum sibi putavit, ut pretiosissimum quidque secum auferret, sed ut senem parentem deosque patrios flammis eriperet asportaretque. Hanc tantam pietatem dignam iudicantur dii, quam pro merito colerent, cumque esset in fatiis, ut regnum Troianum in Italia renascetur, iure Aeneae hunc honorem habuerunt, ut Troianos deosque a se servatos illuc deduceret, novum imperium conderet et sua sacra cum sacris indigenarum consociaret. Debitum erat Aeneae Latium, debita etiam, non erepta, Lavinia, etiam ante illi a Latino patre promissa, quam a Turno petitam sciret. Ita apparet, quare non aliquem pedibus celerem, πόδας ὠκύν, aut astutum et πολυμήχανον, aut flavum, ξανθόν, aut his similem maluerit poeta, sed pium potissimum effingere Aeneam. Ac fortasse non aberraverit a vero, qui etiam hoc sibi proposuisse Virgilium statuerit, ut Romanum populum, oblitum iam avitae virtutis, ad pristinam pietatem hoc carmine reduceret; quae res et ipsa non potuit non sapientissimo cuique ex eius popularibus vel maxime probari. Nunc vide, num Achillis Ulixisque personam a Virgilio in Aenea repraesentatam vel ipse malis vel Romani maluisse videantur?

§. 8. Quale igitur quamque egregium, ac prope dixerim divinum, Romanis videri hoc poema debuerit, ita iam manifestum esse arbitror, nihil ut sit, quod addam amplius, nisi hoc: nobis, si ea, qua par est, mente lectitabimus, idem non posse non admirabiliter placere. Itaque facile discedemus in Schilleri nostratis sententiam „Qui suae satisfecerit aetati homo egregius, eum satisfecisse omnium aetatum posteritati.“

Sed licet immortalem laudem consecuta sit Aeneis, tamen, ut iam supra indicatum est, imperfectam Virgilius reliquit; quod si nesciremus aliunde, ex multis semiplenis versibus colligeremus. Praeterea pauca sunt, quae mutaturum fuisse Virgilium suspiceris. Mandavit autem moriens poeta Tuccae et Vario, amicis suis, doctis hominibus, ut, quae vellent, researent, nihil ipsi adderent. Demsisse illi dicuntur prooemium quattuor versuum Aeneidi praemissum particulamque libri secundi, vs. 567—588.

Atque haec habui, quae Aeneidi potissimum praefanda ducerem. Exstiterunt autem nuper in Germania multi, qui spretis litteris Graecis Latinisque id unum spectandum censerent, ut patriis domesticisque litteris iuventus nostra erudiretur; sic enim eventurum, ut iam in moribus nostris omnia germana essent, nihil peregrini, nihil adventicii resideret; eas autem aiunt esse nostras litteras, ut antiquarum aliquo quasi subsidio nihil indigeamus. Omitto, quae praeterea contra eam opinionem dici possunt, eaque sunt plurima; unum hoc cogitari velim — non ab illis, quibus difficile est respiscere, sed ab iis, qui nova bona sic consecantur, ut antiqua non abiciant —: ita mox futurum esse, ut iis similes evadamus, quibus minime velimus. Nempe quidquid est incorruptae stirpis Germanicae, ita est comparatum, ut semina quaedam habeat omnium earum virtutum, quae maxime elucet in Graecis et Romanis. Quos duces si deseruerimus, ut iubent nostri Bruti atque Coclites, periculum erit, ne optima illa semina tamquam in agro inculto sparsa intereant ipsique propediem ita degeneremus, ut simii antiquorum Germanorum, non posteri esse videamur. Quod si quando tantis exsplendescemus virtutibus, quantas in illis populis admiramur maximas, tum licebit nostris bonis confisos impune negligere illorum litteras, quamquam, cum veteri proverbio similis gaudeat simili, nescio, an tum maiore etiam in honore apud nos futurae sint, quam quo umquam antea fuerunt.

§. 9. Restat, ut paucis dicamus de fontibus, ex quibus Virgilius res in Aeneide relatas derivavit; neque enim, ut iam supra diximus, existimandum est aut omnes aut plerasque ab ipso fictas esse. An vero Homerum suapte ingenio pleraque invenisse opinabere ac non potius sermonibus populi celebrata carmine exornasse? aut tantam apud populares suos auctoritatem adepturum fuisse, si non pro veris crederentur, quae ille prodidit memoriae? Atqui sciebat Virgilius tanto plus gratiae suum carmen habiturum, quo propius ad fidem historicam ac speciem quandam veritatis accederet. Felicius in ea

re fuit Homerus, qui ex copia praesenti et ad usum exposita sumeret, durior condicio Virgilio, cui materia ex variis veterrimorum auctorum monumentis priscaeque famaе obscuritate colligenda esset. Plurima autem in Aeneide fit mentio Troicarum rerum et Italicarum. Illas, Troicas, explicanti praeter Homerum praesto fuerunt cyclici poetae (totum orbem, *κύκλον*, earum rerum complexi, quae vel ad causas vel ad priora et ad extrema tempora belli Troiani, vel ad casus eorum pertinebant, qui huic bello interfuerant), ut Arctinus (*Ἀρκτινὸς* et *Ἰλίου πέρσις*), Lesches (*Ἰλιάς μικρά*), Agias (*Νόστοι*), qui non ita multo post Homerum fuerunt, tum Stesichorus, lyricus poeta (*Ἰλίου πέρσις*), porro etiam unus et alter fortasse e numero logographorum rerumque Sicularum scriptores, denique tragici et Graeci et qui illos expresserunt veteres Romani. (Adiungerem Callisthenis, comitis Alexandri M., bellum Troicum a Cicerone Ep. ad Fam. 5, 12, 2 commemoratum, nec me deterreret, quod idem Cicero Ep. ad Quintum fratrem 2, 13, 4 scribit „Callisthenes vulgare et notum negotium, quemadmodum aliquot Graeci locuti sunt,“ nisi verisimillimum videretur, quod coniecit Orellius Onomast. Cic. Vol. II. p. 119. Ciceronem scripsisse *Crisaeum*, quo spectat Athenaeus, ab ipso Or. laudatus, 13, 10). Antiquarum rerum Italicarum notitiam Virgilius hausit e Naevii primo bello Punico, Saturniis versibus (— ‘ ‘ — ‘ ‘ — | ‘ ‘ — ‘ ‘ —) scripto, ex Emii Annalibus\*) omninoque ex antiquissimis historiae Romanae monumentis, inprimis vero ex Catonis Originibus librisque variis multiplici doctrina refertis M. Terentii Varronis. Horum omnium librorum, si discedis ab Homero tragicisque Graecis, admodum paucae hodie supersunt reliquiae; tamen vel hae satis declarant, quantum studii Virgilius posuerit in congerenda ex diffusa lectione materia, qua ad scribendam Aeneidem uteretur. Praeterea quae sexto libro Aeneas vel vidisse vel audisse traditur, ea sunt ex parte a philosophis Graecis sumta. Iam cum vel mera ipsorum poetarum commenta magnam delectationem habere possint, quantum voluptatis Romanos cepisse credibile est ex carmine, quod etsi plurima miraculis similia contineret, tamen omnes prope numeros historicae fidei implere videretur?

§. 10. Ut olim Livii Andronici Odyssea aliique priscorum poetarum Romanorum libri in scholis explicabantur, ita postea Virgiliana carmina, proximisque post Virgilium saeculis multi docti homines exstiterunt, qui ea scriptis suis illustrarent. Sed haec prope omnia interciderunt, ac praeter exiguas quasdam particulas scholiorum Probi

---

\*) Hic, homo Graecus, Rudiis in magna Graecia ortus, primus carmini epico Latino hexametrum versum adhibere ausus, iure summus poetarum Romanorum habitus est usque ad Imperatoris Augusti tempora. Tantum autem afuit, ut sperneret antiquiores Romanorum poetas Virgilius, ut non dubitarit, quae ipsa antiquitatis commendatione placere possent, ex illis decerpta suis carminibus interponere.

Iunique Philargyri\*), quibus Bucolica et Georgica enarrantur, lacerasque ac minutas Aspri, Cornuti aliorumque reliquias ab A. Maio Mediol. 1818 editas, sola restant, quae totum opus Virgilii complectuntur, commentaria Mauri Servii Honorati, qui fuit quarti saeculi grammaticus. Hic multa servavit ab eruditis grammaticis antiquis ad interpretandum Virgilium collata; sed media, quae dicitur, aetate in breve coactus multisque locis exquisitioris doctrinae ornata spoliatus est.

Rhetores Graeci ad illustranda praecepta sua Homericis versibus multum usi sunt, similiter Romani Virgilianis. Ac Donatus quidem, seposita fere reliqua enarratione, Aeneidem ita interpretatus est, ut omnia ad instituendum oratorem rettulerit. Ex huius quoque opera nonnullum fructum ad hanc editionem redundasse suis locis intelligetur. Et quam utilis ad formandam orationem habitus sit Virgilius, probat Quintilianus, homo integerrimi iudicii, qui inter scriptores Romanos, ex quibus exempla eloquentiae petenda sint, huic poetae primum locum attribuit. Ac profecto insignis ille est et verborum proprietate, elegantia, copia, et sententiarum veritate, varietate, gravitate; pariter egregius in simplici atque in ornato genere orationis; in declarandis vero affectibus animi humani sive tenerioribus sive vehementioribus artifex plane divinus; et quod haec omnia superat (nam in vero oratore plurimi faciemus integritatem animi), uti se omni vitio praebet inimicissimum, sic virtuti omni amicissimum.

Denique, ut etiam iis, qui post literas saeculo XIV renatas in explicandis Virgilii carminibus optime versati sunt, suus honos constet, digni sunt, qui praeter ceteros commemorentur, Cerda Hispanus, Ruaeus Francogallus, tum tres Germani Heynius, Vossius ac, de quo supra praedicavi, Thielius, quorum hominum laudem Vos, qui haec legitis, memoriae vestrae velim habeatis commendatissimam!

---

\*) Idem is est, qui Iunilius Flagrius, cum similibus scriptis a C. W. Muellero Bernae et Rudolphi 1841 sqq. editus; adde Suringari Historiam criticam scholiastarum Latinor. Lugd. Bat. 1834. part. II. pag. 272 sqq. et meas de Iunio Philargyro commentationes duas, Dresd. 1846 et 1847.

# INDEX

verborum aliter, quam fere fit in editionibus  
Virgilii, scriptorum.

*Achivom, Argivom, divom*, pro *Achivorum* cet.

*Adgnosce* pro *agnoscere*.

*Adspargo* pro *adspergo*.

*Aegyptos* pro *Aegyptus*, et similia quaedam similiter.

*Baca, bacatus*, pro *bacca* cet.

*Baccharis* pro *bacharis*.

*Belus* pro *bellua*.

*Bracchia* pro *brachia*.

*Bractea* pro *bractea*.

*Bucina* pro *buccina*.

*Caenum* pro *coenum*.

*Caespes* pro *cespes*.

*Caestus* pro *cestus*.

*Comptus, emptus, sumptus*, et similia, pro *comtus* cet.

*Conditio* pro *conditio*.

*Cymaeus* pro *Cumaeus*.

*Damma* pro *dama*.

*Decumus, maxumus, optumus*, pro *zumus, septumus*, pro *decimus* cet.

*Detractare* pro *detractare*.

*Dicione* pro *ditione*.

*Eriny* pro *Erinny*.

*Faenilia* pro *Fenilia*.

*Felix* pro *filix*.

*Genista* pro *genista*.

*Gleba* pro *gleba*.

*Gnosus, Lyrnesus, Parnasus* et alia similiter, pro *Gnosus* cet.

*Grypes* pro *gryphes*.

*Heia* pro *eia*.

*Hiemps* pro *hiems*.

*Inclutus* pro *inclutus*.

*Interemit* pro *interimit*.

*Karthago* pro *Carthago*.

*Milia, milibus*, pro *millia, milibus*.

*Murra* pro *myrrha*.

*Nequiquam* pro *nequidquam*.

*Noviens, quotiens, totiens*, et similia, pro *novies* cet.

*Obstipui* pro *obstupui*.

*Paenitet* pro *poenitet*.

*Prosaenia* pro *proscenia*.

*Quattuor* pro *quatuor*.

*Quot annis* pro *quotannis*.

*Repperit, reppulit, rettulit*, pro *repperit* cet.

*Saepes* pro *sepes*.

*Sasta* pro *seta*.

*Saena* pro *scena*.

*Sescenti* pro *sexcenti*.

*Setius* pro *secius*.

*Stuppa, stuppeus*, pro *stupa* cet.

*Succipere*, bis pro *suscipere*.

*Sucus* pro *succus*.

*Temptare* pro *tentare*.

*Tremesco* pro *tremisco*.

*Tremibunda* pro *tremebunda*.

*Triboli* pro *tribuli*.

*Tunsus, contunsus, obtunsus, retunsus*, pro *tusus* cet.

*Virecta* pro *vireta*.

*Volcanus, volgare, volgus, volnus, volsus, volt, voltis, voltur*, pro *Vulcanus, vulgare* cet.

## Explicatio notarum quarundam, quibus in Commentariis usus sum:

*cf.* significat ipsa scriptoris, qui laudatur, verba esse adhibenda ad illustrandum poetam.  
*v.* indicat ea, quae loco ita notato in Commentariis scripsi, esse consulenda.  
*h. l.* hoc loco.  
*i. e.* id est.  
*i. q.* id quod.  
*l. l.* loco laudato.  
*s.* sive.  
*sc.* scilicet.  
*sq.* sequens.  
*sqq.* sequentes.  
*vs.* versus.

*E.* Ecloga  
*G.* Georgica  
*A.* Aeneis

{

ubi nulla harum notarum numeris praefixa est, indicatur ea ipsa pars carminum Virgilianorum, quae quoque loco enarratur; itaque nec nota *E* in Eclogis invenitur, nec *G* in Georgicis, nec *A* in Aeneide.

*Catal.* Catalecta Virgillii.

[ ] uncis inclusi versus insiticii sunt, quos nolui loco movere, ne numeri versuum semel recepti turbentur.

Singulae \* binaeve \*\* stellulae vel leviolem vel graviorem suspicionem indicant, non videri ea verba, quibus appositae sunt, ab ipso Virgilio adiecta esse.

## Qui in Commentariis laudantur antiqui scriptores, fere hi sunt:

*Aesch.* Aeschylus.  
*Anth.* Anthologia.  
*Apollon.* Apollonius Rhodius.  
*Appul.* Appuleius.  
*Arat.* Aratus.  
*Auson.* Ausonius.  
*Caes.* Caesar.  
*Callim.* Callimachus.  
*Calp.* Calpurnius.  
*Cat.* Catullus.  
*Cic.* Cicero.  
*Claud.* Claudianus.  
*Col.* Columella.  
*Corn. Nep.* Cornelius Nepos.  
*Curt.* Curtius.  
*Dem.* Demosthenes.  
*Diod. S.* Diodorus Siculus.

*Dion. Hal.* Dionysius Halicarnassensis.  
*Donat.* Donatus, interpres Aeneidos.  
*Enn.* Ennius.  
*Eurip.* Euripides.  
*Fest.* Festus.  
*Gell.* Gellius.  
*Geop. Γεωπονικά,* i. e. Cassiani Bassi  
 Excerpta ex variis libris de re rustica scriptis.  
*Grat.* Gratius Faliscus.  
*Herod.* Herodotus.  
*Hes.* Hesiodus.  
*Hom.* Homerus.  
*Hor.* Horatius.  
*Inscr. lat.* Inscriptiones Latinae.  
*Iust.* Iustinus.  
*Iuv.* Iuvenalis.

*Lact.* Lactantius.  
*Liv.* Livius.  
*Luc.* Lucanus.  
*Lucr.* Lucretius.  
*Macrob.* Macrobius.  
*Mus.* Musaeus.  
*Nemes.* Nemesianus.  
*Or. s. Ovid.* Ovidius.  
*Pallad.* Palladius.  
*Paus.* Pausanias.  
*Petron.* Petronius Arbiter.  
*Philarg.* Philargyrus, interpres Virgilii.  
*Pind.* Pindarus.  
*Plat.* Plato.  
*Plaut.* Plautus.  
*Plin. N. H.* Plinii Naturalis Historia.  
*Plin. Ep.* Plinii Epistolae.  
*Plut.* Plutarchus.  
*Prob.* Probus, interpres Virgilii.

*Prop.* Propertius.  
*Quint.* Quintilianus.  
*Sall.* Sallustius.  
*Sen.* Seneca.  
*Serv.* Servius, interpres Virgilii.  
*Sil.* Silius Italicus.  
*Soph.* Sophocles.  
*Stat.* Statius.  
*Suet.* Suetonius.  
*Tac.* Tacitus.  
*Ter.* Terentius.  
*Theocr.* Theocritus.  
*Tib.* Tibullus.  
*Thuc.* Thucydides.  
*Val. Fl.* Valerius Flaccus.  
*Val. Max.* Valerius Maximus.  
*Varr.* Varro.  
*Vellei.* Velleius Paterculus.  
*Xenoph.* Xenophon.

Paucissima menda in plagulis corrigendis relictæ sunt; inveni hæc in Commentariis:

- pag. 40. l. 3. *mœcum* pro *mecum*.  
 „ „ l. 5. *scmentem* pro *sementem*.  
 „ 75. l. 3. (ab infer. margine) *rœcidens* pro *recidens*.  
 „ 102. l. 4. „ „ „ 730 pro 732.  
 „ 153. l. 13. *terracum* pro *terrarum*.  
 „ 155. l. 11.  $\eta$  excidit e voc. *κῆρυκα*.  
 „ 173. l. 4. delendum est punctum, quod est. post *stant*.  
 „ 317. l. 11. pro *roseum* lege *russeum*.

Item in Commentariis vocales *a* et *o* vitiatæ sunt aliquoties superposita quadam lineola, ut Aen. 4, 155. 158. 7, 477. 509. 512. 517. 9, 433. 10, 87. 172. 309.

Ceterum pag. 51. l. 3. post *servorum* adde: dominis, ut caveant, hoc dictum est. — p. 91. lin. ult. pro *gyri* lege *turbinis*. — p. 183. l. 2. pro *in sacris* lege: Dativus, sacris (mysticis) præstari solita.

---



P. VIRGILI MARONIS  
B U C C O L I C O N  
LIBER.

E C L O G A I.

**TITYRUS.**

MELIBOEUS. TITYRUS.

- m. Tityre, tu patulae recubans sub tegmine fagi  
Silvestrem tenui Musam meditaris avena:  
Nos patriae finis et dulcia linquimus arva;  
Nos patriam fugimus: tu, Tityre, lentus in umbra  
5 Formosam resonare doces Amaryllida silvas.  
r. O Meliboe, deus nobis haec otia fecit.

**Ecloga I.** Octavianus, Bruto Cassioque anno post u. c. 712 proelio Philippensi victis, cum Romam redisset, insequenti anno XXXIV urbium Italicarum agros, quo fides anno 711 data exsolveretur, suis et Antonii militibus dividere coepit. Milites, cum ager Cremonensis illuc missis non sufficeret, invaserunt etiam Mantuanorum agros, qui proximi erant (9, 28); sic factum est, ut etiam Virgilio praediorum suum eriperetur a Claudio quodam, milite veterano. Sed Virgilius, intercedentibus, ut videtur, cum aliis, tum Asinio Pollione, legato M. Antonii, Galliae Transpadanae praefecto, ab Octaviano impetravit, ut ager suus sibi restitueretur. Scripsit Virgilius hanc Eclogam, qua pium erga Octavianum gratumque animum testificaretur, anno p. u. c. 713 autumnii tempore; cf. vs. 81. Virgilius sub Tityri villici persona ita latet, ut pleraque, quae loquitur Tityrus, ipsi Tityro, quaedam hero, Virgilio (cf. vss. 48 sqq.) convenient\*). || 2. *Silvestrem Musam*, carmen pastoritium; per silvas enim saltusque vere, aestate ac per partem autumnii greges pascunt Itali; cf. 6, 2. — *meditaris*, μελετᾷς, unde illud ortum videtur. Meditatio est maxime oratorum et poetarum, cerniturque in rerum, quas oratione aut carmine illustrare et ornare volunt, inventionem; itaque *meditaris Musam* est: carminibus pangendis operam das. Plin. N. H. 10, 29 „Meditantur aliae (luscinae) iuniores, versusque, quos imitentur, accipiunt.“ — *avena*, fistula pastoritia, vel praeludente vel intercinente vel succinente; cf. 3, 22. 8, 21. 25. 31. | 3. *dulcia* appellantur omnia, quae mutuae cuiusdam caritatis vinculo obstrictos nos tenent, ut parentes, fratres, liberi, tum terra et domus, ubi nati educatique sumus. | 4. *fugimus*, φεύγομεν, expellimur patria. — *lentus*, ad otium agendum... A. 12, 237... vel fruendum compositus. | 5. Amaryllidem, amicam, carminibus celebrans facit, ut Echo, quae frequens est in silvis, eius nomen referat. | 6. *deus*, Octavianus, a Iulio Caesare, qui anno p. u. c. 712 in numerum τῶν ἡμιθεῶν relatus Divusque appellatus est, filius adoptatus, ipse etiam vivus aliquanto post public

\*) Scriptae sunt Eclogae Virgilii hoc ordine: II. III. V. I. IX. IV. VI. VIII. VII. X. Quae quarta fuit tempore, ordine primam esse voluit Virgilius, quippe honori et meritis Octaviani dedicatam.

- Namque erit ille mihi semper deus; illius aram  
 Saepe tener nostris ab ovilibus imbuet agnus.  
 Ille meas errare boves, ut cernis, et ipsum
- 10 Ludere, quae vellem, calamo permisit agresti.  
 m. Non equidem invideo; miror magis: undique totis  
 Usque adeo turbatur agris. En, ipse capellas  
 Protinus aeger ago; hanc etiam vix, Tityre, duco.  
 Hic inter densas corylos modo namque gemellos,
- 15 Spem gregis, ah! silice in nuda connixa relinquit.  
 Saepe malum hoc nobis, si mens non laeva fuisset,  
 De caelo tactas memini praedicere quercus,  
 [Saepe sinistra cava praedixit ab ilice cornix.]  
 Sed tamen, iste deus qui sit, da, Tityre, nobis.
- 20 t. Urbem, quam dicunt Romam, Meliboeae, putavi  
 Stultus ego huic nostrae similem, quo saepe solemus  
 Pastores ovium teneros depellere fetus.  
 Sic canibus catulos similis, sic matribus haedos  
 Noram, sic parvis componere magna solebam.
- 25 Verum haec tantum alias inter caput extulit urbes,  
 Quantum lenta solent inter viburna cupressi.  
 m. Et quae tanta fuit Romam tibi caussa videndi?  
 t. Libertas; quae sera, tamen respexit inertem,  
 Candidior postquam tondenti barba cadebat;
- 30 Respexit tamen, et longo post tempore venit,  
 Postquam nos Amaryllis habet, Galatea relinquit.  
 Namque, fatebor enim, dum me Galatea tenebat,  
 Nec spes libertatis erat, nec cura peculi.

pro deo cultus; a Virgilio quidem ob ingens acceptum beneficium ita dictus, v. vs. 44. | 8. *agnus ab ovilibus n.*, petitus ex ovili nostro, s. agnus de grege nostro. Tibull. 2, 1, 57, „a pleno memorabile munus ovili.“ G. 2, 243. 3, 33. A. 1, 160. | 10. *Ludere*, ut *παίζειν*, v. G. 4, 565; calamo sive fistulae quid in ea re negotii fuerit, dictum est ad vs. 2. — *cal. agr.* Theocritus Epigr. 2, 3 sq. ornatum instrumentumque pastoritum paucis complectitur „τοὺς τετραοὺς δόνακας, τὸ λαγωβόλον, ὄξυν ἄκοντα, νεβόλδα, τὰν πήραν.“ | 12. *adeo, tantus, talis, tot, τόσος, τοῖος*, graviter pro *nam maxime, nam maximus* cet.; v. A. 5, 404. 7, 447. 12, 831. „Miror potius (*magis*); nam atrocissime milites turbant omnia“; nempe exturbant colonos sedibus suis et possessionibus. | 13. *Protinus, πρόσω, vorwärts*. — *aeger*, animo maesto. | 15. Ut liberi spes parentum, qui genus suum per illos propagatum iri sperant, ita haedi, agni, vituli spes gregis; cf. G. 3, 473. 4, 162. — *silice in nuda*, non substratis herbis aut stramentis; cf. G. 3, 297 sq. | 16. *laeva*, tarda, stupida. | 17. quercus fulmine icta exsilium portendere (praedicere) credita est. | 18. cf. 9, 15. | 19. *Sed tamen* eam hic vim habet, ut, postquam ad alia deflectit oratio, redeatur ad supra dicta vs. 6. — *da*, dic; ut *accipe* i. q. audi. | 21. *nostrae*, Mantuae. | 22. *depellere* breviter pro: depulsos a lacte sive ab ubere materno vel agere vel portare, cf. 7, 15. G. 3, 187. | 28. *Libertas* a domino, qui tum Romae erat, impetranda, quae sera quidem venit, sed venit tamen. — *inertem*, quia sibi cura peculii, quo uteretur ad libertatem a domino redimendam, non fuerat; vs. 32 sq. | 33. *peculi*, peculii; illa Genitivi forma nominum substantivorum in *..ius* et *..um* desinentium sola usitata est Virgilio; praeterea ubique apud

- Quamvis multa meis exiret victima saeptis,  
 35 Pinguis et ingratae premeretur caseus urbi,  
 Non umquam gravis aere domum mihi dextra redibat.  
 M. Mirabar, quid maesta deos, Amarylli, vocares,  
 Cui pendere sua patereris in arbore poma:  
 Tityrus hinc aberat. Ipsae te, Tityre, pinus,  
 40 Ipsi te fontes, ipsa haec arbusta vocabant.  
 T. Quid facerem? neque servitio me exire licebat,  
 Nec tam praesentis alibi cognoscere divos.  
 Hic illum vidi iuvenem, Meliboeae, quot annis  
 Bis senos cui nostra dies altaria fumant.  
 45 Hic mihi responsum primus dedit ille petenti:  
 Pascite, ut ante, boves, pueri; submitte tauros.  
 M. Fortunate senex, ergo tua rura manebunt!  
 Et tibi magna satis; quamvis lapis omnia nudus  
 Limosoque palus obducatur pascua iunco.  
 50 Non insueta gravis temptabunt pabula fetas,  
 Nec mala vicini pecoris contagia laedent.  
 Fortunate senex, hic, inter flumina nota  
 Et fontis sacros, frigus captabis opacum!  
 Hinc tibi, quae semper, vicino ab limite, saepes  
 55 Hyblaeis apibus florem depasta salicti,

eundem *di, dis, idem, isdem* pro *dii s. dei, diis, iidem, iisdem*. — Ceterum servus, qui sint frugi parique, minus sexennio opus esse ait Cic. Phil. 8, 11, quo pretium pro libertate ex peculio solvere possint. | 35 sq. Comice urbi imputat Tityrus, quod suae stultitiae imputare debebat, quasi illa fructu suo eum fraudaverit, pro optimis rebus, quas parvo pretio emtas accepit, pessimas, ad luxum Galatae pertinentes, easdemque magno pretio venditas reddiderit atque sic ingratae ei praeberit. | 39. Iam intelligo, cur deos invocaverit Amaryllis: Tityrus hinc aberat. — *aberas* 3, 97. 7, 23. G. 2, 211. A. 1, 308 et saepius. — *Ipsae* cet. pius etiam fontesque te desiderabant et quasi vocabant; transfertur enim saepe, maxime a poetis, qui hominum esse solet sensus, ad loca, arbores *cet.*; cf. 5, 21, 27 sqq. 62 sqq. 9, 29. 10, 13 sqq. item in Aeneide 7, 759 sq. 8, 91 sq. Hom. II. 4, 126, tum Cic. pro Sext. 60. de Fin. 5, 2, 4. | 42. *tam praes. div.*, qui me meaque aequae tueri possent; quippe qui praesens est, paratissimus est ad iuvandum; cf. G. 1, 10. | 43. v. vs. 6. | 44. *Bis s. dies*, puta Kalendis vel etiam Nonis aut Idibus singulorum mensium. Colit Tityrus Octavianum ut Larem domesticum, cui menstrua sacra fieri solebant. | 45. *primus*, ille primus me liberavit ea, qua dudum angebar, cura, ne agrum hunc amitterem. | 46. *submittere*, tritum rustico sermone verbum, alere ad supplendum propagandumque gregem. | 47. *maneb.*, erant tua, ut antea fuerunt. | 49. *limoso*, qui in solo limoso nasci solet. — Ceterum ostendit poeta per alienum hominem Octaviano animum suum paucis contentum; simul intelligitur non ita multum aviditati militum praereptum esse. Neque vero offendet te hyperbole, quae est in voce *omnia*. | 50 sq.: Non tu exsulans a paterno rure gregis tui perniciem videbis. Non afferent morbos (*temptabunt*) aegris (*graves*) e partu matribus (*fetas*), tuis ovibus, insueta pabula, ut meis capellis, cf. vss. 13 sqq., quae ex alio in aliam locum actae semper mutant papula, quod perniciosum est. | 53 sq. Hic in tuo rure ad vitandum calorem aestivum captabis auram frigidam in umbra arborum ad fontes rivosque satarum. — *sacros*, a Nymphis habitatos. — *nota*, ad quae, ut antea, venire soles, dum nos exsulatum imus. | 54—56. Hinc, a vicino limite, saepes salignae, quae semper

- Saepe levi somnum suadebit inire susurro;  
 Hinc alta sub rupe canet frondator ad auras;  
 Nec tamen interea raucae, tua cura, palumbes,  
 Nec gemere aëria cessabit turtur ab ulmo.
- 60 τ. Ante leves ergo pascentur in aethere cervi,  
 Et freta destituent nudos in litore pisces,  
 Ante, pererratis amborum finibus, exsul  
 Aut Ararim Parthus bibet, aut Germania Tigrim,  
 Quam nostro illius labatur pectore voltus.
- 65 μ. At nos hinc alii sitientis ibimus Afros;  
 Pars Scythiam et rapidum Cretae veniemus Oaxen,  
 Et penitus toto divisos orbe Britannos.  
 En umquam patrios longo post tempore finis  
 Pauperis et tuguri congestum caespite culmen,  
 70 Post aliquot, mea regna videns, mirabor aristas?

Hyblaeis apibus florem depasta (est), saepe tibi levi (apum) susurro suadebit somnum inire. Verba a vicino limile per appositionem adiecta sunt particulae hinc; cf. 3, 12. A. 1, 235. 2, 18. 3, 616. 6, 305. 7, 209. 12, 273; sunt eadem verba non suo loco posita; neque infrequens talis traectio apud poetas, cf. 9, 3. G. 2, 227. A. 8, 168, negligentiori pastoris sermoni pulchre conveniens. (Alii iungunt: *saepes a vic. ltm.*, i. e. quae est a parte vicini limitis.) — *semper florem depasta*, v. 3, 106; quae quoties novis floribus se induit, statim depasci solet ab apibus, *ἀεὶ νεοφύων*. — *Hyblaeis*, epitheton ab Hybla ductum, monte Siciliae, qui apibus mel egregium facientibus abundabat. Sic praestantia rei saepe eiusmodi epithetis significatur, ut 10, 59. G. 1, 228. 3, 343. A. 7, 816. 11, 773; alibi quandam doctrinae speciem captant poetae Romani e talibus epithetis, ut 5, 27. 9, 13. 30. G. 3, 12. A. 11, 580. — *somnum suad. inire*, susurrus apum ad somnum te invitabit. | 57. frondator stringit frondes arborum maritatarum, ne vites obumbrentur. — *ad auras*: ut tantum aurae eum audiant, quia solus est, cf. 2, 4 sq. | 58. *cura*, apud poetas saepe id, quod cum quadam sollicitudine amamus. | 59. *gemere*, turturum et columbarum proprium. — *aëria*, perpetuum arborum epitheton, altitudinem indicans. | 60 sq. Ante cervi avium, pisces terrestrium animalium induent naturam. — *levis* perpetuum volantium epitheton. — *nudos*, non amplius undis tectos. | 62 sq. Parthi pererratis Germaniae finibus in Galliam venient, Germani pererratis Parthorum finibus ad Tigrim. | 64. *illius*, Octaviani. | 65. *Afros*, ad Afros. | 66. *Pars ... et ... Et*, i. q. alii ... alii ... alii, v. A. 1, 701. 7, 626. (Alii legunt *rap. cretae ven. O.*, ut Oaxes idem sit, qui alias Oxus dicitur, flumen limosum Bactrianos a Sogdianis dividens, *cretae* autem pendeat ex *rapidum*, qui cretam secum rapiat, cretosus.) | 67. *toto divisos orbe*: orbem terrarum ambit Oceanus; Britannia autem sita est ultra Oceanum. Senec. Consol. ad Marc. c. 14 „*Britanniam* peragravit Caesar, nec felicitatem suam *Oceano* continere potuit.“ Eleg. ad Messal. 54 „Vincere et Oceani finibus ulterius.“ add. Tibull. 4, 1, 147 sqq. Fuit autem provisum aliquod perfugium transmarinum veteribus istorum agrorum possessoribus ab Octaviano, quo aveherentur, Africa scilicet aliaeque remotae regiones, Dyrrhachium in Illyrico et Philippus in Thessalia nominat Dio. | 68. Ut hic, ita 8, 7 en coniungitur cum interrogatione vehemens desiderium exprimente. | 69. *tuguri*, v. vs. 33. | 70. *Post sc. longo tempore*, quod repetes ex vs. 68; cf. G. 2, 259, 261. — fietne aliquando, ut revisam agros meos, mirabundus, si rarae in illis, qui olim fertilissimi erant, aristae aliquot oculis occurrent? Negligebatur ab his militibus agrorum cultura, ut ante a Sullanis colonis „quibus libido atque luxuria ex magnis rapinis nihil relicui fecerant.“

- Impius haec tam culta novalia miles habebit,  
 Barbarus has segetes? en, quo discordia civis  
 Produxit miseros! en, quis consevimus agros!  
 Inserere nunc, Meliboeae, puros, pone ordine vitis.
- 75 Ite meae, felix quondam pecus, ite capellae.  
 Non ego vos posthac, viridi proiectus in antro,  
 Dumosa pendere procul de rupe videbo;  
 Carmina nulla canam; non, me pascente, capellae,  
 Florentem cytissum et salices carpetis amaras.
- 80 T. Hic tamen hanc mecum poteras requiescere noctem  
 Fronde super viridi: sunt nobis mitia poma,  
 Castaneae molles et pressi copia lactis;  
 Et iam summa procul villarum culmina fumant  
 Maioresque cadunt altis de montibus umbrae.

## E C L O G A II.

## ALEXIS.

Formosum pastor Corydon ardebat Alexim,  
 Delicias domini, nec, quid speraret, habebat.  
 Tantum inter densas, umbrosa cacumina, fagos  
 Adsidue veniebat. Ibi haec incondita solus

Sall. Cat. 28. | 71. *Impius*: pii sunt agricolae, pacis ac iustitiae amantes nec quemquam laedentes; *impii* milites, quibus vis ac ferrum pro lege est; quare „Mars impius“ G. 1, 511. | 72. *Barbarus*, Galli alique, qui in exercitu Romanorum erant. | 73. *quis*, quibus. | 74. Ironice haec dicta: Quid invat nunc in-  
 sevisse! — *ordine*, in quincuncem; cf. G. 2, 277. | 76. *viridi*, cuius ostio frondes arboris vel fruticis alicuius imminet, ut 5, 7 et 9, 41. | 80 sqq. His verbis Tityrus abeuntem Meliboeum prosequitur. | 81. *Fr. s. viridi*, Theocr. 7, 132 „ἐν τῇ βαθέλει ἀδελὰς στέλνοιο χαμηνίσιν ἐκλήνθημες ἐν τῇ νεοτμάτοισι γεγαδότες οἰναρέοισιν“ et ibid. vs. 67 sq. | 82. *Molles*, dulces; *mollissima vina* G. 1, 341. — *lac pressum*, caseus, qui, ut solidus fiat, ponderibus premitur. | 83. Fumant villae, in quibus paratur coena.

**Ecloga II.** Haec Ecloga tempore prima est omnium, quas scripsit Virgilius, facta a. p. u. c. 712 (fortasse iam a. 709). Viderat poeta puerum quendam, Alexandrum nomine, apud Asinio Pollionem (vid. quae Ecl. I. praefati sumus) pocula miastrantem, cumque eo, quo Socrates, Plato alique formosos pueros, more amare coepit. Is est, qui hoc carmine celebratur, Alexis; ipse Virgilius Corydonis pastoris nomen sibi, Iollae Asinio induit. Pollio, hoc carmine delectatus, donavit Virgilio Alexandrum, qui deinde, ab illo doctrina excultus, grammaticus factus est. Multa in hoc carmen ex Theocrito transtulit poeta, quae suis quaeque locis indicata velim diligenter cum Theocriteis comparentur a legentibus. || 1. *ardere aliquem*, ardentem amare; Propert. 1, 13, 23: *amor Herculis flagrans Heben*. | 2. *nec, quid sp., habebat*, nulla spes videbatur esse; legitur etiam *quod*, i. e. nulla spes erat. — Hoc unum (*Tantum*) ei reliquum erat, ut silvis ac montibus quereretur se ab Alexi spretum. — *inter* cum verbis motum indicantibus iunctum spectat ad plures vel homines, vel res, quas inter medias quis venit; cf. A. 5, 618. 10, 710. — *umbrosa cacumina fagos*, cf. 9, 9. | 4. Theocr. 11, 17

- 5 Montibus et silvis studio iactabat inani:  
 O crudelis Alexi, nihil mea carmina curas?  
 Nil nostri miserere? mori me denique coges.  
 Nunc etiam pecudes umbras et frigora captant;  
 Nunc viridis etiam occultant spineta lacertos,
- 10 Thestylis et rapido fessis messoribus aestu  
 Allia serpyllumque herbas contundit olentis.  
 At mecum raucis, tua dum vestigia lustrō,  
 Sole sub ardenti resonant arbusta cicadis.  
 Nonne fuit satius, tristis Amaryllidis iras
- 15 Atque superba pati fastidia? nonne Menalcan?  
 Quamvis ille niger, quamvis tu candidus esses.  
 O formose puer, nimium ne crede colori!  
 Alba ligustra cadunt, vaccinia nigra leguntur.  
 Despectus tibi sum, nec, qui sim, quaeris, Alexi,
- 20 Quam dives pecoris, nivei quam lactis abundans;  
 Mille meae Siculis errant in montibus agnae;  
 Lac mihi non aestate novum, non frigore deficit.  
 Canto, quae solitus, si quando armenta vocabat,  
 Amphion Dircaeus in Actaeo Aracyntho.
- 25 Nec sum adeo informis: nuper me in litore vidi,  
 Cum placidum ventis staret mare; non ego Daphnim  
 Iudice te metuam; si numquam fallit imago.  
 O tantum libeat mecum tibi sordida rura

et 18. — *incondita*, inornata. | 5. cf. 10, 32 et vid. 1, 39. — *iactabat*, voces ore emissae iaci, iactari dicuntur; sed v. A. 1, 102. | 7. Theocr. 3, 9. | 8. *umbr.* et *fr.*, frigus umbrarum; cf. G. 3, 331 sqq. | 9. Theocr. 7, 22. | 10 sq. Thest. contundit in mortario acres herbas, moretum, ut videtur, effectura. | 12. cano eo diei tempore, quo, quiescentibus ceteris animalibus, solae cicadae canunt. — *tua d. v. l.*, dum persequor vestigia, qua incessisti dominum huc comitatus. | 15. *nonne M?* sc. *ferre*, cuius notio inest in praegresso *pati*. | 16. *niger* vel a natura, vel a sole, cf. 10, 41. | 17. *ne crede col.*, ne confide candori tuo. | 18. *cadunt*, decidunt et iacent neglecta. *leguntur*, placent et carpuntur. Spectant haec ad vs. 16. | 20—24. Theocr. 11, 34—38. | 21. Rem in Sicilia agi, pastorum carminibus celebrata, fingit Virgilius. | 24. Amphion Thebanus, a fonte Boeotiae Dirce appellatus Dircaeus, puer recens natus in confiniis Boeotiae et Atticae, quae Acte antiquitus vocabatur, cum fratre Zetho expositus est et a pastore educatus. Totus versus, ut multi similes, qui hiatum habent et vocabulo quattuor syllabarum clauduntur, ad Graecam rationem conformatus est: *Ἀμφίων Διρκάιος ἐν Ἀκταίῳ Ἀρακύνθῳ*. cf. A. 3, 74 et v. 6, 53. | 25. Theocr. 6, 34 sqq. | 26. *plac. vent. mare*, ventis (placidis) stratum, cf. A. 3, 69. 5, 763 „placidi straverunt aequora venti.“ Hor. Od. 1, 3, 15 „Quo (*Notō*) non arbiter Hadriae maiore, tollere (quando vehemens est) seu (quando placidus) ponere vult freta.“ Callistr. Ic. 14. p. 906 „ὁ ζέφυρος (placidus ventus) τὴν θάλασσαν κατευνάζει.“ Anth. Gr. T. 2. p. 272. 24, 4 „*κῦμα θηλύνηι πρηγῆγελως Ζέφυρος*.“ Itaque Soph. Ai. 674 scripsit „*λέλων* (non *δευλῶν*) *ἄημα πνευμάτων ἐκοίμισε στένοντι νότον*.“ — Audeam cum Daphnide, formosissimo Siciliae pastore, certare de pulchritudine. | 28. Sententiae ita procedunt: O libeat tantum tibi mecum ruri degere; multa est ibi ac varia iucunditas: cantus pastoralis vs. 31—39, munera ex venatu vs. 40—44, flores ac poma vs. 46—55. — *sordida*, quae tu, quippe cultu urbanae munditiae

- Atque humilis habitare casas et figere cervos  
 30 Haedorumque gregem viridi compellere hibisco!  
 Mecum una in silvis imitabere Pana canendo.  
 Pan primus calamos cera coniungere pluris  
 Instituit; Pan curat ovis oviumque magistros.  
 Nec te paeniteat calamo trivisse labellum:  
 35 Haec eadem ut sciret, quid non faciebat Amyntas?  
 Est mihi disparibus septem compacta cicutis  
 Fistula, Damoetas dono mihi quam dedit olim,  
 Et dixit moriens: Te nunc habet ista secundum.  
 Dixit Damoetas; invidit stultus Amyntas.  
 40 Praeterea duo, nec tuta mihi valle reperti,  
 Capreoli, sparsis etiam nunc pellibus albo;  
 Bina die siccant ovis ubera; quos tibi servo.  
 Iam pridem a me illos abducere Thestylis orat;  
 Et faciet, quoniam sordent tibi munera nostra.  
 45 Huc ades, o formose puer: tibi lilia plenis  
 Ecce ferunt Nymphae calathis: tibi candida Nais,  
 Pallentis violas et summa papavera carpens,  
 Narcissum et florem iungit bene olentis anethi;  
 Tum, casia atque aliis intexens suavis herbis,  
 50 Mollia luteola pingit vaccinia caltha.  
 Ipse ego cana legam tenera lanugine mala,  
 Castaneasque nuces, mea quas Amaryllis amabat;  
 Addam cerea pruna: honos erit huic quoque pomo;

carentia, meras sordes esse putas.] 29. Venationem non alienam esse a vita pastoritia discitur etiam ex 3, 12 et 75. imprimis ex G. 3, 404 sqq. — *figere sagitta* A. 4, 69 sq. | 30. *comp. hibisco*, ad hibiscum; satis frequens hic Dativi usus apud poetas; sic *rivo iace pro in rivum* 8, 101. adde A. 2, 276. 10, 683. *Huic* A. 7, 346, in hanc; etiam *Ibat bello* 7, 761. *invitat solio* 7, 178. *funum labris* 12, 417. *πίνειν νέδω* Soph. El. 747 et v. G. 2, 206. | 31. v. 1, 2. | 32. Pan inventor syringis; Ovid. Met. 1, 689—712. | 33. *ov. magistros*; cf. 3, 101. Tibull. 2, 5. 35. Cic. pr. Planc. 25 „sin emimus, quem vilicum imponderemus, quem pecori praeficeremus.“ | 34. *paeniteat*, parum tibi videatur. — *trivisse lab.*, quia movetur calamus ad labra canentis. | 35. *quid non?* i. e. omnia. | 36. *syrinx*, cf. Ovid. Met. 1, 711 sq. — *cicutis*, cf. 5, 85. | 37. *Damoetas*, ut *Amyntas*, pastoris nomen. | 38. *secundum*, canendi arte mihi proximum; cf. 5, 48 sq. Horat. Sat. 2, 3. 193 „Ajax heros ab Achille secundus.“ | 40. Theocr. 11, 40 sq. 3, 34 sqq. Ovid. Met. 13, 834 sqq. Commendatur donum ipso periculo, quod C. subierat, dum capreas has silvestres cubili suo detrahit in valle rupibus clausa adituque difficillima. | 41. *albo*, maculis albis, quas post sextum fere mensem amittunt. | 42. *die*, quotidie; 3, 34. | 44. Theocr. 3, 36. | 45 sqq. Theocr. 11, 56 sq. Haec omnia ruri nascuntur; diversis quidem temporibus, non simul cuncta. — Flores coronaeque minime contemnenda dona visa veteribus, qui illis in convivio, in re sacra, in victoria redimiebantur; iisdem dei ornabantur. | 47. *pallentes*, flavi, ut videtur, coloris; Ovid. Met. 11, 110 „saxum quoque *palluit auro*.“ | 50. *pingit*, variat, distinguit. — *mollia*, tenera; 5, 38. 6, 53. | 51. mala cydonia, *Quitten*; Anthol. Lat. Burm. T. 1. l. 3. Ep. 211, 3 „velleribus hirsuta cydonia canis.“ Calpurn. Ecl. 2, 90 sq. „notavi Cereae sub tenui lucere cydonia lana.“ | 53. Plin. Nat. Hist. 15, 13 „Sunt nigra pruna, ac laudatiora *cerina*.“ Ovid.

- Et vos, o lauri, carpam, et te, proxima myrte:  
 55 Sic posita quoniam suavis miscetis odores.  
 Rusticus es, Corydon: nec munera curat Alexis,  
 Nec, si muneribus certes, concedat Iollas.  
 Heu, heu, quid volui misero mihi! floribus austrum  
 Perditus et liquidis inmisi fontibus apros.  
 60 Quem fugis, ah, demens? habitarunt di quoque silvas  
 Dardaniusque Paris. Pallas, quas condidit arces,  
 Ipsa colat; nobis placeant ante omnia silvae.  
 Torva leaena lupum sequitur; lupus ipse capellam;  
 Florentem cytisum sequitur lasciva capella;  
 65 Te Corydon, o Alexi: trahit sua quemque voluptas.  
 Aspice, aratra iugo referunt suspensa iuveni  
 Et sol crescentis decedens duplicat umbras:  
 Me tamen urit amor; quis enim modus adsit amori?  
 Ah, Corydon, Corydon, quae te dementia cepit!  
 70 Semiputata tibi frondosa vitis in ulmo est.  
 Quin tu aliquid saltem potius, quorum indiget usus,  
 Viminiibus mollique paras detexere iunco?  
 Invenies alium, si te hic fastidit, Alexim.

Met. 13, 817 sq. — Hiatus excusatur interpunctione, ut A. 1, 405. 5, 235, extremo loco et A. 12, 648 etiam arsi. — Hoc quoque pomum gratum tibi erit. § 54. *proxima*, quae in calathio proxima laureis frondibus ponetur; cf. vs. sq. § 55. Plin. N. H. 21, 2, 3 „Postea variari coeptum mixtura versicolori florum, quae invicem odores coloresque accenderet.“ § 56. Theocr. 20, 3. — Increpat stultitiam suam, qui ruri natus et rei rusticae deditus Alexim ex urbe ad se pellicere studeat; cf. vs. 60 sq. § 57. *concedat*, cedat donorum amplitudine. § 58 sq. Stultitiae accusatus sub hac imagine latet; stulte fecit Corydon, qui, cum videret numquam se voti compotem futurum, animi sui tranquillitatem dementi huius pueri amore perverterit cum magno suarum rerum detrimento; cf. vs. 70. — auster in Italia hominibus, arboribus floribusque damnosus; quare qui hortos instituebant, curabant, quantum fieri posset, ut ab austro tuti essent; — fontes quoque arcendarum ferarum pecudumque causa saepiebantur. — *Perditus*, misere s. perdit, i. e. vehementissime, amans; 8, 88. § 60. Theocr. 20, 33. Tibull. 2, 3, 11. — Paris inter pastores adolevit. § 61 sq. Sine Palladem suas artes habitare, tu mecum silvas et vitam rusticam ama. — Minerva conditrix praesesque urbium, unde *πολις*, *πολιούχος*, *ἀρχαία* dicta. § 63. Theocr. 10, 30 sq. — *sequitur*, potiri studet. — *lupus ipse*, *λύκος δ' αὖ*. distinguit ipse alterum ab altero; cf. 1, 39. § 65. *trahit*, allicit et tenet. § 66. aratra, antiquo tempore rotis carentia, iugo domum referunt, *suspensa*, ita sublata, ut solum non tangant. Significatur tempus vespertinum, *βούλυτός*. § 68. Theocr. 2, 40 et 7, 56. Opera diurna cessant sole iam decedente, solus amor meus non residit. § 69 sqq. Theocr. 11, 72 sqq. § 70. Amori indulgens curam operis rustici neglexerat. Arbores, ulmi imprimis, maritantur in Italia vitibus; et haec certis temporibus putabantur, vites quidem ita maxime, ut inutilia, vetera, contorta resecarentur, ulmi vero sic, ut commoda tabulata, solem auramque facile admitteant, praeberent vitibus. § 71. Junge *Quin potius*; habent haec vim admonendi. — *aliquid saltem*, quantumvis exiguum. *aliquid sc. eorum*; sic A. 11, 81 *manus, quos*, ib. 172 *tropaea, quos*, i. e. manus, tropaea *eorum*, quos. adde A. 4, 597 et v. 9, 174. — *quorum indiget usus*, quae opus sunt; *usus, χρεία, Bedürfniss*, Tacit. Annal. 1, 32 „si qua alia praesens *usus* indixerat.“ § 72. ut corbes, qualos, G. 2, 241, etc.



## E C L O G A III.

## PALAEMON.

## MENALCAS. DAMOETAS. PALAEMON.

- M. Dic mihi, Damoeta, cuium pecus? an Meliboei?  
 D. Non, verum Aegonis; nuper mihi tradidit Aegon.  
 M. Infelix o semper, ovis, pecus! ipse Neaeram  
 Dum fovet, ac, ne me sibi praeferat illa, veretur,  
 5 Hic alienus ovis custos bis mulget in hora;  
 Et sucus pecori et lac subducitur agnis.  
 D. Parcius ista viris tamen obiicienda memento.  
 Novimus, et qui te, transversa tuentibus hircis,  
 Et quo — sed faciles Nymphae risere — sacello.  
 10 M. Tum, credo, cum me arbustum videre Miconis  
 Atque mala vitis incidere falce novellas.  
 D. Aut hic ad veteris fagos cum Daphnidis arcum  
 Fregisti et calamos: quae tu, perverse Menalca,  
 Et, cum vidisti puero donata, dolebas,  
 15 Et, si non aliqua nocuisses, mortuus esses.  
 M. Quid domini faciant, audent cum talia fures!  
 Non ego te vidi Damonis, pessime, caprum  
 Excipere insidiis, multum latrante Lycisca?  
 Et cum clamarem: Quo nunc se proripit ille?

**Ecloga III.** Scripta est haec Ecloga sub aetatem anni p. u. c. 712; composita ad similitudinem Theocr. 4 et 5. Certant Menalcas et Damoetas, more Arcadicorum et Siculorum pastorum, de praestantia facultatis poeticae, arbitro Palaemone constituto. || 1 sq. Theocr. 4, 1 sq. *cuium* antiquae; retinebatur *cuius*, ... *a*, ... *um* in quibusdam formulis iuris Romani, aliquandiu etiam in familiari, et diutius fortasse in rustico sermone. | 3. *ipse*, dominus Aegon. | 5. *alienus*, ut mercenarius. — id ille turpis lucelli causa facere dicitur. | 6. v. 10, 13. — *Et ... subducitur*, quo fit, ut subducatur. | 7. *viris tamen*, qui tamen vir sum (cf. Sueton. Vespas. c. 13.), non, qualis tu es, cinaedus. — *viris*: Pluralis Nominum saepe eum denotat, qui est e numero vel in condicione eorum, qui appellantur eo nomine; cf. A. 3, 488. 7, 359. 12, 799. 876. 947. | 8. *qui te*, et quo sacello: reticetur turpe aliquod verbum, ut apud Theocr. 1, 105. Terent. Heautont. 5, 4, 18 sq. „Ten' mi per fallacias adducere ante oculos — ? pudet Dicere hac praesente verbum turpe.“ adde 5, 1, 40. Salax genus est hircorum; quapropter dicuntur turpitudinem istam oculis *transversa tuentibus*, i. e. obliquis s. transversis, adspicere stimulat scilicet libidine et invidia. | 9. *faciles*, indulgentes, cum alii diu graviores ulturi fuissent id sacrilegium. — *sacello* Nympharum scilicet. | 10 sq. Noto ironiae genere de se praedicat flagitium alterius. — Arbustum hic sunt arbores vitibus maritatae; solebant autem vites et arbores aetate pares iungi; itaque ille novellas et arbores et vites laesit. — *videre* ii scilicet, qui erant in vicinia. — *mala f. inc.*, per malitiam falce inc. | 12. „Aut tum, cum fregisti“ cf. | 13. *calamos*, sagittas; Hor. Od. 1, 15, 17. — *perverse*, maligne. | 14. *donata a me*. | 15. cf. 7, 26. | 16. Cum servi alienos tam audacter compilant, quomodo domini, fidei illorum sua committentes, furta eorum cavere poterunt? |

- 20 Tityre, coge pecus: tu post carecta latebas.  
 D. An mihi cantando victus non redderet ille,  
 Quem mea carminibus meruisset fistula caprum?  
 Si nescis, meus ille caper fuit; et mihi Damon  
 Ipse fatebatur; sed reddere posse negabat.
- 25 M. Cantando tu illum? aut umquam tibi fistula cera  
 Iuncta fuit? non tu in triviis, indocte, solebas  
 Stridenti miserum stipula disperdere carmen?  
 D. Vis ergo, inter nos, quid possit uterque, vicissim  
 Experiamur? ego hanc vitulam — ne forte recuses,
- 30 Bis venit ad mulctram, binos alit ubere fetus —  
 Depono: tu dic, mecum quo pignore certos.  
 M. De grege non ausim quicquam deponere tecum:  
 Est mihi namque domi pater, est iniusta noverca;  
 Bisque die numerant ambo pecus, alter et haedos.
- 35 Verum, id quod multo tute ipse fatebere maius, —  
 Insanire libet quoniam tibi — pocula ponam  
 Fagina, caelatum divini opus Alcimedontis:  
 Lenta quibus torno facili superaddita vitis  
 Diffusos hedera vestit pallente corymbos.
- 40 In medio duo signa, Conon, et — quis fuit alter,  
 Descripsit radio totum qui gentibus orbem,

20. Tityrus caprarius Damonis. — *cogere pecus*, dispersum ac vagum compellere in unum locum. | 21. *redderet* (Damon) caprum: daret debitum mihi victori. | 22. cf. 1, 2. | 24. *negabat*, quam ob causam? | 25. *illum?* sc. vicisse te ais. | 26. in triviis indocti et rudes apud ignobilem plebeculam canere solebant. (Aliter Servius. In triviis enim imagines Hecates erant positae, Hecataea, quae dea vel augere greges vel minuere credebatur. „Consuetudo fuerat“, ait ille, „ut per trivium et quadrivium ulularent et flebile quiddam in honorem Dianae [sive Proserpinae sive Hecates] canerent rustici ad reddendam Cereris imitationem, quae raptam Proserpinam in triviis clamore requirebat.“) | 27. *disperdere* significantius quam *canere*; miserum enim erat carmen. | 29. *vitula*, iuvenca; cf. G. 4, 299. | 30. cf. G. 3, 176—78. | 31. *Depono*, pignus pono, quod auferas, si me viceris. | 32. *tecum*, i. e. uti tu pignus de grege ponis; cf. G. 1, 41. 2, 8. A. 1, 675. | 33. *pater*, sc. iniustus, quod ex eo, quod sequitur *iniusta*, repetes; nempe filio peccanti videtur iniustus, qui tantum severus est, cf. Terent. 1, 2, 30 sqq. | 34. *bis*, mane, cum educitur, et vespere, cum reddit pecus in stabula, — *die*, v. 2, 42. | 35. *id quod*, crebrum in parenthesi. | 36. *pocula* duo, ut vs. 44; et solebant paria poculorum haberi. | 37. Alcimedon nomen artificis clari, sed praeterea ignoti; similiter pastor ap. Theocr. 5, 105 crateram a Praxitele factam se habere iactat. Cernimus in ea re vel credulitatem quandam vel comicam vanitatem hominum in tenuissima fortuna viventium; nam ne forte putemus esse has imitationes nobilium artificiorum, vetat vs. 44. | 38. torno res rotundantur; itaque tornus hoc loco i. q. caelum vel scalprum. — in superiore horum poculorum parte sive ora addita s. exsculpta erat vitis, quae explicabat se supra hederam, a qua diffusi corymbi pendebant. — *facili t.* docta et perita manu tractato. | 39. *hed. pallente*, diversum hoc genus a nigra. | 40 sq. Conon Samius clarus fuit mathematicus et astronomus tertio ante Chr. saeculo. — *alter*, Eudoxus Cnidius, Platonis auditor, summus astronomus, cuius Phaenomena agricolarum usibus per Italiam inserviebant, significari videtur. Colum. 9, 14, 12 „in hac raris disciplina sequor Eudoxi et Metonis antiquorumque fastos astrologorum.“ — *radius* geometrarum, hic astronomi, virga est, qua figuras

- Tempora quae messor, quae curvus arator haberet?  
 Necdum illis labra admovi, sed condita servo.  
 D. Et nobis idem Alcimedon duo pocula fecit,  
 45 Et molli circum est ansas amplexus acantho,  
 Orpheaue in medio posuit silvasque sequentis.  
 Necdum illis labra admovi, sed condita servo.  
 Si ad vitulam spectas, nihil est, quod pocula laudes.  
 M. Numquam hodie effugies; veniam, quocumque vocaris.  
 50 Audiat haec tantum — vel qui venit, ecce, Palaemon.  
 Efficiam, posthac ne quemquam voce lacessas.  
 D. Quin age, si quid habes, in me mora non erit ulla,  
 Nec quemquam fugio: tantum, vicine Palaemon,  
 Sensibus haec imis, res est non parva, reponas.  
 55 P. Dicite, quandoquidem in molli consedimus herba.  
 Et nunc omnis ager, nunc omnis parturit arbos;  
 Nunc frondent silvae; nunc formosissimus annus.  
 Incipe, Damoeta; tu deinde sequere, Menalca.  
 Alternis dicetis; amant alterna Camenae.  
 60 D. Ab Iove principium Musae; Iovis omnia plena;  
 Ille colit terras; illi mea carmina curae.  
 M. Et me Phoebus amat; Phoebus sua semper apud me  
 Munera sunt, lauri et suave rubens hyacinthus.  
 D. Malo me Galatea petit, lasciva puella,  
 65 Et fugit ad salices, et se cupit ante videri.

in pulvere delineabant. — *orbem caelestem*.] 42. ita, notato siderum ortu et occasu, definierat tempus, quando metendum, quando arandum esset. — *curvus*, curvato corpore incumbens aratro, et sic ipso corporis pondere vomerem terrae altius imprimens.] 45. *molli*, flexili, ut 2, 72.] 46. *sequentes*, ad cantum eius venientes; Hor. Od. 1, 12, 7 sqq.] 48. *ad*, usitatum in comparando. „Tuum pignus cum meo comparatum leve est“ Quod iam Men. vs. sq. ita interpretatur, quasi subterfugere Damoetas certamen velit.] 49. *Numquam*, gravius simplici negatione; cf. A. 2, 670. — *veniam*, q. v.: declarant haec promptum ad quidvis audendum animum; elatusque certa victoriae spe se quoque vitulae pignore certaturum significat; vs. 32 et 109.] 50. *Aud. h. t.* — volebat subiicere nomen pastoris alicuius, qui arbiter esset certaminis, cum circumspicienti se offert Palaemon.] 52. Theocr. 5, 78 „Εἰα λέγ', εἴ τι λέγεις.“] 53. nec tuum, nec cuiusquam certamen fugio.] 54. Attendas acerrime ad certamen nostrum. — *res e. n. parva*; spectant haec ad magnum victoriae praemium, vitulam.] 56. Bion. Idyll. 6, 17.] 58. Theocr. 9, 1 sq.] 59. *δι' ἀμοιβῶν* Theocr. 8, 61. — *amant a. c.*, Hom. Il. 1, 604.] 60. Theocr. 17, 1. A laudibus Iovis carminum initium facere, sollemne erat antiquioribus. — *Iovis o. p.* cf. G. 4, 220 sqq. Aratus Phaenomen. 2 sqq. „μεστὰ δὲ Διὸς πᾶσαι μὲν ἄγναι, Πᾶσαι δ' ἀνδρῶν ἄγοραι· μεστὴ δὲ θάλασσα καὶ λιμένες.“] 61. Iovi grati acceptique sunt ruricolae, pastores pastorumque carmina.] 62. Modestius respondet Men., cum Dam. superbius iactasset Iovi placere sua carmina. cf. Theocr. 5, 80–83. eadem est sententiarum iunctura ap. Theocr. etiam 4, 9 sq.] 63. v. 2, 24. — *sua*, quae Phoebus ipse sua esse voluit; cf. Ovid. Met. 1, 557 sqq. et 10, 162 sqq. — Sequuntur quina carmina amatoria, 64–83, quae non ad ipsos eorumque amores referri debeat, sed ficta sunt ab ipsis, aut ab aliis audita.] 64. Theocr. 5, 88. Mala Veneri sacra; quare malo petere, mala mittere, amantium est.] 65. *Et f. ad s.*, amantium est etiam delitescere; Plant. Rud. 2, 5, 9 „Amat

- M. At mihi sese offert ultro, meus ignis, Amyntas,  
Notior ut iam sit canibus non Delia nostris.  
D. Parta meae Veneri sunt munera: namque notavi  
Ipse locum, aëriae quo congessere palumbes.  
70 M. Quod potui, puero silvestri ex arborē lecta  
Aurea mala decem misi; cras altera mittam.  
D. O quotiens et quae nobis Galatea locuta est!  
Partem aliquam, venti, divom referatis ad auris!  
M. Quid prodest, quod me ipse animo non spernis, Amynta,  
75 Si, dum tu sectaris apros, ego retia servo?  
D. Phyllida mitte mihi: meus est natalis, Iolla;  
Cum faciam vitula pro frugibus, ipse venito.  
M. Phyllida amo ante alias; nam me discedere flevit,  
Et Longum, formose, vale, vale, inquit, Iolla.  
80 D. Triste lupus stabulis, maturis frugibus imbres,  
Arboribus venti, nobis Amaryllidis irae.  
M. Dulce satis humor, depulsis arbutus haedis,  
Lenta salix feto pecori, mihi solus Amyntas.  
D. Pollio amat nostram, quamvis est rustica, Musam:  
85 Pierides, vitulam lectori pascite vestro.  
M. Pollio et ipse facit nova carmina: pascite taurum,  
Iam cornu petat et pedibus qui spargat arenam.  
D. Qui te, Pollio, amat, veniat, quo te quoque gaudet;

hercle me, ut ego opinor: delituit mala.“] 66. 10, 38. ] 67. *Delia*, nomen amicae, quae saepe ad pastorem suum veniebat. ] 68. *Veneri*, puellae amatae, Galatae; ut *amor*, is, quem amamus. ] 69. *Ipse*, mea manu, puta, incidens signum aliquod in arbore. — *aëriae*, in alto nidificantes; v. 1, 59. — *congessere*, nidum. ] 70. *puero*, Amyntae. ] 71. Theocr. 3, 10. — *misi*, tuli et donavi, cf. 9, 6. Terent. Phorm. 1, 1, 16, ubi Donatus „*mittere* proprie de muneribus,“ item πέμπειν. — *altera*, sc. decem. ] 73. Particulam saltem aliquam ex illis blande dictis promissisque referatis ad aures deorum, ut hi testes sint et Galateam in fide contineant. ] 74. *ipse* rem per se spectatam denotat: scio equidem, si animum tuum solum per se specto, amari me a te; sed si fructum amoris specto, non eum inde capio, quem velim; cupit enim semper una esse cum illo. ] 75. v. 2, 29. Ad retia maneo, ad quae compellis apros. ] 77. Significatur sacrum ambarvale; v. 5, 67. 74. — *faciam vitula*, vitulam sacrificabo; Plaut. Stich. 1, 3, 96 „*quot agnis fecerat?*“ plene Livius in carmine Marci vatis et in senatus consulto 25, 12 „*Graeco ritu hostiis sacra faciant*“ et „*sacra facerent Apollini bove aurato*“ cet. Festus grammaticus: „*Ambarvalis hostia est, quae rei divinae causa circum arva ducitur ab iis, qui pro frugibus faciunt.*“ Ceterum dicta haec sunt cum irrisione; die enim natali indulgebant genio atque amoribus, in sacris autem deorum, ad quae Iollam invitat, omnia debebant esse casta. ] 78 sq. ita illa discessum meum aegre tulit, ut potius Iollae valedixerit, me secutura. — *longum vale*, in longum vel sempiternum vale. — *formosum* appellat cum quadam cavillatione. — *valē inq.* cf. 2, 65. 6, 44. G. 1, 281. A. 3, 211 cet. ] 80. cf. Theocr. 8, 57 sqq. — *Triste lupus*, Graecismus; Hom. Il. 2, 204. cf. 7, 22. A. 4, 569. ] 82. *depulsis*, a lacte et ubere materno remotis. ] 85. pascite vitulam, pro Pollionis, lectoris vestri, salute sacrificandam. Ex more Musae aut dicuntur aut iubentur facere id, quod ipse poeta aut facit, aut, ut faciat, se admonet. ] 86. *nova*, praeclara, qualia numquam antea facta; fuit autem P. poeta tragicus. ] 87. cf. A. 9, 629 et G. 3, 234. ] 88. *quo te q. gaudet*, sc. pervenisse, ad eandem, quae illi

Mella fluant illi, ferat et rubus asper amomum.

- 90 m. Qui Baviū non odit, amet tua carmina, Maevi,  
Atque idem iungat vulpes et mulgeat hircos.

d. Qui legitis flores et humi nascentia fraga,  
Frigidus, o pueri, fugite hinc, latet anguis in herba.

m. Parcite, oves, nimium procedere: non bene ripae

- 95 Creditur; ipse aries etiam nunc vellera siccāt.

d. Tityre, pascentis a flumine reice capellas:

Ipse, ubi tempus erit, omnis in fonte lavabo.

m. Cogite ovis, pueri; si lac praeceperit aestus,

Ut nuper, frustra pressabimus ubera palmis.

- 100 m. Heu, heu, quam pingui macer est mihi taurus in ervo!

Idem amor exitium pecori pecorisque magistro.

m. His certe neque amor caussa est; vix ossibus haerent.

Nescio quis teneros oculus mihi fascinat agnos.

d. Dic, quibus in terris — et eris mihi magnus Apollo —

- 105 Tris pateat caeli spatium non amplius ulnas.

m. Dic, quibus in terris inscripti nomina regum

Nascantur flores: et Phyllida solus habeto.

p. Non nostrum, inter vos tantas componere lites.

Et vitula tu dignus, et hic. — Et quisquis amores

- 110 Haud metuet, dulcis aut experietur amarus.

Claudite iam rivos, pueri: sat prata biberunt.

contigit, praestantiam.] 89. Exprimatur his verbis aurei saeculi felicitas.] 90. Bavius et Maevius mali poetae, obrectatores Virgilii.] 91. Sunt haec proverbiales locutiones, rem plane ineptam et absurdam denotantes. — *iungat* ad arandum.] 92 sqq. Sequuntur sententiae temere arreptae, ut se certanti Damoetae offerebant.] 93. *Frigidus*, Theocr. 15, 58.] 94. *Parcite*, nolite.] 95. documento est ipse dux vester aries, quem iis, quos ducit, cautiorem esse par erat; v. A. 2, 394.] 96. *reice*, pro reice; sic alii *ēicit*, *deicit*, pro eiicit, deiecit.] 97. Theocr. 5, 146. v. 1, 39.] 98. *Cogite* ad umbram et frigus captandum; aestus siccāt ubera.] 102. Theocr. 4, 15. — *neque*, i. e. *ne* ... *quidem*: tui quidem tauri laborant malo, cui occurri potest; meis agnis ne illud ipsum quidem, quamvis sit magnum, causa est maciei, sed maius: fascinatio.] 103. oculis invidorum ac malevolorum fascinandi vis inesse credebatur.] 104. Veteres interpretes, Servius ac Philargyrus, narrant Caelium quendam, decoctorem Mantuanum, omnibus, quae possederat, divenditis, nihil nisi locum, quo sepeliretur, sibi reservasse; hoc ipsum sepulcrum, spatium fere trium ulnarum capiens, designari a Damoeta, et totum aenigma versari in nomine Caelii sive *Caeli*, v. 1, 33.] 106. *regum*, Aiakis et Hyacinthi, qui erant filii regum; Ovid. Met. 10, 206—208. In flore hyacinthi literae *AI* et *T* conspici videbantur. — *inscripti nomina*, nomina inscripta habentes; G. 2, 131. A. 1, 228. *ardentes corpora* G. 4, 99. 338. *faciem mutatus* A. 1, 658. *lacerum ora manusque* 6, 495. *pictus chlamydem* 9, 582. *labant vestigia* 10, 283. *saturata dolorem* 5, 608.] 107. cf. vs. 76. et 78.] 109 sq. qui non fugit amores, ad utrumque paratus esse debet, ut aut dulces experiatur, aut amarus. Tangit Pal. diversa horum pastorum in amore fata; cf. vs. 76 sqq. 80 sqq. 101. 107. Ceterum facile sentis parum haec loco convenire nec videri ita scripta fuisse a Virgilio. Pro *Haud metuet* Virgilium *Haud temnet dulcis*, *haud* scripsisse suspicatur O. Ribbeck.] 111. Exisse Palaemon villicus existimandus est servis imperatum, ut rivos ad irriganda prata aperirent, quos nunc claudi iubet.

## E C L O G A IV.

**POLLIO.**

Sicelides Musae, paulo maiora canamus!  
 Non omnis arbusta iuvant humilesque myricae;  
 Si canimus silvas, silvae sint Consule dignae.

- Ultima Cymaei venit iam carminis aetas;  
 5 Magnus ab integro saeculorum nascitur ordo.  
 Iam redit et Virgo, redeunt Saturnia regna;  
 Iam nova progenies caelo demittitur alto.  
 Tu modo nascenti puero, quo ferrea primum  
 Desinet ac toto surget gens aurea mundo,  
 10 Casta fave Lucina: tuus iam regnat Apollo.

**Ecloga IV.** Ingentibus malis afflicta erat tota Italia, primum ex agrorum divisione, — vide quae praefati sumus Ecl. I. — tum ex inimiciis inter Antonianos et Octavianum agitatissimis ortoque inde sub exitum autumnus a. p. u. c. 713 bello Perusino, denique ex fame atrocissima, intercluso omni per Sext. Pompeium ac L. Domitium Ahenobarbum comaeatu, quorum ille Siciliam et inferum mare, hic superum obtinebat. Tanto maiorem laetitiam attulit foedus Brundisium, autumno a. 714 ictum, quo aetata est inter Antonium et Octavianum concordia. Adhibuerat Antonius ad componendam illam pacem Asinium Pollionem. Is paulo post Romam reversus consulatum iniit, sub idemque tempus filium sustulit. Obtinnerat iam antea fama, novam instare mundi aetatem. Cum autem Italia Pollionis maxime opera ex miseris suis emersisse videretur, ita per Ecl. IV. poeta consulatum Pollioni gratulatur, ut eum tanquam auspicem et ducem novae istius aetatis novique rerum ordinis praedicet atque in huius rei signum puerum ei natum esse augeretur. || 1. *Sicelides*: pastoritii carminis praesides; Sicilia enim, patria Theocriti, bucolici carminis parens habetur. cf. Bion. Idyll. 15, 1. Mosch. Idyll. 3, 8 „Σικελικὰ Μοῖσαι.“ || 2 sq. Non omnium personis dignum hoc carminis genus; itaque si tanto nomine inscribendum est eiusmodi carmen, sit hoc ita comparatum, ita supra vulgarem modum elatum, ut ne dedecet viri summi, consulis, dignitatem. || 4. *Ult. Cym. carm. aetas*: Sibylla Cumana carminibus suis discreverat decem saecula sive aetates generis humani; ea saecula impari erant spatio, alia longiora, alia breviora. Eo ipso, quo haec scribebat Virgilius, tempore decimum agi putabatur, et Volcatius haruspex anno 710 dixerat adesse exitum noni, initium decimi saeculi, cui praeesse Apollo existimabatur. Eiusmodi aetas, qualem decem saeculis complexa erat Sibylla, respondet magno illi anno, quem statuerunt Plato et qui hunc sequebantur. Exacto autem hoc magno anno novus revolvitur credebatur ordo saeculorum, qui item ac pristinus inciperet ab aurea aetate. || 6. *Iam redit*: laetabundus poeta animo praecipit eum reditum, qui exacta decima aetate futurus erat, tanquam iam praesentem. — *Virgo*, Astraea s. Iustitia, Ἀτρη. Ovid. Met. 1, 149 sq. G. 2, 473. — *redeunt* pro repetenda copula: *et Virgo et Sat. regna*; cf. A. 7, 75. 327. 8, 91. 10, 314. 11, 171. 12, 548. Propert. 4, 10, 19 „Idem equus et frenis, idem fuit aptus aratris,“ i. e. Idem aptus et frenis et aratris. — Saturno in Italia regnante aureum saeculum fuisse credebatur; Tibull. 1, 3, 35 sqq. G. 2, 538. || 7. novum et melius hominum genus deorum beneficio existet, v. vs. 9. || 8. *puero*, Gallo, Asinii filio. — *quo f. p. des.*, cuius ortu terminatur aetas ferrea. || 9. *gens aurea*, Cic. de Nat. Deor. 2, 63 „ab illo aureo genere, ut poetae loquuntur.“ Hesiod. *Egy.* vs. 109 χρύσειον γένος μερόπων ἀνθρώπων. Theocr. 12, 15 χρύσειοι ἄνδρες. cf. G. 2, 538. — *mundo*, orbe terrarum. || 10. *Lucina*, quippe quae nascentibus adesse putaretur; eadem credita, quae Diana, soror Apollinis; hinc *tuus*, frater. Servius: „Ultimum saeculum ostendit, quod Sibylla Solis esse memoravit.“ Discretum autem prius Solis et Apollinis numen

- Teque adeo decus hoc aevi, te Consule, inibit,  
 Pollio, et incipient magni procedere menses;  
 Te duce, si qua manent sceleris vestigia nostri,  
 Inrita perpetua solvent formidine terras.
- 15 Ille deum vitam accipiet divisque videbit  
 Permixtos heroas et ipse videbitur illis,  
 Pacatumque reget patriis virtutibus orbem.  
 At tibi prima, puer, nullo munuscula cultu  
 Errantis hederas passim cum bacchare tellus
- 20 Mixtaque ridenti colocasia fundet acantho.  
 Ipsae lacte domum referent distenta capellae  
 Ubera, nec magnos metuent armenta leones.  
 Ipsa tibi blandos fundent cunabula flores.  
 Occidet et serpens, et fallax herba veneni
- 25 Occidet; Assyrium volgo nascetur amomum.  
 At simul heroum laudes et facta parentis  
 Iam legere et quae sit poteris cognoscere virtus:  
 Molli paulatim flavescet campus arista,  
 Incultisque rubens pendebit sentibus uva,
- 30 Et durae quercus sudabunt roscida mella.  
 Pauca tamen suberunt priscae vestigia fraudis,  
 Quae temptare Thetim ratibus, quae cingere muris  
 Oppida, quae iubeant telluri infindere sulcos.  
 Alter erit tum Tiphys et altera quae vehat Argo
- 35 Delectos heroas; erunt etiam altera bella,  
 Atque iterum ad Troiam magnus mittetur Achilles.  
 Hinc, ubi iam firmata virum te fecerit aetas,  
 Cedet et ipse mari vector nec nautica pinus

postea saepe confusum est. | 11. *decus h. aevi*, praeclara haec aetas, *inibit*, initium capiet. | 12. *magni menses*, utpote partes magni anni. | 13. *Te duce*, inde a tuo consulatu. — *sceleris*, puta, pristinae discordiae civilis; nondum autem ab armis recesserat S. Pompeius. | 14. *Irrita*, abolita liberabunt genus humanum formidine. | 15. *Ille*, puer, aget vitam deorum et versabitur inter deos heroasque. Hesiod. *Epy.* 112 sqq. Ovid. *Fast.* 1, 247 sq. | 16. *illis*, sc. permixtus. | 17. ad summos in pacata ac denuo confirmata republica honores olim evectus, patriis, i. e. iisdem, quibus pater splendet Pollio, virtutibus eam gubernabit. | 18 sqq. Felicitas aureae huius vitae initia capiet cum pueritia Galli, incrementa (vs. 26 sqq.) cum adolescentia, consummabitur (vs. 37 sqq.) cum virili eiusdem aetate. — *nullo cultu*, uti omnia in saeculo aureo nascebantur; Hesiod. *Epy.* 117 sq. Ovid. *Met.* 1, 109 sq. | 20. *ridenti*, sua pulchritudine oculos delectante. | 21. *Ipsae*, sponte, nullo ducente; ut paullo post *Ipsa*, nullo serente. | 25. *amomum* in Armenia et Media nascitur; Assyriae nomine saepe plagae orientales a poetis appellantur. | 26. *simul i. q. simulac.* | 27. et virtutem (s. *quae sit virtus*) cognoscere poteris ex illorum factis. | 28. *molli a.*, levi et glabra, non acutis quibusdam acubus vallata; non opus his erit amplius ad arcendas aves in tam affluenti omnium rerum copia. | 30. *querc. sud. rosc. mella*: putabatur mel aurea aetate roris modo de foliis quercuum stillasse; G. 1, 131. Ovid. *Met.* 1, 112 et v. G. 4, 1. | 32 sqq. Similis erit haec aetas heroicae. — *Thetim*, mare; Ovid. *Met.* 1, 94 sqq. Tibull. 1, 3, 37. | 34. Tiphys gubernator Argus. | 38 sq. Non opus erit impor-

- Mutabit merces: omnis feret omnia tellus.
- 40 Non rastros patietur humus, non vinea falcem;  
Robustus quoque iam tauris iuga solvet arator;  
Nec varios discet mentiri lana colores,  
Ipse sed in pratis aries iam suave rubenti  
Murice, iam croceo mutabit vellera luto;
- 45 Sponte sua sandyx pascentis vestiet agnos.  
Talia saecula, suis dixerunt, currite, fuis  
Concordes stabili fatorum numine Parcae.  
Adgredere o magnos — aderit iam tempus — honores,  
Cara deum suboles, magnum Iovis incrementum!
- 50 Aspice convexo nutantem pondere mundum,  
Terrasque tractusque maris caelumque profundum,  
Aspice, venturo laetantur ut omnia saeclo!  
O mihi tam longae maneat pars ultima vitae,  
Spiritus et, quantum sat erit tua dicere facta:
- 55 Non me carminibus vincet nec Thracius Orpheus,  
Nec Linus, huic mater quamvis atque huic pater adsit,  
Orphei Calliopea, Lino formosus Apollo.  
Pan etiam, Arcadia mecum si iudice certet,  
Pan etiam Arcadia dicat se iudice victum.
- 60 Incipe, parve puer, risu cognoscere matrem:  
Matri longa decem tulerunt fastidia menses;  
Incipe, parve puer: cui non risere parentes,  
Nec deus hunc mensa, dea nec dignata cubili est.

tandis mercibus; omnia enim domi nascentur.] 42. *mentitur l. colores*, utpote non suos referens, sed quibus tincta est.] 43 sqq. Oves iam carpent feliciores herbas, et ita fiet, ut inter pascendum sponte trahant eos colores, qui summo in pretio habentur. Murex, lutum, sandyx, mera hic sunt colorum nomina, non herbarum.] 46. adverte brachylogiam poetae *currite* cum accusativo iungentis; *currile saecula*, i. e. currentes volute s.] 47. Concordes propter stabilem certamque Fati voluntatem.] 48. v. vs. 17.] 49. *deum s.*, cf. vs. 7. — *m. l. incr.*, θεῶν, Διὸς *ῥέμμα*, qui divinitus dignitate et honore praeter ceteros mactatus est; unde *διοτρεφεῖς βασιλῆς* apud Homerum.] 50—52. Videtur sibi poeta videre mundum, *convexum* a caeli omnia complectentis specie dictum, tamquam numinis adventu et apparentia (ut hoc utar vocabulo), moveri ac nutare, quod laetum est ac faustum signum. — *Terrasque*, ut G. 1, 153. 164. 352. A. 3, 91. 4, 146. 9, 767. cet. — *Alii laetentur*; Indicativo res significatur ipso adspectu testificata, ut E. 5, 7. A. 8, 192.] 54. *Spiritus*, ingenii vis vigorque poeticus.] 57. *Orphei* Dativus Graec.] 58. *Arcadia*: est enim ipse deus Arcadiae; E. 10, 26.] 60—62. Quasi iam natum alloquitur puerum poeta morae desideriique impatiens. Et duplici causa matrem ex risu eius a puero cognosci vult, una, quod matri praegnanti longa fastidia perpetiunda fuerunt, altera, quod risus matris magno erit ad fortunam pueri momento, nam *cui non risere p.* etc. Ceterum matrem risu eius cognoscit puer ita, ut hunc risum mutua arrisione excipiat, quo nullum laborum suorum praemium matri iucundius. — *decem* menses tempus significant, quo exacto gravidae parere solent.] 63. Spectant haec eo, quod hic puer aliquando inter heroas et deos locum habiturus est; cf. vs. 15 sq.



## E C L O G A V.

## DAPHNIS.

## MENALCAS. MOPSUS.

- ME. Cur non, Mopse, boni quoniam convenimus ambo,  
 Tu calamos inflare levis, ego dicere versus,  
 Hic corylis mixtas inter considimus ulmos?
- MO. Tu maior; tibi me est aequum parere, Menalca,  
 5 Sive sub incertas Zephyris motantibus umbras,  
 Sive antro potius succedimus. Aspice, ut antrum  
 Silvestris raris sparsit labrusca racemis.
- ME. Montibus in nostris solus tibi certat Amyntas.
- MO. Quid, si idem certet Phoebum superare canendo?
- 10 ME. Incipe, Mopse, prior, si quos aut Phyllidis ignis,  
 Aut Alconis habes laudes, aut iurgia Codri.  
 Incipe; pascentis servabit Tityrus haedos.
- MO. Immo haec, in viridi nuper quae cortice fagi  
 Carmina descripsi et modulans alterna notavi,  
 15 Experiar. Tu deinde iubeto ut certet Amyntas.
- ME. Lenta salix quantum pallenti cedit olivae,  
 Puniceis humilis quantum saliunca rosetis,  
 Iudicio nostro tantum tibi cedit Amyntas.
- MO. Sed tu desine plura, puer; successimus antro.
- 20 Exstinctum Nymphae crudeli funere Daphnim  
 Flebant; vos coryli testes et flumina Nymphis;  
 Cum complexa sui corpus miserabile nati,  
 Atque deos atque astra vocat crudelia mater.  
 Non ulli pastos illis egere diebus

**Ecloga V.** Anno p. u. c. 712, cum natales Divi C. Iulii Caesaris mense Iulio celebrarentur per Italiam, Virgilius in eius laudem composuit Eclogam V. Vs. 20—44 pertinent ad mortem, vs. 56—80 ad apotheosim Daphnidis, personati Caesaris. Pastoritio carmine cum poeta Caesarem prosequi vellet, non potuit dignius tanto viro nomen deligere, quam Daphnidis, nobilissimi pastoris, qui et pareatem deum habuit, Mercurium, et ipse ad deos receptus est. || 1. Theocr. 8, 4. — *boni inflare*: Statius Silv. 2, 3, 69 „*optimus Condere divitias*“; Eleg. ad Messal. vs. 7 „*expromere cantus Maximus*“; G. 1, 284 „*felix ponere vitem*“; 4. *maior*, natu. | 5. *alii mutantibus*. | 7. *sparsit*, v. 4, 52. | 8. *alii certet*. | 9. *Quid, si certet*, cum irrisione dictum | 11. *Phyllis et Alcon* ficta nomina; non item Codrus, malus poeta et obtrectator Virgilii; 7, 26. cf. 3, 90. | 12. *servabit*, tuebitur. | 13. cf. 10, 53 sq. | 14. *mod. alt. not.*: dum simul modulator, i. e. modos sive numeros musicos facio inter describenda verba, cum ipsis versibus modos alternans notavi; cf. 1, 2. | 15. cf. vs. 9. — *alii iubeto certet*, omisso ut. | 16. *pallenti*, frondem subviridem habenti; 6, 54. | 21. v. 1, 39. | 22. *complexa*, sc. est. | 23. deos vocat, i. e. dicit, crudeles, astra item crudelia; G. 4, 356 „et te crudelem nomine dicit.“ Astra quandam ad hominum fata vim habere putabantur. — *mater*, Venus, parens Iuliae gentis credita; cf. 9, 47. | 24 sqq. In ceteris, quibus caedes denuntiata est Caesari, prodigiis hoc memoratur a Suetonio Iul. c. 81 „Proximis diebus equorum greges, quos in traiciendo Rubicone flumine conse-

- 25 Frigida, Daphni. boves ad flumina; nulla nec amnem  
Libavit quadrupes, nec graminis attigit herbam.  
Daphni, tuum Poenos etiam ingemuisse leones  
Interitum montesque feri silvaeque loquuntur.  
Daphnis et Armenias curru subiungere tigris
- 30 Instituit, Daphnis thiasos inducere Bacchi  
Et foliis lentas intexere mollibus hastas.  
Vitis ut arboribus decori est, ut vitibus uvae,  
Ut gregibus tauri, segetes ut pinguibus arvis:  
Tu decus omne tuis. Postquam te fata tulerunt,
- 35 Ipsa Pales agros atque ipse reliquit Apollo.  
Grandia saepe quibus mandavimus hordea sulcis,  
Infelix lolium et steriles nascuntur avenae;  
Pro molli viola, pro purpureo narcisso,  
Carduus et spinis surgit paliurus acutis.
- 40 Spargite humum foliis, inducite fontibus umbras,  
Pastores; mandat fieri sibi talia Daphnis;  
Et tumultum facite, et tumulto superaddite carmen:  
Daphnis ego in silvis, hinc usque ad sidera notus,  
Formosi pecoris custos, formosior ipse.
- 45 ME. Tale tuum carmen nobis, divine poeta,  
Quale sopor fessis in gramine, quale per aestum  
Dulcis aquae saliente sitim restinguere rivo.

crarat ac vagos et sine custode dimiserat, comperit pertinacissime pabulo abstinere ubertimque flere.“] 26. *graminis herb.*, i. e. recens ac tenerum gramen; cf. G. 1, 134.] 27. Caesarem si poeta sub alicuius pastoris persona latere voluit, non potuit is pastor alius esse, quam ille omnium nobilissimus Daphnis. Verum ita differt hic Virgilianus Daphnis a Siculo illo, ut nulla ei certa sedes assignetur resque et in Asia et in Africa gessisse dicatur; ita nihil erit offensionis nec in Armeniis tigribus nec in leonibus Poenis. Facta autem et merita Daphnidis extollens poeta bonas leges atque sapienter instituta ostendere videtur, quibus Caesar rempublicam auxit.] 29—39. Omnis hic locus eo redit, ut Daphnis rem pastoritiam excoluisse ac vitium culturam apud suos instituisse dicatur; cum hac coniunctus erat Bacchi cultus. Haec autem ita spectant Caesarem, ut ipsa natura per eius numen laetorem induisse vultum, sed eundem, illo extincto, mutasse dicatur.] 29. Bacchi ritu vehi tigribus currui iunctis. — *curru* Dativus pro *currui*, ut A. 1, 156. 3, 541. 4, 369.] 30. *inducere*, instituere, *διαδοῦς εἰσάγειν*. Servius, quod a nullo praeterea proditum est memoriae, scribit „Caesarem constat primum sacra Liberi patris transtulisse Romam.“] 31. *foliis*, viteis et hederaceis. — *lentas*, teretes et flexiles. — *hastas*, hastilia, stipites. — Describitur thyrsus, quem bacchantes gestabant.] 32. Theocr. 8, 79 sq. v. 2, 70.] 33. Ovid. Art. Am. 1, 290 „armenti gloria taurus.“ Tibull. 4, 1, 208.] 34. *tulerunt*, sustulerunt; Hom. Il. 2, 302.] 35. *Apollo* Nomius, qui praesidet pascuis, *ταῖς νομαῖς*, et v. G. 3, 1.] 36. *Grandia*, ad serendum selecta; G. 1, 197—99.] 37. *Infelix*, infecundum. — *hordeum* in lolium et avenam degenerare, opinio veterum fuit; G. 1, 154. — *steriles*, intelligenda est avena fatua Linnaeo dicta, *wilder Hafer*, Gall. *haveron*. — *nascuntur*, sc. in iis sulcis, quibus *est*.] 38. *moll. v.*, quae coloris teneritate sensum mollior afficit; et significatur τὸ λευκὸν τοῦ s. λευκοῦ.] 40 sqq. Locum, ubi Daphnis sepultus est, frondibus conspergi et arbores circum fontem, ad quem humatus est, seri tumultumque constitui vult. Solebant ruri sepulcra ad fontes fieri arboresque circumseri.] 43 sq. Theocr. 1, 120 sq. — *in silvis*, v. 1, 2.] 47. *quale restin-*

- Nec calamis solum aequiparas, sed voce magistrum.  
 Fortunate puer, tu nunc eris alter ab illo.
- 50 Nos tamen haec quocumque modo tibi nostra vicissim  
 Dicemus Daphnimque tuum tollemus ad astra:  
 Daphnin ad astra feremus: amavit nos quoque Daphnis.  
 MO. An quicquam nobis tali sit munere maius?  
 Et puer ipse fuit cantari dignus, et ista
- 55 Iam pridem Stimicon laudavit carmina nobis.  
 ME. Candidus insuetum miratur limen Olympi  
 Sub pedibusque videt nubes et sidera Daphnis.  
 Ergo alacris silvas et cetera rura voluptas  
 Panaque pastoresque tenet Dryadasque puellas.
- 60 Nec lupus insidias pecori, nec retia cervis  
 Ulla dolum meditantur; amat bonus otia Daphnis.  
 Ipsi laetitia voces ad sidera iactant  
 Intonsi montes; ipsae iam carmina rupes,  
 Ipsa sonant arbusta: deus, deus ille, Menalca!
- 65 Sis bonus o felixque tuis! en quattuor aras:  
 Ecce duas tibi, Daphni, duas altaria Phoebo.  
 Pocula bina novo spumantia lacte quot annis  
 Craterasque duos statuam tibi pinguis olivi,  
 Et multo in primis hilarans convivium Baccho,
- 70 Ante focum, si frigus erit, si messis, in umbra,  
 Vina novum fundam calathis Ariusia nectar.  
 Cantabunt mihi Damoetas et Lyctius Aegon;  
 Saltantis Satyros imitabitur Alphesiboeus.

*guere, οἶον τὸ σβέσαι.* | 48. *sed*, quod maius est, ipsa voce, ipsa carminibus. — *magistrum*, ipsum Daphnidem; cf. vs. 51 sq. | 49. v. 2, 38. | 50. *nostra*, mea carmina. | 51. *tollemus ad astra*, summis laudibus celebrabimus; cf. vs. 43. A. 3, 462. | 54. pueri iuvenes pastores appellantur etiam vs. 19 et 49. | 56. *Candidus*, ut deus; sunt enim dei insignes candore. — *Olympus*, arx caeli, ubi dii habitare putabantur. | 58. *cetera*, quia rus silvas et pascua complectitur; et v. 1, 2. | 60. Cum illa voluptate coniuncta est summa securitas. Theocr. 24, 84 sq. | 61. *bonus*, benignus, ut vs. 65. A. 12, 647. | 62 sqq. v. 1, 39. | 63. *Intonsi*, silvosi, incaedui. | 65. v. vs. 61. — *felix*, propitius, ut A. 1, 330. | 66. plures arae ponuntur, ut plura sacrificia fieri una possint; cf. G. 4, 538 sqq. — *duas altaria*, cum altaribus, in quibus victimae crementur; in sola ara tus, fruges et similia diis offeruntur. — *Phoebo*, quod Iul. Caesaris natalis (III Id. Iul.) in ludos Apollinares incidit. | 67 sqq. Ad bina praeterea sollempnia Daphnidem adhibiturus et libationibus deventuraturus est Menalcas, ad Ambarvalia, quae fiunt extremo Aprilis, incipiente iam in Italia messe, et ad Liberalia, exeunte autumnio celebrari solita; huc spectant illa *si frigus erit, si messis* vs. 70. Et cum Laribus suae essent in utraque sollempnitate partes, cf. Tibull. 1, 1, 19 sqq. et 2, 1, 17. coll. 1, 10, 15, pro Lare a se cultum iri Caesarem significat Men.; v. 1, 44. | 67. *pocula bina*: bina in singulis aris, ut in epulis solebant singulis convivis bina poni; *duos autem crateras*, i. e. in singulis aris singulos. | 69. *convivia*, epulae post sacrificium. | 71. *Ariusia* ex promontorio et tractu Ariusio in insula Chio. Qui eiusmodi epulis intererant, in mensis secundis generosius vinum libabant, v. G. 2, 101 sq. — *nectar* illud dicit, ut vinum dulcissimum, *novum*, ut ruri nondum cognitum. | 72. *Lyct*. Lycto, oppido Cretae, oriundus. | 73. Satyri, numina ruralia,

- Haec tibi semper erunt, et cum sollemnia vota  
 75 Reddemus Nymphis, et cum lustrabimus agros.  
 Dum iuga montis aper, fluvios dum piscis amabit,  
 Dumque thymo pascentur apes, dum rore cicadae,  
 Semper honos nomenque tuum laudesque manebunt.  
 Ut Baccho Cererique, tibi sic vota quot annis  
 80 Agricolae facient; damnabis tu quoque votis.  
 mo. Quae tibi, quae tali reddam pro carmine dona?  
 Nam neque me tantum venientis sibilus austri,  
 Nec percussa iuvant fluctu tam litora, nec quae  
 Saxosas inter decurrunt flumina valles.  
 85 ME. Hac te nos fragili donabimus ante cicuta.  
 Haec nos, Formosum Corydon ardebat Alexim,  
 Haec eadem docuit, Cuium pecus? an Meliboei?  
 mo. At tu sume pedum, quod, me cum saepe rogaret,  
 Non tulit Antigenes — et erat tum dignus amari —  
 90 Formosum paribus nodis atque aere, Menalca.

## ECLOGA VI.

## VARUS.

## Prima Syracosio dignata est ludere versu

Bacchi comites, quorum commode fit mentio in sacris ad deos agrestes, in primis Bacchum, pertinentibus. | 74. Hic honos semper tibi habebitur, et cet. — *sollemnia*, quae quotannis nuncupari solent; cf. vs. 79 sq. | 75. Nymphas quoque Liberalibus veneratos esse pastores hinc discitur. Theocriteus quoque pastor 5, 53 sq. crateram lactis et alteram olei ponit Nymphis. — *reddemus*, solvemus. — *cum lustr. agros*: significantur Ambarvalia; *lustrare* proprie est *ambire, circumire*; ducebatur enim hostia circum agros; itaque lustratio agrorum in eo versabatur, quod ducta circum agros hostia sacrum faciebant diis ruralibus eosque precabantur, ut omnia mala a frugibus, pecore et agrestium turba arcerent; rem totam optime cognosces ex Tibull. 2, 1. G. 1, 343 sqq. | 77. cicadas, succum ex floribus et foliis sugentes, rore vivere veteres credebant. | 80. *damnabis votis*, s. *voti*, i. e. quibus contigerit id, quod per te sibi contingere cupierunt, eos obligabis tuo beneficio, ut solvant tibi, quod voverint. | 85. *cicuta*, cf. 2, 36. | 86. *Haec* — *docuit*, ad hanc modulatus sum E. II. et III.; cf. 10, 34. 51.

**Ecloga VI.** Scripta est haec Ecloga a. 714. p. u. c. et missa Alfenio Varo, qui cum Corn. Gallo poeta Galliae Cisalpiniae ab Octaviano praefectus negotium agrorum dividendorum ibi curabat. Vix licet dubitare, quin Varus Virgilium ad epicum carmen (cf. vs. 3) componendum hortatus sit, in quo ipsius Vari res bello civili gestae locum habiturae essent, cf. vs. 6 sq. Sed poeta, ab Apolline se admonitum fingens, pro epico carmine mittit Varo bucolicum, in quo Silenus primum originem mundi canit, tum insignes quasdam ex antiquissimis fabulis attingit. || 1 sqq. Ad humile et tenue se carmen, bucolicum, natura ferri, a graviore genere carminum abhorрere ingenium suum significat poeta. — *Prima*, Adiectivum pro Adverbio, *primum*, ut G. 1, 12. A. 6, 811. 8, 59 et v. A. 4, 494. Primum poeta ad bucolicum genus se applicuerat; aliud deinde cum temptaret, vs. 3, revocatum se ab ipso Apolline fingit vs. 4 sq. — *Syracosio*, v. 4, 1. Syracusis natus erat Theocritus. *Συρακόσιαι* antiquior huius nominis forma. |

- Nostra nec erubuit silvas habitare Thalia.  
 Cum canerem reges et proelia, Cynthius aurem  
 Vellit et admonuit: Pastorem, Tityre, pinguis  
 5 Pascere oportet ovis, deductum dicere carmen.  
 Nunc ego — namque super tibi erunt, qui dicere laudes,  
 Vare, tuas cupiant et tristia condere bella —  
 Agrestem tenui meditabor arundine Musam.  
 Non iniussa cano. Si quis tamen haec quoque, si quis  
 10 Captus amore leget: te nostrae, Vare, myricae,  
 Te nemus omne canet; nec Phoebo gratior ulla est,  
 Quam sibi quae Vari praescripsit pagina nomen.  
 Pergite, Pierides. Chromis et Mnasylos in antro  
 Silenum pueri somno videre iacentem,  
 15 Inflatum hesterno venas, ut semper, Iaccho;  
 Serta procul, tantum capiti delapsa, iacebant,  
 Et gravis attrita pendebat cantharus ansa.  
 Adgressi — nam saepe senex spe carminis ambo  
 Luserat — iniiciunt ipsis ex vincula sertis.  
 20 Addit se sociam timidisque supervenit Aegle,  
 Aegle, Naiadum pulcherrima, iamque videnti  
 Sanguineis frontem moris et tempora pingit.  
 Ille dolum ridens, Quo vincula nectitis? inquit.  
 Solvite me, pueri: satis est potuisse videri.  
 25 Carmina, quae voltis, cognoscite; carmina vobis,  
 Huic aliud mercedis erit. Simul incipit ipse.  
 Tum vero in numerum Faunosque ferasque videres  
 Ludere, tum rigidas motare cacumina quercus;  
 Nec tantum Phoebo gaudet Parnasia rupes,  
 30 Nec tantum Rhodope miratur et Ismarus Orphea.

2. v. 1, 2. — Thalia praeses carminis bucolici. | 3. aurem V.: in ima aure, quae proprie dicitur auricula, sedes esse memoriae putabatur, Plin. N. H. 11, 103. Nostro quoque more obliviosos similiter admonemus; oblitus autem erat poeta, quid sibi pastori conveniret. | 5. deductum, tenue; proprie vox deduci, i. e. submitti extenuarique, dicitur. | 6. iunge super-erunt; cf. A. 2, 567. 7, 559. G. 2, 349 „Inter enim labentur aquae.“ ib. 351 super-urgerent. adde A. 6, 254. — Et superesse hic dicitur de abundantia, ut A. 11, 420. | 8. v. 1, 2. | 9. Non iniussa, sed iussa ab Apolline; cf. vs. 4 sq. | 10. c. amore l. tali carminum genere delectabitur. — myricae, cf. E. 4, 2. | 12. pagina, liber; carmen Varo inscriptum. | 13. Pergite, agite. — Chromis et Mnasylos Faunorum vel Satyrorum nomina. | 15. Liv. 26, 14 „Impletas cibis vinoque venae.“ | 16. procul, iuxta; non enim ubique procul rem longe remotam indicat; immo tantum capiti delapsa iac., i. e. non haerebant iam in ipso capite, iacebant tamen prope caput. | 17. gravis, magnus quippe et amplus; eumque ille epotaverat; Macrobr. 5, 21 „Scyphus Herculis poculum est, Liberi patris cantharus.“ — attrita, multo usu. — pendebat, semisupinum manu tenebat. | 19. ex ipsis, quae ille gesserat, sertis; cf. vs. 16. | 21. videnti, expergefacto. | 24. satis e. pot. vid., ut videamini me vincere potuisse. | 26. simul, i. e. haec dicens, his dictis, ut G. 4, 359: 381. A. 9, 221. | 27. in num. ludere, ad rhythmum eius cantilenae saltare. | 30. Rhodope et

- Namque canebat, uti magnum per inane coacta  
 Semina terrarumque animaeque marisque fuissent  
 Et liquidi simul ignis; ut his exordia primis  
 Omnia et ipse tener mundi concreverit orbis;  
 35 Tum durare solum et discludere Nerea ponto  
 Coeperit et rerum paulatim sumere formas;  
 Iamque novum terrae stupeant lucescere solem  
 Altius, atque cadant submotis nubibus imbres;  
 Incipiant silvae cum primum surgere, cumque  
 40 Rara per ignaros errent animalia montis.  
 Hinc lapides Pyrrhae iactos, Saturnia regna,  
 Caucasiasque refert volucres furtumque Promethei.  
 His adiungit, Hylan nautae quo fonte relictum  
 Clamassent, ut litus, Hyla, Hyla, omne sonaret;  
 45 Et fortunatam, si numquam armenta fuissent,  
 Pasiphaen nivei solatur amore iuveni.  
 Ah, virgo infelix, quae te dementia cepit!  
 Proetides inplerunt falsis mugitibus agros,  
 At non tam turpis pecudum tamen ulla secuta est  
 50 Concubitus, quamvis collo timuisset aratrum  
 Et saepe in levi quaesisset cornua fronte.  
 Ah, virgo infelix, tu nunc in montibus erras:

*Ismarus* montes Thraciae. | 31 sqq. Canit Sil. primum rerum omnium originem; qua in re poeta Epicurum sequitur. — Duas res a principio fuisse statuit Epicurus: spatium (*magnum inane*, τὸ ἀπειρον κενόν) et atomos. Inane dicitur illud spatium ita, ut continere quidem atomos putaretur, sed eas ipsas tam tenues, ut oculis cerni nullo modo possent, spatium igitur illud vacuum esse videretur. Atomī inter se erant temere mixtae, nondum secretae; haec sunt illa in unum coacta rerum semina. Certis autem paribusque atomorum generibus paulatim inter se coeuntibus existerunt, quae vulgo dicuntur elementa rerum, ignis, aqua, aer, terra. | 32. *animae*, aeris; *maris*, aquae. | 33. *liquidi*, utpote ex tenerrimis atomis orti. — *primis*, principiis s. materiā rerum, unde ductum omne initium rerum, *exordia omnia*. | 34. *tener*, v. vs. 33. — *mundi orbis*, caelum, v. 4, 50. | 35. *durare*, durescere. — *Nerea*, i. q. aquas. — *discl. ponto*, discretas includere mari. | 38. *Altius*, quippe a terra separatum (solem) et altiore loco positum. Nempe quae ante sociata erant mixtaeque, ea nunc sunt disiuncta, quorum alia iam altiozem, alia inferiorem tenent locum; atque huic *altius* respondent *submotae nubes*, sursum evectae scilicet. | 39. *canit cum incipiant pr. surgere*, canit surgentes silvas, s. originem silvarum. | 40. *ignaros*, expertes antea animalium. | 41 sq. de ordine rerum v. A. 10, 38. — *Saturnia regna*, saeculum aureum; v. 4, 6. Ceterum probabilius est Virgilium *Saturniaque* r. scripsisse. Cf. Ovid. Met. 1, 348—415. | 42. Prometheus ignem Iovi furatus dederat hominibus; quapropter Iovis iussu Caucaso affixus est; aquila autem quotidie iecore eius, per noctem rursus crescente, vescebatur. — *Cauc. volucres*: Plurali, ut solet, in circumlocatione usus *unam* significat aquilam poeta; v. 3, 7. | 43 sq. Cum Argonautis in Colchidem navigans Hercules Hylan, puerum a se amatum, a Nymphis raptum amisit. | 46. *Pasiphaen*, uxorem Minois, matrem Minotauri. — *solatur*, canit Pasiphaen se amore tauri solantem, i. e. solatium sui ardoris et voluptatem ex amore tauri capientem. Poetae ipsi facere dicuntur, quod factum canunt; cf. vs. 62 sq. E. 9, 19. | 47. *virgo* hic de iam nupta, item *puella*, G. 4, 458. | 48. Proeti, regis Tirynthii, filiae insanientes in vaccas mutatae sibi videbantur. |

- Ille, latus niveum molli fultus hyacintho,  
 Illice sub nigra pallentis ruminat herbas,  
 55 Aut aliquam in magno sequitur grege. Claudite, Nymphae,  
 Dictaeæ Nymphæ, nemorum iam claudite saltus,  
 Si qua forte ferant oculis sese obvia nostris  
 Errabunda bovis vestigia; forsitan illum,  
 Aut herba captum viridi, aut armenta secutum,  
 60 Perducant aliquæ stabula ad Gortynia vaccae.  
 Tum canit Hesperidum miratam mala puellam;  
 Tum Phaethontidas musco circumdat amarae  
 Corticis atque solo proceras erigit alnos.  
 Tum canit, errantem Permessi ad flumina Gallum  
 65 Aonas in montis ut duxerit una sororum,  
 Utque viro Phoebi chorus adsurrexerit omnis;  
 Ut Linus haec illi, divino carmine pastor,  
 Floribus atque apio crinis ornatus amaro  
 Dixerit: Hos tibi dant calamos, en accipe, Musae,  
 70 Ascræo quos ante seni, quibus ille solebat  
 Cantando rigidas deducere montibus ornos.  
 His tibi Grynei nemoris dicatur origo,  
 Ne quis sit lucus, quo se plus iactet Apollo.  
 Quid loquar, aut Scyllam Nisi, quam fama secuta est  
 75 Candida succinctam latrantibus inguina monstribus  
 Dulichias vexasse rates et gurgite in alto

53. *fultus hyac.*, ut G. 2, 5. 4, 137. A. 11, 69. Tales versus ad Graecorum similitudinem effecti implent aures. — Ceterum v. 3, 106. | 54. *nigra* e viridi, i. e. *dunkelgrün*; *pallentes*, *χλωρός*, *hellgrün*. | 55—60. *Claudite* cet. Pasiphaen haec loquentem facit poeta. | 56. Dictaeæ, a monte Cretae, Dictæ. | 57. *Si saepe* ponitur, ubi rem explorare, ut G. 3, 331 sqq. A. 1, 181. 578, vel temptare, experiri aliquid volumus, ut A. 6, 78. 10, 458. Experiar, num forte ita fiat, ut mihi occurrat ille bos. | 60. Gortyn, s. Gortyna, urbs Cretae. | 61. Atalantam; cf. Ovid. Met. 10, 560 sqq. — *Hesperidum mala*, cf. A. 4, 481 sqq. | 62. cf. vs. 46. — *Phaethontidas*, s. Heliadas; cf. Ovid. Met. 2, 325 sqq. | 64. vide, quae huic Eclogae praefati sumus. — *Permessus*, fluvius Boeotiae. | 65. *Aonas*, i. e. Aonios; Aones primi Boeotiae incolae; ibi Helicon mons Musis sacer. — *sorum*, Musarum, Tibull. 3, 4, 45. Ovid. Met. 5, 254 sq. | 66. Musae adsurgunt Gallo; quae honoris testificatio! | 67. cf. 4, 56 sq. | 68. *crinis ornatus*, v. 3, 106. | 70. *quos*, sc. dederunt *Ascræo seni*, Hesiodo, ab Ascræa, vico Boeotiae, ita dicto. | 71. v. 3, 46. | 72. Gryneum s. Gryneæ oppidum Aeolidis fano Apollinis, quod in luco amoenissimo situm erat, nobile. Fabulas ad originem huius fani lucique spectantes carmine celebraverat Euphorion Chalcidensis, idque in latinum sermonem transtulerat Gallus; cf. 10, 50 sq. Apparet hoc carmen habuisse aliquid coniunctum cum vita carminibusque pastorum; et pastor fuerat etiam Hesiodus, non tamen poeta bucolicus. | 73. *quo se plus i.*, quo magis gloriatur, quem magis amet. | 74. *Quid loquar?* formula est breviter reliqua attingentis. — Erant duae Scyllae, Nisi altera, altera Phorci filia, saepe inter se a poetis, ut h. l., permutatae; quae hic narrantur, spectant ad Phorci filiam; cf. Ovid. Met. 14, 1—67; de Nisi filia Ovid. Met. 8, 1 sqq. — *Scyllam*, sc. ut mutatam narraverit; quod repetes e vs. 78. | 76. Dulichium insula maris Ionii prope Ithacam, posteriore tempore eadem, quae Ithaca, credita; hinc Dulichius Ulixes dictus; cf. Hom. Od.

- Ah! timidos nautas canibus lacerasse marinis;  
 Aut ut mutatos Terei narraverit artus,  
 Quas illi Philomela dapes, quae dona pararit,  
 80 Quo cursu deserta petiverit, et quibus ante  
 Infelix sua tecta supervolitaverit alis?  
 Omnia, quae, Phoebus quondam meditante, beatus  
 Audiit Eurotas iussitque ediscere laurus,  
 Ille canit; pulsae referunt ad sidera valles;  
 85 Cogere donec ovis stabulis numerumque referri  
 Iussit et invito processit Vesper Olympo.

## E C L O G A VII.

**MELIBOEUS.**

## MELIBOEUS. CORYDON. THYRSIS.

- m. Forte sub arguta consederat ilice Daphnis,  
 Compulerantque greges Corydon et Thyrsis in unum,  
 Thyrsis ovis, Corydon distentas lacte capellas,  
 Ambo florentes aetatibus, Arcades ambo,  
 5 Et cantare pares, et respondere parati.  
 Huc mihi, dum teneras defendo a frigore myrtos,  
 Vir gregis ipse caper deerraverat; atque ego Daphnim  
 Aspicio. Ille ubi me contra videt: Ocius, inquit,  
 Huc ades, o Meliboe! caper tibi salvus et haedi;  
 10 Et, si quid cessare potes, requiesce sub umbra.  
 Huc ipsi potum venient per prata iuvenci;  
 Hic viridis tenera praetexit arundine ripas  
 Mincius, eque sacra resonant examina quercu.  
 Quid facerem? neque ego Alcippen, nec Phyllida habebam,

12, 245 sqq. | 78 sqq. cf. Ovid. Met. 6, 424 sqq. — *Terei*, cf. vs. 42. A. 1, 41. 120. 7, 249. 12, 541. | 79. *dona*: satiato Tereo caput et pedes filii intulit. | 80. *quo cursu*, i. e. quali c., insolito quippe, nam in avem erat mutata; *cursus* etiam A. 6, 194 volatum significat. *quibus alis*, alis luscinae. | 82. *Ph. medil.*, v. 1, 2. tum scilicet, cum Hyacinthum, Oebali filium, Spartanum, amabat Phoebus; v. 3, 106. | 83. laurus ad Eurotam sitas; v. 1, 39. 3, 46 et supra vs. 71. | 84. *pulsae*, resonantes eius cantu, ut A. 7, 702. | 85. *cogere*—*referri*, ut A. 3, 61. 5, 773. 11, 84; ceterum v. 3, 34. | 86. Vesper, Hesperus, Veneris stella. *invito*, quod ipsum caelum fingitur aegre ferre, nocte ingruente carmen finire.

**Ecloga VII.** Scripta videtur haec Ecl. vere anni 716 p. u. c. | 1. *arguta*, sibilante, dum leni vento agitur; Theocr. 1, 1 sq. | 2. Theocr. 6, 1 sq. | 4. Theocr. 8, 3 sq. — Arcades servi post deletam Corinthum in Italiam, ubi haec geruntur, cf. vs. 13, venisse videntur; nisi omnino pastores significantur Arcadicis similes. | 5. v. 5, 1 sq. | 6. *def. a frig.*, puta, stramentis eas tegens. | 7. Theocr. 8, 49. — *deerrav.*, G. 2, 200. A. 10, 378. grex cum ipso capro, cf. vs. 9. — *atque* hic facit expectationem; cf. A. 6, 162. 7, 29. 10, 219 et v. A. 4, 261. | 11—13. Commendatur locus rerum iucunditate. — *ipsi*, sponte, scilicet quia



- 15 Depulsos a lacte domi quae clauderet agnos;  
Et certamen erat, Corydon cum Thyrside, magnum.  
Posthabui tamen illorum mea seria ludo.  
Alternis igitur contendere versibus ambo  
Coepere; alternos Musae meminisse volebant.
- 20 Hos Corydon, illos referebat in ordine Thyrsis.  
c. Nymphae, noster amor, Libethrides, aut mihi carmen,  
Quale meo Codro, concedite; proxima Phoebi  
Versibus ille facit; aut, si non possumus omnes,  
Hic arguta sacra pendebit fistula pinu.
- 25 t. Pastores, hedera nascentem ornate poetam,  
Arcades, invidia rumpantur ut ilia Codro;  
Aut, si ultra placitum laudarit, bacchare frontem  
Cingite, ne vati noceat mala lingua futuro.  
c. Saetosi caput hoc apri tibi, Delia, parvus
- 30 Et ramosa Micon vivacis cornua cervi.  
Si proprium hoc fuerit, levi de marmore tota  
Puniceo stabis suras evincta cothurno.  
t. Sinum lactis et haec te liba, Priape, quot annis  
Exspectare sat est: custos es pauperis horti.
- 35 Nunc te marmoreum pro tempore fecimus; at tu,  
Si fetura gregem suppleverit, aureus esto.  
c. Nerine Galatea, thymo mihi dulcior Hyblae,  
Candidior cynnis, hedera formosior alba,  
Cum primum pasti repetent praesepia tauri,

Daphnis ab armento recessit; v. 4, 21. — *sacra*, G. 3, 332. | 15. *a lacte*, a matrum ubere. — *quae* cf. a. puta ante frigus vespertinum. | 16. *Cor. c. Th.*, certaturus enim Cor. erat cum Th., cf. A. 5, 339. | 19. Musae, amantes alterna, cf. 3, 59, hanc legem carminis dicebant, ut versibus alternis illi canerent. *alternos meminisse*, mentem adiciere ad canenda alterna; sic ἄλλου λόγου μέμνησθε, nementote de alia re loqui s. mentem adiciere ad alium sermonem, Aesch. Prom. 531. Eurip. Hel. 119. | 20. *in ordine*, deinceps. | 21. Libethrus fons cum antro in Helicone. Nympham poeta invocat etiam 10, 1. cf. Theocr. 7, 91 sq. | 22. v. 5, 11. — *proxima*, proximos dices secundum consuetudinem, v. 3, 80. | 23. v. 1, 39. | 24. Qui arti alicui renuntiabant, eius instrumenta deo eiusdem artis praesidi suspendebant sacrabantque. — *sacra* Pani. | 25. *nascentem*, nunc primum carmina temptantem. — Servius „Hederā coronantur poetae, quasi Libero consecrati“ et cf. 8, 13. poetae haud minus curae sunt Baccho, quam Apollini, cf. Ovid. A. A. 3, 347 sq. Tibull. 3, 4, 43 sq. | 26. cf. 3, 15. | 27. *ultra plac.*, plus, quam ipsi videtur, s. si Codrus nos immodice et praeter veritatem laudat; quo fascinari veteres putabant ea, quae invidemus alteri. — *bacchare*, quo fascinus depelli existimabatur. | 30. sc. dedicat, ob prosperam venationem; cf. A. 9, 407 sq. et v. A. 3, 288. | 31. Si tam felici venatu perpetuo uti contigerit etc. *proprium* enim saepe id, quod perpetuo nostrum manet; cf. A. 6, 872. Corn. Nep. Thrasyb. c. 4. — *tota*, Servius „Solent enim plerumque caput tantum vel thoraca (*Brustbild*) facere.“ | 32. *sur. ev.*, v. 3, 106. — *coth.*, A. 1, 337. | 35. De industria Thyrsis magnifice loquitur, Micone magna Dianae pollicito, maiora et in ridiculum aucta promittens. — *pro temp.*, pro meis, quales nunc sunt, facultatibus. | 37 sq. Theocr. 11, 19 sqq. — *Nerine*, s. Nereis, Nerei fil. — *thymo*.. *Hyblae*, v. 1, 55 et cf. 5, 77. | 38. Ut est genus hederæ nigricans, ita et albi-

- 40 Si qua tui Corydonis habet te cura, venito.  
 τ. Immo ego Sardoniis videar tibi amarior herbis,  
 Horridior rusco, proiecta vilior alga,  
 Si mihi non haec lux toto iam longior anno est.  
 Ite domum pasti, si quis pudor, ite iuveni.
- 45 c. Muscosi fontes et somno mollior herba,  
 Et quae vos rara viridis tegit arbutus umbra,  
 Solstitium pecori defendite; iam venit aestas  
 Torrida, iam lento turgent in palmite gemmae.  
 τ. Hic focus et taedae pingues, hic plurimus ignis
- 50 Semper, et adsidua postes fuligine nigri;  
 Hic tantum Boreae curamus frigora, quantum  
 Aut numerum lupus, aut torrentia flumina ripas.  
 c. Stant et iuniperi et castaneae hirsutae;  
 Strata iacent passim sua quaque sub arbore poma;
- 55 Omnia nunc rident; at si formosus Alexis  
 Montibus his abeat, videas et flumina sicca.  
 τ. Aret ager; vitio moriens sitit aeris herba;  
 Liber pampineas invidit collibus umbras:  
 Phyllidis adventu nostrae nemus omne virebit
- 60 Iuppiter et laeto descendet plurimus imbi.  
 c. Populus Alcidae gratissima, vitis Iaccho,  
 Formosae myrtus Veneri, sua laurea Phoebo;  
 Phyllis amat corylos; illas dum Phyllis amabit,  
 Nec myrtus vincet corylos, nec laurea Phoebi.
- 65 τ. Fraxinus in silvis pulcherrima, pinus in hortis,  
 Populus in fluviis, abies in montibus altis;  
 Saepius at si me, Lycida formose, revisas,  
 Fraxinus in silvis cedat tibi, pinus in hortis.  
 μ. Haec memini, et victum frustra contendere Thyrsim.
- 70 Ex illo Corydon Corydon est tempore nobis.

cans.] 41. Declarat et Th. suum Galateae desiderium. *Sard. herbae*, batrachii s. ranunculi genus, *Hahnenfuss*, cuius serax Sardinia.] 43. Theocr. 12, 2. | 44. pudeat vos pastos, quasi nondum satiata fame, tam tarde domum procedere et me ab amicae amplexu distingere. | 45 sqq. Theocr. 8, 33 sqq. | 45. Theocr. 5, 51. 15, 125. | 46. *et tu, arbutu, quae fontes herbamque tegis*. — *rara*, non densa, sole interlucente. | 47. *defendite*, arcete, ut A. 10, 905. adde G. 3, 155. | 48. *lento*, Servius „Bene tarde frondere vites commemorat in Venetia, quae est provincia frigidior. | 49. Theocr. 11, 51. — In hoc ἀμυβάλων genere non referuntur omnia a canentibus ad id anni tempus, quo canunt. | 50. *ful. n.*, utpote in paupere interlucio sine *καρυδοῦν*. | 52. numerus pecoris lupum non deterret. | 53—60. Theocr. 8, 41—48. | 53. v. 2, 24. — *Stant*, horrent fructibus, bacis et echinis; sic aliquoties *stare* i. q. horrere, ut G. 3, 368. | 54. Theocr. 7, 144 sq. — *Alii quaque*. | 57. *vitio aeris*, nimio calore. | 58. *aret vinea*. | 60. *Iuppiter*, aer; ex hoc enim decidit pluvia; cf. G. 2, 325. Horat. Od. 1, 1, 25. | 65. *pinus in hortis*, hortensis, *ἡμερος*. | 66. *in fluviis*, ad fluvios, in ripis fluviorum; cf. G. 2, 110 et v. A. 7, 683. | 70. Theocr. 8, 92. — Ex illo tempore Corydon, iam ante a me pro magno poeta habitus (vs. 16), vere Corydon summusque in canendo artifex habetur.

## ECLOGA VIII.

## PHARMACEUTRIA.

DAMON. ALPHESIBOEUS.

Pastorum Musam Damonis et Alphesiboei,  
 Inmemor herbarum quos est mirata iuvenca  
 Certantis, quorum stupefactae carmine lynces,  
 Et mutata suos requierunt flumina cursus,  
 5 Damonis Musam dicemus et Alphesiboei.

Tu mihi, seu magni superas iam saxa Timavi,  
 Sive oram Illyrici legis aequoris, en erit umquam  
 Ille dies, mihi cum liceat tua dicere facta?  
 En erit, ut liceat totum mihi ferre per orbem  
 10 Sola Sophocleo tua carmina digna cothurno?  
 A te principium, tibi desinet. Accipe iussis  
 Carmina coepta tuis, atque hanc sine tempora circum  
 Inter victricis hederam tibi serpere laurus.

Frigida vix caelo noctis decesserat umbra,  
 15 Cum ros in tenera pecori gratissimus herba,  
 Incumbens tereti Damon sic coepit olivae.

D. Nascere, praeque diem veniens age, Lucifer, alnum,  
 Coniugis indigno Nisae deceptus amore  
 Dum queror, et divos, quamquam nil testibus illis

**Ecloga VIII.** Missa est haec Ecloga Pollioni autumnno anni 715, victis Parthinis, populo Dalmatiae, in Italiam redeunti. Continet haec Ecl. duo carmina, quorum alterius (vs. 17—61) argumentum ex Theocr. 3, alterius (vs. 64—109) ex Theocr. 2 petitum est; illud continet conquestionem amatoris a perfida puella decepti, in hoc inducitur mulier amatorem infidelem sacris magicis aggrediens. Ex eodem Theocr. 2 titulus *Pharmaceutria* translatus. || 2. v. 1, 39. | 4. *requierunt suos cursus*, ut est in Ciri vs. 233 „rapidos requiescunt flumina cursus“ et Calvus apud Servium „Sol quoque perpetuos meminit requiescere cursus.“ — *mutata*, quippe desinentia currere. | 6. *mihi*: Dativus Pronominis pers. saepe animum aliquo modo, hic quidem gaudio, affectum omninoque rem ad nos aliquo modo pertinentem, significat; cf. vs. 30. G. 2, 252. 4, 354. A. 1, 136. 261. Horat. Ep. 1, 3, 15 et v. G. 2, 206. — *Timavus*, non longe ab Aquileia lato flumine in mare Adriaticum se effundens; cf. A. 1, 244. | 7. Qui in superiore Adria, turbido mari, cf. Horat. Od. 3, 9, 23, navigabant, ut tuto hoc fieret, litus legere solebant. — *en*, vehementiam desiderii indicat. | 10. cf. 3, 84. Carmina Sophocle, summo tragicorum Graec., digna. Cothurnus tragoedorum, soccus comoedorum calceamentum; cf. Horat. Od. 2, 1, 12 et Art. poet. vs. 90. | 11. „Laudes tuas omnibus meis carminibus praedicandas sumsi;“ cf. 3, 60; haec, cum proverbii in morem dicta sint, non nimis proprie accipienda; cf. Hom. Il. 9, 97. Theocr. 17, 1. | 12. *i. carmina c. t.*, v. 3, 7: carmen hoc, quod est ex eo genere, sc. bucolico, ad quod temptandum tu me excitasti. | 13. Permite, ut inter laudes tuas bellicas etiam hic ex poetico encomio honos tibi accedat, nec Musam meam dedignare. v. 7, 25 et Ovid. Met. 1, 558—561. | 16. *Inc. olivae*, baculo oleagineo nixus. | 17. iunge *prae-veniens*; v. 6, 6. — *diem age*, L., A. 2, 801 sq. | 18. *Coniugis*, i. e. puellae amatae, ut infra v. 66. iuvenis amatus; cf. A. 7, 189. — *indigno am.*, quo ipsius fides digna non erat, i. e. perfidia. | 19. *testibus* ab

- 20 Profeci, extrema moriens tamen adloquor hora.  
 Incipe Maenalius mecum, mea tibia, versus.  
 Maenalus argutumque nemus pinosque loquentis  
 Semper habet; semper pastorum ille audit amores  
 Panaque, qui primus calamos non passus inertis.
- 25 Incipe Maenalius mecum, mea tibia, versus.  
 Mopso Nisa datur: quid non speremus amantes?  
 Iungentur iam grypes equis, aevoque sequenti  
 Cum canibus timidi venient ad pocula dammae.  
 Mopse, novas incide faces: tibi ducitur uxor;
- 30 Sparge, marite, nuces: tibi deserit Hesperus Oetam.  
 Incipe Maenalius mecum, mea tibia, versus.  
 O digno coniuncta viro, dum despicias omnis,  
 Dumque tibi est odio mea fistula dumque capellae  
 Hirsutumque supercilium promissaque barba,
- 35 Nec curare deum credis mortalia quemquam.  
 Incipe Maenalius mecum, mea tibia, versus.  
 Saepibus in nostris parvam te roscida mala —  
 Dux ego vester eram — vidi cum matre legentem.  
 Alter ab undecimo tum me iam acceperat annus;
- 40 Iam fragilis poteram ab terra contingere ramos.  
 Ut vidi, ut perii! ut me malus abstulit error!  
 Incipe Maenalius mecum, mea tibia, versus.  
 Nunc scio, quid sit Amor; duris in cotibus illum

amica ad testandum amorem adhibitis. | 21. v. 5, 86 et 1, 2. — Versus intercalaris, ut ap. Theocr. 1, 64. 70. 73. cet. 2, 17. 22. cet. — *Maenalius*, i. e. Arcadicos, pastoritios; v. 4, 1. Maenalus mons Arcadiae. | 22. nemus pinosque cantu pastorum resonantes. | 24. v. 2, 32. | 26. v. vs. 32. | 27 sq. „Omnia naturae praepostera legibus ibunt“ Ovid. Trist. 1, 8, 1 sqq. — *Iungentur*, eidem curru; cf. E. 3, 91. — *grypes* autem, fabulosa animalia, perpetuam cum equis inimicitiam gerere ferebantur. | 28. *ad poc.*, ad potum. | 29 sq. incisus lignis para taedas; his utebantur ad novam nuptam domum mariti deducendam, quod vesperi fiebat; huc spectat illud *tibi*, quod ea res Mopso grata est, cf. vs. 6. — *des. Hesp. Oet.*, Oetam, montem Thessaliae, *deserit*, i. e. supra Oetam ante visus iam relinquere eam procedens videtur. In Graecia haec geri apparet; admiscuit tamen poeta Romanum morem nuces pueris spargendi. Spargebantur autem nuces nupta iam in domum et thalamum deducta. Ceterum *novas* non ut iterum uxorem ducturus, sed novum dictum omne, quod primum fit vel quod incipit fieri; sic dicimus *novam* nuptam; cf. G. 2, 332. A. 7, 554. 8, 695. | 32. *O. d. c. viro*, cum irrisione haec dicta. Quali, dum ceteros despiciatui habes, viro nupsisti! | 34. Theocr. 11, 30—33. | 35. Dii perfidiae ultores. — *mortalia*, res humanas, Ovid. Met. 13, 70. | 37. Theocr. 11, 25—29. — *Saep. in n.*, in horto nostro saepe aliqua (viva) clauso. — *rosc.*, rore matutino adspersa, *σποσόνετρα*. | 38. *legent.*, carpentem, ut 2, 51. 3, 70. | 39. *Alt. ab undec.*, duodecimus; cf. 5, 49. | 41. Theocr. 2, 82. 3, 42. Hom. Il. 14, 294. Cum te vidi, quanto exarsi statim amore! *perire*, misere amare; Propert. 2, 15, 13 „Paris fertur periisse Lacaenâ“, Helena. — *mal. error*, insania quaedam amoris. | 43 sq. cf. A. 4, 365 sqq. Theocr. 3, 15 sq. — *Tmaros*, mons Epiri, *Rhodope* Thraciae. — *Garamantes*, populus Africae; *extremi*, remotissimam orbis terrarum partem incolentes; A. 8,

- Aut Tmaros, aut Rhodope, aut extremi Garamantes,  
 45 Nec generis nostri puerum nec sanguinis edunt.  
 Incipe Maenalios mecum, mea tibia, versus.  
 Saevus Amor docuit natorum sanguine matrem  
 Commaculare manus: crudelis tu quoque, mater;  
 Crudelis mater magis, an puer improbus ille?  
 50 Improbus ille puer, crudelis tu quoque, mater.  
 Incipe Maenalios mecum, mea tibia, versus.  
 Nunc et ovis ultro fugiat lupus, aurea durae  
 Mala ferant quercus, narcisso floreat alnus,  
 Pinguia corticibus sudent electra myricae,  
 55 Certent et cynis ululae, sit Tityrus Orpheus,  
 Orpheus in silvis, inter delphinas Arion.  
 Incipe Maenalios mecum, mea tibia, versus.  
 Omnia vel medium fiant mare. Vivite, silvae:  
 Praeceptis aerii specula de montis in undas  
 60 Deferar; extremum hoc munus morientis habeto.  
 Desine Maenalios, iam desine, tibia, versus.  
 Haec Damon; vos, quae responderit Alpheisiboeus,  
 Dicite, Pierides; non omnia possumus omnes.  
 a. Effer aquam, et molli cinge haec altaria vitta,  
 65 Verbenasque adole pinguis et mascula tura,  
 Coniugis ut magicis sanos avertere sacris

727. Ceterum v. 2, 24. | 45. *edunt*: Praesenti utitur poeta, quod *edunt* idem valet, quod *parentes sunt*; cf. G. 1, 279. A. 1, 731. 7, 485. 8, 141. 294. 9, 266. 10, 518. Herod. 1, 82 „ἐξάρτοι ἐγκαύων νικᾶν“, utrique affirmabant se victores esse. | 47. *matrem*, Medeam, quae, ab Iasone coniuge repudiata, communes filios occidit. | 48 sqq. Mater illud nefas ausa crudelitatis notam, Amor, qui illam, ut animum maternum exueret, impulit, turpiorem et foediorum saevitiae atque improbitatis sustinet. Ergo nequior et tetricior Amor nequissimis et taeter-  
 rimis, qui umquam fuerunt, hominibus. — Ceterum lusus verborum, qui hic de-  
 prehenditur, minime abhorret ab hoc carminum genere, cf. 1, 1—5. | 49. *improbus*,  
 improbius; repetes enim praegressum *magis*. | 52 sqq. vs. 27. cf. Theocr. 1,  
 132—36. | 54. electrum, in summo pretio habitum, populi, vel alni, aliaeve arbores  
 in ripis Padi, non humiles frutices, quales myricae, exsudare perhibebantur in  
 fabulis; cf. 4, 2. | 55. *Certent*, sc. cantu. — *Tityrus* praeter cetera frequentatum  
 pastorum nomen. | 56. v. 1, 2. — *Arion* Methymnaeus cantu delphinas deleniens  
 ab uno eorum servatus; Ovid. Fast. 2, 91 sqq. | 58. Velim adeo omnia longe  
 lateque mari contegantur; perire omnia vult, cui omnia odiosa sunt. — *Vivite*,  
 valet; cf. Theocr. 1, 115 sqq. | 59. Theocr. 3, 25. — *aerii*, v. 1, 59. | 60. Acerbe  
 Damon: Hoc muneris, hanc tibi laetitiam moriens offero, ut tua causa misere  
 peream. Theocr. 33, 20 sq. | 63. Alpheisiboei carmen, tamquam doctius, a Musis  
 vult recitari, se ei recitando imparem esse proverbiali locutione „non o. p. omnes“  
 significans. | 64 sqq. Mulier aliqua venefica inducitur amatorem suum, a se abalie-  
 natum et ex agro in urbem profectum, magicis sacris ad se revocans. Alloquitur  
 Amaryllidem, sacrorum horum administram; σύμμεστον appellat Servius. | 64.  
*aquam*, lustralem; cf. A. 6, 229 sqq. — *molli*, utpote *lanae*. | 65. *Verbenas*,  
 frondes sacro usui destinatas; *pingues*, fortasse, ut in re magica, venenato succo  
 tumentes; cf. A. 4, 513 sq. — *masculum* tus, optimum, stagonias appellatum. |  
 66. *Coniug*., v. s. 18. — *sanos av. sensus*, quasi a sanitate avertere, pervertere

- Experiar sensus; nihil hic nisi carmina desunt.  
 Ducite ab urbe domum, mea carmina, ducite Daphnim.  
 Carmina vel caelo possunt deducere Lunam;  
 70 Carminibus Circe socios mutavit Ulixi;  
 Frigidus in pratis cantando rumpitur anguis.  
 Ducite ab urbe domum, mea carmina, ducite Daphnim.  
 Terna tibi haec primum triplici diversa colore  
 Licia circumdo, terque hanc altaria circum  
 75 Effigiem duco; numero deus inpare gaudet.  
 Ducite ab urbe domum, mea carmina, ducite Daphnim.  
 Necte tribus nodis ternos, Amarylli, colores;  
 Necte, Amarylli, modo, et, Veneris, dic, vincula necto.  
 Ducite ab urbe domum, mea carmina, ducite Daphnim.  
 80 Limus ut hic durescit et haec ut cera liquescit  
 Uno eodemque igni: sic nostro Daphnis amore.  
 Sparge molam, et fragilis incende bitumine laurus.  
 Daphnis me malus urit, ego hanc in Daphnide laurum.  
 Ducite ab urbe domum, mea carmina, ducite Daphnim.  
 85 Talis amor Daphnim, qualis cum fessa iuvenum  
 Per nemora atque altos quaerendo bucula lucos  
 Propter aquae rivum viridi procumbit in ulva,  
 Perdita, nec serae meminit decedere nocti,  
 Talis amor teneat, nec sit mihi cura mederi.  
 90 Ducite ab urbe domum, mea carmina, ducite Daphnim.  
 Has olim exuvias mihi perfidus ille reliquit,

et in amoris insaniam convertere.] 67 *carmina*, incantamenta. [69. Mira, sed saepe a poetis commemorata superstitio; cf. Tibull. 1, 8, 21. Horat. Epod. 5, 46. 17, 78. Putabatur autem luna ita deducta spumas quasdam emittere, quibus utebantur magae.] 70. cf. Tibull. 4, 1, 62 sq. Hom. Odys. 10, 203 sqq.] 71. v. 3, 93. Medea de se ap. Ovid. Met. 7, 203 „Vipereas rumpo verbis et carmine fauces,” adde Ovid. Am. 2, 1, 25. — *cantando*, cantu, s. eo, quod quis incantat; falso enim Gerundium passivam vim habere creditur; cf. G. 2, 250. 3, 215. 454.] 73. *Terna*, Servius „tria alba, tria rosea et tria nigra;” *tibi*, Daphnidi, per parvam imaginem repraesentato; eaque ipsa duplex fuit, altera e limo, altera e cera; cf. vs. 80 et v. A. 4, 508.] 75. *inpare*, v. A. 4, 510.] 77. cf. vs. 73. — Amaryllidem iubet facere, quod ipsa, dum tenet imagunculam, commode non potest. — *nodis*, Servius „alligationibus,” unde suspicabimur ipsorum liciorum extremitates in nodos collectas esse.] 78. *modo* est instantius imperantis.] 80. v. vs. 73 et G. 1, 479.] 81. Sic D. mollis et mitis fiat erga me, durus autem adversus alias puellas.] 82. *molam*, v. A. 4, 517. *ἀλεπούδα* Theocr. 2, 18. — *fragilis*, fractum quid sonantes, cum incensae sunt, v. G. 1, 357 et A. 12, 522; et illitae erant bitumine, quo celerius flammam corripere.] 83. Ut Daphnis me urit, sic ego laurum hanc imagini eius iniectam ita uro, ut D. eo igne se uri flammaque amoris corripat; in D. ut ἐπὶ Ἀέλφιδι Theocr. 2, 23.] 85. *qualis cum* idem, quod *ut cum*, ὡς ὅτε, G. 3, 196. A. 2, 471. 3, 679. 9, 563. 11, 624. Ad buculam spectat illud *qualis*. Notionem immodici cuiusdam amoris ipsa continet comparatio.] 87. *Propter*, ut G. 3, 14.] 88. *Perdita*, v. 2, 59. — *deced. nocti*, vitare frigus nocturnum ad saepa redeundo; G. 3, 467; et *calori decedere* G. 4, 23.] 89. *mederi* tali illius amori.] 91. *exuvias*, res, quas ipse olim gessit; cf.

- Pignora cara sui; quae nunc ego limine in ipso,  
 Terra, tibi mando; debent haec pignora Daphnim.  
 Ducite ab urbe domum, mea carmina, ducite Daphnim.  
 95 Has herbas atque haec Ponto mihi lecta venena  
 Ipse dedit Moeris; nascuntur plurima Ponto.  
 His ego saepe lupum fieri et se condere silvis  
 Moerim, saepe animas imis excire sepulchris  
 Atque satas alio vidi traducere messis.  
 100 Ducite ab urbe domum, mea carmina, ducite Daphnim.  
 Fer cineres, Amarylli, foras, rivoque fluenti  
 Transque caput iace; nec respexeris. His ego Daphnim  
 Adgrediar; nihil ille deos, nil carmina curat.  
 Ducite ab urbe domum, mea carmina, ducite Daphnim.  
 105 Aspice, corripuit tremulis altaria flammis  
 Sponte sua, dum ferre moror, cinis ipse. Bonum sit!  
 Nescio quid certe est, et Hylax in limine latrat.  
 Credimus? an, qui amant, ipsi sibi somnia fingunt?  
 Parcite, ab urbe venit, iam parcite, carmina, Daphnis.

## E C L O G A IX.

## MOERIS.

## LYCIDAS. MOERIS.

L. Quo te, Moeri, pedes? an, quo via ducit, in urbem?

A. 4, 495 sq. et 507.] 92. limine scilicet, per quod D. saepe commeavit ad amicam.] 93. Terra, cuius magnum numen in re magica. — pignus est quodammodo vadis loco, qui sistere debeat eum, a quo datus est.] 95. *Has herb. atque h. ven.* i. e. has herbas venenatas. — Ponto, Colchide, parte regni Pontici, patria Medae, nobilissimae veneficae; Horat. Od. 2, 13, 8.] 96. *Ipse M.*, summus sc. magus.] 97. lupum factum silvis se condere.] 99. *alio*, in alium agrum, et ita possessorem spe messis fraudare; *fruges excantare* id dicebant; Tibull. 1, 8, 19.] 101. v. 2, 30.] 102. *trans. caput*, aversa, Ovid. Fast. 5, 437. Ceterum v. G. 2, 290. — *nec. resp.*, ne res, quae agitur, irrita fiat; Ovid. l. l. 439 sq. — *Alii ne r.* — Quoniam artes et carmina nihil adhuc profecisse videntur, novissime id, quod efficacissimum putat quodque unum superest, experitur.] 105 sq. repente ex cinere nondum ablato, cf. vs. 101, emicat flamma in altari, quod precatur ut sit, quemadmodum est, prosperum omen.] 107. *Nescio quid certe est*: sentit mulier evenire aliquid, quo omen illud confirmari possit; et referemus haec vel ad strepitum aliquem exauditus, vel ad certam praesensionem animo repente conceptam, vel, quod malim, ad utrumque.] 108. Sunt haec verba conspicientis iam redeuntem Daphnim, sed, ut fit in tali re, vix credentis oculis suis. — *qui amant*, A. 6, 507.] 109. *Parcite*: non est iam, quod ultra per vos Daphnidem aggrediar.

**Ecloga IX.** Anno 714 p. u. c. cum denuo agri militibus dividerentur, Alfenus Varus, qui tum ab Octaviano Galliae Cisalpinae praefectus erat, rursus partem agrorum Mantuanis (vide, quae Ecl. I. praefati sumus) eripi passus est, invitus, ut videtur. Arrio centurioni datus ager Virgilii. Virgilius, ab hoc paene interfectus, relicto villico, qui, donec restitutus sibi esset ager, Arrio morem gereret, Romam abiit ibique scripsit hanc Eclogam, qua per ambages quasdam scite se suasque res Octaviano Varoque commendaret. || 1. *Quo t. M. p. ducunt*,

- m. O Lycida, vivi pervenimus, advena nostri,  
Quo numquam veriti sumus, ut possessor agelli  
Diceret: Haec mea sunt; veteres migrate coloni.
- 5 Nunc victi, tristes, quoniam Fors omnia versat,  
Hos illi — quod nec vertat bene — mittimus haedos.  
L. Certe equidem audieram, qua se subducere colles  
Incipiunt mollique iugum demittere clivo,  
Usque ad aquam et veteris, iam fracta cacumina, fagos
- 10 Omnia carminibus vestrum servasse Menalcan.  
m. Audieras? et fama fuit; sed carmina tantum  
Nostra valent, Lycida, tela inter Martia, quantum  
Chaonias dicunt aquila veniente columbas.  
Quod nisi me quacumque novas incidere lites
- 15 Ante sinistra cava monuisset ab ilice cornix,  
Nec tuus hic Moeris, nec viveret ipse Menalcas.  
L. Heu, cadit in quemquam tantum scelus? heu, tua nobis  
Paene simul tecum solatia rapta, Menalca?  
Quis caneret Nymphas? quis humum florentibus herbis
- 20 Spargeret, aut viridi fontis induceret umbra?  
Vel quae sublegi tacitus tibi carmina nuper,  
Cum te ad delicias ferres, Amaryllida, nostras?  
„Tityre, dum redeo — brevis est via — pasce capellas,  
„Et potum pastas age, Tityre, et inter agendum
- 25 „Occursare capro, cornu ferit ille, caveto.  
m. Immo haec, quae Varo necdum perfecta canebat:  
„Vare, tuum nomen, superet modo Mantua nobis,  
„Mantua vae miserae nimium vicina Cremonae,

quod ex proximo *ducit* repetendum. Theocr. 14, 42.] 2. *vivi*, Servius „diu vivendo;“ putabimus igitur Moerim aetate iam provectiorem esse.] 2 sq. pervenimus eo, quo numquam nos perventuros putavimus, ut advena possessor agelli nostri diceret; v. 1, 54.] 5. *victi*, oppressi a potentioribus.] 6. Quae res in eius, novi heri, perniciem vertatur. — *nec*: pro non antiqui saepe dixerunt *nec*; unde factum est *negare*, *negotium*, *nec opinans*, *nec memor*, et similia, v. A. 12, 534; praeterea *nec*, quia fortius negabat, quam *non*, quibusdam detestandi formulis convenire visum est, ut h. l. et apud Plin. Epist. 2, 2, 3 „Illud enim nec dii sinant.“ — *mittimus*: portamus absenti, in urbe degenti; cf. 3, 71 et Terent. Phorm. 1, 1, 16.] 7 sq. qua colles decrescunt et paulatim ita depri-muntur, ut in clivum lenem ascensu desinant.] 9. *aquam*, Mincium. Ceterum v. 2, 3.] 10. Per Menalcan significatur Virgilius, qui per carmina sua fautores et deprecatores nactus agrum suum receperat.] 13. *Chaoniae* dictae propter oracula per columbas s. palumbes in luco Dodonaeo edita; Dodona urbs Epiri olim a Chaonibus habitata; et v. 1, 55.] 14. cf. G. 1, 155.] 15. monita cornicis tum rata sunt et eventum habitura, cum a sinistra canit.] 18. carmina eius in his temporum miseriis una solatia esse videbantur.] 19. *Quis c. N.*, hoc ad Ambar-valium sollemnitatem videtur spectare; v. 5, 75. — Quis humum florentibus herbis sparsam, quis fontes arboribus umbris consitos caneret? v. 6, 46 et A. 1, 165. 7, 463.] 20. *vir. umbra*, v. A. 7, 463.] 21. Quis caneret vel illa, vel tale aliquid, quale nuper tibi sublegi, i. e. te non sentiente, cum canebas, ex te didici.] 22. Spectat hic vs. ad Theocr. 3, 1.] 23—25. Theocr. 3, 3—5.] 27 sq. Vide,



- „Cantantes sublime ferent ad sidera cynci.  
 30 L. Sic tua Cyrneas fugiant examina taxos,  
 Sic cytiso pastae distendant ubera vaccae:  
 Incipe, si quid habes. Et me fecere poetam  
 Pierides; sunt et mihi carmina; me quoque dicunt  
 Vatem pastores; sed non ego credulus illis.  
 35 Nam neque adhuc Vario videor nec dicere Cinna  
 Digna, sed argutos inter strepere anser olores.  
 M. Id quidem ago et tacitus, Lycida, mecum ipse voluto,  
 Si valeam meminisse; neque est ignobile carmen.  
 „Huc ades, o Galatea; quis est nam ludus in undis?  
 40 „Hic ver purpureum, varios hic flumina circum  
 „Fundit humus flores, hic candida populus antro  
 „Imminet et lentae texunt umbracula vites;  
 „Huc ades; insani feriant sine litora fluctus.  
 L. Quid, quae te pura solum sub nocte canentem  
 45 Audieram? numeros memini, si verba tenerem.  
 M. „Daphni, quid antiquos signorum suspicis ortus?  
 „Ecce Dionaei processit Caesaris astrum;  
 „Astrum, quo segetes gauderent frugibus et quo  
 „Duceret apricis in collibus uva colorem.  
 50 „Insere, Daphni, piros; carpent tua poma nepotes.  
 Omnia fert aetas, animum quoque; saepe ego longos  
 Cantando puerum memini me condere soles:

quae praefati sumus huic et primae Eclogae.] 29. *cynci*, quia his Mincius abundabat, G. 2, 189 sq., et v. 1, 39.] 30. *Sic*, formula obstandi per res carissimas. Sic cupio salvas esse apes tuas: ut cupio ex te audire, quae habes carmina; cf. 10, 4. Horat. Od. 1, 3, 1. Tibull. 3, 6, 1. — E taxo mel amarum, quale Corsicanum, fiebat; cf. G. 2, 257. 4, 47. — *Cyrneas*, *Κύρνας* Corsica; v. 1, 55. ] 32 sqq. Theocr. 7, 37 sqq.] 35. Varius et Cinna poetae nobiles Virgilio aequales. ] 36. Theocr. 7, 47 sq. Tecte rodit Anserem, malum poetam, ad quem pertinet etiam, quod est apud Ciceronem Philipp. 13, 5 „de Falerno Anseres depelluntur.“ ] 38. v. 6, 57. ] 39 sqq. cf. Theocr. 11, 42—49. ] 40. *purp.* apud poetas de insigni rerum nitore ac splendore, Tibull. 3, 5, 4 et v. A. 6, 641. ] 41. *cand. p.*, *Silberpappel*, *λευκή*. ] 42. *lentae*, v. 5, 31. ] 44. *Quid?* ita breviter interrogamus, cum ad aliam rem transeuntes hanc potissimum nos scire velle significamus. — *pura*, serena. ] 45. *numeros*, modos. — *si*, modo, dummodo. ] 46. *quid suspicis*, sc. prognostica petiturus. — *signorum*, siderum, G. 1, 257. A. 7, 138. — *antiquos*: secundum consuetudinem diceret *antiquorum*. Qui ex nomine aliquo (hic *ortus*) pendet Genetivus (*signorum*), ita confunditur cum illo in unam notionem et apud Graecos et apud Romanos, ut interdum, cum accedit Adiectivum aliquod (*antiquos*), id non ei adiungatur vocabulo (*signorum*), cui potissimum adiungendum erat: ut G. 1, 211. 4, 267. A. 3, 411. 7, 533 sq. 8, 526. 10, 426. 12, 199. *maior rerum ordo*, i. e. ordo maiorum rerum, 7, 44. ] 47. Dione mater Veneris, et v. 5, 23. — *processit*, apparuit, numquam antea visum; significatur stella crinita, non multo post Iul. Caesaris mortem visa, quam animam esse Caesaris inter deos recepti putabat populus; Sueton. Caes. c. 88. ] 48 sq. Ea stella bonum frugum proventum ominari et maturare fingitur. ] 50. *Insere nunc*, astro tam propitio lucente; sic fiet, ut (non tu solum, sed etiam) nepotes fructum habeant ex arboribus a te insitis. ] 51. memoriam quoque aufert. ] 52.

- Nunc oblita mihi tot carmina; vox quoque Moerim  
Iam fugit ipsa; lupi Moerim videre priores.  
55 Sed tamen ista satis referet tibi saepe Menalcas.  
L. Caussando nostros in longum ducis amores.  
Et nunc omne tibi stratum silet aequor, et omnes,  
Aspice, ventosi ceciderunt murmuris aerae;  
Hinc adeo media est nobis via; namque sepulchrum  
60 Incipit adparere Bianoris: hic, ubi densas  
Agricolae stringunt frondes, hic, Moeri, canamus;  
Hic haedos depone, tamen veniemus in urbem.  
Aut si, nox pluviam ne colligat ante, veremur,  
Cantantes licet usque — minus via laedit — eamus;  
65 Cantantes ut eamus, ego hoc te fasce levabo.  
M. Desine plura, puer, et, quod nunc instat, agamus;  
Carmina tum melius, cum venerit ipse, canemus.

## ECLOGA X.

## GALLUS.

- Extremum hunc, Arethusa, mihi concede laborem:  
Pauca meo Gallo, sed quae legat ipsa Lycoris,  
Carmina sunt dicenda: neget quis carmina Gallo?  
Sic tibi, cum fluctus subterlabere Sicanos,  
5 Doris amara suam non intermisceat undam.  
Incipe; sollicitos Galli dicamus amores,

totos dies, qui longi sunt per aestatem, cantando exigere; Horat. Od. 4, 5, 29. | 54. Quem occurrens lupus prior vidisset, eum vocem amittere olim putabant. Theocr. 14, 22. | 55. v. vs. 10. | 56. Excusationes afferendo differs meum desiderium. | 57. v. A. 8, 89. — *aequor* Mincii late ibi stagnantis. | 59. *adeo*, v. A. 4, 533. | 60. Bianor, s. Ocaus, conditor Mantuae creditus. | 61. v. 1, 57. | 62. *tamen*, etiamsi paululum quiescentes dederimus operam cantilenae. | 65. *fasce*, cf. vs. 62. | 66. *puér*, 10, 69. G. 3, 76. 118. 4, 92. et saepius. | 67. *ipse*, Menalcas. **Ecloga X.** Extremo anno 716 cum Agrippa in Galliam cum exercitu missus esset, Lycoris (quae vero nomine fuit Cytheris, mima), Galli poetae amica, militem quendam illuc secuta Virgilio huius carminis scribendi occasionem prae-buit. Conveniunt pastores Arcadici ipsique dii agrestes ad consolandum Gallum maerore afflictum; qui cum primo malit ipse unus fuisse et pastoribus Arcadicis aut in silvis duram venatoris vitam degere, postremo mutata mente repudiat, quod modo optavit, Amorique ait contedendum esse, cui nihil possit resistere. — Versus 3 probat ipsius Galli rogatu a Virgilio scriptam esse hanc eclogam. || Arethusa Nympha fontis Syracusani, h. l. Musa bucolici carminis in Sicilia orti; v. 7, 21. tum 6, 1 et 4, 1. | 2. quae legens Lycoris commoveatur. | 4. *Se*, v. 9, 30. — *fl. s. S.*, A. 3, 694—96. | 5. *Doris*, Nerei, dei marini, coniux, i. e. mare, idque *amarum*, i. e. salsum. Sic tibi, Arethusa, sinceritas tua perstet, non corrupta

Dum tenera attondent simae virgulta capellae.  
Non canimus surdis; respondent omnia silvae.

Quae nemora, aut qui vos saltus habuere, puellae

10 Naides, indigno cum Gallus amore peribat?

Nam neque Parnasi vobis iuga, nam neque Pindi

Ulla moram fecere, neque Aonie Aganippe.

Illum etiam lauri, etiam flevere myricae;

Pinifer illum etiam sola sub rupe iacentem

15 Maenalus et gelidi fleverunt saxa. Lycae.

Stant et oves circum; — nostri nec paenitet illas,

Nec te paeniteat pecoris, divine poeta:

Et formosus ovis ad flumina pavit Adonis —

Venit et upilio, tardi venere subulci;

20 Uvidus hiberna venit de glande Menalcas.

Omnes „Unde amor iste, rogant, tibi?“ Venit Apollo:

„Galle, quid insanis? inquit; tua cura Lycoris

„Perque nives alium perque horrida castra secuta est.

Venit et agresti capitis Silvanus honore,

25 Florentis ferulas et grandia lilia quassans.

Pan deus Arcadiae venit, quem vidimus ipsi

aquis marinis.] 8. *respond.*, resonant per echo; v. 1, 5.] 9 sqq. Imitatus est Virgilius carmen Theocriti primum, quo canitur mors Daphnidis amore contabescentis vs. 66 sqq. In eius carminis ingressu quaerit Th., ubi tandem eo tempore fuerint Nymphae? non fuisse enim tum ulla in vicinis locis, quae habitare antea consueverant, sed procul aliquo abisse, Peneum fortasse Pindumve viscentes. Scholiastes (vs. 69) Daphnidem ait alicuius ex his fuisse amatorem; hanc cum ceteris Nymphis peregre profectam esse, Daphnidem abitu eius ad desperationem mortemque compulsum. Haec cum non conspirent cum causa Galli, Lycoridem, non Nympham aliquam, amantis, Virgilius pro sui consilii ratione immutanda sibi intellexit; increpat igitur Naidas Arcadicas (nam scaenam totius rei Arcadiam esse voluit poeta atque, ut Daphnis apud Theocr. inter Siculos pastores constitutus est, ita Gallum inter Arcadicos constituit), quod, cum ipsae in numero ruralium deorum pastoribusque amicae essent, auferint in dolore Galli inter pastores Arcadiae versantis. Putabimus autem eas Nymphas, sicut Theocriteas illas, longinquius iter ingressas esse ad visendas alias valles amoenas, nescio quas; nam certe Parnasum Pindumve, si tum ibi essent, eas remoraturum non fuisse, quin Gallo laboranti adessent, quandoquidem hi Musarum montes, ipsi clarissimi poetae misericordia affecti (cf. vs. 15), facile eas dimissuri fuissent, suum fletum cum fletu ceterorum coniuncturas.] 10. *indigno*, quare? cf. vs. 23 et v. 8, 18. — *Alii periret.*] 11. *iuga*, quia biceps erat P.] 12. Aganippe, fons in Helicone; v. 6, 66.] 18. v. 1, 39. — *lauri; etiam*, 8, 6. 8, 41. G. 1, 4. 341. 2, 86.] 15. montes Arcadiae.] 16. Theocr. 1, 74 sq. — Excusat bucolici carminis humilitatem, vel maxime excusandam apud eum, qui ipse summa carminum laude floreret. — Noli continere oves, quae ne nos quidem contemnunt, sed accedunt ad nos sensumque habent nostri doloris.] 18. Theocr. 1, 109. Adonis, iuvenis mirandae pulchritudinis fabulis poetarum celebratus.] 20. Menalcas bubulcus venit, uvidus ab aqua, in qua glandes, sub hiemem collectae bubusque pro pabulo praebere in Italia solitae, asservabantur.] 21. Theocr. 1, 77 sq.] 22. *insanire*, *μαίνεσθαι*, Theocr. 2, 82. — *cura*, v. vs. 38.] 24 sq. Venit Silvanus, vetus italicum numen agreste, agresti ornato, puta pinea corona aut simili, redimitum habens caput, et manibus ferulas ac lilia gestans atque cundo quassans.] 26. *quem*

- Sanguineis ebuli bacis minioque rubentem.  
 Ecquis erit modus? inquit; Amor non talia curat:  
 Nec lacrimis crudelis Amor, nec gramina rivis,  
 30 Nec cytiso saturantur apes, nec fronde capellae.  
 Tristis at ille: Tamen cantabitis, Arcades, inquit,  
 Montibus haec vestris, soli cantare periti  
 Arcades. O mihi tum quam molliter ossa quiescant,  
 Vestra meos olim si fistula dicat amores!  
 35 Atque utinam ex vobis unus, vestrique fuisset  
 Aut custos gregis, aut maturae vinitor uvae!  
 Certe, sive mihi Phyllis, sive esset Amyntas,  
 Seu quicumque furor, — quid tum, si fuscus Amyntas?  
 Et nigrae violae sunt et vaccinia nigra —  
 40 Mecum inter salices lenta sub vite iaceret;  
 Serta mihi Phyllis legeret, cantaret Amyntas.  
 Hic gelidi fontes, hic mollia prata, Lycori,  
 Hic nemus; hic ipso tecum consumerer aevo.  
 Nunc insanus amor duri me Martis in armis  
 45 Tela inter media atque adversos detinet hostis:  
 Tu procul a patria — nec sit mihi credere tantum! —  
 Alpinas ah, dura, nives et frigora Rheni  
 Me sine sola vides. Ah, te ne frigora laedant!  
 Ah, tibi ne teneras glacies secet aspera plantas!  
 50 Ibo, et, Chalcidico quae sunt mihi condita versu  
 Carmina, pastoris Siculi modulabor avena.  
 Certum est in silvis, inter spelaea ferarum  
 Malle pati tenerisque meos incidere amores  
 Arboribus; crescent illae, crescetis, amores.

*vid. ipsi:* addit haec poeta, quod Pan non facile se conspiciendum praebebat; poeta autem se tum una cum Gallo fuisse fingit. | 31. *ille*, Gallus. — *Tamen* ponitur interdum, ubi nos eo consolamur, quod amisso maiore aliquo commodo tamen non omnia amisimus; A. 4, 329. 10, 509. | 32. v. 2, 5. | 34. v. 5, 86. | 38. *furor*, ut *curā*, *ignis*, *flamma*, de puella vel puero amato. — *fuscus*, v. 2, 16. | 39. cf. 2, 18. | 40. *sub vite*, corona vitea redimitus; auctor Culic. vs. 74: „illum Tmolia pampineo subter coma velat amictu;“ ubi iunge *subtervelat*, i. e. velat corona vitea, cuius frondes dependent. Sic captivi *sub corona*, i. e. corona ex more redimiti, vendi dicebantur. Sed missa haec omnia faciemus, si Virgilius scripsit (et opinor scripsisse) *inter calices*, i. e. *inter pocula* sive inter potandum; en suavissimam imaginem hominum festo die ruri feriantium, ad quam illustrandam adhibebis G. 2, 527 sq. | 43. *consumerer* optantis est. | 44. Hunc sequentesque versus ex carmine Galli translatos esse refert Servius; quot autem transtulerit poeta, non scribit; sex, ut videtur. — Particula *Nunc* b. l. rem rei modo propositae contrariam significat, nostrum *so aber*; G. 2, 55. A. 10, 630. — *ins. amor* Lycoridis; Servius „ex affectu amantis ibi se esse putat, ubi amica est, ut me sit animum meum.“ | 46. utinam *liceat* mihi non credere rem adeo horribilem. | 50. Servius „Ibo et Theocritio stilo canam carmina Euphronis;“ et v. 6, 72. — *Ibo* hic de eo dicitur, qui constituit occipere aliud quid; Francogalli similiter *j'irai chanter*. | 53. *pati*, durare, vitam sustinere; Lucan.

- 55 Interea mixtis lustrabo Maenala Nymphis,  
 Aut acris venabor apros. Non me ulla vetabunt  
 Frigora Parthenios canibus circumdare saltus.  
 Iam mihi per rupes videor lucosque sonantis  
 Ire; libet Partho torquere Cydonia cornu
- 60 Spicula. — Tamquam haec sit nostri medicina furoris,  
 Aut deus ille malis hominum mitescere discat!  
 Iam neque Hamadryades rursus nec carmina nobis  
 Ipsa placent; ipsae rursus concedite silvae.  
 Non illum nostri possunt mutare labores,
- 65 Nec si frigoribus mediis Hebrumque bibamus  
 Sithoniasque nives hiemis subeamus aquosae,  
 Nec si, cum moriens alta liber aret in ulmo,  
 Aethiopum versemus ovis sub sidere Cancri.  
 Omnia vincit Amor; et nos cedamus Amori.
- 70 Haec sat erit, divae, vestrum cecinisse poetam,  
 Dum sedet et gracili fiscellam texit hibisco,  
 Pierides; vos haec facietis maxima Gallo,  
 Gallo, cuius amor tantum mihi crescit in horas,  
 Quantum vere novo viridis se subiicit alnus.
- 75 Surgamus: solet esse gravis cantantibus umbra;  
 Iuniperi gravis umbra; nocent et frugibus umbrae.  
 Ite domum saturae, venit Hesperus, ite capellae.

5, 313 „disce sine armis posse pati.“ — Ceterum cf. 5, 13. | 55. *mixtis Nymphis*, i. e. cum N., s. permixtus N. cf. A. 10, 871. | 57. cf. G. 3, 409—13. — *Parthenius*, mons Arcadiae. | 59. *Partho*, Parthico. — Cydonia urbs Cretae; A. 12, 858 et v. 1, 55. | 60. *Tamquam* cet. Abiicit rursus id, quod modo probaverat, nihil prodesse sentiens. — Alii *sint*. | 61. *deus ille*, Amor. | 62. *Hamadryades*, cf. vs. 55. | 63. *concedite*, valet. | 64. *illum*, v. vs. 61. — *labores*, cf. vs. 52—59. | 65 sqq. Theocr. 7, 112—14. — v. 2, 22 et cf. 1, 63. — Hebrus fluvijs Thraciae. | 66. Sithones gens Thraciae. | 72. facietis, ut Gallo sint gratissima. | 74. *se subiicit*, se attollit, crescit; ut *se subducere* i. q. decrescere 9, 7. | 76. Lucret. 6, 784 sqq. „Arboribus primum certis gravis umbra tributa, Usque adeo, capitis faciant ut saepe dolores, Si quis eas subter iacuit prostratus in herba.“

P. VIRGILI MARONIS  
G E O R G I C O N  
LIBER PRIMUS.

- Quid faciat laetas segetes, quo sidere terram  
Vertere, Maecenas, ulmisque adiungere vitis  
Conveniat, quae cura boum, qui cultus habendo  
Sit pecori, apibus quanta experientia parcis,  
5 Hinc canere incipiam. Vos, o clarissima mundi  
Lumina, labentem caelo quae ducitis annum;  
Liber et alma Ceres, vestro si munere tellus  
Chaoniam pingui glandem mutavit arista,  
Poculaque inventis Acheloia miscuit uvis;  
10 Et vos, agrestum praesentia numina, Fauni,  
Ferte simul Faunique, pedem Dryadesque puellae:  
Munera vestra cano. Tuque o, cui prima frementem

**Georg. L. I.** 1—4. *Exponitur totius operis argumentum: agricultura et rustico libro I., arborum cultura l. II., res pecuaria l. III., res apiaria l. IV. tractabitur.* || 1. *quo sidere*, qua tempestate anni, cf. vs. 68. 208. 221. | 2. *Maecenati*, cuius hortatu Georgica scribere aggressus erat, 3, 41, poeta dedicat hunc librum, eidem Horatius Carmina, Sermones, Epistolas. — *vites*, pertinet hoc ad l. II., qui est de arboribus; ceterum v. E. 2, 70. | 3. *habendo pec.*, ad tuendum, i. e. servandum supplendumque, gregem; cf. 3, 159. 2, 178. | 4. *pecori*: *ap.*, v. E. 10, 13. — *parcis*, *σπαρίαις*, 3, 403. quanta experientia requiratur, ut apiarium infrequens augeas. | 5. *Hinc*, i. e. ex his, horum partem, ut τῶν ἀμώθεν Hom. Od. 1, 10; modeste, non omnia enim, quae de re rustica commentari possit, persecuturum se significat, sed tantum, ut ait A. 1, 342, quaedam rerum fastigia.

5—42. *Invocatio numinum, a quibus poeta se in pangendo hoc carmine adiutum cupit.* | 6. sidera, Sol maxime, quorum decursu varia anni tempora efficiuntur; e verbis *Ferte pedem* vs. 11. repetes communem notionem: *adeste mihi canenti.* | 7. *si crebro* in invocatione et obtestatione habet locum, ut vs. 17. A. 4, 317. 6, 119. 9, 406. | 8. Ante inventas fruges glande homines vescebantur; Ovid. Met. 1, 106. Tibull. 2, 1, 37—43. — *Chaoniam*, v. E. 9, 13. — *pingui*, granis tumentis. | 9. Achelous Aetoliam separat ab Acarnania. Huic flumini omnium, ut ferebatur, antiquissimo is honor datus est, ut omnis ex aliquo fonte profluens aqua diceretur Achelous. Notus autem veterum mos vini aqua temperandi; quare in dramate aliquo Achaei satyrico aegre ferentes Satyri, quod sibi vinum aqua mixtum daretur: „μὲν Ἀχελῷος ἦν κεκραμένος πολὺς; | 10. *praes.* v. E. 1, 42. | 11. Dryades invocantur, quia sunt deae silvarum, in quibus greges pascuntur. | 12. v. E. 6, 1. Ipsam rem breviter narrat Ovid. Met.

- Fudit equum magno tellus percussa tridenti,  
 Neptune; et cultor nemorum, cui pinguis Caeae  
 15 Ter centum nivei tondent dumeta iuveni;  
 Ipse, nemus linquens patrium saltusque Lycae,  
 Pan, ovium custos, tua si tibi Maenala curae,  
 Adsis, o Tegeae, favens, oleaeque Minerva  
 Inventrix, unicusque puer monstrator aratri,  
 20 Et teneram ab radice ferens, Silvane, cupressum,  
 Dique deaeque omnes, studium quibus arva tueri,  
 Quisque novas alitis non ullo semine fruges,  
 Quisque satis largum caelo demittitis imbrem;  
 Tuque adeo, quem mox quae sint habitura deorum  
 25 Concilia, incertum est, urbisne invisere, Caesar,  
 Terrarumque velis curam, et te maximus orbis  
 Auctorem frugum tempestatumque potentem  
 Accipiat, cingens materna tempora myrto,  
 An deus immensi venias maris ac tua nautae  
 30 Numina sola colant, tibi serviat ultima Thule,  
 Teque sibi generum Tethys emat omnibus undis;  
 Anne novum tardis sidus te mensibus addas,  
 Qua locus Erigonen inter Chelasque sequentis  
 Panditur; ipse tibi iam brachia contrahit ardens  
 35 Scorpios, et caeli iusta plus parte reliquit;

6, 70 sqq. | 13. *Fudit*, v. A. 8, 139. | 14. Aristaeus, Apollinis et Cyrenes filius, quem alii Thessalum fuisse, alii Arcadem volunt, frugum et pascuorum curam habens, G. 4, 327 sq., imprimis in insula Cea, una de Cycladibus, Iovis Aristaei et Apollinis Nomii nomine cultus. — *nemorum*, quae paulo post *dumeta*, v. E. 1, 2. | 16. v. E. 10, 15. — *Ipse*, etiam tu, qui haud facile discedis a patria Arcadia; et diu in sola Arcadia cultus est Pan. | 18. Tegeaeus a Tegea, oppido Arcadiae, dictus. | 19. *puer*, Triptolemus, v. vs. 165. | 20. v. E. 10, 24. — *ab rad.*, ergo cupressum stirpitibus evulsam; G. 1, 319. | 24. *Tuq. adeo*, tu potissimum, *besonders*, v. A. 4, 533. | 25. *urbis*, Romae. — *Caesar* Octavianus. — *urbis inv. curam*; proprie dicimus *gerere curam*; quia autem invisere res solemus, quarum curam gerimus, cum Nomine *curae* iungitur Verbum cognatae significationis *invisere*; v. A. 1, 340. Suet. Claud. 18 „Urbis curam sollicitissime egit.“ Horat. Serm. 1, 6, 34 „Urbem sibi curae fore.“ Aptè coniungitur cum terris urbis mentio, quae caput non solum Romani imperii, sed terrarum habebatur. | 28. Fingit poeta orbem, i. e. qui incolunt orbem terrarum, venerationis causa Caesaris caput corona cingentem; *materna*, v. E. 1, 6, 5, 23 et cf. E. 7, 62; et myrtea corona Caesari tribuitur tamquam rerum naturae curam cum parente gentis Iuliae, Venere (cui sacra erat myrtus), suscepturo; nam Venus, ut ait Lucret. 1, 22 „rerum naturam sola gubernat.“ | 29. Servius „venias magis, quam *fas*, ut propriae magis sit, quam alienae potestatis.“ | 30. *sola*, posthabitis ceteris diis marinis. — *Thule*, una, ut videtur, ex insulis Shetlandicis, extrema pars orbis terrarum tum credita solique hominum Agricolaë dispecta esse visa, Tac. Agr. 10. | 31. *omnibus undis*, omnis maris imperio tibi tradito, tamquam dotati. | 32. an novum sidus futurus sis, v. E. 9, 47; siderum decursu definiuntur anni tempora, menses, *tardi*, aestivi, qui propter longiores dies tardius decurrere videntur. | 33. Inter Erigonen, s. Virginem, et Chelas Scorpii, *sequentes*, quae illi a tergo sunt, vacabat locus, qui assignari Octaviano posset, novo Librae sideri, quod media aestate in caelo visitur, postea datus. | 35. *c. iusta plus*

- Quidquid eris, — nam te nec sperant Tartara regem,  
 Nec tibi regnandi veniat tam dira cupido,  
 Quamvis Elysios miretur Graecia campos,  
 Nec repetita sequi curet Proserpina matrem —
- 40 Da facilem cursum, atque audacibus adnue coeptis,  
 Ignarosque viae mecum miseratus agrestis  
 Ingredere, et votis iam nunc adsuesce vocari.
- Vere novo, gelidus canis cum montibus humor  
 Liquitur et Zephyro putris se glaeba resolvit,
- 45 Depresso incipiat iam tum mihi taurus aratro  
 Ingemere et sulco attritus splendescere vomer.  
 Illa seges demum votis respondet avari  
 Agricolae, bis quae solem, bis frigora sensit;  
 Illius immensae ruperunt horrea messes.
- 50 Ac prius ignotum ferro quam scindimus aequor,  
 Ventos et varium caeli praediscere morem  
 Cura sit ac patrios cultusque habitusque locorum,  
 Et quid quaeque ferat regio, et quid quaeque recuset.  
 Hic segetes, illic veniunt felicius uvae,
- 55 Arborei fetus alibi; atque iniussa virescunt  
 Gramina. Nonne vides, croceos ut Tmolus odores,  
 India mittit ebur, molles sua tura Sabaei,  
 At Chalybes nudi ferrum, virosaque Pontus  
 Castorea, Eliadum palmas Epiros equarum?

parte, plus, quam uni sideri in Zodiaco debetur.] 38. cf. Tibull. 1, 3, 58 sqq.] 40. *Da fac. cursum*, a navigatione hoc translatus; Ovid. Fast. 1, 3 sq.] 42. *Ingredere* viam mecum, quod repetes e vs. superiore, i. e. adsis mihi ingredienti v. — *votis* tertius casus, i. q. *in vota*, et v. A. 5, 234.] I. *Exponitur de iis, quae ante sementem agricolae facienda, vs. 43—99*: 1) *de tempore arationis ac de varia caeli solique natura ante arandum observanda*, 43—70; 2) *de agro variis modis recreando*, 71—93; 3) *de terra comminuenda*, 94—99.] 43. *canis*, quales sunt, cum nives liquescunt. Et cf. 2, 324—331.] 44. *putr. se g*: r., resolvitur et ita fit putris.] 46—49. Forte ac densum solum, quale fere erat Italiae, ter, etiam quater, autumnum primum, tum proximo vere, aestate rursusque autumnum, arabatur; ita bis solem, bis frigora sentiebat.] 47. *avari*, cui vix ullus proventus frugum satis est; v. *Prooem.* Aeneidos v. 3.] 49. *Illius segetis*. — *ruperunt*, tota repleant ita, ut rumpere ea posse videantur; et Perfectum *ruperunt* ex more poetarum positum est in re fieri solita, quo animus ab universa quadam rerum imaginatione ad intuendam unam quandam rem praesentem traducatur, ut I, 263. 287. 391. 2, 24. 499 sqq. 3, 104. 378. 4, 213.] 50. *ignotum* aequor appellat poeta, quod fingit hominem rudem in re rustica sibi instituendum, cui cum omnia, tum natura locorum ignota sit.] 51. *caeli morem*, aeris naturam, temperiem; *varium*, pro diversa regionum natura ac situ diversum.] 52. *cultus*, colendi rationem; *habitus*, ingenium agri; *patrios*, quasi hereditarios, cuiusque loci ab antiquissimo tempore proprios.] 56. *Tmolus*, Lydiae mons. — *croceos odores*, crocum odoratum.] 57. *Sabaei*, incolae Sabae, quae erat urbs felix Arabiae; *molles*, effeminati, ἀρροί.] 58. *Chalybes*, populus Ponti in Asia minore; *nudi*, utpote in ferro cudendo occupati, A. 8, 425.] 59. tales, quales in ludis Olympiae, vico Elisidis, celebrari solitis palmam s. victoriam reportant, i. e. longe praestantissimas; cf. A. 5, 339. Ut autem canes feminae meliores ad



- 60 Continuo has leges aeternaque foedera certis  
 Inposuit natura locis, quo tempore primum  
 Deucalion vacuum lapides iactavit in orbem,  
 Unde homines nati, durum genus. Ergo age, terrae  
 Pingue solum primis extemplo a mensibus anni
- 65 Fortes invertant tauri, glaebasque iacentis  
 Pulverulenta coquat maturis solibus aestas;  
 At si non fuerit tellus fecunda, sub ipsum  
 Arcturum tenui sat erit suspendere sulco:  
 Illic, officiant laetis ne frugibus herbae,
- 70 Hic, sterilem exiguus ne deserat humor arenam.  
 Alternis idem tonsas cessare novalis  
 Et segnem patiēte situ durescere campum;  
 Aut ibi flava serēs mutato sidere farra,  
 Unde prius laetum siliqua quassante legumen
- 75 Aut tenuis fetus viciae tristisque lupini  
 Sustuleris fragilis calamos silvamque sonantem.  
 Urit enim lini campum seges, urit avenae,  
 Urunt Lethaeo perfusa papavera somno:  
 Sed tamen alternis facilis labor; arida tantum
- 80 Ne saturare fimo pingui pudeat sola neve  
 Effetos cinerem inmundum iactare per agros.  
 Sic quoque mutatis requiescunt fetibus arva,  
 Nec nulla interea est inaratae gratia terrae.  
 Saepe etiam sterilis incendere profuit agros
- 85 Atque levem stipulam crepitantibus urere flammis:

venandum habebantur, ita equae perniciores ad currendum.] 60—63. Continuo s. statim a rerum humanarum principio ita diversum esse locorum ingenium natura voluit; cf. E. 6, 41. — *foedera* cet.: quasi foedere facto tenetur quisque locus certis condicionibus a natura impositis.] 63. Redit poeta ad vs. 43 sqq.] 64. *prim. a mens. a.*, id, quod supra vs. 43 *Vere novo*, et v. 3, 304.] 66. *maturi soles*, quasi adulti, ἀκμαῖοντες, i. e. calor solis ferventissimus.] 67. *tellus non fecunda*, solum arenosum, non pingue.] 68. Arcturus Nonis Septembr. exoritur. — *suspendere*, atrato suspensio, non alte depresso, terram leviter proscindere.] 69. *Illic*, in pingui solo; cf. 2, 251.] 70. *Hic*, in sterili; ne exiguus, qui est in tali solo, humor exsiccetur.] 71. *tonsas*, demessas, *novalis*, i. e. agrum, qui alternis annis vacat et novatur, *Brachacher*.] 72. *situ*, otio, cessatione. — *durescere*, dum non movetur, indurescit ac fortior fit. — Utilissimam eam rem, si ruris patientur spatia, appellat Plin. N. H. 18, 21, 187.] 73. *mut. sidere*, v. vs. 1, alio anni tempore, autumnno.] 74. *prius*, verno tempore. — *quassante*, quae mota crepitat.] 75. *tristis*, amari, cf. 2, 247.] 76. *silvam*, densam calamorum multitudinem, ut vs. 152. — *sonantem*, utpote aridam.] 77. *enim*: Prodest alternare segetem; *nam* ne linum quidem, si alternis annis seritur, etsi urit agrum, nimis eum emaciabit, modo adhibeas stercorationem.] 78. cf. A. 4, 486.] 79. *alterna*, neque eadem semper, serendo facilis labor reddetur agro.] 83. Noli iungere *Nec nulla*, i. e. aliqua; sed *Nec* negat totam hanc sententiam „*nulla est i. g. terrae*.“ Atque sic non fiet, ut nulla sit agri gratia (nullus fructus), quae sane est nulla, si inaratus sit ager sive cesset; contra non carebit fructu, si serēs alterna.] 84. *steriles agros*, effeti agri stipulam; v. vs. 297.]

- Sive inde occultas viris et pabula terrae  
 Pingua concipiunt; sive illis omne per ignem  
 Excoquitur vitium atque exsudat inutilis humor;  
 Seu pluris calor ille vias et caeca relaxat  
 90 Spiramenta, novas veniat qua sucus in herbas;  
 Seu durat magis et venas adstringit hiantis,  
 Ne tenues pluviae rapidive potentia solis  
 Acrior aut Boreae penetrabile frigus adurat.  
 Multum adeo, rastris glaebas qui frangit inertis  
 95 Vimineasque trahit cratis, iuvat arva; neque illum -  
 Flava Ceres alto nequiquam spectat Olympo;  
 Et qui, proscisso quae suscitât aequore terga,  
 Rursus in obliquum verso perrumpit aratro  
 Exercetque frequens tellurem atque inperat arvis.  
 100 Humida solstitia atque hiemes orate serenas,  
 Agricolae; hiberno laetissima pulvere farra,  
 Laetus ager: nullo tantum se Mysia cultu  
 Iactat et ipsa suas mirantur Gargara messis.  
 Quid dicam, iacto qui semine comminus arva  
 105 Insequitur cumulosque ruit male pinguis arena?  
 Deinde satis fluvium inducit rivosque sequentis,  
 Et, cum exustus ager morientibus aestuat herbis,  
 Ecce supercilio clivosi tramitis undam

89. *caeca rel. Spir.*, occultos meatus (idem, quod *venae* vs. 91) aeri penetrabiles aperit, oclusos ante. | 90. *vias, qua*, ut A. 5, 590. | 92. Ne pluvia (si forte diuturnior erit) sua tenuitate occultissimos terrae meatus penetrans noceat; nocendi enim significationem repetes ex verbo *adurat*; satis autem crebra haec zeugmatis figura apud poetas. | 94. *inertes*, infecundas, nisi comminuuntur. | 95. *crates*, dentatas scilicet, occandi instrumentum. | 96. *flava*, ξανθή Graecis dicta. — Cui favent dii, cum *spectare*, respicere, dicuntur. | 97. Servius e Varrone: „Cum primo agri arantur, proscindi dicuntur, cum iterantur, obfringi, cum tertiantur [iacto semine] lirari. — suscitata terga, porcae. | 98. id fit autumnali tempore. | 99. *imperat arvis*, cogit quasi agrum, ut sit fecundus, cf. *Prooem.* Aeneidos vs. 3. || II. *Quae post sementem prosint futurae segeti*, vs. 100—159: 1) *commoda tempestas*, 100—103; 2) *glaebarum contusio*, 104—105; 3) *irrigatio aridi soli*, 106—110; 4) *depastio nimis laetae segetis*, 111—113; 5) *deductio nimii humoris*, 113—117; 6) *depulsio aliorum malorum, quibus segetes, ad excitandam hominum sollertiam, premi infestarique Iuppiter post auream aetatem voluit*, 118—159. | 100 sq. Plurimum prodest satis aestas non nimis sicca, hiems non nimis humida. | 102. Tali felicitate tempestatis fit, ut Mysia, etsi ibi nullus, i. e. perexiguus, cultus adhibetur agris, tamen tantum se iactet ac messes suas ipsa miretur. | 103. *Gargara summa pars Idae, montis Mysii*. | 104. *Quid dicam, qui*, ut infra vs. 111 et 113. A. 6, 141. 453. Est hoc genus quoddam breviloquentiae, quam ita explicabis: Quid dicam, *qualem messem* (cf. vs. 103) *habiturus sit*, qui sua ipse manu, *comminus*, i. e. rastro, quod manu tenetur, glaebas tenaciores et infecundas, *cumulos m. p. arenae*, per agrum iacentes aliam post aliam, *insequens*, contundit et quasi diruit? | 106 sqq. Hom. II. 21, 257 sqq. | 107. *ager m. a. herbis*, herbae in agro aestuantes moriantur, s. aestu enecantur. | 108. *supercilium, ὄρεος* Hom. II. 20, 151, credido montis. — *cliv. tramitis*, rivi, qui tramitis instar per clivum ductus est. |

- Elicit? illa cadens raucum per levia murmur  
 110 Saxa ciet scatebrisque arentia temperat arva.  
 Quid, qui, ne gravidis procumbat culmus aristis,  
 Luxuriam segetum tenera depascit in herba,  
 Cum primum sulcos aequant sata? quique paludis  
 Collectum humorem bibula deducit arena?  
 115 Praesertim incertis si mensibus amnis abundans  
 Exit et obducto late tenet omnia limo,  
 Unde cavae tepido sudant humore lacunae.  
 Nec tamen, haec cum sint hominumque boumque labores  
 Versando terram experti, nihil inprobus anser  
 120 Strymoniaeque grues et amaris intiba fibris  
 Officiunt aut umbra nocet. Pater ipse colendi  
 Haud facilem esse viam voluit, primusque per artem  
 Movit agros, curis acuens mortalia corda  
 Nec torpere gravi passus sua regna veterno.  
 125 Ante Iovem nulli subigebant arva coloni;  
 Ne signare quidem aut partiri limite campum  
 Fas erat: in medium quaerebant, ipsaque tellus  
 Omnia liberius, nullo poscente, ferebat.  
 Ille malum virus serpentibus addidit atris,  
 130 Praedarique lupos iussit, pontumque moveri,  
 Mellaque decussit foliis, ignemque removit,  
 Et passim rivis currentia vina repressit,

110. *temperare* dicitur, qui iustum rebus modum adhibet; aquis temperat arva, qui tantum, quantum commodum est, humoris in arva arentia inducit. | 112. *ten. in herba*, dum tenera est h., necdum culmos agunt sata. | 113. quando sata ita cooperiant sulcos, ut speciem praebeant continui aequoris, quale est pratorum; „cum sata sulcos contexerint“ Colum. 2, 12. | 114. qui aquam in agro depressiore stagnantem facto sulco vel fossa deducit ad locum arenosum, quo absorbeatur. | 115. *incertis m.* veris et autumnii, quod anni tempus incertae tempestatis est. | 116. *Exit*, A. 2, 496 sq. | 117. *sud. h.*, secundum consuetudinem diceret: exhalant humorem. | 119. *inprobus*, commune nocentium et rapacium bestiarum epitheton, avidam voracitatem indicans, ut A. 9, 62. 12, 250; omnino *inprobus* est quisquis modum non servat proptereaque improbari potest; cornix assidue crocians vs. 388; mons vehementissime incitatus A. 12, 687. Tum idem epitheton in laudem versum laborem imprimis acrem indicat infra vs. 146. De pervicaci studio insidiantis Arruntis A. 11, 767. Intelliges autem feros anseres, non domesticos. | 119—21. cf. vs. 155—57. | 120. *Strym.*, v. E. 1, 55. — Est et borthense intibum, et agreste; hoc *πικρὸς* vocatur Graecis. | 121. *Pater ipse*, v. vs. 163. | 123. *Movit agr.* cet., fecit, ut moverentur, s. colendi agri necessitatem imposuit, excitans sollicitam ingenii humani per curam victus quaerendi. | 126. *signare*, lapide puta; *limite*, via, qua dirimuntur agri vicinorum; Ovid. Met. 1, 135 sq. | 127. *in med.*, v. 4, 157. | 128. v. E. 4, 18. — *liberius*: „quia supra (vs. 99) ait: imperat arvis.“ Servius. | 129. *atris*, atrum vocatur fere quidquid dirum, exitiosum, horrendum. Ceterum contra hoc malum theriaca sunt inventa, cf. vs. 133. | 130. *moveri*, procellis. | 131. v. E. 4, 30. — *ignem rem.* Hesiod. *E. x. 'Hμ.* 50, ut eius usus ignoraretur, necesse igitur esset per artem cum reperire, silicis et ferri attritu. | 132. *Iunge rivis currentia*; Ovid. Met. 1,

- Ut varias usus meditando extunderet artis  
 Paulatim, et sulcis frumenti quaereret herbam,  
 135 Et silicis venis abstrusum excuderet ignem.  
 Tunc alnos primum fluvii sensere cavatas;  
 Navita tum stellis numeros et nomina fecit,  
 Pleiadas, Hyadas, claramque Lycaonis Arcton;  
 Tum laqueis captare feras, et fallere visco  
 140 Inventum, et magnos canibus circumdare saltus.  
 Atque alius latum funda iam verberat amnem  
 Alta petens, pelagoque alius trahit humida lina.  
 Tum ferri rigor atque argutae lamina serrae, —  
 Nam primi cuneis scindebant fissile lignum —  
 145 Tum variae venere artes. Labor omnia vicit  
 Inprobus et duris urguens in rebus egestas.  
 Prima Ceres ferro mortalis vertere terram  
 Instituit, cum iam glandes atque arbuta sacrae  
 Deficerent silvae et victum Dodona negaret.  
 150 Mox et frumentis labor additus, ut mala culmos  
 Esset robigo segnisque horreret in arvis  
 Carduus; intereunt segetes, subit aspera silva,  
 Lappaeque tribolique, interque nitentia culta  
 Infelix lolium et steriles dominantur avenae.  
 155 Quod nisi et adsiduis herbam insectabere rastris,  
 Et sonitu terrebis aves, et ruris opaci  
 Falce premes umbram, votisque vocaveris imbrem,  
 Heu, magnum alterius frustra spectabis acervum,  
 Concussaue famem in silvis solabere quercu.

111. Sic abundantem vini copiam veteres declarare solebant. | 133. *usus*, necessitas, *χρεία*, *das Bedürfniss*. | 134. *frum. herb.*, ut E. 5, 26. | 135. *ignem*, quo torreretur grana panisque coqui posset. | 137. Ad distinguenda sidera observabatur numerus stellarum, quibus quodque constaret. — *nomina fecit Pleiadas*, A. 3, 18. 693. 7, 63. Liv. 7, 22: „Quidam *Kaesone*, alii *Gaium nomen Quintio adiiciunt*.“ | 138. Arctos sidus, Ursa maior, Helice. Callisto, Lycaonis filia per lunonem in ursam mutata ab Iove inter sidera relata fuerat. | 141 sq. *funda*, *βόλος*, minus rete, maius *lina*, everriculum, *σαγήνη*. — *verberat*, cum sonitu iacit fundam globulis plumbeis gravatam in amnem. | 142. *Alta*, Liv. 21, 28 „primus erat pavor, cum elephantis, soluta ab ceteris rate, in altum (*fluminis Rhodani*) raperentur.“ | 143. *ferri rigor*, rigidum ferrum, ut vs. 162 „grave robur aratri.“ | 144. qui primi scindebant lignum, scindebant cuneis. | 146. v. vs. 119. — Theocr. 21, 1. | 148. *sacrae* s., ante ab omni violatione tutae intactaeque. | 149. *Dodona* quercetis nobilis; quanto humilior evasura fuisset oratio, si dixisset poeta: et victum querceta negarent. | 150. frumenta malis laborare coeperunt. | 151. *Esset*, adederet. — *segnis*, infecundus. | 153. v. E. 4, 51. — *nitere* dicuntur culta, squalere et horrere inculta. | 154. v. E. 5, 37. | 155. *Quod nisi*, quamobrem nisi. — Significatur sarritio, qua herbae nocivae eradicantur. | 157. *premes*, coarcebis, *umbram* arborum vel fecundarum, quae per agros in Italia dispositae erant, vel sterilium, quae eosdem multis in locis circumdabant. || III. *Varia praecepta*, vs. 160—203; 1) *de instrumento rustico et area*, 160—186; 2) *de indicis futurae fertilitatis vel inopiae*,

- 160 Dicendum et, quae sint duris agrestibus arma,  
 Quis sine nec potuere seri nec surgere messes:  
 Vomis et inflexi primum grave robur atrati,  
 Tardaque Eleusinae matris volventia plaustra,  
 Tribulaque traheaeque, et iniquo pondere rastri;  
 165 Virgea praeterea Celei vilisque supellex,  
 Arbuteae crates et mystica vannus Iacchi.  
 Omnia quae multo ante memor provisa repones,  
 Si te digna manet divini gloria ruris.  
 Continuo in silvis magna vi flexa domatur  
 170 In burim et curvi formam accipit ulmus aratri.  
 Huic ab stirpe pedes temo protentus in octo,

187—192; 3) *de medicandis seligendisque seminibus*, 193—203. || 160. *arma*, i. e. instrumentum rusticum. | 162. v. vs. 143. aratro gravi robustoque opus erat ad solum densum, quale fere est Italiae, perrumpendum. | 163. *volventia*: Verba transitiva saepe sine obiecto, quod dicitur, ita ponuntur, ut actio, quae tali verbo significatur, sola per se spectetur, ut *amare* E. 8, 108 (unde *amare* inter se, *complecti* inter se, A. 5, 766), *dicere* verba facere, *dissimulare* dissimulatione uti A. 1, 516, *turbare* *ταρβειν*, *ταράττεσθαι*, A. 6, 801; h. l. *volventia* rotarum lapsu se circumagentia, tum *movere* et *vertere* motum et versionem (?) facere, si ita loqui liceat, similiterque cetera, ut *lavare*, *insinuare*, *iungere*, *urgere*. — *tarda volv.*, pro *tarde v.*, ut 2, 377 *gravis incumbens aestas*, 3, 28 *magnum fluentem Nilum*, A. 3, 70 *lenis crepitans Auster*, 8, 559 *inepletus lacrimans*. — *Eleusinae matris*, Cereris Eleusine maxime cultae; huic et agricultura, quam ipsa invenit, et quae ad illam pertinent, sacra sunt. Matris autem nomine Deae interdum, cf. A. 3, 111. 9, 619, ut Dii saepe patres, genitores, cf. vs. 121. 2, 4. 4, 369. A. 1, 155. 5, 14. 7, 327. 12, 703, honoris causa appellantur; et *ipse pater* non adiecto dei nomine est *Iuppiter*, ut vs. 121. A. 2, 617. | 164. Varro R. R. 1, 52 „tribulum fit (1) e tabula lapidibus aut ferro asperata, quae imposito auriga aut pondere grandi trahitur iumentis iunctis, ut discutiat e spica grana, aut (2) ex assibus (s. axibus) dentatis cum orbiculis.“ horum generum quod priore loco positum est, traheam videtur Virgilius dicere. — *iniquo p. rastri*, admodum ac paene nimis graves; cf. 3, 347. | 165. Triptoleum, Eleusinium, arationem ac sationem frugum docuerat Ceres, Ovid. Met. 5, 642 sqq.; Cēlēus, illius pater, ab eadem Dea didicerat crates, cf. vs. 95, vannum, corbes, qualos, cet. ex virgis s. viminibus texere. — *v. mystica*, dicta a mysteriis Eleusiniis, portabatur cum primitiis frugum in pompa Iacchi (hoc erat mysticum nomen Bacchi), quam Athenienses certo die Eleusinem ducebant; et ut vannos grana a palea purgantur, ita haec mystica vannus signum fuit animarum per mysteria purgandarum. | 168. *divini*: ut philosopho sapientia, artificis ars sua, alia aliis divina videtur et dicuntur, ita ei, qui praeter cetera amat rem rusticam, rus. | 169. *Continuo* spectat ad rerum principia; non caesa iam, sed statim in silvis, dum iuvenis est et tenera, ulmus inflectitur, ut crescens sponte accipiat formam burae; 3, 75 „*Continuo* pecoris generosi pullus in arvis Altius ingreditur;“ i. e. statim, ubi incipit pullus incedere, ingreditur altius. Interdum explicatur illud *continuo* sententia per relativum adiuncta, ut 1, 60 *quo tempore*, 3, 271 *ubi*. | 170. *aratri* hic idem, quod *burae*, quae quod praecipua pars aratri habetur, propterea *aratrum* interdum pro solius burae nomine ponitur. | 171 sq. *ab stirpe p. t. p. i. o.*, intellige temonem ita factum ex arbuscula aliqua, ut ab ima stirpe recisus amputata summitate in octo pedum longitudinem se protendat. — Burae aptantur temo octo pedum, binae aures et dentalia; *aures* duae tabulae inferiori burae parti utrimque applicatae, quibus sulcus latior, porca, s. crata inter duos sulcos terra, altior efficitur; *dentalia*, ima pars aratri, duo

- Binae aures, duplici aptantur dentalia dorso.  
 Caeditur et tilia ante iugo levis, altaque fagus  
 Stivaque, quae currus a tergo torqueat imos;  
 175 Et suspensa focis explorat robora fumus.  
 Possum multa tibi veterum praecepta referre,  
 Ni refugis tenuisque piget cognoscere curas.  
 Area cum primis ingenti aequanda cylindro  
 Et vertenda manu et creta solidanda tenaci,  
 180 Ne subeant herbae, neu pulvere victa fatiscat,  
 Tum variae inludant pestes: saepe exiguus mus  
 Sub terris posuitque domos atque horrea fecit;  
 Aut oculis capti fodere cubilia talpae;  
 Inventusque cavis bufo et quae plurima terrae  
 185 Monstra ferunt; populatque ingentem farris acervum  
 Curculio atque inopi metuens formica senectae.  
 Contemplator item, cum se nux plurima silvis  
 Induet in florem et ramos curvabit olentis:  
 Si superant fetus, pariter frumenta sequentur,  
 190 Magnaque cum magno veniet tritura calore;  
 At si luxuria foliorum exuberat umbra,  
 Nequiquam pinguis palea teret area culmos.  
 Semina vidi equidem multos medicare serentis  
 Et nitro prius et nigra perfundere amurga,

crara lignea, quibus extrema buris immissa, quibusque in fine coeuntibus ferreus dens vomeris inductus; his tribuitur *dorsum*, quod vomeris dens indutus est illorum extremae parti velut capiti, a quo, ut in equis, tauris, *cet.* longum dorsum protenditur. | 172. *ante*, cf. vs. 167. | 173. *iugo levis*, leve ideoque iugo aptum lignum. — *fagus Stivaque*, i. e. stiva faginea, s. caeditur fagus, unde stiva fiat. Crebro Virgilius tali utitur epexeysi, sive hendiadyn appellare mavis, ut E. 2, 8: *umbras et frigoras*, i. e. umbras frigidas; G. 1, 335: *caeli menses et sidera*, signa caelestia menses et tempestatem regentia; 2, 192: *pateris libamus et auro*, i. e. pateris aureis; ib. 477: *caeli vias et sidera*, i. e. cursum siderum in caelo; 486: *O ubi campi Spercheosque*, i. e. campi Sperchei; A. 7, 751: *fronde et felici comptus oliva*, i. e. felici olivae fronde. | 174. Stiva quam tenens arator regit et vel attollit vel deprimit aratrum. — „*currus* dixit poeta propter morem provinciae suae, in qua aratra habent rotas,” Servius. — Alii *Stivae*, quae *currus*. | 175. *explorat r.*, temptat quodammodo, ut de bonitate ligni inde constet; nisi enim firmum et probum sit, exarescens rimas aget. | 177. *ten. curas*, etiam tenuia illa opera, quae curanda sunt rusticis. | 178. *cum primis*, inprimis. — Area veterum erat locus in ipso agro, patens et editus, qua ventus perflare posset, solidus atque complanatus. | 180. *vinci* pulvere dicitur area, quae passim in pulverem solvitur et ita fatiscit. | 181. *pestes*, cf. 3, 419. — ut h. l. monosyllaba vox in exitu versus posita tamquam adumbrat exiguitatem, ita alibi (*divom pater atque hominum rex*) augustam quandam magnitudinem, vel gravitatem ac pondus (*procumbit humi bos*), vel altitudinem silentii (*intempesta silet nox*), vel rei quandam amplitudinem (*ruit Oceano Nox*), quae ut varia sunt, ita varie afficiunt animum legentis. | 187. *nux*, intelliges amygdalam arborem. — iunge *plurima induet*, i. e. plurimo flore se induet. | 189. *superant*, abundant, magna est copia, cf. 2, 331. | 190. *calore solis*, qui exarescere faciens aristas adiuvat trituram. | 192. *pingues palea*, non granis. — *teret a.*, v. 2, 59. | 193.

- 195 Grandior ut fetus siliquis fallacibus esset,  
 Et, quamvis igni exiguo, properata maderent.  
 Vidi lecta diu et multo spectata labore  
 Degenerare tamen, ni vis humana quot annis  
 Maxima quaeque manu legeret. Sic omnia fatis
- 200 In peius ruere ac retro sublapsa referri;  
 Non aliter, quam qui adverso vix flumine lembum  
 Remigiis subigit, si bracchia forte remittit  
 Atque illum in praeceps prono rapit alveus amni.

Praeterea tam sunt Arcturi sidera nobis

- 205 Haedorumque dies servandi et lucidus Anguis,  
 Quam quibus in patriam ventosa per aequora vectis  
 Pontus et ostriferi fauces temptantur Abydi.  
 Libra die somnique pares ubi fecerit horas  
 Et medium luci atque umbris iam dividit orbem,
- 210 Exercete, viri, tauros, serite hordea campis,  
 Usque sub extremum brumae intractabilis imbrem;  
 Nec non et lini segetem et Cereale papaver  
 Tempus humo tegere, et iamdudum incumbere aratris,

*medicare*, inficere, sc. nitro diluto et amurca. | 195. *fallacibus*, spem saepe fallentibus. | 196. ut, cum coquantur, citius mollescant. | 197. *spectata*, inter legendum explorata. | 198. *vis h.*, opera humana. | 199. *fatis*, fatali quadam, quae regnat in rerum natura, necessitate. | 200. *ruere*, Infinitivus absolutus: ruere solent; ut 4, 134. 140. A. 4, 422. 11, 822. — *retro subl. r.*, iunge: *retro referri*, sic *retro* saepe pleonastice cum verbis a *re* .. incipientibus iungitur, cf. A. 9, 794 et 797; repetita est haec locutio, id quod subiecta comparatio docet, a navigio, quod adverso flumine subactum cessante remige *sublabitur*, i. e. deorsum labitur s. secundo flumine abripitur; significantur autem his verbis res in deterius mutatae; similiter nos: *es geht zurück*. | 201 sqq. Non aliter, quam si, qui summa virium contentione vix promovet lembum oboitente adversi fluminis vi, laborem remigandi remiserit atque *retro refertur* et in praeceps rapitur. || IV. *Quibus quodque opus temporibus faciendum sit, vs. 204—310.* 1) *quando serendum*, 208—230; 2) *quando omnino praecipua opera rustica fieri debeant, disci ex annuo solis decursu*, 231—256; 3) *quae facienda sint, cum pluat*, 257—267; 4) *quae diebus festis*, 268—275; 5) *quae singulis mensium diebus*, 276—286; 6) *quae noctu*, 287—296; 7) *quae interdum, vel aestivo, vel hiemali tempore*, 297—310. | 204—7. Agricolis siderum ortus et occasus. (*dies*) non minus sunt observandi, quam navigantibus. | 206. in patriam, Italiam, ex Asia redeuntibus; et nota sunt Bithyna negotia ex Horat. Epist. 1, 6, 22. — *vectis*, qui vehuntur, ut *tunae*, quae tunduntur, A. 1, 481, *commissos, ἀρρομένους*, A. 5, 113, *quaesitum, ζητούμενον*, 9, 565. | 208—214. hordeum, linum, papaver serendum esse ab aequinoctio autumnali, cum sol Librae sidus ingressus est, usque ad brumam s. solstitium hiemale, i. e. VII. Kal. Ianuar. | 208. *dis* antiquae pro *diei*. — *pares*, et dies et nox in duodecas horas apud Romanos divisa erat, sed aequinoctii tantum tempore aequales; ubi longior erat dies nocte, longiores etiam erant horae diurnae; ubi nox longior die, longiores erant horae nocturnae diurnis. | 209. *orbem*, caelum; ubi Sol et Nox per aequale temporis spatium tenent caelum. | 211. *extremum*, quia ipsa bruma in extremum anni tempus incidit; v. E. 9, 46. | 212. *Cereale p.*, sacrum Cereri; et saepe Ceres fingebatur papaver tenens. | 213. *Tempus iamd. inc. aratris*, quasi dixeris: incumbite

- Dum sicca tellure licet, dum nubila pendent.  
 215 Vere fabis satio; tum te quoque, Medica, putres  
 Accipiunt sulci et milio venit annua cura:  
 Candidus auratis aperit cum cornibus annum  
 Taurus et adverso cedens Canis occidit astro.  
 At si triticeam in messem robustaque farra  
 220 Exercebis humum solisque instabis aristis,  
 Ante tibi Eoae Atlantides abscondantur  
 Gnosiisque ardentis decedat stella Coronae,  
 Debita quam sulcis committas semina quamque  
 Invitae properes anni spem credere terrae.  
 225 Multi ante occasum Maiæ coepere; sed illos  
 Expectata seges vanis elusit aristis.  
 Si vero viciamque seres vilemque phaselum  
 Nec Pelusiæ curam aspernabere lentis,  
 Haud obscura cadens mittet tibi signa Bootes.  
 230 Incipe, et ad medias sementem extende pruinas.  
 Idcirco certis dimensum partibus orbem  
 Per duodena regit mundi Sol aureus astra.  
 Quinque tenent caelum zonæ; quarum una corusco  
 Semper sole rubens et torrida semper ab igni;  
 235 Quam circum extremæ dextra laevæ trahuntur,  
 Caerulea glacie concretæ atque imbribus atris;

aratris, idque non tum demum, sed iamdudum faciendum; v. A. 2, 103. | 214. *sicca tellure*, Ablat. abs. ἀχρηστὸν ὄντος τοῦ ἀγροῦ, ut *caelo sereno* vs. 260, *magno murmure virorum* A. 5, 369. | 215. *putres*, v. 2, 204. | 216. *annua cura*, satio. | 217 sq. Colum. 11, 2, 36 „XV. Kal. Maias sol in Taurum transitum facit. ... Pridie Kal. Maias Canis se vespere celat.“ — *aperit annum*; eo enim anni tempore terra quasi reclusa et aperta novos flores herbasque profert. — Canis tum quasi cedens Tauro, tamquam adversa fronte et cornibus minanti, occidit. | 219. *robusta*, tempestatis vim et iniuriam melius, quam alia frumenti genera, ferentia. | 220. *inst. aristis*, ei generi, quod aristas gignit, operam dabis. | 221. Pleiades s. Vergiliae, Atlantis filiae; occidunt III. Id. Novembres matutino tempore, unde dicuntur Eoae. | 222. Gnosus, nobilissima urbs Cretæ; et appellatur sidus Coronæ a corona Ariadnes, Cressæ s. Gnosiæ, Minois regis filiae, a Baccho in caelo collocata; occidebat autem exeunte mense Novembri, ut ait Democritus Geop. 2, 14. | 225. *ante occ. Mai.*, i. e. Pleiadum, e quibus una est Maia. | 226. Quintilianus, hunc ipsum versum, ut videtur, respiciens, 1, 3, 1 „imitatæ spicas herbulæ inanibus aristis ante messem flavescunt.“ | 227. *vilem*, minimo parabilem, propter frequentiam. | 228. Pelusium urbs Aegypti; lentis autem magna praestantia et copia in Aegypto; v. E. 1, 56. | 229. Bootes, s. Arctophylax, occidit exeunte mense Octobri. | 231 sq. *Idcirco*, ut ex annuo solis per zodiacum decursu operis rustici tempora definiri possint. — Sol singula deinceps astra zodiaci ingrediendo facit, ut ipse cum his XII astris, s. *per ea*, anni tempora regat, i. e. definiat, et certis partibus dimetiatur s. describat. — *astra mundi*, caeli. | 233. *zonæ* hic sunt caeli quaedam regiones, quibus caelestiae partes subiectae sunt, quas zonarum nomine definimus. | 234. Transtulit haec poeta ab Eratosthene: „ἡ δὲ μετὰ ψαυαρή τε καὶ ἐκ πυρὸς οἶον ἐνδραή.“ | 235. *trahuntur*, extensae sunt. | 236. *concretæ*, i. e. concretam ex aqua glaciem habentes, glacie rigentes; *imbribus* per zeugma adiungitur; *atris*, cf. A. 3,



- Has inter mediamque duae mortalibus aegris  
 Munere concessae divom; et via secta per ambas,  
 Obliquus qua se signorum verteret ordo.
- 240 Mundus, ut ad Scythiam Rhipaeasque arduus arces  
 Consurgit, premittitur Libyae flexus in austros.  
 Hic vertex nobis semper sublimis; at illum  
 Sub pedibus Styx atra videt Manesque profundi.  
 Maxumus hic flexu sinuoso elabitur Anguis
- 245 Circum perque duas in morem fluminis Arctos,  
 Arctos Oceani metuentis aequore tingui.  
 Illic, ut perhibent, aut intempesta silet nox,  
 Semper et obtenta densantur nocte tenebrae;  
 Aut redit a nobis Aurora diemque reducit,
- 250 Nosque ubi primus equis Oriens adflavit anhelis,  
 Illic sera rubens accendit lumina Vesper.  
 Hinc tempestates dubio praediscere caelo  
 Possumus, hinc messisque diem tempusque serendi,  
 Et quando infidum remis impellere marmor
- 255 Conveniat, quando armatas deducere classis,  
 Aut tempestivam silvis evertere pinum.

195. | 237. *mort. aegr.*, δειλοῖσι βροτοῖσιν Hom. Od. 11, 19. | 238 sq. Zodiacus *obliquus* dicitur, quia sidera, quibus constat, per obliquam illam Solis viam, quae linea ecliptica vocatur, disposita sunt. — *secta*, quia via similis est secturae, quippe dirimens ea, quae utrumque adiacent. — *per*, i. e. inter ambas; sic *per* saepe spectat ad rem, quae media extenditur inter duas alias. | 240 sq. Significatur pars caeli septemtrionalis et australis, i. e. polus arcticus et antarcticus; *mundus*, caelum, ut vs. 232; *Rhipaei* montes in ora Scythiae ultra Tanaïm; v. G. 2, 535. Ceterum haec, ut multa apud veteres poetas, ad vulgarem opinionem atque ad quandam speciem rerum, non ad veritatem, accommodata sunt. | 242 sq. *Hic vertex*, polus arcticus, supra nos eminet (propterea quae nobis est semper conspicuus), contra polus antarcticus sub pedibus est nobis cumque suspiciunt οἱ ἀντίποδες s. ἀντιποδες. Servius ad A. 6, 532: „Antipodes, quantum ad nos spectat, Inferi sunt, sicut nos illis.“ Eodem refertur, quod ipse Virg. de iis dicit, qui in Elysio degunt, A. 6, 641: „solemque suum, sua sidera norunt;“ cf. etiam infra vs. 249 sqq. | 244 sq. *hic*, in polo arctico, sidus Draconis, sinuosum fluminis cursum imitans, inter Ursam maiorem et minorem, s. Helicem et Cynosuram, positum ultra utramque porrigitur. | 246. Arcti numquam occidunt; sidera occidentia, ut ipse sol, saepe dicuntur poëtis in mare descendere; *metuentes*, quasi ab hoc sibi caveant, quod numquam faciunt. | 247. *Illic*, sub polo antarctico. — Ceterum v. vs. 181. | 248. v. A. 6, 716. | 250. aurae matutinae ante orientem diem flantes tribuntur anhelationi appropinquantium equorum Solis, ut A. 5, 739. | 252 sqq. Ex hoc Solis per Zodiacum decursu discimus, quando hiems, quando aestas, quando ver instet; quod anni tempus navigationi aptum sit, cet. — *dubio* c. i. e. quando caeli facies incertum relinquit, qualis futura sit tempestas. | 254. Hoc versu videntur parva navigia significari, quae tantum remis aguntur, qualia sunt piscatorum, proximo maiores naves omni velorum apparatu instructae. — *deducere*, v. A. 3, 71. | 256. *temp. evert. p.*, materiem tempestive caedere. Facile intelligitur non exigi ab indoctis hominibus, quales fere sunt rustici, observationem siderum; at reperiebant illi, quae tunc spectabant, omnia in fastis astrologorum (v. E. 3, 40) aut in calendariis notata, quale composuit Colum. 11, 2, ubi etiam, quae tempestas cuiusque temporis pro-

- Nec frustra signorum obitus speculamur et ortus,  
 Temporibusque parem diversis quattuor annum.  
 Frigidus agricolam si quando continet imber,  
 260 Multa, forent quae mox caelo properanda sereno,  
 Maturare datur: durum procudit arator  
 Vomeris obtunsi dentem; cavat arbore lintres;  
 Aut pecori signum aut numeros inpressit acervis.  
 Exacuunt alii vallos furcasque bicornis,  
 265 Atque Amerina parant lentae retinacula viti.  
 Nunc facilis rubea texatur fiscina virga;  
 Nunc torrete igni fruges, nunc frangite saxo.  
 Quippe etiam festis quaedam exercere diebus  
 Fas et iura sinunt: rivos deducere nulla  
 270 Religio vetuit, segeti praetendere saepem,  
 Insidias avibus moliri, incendere vepres,  
 Balantumque gregem fluvio mersare salubri.  
 Saepe oleo tardi costas agitator aselli  
 Vilibus aut onerat pomis; lapidemque revertens  
 275 Incusum aut atrae massam picis urbe reportat.  
 Ipsa dies alios alio dedit ordine Luna  
 Felicis operum. Quintam fuge: pallidus Orcus  
 Eumenidesque satae; tum partu Terra nefando  
 Coeumque Iapetumque creat, saevumque Typhoea,  
 280 Et coniuratos caelum rescindere fratres.  
 Ter sunt conati inponere Pelio Ossam  
 Scilicet, atque Ossae frondosum involvere Olympum;  
 Ter Pater exstructos disiecit fulmine montis.

pria sit, perscriptum est. | 258. *parem*, in quattuor aequalia spatia, ver, aestatem, autumnum, hiemem, divisum. | 259. *continet*, domi tenet. | 260. v. vs. 214. — *properantur*, quae properanter, *maturantur*, quae tempestive et ordine fiunt. | 261. *proc.*, procudendo acuit. | 262. *lintres*, intellige hic vasa lignea concava, Tib. 1, 5, 23. | 263. *signum*, infra 3, 158. — *num. inpr.*, imponit tabellas, quibus inscriptum, quot sint modii; et v. vs. 49. | 264. ad vites sustentandas, v. 2, 359. | 265. Ameriae, oppido Umbriae, multa erat salix. | 267. frumentum, ut facilius moli (frangi saxo molari) posset, torrebatur; A. 1, 179. | 269 sqq. Haec et plura similia libris Pontificum exposita persequitur Colum. 2, 22. | 270. *Relig.*, interdictum, quod vetat fieri, quod contra religiones sit, *Religionsverbot*. | 272. *salubri*, ergo valetudinis, non purgandae lanae causa tum id facere licebat. | 274. *lapidem*, puta molarem. | 275. *incusum*, qui cudendo aptus factus est ad moleandum; *urbe*, v. 4, 88. — pice opus erat et ad vasa picanda et ad mustum condiendum, Colum. 12, 22 sq. | 276 sqq. Alius dies alii rei aptus; alius praeterea felix, alius infelix. | 277. *fel. op.*, ad opus rusticum persequendum. — *quintam*, licet praecesserit „*dies alios*“; cf. Tib. 3, 6, 32. — *Orcus*, Pluto. | 279. tum creati sunt C. et I., *proles* Terrae; v. E. 8, 45. Titanes sunt, Caeli Terraeque filii, Coeus et Iap.; Typhoei pater Tartarus; Typhoea. | 280. *fratres*, Alodidae, Hom. Od. 11, 305 sqq., vel Gigantes, Ovid. Met. 1, 151 sqq. | 280 sq. Rei incredibilis magnitudo conatusque difficultas per tarditatem numerorum duplicemque hiatum feliciter expressa. Pelion, Ossa, Olympus, montes Thessaliae. — *Scilicet* indicat instantiam rei vel novitate (ut 2, 245. 3, 266) vel magnitudine

- Septuma post decumam felix et ponere vitem,  
 285 Et prensos domitare boves, et licia telae  
 Addere; nona fugae melior, contraria furtis.  
 Multa adeo gelida melius se nocte dedere,  
 Aut cum sole novo terras inrorat Eous.  
 Nocte leves melius stipulae, nocte arida prata  
 290 Tondentur; noctes lentus non deficit humor.  
 Et quidam seros hiberni ad luminis ignis  
 Pervigilat ferroque faces inspicat acuto;  
 Interea longum cantu solata laborem  
 Arguto coniunx percurrit pectine telas,  
 295 Aut dulcis musti Volcano decoquit humorem  
 Et foliis undam trepidi despumat aeni.  
 At rubicunda Ceres medio succiditur aestu,  
 Et medio tostas aestu terit area fruges.  
 Nudus ara, sere nudus: hiemps ignava colono.  
 300 Frigoribus parto agricolae plerumque fruuntur,  
 Mutuaque inter se laeti convivia curant;  
 Invitat genialis hiemps curasque resolvit:  
 Ceu pressae cum iam portum tetigere carinae,  
 Puppiibus et laeti nautae inposuere coronas.  
 305 Sed tamen et quernas glandes tum stringere tempus  
 Et lauri bacas oleamque cruentaue myrta;  
 Tum gruibus pedicas et retia ponere cervis,  
 Auritosque sequi lepores; tum figere dammas,

(ut 2, 534) vel, ut hic, utraque percussum animum loquentis.] 284. v. E. 5, 1. |  
 285. *prensos*, cf. 3, 207. — *lic. telae addere*, annectere, i. q. telam ordiri; Tib.  
 1, 6, 79. | 286. *fugas*, servorum. | 287. *dat se aliquid*, quod pro re nata evenit;  
 Ter. Hec. 3, 3, 20 „Omibus nobis ut *res dant sese*, ita magni atque humiles  
 sumus;“ i. e. ut cuique evenit; A. 4, 627 „*dabunt se vires*,“ suppetent, con-  
 tingent. Ceterum v. vs. 49. | 288. *Eous*, Lucifer. — *inrorat*, G. 3, 324 sqq. |  
 290. *lentus*, qui lenta, flexilia et molliora reddit, quae secantur, cum ante arida  
 fuissent et rigida. | 291. *quidam*, ut *τις*, i. q. sunt, qui *est*. | 292. cf. E. 7, 49  
 et 8, 29. | 293. *solata*, solans, ut vs. 339. 4, 72. A. 5, 708. | 294. A. 7, 14. |  
 295. Versus, qui vocatur hypermetrus; sed ultima syllaba eliditur; cf. 3, 242.  
 A. 5, 422. — *Volcano*, igne, A. 2, 311, ut Mars pro bello vel armis, Ceres  
 pro frugibus, Bacchus pro vino et vitibus, Neptunus pro aqua, Venus pro amore,  
 Minerva pro tela; cf. Cic. de N. D. 2, 23, 60. — Significatur mulier defrutum  
 faciens. | 296. *trepidi* ex aestuante musto. | 297. Sata cum rubicundum colorem  
 traxerunt, messis facienda est. — *succiditur* sub ipsis scilicet spicis, quae in  
 corbes colligebantur, Liv. 22, 1, relicta stipula, quae vel post secaretur, cf. vs.  
 289, vel cremaretur, cf. vs. 85. — *medio aestu* Servius: „per diem, quando aestus  
 est.“ | 298. v. vs. 192. | 299. *Nudus*, i. e. tunica tantum indutus, eo quidem  
 anni tempore, quo sol nondum desiit fervere; cf. Hes. *Egy.* 391. | 303. Tib. 1,  
 3, 40. | 304. Puppis navium portum ex itinere intrantium coronari solebant. —  
*pressae*, onustae. | 305. *Sed tamen: quamquam* ignava est hiems, *tamen* non  
 deest, quod per eam agere liceat; cf. A. 3, 541. — Ceterum v. E. 10, 20. |  
 306. bacis lauri et nigrae myrti utebantur ad vinum oleamque condiendum. —  
*cruenta*, Servius: „quia matura cruoris imitantur colorem.“ | 307. *grus* gulosis

- Stuppea torquentem Balearis verbera fundae,  
 310 Cum nix alta iacet, glaciem cum flumina trudunt.  
 Quid tempestates autumni et sidera dicam,  
 Atque, ubi iam breviorque dies et mollior aestas,  
 Quae vigilanda viris? vel cum ruit imbriferum ver,  
 Spicea iam campis cum messis inhorruit, et cum  
 315 Frumenta in viridi stipula lactentia turgent?  
 Saepe ego, cum flavis messorum induceret arvis  
 Agricola et fragili iam stringeret hordea culmo,  
 Omnia ventorum concurrere proelia vidi,  
 Quae gravidam late segetem ab radicibus imis  
 320 Sublimem expulsam eruerent; ita turbine nigro  
 Ferret hiemps culmumque levem stipulasque volantis.  
 Saepe etiam immensum caelo venit agmen aquarum,  
 Et foedam glomerant tempestatem imbris atris  
 Collectae ex alto nubes; ruit arduus aether,  
 325 Et pluvia ingenti sata laeta boumque labores  
 Diluit; implentur fossae, et cava flumina crescunt  
 Cum sonitu, fervetque fretis spirantibus aequor.  
 Ipse Pater media nimborum in nocte corusca  
 Fulmina molitur dextra; quo maxuma motu  
 330 Terra tremit; fugere ferae, et mortalia corda  
 Per gentis humilis stravit pavor; ille flagranti

accepta. | 309. Balearis nobilissimi funditores; v. E. 1, 55. || V. De tempestatibus, vs. 311—463; quando ingruant, 311—334; quid propterea observandum agricolis, 335—350; signa futurae tempestatis, 351—463. Episodiu[m] de miseria, variis signis, maxime per solem, prodita, quae post Iul. Caesaris mortem Romanos afflicti, 463—497. Postremo, ut saltem Caesarem Octavianum servent, deos precatur poeta, 498—514. || 311—315. Tempestates maxime sub initium autumnus et exitum veris ingruunt. — aut. sidera, quia ad siderum ortus et occasus tempestatum tempora atque etiam causas referebant. | 312. mollior aest., lenior s. cum iam remissior est calor solis. | 313. vigilanda, providenda, cf. vs. 335 sqq. — ruit, ad finem festinat. | 314. inhorr. v. A. 1, 165. | 316 sqq. Interdum etiam media aestate turbida est tempestas. | 317. Stringere interdum dicitur, qui poma, bacas, oleas decerpit; hinc stringere hordea, qui spicas hordeaceas falce resecat, v. vs. 297. | 319. gravidam granis; et v. vs. 20. | 320. eruerent et sublimem eicerent, atque ita, i. e. erutam, ferrent. | 322. caelo venit, tendit ad caelum, v. 2, 206. — agmen densitatem et quandam continuitatem significat. | 323 sq. Collectae ex alto, i. e. ex mari sive vaporibus marinis nubes contrahunt et quasi conglobant (glomerant) foedam tempestatem, gravidam densissimis imbris; sed imbris proprie i. q. per imbres, quandoquidem coacti vapores imbrem gignentes efficiunt tempestatem. — ruere caelum dicebatur, cum vehementer plueret; cf. 2, 325 sq. — Ceterum observa numeros s. rhythmos versus 323—327 cum ipsa re, quae describitur, mire concinentes. | 325. ἔργα ποῦν Hes. "Erg. 46. | 326. fossae, colliciae, quales vs. 114 commemorantur, cf. vs. 372. — cava, non repleta, quorum alvei plane aut fere sicci ante fuerant. | 327. spirantibus, aestuantibus, ut A. 10, 291. fretis, ὄλῳ, ut vs. 356. | 329. moliri, proprie cum vi movere, cum vi iactare, ut hic et 4, 331; terram vs. 494, i. e. vertere; tum de omni conatu aut operis alicuius susceptione; insidias avibus vs. 271, arcem A. 1, 424. — quo motu, qua re commota T. tr.; v. A. 2, 171. | 330. v. vs. 49. | 331. humilis ipse dicitur pavor, quia sternit, affligit hominum

- Aut Athon, aut Rhodopen, aut alta Ceraunia telo  
 Deicit; ingeminant austri et densissimus imber;  
 Nunc nemora ingenti vento, nunc litora plangunt.  
 335 Hoc metuens caeli menses et sidera serva;  
 Frigida Saturni sese quo stella receptet;  
 Quos ignis caelo Cyllenius erret in orbis.  
 In primis venerare deos, atque annua magnae  
 Sacra refer Cereri laetis operatus in herbis,  
 340 Extremae sub casum hiemis, iam vere sereno.  
 Tum pingues agni, et tum mollissima vina;  
 Tum somni dulces densaeque in montibus umbrae.  
 Cuncta tibi Cererem pubes agrestis adoret;  
 Cui tu lacte favos et miti dilue Baccho;  
 345 Terque novas circum felix eat hostia fruges,  
 Omnis quam chorus et socii comitentur ovantes,  
 Et Cererem clamore vocent in tecta; neque ante  
 Falcem maturis quisquam supponat aristis,  
 Quam Cereri torta redimitus tempora quercu  
 350 Det motus inconpositos et carmina dicat.  
 Atque haec ut certis possemus discere signis,  
 Aestusque, pluviasque, et agentis frigora ventos,  
 Ipse Pater statuit, quid menstrua Luna moneret;  
 Quo signo caderent austri; quid saepe videntes  
 355 Agricolae propius stabulis armenta tenerent.  
 Continuo, ventis surgentibus, aut freta ponti

animos.] 332. *Athos* Macedoniae, *Rhodope* Thraciae, *Ceraunia* Epiri montes;  
 cf. Theoc. 7, 77.] 334. *plangunt*, plangerem, sonitum edunt.] 335. v. vs. 173.  
 — *serva*, observa, sidera zodiaci.] 336. Observa etiam planetas. Servias: „Sat-  
 urnus in Capricorno facit gravissimas pluvias, praecipue in Italia, in Scorpiae  
 grandinae.“] 337. cf. A. 8, 138 sq. *In orbem errare* dicitur Mercurius, quippe  
 qui ex planetis, si Lunam exceperis, minimum orbem, intra spatium dierum 87  
 et 23 horarum, percurrat; itaque plures orbis peragrat, dum Saturnus maximum  
 orbem, intra spatium annorum 29, dierum 168 et horarum 19, peragit. Bene  
 igitur ad omnes planetas notandos Saturnus et Mercurius delecti.] 338 sqq. In-  
 primis sunt dei, Ceres maxime, agricolis venerandi, ut avertant immodicas tem-  
 pestates; Hes. *Egy.* 465 sq.] 339 sq. Significantur Ambarvalia, v. E. 3, 77. 5,  
 67 et 75. *operatus*, v. vs. 293.] 341. v. E. 10, 13.] 341. Hes. *Egy.* 585.  
*pingues*, quales epulis aut sacrificiis sunt apti. — Tum vinum, superiore anno  
 conditum, exorta asperitate mite et leno est.] 344. Diis agrestibus lac, mel,  
 vinum libari solebat.] 345. *felix*, pura ac diis grata proptereaue portendens  
 felicia. — *eat*: cornu ducebatur hostia aut laxo fene, ut sponte ire videretur,  
 non, quod mali erat ominis, reluctans.] 346. *chor.* et *soc.*, chorus sociorum.]  
 347. *clamore*: veteres, nisi rea contrarium exigebat, non solebant clam aut voce  
 submissa precari, v. A. 4, 681. 9, 403. Tib. 2, 1, 84 et 4, 5, 20. Soph. El.  
 637—640.] 347 sqq. *neque ante cet.* alterum sacrum Cereri ante ipsam messam  
 offerebatur; id coniunctum erat cum incondita saltatione, qualis Satyrorum fuit  
 E. 5, 72; querna corona in memoriam revocabat pristinum victum, Cereris  
 beneficio mutatum, cf. vs. 147 sqq.] 351. *haec*, sc. aestus, pluvias, ventos. —  
 Alii *possimus*.] 352. v. E. 4, 51.] 354. *quid s. vid.*, quo viso indicio moniti.]  
 356 sqq. Ea agitationem, fragorem, murmur vel numeris vel verborum sono ex-

- Incipiunt agitata tumescere et aridus altis  
Montibus audiri fragor, aut resonantia longe  
Litora misceri et nemorum increbrescere murmur.  
360 Iam sibi tum a curvis male temperat unda carinis,  
Cum medio celeres revolant ex aequore mergi  
Clamoremque ferunt ad litora, cumque marinae  
In sicco ludunt fulicae, notasque paludis  
Deserit atque altam supra volat ardea nubem.  
365 Saepe etiam stellas, vento inpendente, videbis  
Praecipitis caelo labi noctisque per umbram  
Flammarum longos a tergo albescere tractus,  
Saepe levem paleam et frondes volitare caducas,  
Aut summa nantis in aqua colludere plumas.  
370 At Boreae de parte trucidis cum fulminat, et cum  
Eurique Zephyrique tonat domus: omnia plenis  
Rura natant fossis, atque omnis navita ponto  
Humida vela legit. Numquam imprudentibus imber  
Obfuit: aut illum surgentem vallibus imis  
375 Aeriae fugere grues, aut bucula caelum  
Suspiciens patulis captavit naribus auras,  
Aut arguta lacus circumvolitavit hirundo,  
Et veterem in limo ranae cecinere querelam.  
Saepius et tectis penetralibus extulit ova  
380 Angustum formica terens iter; et bibit ingens  
Arcus; et e pastu decedens agmine magno  
Corvorum increpuit densis exercitus alis.  
Iam variae pelagi volucres, et quae Asia circum  
Dulcibus in stagnis rimantur prata Caystri,  
385 Certatim largos humeris infundere rores,  
Nunc caput obiectare fretis, nunc currere in undas,  
Et studio incassum videas gestire lavandi.  
Tum cornix plena pluviam vocat improba voce  
Et sola in sicca secum spatiaturs arena.  
390 Ne nocturna quidem carpentes pensa puellae

pressum. Et v. vs. 169 et 327. | 357. *aridus fr.*, qualis lignorum aridorum, cum franguntur, Hom. Il. 13, 409 et 441. E. 8, 82. | 360. *male*, vix, vel non; infra vs. 448. | 365. ἀνοριστὸς ἀστέρων, A. 2, 693 sq. 5, 527 sq. | 369. *colludere*, moveri inter se saltantium modo. | 370 sq. Quando ab omni caeli parte fulminat et tonat. | 372. v. vs. 326. | 373. *legit*, colligit, contrahit. — Agricolis imber supervenire non potest imprudentibus, i. e. quin ante provideant. | 375. *aeriae*, alte volantes, Hom. Il. 3, 7. v. E. 1, 59. grues, cum imber ingruit, petunt valles; quare iunge *vallibus fugere*, i. e. in vallibus absconditae vitant imbrem, cf. 4, 474; ceterum v. vs. 49. | 378. *vet. querelam*, quod, qui antea homines fuerant, facti sunt ranae; Ovid. Met. 6, 317—381. | 380 sq. Iris aquam trahere credebatur, Tib. 1, 4, 44. Ovid. Met. 1, 271. | 383. Alii *varias*. — *quae*, cycnos puta. Asia prata, tractus paluster Lydiae ad Caystrum; Hom. Il. 2, 461. | 387. *lavandi incassum*, temere, quia humor non penetrat ad vivum. | 388. *vocare* pluviam dicitur, quae eam denuntiat. — *improba*, v. vs. 119. | 389. *sola*

Nescivere hiemem, testa cum ardente viderent;  
Scintillare oleum et putris concrevere fungos.

- Nec minus ex imbri soles et aperta serena  
Prospicere et certis poteris cognoscere signis;|  
395 Nam neque tum stellis acies obtunsa videtur,  
Nec fratris radiis obnoxia surgere Luna,  
Tenuia nec lanae per caelum vellera ferri;  
Non tepidum ad solem pennas in litore pandunt  
Dilectae Thetidi alcyones, non ore solutos  
400 Immundi meminere sues iactare maniplos.}|  
At nebulae magis ima petunt campoque recumbunt,  
Solis et occasum servans de culmine summo  
Nequiquam seros exercet noctua cantus.  
Adparet liquido sublimis in aere Nisus,  
405 Et pro purpureo poenas dat Scylla capillo;  
Quacumque illa levem fugiens secat aethera pennis,  
Ecce inimicus, atrox, magno stridore per auras  
Insequitur Nisus; qua se fert Nisus ad auras;|  
Illa levem fugiens raptim secat aethera pennis.  
410 Tum liquidas corvi presso ter gutture voces  
Aut quater ingeminant, et saepe cubilibus altis,  
Nescio qua praeter solitum dulcedine laeti,  
Inter se in foliis strepitant; iuvat imbribus actis  
Progeniem parvam dulcisque revisere nidos;  
415 Haud equidem credo, quia sit divinitus illis  
Ingenium aut rerum fato prudentia maior;  
Verum, ubi tempestas et caeli mobilis humor  
Mutavere vias et Iuppiter uvidus austris  
Densat, erant quae rara modo, et, quae densa, relaxat,  
420 Vertuntur species animorum, et pectora motus;  
Nunc alios, alios, dum nubila ventus agebat,|

*secum, αὐτὴ καὶ ἑαυτήν, für sich allein.* | 391. *testa*, lucerna fictilis. | 393. *ex imbri*, simulatque imber cessat. — *aperta*, nubibus non obducta, A. 1, 155. | 396. neque oriens Luna rutilantibus Solis occidentis radiis obnoxia est, i. e. rubicundum inde trahit colorem. | 397. *Tenuia*, dactylus, ut *u* pro consona sit, ut A. 12, 905. — *lanae vellera*, nubeculae lanis similis, quas Germani oviculas appellant. | 400. *meminere*, quasi obliti, quod alias facere solent. — *manipulos*, puta graminis vel straminis; *iactare solutos*, ita iactare, ut solvantur. | 401. *At*, v. A. 7, 691. | 403. *Nequit*, quasi quae cantu suo turbulentam tempestatem revocare velit. | 404 sq. v. E. 6, 74. | 413. *in foliis*, inter frondes. | 416. *iunges rerum prudentia*. — *maior*, quam in hominibus aut aliis in animalibus esse solet. | 417 sqq. Quando mutatur tempestas vel in melius, vel in deterius, similiter mutantur etiam animi avium. | 418. *mut. vias*, ubi ventis mutatis alio, quam ante, nubes aguntur. — Iovi tribuuntur, quae fiunt in aere; hinc aer ipse Iovis nomine appellatur, ut Horat. Od. 1, 1, 25. Theocr. 4, 23. hinc Iuppiter etiam i. q. tempestas 2, 419. | 419. modo cogit, modo dispellit nubila. — Copulativae Particulae a Graecis Latinisque ponuntur interdum, ubi disiunctivas expectes: „aut, quae densa erant, i. e. densum aëra, relaxat“ serenus scilicet factus; cf.

- Concipiunt: hinc ille avium concentus in agris,  
 Et laetae pecudes, et ovantes gutture corvi.  
 Si vero solem ad rapidum lunasque sequentis  
 425 Ordine respicies, numquam te crastina fallat  
 Hora, neque insidiis noctis capiere serenae.  
 Luna, revertentis cum primum colligit ignis,  
 Si nigrum obscuro comprehenderit aera cornu,  
 Maxumus agricolis pelagoque parabitur imber;  
 430 At si virgineum suffuderit ore ruborem,  
 Ventus erit; vento semper rubet aurea Phoëbe.  
 Sin ortu quarto, namque is certissimus auctor,  
 Pura neque obtunsis per caelum cornibus ibit,  
 Totus et ille dies, et qui nascentur ab illo  
 435 Exactum ad mensem, pluvia ventisque carebunt,  
 Votaque servati solvent in litore nautae  
 Glaucō et Panopeae et Inoo Melicertae.  
 Sol quoque et exoriens et cum se condet in undas,  
 Signa dabit; solem certissima signa sequuntur,  
 440 Et quae mane refert, et quae surgentibus astris.  
 Ille ubi nascentem maculis variaverit ortum  
 Conditus in nubem, medioque refugerit orbe,  
 Suspecti tibi sint imbres; namque urguet ab alto  
 Arboribusque satisque Notus pecorique sinister.  
 445 Aut ubi sub lucem densa inter nubila sese  
 Diversi rumpent radii, aut ubi pallida surget  
 Tithoni croceum linguens Aurora cubile,  
 Heu, male tum mitis defendet pampinus uvas:  
 Tam multa in tectis crepitans salit horrida grando.  
 450 Hoc etiam, emenso cum iam decedit Olympo,  
 Profuerit meminisse magis; nam saepe videmus  
 Ipsius in voltu varios errare colores:  
 Caeruleus pluviam denuntiat, igneus Euros;  
 Sin maculae incipient rutilo inmiscerier igni,

1, 442. 2, 351. 399. 503. 3, 121 sq. A. 3, 459. 5, 52. 10, 112.] 424. *lunas*, non *lunam*, de luna singulis deinceps vicibus oriente.] 425. *Ordine*, certa quadam ratione, id quod ad varias phases, quas dicunt, mutationesque lunae referendum videtur.] 427. cum primum renascentis lunae cornua apparent.] 428. *compr.* quasi complexa fuerit utroque cornu.] 430. *ore*, sic Virgilius adiicit interdum nudos Substantivorum Ablativos (*manu* A. 3, 659) ad illustrandas rerum imagines; *ore suff.*, ita suffuderit, ut in ore eius cernatur rubor; similia videbis 3, 439. A. 6, 187.] 431. *semper*, ut Gr. *ἀεὶ*, i. e. quoties ventus instat, rubet luna.] 437. Glaucus, v. A. 6, 36. Panopea, Nereis; Melicertes, Ovid. Met. 4, 521 sqq. — *Glaucō et*, hiatus similis ei, qui est ap. Hom. II. 17, 40 *Πάνθη ἐν χελοεσσιν.*] 441. *nasc. m. v. ortum*, primum oriens maculis infectus erit.] 442. *med. ref. o.*, ubi obscurata media sui parte concavus videbitur. — *quae*, v. vs. 419.] 443. *alto*, mari.] 448. v. vs. 360.] 449. *crepitans salit*, vide numeros ad rem accommodatos.] 450. iunge: *etiam magis profuerit.*] 454. *in-*





- 455 Omnia tum pariter vento nimbisque videbis  
 Fervere. Non illa quisquam me nocte per altum  
 Ire, neque ab terra moneat convellere funem.  
 At si, cum referetque diem condetque relatum,  
 Lucidus orbis erit, frustra terreberet nimbis,  
 460 Et claro silvas cernes Aquilone moveri.  
 Denique, quid vesper serus vehat, unde serenas  
 Ventus agat nubes, quid cogitet humidus Auster,  
 Sol tibi signa dabit. Solem quis dicere falsum  
 Audeat? Ille etiam caecos instare tumultus  
 465 Saepe monet, fraudemque et operta tumescere bella.  
 Ille etiam extincto miseratus Caesare Romam,  
 Cum caput obscura nitidum ferrugine textit,  
 Impiaeque aeternam timuerunt saecula noctem.  
 Tempore quamquam illo tellus quoque et aequora ponti  
 470 Obscenaque canes inportunaeque volucres  
 Signa dabant. Quotiens Cyclopum effervere in agros  
 Vidimus undantem ruptis fornacibus Aetnam  
 Flammarumque globos liquefactaque volvere saxa!  
 Armorum sonitum toto Germania caelo  
 475 Audiit; insolitis tremuerunt motibus Alpes.  
 Vox quoque per lucos volgo exaudita silentis,  
 Ingens, et simulacra modis pallentia miris  
 Visa sub obscurum noctis; pecudesque locutae,  
 Infandum! sistunt amnes, terraeque dehiscunt,  
 480 Et maestum inlacrimat templis ebur, aeraque sudant.  
 Proluit insano contorquens vertice silvas

*miserier*, antiquae pro *immisceri*.] 456. *Fervere*, ut *stridere* 4, 556, *fulgere* A. 6, 827, antiquae, et sic semper Virgil. — *Non*, ubi exspectes *ne*. *Non* sic in principio cum vi collocatum iunges cum *quisquam*, ut 3, 140; fortius id, quam *nemo*, *haud quisquam*.] 457. *funem*, retinaculum, ut A. 3, 266.] 460. *claro*, clarum s. serenum caelum efficiente.] 461. *unde*, a qua caeli parte venturus sit ventus, qui nubes per caelum agat serenas, non ferentes pluviam.] 464. *caecos*, occultos adhuc.] 467. De prodigiis, quae Iul. Caesaris interitum secuta sunt, vid. etiam Ovid. Met. 15, 782 sqq. Tibull. 2, 5, 71 sqq.] 470. *obscenae*, mala portendentes, ut A. 3, 367. 4, 455. 12, 876. — *canes*, Ovid. l. 1. 797. — *volucres*, Ovid. l. 1. 791. — *inportunae*, Servius „in alienum tempus ruentes, ut striges aut bubones, nocte gaudentes, per diem possent videri.“] 471 sq. *undare*, hic de flammis dicitur, cf. A. 8, 257; Livius a Servio laud.: „Tanta flamma ante mortem Caesaris ex Aetna monte defluxit, ut non tantum vicinae urbes, sed etiam Rhœgina civitas afflaretur.“ — *fornacibus*, quia Aetna Vulcani et Cyclopum officina putabatur.] 474. intelligenda est ea pars Germaniae, quae Rheno sinistra erat, tum a Romanis possessa; et iste armorum sonitus non poterat non aevum bellum a Germanis imminens ostendere.] 476. *vulgo*, crebro.] 477. umbrae mortuorum; cf. A. 1, 353 sq.] 479. *sistunt*, cursu per terrae motum intersaepto. — Ceterum velim advertas: ut hic, ita vs. 470, studio quaesitam verborum (*sistunt* .. *dehiscunt*) similitudinem; alliterationem vulgo appellamus; v. A. 9, 634. cuius quam varia vis sit, varia monstrabunt exempla E. 8, 80. G. 2, 441. A. 8, 641 et 644—649. G. 3, 421. A. 8, 669. 9, 621. 634. 10, 735. 11, 189 sq.] 480. *ebur*

- Fluviorum rex Eridanus, camposque per omnis  
 Cum stabulis armenta tulit. Nec tempore eodem  
 Tristibus aut extis fibrae adparere minaces  
 485 Aut puteis manare cruor cessavit et altae  
 Per noctem resonare lupis ululantibus urbes.  
 Non alias caelo ceciderunt plura sereno  
 Fulgura, nec diri totiens arsere cometae.  
 Ergo inter sese paribus concurrere telis  
 490 Romanas acies iterum videre Philippi;  
 Nec fuit indignum superis, bis sanguine nostro  
 Emathiam et latos Haemi pinguescere campos.  
 Scilicet et tempus veniet, cum finibus illis  
 Agricola, incurvo terram molitus aratro,  
 495 Exesa inveniet scabra robigine pila,  
 Aut gravibus rastris galeas pulsabit inanis,  
 Grandiaque effossis mirabitur ossa sepulchris.  
 Di patrii, Indigetes, et Romule Vestaque mater,  
 Quae Tuscum Tiberim et Romana Palatia servas,  
 500 Hunc saltem everso iuvenem succurrere saeclo  
 Ne prohibet! Satis iam pridem sanguine nostro  
 Laomedontae luimus periuria Troiae;  
 Iam pridem nobis caeli te regia, Caesar,  
 Invidet, atque hominum queritur curare triumphos;  
 505 Quippe ubi fas versum atque nefas: tot bella per orbem,  
 Tam multae scelerum facies; non ullus aratro

et aera, deorum signa ex ebore vel aere facta; A. 2, 173 sq. | 482. Pronuntia *Fluviorum*, et v. vs. 397. — Rex fluviorum Erid., s. Padus, dici videtur, quia maximus est fluviorum Italiae plurimosque fluvios alveo suo excipit; item Tiberis A. 8, 77, ut maximus fluviorum mediae, quam dicimus, Italiae. | 485. *et, ac. non cessarunt.* — *altae*, ut „alta Roma,” A. 1, 7, et ad hanc praeter ceteras id epitheton hic referri potuisse ex eo intelligitur, quod lupos tum per ipsum forum Romanum discursisse traditum est. | 489. *paribus*, quia Romani cum Romanis congressi. | 490 sqq. Emathia, pars Macedoniae, ut fit, pro tota Macedonia ponitur; et ut Macedoniae, sic etiam Emathiae nomine veteres Thessaliam quoque, Epirum partemque Thraciae interdum complectantur; itaque Philippi, Thraciae oppidum, *iterum*, s. alteram, vidisse civilem decertationem dici poterant, cum priorem non ipsi Philippi, sed campi Pharsalii, qui erant in Thessalia, vidissent; hic Pompeius, illic Brutus cum Cassio victi. — *Haemus*, mons Thraciae. | 491. *superis* dativus, v. A. 11, 416. | 494. v. vs. 329. | 498. Ex diis patriis una praeter ceteros Vesta, ex indigetum, τῶν ἐγγυόλων θεῶν, numero Romulus appellatur. | 499. In Palatino monte ante Romulus, tum Octavianus Caesar habitabat. | 500. *Hunc*, qui nunc regit rem Romanam, iuvenem, Octavianum, tum fere XXVIII annos natum. — *ev. saeclo*, quo iacent leges, mores, agricultura, quo scelerum armorumque omnia plena sunt, vs. 505—511; cf. Horat. Od. 1, 2, 25 sqq. | 502. Laomedon, rex Troiae, cum Apollo et Neptunus muros Troianos aedificassent, periurus et illos, nec multo post, liberata Hesione, Herculem pacta mercede fraudavit; Hom. Il. 21, 450 sqq. Huius sceleris poenas dii suo more non a solo Laomedonte, sed a toto eius genere, unde etiam Romani prognati putabantur, quasi per contagionem ad nova semper scelera proclivi, expetebant. | 503. dudum te dii suo coetui additum cupiunt. | 505. fas in nefas, nefas in fas

Dignus honos; squalent abductis arva colonis,  
 Et curvae rigidum falces conflantur in ensem.  
 Hinc movet Euphrates, illinc Germania bellum;  
 510 Vicinae ruptis inter se legibus urbes  
 Arma ferunt; saevit toto Mars impius orbe;  
 Ut cum carceribus sese effudere quadrigae,  
 Addunt in spatia, et frustra retinacula tendens  
 Fertur equis auriga, neque audit currus habenas.

## G E O R G I C O N

### LIBER. SECUNDUS.

Hactenus arborum cultus et sidera caeli,  
 Nunc te, Bacche, canam, nec non silvestria tecum  
 Virgulta et prolem tarde crescentis olivae.  
 Huc, pater o Lenaeae, — tuis hic omnia plena  
 5 Muneribus, tibi pampineo gravidus autumnus  
 Floret ager, spumat plenis vindemia labris; —

versum.] 509. Per Euphraten Parthi significantur, v. 4, 560 sq., adversus quos Antonius pugnabat anno 718 u. c., adversus Gallos et Germanos Agrippa anno 717.] 510. Seditiosa erat ipsa Italia et vicinae urbes, rupta vetere societate et concordia, ferro inter se decertabant.] 512. carceres locus in Circo, unde currere incipiebant equi ad certamen comparati.] 513. Sententia horum verborum ita comparata est, ut verbum *addere* videatur ex usu circensi sumptum esse crescentemque, dum aliud ex alio spatium conficitur (erant autem septena conficienda), celeritatem significasse; nec inepte cum hoc contuleris Graecum verbum *ἐπιδοῦναι*, quod dicitur de eo, qui incrementum capit in arte aliqua.] 514. *audit h.*, paret iis; Ovid. Met. 5, 382 „sagitta, quae magis *audiat* arcum.“ — *currus*, ipsi equi currum trahentes, ut 3, 91. A. 12, 287.

**Georg. L. II.** *De arborum vitiumque cultura se acturum profertur poeta, vs. 1—3. Sequitur invocatio Bacchi, 4—8.* 1. cf. 1, 1. Hactenus cecini, quod e verbo *canam* repetendum; cf. A. 12, 96 sq.] 2 sq. Baccho sacrae sunt et vites et, praeter oleam, arbores fructiferae; de utrisque se expositurum scribit his verbis „Nunc te, Bacche, canam.“ — *nec non* autem eam habet vim, quam oratio ostendit hunc in modum dilatata: neque solum has canam, sed etiam silvestres arbores atque oleam Minervae sacram. — *silv. virgulta* novellas arbores intelliges silvestres; iam hic significat poeta etiam de creandis arboribus se dicturum, quod fit vs. 9 sqq.; itaque virgulta componuntur cum prole oleae.] 4 sqq. Poeta se fingit in ipsis mediis rebus versantem, in eademque Bacchum vocat; ceterum v. 1, 6.] 5. *tibi*, per te, beneficio tuo, ut A. 5, 797 et v. vs. 206. — *pamp. aut.*, proventus autumnus vindemiali. — *gravidus*, v. E. 6, 53.] 6. *Floret*, ostendit faciem e varia specie et colore uvarum laetissimam. — *labris*,



Huc, pater o Lenae, veni, nudataque musto  
Tingue novo mecum dereptis crura cothurnis.

Principio arboribus varia est natura creandis.

- 10 Namque aliae, nullis hominum cogentibus, ipsae  
Sponte sua veniunt camposque et flumina late  
Curva tenent, ut molle siler, lentaeque genestae,  
Populus et glauca canentia fronde salicta;  
Pars autem posito surgunt de semine, ut altae
- 15 Castaneae, nemorumque Iovi quae maxima frondet  
Aesculus, atque habitae Graiis oracula quercus.  
Pullulat ab radice aliis densissima silva,  
Ut cerasis ulmisque; etiam Parnasia laurus  
Parva sub ingenti matris se subiicit umbra.
- 20 Hos natura modos primum dedit; his genus omne  
Silvarum fruticumque viret nemorumque sacrorum.  
Sunt alii, quos ipse via sibi repperit usus.  
Hic plantas tenero abscindens de corpore matrum  
Deposuit sulcis; hic stirpes obruit arvo,
- 25 Quadrifidasque sudes, et acuto robore vallos;  
Silvarumque aliae pressos propaginis arcus  
Exspectant et viva sua plantaria terra;  
Nil radicis egent aliae, summumque putator  
Haud dubitat terrae referens mandare cacumen.
- 30 Quin et caudicibus sectis — mirabile dictu —  
Truditur e sicco radix oleagina ligno.  
Et saepe alterius ramos inpune videmus  
Vertere in alterius, mutataeque insita mala  
Ferre pirum, et prunis lapidosa rubescere corna.

vasis, in quae infunditur mustum. | 8. Spectant haec ac uvas pedibus calcandas. — cothurnatus esse solebat Bacchus. || I. *Arbores procreantur aut natura*, 9—21, *aut arte*, 22—34. | 9. natura utitur varia via ad creandas arbores. | 10 sq. *ipsae*, sine semine, ut imperitiis quidem videri solet, *sua sponte*, sua quadam vi. | 14. *posito*, ut vs. 521, quod sua sponte defluxit de arboribus. | 15. *nemorum*, i. e. arborum nemoralium. Aesculus, ut omnis quercus, Iovi sacra. | 16. quercus Dodonaeae vocales et fatidicae; Hom. Od. 14, 327 sq. Ovid. Am. 3, 10, 9 „quercus, oracula prima.“ | 19. v. E. 10, 74. | 22. *usus*, experientia, quasi progrediens ea, quam ingressus est, via, repperit alios modos. | 23. *stolo* a radice matris avulsus scrobi mandatur. | 24. sq. infossio ramorum validiorum, vel acuminatorum, vel quadripartito fissorum. | 26 sq. agitur de propagine. *Silvarum*, arborum. — *pressos*, in terram depressos. — *viva*, quia non rosecantur, sed cohaerent cum matre. — *sua t.*, in qua mater crevit. | 29. *ref.*, verba, quibus *re.* praefixum, omne genus mutationis aut vicissitudinis indicant; hinc ramulus, qui mutato loco in alium locum deferretur, referri dicitur; A. 10, 284 „hanc faciem .. *refecit*,“ pristinam in hanc mutavit; sic *resistere* Camilla 11, 710 dicitur, quae ante equo vehebat; *reposci*, vicissim, *dagegen*, *posci* A. 12, 2; et v. A. 12, 35. | 30 sq. olea inprimis sic procreatur, ut caudex, i. e. pars trunci, coniectus et fissus terrae infodiatur. | 31. *e sicco*, quia radix et rami sucosi, siccior contra tranens. | 32 sqq. Insito, qua efficitur, ut pirus mala, cornus, propter pomi, quod gignit, naturam lapidosa dicta, pruna ferat; et

- 35 Quare agite o, proprios generatim discite cultus,  
Agricolae, fructusque feros mollite colendo,  
Neu segnes iaceant terrae. Invat Ismara Baccho  
Conserere, atque olea magnum vestire Taburnum.  
Tuque ades, inceptumque una decurre laborem,
- 40 O decus, o famae merito pars maxuma nostrae,  
Maecenas, pelagoque volans da vela patenti.  
Non ego cuncta meis amplecti versibus opto,  
Non, mihi si linguae centum sint, oraue centum,  
Ferrea vox; ades, et primi lege litoris oram;
- 45 In manibus terrae; non hic te carmine ficto  
Atque per ambages et longa exorsa tenebo.  
Sponte sua quae se tollunt in luminis oras,  
Infecunda quidem, sed laeta et fortia surgunt;  
Quippe solo natura subest. Tamen haec quoque, si quis
- 50 Inserat, aut scrobibus mandet mutata subactis,  
Exuerint silvestrem animam, cultuque frequenti  
In quascumque voles artis haud tarda sequentur.  
Nec non et sterilis, quae stirpibus exit ab imis,  
Hoc faciat, vacuos si sit digesta per agros;

v. vs. 426. || II. *Cultura arborum et silvestrium et fructiferarum*, vs. 35—82. | 35. cultum cuique generi proprium. | 37 sq. Ismarus, mons Thraciae, *Baccho*, v. 1, 296, Taburnus oleis nobilis, mons in confinio Campaniae, Samnii et Apuliae, haud longe a Caudio. | 41. *Maec.* v. 1, 2. — Singulos Georgicorum libros inscribit Maecenati poeta; sed in ea quoque re utitur variatione; conveniebat nomen Maecenatis in primo ultimoque libro primis versibus interponere, licebat contra in binis mediis eo demum loco inserere, quo venit ad praecepta. — Saepo ad studium poeticum aliasque res, ut Tibull. 1, 5, 76, referuntur imagines a navigatione repetitae. — *da vela*, expansis velis naviga, scil. *una*, s. mecum, quod e vs. 39. repetes. — *patenti*, quod patet ad navigandum; *alibi patens* est i. q. amplum. | 43. *si linguae centum* s. etc., *δέξα γλώσσαι, δέξα στόματα* Hom. II: 2, 489 sq. | 44. litus cum legere secum vult, non, quod longinqua petitori faciunt, in altum evehi, i. e., detracta imagine, non omnia persequi, quod immensi laboris esset, sed summa tantum rerum capita perstringere. | 45. *In manibus*, ut *ἐν χερσὶ*, dicuntur, quae propinqua vel in promptu sunt; qui litus legit, ei terra in manibus est; itaque hoc dicit poeta: En terras ipsas, quae sunt carminis mei argumentum; — nam spectat ea res, quam explicaturus est poeta, ad terras agrosque; — legens igitur mecum litus in ipsam quodammodo mediam rem nullas per ambages deducetis, posito scilicet ante oculos eo, de quo acturus sum; in ipsa igitur rerum veritate mecum versaberis, non in argumento aliquo ficto, mythico aut simili, cf. 3, 3 sqq. In ficto autem eiusmodi carmine, ut in Iliade, Odyssea; Aeneide, per multas demum ambages et longa exorsa eo devenitur, quo consilium intendit poeta, ut ad Hectoris Turnique caedem, Ulixis reditum et ultionem procorum. | 49. *Q. s. n. subest*; nihil enim potest laetius crescere, quam quod, sicut silvestres arbores, ex eo solo provenit, quod natura illi aptum est. | 50. Vetus scholiastes (Philargyrus, ut videtur) apud Burmannum: „Duas hic res dicit, ut aut inserantur infecundae arbores fecundis et fructiferis aut certe mutantur de suis locis et fossis immittantur; utrumque enim iis infecunditatem aufert.“ De stolonibus silvestrium arborum id affirmat etiam Plinius N. H. 17, 10, 12 „qui transitus mirum in modum mitigat etiam silvestres.“ | 51. *Ex. s. a.*, exutam videbis silvestrem naturam. | 52. *artes*, cultus artificiales. | 53. *sterilis*,

- 55 Nunc altae frondes et rami matris opacant,  
Crescentique adimunt fetus, uruntque ferentem.  
Iam, quae seminibus iactis se sustulit arbos,  
Tarda venit, seris factura nepotibus umbram,  
Pomaque degenerant sucos oblita priores,
- 60 Et turpis avibus praedam fert uva racemos.  
Scilicet omnibus est labor inpendendus, et omnes  
Cogendae in sulcum, ac multa mercede domandae.  
Sed truncis oleae melius, propagine vites  
Respondent, solido Paphiae de robore myrtus;
- 65 Plantis et durae coryli nascuntur, et ingens  
Fraxinus, Herculeaeque arbos umbrosa coronae,  
Chaonisque patris glandes; etiam ardua palma  
Nascitur, et casus abies visura marinos.  
Inseritur vero et nucis arbutus horrida fetu,
- 70 Et steriles platani malos gessere valentis;  
Castaneae fagus, ornusque incanuit albo  
Flore piri, glandemque sues fregere sub ulmis.  
Nec modus inserere atque oculos inponere simplex.  
Nam, qua se medio trudunt de cortice gemmae
- 75 Et tenuis rumpunt tunicas, angustus in ipso  
Fit nodo sinus: huc aliena ex arbore germen  
Includunt, udoque docent inolescere libro.  
Aut rursum enodes trunci resecantur, et alte

sc. arbor; significantur stolones a radice maioris arboris pullulantes.] 56. *Cr. ad. fet.*, crescit illa quidem, sed adimitur ei pariendi facultas. — *ur. f.*, sucum subducunt ferenti, i. e. quasi volenti conantique fructus ferre, ut Cic. de sen. 4, 11 „Restitit agrum dividenti.“] 59. *oblita*, carentia; transferuntur a poetis ad res inanimatas ea, quae sunt animantium, ut oblivio; cf. vs. 59. 350; similiter varii labores, ut 1, 192.] 61. En industrii laboris imaginem numeris expressam! et cf. vs. 399.] 62. *Cog. in s.*, digerendae, cf. vs. 54, et scrobibus mandandae. — *multa m.*, multi laboris impendio.] 63. *truncis*, si truncos, s. sectos caudices infoderis, v. vs. 30.] 64. *Resp.*, cf. 1, 47. — *de robore*, quae de s. ex robore, palo, terrae infixio proveniunt, cf. vs. 24 sq. — *Paphiae* dicuntur myrtus a Papho, oppido Cypri, ubi praecipue colebatur Venus.] 65. Plantae habent radicem et cum ea transferuntur.] 66. *Herc. etc.*, populus alba, ἄχερως, quam ab Acheronte rettulit Hercules, fronde eius arboris coronatus; eadem viri fortes se redimunt et iuvenes in gymnasiis certantes; E. 7, 61. Horat. Od. 1, 7, 23.] 67. *Ch. patris*, Iovis Dodonaei, v. vs. 16 et E. 9, 13; nobilis est Chaonia quercetis.] 68. *Nascitur*, sc. plantis.] 69. *nucis*, iuglandis. — *horrida* ea dicitur a cortice hispidi et asperi.] 70. *gessers*, vid. 1, 49.] 71. *fagus* est Nominativus plural. IV. Declinat., sc. *incanuerunt flore castaneae*; sed Verbum ex more Virgilii sequitur Numerum proximi Substantivi, *ornus*.] 72. quercus inseritur ulmo, fortasse quia citius gignuntur glandes ex insita quercu, quam e nata.] 73 sqq. Diversa est ab insitione, quae vss. 78 sqq. describitur, inoculatio, de qua vss. 74—77 agitur.] 75. *tunicas*, librum, s. interiorem corticem.] 76. *nodus* dicitur ipsa e cortice prorumpens gemma, in modum nodi turgens; fit autem sinus, cavitas quaedam, avulsâ gemmâ, cuius in locum germen, s. gemma, ex alia arbore transfertur.] 77. *docent*, efficiunt ita, ut inolescant.] 78 sqq. Resecantur arbores

- Finditur in solidum cuneis via, deinde feraces  
 80 Plantae inmittuntur: nec longum tempus, et ingens  
 Exiit ad caelum ramis felicibus arbos,  
 Miraturque novas frondes et non sua poma.  
 Praeterea genus haud unum nec fortibus ulmis,  
 Nec salici lotoque, neque Idaeis cyparissis;  
 85 Nec pingues unam in faciem nascuntur olivae,  
 Orchades, et radii, et amara pausia baca,  
 Pomaque et Alcinoi silvae; nec surculus idem  
 Crustumii Syriisque piris gravibusque volemis.  
 Non eadem arboribus pendet vindemia nostris,  
 90 Quam Methymnaeo carpit de palmite Lesbos;  
 Sunt Thasiae vites, sunt et Mareotides albae,  
 Pinguibus hae terris habiles, levioribus illae;  
 Et passo Psithia utilior, tenuisque Lageos,  
 Temptatura pedes olim vincturaque linguam;  
 95 Purpureae, preciaeque; et quo te carmine dicam,  
 Rhaetica? nec cellis ideo contende Falernis.  
 Sunt et Aminnaeae vites, firmissima vina,  
 Tmolius adsurgit quibus et rex ipse Phanaeus;  
 Argitisque minor, cui non certaverit ulla  
 100 Aut tantum fluere aut totidem durare per annos.  
 Non ego te, Dis et mensis accepta secundis,  
 Transierim, Rhodia, et tumidis, Bumaste, racemis.

aut rami ita, ut nullus nodus relinquatur, tum, facta fissura, surculi immittuntur.] 81. *felicibus*, fertilibus. || III. *Diversas esse arbores fruticesque et ipso genere, et solo locisque, et regionibus*, vss. 83—135. *Adiungitur laus Italiae*, 136—176.] 84. Lotus h. l. arbor est, cuius variae sunt formae s. species, quarum zizyphus, dulces ferens bacas, nobilissima. — cupressus arbor familiaris Cretae, cuius mons Ida; v. E. 1, 55.] 85. nec olivae eadem omnes sunt facie, non unum omnium genus.] 87. Horti et pomaria Alcinoi nobilitata per Hom. Od. 7, 112 sqq.] 88. Crustumium, s. Crustumeria, oppidum Etruriae.] 89. v. E. 2, 70.] 90. Methymna urbs Lesbi, insulae maris Aegaei.] 91. Thasus eiusd. maris ins. — *Mar. dictae* a lacu Mareotico, qui erat super Alexandriam.] 92. *habiles*, aptae.] 93. passum fit ex uvis passis. — Psithia et Lageos, utraque Graeca vitis, unde nomen habeat, parum constat. — *tenuis*, vel exiguas uvas habens, vel (quod verius videtur, cf. 1, 92) vinum gignens, quod cito descendit in venas; — 94. quod bibentes fiet olim ut pedum et linguae non sint satis compotes.] 95. *preciae*, subnigrae ut videtur.] 96. Plin. N. H. 14, 6, 8 „In Veronensi (agro) Rhaetica vina, Falernis tantum posthabita a Vergilio.“ et cf. Sueton. Aug. 77. Verona proxima Rhaetiae. — ager Falernus in Campania nobilissimum vinum dabat.] 97. Aminnaea appellata dicitur regio quaedam agri Picentini. — *firm.*, cf. vs. 100.] 98. *Τμῶλιος οἶνος*, vinum ex Tmolo, monte Lydiae; Phanae, promontorium Chii insulae; *rea*, ut vinum omnium praestantissimum; *adsurgit*, honoris significatio, cedit; E. 6, 66.] 99. *Argitis*, aut ab Argis nomen habet, aut ab ἀργός, quod vinum fundit album; est ea duplex, maior et minor, abundans latice.] 101. *diis*, quibus vinum generosius libari solebat apposita post ipsam cenam alia s. secunda mensa cum vino et bellariis; cf. A. 1, 723 sq.] 102. Rhodia a Rhodo ins. dicta. — Plinius: „Tument *mammaram* modo bumasti, *βουμα-*

- Sed neque, quam multae species, nec, nomina quae sint,  
Est numerus; neque enim numero comprehendere refert;
- 105 Quem qui scire velit, Libyci velit aequoris idem  
Discere quam multae Zephyro turbentur arenae,  
Aut, ubi navigiis violentior incidit Eurus,  
Nosse, quot Ionii veniant ad litora fluctus.
- Nec vero terrae ferre omnes omnia possunt.
- 110 Fluminibus salices crassisque paludibus alni  
Nascuntur, steriles saxosis montibus orni;  
Litora myrtetis laetissima; denique apertos  
Bacchus amat collis, aquilonem et frigora taxi.  
Aspice et extremis domitum cultoribus orbem,
- 115 Eoasque domos Arabum pictosque Gelonos:  
Divisae arboribus patriae. Sola India nigrum  
Fert ebum, solis est turea virga Sabaeis.  
Quid tibi odorato referam sudantia ligno  
Balsamaque et bacas semper frondentis acanthi?
- 120 Quid nemora Aethiopum, molli canentia lana?  
Velleraque ut foliis depectant tenuia Seres?  
Aut quos Oceano propior gerit India lucos,  
Extremi sinus orbis, ubi aera vincere summum  
Arboris haud ullae iactu potuere sagittae?
- 125 Et gens illa quidem sumptis non tarda pharetris.  
Media fert tristis sucos tardumque saporem  
Felicis mali, quo non praesentius ullum,  
Pocula si quando saevae infecere novercae,  
\*Miscueruntque herbas et non innoxia verba,\*
- 130 Auxilium venit, ac membris agit atra venena.  
Ipsa ingens arbos faciemque simillima lauro;  
Et, si non alium late iactaret odorem,  
Laurus erat; folia haud ullis labentia ventis;

σφοδ." 103. species, sc. vitium. | 104. nec opus est enumerare omnes. | 109. cf. 1, 53—59. | 110. v. E. 7, 66. | 114. domitum, cf. A. 9, 608. In aliis terris aliae nascuntur arbores. | 115. Geloni, populus Sarmaticus ultra Borysthenem incolens. picti, stigmatibus compuncti; Herodot. 5, 6 de Thracibus, quorum in numero Gelonos ponunt poetae: „τὸ μὲν ἐστίγσαι εὐγενὲς κέκριται, τὸ δ' ἄστικτον (εἶναι), ἀγεννές.“ | 117. v. 1, 57. | 119. acanthus, hic arboris genus, fortasse acacia. | 120. gossypion s. xylon. | 121. Veteres opinabantur, Seres, gentem Indicam, sericum ita parare, ut textam a bombycibus lanuginem ex arborum foliis depecterent. | 123. sinus, curvatura; ubi curva extremi terrarum orbis litora ab Oceano ambiuntur. — aera summ. arb., significatur cacumen, quo altissime in aera tendit arbor. | 126. malum citreum tristis (acidi) suci et tardi, i. e. diu palato inhaerentis, saporis. | 127. Felicis ad medendum scilicet. | 128. infecere, sc. veneno; cf. 3, 283. | 130. atra, v. 1, 129. | 131. v. E. 3, 106. | 133. erat; ubi ponimus, esse aliquid, si quid aliud esset, quod quidem non esse et scimus et significare volumus, Latini, si agitur de re praesenti, utuntur Indicativo Imperfecti, si de re praeterita, Plusquamperfecti. — 133. v. A. 7, 787. |



- Flos ad prima tenax; animas et olentia Medi  
 135 Ora foveat illo et senibus medicantur anhelis.  
 Sed neque Medorum, silvae ditissima, terra,  
 Nec pulcher Ganges atque auro turbidus Hermus  
 Laudibus Italiae certent, non Bactra, neque Indi,  
 Totaque turiferis Panchaia pinguis arenis.  
 140 Haec loca non tauri spirantes naribus ignem  
 Invertere satis inmanis dentibus hydri,  
 Nec galeis densisque virum seges horruit hastis;  
 Sed gravidæ fruges et Bacchi Massicus humor  
 Inplevere; tenent oleae armentaque laeta.  
 145 Hinc bellator equus campo sese arduus infert;  
 Hinc albi, Clitumne, greges et maxuma taurus  
 Victima, saepe tuo perfusi flumine sacro,  
 Romanos ad templa deum duxere triumphos.  
 Hic ver adsidium atque alienis mensibis aestas;  
 150 Bis gravidæ pecudes, bis pomis utilis arbor.  
 At rabidæ tigres absunt et saeva leonum  
 Semina, nec miseros fallunt aconita legentis,  
 Nec rapit inmensos orbis per humum, neque tanto  
 Squameus in spiram tractu se colligit anguis.  
 155 Adde tot egregias urbes operumque laborem,  
 Tot congesta manu praeruptis oppida saxis  
 Fluminaque antiquos subterlabentia muros.  
 An mare, quod supra, memorem, quodque adluit infra?  
 Anne lacus tantos? te, Lari maxume, teque,  
 160 Fluctibus et fremitu adsurgens Benace marino?  
 An memorem portus Lucrinoque addita claustra,  
 Atque indignatum magnis stridoribus aequor,

134. *ad prima*, inprimis. | 135. *fov.*, emendant; v. 4, 230. | 137. *Herm.* fluvius Asiae minoris aurifer. | 138. Bactra, caput regionis Bactrianæ, illo tempore Parthis erant subiecta. | 139. Panchaia, fabulosa insula maris Erythraei, propinqua Arabiae illi tunc abundanti. | 140. ut Colchidem, cf. Ovid. Ep. 6, 31—36. | 141. *satis dentibus* Dativus est; *dentibus hydri*, sc. serendis, *quales ab lasone sato accepimus*. | 143. Massicus mons Campaniae. | 144. v. E. 10, 13. | 146. Clitumnus Umbriae fluvius; ibi albi greges; et putabant hanc vim inesse in aquis Clitumni, ut pecudes efficeret albas. — *albae* pecudes diis superis mactabantur. | 148. *ad t. d.*, in Capitolium. — *duxere*, quia currum triumphantis praecedebant. | 149. *alienis*, etiam non aestivis. | 152. *Semina*, genus. — Nec, qui herbas, quibus vescantur, campestres colligunt, imprudentes carpunt herbas venenatas, quae in aliis terris multae nascuntur. | 155. *op. lab.*, moenium aedificiorumque amplitudinem. | 157 sqq. Quae iam sequuntur, vel adspectus iucunditate, vel utilitatis opportunitate se commendant. | 158. *quod supra*, superam mare s. Adriaticum, *quod infra*, inferum s. Tyrrhenum. | 159. Larius in agro Mediolanensi, nunc *Lago di Como*. | 160. Benacus inter Brixiam et Veronam, nunc *Lago di Garda*. | 161—164. Describitur portus Iulius, qui prope Baias erat in Campania, a. C. Iulio Caesare Octaviano factus perfosso angusto aggere, qui Lucrinum lacum a mari Tyrrhenio (cf. vs. 164) secludebat, eodemque lacu cum lacu Averno per fossam coniuncto. — *claustra*, aggerem modo memoratum, ab

- Iulia qua ponto longe sonat unda refuso  
 Tyrrhenusque fretis inmittitur aestus Avernis?  
 165 Haec eadem argenti rivos aerisque metalla  
 Ostendit venis, atque auro plurima fluxit.  
 Haec genus acre virum, Marsos, pubemque Sabellam,  
 Adsuetumque malo Ligurem, Volcosque verutos  
 Extulit, haec Decios, Marios, magnosque Camillos,  
 170 Scipiadas duros bello, et te, maxume Caesar,  
 Qui nunc extremis Asiae iam victor in oris  
 Inbellem avertis Romanis arcibus Indum.  
 Salve, magna parens frugum, Saturnia tellus,  
 Magna virum; tibi res antiquae laudis et artis  
 175 Ingredior, sanctos ausus recludere fontis,  
 Ascræumque cano Romæ per oppida carmen.  
 Nunc locus arborum ingeniis; quæ robora cuique,  
 Quis color, et quæ sit rebus natura ferendis.  
 Difficiles primum terræ collesque maligni,  
 180 Tenuis ubi argilla et dumosis calculus arvis,  
 Palladia gaudent silva vivacis olivæ.

Octaviano ea parte, quæ relicta erat, ita munitum, ut a fluctibus maris superari non posset. | 163 sq. Hi versus ad illustrandum versum præcedentem pertinent. Indignatio ista (v. vs. 59) magnis stridoribus proditur, qui partim refuso i. e. reiecto per aggerem oppositum mari efficiuntur, partim aestu illo, quo idem per angustias ostii in lacum Lucrinum Avernumque immittitur. | 166. *Ut venas et rivos metallorum dicimus, ita eadem fluere dicuntur. Et fluxit, non fluit, quod metalla Italiae exercere Senatusconsulto interdictum erat.* | 168. *malo, duris laboribus; colunt enim Ligures agrum sterilem et saxosum; eosdem durum in armis genus appellat Livius 27, 48.* | 169. Decii, pater, filius et nepos, se pro patria deoverunt; Cic. Tusc. 1, 37. Liv. 8, 9. 10, 28. — *Marios, Camillos, tales, quales fuerunt Marius et Camillus.* | 170. *bello, Dativus, duros ad bellum; durus dici solet miles, ut laboribus adsuetus.* | 171 sq. Spectant hæc eo, quod Octavianus anno 724 p. u. c. capta Aegypto res Asiae constituit. — Indi, i. e. omnino populi Orientis, qui Antonium et Cleopatram in bellum secuti erant; cf. A. 8, 685 sqq. *imbellis* cum indignatione dicitur, qui tantum audere in animum induxerit. — *Rom. arcibus*, ab ipsa Roma in septem collibus (*arcibus*) sita; Prop. 3, 11, 31 „Coniugii obsceni pretium Romana poposcit (*Cleopatra*) Moenia et addictos in sua regna patres,“ et 57 „Septem urbs alta iugis, toti quæ praesidet orbi, Fœmineas timuit territa Marte minas.“ | 173. *Sat. t.*, Italia, cf. A. 8, 819 sqq. | 174. *tibi*, tuo honori inserviens. | 175. *Ingr.*, dicere instituo. — Poetae hausta ex fonte Musis sacro aqua spiritum poeticum ducere, et qui primi novum argumentum, ut Virgilius Romanorum primus disciplinam rei rusticæ, tractant, recludere eiusmodi fontem, tamquam ante absconditum et intactum, dicuntur. | 176. *Ascr.*, quale primus omnium cecinit Hesiodus, Ascræa, vico Boeotiae, oriundus; significantur *Ἔργα καὶ Ἡμέραι Ἡσιόδου*; sed eius carminis tenuitas non est comparanda cum copia et præstantia Virgiliani. || IV. *De varia natura soli*, vs. 177—258, *ac primum, quod solum cuius rei ferendæ aptum sit, exponitur* vs. 179—225, *tum, quibus signis quodque solum cognoscatur.* | 177. locus tribuitur rebus, quæ certo ordine tractantur. — *quæ rob. c.*, quæ sit vis ac virtus cuiusque soli. | 178. qualis cuiusque soli natura ad quas res ferendas apta sit, v. 1, 9. | 179. *Diff.*, non faciles ad largiendas fruges, quasi avaræ; et *coll. mal.*, quasi invidentes et negantes proventum frugum; v. vs. 59 et cf. vs. 223. | 181. cf. G. 1, 18 sq. — *vivacis*, annis enim CC durare dicitur. |

- Indicio est tractu surgens oleaster eodem  
 Plurimus et strati bacis silvestribus agri.  
 At quae pinguis humus dulcique uligine laeta,  
 185 Quique frequens herbis et fertilis ubere campus —  
 Qualem saepe cava montis convalle solemus  
 Despicere; huc summis liquuntur rupibus amnès,  
 Felicemque trahunt limum — quique editus austro,  
 Et felicem curvis invisam pascit aratris:  
 190 Hic tibi praevalidas olim multoque fluentis  
 Sufficiet Baccho vitis, hic fertilis uvae,  
 Hic laticis, qualem pateris libamus et auro,  
 Inflavit cum pinguis ebur Tyrrhenus ad aras  
 Lancibus et pandis fumantia reddimus exta.  
 195 Sin armenta magis studium vitulosque tueri,  
 Aut fetus ovium, aut urentis culta capellas,  
 Saltus et saturi petito longinqua Tarenti,  
 Et qualem infelix amisit Mantua campum,  
 Pascentem niveos herboso flumine cycnos:  
 200 Non liquidi gregibus fontes, non gramina deerunt,  
 Ef, quantum longis carpent armenta diebus,  
 Exigua tantum gelidus ros nocte reponet.  
 Nigra fere et presso pinguis sub vomere terra,  
 Et cui putre solum, — namque hoc imitatur arando —  
 205 Optuma frumentis; non ullo ex aequore cernes  
 Plura domum tardis decedere plaustra iuvençis,  
 Aut unde iratus silvam devexit arator

183. *bacis* s., sc. oleastri. | 185. *ubere*, largo proventu. | 187. *Despic.*, qualem facile est videre, modo oculos deicias in terram. — Alii *dispicere*. — *liqu.*, fluunt; cf. A. 3, 28. | 192. *pat. et auro*, ut Ovid. Met. 3, 32 „anguis cristis praesignis et auro;“ v. 1, 173. | 193 *Tyrrh.*, adhibebantur sacrificiis tibicines Etrusci. | 194. *exta dare, reddere, porrigere*, i. e. in aras imponere; *fumantia*, quippe modo mactatae hostiae erepta et adhuc calida, cf. A. 12, 214 sq. | 195. *Sin studium est.* | 196. *urentes* c., laedentes seu serrato dente, seu saliva, ut exarescant; Plin. N. H. 8, 76 „Morsus caprarum arbori exitialis. Olivam lambendo quoque sterilem faciunt.“ | 197. *saturi*, abundantis omni genere proventus. *longinqua*, longe remotos agros, utpote in extrema Italia sitos. | 198. v. quae Ecl. I. praefati sumus. | 199. *fl.*, Mincio. | 200. *deerunt*, v. E. 7, 7. | 203. *fere*, plerumque; solet optima esse nigra, sc. si eadem pinguis est et putris. | 204. nam arando efficimus, ut solum sit putri simile, i. e. resolutum. | 206. *iuvençis*. Profuerit hoc loco breviter complecti, quae de usu Dativi potissimum tenenda sunt. Dativus significat, quo quid tendit: *caelo tendere manus, saltum dare arvis, ponto iacere pilam*, i. q. ad s. versus caelum, arva, in pontam, v. E. 2, 30; hinc Dativus consilii, v. A. 2, 315. Inde factum, ut Dativus omnino indicet, quo quid aliquo modo pertineat, sive ad usum et commodum, sive ad incommodum et damnum (ad animum suaviter aut contrario motu affectum, qui appellatur Dativus ethicus, v. E. 8, 6. A. 7, 390), sive ad operam rerumque efficientiam; ex hoc genere, quod extremo loco posuimus, haec sunt: *tibi floret ager, decedunt plaustra iuvençis*, i. e. per te, per iuvenços; *terra fertilis iuvençis*, respondens operae iuvençorum; tum illud *nigris exosa chelydri* et similia. | 207. *Aut unde*, aut ex aequore, ex quo cet. — *iratus*

- Et nemora evertit multos ignava per annos,  
 Antiquasque domos avium cum stirpibus imis  
 210 Eruit; illae altum nidis petiere relictis;  
 At rudis enituit impulso vomere campus.  
 Nam ieiuna quidem clivosi glareae ruris  
 Vix humilis apibus casias roremque ministrat;  
 Et tophus scaber et nigris exesa chelydri  
 215 Creta negant alios aequae serpentibus agros  
 Dulcem ferre cibum et curvas praebere latebras.  
 Quae tenuem exhalat nebulam fumosque volucris,  
 Et bibit humorem, et, cum volt, ex se ipsa remittit,  
 Quaeque suo semper viridis se gramine vestit,  
 220 Nec scabie et salsa laedit robigine ferrum:  
 Illa tibi laetis intextet vitibus ulmos,  
 Illa ferax oleo est, illam experire colendo  
 Et facilem pecori et patientem vomeris unci.  
 Talem dives arat Capua et vicina Vesevo  
 225 Ora iugo et vacuis Clanius non aequus Acerris.  
 Nunc, quo quamque modo possis cognoscere, dicam.  
 Rara sit an supra morem si densa requires,  
 Altera frumentis quoniam favet, altera Baccho,  
 Densa magis Cereri, rarissima quaeque Lyaeo:  
 230 Ante locum capies oculis, alteque iubebis  
 In solido puteum demitti, omnemque repones  
 Rursus humum, et pedibus summas aequabis arenas.  
 Si deerunt, rarum, pecorique et vitibus almis  
 Aptius uber erit; sin in sua posse negabunt  
 235 Ire loca et scrobibus superabit terra repletis,  
 Spissus ager; glaebas cunctantis crassaue terga  
 Exspecta, et validis terram proscinde iuvenis.  
 Salsa autem tellus et quae perhibetur amara,  
 Frugibus infelix, — ea nec mansuescit arando,  
 240 Nec Baccho genus aut pomis sua nomina servat —

sc. silvae inutili bonum solum occupanti.] 211. *enituit*, v. E. 1, 39. — sulci terrae pinguis modo aratae nitescere solent.] 213. *rorem* sc. *marinum*, fruticis genus.] 214. v. vs. 206. Terra tophacea et cretosa serpentibus omnium est aptissima.] 215. *negant*, v. vs. 59.] 216. *cib.*, „mala gramina,” A. 2, 471.] 219. Poeta cum hoc vellet dicere *quae viridis est*, ornatius id elocutus est ita: *viridis se vestit*. Alii *viridi*. — *suo*, Servius „naturali, non coacto.”] 220. *salsa*, quae ex salsedine nascitur et aquae salsae modo ferrum rodit.] 221. v. E. 2, 70.] 222. *oleo*, ad oleum gignendum; Sallust. Iug. c. 17 „ager *arbori* infecundus.”] 223. *fac. p.*, largum pabulum praebentem; v. vs. 179. — *pat. vom.*, ad fruges ferendas aptam.] 225. Clanius, fluvius Campaniae, exitiosus erat exundatione vicinis agris, Acerranis maxime; quo factum, ut Acerrae vacuae, infrequentes, essent.] 227. Si requires, utrum rara sit, an nimis densa. — Alii *requiras*.] 230. *cap. oc.*, eliges et designabis.] 233. *Si d.*, si terra effossa eum scrobem non ad summum replebit.] 234. *Apt. uber*, terra aptior et fecundior. — *negab.*, v. vs. 59.] 236. *cunct.*, tenaces. — *terga*, v. 1, 97.] 240. degenerant

- Tale dabit specimen: Tu spisso vimine qualos  
 Colaue prelorum fumosis deripe tectis;  
 Huc ager ille malus dulcesque a fontibus undae  
 Ad plenum calcentur; aqua eluctabitur omnis  
 245 Scilicet, et grandes ibunt per vimina guttae;  
 At sapor indicium faciet, manifestus et ora  
 Tristia temptantum sensu torquebit amaror.  
 Pinguis item quae sit tellus, hoc denique pacto  
 Discimus: haud umquam manibus iactata fatiscit,  
 250 Sed picis in morem ad digitos lentescit habendo.  
 Humida maiores herbas alit, ipsaque iusto  
 Laetior. Ah nimium ne sit mihi fertilis illa,  
 Neu se praevalidam primis ostendat aristis!  
 Quae gravis est, ipso tacitam se pondere prodit,  
 255 Quaeque levis. Promptum est oculis praediscere nigram,  
 Et quis cui color. At sceleratum exquirere frigus  
 Difficile est: piceae tantum taxique nocentes  
 Interdum aut hederæ pandunt vestigia nigrae.  
 His animadversis, terram multo ante memento  
 260 Excoquere et magnos scrobibus concidere montis,  
 Ante supinatas aquiloni ostendere glaebas,  
 Quam laetum infodias vitis genus. Optuma putri  
 Arva solo: id venti curant gelidaeque pruinae  
 Et labefacta movens robustus iugera fossor.  
 265 Ac, si quos haud ulla viros vigilantia fugit,  
 Ante locum similem exquirunt, ubi prima paretur


vites in ea positae. | 241 sq. *qualos colaue*, i. e. viminea cola; crebrum est hoc Epexegesis genus, ut 3, 198 „segetes altae campique natantes,” i. e. segetes altae vento motae. A. 1, 258 „urbem et promissa Lavini moenia,” i. e. promissam Lavinii urbem; cf. etiam A. 2, 722. 7, 659. 804. | 242. Solebant eiusmodi vasa, ne a vermibus aut humore laederentur, in culina suspendi. | 243. *undae a fontibus* sc. petitae; v. E. 1, 8. — *Huc-calcentur*, i. e. huc *infundantur* et calcentur; v. 4, 82. | 244. *Ad pl.*, ad summum, ut colum plenum sit. | 247. *tempt.*, gustantum. — iunge *torquebit sensu*; Lucr. 2, 398 sqq. „Huc accedit, uti mellis lactisque liquores lucundo sensu linguae tractentur in ore; At contra taetra absinthi natura ferique Centauri foedo pertorqueat ora sapore.” | 249. *man. i.*, de manu in manum iactata. | 250. *habendo*, dum quis eam habet, s. tractat, v. A. 2, 6. | 251. *ipsa*, i. e. sua vi, non aut stercore roborata, aut rivis irrigata. | 252. *Laetior*, laetiores gignens herbas. — *mihi* sollicitum significat animum, v. E. 8, 6. | 253. cf. 1, 111. | 254. *tacitam*, quasi tacite, i. e. non alio signo proditam. | 256. *qu. cui*, ὅστις τίηι, non τίς τίηι. Communis usus postulare quis *cuique*. — *sceleratum*, noxium, v. vs. 59. | 257. cf. vs. 113. Plin. N. H. 16, 20 „Taxus noxio fructu; letale quippe bacis, in Hispania praecipue, venenum inest.” | V. *De vitium cultura* vs. 259—419. *Inseruntur tamen huic loco etiam praecepta quaedam ad omne genus arborum spectantia.* | 259. *multo ante*, sc. quam seras quidpiam. | 260. *Excoqu.*, cf. 1, 64—66. — per totum collem, quem vitibus conserere voles, quantus pateat, crebros scrobes faciendos praecipit poeta. | 261. *Ante*, repetes e vs. 259 *multo*. | 263. *solo*, tertius casus an sextus? — *id curant*, faciunt, ut putre fiat; cf. 1, 48. | 265—268. Qui

- Arboribus seges, et quo mox digesta feratur,  
 Mutatam ignorent subito ne semina matrem.  
 Quin etiam caeli regionem in cortice signant,  
 270 Ut, quo quaeque modo steterit, qua parte calores  
 Austrinos tulerit, quae terga obverterit axi,  
 Restituant: adeo in teneris consuescere multum est.  
 Collibus an plano melius sit ponere vitem,  
 Quaere prius. Si pinguis agros metabere campi,  
 275 Densa sere: in denso non segnior ubere Bacchus;  
 Sin tumulis adclive solum collisque supinos,  
 Indulge ordinibus, nec setius omnis in unguem  
 Arboribus positis secto via limite quadret.  
 Ut saepe ingenti bello cum longa cohortes  
 280 Explicuit legio et campo stetit agmen aperto,  
 Directaeque acies, ac late fluctuat omnis  
 Aere renidenti tellus, necdum horrida miscent  
 Proelia, sed dubius mediis Mars errat in armis:

diligentior est, educabit vites in seminario, quod habeat solum simile ei, in quod illae mox transferantur. | 267. *digesta*, ordine disposita, cf. vs. 277. | 268. ne forte non adsuescant novo solo. | 271. *terga* hoc loco significant partem arborum ab Austro aversam; ergo ut quaeque pars Austro aut septentrioni opposita fuerit, ita restituatur. — Alii *qua*. — *axi*, polo. | 272. tanta est vis consuetudinis in rebus tenetis; cf. vs. 343. | 273. nempe alii generi vitium collis, alii campus aptus est. | 275. Satis fuerat dixisse *in denso*, i. e. in densa segete; ipsa autem densitas cum ubertatis quandam speciem prae se ferat, propterea adiecit poeta *ubere*. — *segnior*, v. 1, 151. | 277 sq. *Indulge ordinibus*, i. e. fac ordines laxiores. — *nec setius* in laxis scilicet ordinibus, quam ubi densa severis, vs. 275. — *Arborib. positis in ungu.*, eo, ut vites disponas accurate, s. certis intervallis, efficias, ut omnis via quadret. — *in (s. ad) unguem*: „translatio a marmorariis, ait Servius, qui iuncturas usguibus probant.“ — *limite*, via transversa; *secto* per alteram viam, ut existat decussatio hunc in modum:



Quadrabit autem, s. conveniet inter se, omnis via sic, ut aequalia sint in utramque partem intervalla, unde fit haec figura, quincunx dicta:



Lineis in hac delineatione viae limitesque significantur, circulis vel vites vel milites. | 279. *lunge*: *Ut cum saepe*, v. A. 1, 148. *ingenti*, obversatur poetae animo pugna per campum longissime patentem extenta. — *longa* fit explicando sese. | 281 sq. proprie: fluctuat sole repercusso splendor armorum per campum; hinc, inversa oratione, campus splendore fluctuare dicitur. | 283. *mod. in armis*, inter duo exercitus. — *errat dubius*, dum incertum est, ab utra parte et quando

- Omnia sint paribus numeris dimensa viarum;  
 285 Non animum modo uti pascat prospectus inanem,  
 Sed quia non aliter viris dabit omnibus aequas  
 Terra, neque in vacuum poterunt se extendere rami.  
 Forsitan et scrobibus quæ sint fastigia quaeras.  
 Ausim vel tenui vitem committere sulco.  
 290 Altior ac penitus terræ defigitur arbos,  
 Aesculus in primis, quæ, quantum vertice ad auras  
 Aetherias, tantum radice in Tartara tendit.  
 Ergo non hiemes illam, non flabra neque imbres  
 Convellunt; inmotâ manet, multosque nepotes,  
 295 Multa virum volvens durando sæcula vincit.  
 Tum fortis late ramos et brachia tendens  
 Huc illuc, media ipsa ingentem sustinet umbram.  
 Neve tibi ad solem vergant vineta cadentem;  
 Neve inter vitis corylum sere; neve flagella  
 300 Summa pete, aut summa defringe ex arbore plantas:  
 Tantus amor terræ; neu ferro læde retunso  
 Semina; neve olea silvestris insere truncos:  
 Nam sæpe incautis pastoribus excidit ignis,  
 Qui, furtim pingui primum sub cortice tectus,  
 305 Robora comprehendit, frondesque elapsus in altas  
 Ingentem caelo sonitum dedit; inde secutus  
 Per ramos victor perque alta cacumina regnat,  
 Et totum involvit flammis nemus, et ruit atram  
 Ad caelum picea crassus caligine nubem,  
 310 Praesertim si tempestas a vertice silvis

pugna initium habitura sit.] 284. *numeris*, sc. mensurae s. pedum, i. e. intervallis.] 285. *animum inanem* est eius, qui inani voluptate capitur.] 288. *quam alti s. profundi scrobes* esse debeant.] 290. *Altior ac penitus*, sic sæpe inaequalia, quorum posterius inservit illustrando priori, per copulas iunguntur, ut vs. 428. 3, 238. A. 3, 329. 4, 102. 5, 327. 447. 498. 6, 640. 8, 610. 10, 734. 11, 569. 673. 12, 502. E. 8, 102 „rivo fluenti Transque caput iace,” i. e. et quidem trans caput.“ — *terrae*, ut *proiectus terrae* A. 11, 87. 12, 130 „Defigunt telluri hastas.”] 293. *imbres*, torrentes ex imbribus collecti.] 295. *vir. saecula*, i. e. hominum aetates, v. A. 8, 508. — *volvens* sc. ea, *saecula*, alterum ex altero transigens.] 296. *Tum*, cum durando consensuit.] 297. *ipsa*, i. e. truncus; per hoc pronomen sæpe totum aliquid a partibus, etiam potior pars a reliquis distinguitur; cf. 4, 274. A. 7, 816. 10, 226. adde G. 3, 387. 4, 543. A. 12, 303. — *ing. umbram*, frondes umbram late facientes; cf. 1, 191. 2, 19.] 299. *corylum*, quia vel densa foliorum umbra nocet, vel alimenta viti aufert.] 300 sq. Surculos non ex cacumine, quod siccus est, vitium vel arborum petendos esse praecipitur, sed ex ea parte, quæ terræ sit propior, sive, ut ait Plinius, ex humeris arborum. — Alii *destringe*, cf. vs. prox.] 302. vetat posta oleam in truncos silvestres, i. e. oleastros, inseri, quippe incendiis obnoxios. — Alii *oleae*, cf. vs. 69.] 303. pastoribus per lata illa arbustorum intervalla (cf. vs. 356 sq.) greges pascentibus ignemque frigidior caelo facientibus.] 306. *caelo*, ad caelum.] 309. *crassus caligine*, crassum agens fumum; sic intelliges *atros ignes*, A. 4, 384. 8, 198.] 310. *a vertice*, de caelo, ὑψόθεν.]

Incubuit glomeratque ferens incendia ventus.  
 Hoc ubi, non a stirpe valent caesaeque reverti  
 Possunt atque ima similes revirescere terra;  
 Infelix superat foliis oleaster amaris.

- 315 Nec tibi tam prudens quisquam persuadeat auctor  
 Tellurem Borea rigidam spirante movere.  
 Rura gelu tum claudit hiemps, nec semine iacto  
 Concretam patitur radicem adfigere terrae.  
 Optuma vinetis satio, cum vere rubenti
- 320 Candida venit avis longis invisâ colubris,  
 Prima vel autumnî sub frigora, cum rapidus Sol  
 Nondum hiemem contingit equis, iam praeterit aestas.  
 Ver adeo frondi nemorum, ver utile silvis,  
 Vere tument terrae et genitalia semina poscunt.
- 325 Tum pater omnipotens fecundis imbribus Aether  
 Coniugis in gremium laetae descendit, et omnis  
 Magnus alit, magno commixtus corpore, fetus.  
 Avia tum resonant avibus virgulta canoris,  
 Et Venerem certis repetunt armenta diebus;
- 330 Parturit almus ager Zephyrique tepentibus auris  
 Laxant arva sinus; superat tener omnibus humor;  
 Inque novos soles audent se germina tuto  
 Credere; nec metuit surgentis pampinus austros  
 Aut actum caelo magnis aquilonibus imbrem,
- 335 Sed trudit gemmas et frondes explicat omnis.  
 Non alios prima crescentis origine mundi  
 Inluisse dies aliumve habuisse tenorem  
 Crediderim: ver illud erat, ver magnus agebat  
 Orbis, et hibernis parcebant flatibus Euri:
- 340 Cum primae lucem pecudes hausere, virumque

311. *ferens*, proferens incendia, *glomerat* ea, facit, ut correptis semper proximis arboribus, unum ingens incendium fiat. | 312 sq. Hoc ubi accidit, invalida est stirps et radix, caeso trunco non oleam rursus, sed oleastrum gignens. | 314. *Infelix*, v. A. 6, 230. — *superat*, superest, revirescit. | 317. *claudit*, adstringit eoque facit, ut nihil proferant, cf. vs. 331. — *sem. i.*, positus surculis. | 318. hiems non patitur surculorum radices concreescere cum terra eique adfigi. — *adfigere*, v. 1, 163. | 319. *rubenti*, rubicundos aliosque colorum pulchritudine insignes flores gignent; cf. 4, 306. | 320. ciconia serpentes vorat. | 322. *hiemem*, sidera, quae sol hiemis tempore intrat. | 323. *adeo* ad vim veris ab autumnno distinguendam adiectum est; Graece dicas τό γε ἔαρ, Latine quidem, sed hoc tenuius, quam *adeo*, Germanice *der Frühling namentlich s. besonders*. — nemora et silvae hic ita differunt, ut illa significant plantatas, hae sponte natas et cultu carentes arbores. | 325. vid. E. 7, 60. G. 1, 324. | 326. *Coniugis*, Terrae. | 327. *corpore*, sc. Terrae. | 331. *arva* Nominativus, *sinus* Accusativus, *Zephyri* Genet.; cf. vs. 317. — *superat*, v. 1, 189. | 332. credunt se lumini, prodeunt in lumen; *novos*, quia tum illa primum attingunt lumen; v. E. 8, 29; Servius quidem interpretatur „dies vernaes.“ | 334 sq. quare non metuit austrum, aquilonem? cf. vs. 330. | 339. *parc. flatibus*, i. e. non flabant, ut A. 1, 257.



Terrea progenies duris caput extulit arvis,  
Inmissaeque ferae silvis et sidera caelo.

Nec res hunc tenerae possent perferre laborem,  
Si non tanta quies iret frigusque caloremque

345 Inter, et exciperet caeli indulgentia terras.

Quod superest, quaecumque premes virgulta per agros,  
Sparge fimo pingui et multa memor occule terra,  
Aut lapidem bibulum, aut squalentis infode conchas,  
Inter enim labentur aquae, tenuisque subibit

350 Halitus, atque animos tollent sata; iamque reperti,  
Qui saxo super atque ingentis, pondere testae  
Urguerent; hoc effusos munimen ad imbris,  
Hoc, ubi hiulca siti findit canis aestifer arva.

Seminibus positis, superest diducere terram

355 Saepius ad capita, et duos iactare bidentis,  
Aut presso exercere solum sub vomere, et ipsa  
Flectere luctantis inter vineta iuencos;

Tum levis calamos et rasae hastilia virgae  
Fraxineasque aptare sudas furcasque valentis,

360 Viribus eniti quarum et contemnere ventos  
Adsuescant summasque sequi tabulata per ulmos.

Ac dum prima novis adolescit frondibus aetas,

Parcendum teneris, et, dum se laetus ad auras  
Palmes agit laxis per purum inmissus habenis,

365 Ipsa acie nondum falcis temptanda, sed uncis  
Carpendae manibus frondes interque legendae.

*parce metu, ne metue.* | 341. Primos homines e terra natos esse putabant veteres. | 343 sqq. Nec res tenerae, i. e. nova sata, novae frondes, hunc laborem, i. e. molestiam, quam creat vis frigoris aestusque, *cet.* | 344. *tanta quies*, ipsum ver, in quo quies, securitas, est et a frigore et ab aestu. | 345. *excipit* me aliquid, i. e. accidit, contingit mihi aliquid diversum ab illo, quod ante fuit, cf. A. 3, 318. | 346. *premes*, in terra defiges, plantabis; Colum. 3, 18, 1 „Pastinum autem vocant agricolae ferramentum bifurcum, quo semina panguntur,” i. e. demerguntur, deprimuntur. — *virgulta*, surculos. | 348 sqq. conchae etiam et lapides infodiebantur, qui et aquam ad radices admitterent, et spiramenta iisdem praeberent. — *bibulum*, pumicem aut sabulosum. | 349. *Inter ... lab.*, v. E. 6, 6. | 350. *animos tollent*, laetissime efflorescent; v. 2, 59. | 351. *Iunge super-urguerent*, i. e. desuper urg. — *atque*, v. G. 1, 419. | 352. *effusus* magnum hic quidpiam et vehemens indicat, ut A. 5, 693. 12, 131. — *ad*, adversus. | 353. *Hoc* est munimen adversus aestum canicularem. | 354. *did. t.*, glaebas diminueret. | 355. *ad c.*, i. e. circum c.; et capita significant utramque extremitatem, hic quidem eam, quae est circum radicem; Cato de R. R. 33 „circum capita addito stercus; circum capita sarrito.” | 356. v. vs. 303 et 1, 99. | 358 sqq. Pedandae primo sunt vites, donec attigerint ramos arborum, ad quos se applicare possint et quasi per gradus, *tabulata*, altius altiusque adscendere. — *calamos*, arundineos, cf. vs. 414. | 359. *aptare*, ita, uti convenit, apparare. | 364. *laxis hab.*, accipienda haec sunt de celeriter crescente vite, v. A. 8, 708. — *per purum*, p. aera, cf. vs. 287. | 365. *Ipsa*, prima aetas, i. e. tenerae frondes. | 366. *interlegendae*, non omnes decerpendae s. putandae sunt, sed quasdam per certa inter-

- Inde ubi iam validis amplexae stirpibus ulmos  
 Exierint, tum stringe comas, tum bracchia tonde;  
 Ante reformidant ferrum; tum denique dura  
 370 Exerce inperia et ramos compesce fluentis.  
 Texendae saepes etiam et pecus omne tenendum,  
 Praecipue dum frons tenera imprudensque laborum;  
 Cui super indignas hiemes solemque potentem  
 Silvestres uri adsidue capreaeque sequaces  
 375 Inludunt, pascuntur oves avidaeque iuvencae.  
 Frigora nec tantum cana concreta pruina  
 Aut gravis incumbens scopulis arentibus aestas,  
 Quantum illi nocuere greges durique venenum  
 Dentis et admorso signata in stirpe cicatrix.  
 380 Non aliam ob culpam Baccho caper omnibus aris  
 Caeditur et veteres ineunt proscaenia ludi  
 Praemiaque ingeniis pagos et compita circum  
 Thesidae posuere atque inter pocula laeti  
 Mollibus in pratis unctos saluere per utres.  
 385 Nec non Ausonii, Troia gens missa, coloni  
 Versibus incomptis ludunt risuque soluto,

valla relinques intactas.] 368. *Exierint*, in altum se sustulerint. — *comas*, frondes, ut 4, 137; *bracchia*, ramulos e pampino protensos.] 371. *tenendum*, continendum et arcendum.] 372. *inpr. lab.*, ignara et impatiens earum rerum, quas adultae vites tolerare possunt.] 373. *super* non i. q. plus quam, sed praeter; plus etiam nocere illa animalia, quam frigoris aestusque vim acerrimam, versa 376 sqq. ait poeta. — *indigna* dicuntur, quibus quis non est dignus, quae quis immerito patitur; talia autem videri solent inprimis dura; hinc *indigna* i. q. dura, saeva.] 374. *uri*, non Gallici illi, quorum Caesar mentionem facit, sed aliud quoddam bonum silvestrium genus, bubalorum nomine appellatum. — *sequaces*, tenerae frondis valde appetentes.] 375. *illudunt*, officiunt, nocent, adiuncta petulantiae notione.] 376. *concreta*, frigori poetice tribuitur id, quod per frigus efficitur; hoc enim efficit, ut ex humore pruina concreseat, i. e. congelat; ut *tristis cura, tarda senectus*, quae tristes, tardos reddit.] 377. v. 1, 163. — *scopulis*, cf. vs. 522.] 378. *venenum*, v. vs. 296.] 380 sqq. Ob eam ipsam causam caper Baccho immolari solet, quae res tragoediae, tum etiam ascoliasmo (v. vs. 384), originem dedit. Nam tragoedia e Graeco capri nomine, *τράγος*, appellata est; sub tempus enim vindemiae sollemnia quaedam in honorem Bacchi agitabant Attici, quibus intererant olim poetae carminibus inter se certantes; quorum qui vicisset, is praemii loco caprum accipiebat, quem Baccho immolaret; atque ex his carminibus, ab exiguis initiis profecta, tragoedia extitit, quae et ipsa Baccho sacra erat.] 381. ludi scenici *veteres*, quippe antiquis temporibus inventi. — *proscenium*, anterior scenae pars, in quam prodibant actores.] 382. *ingeniis*, poetis. Tragoedia et comoedia cum iam artis formam induere coepisset, relicto rure in urbem migravit; antea poetae illi ruri pagos circumibant et in compitis plaustra, quibus pro scena utebantur, statuebant.] 383. *Thesidae*, Attici, a Theseo, nobilissimo rege Atticae, dicti.] 384. Significatur *ἀσκαλισμός*. In Dionysiis ruralibus saltabant uno pede per utres, *ἀσχούς*, inflatos vel vino plenos et oleo unctos; qui super utre consisteret nec laberetur, is utrem et vinum praemii loco accipiebat.] 385 sqq. Coloni (i. e. homines rustici) Italici quoque, maxime Latini, qui se a Troianis ortos ferebant, in similem laetitiam effusi Bacchum celebrabant. Videtur autem duplex significari sollemnitas, primum Liberalia, quae vere fiebant,

Oraque corticibus sumunt horrenda cavatis,  
Et te, Bacche, vocant per carmina laeta, tibi que  
Oscilla ex alta suspendunt mollia pinu.

- 390 Hinc omnis largo pubescit vinea fetu,  
Conplentur vallesque cavae saltusque profundi,  
Et quocumque deus circum caput egit honestum.  
Ergo rite suum Baccho dicemus honorem  
Carminibus patriis lancesque et liba feremus,  
395 Et ductus cornu stabit sacer hircus ad aram  
Pinguiaque in veribus torrebimus exta columnis.

- Est etiam ille labor curandis vitibus alter,  
Cui numquam exhausti satis est: namque omne quot annis  
Terque quaterque solum scindendum, glaebaque versis  
400 Aeternum frangenda bidentibus; omne levandum  
Fronde nemus. Redit agricolis labor actus in orbem  
Atque in se sua per vestigia volvitur annus.  
Ac iam olim, seras posuit cum vinea frondes  
Frigidus et silvis aquilo decussit honorem,  
405 Iam tum acer curas venientem extendit in annum  
Rusticus et curvo Saturni dente relictam  
Persequitur vitem attondens fingitque putando.  
Primus humum fodito, primus devecta cremato  
Sarmenta, et vallos primus sub tecta referto;  
410 Postremus metito. Bis vitibus ingruit umbra;  
Bis segetem densis obducunt sentibus herbae;

tum, vss. 393 sqq., alia post vindemiam peractam instituta; v. E. 5, 67.] 387. *ora horr.*, personas s. larvas.] 389. *oscilla*, larvas; sunt hic intelligendae imagunculae quaedam, caput Bacchi referentes; ad has respicitur vs. 392. — *mollia*, mobilia, unde contractum est *mollia*, quae mota aura huc atque illuc convertuntur; Servius interpretatur „pensilia.“] 390. proprie ipse fetus, fructus, pubescere i. e. adolescere et maturescere dicitur.] 391. *complentur*, sc. ubere fractu. — *cavae*, *κοίλαι βάται*, depressiores, collibus vel montibus utrimque clausae.] 392. v. vs. 389. — *honestum*, „pulchrum,“ ait Servius; ut A. 10, 133. 12, 155.] 393. *Ergo*, propterea. — *honorem*, laudes.] 394. *lances* saturas puta, variarum frugum primitiis onustas.] 395. v. 1, 345.] 396. *columnis* „quia, sicut caper inimicus est vitibus, ita iis nocet et corylus,“ Servius; cf. vs. 299.] 398. *exhausti*, i. e. exhaustionis, — si conficto vocabulo uti licet —, s. qui numquam satis exauriri potest.] 399. assiduitas laboris numeris versus prioribus, gravitas eiusdem et tarditate verbi *scindendum* et pausa heroica, quae inter quartum quintumque pedem intercedit, item verbis proximi versus *Act. fr. bid.* illustratur; praeterea v. vs. 61.] 400. *versis bid.*, i. e. aversa bidentis parte, s. ea parte, quae dentes non habet, s. tergo.] 401. *nemus*, h. l. vinea. — iunge: *in orbem redit*; labor peractus mox denuo agendus est.] 402. *annus*, opera annua; *in se volvitur*, in circulum quasi agitur et redintegratur; *per sua vestigia*, ut sua quasi vestigia denuo semper legat et eundem quotannis cursum repetat.] 404. *honorem*, frondes, decus arborum.] 406. *Sat. dens*, falx, insigne huius dei. — *relictam*, frondibus iam nudatam, cf. vs. 403.] 407. *fingit put.*, recidens inutiles ramulos talem efficit, qualis esse debet.] 409. *sarmenta*, resectos ramulos. — *vallos*, pedamenta, quibus per meliorem anni partem alligatae vites fuerant.] 410 sq. bis in anno, vere et autumnno, pampinandum et runcandum.]

- Durus uterque labor: laudato ingentia rura,  
 Exiguum colito. Nec non etiam aspera rusci  
 Vimina per silvam, et ripis fluvialis arundo  
 415 Caeditur, incultique exercet cura salicti.  
 Iam vinctae vites, iam falcem arbusta reponunt,  
 Iam canit effectos extremus vinitor antes:  
 Sollicitanda tamen tellus, pulvisque movendus,  
 Et iam maturis metuendus Iuppiter uvis.  
 420 Contra non ulla est oleis cultura; neque illae  
 Procurvam expectant falcem rastrosque tenacis,  
 Cum semel haeserunt arvis aurasque tulerunt;  
 Ipsa satis tellus, cum dente recluditur unco,  
 Sufficit humorem et gravidas, cum vomere, fruges.  
 425 Hoc pinguem et placitam Paci nutritor olivam.  
 Poma quoque, ut primum truncos sensere valentis  
 Et viris habuere suas, ad sidera raptim  
 Vi propria nituntur opisque haud indiga nostrae.  
 Nec minus interea fetu nemus omne gravescit  
 430 Sanguineisque inculta rubent aviaria bacis.  
 Tondentur cytisi, taedas silva alta ministrat  
 Pascunturque ignes nocturni et lumina fundunt.  
 Et dubitant homines serere atque inpendere curam?  
 Quid maiora sequar? — salices humilesque genestae,  
 435 Aut illae pecori frondem aut pastoribus umbram

412. *laudato*, noli optare; est haec mollior quaedam recusandi forma, ut αἰνεῖν pro παρατεῖσθαι; praefer igitur exiguum vineam, quam diligentius colere possis. | 413 sqq. Praeterea curanda sunt vincula e rusco et salice, quibus alligentur vites ad vallos vel arbores, etiam pedamenta arundinea, cf. vs. 358, itemque saligna. | 415. *inculti*, quia nulla cura indiget. | 416. *arb. reponunt*, arbores iam et ipsae putatae sunt, ut vinitori liceat falcem reponere; v. E. 2, 70. | 417. Iam cantu se exhilarat ob effectos antes vinitor, *extremus*, ad extremam partem vineae putando vinciendoque paulatim progressus. | 418. *pulv. mov.*, fodienda est vinea, eoque solum in pulverem resolvendum, unde dicta est pulveratio. | 419. *metuendum*, ne grandine corrumpatur vindemia. || VI. *De arboribus levi aut nulla cultura indigentibus*, vs. 420—457. | 421. *tenaces*, quae glaebras firmiter comprehendunt tenentque. | 422. *cum e seminario translata olea radices fixerit et aeris varietatem ferre consueverit*; cf. vs. 318 et 332. | 423. *satis*, hic i. q. oliveto. — *dente unco*, bidente. | 424. *cum vomere*, sc. recluditur. | 425. *Hoc*, propterea. — *nutritor* antiquae pro *nutrito*, nutri, ut *bellantur* pro *bellant* A. 11, 660. | 426. *Poma* hic i. q. pomi, ut vs. 33 *cornu* i. q. cornus. | 428. *que* est, qui malit omissum; sed v. vs. 290. | 431 sq. *taedas*, unde pascuntur ignes, s. quae materiam praebent igni, i. e. quae incensae lumen fundunt. | 433. *serere* eiusmodi frutices arboresque; v. A. 6, 807. | 434 sqq. Quid maiora recenseam, arbores proceritate prae domesticis insignes, pinos, cedros, cupressos, quales in altissimo illo Caucaso visuntur, cum ne minora quidem, ut salix, genesta, careant utilitate praetereaque solus etiam adpectus silvorum montium iuvet (delectet) animum? — Alii *sequor*. | 435. *illae* non est otiosum, sed vim addit orationi; sic enim fit, ut notione vocabuli, ad quod spectat hoc pronomen, quodam modo geminata animus ad illud magis attendere iubeatur; cf. A. 6, 593. 11, 494. Inprimis saepe *ille* cum Participiis, etiam Adiectivis, ita iunctum reperitur, ut A.

- Sufficiunt saepemque satis et pabula melli;  
 Et iuvat undantem buxo spectare Cytorum  
 Naryciaeque picis lucos, iuvat arva videre  
 Non rastris, hominum non ulli obnoxia curae —  
 440 Ipsae Caucasio steriles in vertice silvae,  
 Quas animosi Euri adsidue franguntque feruntque,  
 Dant alios aliae fetus, dant utile lignum  
 Navigiis pinos, domibus cedrumque cupressosque;  
 Hinc radios trivere rotis, hinc tympana plaustis  
 445 Agricolae et pandas ratibus posuere carinas;  
 Viminibus salices fecundae, frondibus ulmi,  
 At myrtus validis hastilibus; et bona bello  
 Cornus; Ituraeos taxi torquentur in arcus;  
 Nec tiliae leves aut torno rasile buxum  
 450 Non formam accipiunt ferroque cavantur acuto;  
 Nec non et torrentem undam levis innatat alnus,  
 Missa Pado; nec non et apes examina condunt  
 Corticibusque cavis vitiosaeque ilicis alveo.  
 Quid memorandum aequae Baccheia dona tulerunt?  
 455 Bacchus et ad culpam caussas dedit; ille furentis  
 Centauros leto domuit, Rhoetumque Pholumque  
 Et magno Hylaeum Lapithis cratere minantem.  
 O fortunatos nimium, sua si bona norint,  
 Agricolas! quibus ipsa, procul discordibus armis,  
 460 Fundit humo facilem victum iustissima tellus.

1, 3, 5, 457. 9, 796. 10, 274. 12, 5. | 437. *undantem*, in modum aquae vento motae fluctuantem. — Cyturus mons Paphlagoniae. | 438. *Naryciae* h. l. idem, quod Bruttiae; Naryx enim s. Narycium oppidum erat Locrorum Epicnemidiorum; colonia autem Narycia Locros oppidum in Bruttiis condidit. — *arva*, sc. silvis consita. | 441. *animosi Euri ads.* Excipientes se plures in eodem versu elisiones aliquoties valent ad illustrandam vel vim ac vehementiam rei, ut h. l., vel magnitudinem, ut A. 6, 552. 12, 897, vel difficultatem, ut infra 3, 505, vel perpetuitatem eiusdem status, ut A. 7, 623, vel pertinaciam, ut infra 4, 84, vel indignationem, ut A. 2, 84; item indicant animum plenum irae, ut A. 2, 96. G. 3, 232. 4, 330, horroris, ut A. 2, 12. 3, 658. 4, 181. 7, 78. 8, 81. 647, perturbationis, ut A. 4, 203. Sed accedunt in eiusmodi versibus plerumque etiam alia adiumenta gravitatem orationi conciliantia, et v. 1, 479. — *ferunt*, decussos ramulos et frondes auferunt; *franguntque* est nostrum *zerzausen*. | 442. *fetus*, utilitates. | 443. Servius ad E. 1, 25 „Cupressus arbor est maxima.“ | 444. *Hinc ... hinc*, ex aliis ... ex aliis. — *trivere*, v. 1, 49. | 446. *frondibus*, quae pro pabulo dabantur pecori. | 447. *myrtus* fecunda hastilibus, unde pedamenta sunt, cf. vs. 358; *cornus* inprimis apta hastis iaculisque. | 448. Ituraeam, ultra Iordanem sitam, incolebant Arabes sagittandi arte clari; et v. E. 1, 55. | 449. *Nec non til.*, etiam t. et buxus tornari et scalpi possunt. | 452. *Missa P.*, immissa in Padum de navalibus; et ripae Padi alnis erant consitae. | 453. v. 4, 33 et cf. 4, 44. — *alveo*, ut 4, 34 *alvearia*. | 455. *ad culp.*, ad scelera committenda. | 456 sq. cf. A. 8, 294. Ovid. Met. 12, 210 sqq. Hom. Od. 21, 295 sqq. || VII. *Laus vitae rusticae*, vss. 458—540. | 459. *ipsa*, v. E. 4, 21. | 460. *facilem*, cf. vs. 500; contrariae sunt cenae luxuriosius apparatus. — verbum *fundit*

- Si non ingentem foribus domus alta superbis  
 Mane salutantum totis vomit aedibus undam,  
 Nec varios inhiant pulchra testudine postis,  
 Inlusasque auro vestes, Ephyreiaque aera,  
 465 Alba neque Assyrio fucatur lana veneno,  
 Nec casia liquidi corrumpitur usus olivi:  
 At secura quies et nescia fallere vita,  
 Dives opum variarum, at latis otia fundis,  
 Speluncae, vivique lacus, at frigida Tempe,  
 470 Mugitusque boum, mollesque sub arbore somni  
 Non absunt; illic saltus ac lustra ferarum,  
 Et patiens operum exiguoque adsueta iuventus,  
 Sacra deum, sanctique patres; extrema per illos  
 Iustitia excedens terris vestigia fecit.  
 475 Me vero primum dulces ante omnia Musae,  
 Quarum sacra ferro ingenti percussus amore,  
 Accipiant, caelique vias et sidera monstrent,  
 Defectus solis varios, lunaeque labores;  
 Unde tremor terris, qua vi maria alta tumescant  
 480 Obiicibus ruptis rursusque in se ipsa residant,  
 Quid tantum Oceano properent se tingere soles

copiae notionem adiunctam habet. — *iustissima*, quia creditum (semen) cum fenore reddere solet; γήδιον δικάϊότατον Xenoph. Cyrop. 8, 3, 38. | 461 sqq. Describitur fastus et luxur potentium. — *f. domus sup.*, habens fores superbas, i. e. fabrefactas et magnificas; cf. 3, 26. A. 6, 20. | 462. Solebant mane clientes patronos suos salutatum venire. | 463. *inhiant*, agricolae. — *varios*, πεποικιλμένους. | 464. *Illusas*, quasi ludendi causa intextas auro; ludere artifices dicuntur rebus varie orandis indulgentes. Vestes intelliges stragulas. — *Eph. aera*, vasa ex aere Corinthio, quod in summo habebatur pretio; Ἐφύρα antiquum nomen Corinthi. | 465. *venenum*, ut φάρμακον, quivis sucus acrior. *Assyrium* saepe apud poetas i. q. Syrium; Syria rursus complectebatur Phoenicem; itaque *Assyrio* v. i. q. purpura Phoenicia. | 466. *casiae* id genus h. l. intelligendum, cuius odoratus cortex oleo ab unguentariis admiscebatur; rustici contenti sunt oleo *liquido*, i. e. puro et limido. | 467. *At*, sc. non abest; quod repetes c. vs. 471. — *nescia f.*, innocens vita, quae nondum didicit fallere. | 468. *op. var.*, variarum frugum, fructuum, *cet.* — *otia*, ad quae invitant speluncae, lacus, valles, pascentes circa boves. | 469. *vivi*, natura, non arte, facti, affluente ex fontibus rivisque aqua; v. 3, 449. — *fr. Tempe*, umbrosae valles. Τέμπεα, Τέμπη, erant vallis amoenissima Thessaliae. | 472. *operum*, opus inprimis dicitur, quod ruri fit. | 473. *Sacra d.*, solum Substantivum sine Verbo, v. A. 1, 639: sunt ibi sacra deum, nec desierunt, ut vulgo in urbibus, celebrari. — *sancti*, qui sancte ac pie coluntur. | 474. v. E. 4, 6. | 475. *dulces a. omn.*, dulcissimae. | 476. *sacra ferre*, est sacrificantis, ut A. 3, 19, maxime sacerdotis; poetae autem Musarum sacerdotes, Μουσάων θεράποντες, appellantur. | 477. Musae accipiunt eum, qui se iis tradit, consecrat. — Ceterum v. G. 1, 173. | 478. *labores*, defectus, dum quasi invita obscuratur. Arnob. adv. Gent. 8, 83 „mensem vide ut luna auctu, senio, labore circumagat;“ certis enim vicibus luna augetur, senescit, deficit. | 479 sq. causas accessus et recessus maris aestuantis. | 480. *obiic.*, litoribus; fit enim, ut, cum vehementior est maris accessus, super litora mare se effundat. | 481. Sol putabatur confecto cursu diurno in Oceanum descendere. |

- Hiberni, vel quae tardis mora noctibus obstet.  
 Sin, has ne possim naturae accedere partis,  
 Frigidus obstiterit circum praecordia sanguis:  
 485 Rura mihi et rigui placeant in vallibus amnes,  
 Flumina amem silvasque inglorius. O, ubi campi  
 Spercheosque, et virginibus bacchata Lacaenis  
 Taygeta! o, qui me gelidis convallibus Haemi  
 Sistat et ingenti ramorum protegat umbra!  
 490 Felix, qui potuit rerum cognoscere caussas,  
 Atque metus omnis et inexorabile fatum  
 Subiecit pedibus strepitumque Acherontis avari!  
 Fortunatus et ille, deos qui novit agrestis,  
 Panaque Silvanumque senem Nymphasque sorores:  
 495 Illum non populi fascēs, non purpura regum  
 Flexit et infidos agitans discordia fratres,  
 Aut coniurato descendens Dacus ab Histro,  
 Non res Romanae perituraque regna; neque ille  
 Aut doluit miserans inopem, aut invidit habenti.  
 500 Quos rami fructus, quos ipsa volentia rura  
 Sponte tulere sua, carpsit; nec ferrea iura

482. vel cur aestate breviores sint noctes. — *quae mora n. obstet* eoque efficiat, ut tarde veniant; v. A. 4, 298. | 484. Frigidus sanguis putabatur esse eorum, qui hebeti et tardo essent ingenio; Empedocles „τῆτε (ἐν αἵματι) νόημα μάλιστα κυλλοῦται ἀνθρώποισιν· αἷμα γὰρ ἀνθρώποις περικάρδιόν ἐστι νόημα.“ | 486. *inglor.*, expers illius gloriae, quam afferunt studia modo commemorata. | 487. *Spercheos*, fluv. Thessaliae; v. 1, 173. — *bacchata*, passive, in quibus virginēs Lac. bacchari, orgia celebrare, solent; cf. A. 3, 125. | 488. *Taygeta*, sc. ὄρη, montes ex Arcadia per totam Laconicam procurentes. — o, qui me ... *Sistat*, utinam me aliquis s.; cf. A. 12, 883. — *Haemi*, v. 1, 492. | 490 sqq. Beata est vita philosophi, beata etiam agricolae. | 491 sq. qui se ab omni metu mortisque ac rerum infernarum terroribus liberavit; v. A. 7, 100. | 494. v. E. 10, 24. | 495. *pop. fasc.*, magistratus, quos dat populus. — Quam nulla, aut prope nulla, agrestium hominum fuerit rei publicae cura, docent et vetera et recentia testimonia; Liv. 22, 10 indicto post cladem ad Trasimenum acceptam vere sacro „supplicatum iere cum coniugibus ac liberis non urbana multitudo tantum, sed agrestium etiam, quos in aliqua sua fortuna publicae quoque contingebat cura.“ Cic. Ep. ad Att. 7, 7, 5 „feneratoribus et agricolis optatissimum est otium; nisi eos timere putas, ne sub regno sint, qui id numquam, dum modo otiosi essent, recusarunt.“ | 596. *Flexit*, flectere solet, v. G. 1, 49. Nihil omnia ista curat rusticus. — *non purpura* .... *fratres*: videntur significari Tiridates et Phraates, consanguinei proptereaque fratres dicti, qui de regno Parthico armis inter se certantes Imperatoris Augusti gratiam ambiebant. | 497. Daci ad sinistram ripam Istri in montibus habitantes Istrum glacie obductum transire vicinamque regionem Romanis subiectam populari solebant. *Ister coniuratus*, populi ad Istrum, qui cum Dacis coniuraverant, i. e. arma sociaverant. | 498. *Non r. R. p. r.*, non quas domi, nec quas foris res gerunt Romani. | 499. Agricola semper aequo contentoque animo esse solet, quia tantum habet, quantum requiritur ad vitam sustentandam; itaque nec inopiam novit, qua misera plebs in urbe laborat, nec luxum divitiarum, quibus invidet. — *habenti*, τῷ ἔχοντι, i. e. diviti. | 501. *ferrea*, rigida, quae nullo modo flecti, deleniri possunt. Rustici legum iudiciorumque ignari sunt; unde nata illa excusatio „Rusticus sum“

- Insanumque forum aut populi tabularia vedit.  
 Sollicitant alii remis freta caeca, ruuntque  
 In ferrum, penetrant aulas et limina regum;  
 505 Hic petit excidiis urbem miserosque Penatis,  
 Ut gemma bibat et Sarrano dormiat ostro;  
 Condit opes alius defossoque incubat auro;  
 Hic stupet attonitus Rostris; hunc plausus hiantem  
 Per cuneos geminatus enim plebisque patrumque  
 510 Corripuit; gaudent perfusi sanguine fratrum,  
 Exsilioque domos et dulcia limina mutant  
 Atque alio patriam quaerunt sub sole iacentem.  
 Agricola incurvo terram dimovit aratro:  
 Hinc anni labor, hinc patriam parvosque Penatis  
 515 Sustinet, hinc armenta boum meritosque iuvencos.  
 Nec requies, quin aut pomis exuberet annus,  
 Aut fetu pecorum, aut Cerealis mergite culmi,  
 Proventuque oneret sulcos atque horrea vincat.  
 Venit hiemps: teritur Sicyonia baca trapetis,  
 520 Glande sues laeti redeunt, dant arbuta silvae;  
 Et varios ponit fetus autumnus, et alte  
 Mitis in apricis coquitur vindemia saxis.  
 Interea dulces pendent circum oscula nati,  
 Casta pudicitiam servat domus, ubera vaccae  
 525 Lactea demittunt, pinguesque in gramine laeto  
 Inter se adversis luctantur cornibus haedi.

Quintil. 7, 1, 48 et 51.] 502. *Ins.*, insano clamore litigantium perstrepsens. — *aut p. f. v.*, nullum nec vectigal, nec portorium, nec pascua a populo tamquam publicanus conduxit, quarum redemptionum tabulae in tabulario publico, quod Romae erat in atrio Libertatis, servabantur.] 503 sqq. Studia et facinora urbanorum: Alii (urbani) navigationi dant operam, aut (v. 1, 419) armant se ferro ad caedem faciendam, aut in aulas ventitant praestoque sunt regibus, et quae praeterea lucri aut commodi alicuius causa sunt. — *casca*, plena incertorum casuum.] 506. patriae bellum infert. Antonium significari putant.] 506. *gemma*, poculis ex gemma factis, quae immensi erant pretii. — *Sarrano*, Tyrio; Tyrus olim Sarra dicta.] 508 sqq. Alius miratur eloquentiae forensis laudem, alius captat gratiam populi. — *hiantem* prae admiratione et stupore scilicet. — *Corripuit*, animum commovet. — *iunge plausus per cuneos*, i. e. ab iis, qui per cuneos sedent in theatro, edictus, cf. Horat. Od. 1, 20, 3 sq. Cic. Or. Phil. 1, 12. — *geminatus*, repetitus, Horat. Od. 2, 17, 25 sq. „populus frequens Laetum theatris ter crepuit sonum.“ Alii geminatum interpretantur duplicem, qui et a plebe detur, et a senatu. — *enim*, v. A. 8, 84.] 510 sqq. ibi (in urbe) parricidia, inde exsilia, ignota illa rusticis. — *gaudent perfusi*, Graeco more Participium cum verbo gaudendi iunctum, ut A. 10, 500. 12, 6. — *dulcia*, v. E. 1, 3.] 513. v. 1, 49.] 514. *anni l.*, annuus.] 516–522. *Nec requies, quin ...* Semper aliquem fractum capit rusticus vel ex pomis, vel ex pecoribus, vel ex agris, cet.] 519. *Venit*, i. e. cum venit; similiter Horat. Sat. 1, 3, 53 „Caldior est, acres inter numeretur;“ i. e. si cald. est; adde A. 1, 572. 6, 31. — *Sicyon* olivifera, v. E. 1, 55.] 520. *Glande*, quam in silvis frugerant, laeti, quippe gratissimo sibi pabulo, redeunt ad villam.] 521. *pon. f. aut.*, autumnus poma ex arboribus deci-



- Ipse dies agitat festos, fususque per herbam,  
 Ignis ubi in medio et socii cratera coronant,  
 Te, libans, Lenaeae, vocat, pecorisque magistris  
 530 Velocis iaculi certamina ponit in ulmo,  
 Corporaque agresti nudant praedura palaestrae.  
 Hanc olim veteres vitam coluere Sabini,  
 Hanc Remus et frater, sic fortis Etruria crevit  
 Scilicet et rerum facta est pulcherrima Roma,  
 535 Septemque una sibi muro circumdedit arces.  
 Ante etiam sceptrum Dictaei regis, et ante  
 Impia quam caesis gens est epulata iuvenis,  
 Aureus hanc vitam in terris Saturnus agebat;  
 Necdum etiam audierant inflari classica, necdum  
 540 Inpositos duris crepitare inludibus enses.  
 Sed nos immensum spatii confecimus aequor,  
 Et iam tempus equum fumantia solvere colla.

dant, v. vs. 14.] 527. *Ipse*, dominus praedii; is autem agitare dies festos dicitur, non quasi solus ac semper ferietur, sed quia ad eum procuratio sollemnium pertinet. Varia autem cum sint sollemnia, unum commemorat poeta, quod peracta vindemia in honorem Bacchi celebrabatur, v. E. 5, 67 sqq.] 528. *Ignis*, sc. in ara. — *socii* sc. operis rustici, cf. Hor. Ep. 2, 1, 142. — *cr. coronant*, fronde redimunt, ex more illius aevi, cf. A. 3, 525; diversum est ab hoc Homericum illud ἐπιστέφασθαι ποτοίο. ] 530. *cert. ponit*, instituit, ἀγῶνα προτίθηναι. — *in ulmo*, ut aliquid ulmo affixum pro scopo sit. ] 531. *palaestrae*, i. e. ad luctam incedam. ] 534. *rerum*, i. e. omnium pulch. Terent. Eun. 2, 2, 17 „qui esse primos se omnium rerum volunt.“ ] 535. *arces*, montes, colles, 3, 531. 4, 461. ] 536. ante imperium Iovis, cf. 4, 152. ] 537. Colum. lib. VI. Praefat. „bovis tanta fuit apud antiquos veneratio, ut tam capital esset, bovem necuisse, quam civem.“ Cic. de Nat. Deor. 2, 63 „Tanta putabatur utilitas percipi ex bubus, ut eorum visceribus vesci scelus haberetur.“ ] 538. v. E. 4, 6 et 9. ] 541. iam se ad finem operis pervenisse significat poeta, sumta a circo imagine; aequor locum indicat planum, qualis erat circus; qui in eo fiunt cursus ac recessus, proprie vocantur *spatia* 1, 512. — *immensum spatii*, immensorum spatiorum campus; adamant etiam oratores talis compositionis elegantiam, ut Cic. Phil. 3, 6 „*vetustate* antiquissimum, *iure* foederatum, *propinquitatem* paene finitimum, *splendore* municipium honestissimum.“ ] 542. *solv. colla*, proprie iugum collo impositum solvi dicitur.

De clausula libri secundi exordioque libri tertii fusius dictum est in Prolegomenis §. 4.

# G E O R G I C O N

## LIBER TERTIUS.

- Te quoque, magna Pales, et te memorande canemus  
 Pastor ab Amphryso, vos, silvae amnesque Lycae.  
 Cetera, quae vacuas tenuissent carmina mentes,  
 Omnia iam volgata: quis aut Eurysthea durum,  
 5 Aut inlaudati nescit Busiridis aras?  
 Cui non dictus Hylas puer et Latonia Delos,  
 Hippodameque humeroque Pelops insignis eburno,  
 Acer equis? Temptanda via est, qua me quoque possim  
 Tollere humo victorque virum volitare per ora.  
 10 Primus ego in patriam mecum, modo vita supersit,

**Lib. III.** Exordium carminis vs. 1—48. *Poeta de re pecuaria se scripturum profitetur, vs. 1—2; alia argumenta, quibus quis tractandis laudem possit consequi, ab altis occupata esse, trita iam et vulgaria, vs. 3—8; rem se carmine explicandam sumpsisse, quam nullus ante ipsum poeta attigerit, vs. 8—9 (nempe ut libro I et II Graecos poetas, qui de illis rebus scripserunt, longo intervallo post se reliquit, ita libro III et IV argumenta tractat ab omnibus poetis derelicta, unde intelligitur, quare hoc demum loco suae ipse virtuti gloriaeque faveat); gloriam Musarum beneficio sibi partam decus et ornamentum fore patriae, vs. 10—12; ibi se Caesari Octaviano (quippe cui etiam ipsum otium ad scribendum debeat) ludos celebres templumque institutum, imaginibus rerum ab illo gestarum statuisque proavorum eius Troianorum condecoratum, vs. 13—39. Tum invocat Maecenatem, cuius iussu Georgica scribere aggressus erat, ut sibi ad telam inceptam feliciter pertexendam adsit propitius, vs. 40—45. Postremo Caesaris laudes bellicas heroico carmine se celebraturum promittit, vs. 46—48. || 1. 2. Pales, Apollo Nomius et Pan numina pastoritia. — *Past. ab Amphr.*, i. e. Amphrysus, ut 2, 643 „a fontibus undae“, i. e. fontanae; A. 7, 647 „Tyrrhenis ab oris Mezentius“, Ovid. Am. 2, 6, 1 „ales ab Indis“, i. e. Indica; v. E. 1, 8. — Amphrysus Thessaliae fluvius, ad quem Apollo boves Admeti pavisse dicitur. — Lycaeus, mons Arcadiae, Pani sacer. | 3. *vac.*, quibus vacat animum ad carmina legenda advertere. | 5. Busiris, rex Aegypti, omnes advenas solebat mactare; interemit eum Hercules ex hortis Hesperidum rediens. | 6. v. E. 6, 43. | 7. Cum Tantalus, rex Lydiae, Pelopem filium Diis epulandum apposuisset, Iuppiter hunc in vitam restituit et humerum ei, a Cerere iam absumptum, eburneum tribuit. Idem Pelops Hippodamiam, patre Oenomaos, rege Pisae, certamine quadrigarum victo, uxorem ex pacto duxit. | 8. *Acer. eq.*, ἰπποσύνη πεποιθώς, Hom. Il. 4, 303. Equos alatos a Neptuno Pelopi datos refert Pind. Ol. 1, 140 sq., alati iidem in arca Cypseli ap. Pausan. 5, 17, 4. Alii dolo victum Oenomaum tradunt. | 9. *vict.*, effector propositi parata egregii operis fama. — *vir. vol. p. o.*, sumpta locutio ab illo, quod est tenuius, *esse in ore omnium*, i. e. ab omnibus laudari; Ennius de se „volito vivu“ per ora virum.“ | 10. Primus, non Romanorum, quod superbum esset, sed primus ex popularibus meis, i. e. Mantuanis, Musas ab Helicone deducam, i. e. huc in patriam transferam a Graecis laudem artis poeticae; v. E. 6, 65. — *modo v. s.*, septem annos Georgicis impendisse Virgilium accipimus; ergo minimum tres cadunt in tertium quartumque librum, satis longum spatium homini semper iafirma valetudine utenti.]*

- Aonio rediens deducam vertice Musas;  
 Primus Idumaeas referam tibi, Mantua, palmas;  
 Et viridi in campo templum de marmore ponam  
 Propter aquam, tardis ingens ubi flexibus errat  
 15 Mincius et tenera praetexit arundine ripas.  
 In medio mihi Caesar erit, templumque tenebit.  
 Illi victor ego et Tyrio conspectus in ostro  
 Centum quadriungos agitabo ad flumina currus;  
 Cuncta mihi, Alpheum linquens lucosque Molorchi,  
 20 Cursibus et crudo decernet Graecia caestu.  
 Ipse, caput tonsae foliis ornatus olivae,  
 Dona feram. Iam nunc sollemnis ducere pompas  
 Ad delubra iuvat caesosque videre iuencos;  
 Vel scaena ut versis discedat frontibus, utque  
 25 Purpurea intexti tollant aulaea Britanni.  
 In foribus pugnam ex auro solidoque elephanto

12. *palmas*, tamquam insigne victoris, cf. vs. 9 et 17; nempe iure gloriatur Virgilius victoriam se in hoc genere carminis (modo vita supersit, nam coepta tum erant, nondum absoluta Georgica) relaturum esse, quia ne Graecorum quidem quisquam similem in eo laudem adeptus est. — Idume s. Idumaea pars Iudaeae, quae palmis frequens erat; v. E. 1, 55. | 13. Qui victoriam appetebant, aras, templa, ludos, vel alia, vovebant ei numini, ut h. l. Virgilius Caesari Octaviano, cuius auxilio maxime confidebant. | 14. v. E. 8, 87. | 17. *Tyr. c. i. ostro*, purpura, i. e. toga praetexta, conspicuus, ut magistratus Romani ludis praesidentes. | 18. *Centum* non uno missu, sed pluribus; multiplicavit missus Nero, centum peracti iussu Domitiani ludis saecularibus, cf. Sueton. Ner. 22. Domit. 4. — Ceterum numerus centenarius sollemnis in rebus sacris; cf. A. 1, 417. 4, 199 sq. Tib. 1, 7, 49 et v. A. 8, 716; ipsi autem eiusmodi ludi et certamina erant res sacra, utpote in honorem deorum instituta. — *agit.*, efficiam, ut agitentur. | 19 sq. Ipsi Graeci, Augusti faventes honori, posthabitis ludis Olympiacis et Nemeacis haec certamina concelebrabant. Hercules postquam leonem Nemeaeum occidit, vel primum fecit ludos Nemeaeos, vel restituit intermissos; is tum hospitio exceptus est a Molorcho pastore; hinc lucus Molorchi i. q. lucus Nemeaeus. — Alpheus flumen Olympiam praeterlabebatur. | 20. *crudo*, v. A. 5, 69. | 21 sq. *Dona*, i. e. sacra, cf. A. 4, 453. 7, 86. 9, 626. — Sacerdotes et sacrificantes corona oleaginea se redimebant, A. 5, 774. 6, 809, quae *tonsa* propterea dici videtur, quod maioribus foliis detonsis minora tantum relinquerentur. | 22 sqq. Praecipit animo ista, quae instituturus est, sollemnia, ut iam peragi videantur. Solebant autem, antequam ludi Circenses inirentur, prosequente magna caterva deorum signa feretris in Circum deferri; quae res per voc. *pompae* indicatur. | 24. *Vel videre, ut cet.* Etiam scenicos ludos exhibiturus est poeta. Et scena h. l., angustiore sensu dicta, significat parietem illum pictum, qui consistentibus in proscenio actoribus a tergo est. Indicatur autem a poeta, ut auctor est Servius, scena versatilis, quae, si qua loci, quo res agerentur, mutatio necessaria esset, convertebatur; sic fiebat, ut, quae modo antica pars, s. frons, fuisset, fieret postica, haec autem antica; et aliam locorum faciem haec, aliam illa referebat. Atque ut in ductili scena tabulae, quibus ea constabat, diduci, ita in versatili versis cardinibus converti facile poterant. *discedat* igitur i. q. dissolvatur. | 25. Aulaeum cum scenae obtendebatur, non demitti, sed tolli solebat in vetere theatro. Imagines autem Britannorum ita erant intextae, ut ipsi aulaeum tollere sublatumque sustinere viderentur, cf. Ovid. Met. 3, 111—114. | 26 sqq. Ornamenta templi in Augusti honorem condendi: anaglypha in foribus, cf. A. 6, 20,

- Gangaridum faciam victorisque arma Quirini,  
Atque hic undantem bello magnumque fluentem  
Nilum ac navali surgentis aere columnas.
- 30 Addam urbes Asiae domitas pulsumque Niphaten  
Fidentemque fuga Parthum versisque sagittis,  
Et duo rapta manu diverso ex hoste tropaea  
Bisque triumphatas utroque ab litore gentis.  
Stabunt et Parii lapides, spirantia signa,
- 35 Assaraci proles demissaeque ab Iove gentis  
Nomina, Trosque parens, et Troiae Cynthus auctor.  
Invidia infelix Furias amnemque severum  
Cocyti metuet tortosque Ixionis anguis  
Inmanemque rotam, et non exsuperabile saxum.
- 40 Interea Dryadum silvas saltusque sequamur  
Intactos, tua, Maecenas, haud mollia iussa.  
Te sine nil altum mens inchoat: en age, segnis  
Rumpe moras; vocat ingenti clamore Cithaeron

tum signa et statuæ vs. 34 sqq. Illa spectant ad res Octaviani maxime in Asia Africaque gestas, a poeta mirabilius auctas. Gangaridae, Indi ad Gangis ostia; horum nomine omnino populi orientales significantur; cf. 2, 172. — Quirinum, tamquam alterum Romulum alterumque Urbis conditorem, Octavianum appellat poeta. | 28. *Atque hic*, in altera forium parte, in altera valva. — *magnum fl.*, *πολὺν ῥέοντα*, copia profluentium aquarum abundantem, v. 1, 168; similiter „*plurimus Eridanus*“ A. 6, 669 et cf. A. 3, 196; respicitur autem ad bellum cum Antonio gestum. | 29. col. rostratas ex rostris navium in pugna Actiaca captarum faciendas. | 30. quomodo *urbes*? solebant hae per effigies mulierum repraesentari. — per *Niphaten*, ut A. 8, 728 per Araxen, fluvium Armeniae ipsi Armenii significantur, quorum in regnum deductus est a Romanis Tigranes a. 734. | 31. Parthi fugientes solebant in hostem sequentem sagittas mittere. | 32 sq. *diversi* hostes dicuntur, qui contrarias orbis terrae partes incolunt, Orientem et Occidentem; et binas victorias ex utroque hoste ita dicitur reportasse, ut respiciatur ad bellum Antonianum a. 723 et 724 gestum et ad signa, quae Crasso duce Romani amiserant, a Phraate, Parthorum rege, a. 734 reddita; tum ad domitos in Hispania Cantabros a. 729 rebellesque eosdem a. 732 contusos; adiungere licebit etiam Britannos armorum Romanorum solo terrore percussos a. 727. — *utroque ab lit.*, utriusque Oceani, orientalis et occid., et v. E. 1, 8. | 34. Paros una ex Cycladibus optimo candidissimoque marmore nobilis. — *spirantia*, quasi viventia, i. e. verum vultum felicissime exprimentia; cf. A. 6, 848 sq. | 35 sq. *Ass. pr.*, auctores gentis Iuliae, in quam Octavianus per adoptionem venerat; cf. Hom. II. 20, 215. 219 et 230—240. tum A. 1, 286—288. | 36. Apollo, a Cyntho, Deli monte, Cynthus appellatus, cum Neptuno muros arcis Troianae condiderat; idem deus tutelaris Augusti, atque adeo pater eius a vulgo creditus; Sueton. Aug. c. 94. | 37. Imago Invidiae ad Tartarum proturbatae, per quam compressa adversariorum in Augustum odia coercitaeque discordiae civiles significantur, in eodem templo exhibebitur, in tabula scilicet picta; aliter enim haec, quae ponuntur a poeta, non facile omnia simul exprimi poterant. | 38. *angues*, quibus ille propter tentatam Iunonis pudicitiam ad rotam perpetuo se circumagentem alligatus erat; cf. Tibull. 1, 3, 73 sq. | 39. saxum Sisyphi, cf. Hom. Od. 11, 593 sqq. | 40 sq. cf. 1, 12 et v. 1, 2. 14. — *intactos*, quod nullus ante Virgilium poeta hanc partem rei rusticae attigit, cf. vs. 291 sqq. — *haud mollia i.*, cf. vs. 289 sq. | 43 sq. *Rumpe m.*, his verbis se ipse exhortatur poeta, qui tamquam in rem praesentem delatus (cf. 2, 45) iam sibi videtur

- Taygetique canes domitrixque Epidaurus equorum,  
 45 Et vox adsensu nemorum ingeminata remugit.  
 Mox tamen ardentis accingar dicere pugnas  
 Caesaris, et nomen fama tot ferre per annos,  
 Tithoni prima quot abest ab origine Caesar.  
 Seu quis, Olympiacae miratus praemia palmae,  
 50 Pascit equos, seu quis fortis ad aratra iuencos,  
 Corpora praecipue matrum legat. Optuma torvae  
 Forma bovis, cui turpe caput, cui plurima cervix,  
 Et crurum tenuis a mento palearia pendens;  
 Tum longo nullus lateri modus; omnia magna,  
 55 Pes etiam; et camuris hirtae sub cornibus aures.  
 Nec mihi displiceat maculis insignis et albo,  
 Aut iuga detractans, interdumque aspera cornu,  
 Et faciem tauro propior, quaeque ardua tota,  
 Et gradiens ima verrit vestigia cauda.  
 60 Aetas Lucinam iustosque pati hymenaeos  
 Desinit ante decem, post quattuor incipit annos;  
 Cetera nec feturae habilis, nec fortis aratris.  
 Interea, superat gregibus dum laeta iuventas,  
 Solve mares; mitte in Venerem pecuaria primus,  
 65 Atque aliam ex alia generando suffice prolem.  
 Optuma quaeque dies miseris mortalibus aevi  
 Prima fugit; subeunt morbi tristisque senectus,  
 Et labor et durae rapit inclementia mortis.  
 Semper erunt, quarum mutari corpora malis:  
 70 Semper enim refice, ac, ne post amissa requiras,  
 Anteveni, et subolem armento sortire quot annis.

varias multiplicesque voces armentorum, canum, equorum audire ex nobilissimis saltibus pascuisque ad aures accidentes. — Cithaeron mons Boeotiae, Taygetus Laconiae, et v. E. 1, 2. Pastores etiam venationi operam dabant; canum autem venaticorum maxime laudabantur Laconici. — Epidaurus non illud Illyridis, sed Argolidis oppidum, equis nobile. Xenophon, qui hominem militarem rebus ad usum belli praestantissimis exornatum volebat, equo Epidaurio vehebatur, Ael. V. H. 3, 24.] 45. eaque vox repercutitur per echo nemorenses.] 48. quot anni effluxerunt a primis gentis Iuliae auctoribus; in quibus Tithonus, Laomedontis filius, Trois abnepos, a poeta numeratur; v. vs. 122.] 49—283. *De equis et armentis.*] 49. Seu quis ad certamina (quorum nobilissima erant Olympia) equos alit. — *palmae*: Virgili quidem temporibus, item postea, Olympionicis non solum coronae ex oleastro, quas capiti imponent, sed etiam palmae, quas, ut videtur, manu gestarent, dabantur.] 52. *turpe c.*, frons lata, adspectu minus iucunda, quam angustior et reliquis partibus convenientior.] 56. *maculis et albo*, hendiadys, i. q. *maculis albis*, v. 1, 173. Maxime probabantur vaccae rubae aut helvae.] 57. *aspora c.*, cornu petens.] 60. *Luc.*, partum, v. 1, 296. — *pati hym.*, v. E. 2, 24.] 64. *Solve mares* quid hic significet, docere videtur 4, 199.] 69 sq. Semper erunt matres quaedam parum idoneae, quas cum aliis mutare praestet; semper enim reficiendae, i. e. novae in illarum locum substituendae.] 70 sq. ne postea damnum cum desiderio sentias, elige quotannis, quas ex nova

- Nec non et pecori est idem delectus equino.  
 Tu modo, quos in spem statues submittere gentis,  
 Praecipuum iam inde a teneris inpende laborem.
- 75 Continuo pecoris generosi pullus in arvis  
 Altius ingreditur et mollia crura reponit;  
 Primus et ire viam et fluvios temptare minacis  
 Audet et ignoto sese committere ponti,  
 Nec vanos horret strepitus. Illi ardua cervix,
- 80 Argutumque caput, brevis alvus, obesaque terga,  
 Luxuriatque toris animosum pectus. Honesti  
 Spadices glaucique, color deterrimus albis  
 Et gilvo. Tum, si qua sonum procul arma dedere,  
 Stare loco nescit, micat auribus et tremit artus,
- 85 Collectumque fremens volvitur sub naribus ignem.  
 Densa iuba, et dextro iactata recumbit in armis;  
 At duplex agitur per lumbos spina; cavatque  
 Tellurem et solido graviter sonat ungula cornu.  
 Talis Amyclaei domitus Pollucis habenis
- 90 Cyllarus, et, quorum Graii meminere poetae,  
 Martis equi biuges, et magni currus Achilli.  
 Talis et ipse iubam cervice effudit equina  
 Coniugis adventu pernix Saturnus et altum  
 Pelion hinnitu fugiens inplevit acuto.
- 95 Hunc quoque, ubi aut morbo gravis aut iam segnior annis  
 Deficit, abde domo, nec turpi ignosce senectae:  
 Frigidus in Venerem senior, frustra que laborem  
 Ingratum trahit; et, si quando ad proelia ventum est,  
 Ut quondam in stipulis magnus sine viribus ignis,

subole armento ad feturam apto adiungas.] 73. v. E. 1, 15 et 46.] 75. v. 1, 169.] 76. *mollia*, molliter inflexa, non, ut rigidiores equi, recta; Xenoph. de re equestr. 10, 4 „τὰ σκέλη ὑγρὰ μετεωρίζει.“ — *reponit*, in gradiendo sublata humi vicissim ponit, v. 2, 29.] 77. *Primus ire v.*, „procurrit ante gregem“ Colum.] 79. *van. strepitus* pontis scilicet lignei.] 80. *Argutum*, apte venustaque compositum, quale solet esse generosi equi; spectatur in tali capite maxime brevis, quare *breve* interpretatur Servius.] 82. *glauci*, *Blauschimmel*, chevaux bleus pommelés. — *albis*, quos probe distingues a candidis; quamquam etiam qui cadent dicuntur interdum albi, ut Ovid. Met. 15, 189.] 85. per *ignem* calidi flatus significantur, indicium acris animi; *collectum* in pectore; similiter dicimus *iram*, *rabiam*, *sitim colligere*. Claud. de IV cons. Hon. 545 „Ignescunt patulae nares.“] 87. *At*, v. A. 7, 691. — *duplex*, duplicis spinæ speciem habens, lata et sulcata. — *lumbos*, i. e. eam dorsi partem, quæ lumbos attingit.] 89. *Amycl.*, Amyclis, urbe Laconica, natus.] 91. *Mart. e. b.* Hom. II. 15, 119. — *currus*, v. 1, 514. — *Achilli*, Genetivus, ut *Ulixi*, a forma Dorica Ἀχιλλῆος, Οὐλίσσης, Genet. Ἀχιλλέου, Accus. Ἀχιλλῆν. Ceterum cf. Iliad. 16, 148 sqq.] 93. Saturnus cum Philyra, Oceani filia, congressus (unde Chiron natus) supervenientem coniugem Opim ut falleret, in equum se convertit. — *Pelion*, v. 1, 281.] 96. *abdi* dicuntur interdum, qui e luce, nobilitate, celebritate rediguntur in obscuritatem ac solitudinem, cf. Horat. Ep. 1, 1, 5; *abde domo*, ad ignobilia villae ministeria redige.] 98. *proelia*, cf. A. 11, 736.] 99. cf. 1, 84 sq.]

- 100 Incassum furit. Ergo animos aevumque notabis  
 Praecipue; hinc alias artis, prolemque parentum,  
 Et quis cuique dolor victo, quae gloria palmae.  
 Nonne vides, cum praecipiti certamine campum  
 Corripuere ruuntque effusi carcere currus,  
 105 Cum spes arrectae iuvenum, exsultantiaque haurit  
 Corda pavor pulsans? Illi instant verbere torto  
 Et proni dant lora; volat vi fervidus axis;  
 Iamque humiles, iamque elati sublime videntur  
 Aera per vacuum ferri atque adsurgere in auras;  
 110 Nec mora, nec requies; at fulvae nimbus arenae  
 Tollitur; humescunt spumis flatuque sequentum:  
 Tantus amor laudum, tantae est victoria curae.  
 Primus Erichthonius currus et quattuor ausus  
 Iungere equos rapidusque rotis insistere victor.  
 115 Frena Pelethronii Lapithae gyrosque dedere  
 Inpositi dorso, atque equitem docuere sub armis  
 Insultare solo, et gressus glomerare superbos.  
 Aequus uterque labor; aequae iuvenemque magistri  
 Exquirunt calidumque animis et cursibus acrem,  
 120 Quamvis saepe fuga versos ille egerit hostis,  
 Et patriam Epirum referat, fortisque Mycenae,  
 Neptunique ipsa deducat origine gentem.  
 His animadversis instant sub tempus et omnis  
 Inpendunt curas denso distendere pingui,  
 125 Quem legere ducem et pecori dixere maritum;

101. *artes*, virtutes, quales in eiusmodi equo requiruntur. — *parentes* h. l. sunt auctores totius generis, *proles*, qui ab his deinceps alii ex aliis procreati; ergo notabis, quales fuerint, per quos quasi gradus inchoatum a primis auctoribus genus ad ipsos descenderit; cf. Horat. C. 4, 4, 29 sq. | 103. v. E. 3, 12. | 104. *Corrip.*, v. 1, 49. — *carcere*, v. 1, 512. Praeterea cf. Iliad. 23, 362 sqq. | 105 sq. *haurit* apud Virgilium saepe i. q. alte penetrat; v. A. 2, 600. — Ceterum similiter Aeschylus: ὀφείλου καρδία φόβῳ et καρδία φόβῳ φρένα laxτίζει. | 107. *volat vi*, v. cum impetu. | 113. *Erichth.*, antiquissimus rex Atheniensium. | 114. *rotae*, currens currus, A. 12, 533. 671. | 115. *Pelethronii* dicti a saltu Pelethronio in Pelio monte Thessaliae. — Inventio artis equitandi. — *gyr. dedere*, invenerunt, i. e. docuerunt, equum in gyrum flectere. | 117. *Insult.*, equiti, quod proprie equo, tributur. — *gr. glom.*, glomeratus gradus opponitur vulgari a Plin. N. H. 8, 42, 67, ac significatur is, qui fit cruribus paulo altius sublati atque arcuatim replicatis, et hoc est illud ap. Grat. 503 „ardua fundet in auras Crura.“ | 118—122. Aequus uterque labor, et Veneri satisfacere (cf. vs. 97) et certaminis sive curuli sive equestri. Itaque ad talia magistri seligunt e ceteris equis et iuvenem et aerem, quamvis „ille“ vetus, nunc praeteritus, olim saepe fuga versos egerit hostes etc. — Vir doctus, Tittlerus, versus 120—22 post vs. 96 collocari iubet. | 121. cf. 1, 59 et v. 1, 419. | 122. Arion ex Neptuno et Cerere in equos conversis prognatus, equus longe nobilissimus, cuius seminium fuit apud Adrastum. *Neptuni origine*, a Neptuno tamquam primo generis auctore; cf. vs. 48. | 123. *sub t.*, appropinquante admissurae tempore. | 124. *pingue* etiam in soluta oratione pro Substantivo positum invenitur. — *denso*, Servius „non laxo; quod quibusdam potionibus per fraudem agasones facere consueverunt.“ |

- Florentisque secant herbas, fluviosque ministrant  
 Farraque, ne blando nequeat superesse labori,  
 Invalidique patrum referant ieiunia nati.  
 Ipsa autem macie tenuant armenta volentes,  
 130 Atque, ubi concubitus primos iam nota voluptas  
 Sollicitat, frondesque negant et fontibus arcent.  
 Saepe etiam cursu quatiunt et sole fatigant,  
 Cum graviter tunsis gemit area frugibus, et cum  
 Surgentem ad Zephyrum paleae iactantur inanes.  
 135 Hoc faciunt, nimio ne luxu obtunsior usus  
 Sit genitali arvo et sulcos oblimet inertis,  
 Sed rapiat sitiens Venerem interiusque recondat.  
 Rursus cura patrum cadere et succedere matrum  
 Incipit. Exactis gravidae cum mensibus errant,  
 140 Non illas gravibus quisquam iuga ducere plaustreis,  
 Non saltu superare viam sit passus et acri  
 Carpere prata fuga fluviosque innare rapacis.  
 Saltibus in vacuis pascunt et plena secundum  
 Flumina, muscus ubi et viridissima gramine ripa,  
 145 Speluncaeque tegant, et saxea procubet umbra.  
 Est lucus Silari circa ilicibusque virentem  
 Plurimus Alburnum volitans, cui nomen asilo  
 Romanum est, oestrum Graii vertere vocantes,  
 Asper, acerba sonans, quo tota exterrita silvis  
 150 Diffugiunt armenta; furit mugitibus aether  
 Concussus silvaeque et sicci ripa Tanagri.  
 Hoc quondam monstro horribilis exercuit iras

126. *Florentis*, i. e. nitentes sucique plenas. Al. *pubentis*.| 127. *superesse*, sufficere et perferre.| 128. *Neve cet.*| 129. *armenta*, quibus illum ducem esse voluerunt, i. e. feminas. — *volentes*, data opera.| 130. *ubi primos*, i. e. ubi primum, simulac; sic *postquam prima* A. 1, 723; *cum primas* 7, 61 (Liv. 21, 5 „*cum prima* quies fuit“), *ut primis* 11, 573, *vix primos* 5, 857. infra vs. 187 „*primo* depulsus ab ubere“, i. e. ubi primum ab ubere matris depulsus fuerit; „*primisque* cadentibus astris“ A. 8, 59. — *nota*, signis quibusdam prodita.| 131. *frondes*, cf. vs. 528.| 133. cf. 1, 297 sq.| 134. „ad eam rem Favonius (Zeph.) habetur eximius, qui lenis aequalisque aestivis mensibus perflat“ Colum. 2, 20, 5.| 136. Sic Graeci poetae saepe verbis *ονειρεῖν* et *αὐλαῖς* utantur in re venerae.| 137. celeriter concipiat.| 139. Solent a concipiendi tempore ad tempus pariendi numerari menses; cf. E. 4, 61; *exacti* vicini partui.| 140. *Non quisquam*, v. 1, 456. — Proprie dicimus: plastrum iugo ducere. Sed cum iugum simul cum plaistro promoveatur, ipsum iugum duci s. trahi dicitur. *plaustreis* est Dativus, qui omnino rem significare solet, ad quam quid (h. l. *iuga ducere*) aliquo modo pertinet; v. 2, 206.| 143. *vacuis*, ubi nihil obstat, quod saltu superent (ut saepes, fossas), non flumen rapidum, quod tranent. — *pascunt* eas, *ubi sit muscus*.| 145. v. A. 7, 463.| 146 sq. *Silarus* fluvius, *Alburnus* mons Lucaniae; *volitans*, h. l. Substantivum, *ut natantes* vs. 541, *volans* 4, 16.| 148. *vert. voc.*, mutato i. e. alio, nomine vocant oestrum.| 149. *acerba* s., cf. A. 9, 794. 12, 898. infra vs. 500 „*Crebra* ferit.“ „*torva* tuentem“ A. 6, 467 „*vana tumentem*“ 11, 854, et v. A. 2, 690.| 151. *Tanagrus* torrens, qui se in



- Inachiae Iuno pestem meditata iuvencae.  
 Hunc quoque, nam mediis fervoribus acrior instat,  
 155 Arcebis gravido pecori, armentaque pascas  
 Sole recens orto aut noctem ducentibus astris.  
 Post partum cura in vitulos traduntur omnis;  
 Continuoque notas et nomina gentis inurunt,  
 Et quos aut pecori malint submittere habendo,  
 160 Aut aris servare sacros, aut scindere terram  
 Et campum horrentem fractis invertere glaebis.  
 Cetera pascuntur viridis armenta per herbas.  
 Tu quos ad studium atque usum formabis agrestem,  
 Iam vitulos hortare, viamque insiste domandi,  
 165 Dum faciles animi iuvenum, dum mobilis aetas.  
 Ac primum laxos tenui de vimine circlos  
 Cervici subnecte; dehinc, ubi libera colla  
 Servitio adsuerint, ipsis e torquibus aptos  
 Iunge pares, et coge gradum conferre iuencos;  
 170 Atque illis iam saepe rotae ducantur inanes  
 Per terram, et summo vestigia pulvere signent;  
 Post valido nitens sub pondere faginus axis  
 Instrepat, et iunctos temo trahat aereus orbis.  
 Interea pubi indomitae non gramina tantum,  
 175 Nec vescas salicum frondes ulvamque palustrem,  
 Sed frumenta manu carpes sata; nec tibi fetae,  
 More patrum, nivea implebunt mulctraria vaccae,  
 Sed tota in dulcis consument ubera natos.  
 Sin ad bella magis studium turmasque ferocis,  
 180 Aut Alphea rotis praelabi flumina Pisae,  
 Et Iovis in luco currus agitare volantis:  
 Primus equi labor est, animos atque arma videre  
 Bellantum, lituosque pati, tractuque gementem  
 Ferre rotam, et stabulo frenos audire sonantis;  
 185 Tum magis atque magis blandis gaudere magistri  
 Laudibus et plausae sonitum cervicis amare.  
 Atque haec iam primo depulsus ab ubere matris

Silarum effundit, aestate siccus.] 153. Ioni, Inachi filiae; cf. Ovid. Met. 1, 588 sqq. | 155. cf. E. 7, 47. | 158 sqq. notas inurunt, quibus indicetur, et quo quisque genere sit ortus, et quos aut admissarios esse malint, aut hostias cet. | 159. v. E. 1, 46 et G. 1, 3. | 162. Illa modo memorata domi aut omnino separatim habebantur, cf. vs. 212 sqq.; cetera, non signata, unde lac tantum petebatur aut carnes, promiscue pascebantur. | 163. Tu vim habet in praecipiendo, hortando, increpando, cf. 1, 344. 2, 241. A. 4, 265. | 168. *ipsis e t.*, ex ipsis illis, i. e. eiusdem generis circulis. | 170. v. vs. 114. | 173. *aereus*, aere vinctus. — *orbes*, rotas, plaustrum. | 176. *frum. sata*, herbas novellae segetis, farraginis puta, cf. vs. 205. | 179 sq. Si studium est, aut ad usum belli pullos formare (quod verbum repetes et vs. 163) aut praelabi fl. P.; et v. vs. 19. — Olympia saepe Pisae, proxime sitae urbis, sed bello funditus deletae, nomine a poetis appellatur. | 183. *tractu gem.*, strepentem, dum trahitur. | 187. v. vs. 180.]

- Audeat, inque vicem det mollibus ora capistris  
 Invalidus etiamque tremens, etiam inscius aevi.  
 190 At tribus exactis ubi quarta acceperit aestas,  
 Carpere mox gyrum incipiat gradibusque sonare  
 Compositis, sinuetque alterna volumina crurum,  
 Sitque laboranti similis; tum cursibus auras,  
 Tum vocet, ac per aperta volans, ceu liber habenis,  
 195 Aequora vix summa vestigia ponat arena;  
 Qualis Hyperboreis Aquilo cum densus ab oris  
 Incubuit, Scythiaeque hiemes atque arida differt  
 Nubila; tum segetes altae campique natantes  
 Lenibus horrescunt flabris, summaeque sonorem  
 200 Dant silvae longique urgunt ad litora fluctus;  
 Ille volat, simul arva fuga, simul aequora verrens.  
 Hinc vel ad Elei metas et maxuma campi  
 Sudabit spatia, et spumas aget ore cruentas,  
 Belgica vel molli melius feret esseda collo.  
 205 Tum demum crassa magnum farragine corpus  
 Crescere iam domitis sinito: namque ante domandum  
 Ingentis tollent animos, prensique negabunt  
 Verbera lenta pati et duris parere lupatis.  
 Sed non ulla magis viris industria firmat,  
 210 Quam Venerem et caeci stimulos avertere amoris,  
 Sive boum sive est cui gratior usus equorum.

188. *in vicem* haec facienda, i. e. modo strepitu, modo capistris assuefaciendus est equus. | 189. *Invalidus*, cf. vs. 332. A. 4, 64. 5, 337. — *insc. aevi*, virium, quas propter aetatem nondum aut habet, aut expertus est. — *etiam*, etiamnum. | 190. Equae concipiunt verno tempore, exactoque toto prope anno pariunt; ergo quarta aestate pullus incipit domari. — *Al. adcesserit*; cf. E. 8, 39. | 191. *Carp. gyr.*, cf. A. 6, 629. — *sonare*, cf. A. 8, 596. — *grad. son. compos.*, in numerum factis. | 192. *sinuet vol.*, v. A. 1, 340. | 193. laboranti est similis et propter cohibitum libere currendi impetum et propter difficilem incessum. | 194. *vocet*, in certamen, A. 6, 172. 11, 375, i. e. provocet. | 196. *Hyperb.*, cf. v. 381. — *densus*, qui quasi condensata aura et ad resistendum difficili flat, ergo vehemens. | 197. *hiemes*, tempestates. — Aquilo serenat caelum Italiae; hinc ipse siccus a Lucano 4, 50 appellatur; et Seneca Nat. Quaest. 3, 28 „fluere assiduae imbres et non esse modum pluviis, suppressis *Aquilonibus et flatu sicciores*.“ — *arida n.*, igitur, quae sunt sine pluviis. | 198. *altae*, adultae. — *c. natantes*, segetes undantes et fluctuantes. | 199. *Lenibus h. fl.*, leniter strepunt agitatae et quasi trementes, contra arbores graviter sonant, id est enim *dant sonorem*. | 200. *longi*, qui longo sunt tractu. — *urgunt*, i. e. arguntur, v. 1, 163. | 202. *Elei campi*, v. 1, 59. — *Hinc*, i. e. ubi ista didicerit. Alii *Hic*. | 203. *spatia*, locus, ubi decurritur, ut A. 5, 316, hic quidem hippodromus. — *sp. ag. o. cruentas*, duris lupatis (vs. 208) laeso ore, ut puto; Servius „est signum equi fortissimi, si velut rubras egerit spumas.“ | 204. *Belgica*, Belgae, ut alii Galli, cf. Liv. 10, 28, Britannique, cf. Caes. B. G. 4, 24 et 33, ex essedis pugnabant. — *molli*, ex disciplina scilicet, quod facile flectitur et regitur. | 205. *Tum demum ... iam domitis*, similiter, sed inverso ordine, A. 12, 6. | 206. *ante dom.*, i. e. si farraginem praeberis, antequam domare inceperis. | 210. *caeci*,

- Atque ideo tauros procul atque in sola relegant  
 Pascua, post montem oppositum, et trans flumina lata;  
 Aut intus clausos satura ad praesepia servant.
- 215 Carpit enim viris paulatim uritque videndo  
 Femina, nec nemorum patitur meminisse nec herbae.  
 Dulcibus illa quidem inlecebris et saepe superbos  
 Cornibus inter se subigit decernere amantis.  
 Pascitur in magna Sila formosa iuvenca:
- 220 Illi alternantes multa vi proelia miscent  
 Volneribus crebris; lavit ater corpora sanguis,  
 Versaque in obnixos urguntur cornua vasto  
 Cum gemitu; reboant silvaeque et longus Olympus.  
 Nec mos bellantis una stabulare; sed alter
- 225 Victus abit, longeque ignotis exsulat oris,  
 Multa gemens ignominiam plagasque superbi  
 Victoris, tum, quos amisit inultus, amores;  
 Et stabula adspectans regnis excessit avitis.  
 Ergo omni cura viris exercet, et inter
- 230 Dura iacet pernox instrato saxa cubili,  
 Frondibus hirsutis et carice pastus acuta,  
 Et temptat sese, atque irasci in cornua discit  
 Arboris obnixus trunco, ventosque lacessit  
 Ictibus, et sparsa ad pugnam proludit arena.
- 235 Post, ubi collectum robur viresque refectae,  
 Signa movet, praecepsque oblitum fertur in hostem;  
 Fluctus uti medio coepit cum albescere ponto,  
 Longius ex altoque sinum trahit; utque volutus  
 Ad terras inmane sonat per saxa, neque ipso
- 240 Monte minor procumbit; at ima exaestuatur unda  
 Verticibus, nigramque alte subiectat arenam.

occulti, nondum se prodentis, A. 4, 2. | 212. v. 1, 142. | 215. *urit vid.*, *urit taurum* eo, quod ille eam videt; v. A. 12, 46. | 219. Postquam ante poetam universe commemoravit impatientiam amoris, quae est taurorum, iam revocatur ea res ad certum exemplum. Et vide tranquillitatem pascentis vaccae ipsis numeris expressam, contrariam illam certamini proximis versibus describendo. — *Sila* mons silvosus in Bruttiiis. | 220. *altern.*, invicem inter se; cf. A. 2, 433. | 230. *instr. c.*, in nudo solo. | 232. *ir. in corn.*, iram quasi viresque, quas suppeditat ira, colligere in cornua; Silius 15, 64 „torvi in cornua tauri“ Eurip. Bacch. 742 „ταύροις εἰς κέρας θυμώμενοι.“ Calpurn. Ecl. 9, 34 „Qui nunc pro nivea coiere in cornua vacca.“ similiter *meditari in proelia* A. 10, 455. — Ceteram v. 2, 441. | 233. *vent. lacessit*, velut adoritur et ferit aera, ventilans quasi gladiatorum more. | 236. *Signa m.*, locutio castrensis; sic multa e vita humana ad vitam ceterorum animalium transtulit Virgilius; cf. 4, 108. A. 12, 6. | 237. *medio ponto*, i. e. in ponto, v. A. 7, 563. | 238. colligit vim aquae in speciem sinus curvatae; cf. A. 3, 564. 7, 528—30; expressit poeta Homericum illud II. 4, 426 *κυρτὸν ἔον κορυφοῦται*. Ceteram v. 2, 290. | 239. *ipso Monte*, ipsis *saxis*, s. scopulis. | 241. *Verticibus*, aquis in modum gyri sursum actis. |

- Omne adeo genus in terris hominumque ferarumque,  
 Et genus aequoreum, pecudes, pictaeque volucres,  
 In furias ignemque ruunt. Amor omnibus idem.
- 245 Tempore non alio catulorum oblita leaena  
 Saevior erravit campis, nec funera volgo  
 Tam multa informes ursi stragemque dedere  
 Per silvas; tum saevus aper, tum pessima tigris;  
 Heu, male tum Libyae solis erratur in agris.
- 250 Nonne vides, ut tota tremor pertemptet equorum  
 Corpora, si tantum notas odor attulit auras?  
 Ac neque eos iam frena virum, neque verbera saeva,  
 Non scopuli rupesque cavae atque obiecta retardant  
 Flumina correptosque unda torquentia montis.
- 255 Ipse ruit dentesque Sabellicus exacuit sus,  
 Et pede prosubigit terram, fricat arbore costas,  
 Atque hinc atque illinc humeros ad volnera durat.  
 Quid iuvenis, magnum cui versat in ossibus ignem  
 Durus amor? Nempe abruptis turbata procellis
- 260 Nocte natat caeca serus freta; quem super ingens  
 Porta tonat caeli, et scopulis inlisa reclamant  
 Aequora; nec miseri possunt revocare parentes,  
 Nec moritura super crudeli funere virgo.  
 Quid lynces Bacchi variae et genus acre luporum
- 265 Atque canum? quid, quae inbelles dant proelia cervi?  
 Scilicet ante omnis furor est insignis equarum;  
 Et mentem Venus ipsa dedit, quo tempore Glauci  
 Potniades malis membra absumpsere quadrigae.  
 Illas ducit amor trans Gargara transque sonantem
- 270 Ascanium; superant montis et flumina trauant.  
 Continuoque avidis ubi subdita flamma medullis: —

242. v. 1, 295. | 246. v. 1, 49. | 251. *od. att. aur.*, nimirum emanat quiddam  
 ✱ odore, quod mixtum auris affertur ad sensum olfaciendi, et cf. 4, 417. | 252.  
*Ac* i. e. quod ubi fit; copulatur per hanc particulam eventus cum causa ita, ut  
 ille hanc statim subsequi significetur, v. A. 5, 504. | 253. *obiecta*, ergo vulgaris  
 equi cursum morantia. | 254. *montes*, saxa. | 257. *Al. humerosque.* | 259 sq.  
 Spectant haec ad Leandrum et Heronem. — *abrupt.* v. A. 2, 416. | 261. Caelum,  
 quod solidum et concameratum antiqua superstitio putabat, portam habere existi-  
 mabatur, quemadmodum Olympus apud Hom. II. 5, 749, per quam et dii ipsi  
 descenderent et fulmina ac tonitrua venirent. | 262 sq. Ignotum parentibus fuit  
 inceptum filii; ergo *miseri parentes* i. q. miseria parentum, *moritura virgo* i. q.  
 certa mors virginis; harum rerum scilicet cogitatio eum revocare debuit; nam  
 si res male cederet, illi orbi erant futuri, haec animam proiectura. | 263. *super*,  
 cf. A. 4, 606. — *cr. funere*, cf. A. 4, 308. | 264. *Quid* i. e. Quid dicam, ut  
 illae furant, quandoquidem constat omnium maxime furere equas? — Ceterum  
 cf. Ovid. Met. 3, 668. | 267. *mentem*, μένος, impetum. — Glaucus, Sisyphi fil.,  
 Potniis, vico Boeotiae, equas aiebat, quibus Venus furorem iniecit, ut ipsius domini  
 corpus dilaniarent, quod ab eo arcebantur a coitu. 269. v. 1, 103. | 270. Asca-

- Vere magis, quia vere calor redit ossibus — illae  
 Ore omnes versae in Zephyrum stant rupibus altis,  
 Exceptantque levis auras, et saepe sine ullis  
 275 Coniugiis vento gravidæ — mirabile dictu —  
 Saxa per et scopulos et depressas convallis  
 Diffugiunt, non, Eure, tuos, neque Solis ad ortus,  
 In Borean Caurumque, aut unde nigerrimus Auster  
 Nascitur et pluvio contristat frigore caelum.  
 280 Hic demum, hippomanes vero quod nomine dicunt  
 Pastores, lentum destillat ab inguine virus;  
 Hippomanes, quod saepe malae legere novercae,  
 Miscueruntque herbas et non innoxia verba.  
 Sed fugit interea, fugit inreparabile tempus,  
 285 Singula dum capti circumvectamur amore.  
 Hoc satis armentis: superat pars altera curae,  
 Lanigeros agitare greges hirtasque capellas.  
 Hic labor; hinc laudem fortes sperate coloni.  
 Nec sum animi dubius, verbis ea vincere magnum  
 290 Quam sit, et angustis hunc addere rebus honorem;  
 Sed me Parnasi deserta per ardua dulcis  
 Raptat amor; iuvat ire iugis, qua nulla priorum

nus nomen lacus et fluvii Bithyniae.] 272. *ossibus*, medullae ossibus inclusae; medulla enim sedes caloris habebatur, quare etiam sudare dicitur A. 7, 458 sq.; itaque calor ossa relinquit deficientium A. 3, 308, miseria aliqua afflictorum A. 9, 475; similiter afficit ossa tremor A. 2, 120 sq. et, ut puto, pavor A. 3, 57; contra incenduntur ossa dolore G. 3, 457 sq. A. 5, 172, amore G. 3, 258. A. 1, 660. 8, 390, *furor* A. 4, 101 et quodam genere pavoris A. 7, 458; denique „*λίπεν ὀστέα θυμός*“ Hom. II. 20, 406, quia in iis inest vis et calor vitalis.] 278. Aristoteles de re eadem: „*θέρουσι δὲ οὔτε πρὸς ἔω, οὔτε πρὸς θυσμάς, ἀλλὰ πρὸς ἀέθρον ἢ νότον*.“] 279. *pluv. frigore*, quia omnis pluvia refrigerat aera; cf. 4, 261.] 280. *demum* vim habet h. l., quam Grammatici appellant, restrictivam; nempe hoc virus quidem vero ac proprio nomine vocatur hippomanes; nam etiam alii rei, sed parum proprie, imponitur idem nomen; v. A. 4, 515.] 282. *leg. nov.*, ut eo pro philtro uterentur. Videtur poeta maxime de Phaedra Hippolytum amante cogitasse.] 283. Inter cantum carminum magicorum cum hippomane miscuerunt herbas vim magicam habentes. — En subitum transitum a relativa, quam dicunt, structura ad demonstrativam a nostra consuetudine alienum. Praegresso enim pronomine relativo saepe alterum enuntiatum per copulam aut ita subiungitur, ut Verbo finito Participium substituere liceat, ut A. 6, 283 sq. „*quam sedem Somnia vulgo Vana tenere ferunt, foliisque sub omnibus haerent*“, i. e. sub o. f. *haerentia*; adde 5, 402 sq. 6, 550 sq. 10, 811. 11, 75; aut ita, ut ipsum nomen, sed alio casu, repeti possit, quemadmodum h. l. *miscueruntque pro et cui miscuerunt*; A. 3, 381 sq. „*Italiam, quam tu iam rere propinquam Vicinosque, ignare, paras invadere portus*“ pro *et cuius portus*; adde 8, 566 sq. 9, 593. 10, 519 sq.; similiter G. 4, 9 „*Quo neque sit ventis auditus, .... neque oves haedique petulci Floribus insultent*“ pro *et ubi non insultent floribus*.] 285. dum speciatim quaeque describimus. — *capti .... amore*, qui quidem ex rei iucunditate nascitur.]] 286—403. *De ovidus et capris*.] 287. *agitare*, i. e. proprie pastum agere, quia haec est praecipua cura pecus habentis, omnino curare.] 288. *Hic lab.*, in hoc opera vestra posita esto.] 289. *an. d.*, v. 4, 491.] 290. *hunc hon.*, eum, qui a poeta requiritur, verborum ornatum.] 291. *deserta*, v.

- Castaliam molli devertitur orbita clivo.  
 Nunc, veneranda Pales, magno nunc ore sonandum.
- 295 Incipiens stabulis edico in mollibus herbam  
 Carpere ovis, dum mox frondosa reducitur aestas,  
 Et multa duram stipula felicumque maniplis  
 Sternere subter humum, glacies ne frigida laedat  
 Molle pecus, scabiemque ferat turpisque podagras.
- 300 Post hinc digressus iubeo frondentia capris  
 Arbusta sufficere et fluvios praebere recentis,  
 Et stabula a ventis hiberno opponere soli  
 Ad medium conversa diem, cum frigidus olim  
 Iam cadit extremoque inrorat Aquarius anno.
- 305 Hae quoque non cura nobis leviores tuendae,  
 Nec minor usus erit, quamvis Milesia magno  
 Vellera mutentur Tyrios incocta rubores:  
 Densior hinc suboles, hinc largi copia lactis;  
 Quam magis exhausto spumaverit ubere mulctra,
- 310 Laeta magis pressis manabunt flumina mammis.  
 Nec minus interea barbas incanaeque menta  
 Cinyphii tondent hirci saetasque comantis  
 Usus in castrorum et miseris velamina nautis.  
 Pascuntur vero silvas et summa Lycaeï,
- 315 Horrentisque rubos et amantis ardua dumos;  
 Atque ipsae memores redeunt in tecta, suosque  
 Ducunt, et gravido superant vix ubere limen.  
 Ergo omni studio glaciem ventosque nivalis,  
 Quo minus est illis curae mortalis egestas,
- 320 Avertes, victumque feres et virgea laetus  
 Pabula, nec tota claudes faenilia bruma.  
 At vero Zephyris cum laeta vocantibus aestas

vs. 40. | 293. *Cast.*, ad *Cast.* — *molli*, ad ingrediendum facili, non praecipiti. | 294. Spectant haec ad vs. 289 sq. | 295. *mollibus*, cf. vs. 297 sq. | 299. *turpes*, pedes tuberibus deformantes. | 300. *Post h. d.*, respondent haec voci *Incipiens* vs. 295. | 302. *a ventis*, i. q. aversa a ventis. | 303. *cum frig.* cet. Aquarii sidus medio Februario occidit; et poeta cum eandem curam per totam hiemem adhiberi velit, satis habet, extremam eius partem significare, quo appareat, quousque id, quod praecipit, fieri debeat. | 304. de *extremo anno* v. 1, 64 et cf. Tib. 3, 1 sq. | 306 sq. Milesia lana praestantissima. — *magno mutentur* „ingenti pretio comparentur; nam apud maiores omne mercimonium in permutatione constabat,” Servius. Ceterum probe distingues usum (a quo solo capras commendat poeta) et pretium. — *Tyr. inc. r.*, v. E. 3, 106. | 309. *Quam*, alii *Quo*, cf. A. 7, 787 sq. | 312. Cinyphs fluvius Libyae inter utramque Syrtim; et videntur greges Cinyphii, saetarum longitudine insignes, in Italiam translati. — *tondent*, qui? scilicet quorum hoc opus est, pastores; v. 4, 231. | 313. Geopon. 18, 9 „ἡ δὲ θρίξ τῶν αἰγῶν ἀναγκαῖα πρὸς τε σχολίους καὶ σάκκους καὶ τὰ τοῦτοις παραπλήσια καὶ εἰς ναυτικάς ὑπηρεσίας, οὔτε κοπιόμενα ῥαδίως οὔτε σηπόμενα.” — *Usus in c.*, fiebant inde funes ad tormenta bellica, tum cilicia, quibus tentoria et plutei intendeabantur. | 314. *Lycaeï*, v. E. 10, 15. |

- In saltus utrumque gregem atque in pascua mittet,  
 Luciferi primo cum sidere frigida rura  
 325 *Carpamus*, dum mane novum, dum gramina canent,  
 Et ros in tenera pecori gratissimus herba.  
 Inde, ubi quarta sitim caeli collegerit hora  
 Et cantu querulae rumpent arbusta cicadae,  
 Ad puteos aut alta greges ad stagna iubeto  
 330 Currentem ilignis potare canalibus undam;  
 Aestibus at mediis umbrosam exquirere vallem,  
 Sicubi magna Iovis antiquo robore quercus  
 Ingentis tendat ramos, aut sicubi nigrum  
 Illicibus crebris sacra nemus accubet umbra;  
 335 Tum tenuis dare rursus aquas, et pascere rursus  
 Solis ad occasum, cum frigidus aera vesper  
 Temperat, et saltus reficit iam roscida luna,  
 Litoraque alcyonem resonant, acalanthida dumi.  
 Quid tibi pastores Libyae, quid pascua versu  
 340 Prosequar, et raris habitata mapalia tectis?  
 Saepe diem noctemque et totum ex ordine mensem  
 Pascitur itque pecus longa in deserta sine ullis  
 Hospitiis: tantum campi iacet. Omnia secum  
 Armentarius Afer agit, tectumque Laremque  
 345 Armaque Amyclaeumque canem Cressamque pharetram;  
 Non secus ac patriis acer Romanus in armis  
 Iniusto sub fasce viam cum carpit, et hosti  
 Ante exspectatum positus stat in agmine castris.  
 At non, qua Scythiae gentes Maeotiaque unda, -  
 350 Turbidus et torquens flaventis Hister arenas,  
 Quaque redit medium Rhodope porrecta sub axem.

325. *Carpamus* rura, ambulemus per rura, cum grege scilicet; *aera carpere*, i. e. volare, 4, 311, *litora* Ovid. Met. 12, 196. | 327. *quarta*, fere nona ex nostra horas numerandi ratione; veteres ab ortu solis numerabant horas. | 328. *rumpent*, multo assiduoque cantu personant; Iuvenal. 1, 12 sq. „Frontonis platani convulsaeque marmora olamant Semper et assiduo *ruptae* lectore columnae.“ | 330. *ilignis*, qui vim solis perferre possint nec fatiscant; quare ille apud Terent. Ad. 4, 2, 46 lectulos, quibus in sole utatur, ilignis pedibus sibi faciendos curat. | 332. v. E. 6, 57 et supra vs. 189. | 334. Proprie *umbra* dicitur cubare, accubare; hinc ipsae res umbram praebentes; v. A. 1, 165. | 335. *dare*, sc. *iubeo*, quod verbum facile subintelligi potest, cum praecipientis partes agat poeta. — *tenuis*, cf. vs. 330. | 340. *mapalia raris tectis habitata*, raras habitationes praebentia, i. e. quae ipsa rara sunt, utpote ingentibus intervallis dispersa. Nove Probus: „mapalia loca deserta Punica.“ | 345. v. E. 1, 55 et supra vs. 89 infra vs. 405. | 346. non secus, ac Romanus miles omnia secum agit. | 347. v. 1, 164 et cf. Cic. Tusc. 2, 16. — *hosti* Dativus Graeco more: antequam id ab hoste exspectatur, et castra posuit et in agmine stat, instructo scilicet, quod statim in hostem pergere possit; Liv. 2, 49 „Consul gentem omnem suam instructo agmine videt; acceptus in medium signa ferri iubet.“ | 349. *At non ita pascitur cet.* cf. 4, 530. A. 4, 529. | 350. Ordo est: *Et turbidus torquens*; v. 1, 163. | 351. v. E. 6, 30. — *redit*, quia est, ut ait Servius, γαμμοειδής, s. in formam Graecae litterae

- Illic clausa tenent stabulis armenta, nec ullae  
 Aut herbae campo adparent aut arbore frondes;  
 Sed iacet aggeribus niveis informis et alto  
 355 Terra gelu late, septemque adsurgit in ulnas.  
 Semper hiemps, semper spirantes frigora Cauri.  
 Tum Sol pallentis haud umquam discutit umbras,  
 Nec cum invectus equis altum petit aethera, nec cum  
 Praecipitem Oceani rubro lavit aequore currum.  
 360 Concrescunt subitae currenti in flumine crustae,  
 Undaque iam tergo ferratos sustinet orbis,  
 Puppibus illa prius, patulis nunc hospita plaustris;  
 Aeraque dissiliunt volgo, vestesque rigescunt  
 Indutae, caeduntque securibus humida vina,  
 365 Et totae solidam in glaciem vertere lacunae  
 Stiriaque inpexis induruit horrida barbis.  
 Interea toto non setius aere ninguit:  
 Intereunt pecudes, stant circumfusa pruinis  
 Corpora magna boum, confertoque agmine cervi  
 370 Torpent mole nova et summis vix cornibus exstant.  
 Hos non inmissis canibus, non cassibus ullis  
 Puniceaeve agitant pavidos formidine pennae;  
 Sed frustra oppositum trudentis pectore montem  
 Comminus obtruncant ferro, graviterque rudentis  
 375 Caedunt, et magno laeti clamore reportant.  
 Ipsi in defossis specubus secura sub alta  
 Otia agunt terra, congestaque robora totasque  
 Advolvere focis ulmos ignique dedere.  
 Hic noctem ludo ducunt, et pocula laeti  
 380 Fermento atque acidis imitantur vitea sorbis.  
 Talis Hyperboreo Septem subiecta trioni  
 Gens effrena virum Rhipaeo tunditur Euro,  
 Et pecudum fulvis velatur corpora saetis.  
 Si tibi lanitium curae, primum aspera silva,  
 385 Lappaeque tribolique, absint; fuge pabula laeta;

*F* reflectitur; similiter Philarg.: „flectitur in sinum.“ — *sub mod. axem*, i. e. versus septentrionem, ita ut cornua, in quae excurrit Rhodope, sub ipso (medio) polo esse videantur. | 355. *adsurgit*, sc. nive, i. e. nix, qua obducta est terra, adsurgit in s. u. | 357. *umbras* „e nubibus factas“ Servius. | 361. v. vs. 173. | 363. *Aera*, idem de saxis memoratur 4, 135 sq. | 364. *vina*, non nata ibi, sed importata. | 366. v. 1, 49 et 163. | 367. *non secius*: quam saevum frigus, tam multae nives. | 368. At cf. vs. 352. Nempe cogitat poeta de vaccis et bobus plaustra vehentibus, cf. vs. 361 et v. E. 7, 53. | 370. *formido*, linea variis pennis distincta, qua claudebatur pars silvae ad feras, quae transsilire talem lineam reformidant, et continendas et in retia compellendas, cf. A. 12, 750. | 377. v. 1, 295. | 379. *noctem*, partem noctis hiemalis. | 380. *fermento et sorbis*, i. e. sorbis fermentatis, v. 1, 173. Servius: „Potionis genus est, quod cervisia nominatur.“ | 382. v. 1, 240. | 385. v. E. 4, 51. — „laeta pascua solocem lanam



- Continuoque greges villis lege mollibus albos.  
 Illum autem, quamvis aries sit candidus ipse,  
 Nigra subest udo tantum cui lingua palato,  
 Reïce, ne maculis infuscet vellera pullis  
 390 Nascentum, plenoque alium circumspice campo.  
 Munere sic niveo lanae, si credere dignum est,  
 Pan deus Arcadiae captam te, Luna, fefellit,  
 In nemora alta vocans; nec tu aspernata vocantem.  
 At cui lactis amor, cytisum lotosque frequentis  
 395 Ipse manu salsasque ferat praesepibus herbas.  
 Hinc et amant fluvios magis, et magis ubera tendunt,  
 Et salis occultum referunt in lacte saporem.  
 Multi iam excretos prohibent a matribus haedos,  
 Primaque ferratis praefigunt ora capistris.  
 400 Quod surgente die mulsero horisque diurnis,  
 Nocte premunt; quod iam tenebris et sole cadente,  
 Sub lucem exportans calathis adit oppida pastor;  
 Aut parco sale continguunt hiemique reponunt.  
 Nec tibi cura canum fuerit postrema, sed una  
 405 Velocis Spartae catulos acremque Molossum  
 Pasce sero pingui. Numquam custodibus illis  
 Nocturnum stabulis furem incursusque luporum,  
 Aut inpacatos a tergo horrebis Hiberos.  
 Saepe etiam cursu timidos agitabis onagros,  
 410 Et canibus leporem, canibus venabere dammas;  
 Saepe volutabris pulsos silvestribus apros  
 Latratu turbabis agens, montisque per altos  
 Ingentem clamore premes ad retia cervum.  
 Disce et odoratam stabulis accendere cedrum,  
 415 Galbaneoque agitare gravis nidore chelydros.

faciunt, h. e. minutam, duram atque hirsutam, Philarg.] 386. v. 1, 169.] 387.  
*Illum autem arietem, q. sil c. i.*; ita saepe a poetis primariae sententiae  
 Subiectum, quod vocant, vel Obiectum enuntiatis ex relativo vel coniunctione aliqua  
 pendentibus inseritur, ut vs. 474. 4, 33. A. 12, 641. — *ipse*, v. 2, 297.] 390. *pl.*  
*campo*, plenis grege pascuis.] 391. Pan in arietem mutatus nivei velleris pulchri-  
 tudine Lunam in nemoris recessum pellexisse fertur. — *Munere*, munus dicitur,  
 quidquid aptum est ad gratiam et amorem vel significandum, ut 4, 520, vel con-  
 ciliandum, ut h. l.] 398. *iam* significat novum esse hoc institutum, antea fuisse  
 incognitum. Multi prohibent haedos a lacte matrum ita, ut eos aut separent  
 (*excretos*), aut capistrum ori praefigant.] 399. *que*, v. 1, 419. Ceterum v. A.  
 4, 500.] 401. lac coactum, ut sicior fieret caseus, premebatur.] 403. His quoque  
 verbis caseus significatur, sed diversi ab eo, quod vs. 399 tangitur, generis; hic  
 genus magis durabile commemorari videtur, illic tale, quo recens presso vesce-  
 rentur. || 404—13. *De utilitate, quam praestent pastoribus canes.*] 408. Per  
 liberum a poeta quisvis praedo hic significatur, quia Iberi rapinis infames erant. —  
*a tergo* veniunt, qui insidiantur.] 409. Onagram, peregrinam bestiam (ut *uros*  
 2, 374), velocitate insignem, pro quavis celeri fera nominat. || 414—39. *Prae-*  
*cepta de exigendis necandisque serpentibus.*] 415. *graves*, periculum facientes

- Saepe sub inmotis praesepebus aut mala tactu  
 Vipera delituit caelumque exterrita fugit;  
 Aut tecto adsuetus coluber succedere et umbrae,  
 Pestis acerba boum, pecorique adspargere virus,  
 420 Fovit humum. Cape saxa manu, cape robora, pastor,  
 Tollentemque minas et sibila colla tumentem  
 Deice. Iamque fuga timidum caput abdidit alte,  
 Cum medii nexus extremaeque agmina caudae  
 Solvuntur, tardosque trahit sinus ultimus orbis.  
 425 Est etiam ille malus Calabris in saltibus anguis,  
 Squamea convolvens sublato pectore terga  
 Atque notis longam maculosus grandibus alvum,  
 Qui, dum amnes ulli rumpuntur fontibus et dum  
 Vere madent udo terrae ac pluvialibus austris,  
 430 Stagna colit, ripisque habitans, hic piscibus atram  
 Inprobus ingluviem ranisque loquacibus explet;  
 Postquam exusta palus, terraeque ardore dehiscunt,  
 Exsilit in siccum, et flammantia lumina torquens  
 Saevit agris, asperque siti atque exterritus aestu.  
 435 Nec mihi tum mollis sub divo carpere somnos,  
 Neu dorso nemoris libeat iacuisse per herbas,  
 Cum positis novus exuviis nitidusque iuventa  
 Volvitur, aut catulos tectis aut ova relinquens,  
 Arduus ad solem, et linguis micat ore trisulcis.  
 440 Morborum quoque te caussas et signa docebo.  
 Turpis ovis temptat scabies, ubi frigidus imber  
 Altius ad vivum persedit et horrida cano  
 Bruma gelu, vel cum tonsis inlotus adhaesit  
 Sudor, et hirsuti secuerunt corpora vepres.  
 445 Dulcibus idcirco fluviiis pecus omne magistri  
 Perfundunt, udisque aries in gurgite villis  
 Mersatur, missusque secundo defluit amni;  
 Aut tonsum tristi contingunt corpus amurga,  
 Et spumas miscent argenti et sulfura viva  
 450 Idaeasque pices et pinguis unguine ceras

gregi.] 416. *inmot.*, ergo movenda sunt interdum.] 420. *fovere* locum is dicitur, qui multas et assiduus in eo moratur molliterque se ibi habet; cf. 4, 43. A. 9, 57. — *robora*, graves fustes.] 421. *Toll. minas*, sublato capite minantem; cf. A. 2, 381 et v. 1, 479.] 425 sqq. Describitur chersydrus.] 428. *rumpuntur*, se rumpunt, prorumpunt ex font. cf. A. 1, 246. 11, 549.] 430. *hic*, in stagnis. — *atr.*, v. 1, 129.] 434. *exterritus*, exagitatus, in furorem coniectus.] 436. etiam Horat. Sat. 2, 6, 91: *Praerupti nemoris dorso.*] 439. v. 1, 430. — *bisulca* lingua serpentum micando efficit, ut videatur trisulca.]] 440—473. *De morbis ovium.*] 443. Colum. 7, 5 „Scabies nascitur, ... si aestivum sudorem mari vel flumine non abluit.“] 448. v. 1, 75.] 449. Spuma argenti Graecis dicitur *ἀργυρος*, nobis *Silberglätte*. — *viva*, nativum, non adhibita arte paratum, sulfur; v. 2, 469.] 450. *Idaeas*, v. E. 1, 55. — *pices*, liquidas intellige, *Theos*. —

- Scillamque elleborosque gravis nigrumque bitumen.  
 Non tamen ulla magis praesens fortuna laborum est,  
 Quam si quis ferro potuit rescindere summum  
 Ulceris os: alitur vitium vivitque tegendo,  
 455 Dum medicas adhibere manus ad volnera pastor  
 Abnegat, aut meliora deos sedet omina poscens.  
 Quin etiam, ima dolor balantum lapsus ad ossa  
 Cum furit atque artus depascitur arida febris,  
 Profuit incensos aestus avertere et inter  
 460 Ima ferire pedis salientem sanguine venam;  
 Bisaltae quo more solent acerque Gelonus,  
 Cum fugit in Rhodopen atque in deserta Getarum  
 Et lac concretum cum sanguine potat equino.  
 Quam procul aut molli succedere saepius umbrae  
 465 Videris, aut summas carpentem ignavius herbas;  
 Extremamque sequi, aut medio procumbere campo  
 Pascentem, et serae solam decedere nocti:  
 Continuo culpam ferro compesce, prius quam  
 Dira per incautum serpant contagia volgus.  
 470 Non tam creber agens hiemem ruit aequore turbo,  
 Quam multae pecudum pestes. Nec singula morbi  
 Corpora corripunt, sed tota aestiva repente,  
 Spemque gregemque simul, cunctamque ab origine gentem.  
 Tum sciat, aerias Alpes et Norica si quis  
 475 Castella in tumulis et Iapydis arva Timavi  
 Nunc quoque post tanto videat desertaque regna  
 Pastorum et longe saltus lateque vacantis.

Hic quondam morbo caeli miseranda coorta est  
 Tempestas totoque autumnu incanduit aestu,

*pingu. ungu.*, multum unguinis, s. suci ad unguenta apti habentes. | 451. *graves*, graveolentes. | 452. nullum praesentius auxilium est adversus scabiem; *laborum*, morbi. | 453. *potuit*, ἐτελε, a se impetravit; cf. A. 4, 19. 7, 309. 10, 307. | 461. Bisaltae populus Thraciae ad Strymonem habitans; de Gelonis v. 2, 115. | 462. *Rhodope*, v. E. 6, 30. *Getae* ad Istrum et Pontum Euxinum sedem habebant. — Bisaltae sive ab hostibus pulsi, sive alia causa moti fugiunt (citatis equis vehuntur) in Rhodopen, Geloni in deserta (*Steppen*) Getarum. | 464—468. *Quam videris* — — *culpam ferro compesce*, ἀναξολοῦθλα, ultima enim non respondent primis; coeperat poeta ita, ac si haec subiecturus esset: *hanc continuo occide*, v. A. 8, 403. 11, 552. | 464. *molli*, in qua molliter est ei, qui eam petit. | 467. v. E. 8, 88. | 468. *culpam*, malum exitio futurum gregi. | 470. *hiemem*, i. e. pluvias cum tempestate coniunctas, *tam creber*, i. e. cum tam crebro s. denso imbri; additur *aequore*, quia maxime horridae esse solent tempestates in mari. | 473. v. E. 1, 15. — *ab origine*: a minimis natu pecudibus usque ad maximas id malum pertinere significatur. || 474—566. *Pestis Norica*. cf. similis eladis descriptionem ap. Ovid. Met. 7, 523 sqq. | 474. *aerias*, v. E. 1, 59. | 475. *castella*, villae ac vici in montibus siti. — *Timavus* fluvius Venetiae, *Iapyx* dictus a vicinis Iapydibus, populo Illyrici. | 476. *post tanto pro tanto post*; sed *tanto* cum vi postpositum. | 478. *m. caeli*, aeris vitio, cf. A. 3, 137—39. | 479. aer inflammatus est tota aestus autumnalis vi; autumnus apud

- 480 Et genus omne Neci pecudum dedit, omne ferarum,  
Corruptique lacus, infecit pabula tabo.  
Nec via mortis erat simplex; sed ubi ignea venis  
Omnibus acta sitis miseros adduxerat artus,  
Rursus abundabat fluidus liquor omniaque in se
- 485 Ossa minutatim morbo conlapsa trahebat.  
Saepe in honore deum medio stans hostia ad aram,  
Lanea dum nivea circumdatur infula vitta,  
Inter cunctantis cecidit moribunda ministros.  
Aut si quam ferro mactaverat ante sacerdos,
- 490 Inde nec inpositis ardent altaria fibris,  
Nec responsa potest consultus reddere vates,  
Ac vix suppositi tinguuntur sanguine cultri  
Summaque ieiuna sanie infuscatur arena.  
Hinc laetis vituli volgo moriuntur in herbis,
- 495 Et dulcis animas plena ad praesepia reddunt;  
Hinc canibus blandis rabies venit, et quatit aegros  
Tussis anghela sues ac faucibus angit obes.  
Labitur infelix studiorum atque inmemor herbae  
Victor equus fontisque avertitur et pede terram
- 500 Crebra ferit; demissae aures, incertus ibidem  
Sudor, et ille quidem moriturus frigidus, aet  
Pellis et ad tactum tractanti dura resistit.  
Haec ante exitium primis dant signa diebus;  
Sin in processu coepit crudescere morbus,
- 505 Tum vero ardentes oculi atque attractus ab alto  
Spiritus, interdum gemitu gravis, imaque longo  
Ilia singultu tendunt, it naribus ater  
Sanguis, et obsessas fauces premit aspera lingua.  
Profuit inserto latices infundere cornu
- 510 Lenaeos; ea visa salus morientibus una;

Romanos initium capiebat a III. Id. August., desinebat III. Id. Novembr. | 482. *simplex*, una, ut 2, 73; primum enim aestu (*siti* ait vs. proximo) totum corpus torrebatur, deinde tabescebat colliguescendo. | 483. „Adducitque (contrahit) sitis maciem,” Ovid. M. 3, 397. | 485. *trahebat in se*, quasi contagione quadam effecit, ut et ipsa in tabidum liquorem resolverentur. | 486. *honore d.*, sacrificio, ut A. 3, 406. | 487. *infula*, h. l. est velamentum laneum capiti hostiae impositum et ab utraque parte capitis dependens, quod, ut in capite haereret, vittis constringi s. ligari solebat. — *circumdatur* nempe capiti. | 489. *ante*, antequam videretur correpta peste. | 490. *lunge fibris inde*, i. e. fibris ex ea, eius. | 492. *suppositi*: piacularare sacrum diis inferis oblatum significari puta; in eo caput hostiae ad terram versus deprimebatur et culter ab inferiore parte iugulo adigebatur; cf. A. 6, 248. | 493. *ieiuna*, tenui. | 497. significatur angina morbus. | 498. *inf. stud.*, cui nihil prosunt studia sua, victoriae reportatae; cf. vs. 525. | 500. v. vs. 149. — *incertus*, inconstans. — *ibidem*, circa aures, capitis sudor. | 502. *resistit*, non cedit, utpote dura, non mollis. | 503. *dant*, scilicet equi ea peste correpti. | 505. v. 2, 441 et A. 7, 787. | 508. *obsessas*, Lucretius in descriptione Atticae pestis 6, 1146 „ulceribus vocis via saepta coibat.” —

- Mox erat hoc ipsum exitio, furiisque relecti  
 Ardebant, ipsique suos iam morte sub aegra —  
 Di meliora piis erroremque hostibus illum! —  
 Discissos nudis laniabant dentibus artus.
- 515 Ecce autem duro fumans sub vomere taurus  
 Concidit et mixtum spumis vomit ore cruorem  
 Extremosque ciet gemitus. It tristis arator,  
 Maerentem abiungens fraterna morte iuvenum,  
 Atque opere in medio defixa relinquit aratra.
- 520 Non umbrae altorum nemorum, non mollia possunt  
 Prata movere animum, non, qui per saxa volutus  
 Purior electro campum petit amnis; at ima  
 Solvuntur latera, atque oculos stupor urguet inertis,  
 Ad terramque fluit devexo pondere cervix.
- 525 Quid labor aut benefacta iuvant? quid vomere terras  
 Invertisse gravis? atqui non Massica Bacchi  
 Munera, non illis epulae nocuere repostae:  
 Frondibus et victu pascuntur simplicis herbae,  
 Pocula sunt fontes liquidi atque exercita cursu
- 530 Flumina, nec somnos abrumpit cura salubris.  
 Tempore non alio dicunt regionibus illis  
 Quaesitas ad sacra boves Iunonis, et uris  
 Inparibus ductos alta ad donaria currus.  
 Ergo aegre rastris terram rimantur, et ipsi
- 535 Unguibus infodiunt fruges, montisque per altos  
 Contenta cervice trahunt stridentia plaustra.  
 Non lupo insidias explorat ovilia circum,  
 Nec gregibus nocturnus obambulat; acrior illum  
 Cura domat; timidi dammae cervique fugaces
- 540 Nunc interque canes et circum tecta vagantur.  
 Iam maris immensi prolem et genus omne natantum  
 Litore in extremo, ceu naufraga corpora, fluctus

*premit*, quia ipsa intumuerat. | 513. cf. Tibull. 3, 4, 1. — *errorem*, furorem illum, quo illi correpti se ipsi dilaniabant. | 514. *nudis*, qui sunt nudati, reductis labiis, more ringentium, canum inprimis et furiosorum. | 515. *sub vomere*, s. arandi labore. | 520 sqq. Haec non ad unum illum pari suo superstitem, sed ad universum taurinum genus spectare, declarat verbum *pascuntur* vs. 528. | 522. *electro*, metallo ex auro et quinta parte argent. conflato. Servius „sicut electrum defaecatus est metallis omnibus, ita et currens aqua ceteris purior;“ et Plin. N. H. 33, 4, 23 „electri natura est ad lucernarum lumina clarius argento splendere.“ | 523. *Solvuntur*, dependent flaccida. | 526. v. 2, 143. | 527. Qui terras longe remotas meminerit a Virgilio A. 3, 364 repostas appellari, non dubitabit, quin cenae repostae sint eae, quas Silius, haec Virgiliana imitatus, dixit 13, 354 „mensas alia tellure petitas.“ | 529. *exercita* c., assiduo cursu agitata. | 532. *Quaesitas*, desideratas esse, defuisse; *boves*, niveas quidem, qualium usus erat in sacerdote Iunonis Argivae ad templum deae vehenda. — *uris*, v. 2, 374. | 533. *Inparibus*, sive magnitudinae, sive colore, sive utroque. | 537. *ins.*, occasionem insidiarum. | 539. *Cura d.*, nempe ipse cum reliquo ferarum, ut damarum, cer-

- Proluit; insolitae fugiunt in flumina phocae.  
 Interit et curvis frustra defensa latebris  
 545 Vipera et attoniti squamis adstantibus hydri.  
 Ipsis est aer avibus non aequus, et illae  
 Praecipites alta vitam sub nube relinquunt.  
 Praeterea iam nec mutari pabula refert,  
 Quaesitaeque nocent artes: cessere magistri,  
 550 Phillyrides Chiron Amythaoniusque Melampus.  
 Saevit et in lucem Stygiis emissa tenebris  
 Pallida Tisiphone Morbos agit ante Metumque,  
 Inque dies avidum surgens caput altius effert.  
 Balatu pecorum et crebris mugitibus amnes  
 555 Arentesque sonant ripae collesque supini.  
 Iamque catervatim dat stragem atque aggerat ipsis  
 In stabulis turpi dilapsa cadavera tabo,  
 Donec humo tegere ac foveis abscondere discunt.  
 Nam neque erat coriis usus, nec viscera quisquam  
 560 Aut undis abolere potest, aut vincere flamma;  
 Ne tondere quidem morbo inluvieque peresa  
 Vellera nec telas possunt attingere putris;  
 Verum etiam invisos si quis temptarat amictus,  
 Ardentes papulae atque inmundus olentia sudor  
 565 Membra sequebatur, nec longo deinde moranti  
 Tempore contactos artus sacer ignis edebat.

vorum, genere, etiam piscium, morbo illo pestilenti laborat. | 543. *insolitae*, non fluminibus, sed mari adsuetae. | 545. *attoniti*, stupentes et torpentes. | 549 sq. *artes*, remedia. — Discedunt infecta re magistri pecoris (quorum etiam erat mederi aegrotis pecori), etiamsi artis medendi tam sint periti, quam Chiron (de quo v. vs. 93) et Melampus, Amythaonis filius, quorum Chiron herbarum succis aegrotos curabat, Melampus lustrationum religione. | 552. *ante*, puta: ante se, et cf. A. 6, 274—76. | 555. *Arentes ripae* sunt fluminum, quae prope exaruerunt. | 556. *dat* Tisiphone. | 558. donec humare ea coeperunt, qui unus restabat modus inhibendae pestis; quod quidem fecerunt, postquam intellectum est, nullum esse (vs. 559 sqq.) usum pecudum ea peste peremtarum, nec coriorum, nec carniū, nec velleris. | 560. Servius „Nec lavari nec coqui poterant. Caro enim corrupta morbo quandam habet mucorem, qui non potest ablui, quoniam omne possidet corpus. Item igni superposita aut putrescit aut durescit, non coquitur.“ | 562. nec, si quis *tonderat et telam inde fecerat*, ullo ea erat usu, quia putris erat, statim igitur rumpebatur. Sic condicionales aliaeque sententiae, quae quidem a lectore paulo acutius facile subintelligi possint, interdum omittuntur a poetis, ut supra vs. 206. A. 1, 334. 7, 436—40. 8, 522 sq. 10, 423. 12, 727. 730. 805. 880. | 565. *membra sequebatur*, se diffundebat per omnia deinceps membra; similiter *fumi sequaces* 4, 230. | 566. *sacer ignis*, morbus quidam cancro carbunculoque similis.

## G E O R G I C O N

## LIBER QUARTUS.

- Protinus aerii mellis caelestia dona  
 Exsequar. Hanc etiam, Maecenas, aspice partem.  
 Admiranda tibi levium spectacula rerum  
 Magnanimosque duces totiusque ordine gentis  
 5 Mores et studia et populos et proelia dicam.  
 In tenui labor; at tenuis non gloria, si quem  
 Numina laeva sinunt auditque vocatus Apollo.  
 Principio sedes apibus statioque petenda,  
 Quo neque sit ventis aditus, — nam pabula venti  
 10 Ferre domum prohibent — neque oves haedique petulci  
 Floribus insultent, aut errans bucula campo  
 Decutiat rorem, et surgentis atterat herbas.  
 Absint et picti squalentia terga lacerti  
 Pinguibus a stabulis, meropesque, aliaeque volucres  
 15 Et manibus Procne pectus signata cruentis;  
 Omnia nam late vastant, ipsasque volantis  
 Ore ferunt dulcem nidis inmitibus escam.  
 At liquidi fontes et stagna virentia musco  
 Adsint, et tenuis fugiens per gramina rivus,  
 20 Palmaque vestibulum aut ingens oleaster inumbret,  
 Ut, cum prima novi ducent examina reges  
 Vere suo ludetque favis emissa iuventus,

**Georg. L. IV.** 1. *Protinus* significat continuationem coepti de re rustica operis transitumque ad novam eius partem, ad mellificium. — *aerii*, quia veteres mel ex rore, qui ex aere deflueret, colligi ab apibus, ex florum suco ceram fieri existimabant; hinc mel *caeleste donum*. cf. Plin. N. H. 11, 12. | 7. Gell. 5, 12 „deos quosdam [*dextra numina*] ut prodessent celebrabant, quosdam [*laeva numina*] ut ne obsessent placabant.“ Arnobius „Non commemorabimus deam Lavernam furum, Bellonas, Discordias, Furias, et laeva illa quae constituitis numina.“ || 8—50. *De situ apiarii deque alvearibus*. | 10. v. 3, 283. | 13. *squalentia*, v. A. 10, 314. — *lacerti*, utpote ipsis apibus insidiantes. | 14. *stab.*, alveario. — *aliaeque* v. et *Procne*, est Graecismus: ἅλλα τε πτηνὰ καὶ Πρόκνη, i. e. cum aliae volucres, tum maxime Procne. | 16. interficiunt, quascumque comprehenderint, apes; nam *omnia vastare* est: omnia caede implere, ut Phaedr. 3, 2, 13 sq. adde A. 1, 471. — *volantes*, v. 3, 147. | 19. v. 1, 163. *tenuis fug.*, cum tenui aqua fugiens; Varro 3, 16, 27 „oportet esse aquam propinquam, quae praeterfluat, aut in aliquem locum influat (*stagnum*) ita ut ne altitudine ascendat duo aut tres digitos.“ | 21. v. 3, 130. | 22. Servius „*suo*, i. e. sibi grato et aptissimo;“ sic navis *suo* vento ferri dicitur, sic vota *suos* vel *non suos* deos habere, i. e. propitios, faventes; cf. A. 2, 396. 12, 187. Vossius „*suo*, i. e. eo, quod proprium est apum,“ incipiens illud quidem a verno aequinoctio et pertinens usque ad solstitium aestivum; contra in fastis ver initium habet a V Id.

- Vicina invitet decedere ripa calori,  
 Obviaque hospitibus teneat frondentibus arbor.
- 25 In medium, seu stabit iners, seu profluet humor,  
 Transversas salices et grandia coniice saxa,  
 Pontibus ut crebris possint consistere et alas  
 Pandere ad aestivum solem, si forte morantis  
 Sparsert aut praeceps Neptuno inmerserit Eurus.
- 30 Haec circum casiae virides et olentia late  
 31 Serpylla et graviter spirantis copia thymbrae  
 32 Floreat, inriguumque bibant violaria fontem.  
 47 Neu propius tectis taxum sine, neve rubentis  
 48 Ure foco caneros, altae neu crede paludi,  
 49 Aut ubi odor caeni gravis, aut ubi concava pulsu  
 50 Saxa sonant vocisque offensa resultat imago.
- 33 Ipsa autem, seu corticibus tibi suta cavatis,  
 34 Seu lento fuerint alvearia vimine texta,  
 35 Angustos habeant aditus: nam frigore mella  
 Cogit hiemps, eademque calor liquefacta remittit.  
 Utraque vis apibus pariter metuenda; neque illae  
 Nequiquam in tectis certatim tenuia cera  
 Spiramenta linunt, fucoque et floribus oras
- 40 Explent, collectumque haec ipsa ad munera gluten  
 Et visco et Phrygiae servant pice lentius Idae.  
 Saepe etiam effossis, si vera est fama, latebris  
 Sub terra fovere larem, penitusque repertae  
 Pumicibusque cavis exesaeque arboris antro.
- 45 Tu tamen et levi rimosa cubilia limo  
 46 Ungue fovens circum, et raras superiniice frondes.
- 51 Quod superest, ubi pulsam hiemem Sol aureus egit  
 Sub terras caelumque aestiva luce reclusit,

Februar. | 23. v. E. 8, 88. | 24. *Obvia arb.*, quasi offerens se exeuntibus. | 25. *In medium* humorem. | 29. *Sparsert* imbre. — *Neptuno*, v. 1, 295. | 30. *Haec circum*, circa fontes et stagna. | 47—50. Hoc ordine, per se commendabili, hos versus legisse videtur Columella. | 48. *Canci* in morborum quorundam cura urebantur; odor autem ustorum gravissimus. | 50. *vocis imago*, echo, „*πέρως ὁρῶντας παῖς*“ dicta ab Eurip. Hec. 1100. | 33. v. vs. 25 et 3, 387. — Colum. 9, 6 „Si regio ferax est suberis, haud dubitanter utilissimos alveos faciemus ex corticibus, quia nec hieme rigent, nec candent aestate.“ | 36. *liquet. rem.*, ita resolvit, ut denuo colliquescant, desinant esse tenacia, vs. 57. | 38. *tenuia*, v. 1, 397. | 39. *fucus* h. l. significat melliginem, quae ex arborum lacrimis (resina) paratur, *flores* spectant ad ceram, quae ex floribus colligitur, v. vs. 1 et 250; utraque res proximo versu comprehenditur vocabulo glutinis; *orae* sunt ostia alvearium, cf. vs. 188. | 41. *servant*, reponunt. | 43. v. 3, 420. — *larem*, cf. vs. 155. | 44. cf. Hom. Il. 2, 88. | 45 sq. Tamen etiam apiarum operam diligentia apum adiuvanda est. — *fovens*, quia ad calorem continendum rimae obturantur. || 51—113. *De examinibus*. — 51. *Quod superest*, i. e. Ceterum; haud infrequens apud antiquiores poetas transitionis formula. | 52. *sub terras*, nempe interiorem terram aestate frigidam, hieme calidam existimabant;



- Illae continuo saltus silvasque peragrant  
 Purpureosque metunt flores et flumina libant  
 55 Summa leves. Hinc nescio qua dulcedine laetae  
 Progeniem nidosque foveant, hinc arte recentis  
 Excudunt ceras et mella tenacia fingunt.  
 Hinc ubi iam emissum caveis ad sidera caeli  
 Nare per aestatem liquidam suspexeris agmen  
 60 Obscuramque trahi vento mirabere nubem,  
 Contemplator: aquas dulcis et frondea semper  
 Tecta petunt. Huc tu iussos adsperge saporis,  
 Trita melisphylla et cerinthae ignobile gramen,  
 Tinnitusque cie et Matris quate cymbala circum:  
 65 Ipsae considant medicatis sedibus, ipsae  
 Intima more suo sese in cunabula condent.  
 Sin autem ad pugnam exierint — nam saepe duobus  
 Regibus incessit magno discordia motu;  
 Continuoque animos volgi et trepidantia bello  
 70 Corda licet longe praesciscere; namque morantis  
 Martius ille aeris rauci canor increpat et vox  
 Auditur fractos sonitus imitata tubarum;  
 Tum trepidae inter se coeunt, pennisque coruscant,  
 Spiculaque exacuunt rostris, aptantque lacertos,  
 75 Et circa regem atque ipsa ad praetoria densae  
 Miscentur, magnisque vocant clamoribus hostem.  
 Ergo ubi ver nactae sudum camposque patentis,  
 Erumpunt portis: concurritur; aethere in alto  
 Fit sonitus; magnum mixtae glomerantur in orbem,  
 80 Praecipitesque cadunt; non densior aere grando,  
 Nec de concussa tantum pluit ilice glandis.  
 Ipsi per medias acies insignibus alis

cf. Lucret. 6, 841 sqq. — *reclisit*, sc. nubibus antea obductum. | 55—58. *Hinc... hinc... Hinc...*: ter posita particula refertur ad ordinem, quo apes ea munia deinceps obeunt. | 57. v. vs. 36. | 59. *p. aest. l.*, per serenum aera aestivum. | 62. *iussos*, quos iussero, proximo scilicet versu. | 64. *Matris*, Cybeles. | 67. *Sin... exierint*; abreptus ingenii fervore poeta ita pergit, ut, satis habens significasse, qua de re dicturus esset, plane oblitus videatur coeptae per protasin orationis. Redit poeta eo, unde deflexit, vs. 77. | 69. *trepidantia bello*, belli cupiditate irritata. | 74. *aptant lac.*, petunt hoc a pugilibus, qui ante certamen explorant vires, iactant brachia, ut A. 5, 376 sq. Apes quidem posterioribus pedibus se erigant, anterioribus, quasi manibus, sublatis aggrediuntur hostem. | 77. *camp. pat.*, caelum nubibus vacuum, ubi tamquam in campo patenti confligant. | 82. *Ipsi, reges*: et iunge *ipsi insignibus alis*, sc. instructi; *per medias acies*, sc. incedentes, ut A. 7, 543.: „caeli conversa *per auras* lunonem adfatur,” i. e. convertit se et per auras *evecta* l. adf.; Hom. Il. 5, 74 „ἀντιπρὸ δ' ἄν' ὀδόντας ὑπὸ γλῶσσαν τάμε χάλκος,” i. e. ἀντιπρὸ δ' ἡλθεῖν ἄν' ὀδόντας καὶ ὑπέρταμε γλ. et Il. 21, 69 sq. „ἐγγχείη δ' ἄρ' ὑπὲρ νώτου ἐν γαίῃ ἔστη”. cf. etiam A. 11, 781. 2, 471 „in lucem ... convolvit,” i. e. in lucem progressus c., 10, 637 „in faciem Aeneae ... ornat telis,” i. e. conformatam

- Ingentis animos angusto in pectore versant,  
 Usque adeo obnixi non cedere, dum gravis aut hos  
 85 Aut hos versa fuga victor dare terga subegit.  
 Hi motus animorum atque haec certamina tanta  
 Pulveris exigui iactu compressa quiescunt.  
 Verum ubi ductores acie revocaveris ambo,  
 Deterior qui visus, eum, ne prodigus obsit,  
 90 Dede Neci; melior vacua sine regnet in aula.  
 Alter erit maculis auro squalentibus ardens;  
 Nam duo sunt genera: hic melior, insignis et ore,  
 Et rutilis clarus squamis; ille horridus alter  
 Desidia latamque trahens inglorius alvum.  
 95 Ut binae regum facies, ita corpora plebis.  
 Namque aliae turpes horrent, ceu pulvere ab alto  
 Cum venit et sicco terram sput ore viator  
 Aridus; elucent aliae et fulgore coruscant,  
 Ardentes auro et paribus lita corpora guttis.  
 100 Haec potior suboles, hinc caeli tempore certo  
 Dulcia mella premes, nec tantum dulcia, quantum  
 Et liquida et durum Bacchi domitura saporem.  
 At cum incerta volant caeloque examina ludunt,  
 Contemnuntque favos et frigida tecta relinquunt,  
 105 Instabilis animos ludo prohibebis inani.  
 Nec magnus prohibere labor: tu regibus alas  
 Eripe; non illis quisquam cunctantibus altum  
 Ire iter aut castris audebit vellere signa.  
 Invitent croceis halantes floribus horti,  
 110 Et custos furum atque avium, cum falce saligna  
 Hellespontiaci servet tutela Priapi.  
 Ipse thymum pinosque ferens de montibus altis

in faciem; denique v. G. 2, 243 et A. 4, 517. | 84. cur non *has*, sc. *apes*? *hos*, quasi milites alterius exercitus, aut cives alterius populi; cf. vs. 107. — Ceterum v. 2, 441. | 88. *acie rev.*, verba a *re* incipientia saepe cum nudo Ablativo iunguntur, ut 1, 275. A. 1, 358. 679. 10, 473. | 91. *squalentibus*, v. A. 10, 314. | 92. v. E. 9, 66. | 94. *desidia* s. *negligentiae* tribuitur, quod alter horridus sit, i. e. incultus. | 96. *alto*, βαθεῖ. — Varro 3, 16, 20 „minus valentium apum signa, si sunt pilosae et horridae aut pulverulentae,” tamquam pulvere conspersae. | 99. v. E. 3, 106. | 100. c. *temp. c.*, vere et autumnus. | 101. *premes*, premendo eliquabis, cf. vs. 140. | 102. *liquida*, limpida. — *dur.* B. d. s., apta mulso, quod est vinum melle temperatum. | 103. *incerta*, non petentia certum locum, quo considant, ut arborem. | 104. *Cont. f.*, detrectant mellificium. — *frig. t.*, vel abscessu apum frigida facta, vel, ut ait Servius „inoperosa: contra vs. 169 *Fervet opus*.” | 105. Futurum saepe in praecipiendi locum habet, ut 3, 176. | 106. v. 3, 163. | 108. aut ad ludum, cf. vs. 103, aut ad bellum exire. | 109—115. Denique etiam horti cum deo suo tutelari Priapo apti sunt ad retinendas apes. Ut aves (vs. 14) ita fures metuendi apibus. | 111. Priapus Lampsaci, oppido ad Hellespontum sito, inprimis colebatur. | 112. *pinus* non solum inter hortenses arbores memoratur (E. 7, 65), sed nascebatur etiam in Caucaso, 2, 443, in monte

- Tecta serat late circum, cui talia curae;  
 Ipse labore manum duro terat, ipse feracis  
 115 Figat humo plantas et amicos inriget imbris.  
 Atque equidem, extremo ni iam sub fine laborum  
 Vela traham et terris festinem advertere proram,  
 Forsitan et, pinguis hortos quae cura colendi  
 Ornaret, canerem, biferique rosaria Paesti,  
 120 Quoque modo potis gauderent intiba rivis  
 Et virides apio ripae, tortusque per herbam  
 Cresceret in ventrem cucumis; nec sera comantem  
 Narcissum aut flexi tacuissem vimen acanthi  
 Pallentisque hederas et amantis litora myrtos.  
 125 Namque sub Oebaliae memini me turribus arcis,  
 Qua niger humectat flaventia culta Galaesus,  
 Corycium vidisse senem, cui pauca relict  
 Iugera ruris erant, nec fertilis illa iuvenis,  
 Nec pecōri opportuna seges, nec commoda Baccho.  
 130 Hic rarum tamen in dumis olus albaque circum  
 Lilia verbenasque premens vescumque papaver  
 Regum aequabat opes animis, seraque revertens  
 Nocte domum dapibus mensas onerabat inemptis.  
 Primus vere rosam atque autumnō carpere poma,  
 135 Et cum tristis hiemps etiamnum frigore saxa  
 Rumperet et glacie cursus frenaret aquarum,  
 Ille comam mollis iam tondebat hyacinthi,  
 Aestatem increpitans seram zephyrosque morantis.

Ida, A. 10, 230, et in ingis Italiae, A. 11, 134—36. Verum haec silvestris ut in hortensem transiret, fortasse cultura effectum est. | 113. *tecta*, apiarium. | 115. *inrig. imbr.*, plantis; cf. A. 1, 691 sq. | 116—148. Sed eum, quem attigit, locum de hortorum cura aliis persequendum relinquere se significat poeta. | 116 sqq. *ni iam traham .. festinem .... canerem*: Latini fere ita loquuntur „*ni traherem ... canerem*,” quod dicitur cum cogitatione talis oppositionis: „At facio illud, ergo non faciam hoc.” Contra *ni traham ... canerem* dicitur sine tali cogitatione: cf. Catull. 6, 1 sqq. Tibull. 1, 4, 63 sq. 8, 21 sq. Liv. 6, 40. | 117. *V. traham*, contraham, quod faciunt nautae, qui, portum intraturi, solis remis utuntur. | 119. *Paestum*, oppidum Lucaniae. | 122. *cuc.*, hoc nomine etiam melones comprehenduntur. — *sera c.*, sero, sed multo flore se induentem, cf. A. 12, 413 et v. 3, 149. | 124. v. E. 3, 39. | 125. *Oebalia ara*, Tarentum, colonia Lacedaemoniorum, a veteri rege Oebale Oebalium appellatum. | 127. *Corycium* oppidum Ciliciae; Cilices autem hortorum culturae peritissimi. — *relict*, propter sterilitatem neglecti nec in metatione agrorum intra limites recepti nullique domino assignati. | 128. *fert. iuv.* i. e. nec is erat ager, qui proferret ea, quae ut proveniant, per iuvenorum laborem efficitur; v. 2, 206. | 129. *seges*, proprie quidem de consito, hic omnino de quolibet agro aliquid (gramen) proferente. Sed pro *pecori* in Ribbeckiana editione est *Cereri*. | 130. *rarum*, quia natura soli non patiebatur densum seri. — *in dumis*, loco dumis saepto, v. E. 8, 37. | 131. *premens*, v. 2, 346. — *vescum*, vesca habens grana. | 132. animo successu operis elato aequabat suas opes regis. Alii *animo*. | 134. v. 1, 200. | 135. v. 3, 363. | 137. *comam*, folia cum ipso etiam flore. Videtur autem arte frigus a floribus arcuisse. — *tondebát*, v. E. 6, 53. | 138.

- Ergo apibus fetis idem atque examine multo  
 140 Primus abundare et spumantia cogere pressis  
 Mella favis; illi tiliae atque uberrima pinus;  
 Quotque in flore novo pomis se fertilis arbos  
 Induerat, totidem autumnu matura tenebat.  
 Ille etiam seras in versum distulit ulmos  
 145 Eduramque pirum et spinos iam pruna ferentis  
 Iamque ministrantem platanum potantibus umbras.  
 Verum haec ipse equidem spatiis exclusus iniquis  
 Praetereo atque aliis post me memoranda relinquo.

- Nunc age, naturas apibus quas Iuppiter ipse  
 150 Addidit, expediam, pro qua mercede, canoros  
 Curetum sonitus crepitantiaque aera secutae,  
 Dictae caeli Regem pavere sub antro.  
 Solae communis natos, consortia tecta  
 Urbis habent, magnisque agitant sub legibus aevum,  
 155 Et patriam solae et certos novere penatis;  
 Venturaeque hiemis memores aestate laborem  
 Experiuntur et in medium quaesita reponunt.  
 Namque aliae victu invigilant et foedere pacto  
 Exercentur agris; pars intra saepta domorum  
 160 Narcissi lacrimam et lentum de cortice gluten  
 Prima favis ponunt fundamina, deinde tenacis  
 Suspendunt ceras; aliae spem gentis adultos  
 Educunt fetus; aliae purissima mella  
 • Stipant et liquido distendunt nectare cellas.

*insep.*, en morae comice impatientem senem!| 139. apes fetae, i. e. partum enixae; *apibus fetis* igitur per consequens, ut loquuntur, idem, quod: proventus novarum apum. Videtur autem poeta h. l. eos secutus esse, qui apes a regina apum gigni affirmabant. | 140. v. vs. 101. | 144. *seras*, Servius „maiores,“ quas in aliud solum transferre serum esse videri posset aliis. — *in versum distulit*, certo ordine disposuit. | 145. *spinos*, videlicet quibus insitae erant pruni. | 147. cf. vs. 116 sq. | 149—227. *De ingenio, natura et moribus apum*. | 150. Expediam naturas, quas Iuppiter addidit apibus, mercedem illam quidem, pro qua pavere *col.* sive: mercedis loco ab Jove acceptas pro eo, quod pavere *col.* v. 3, 387. | 151. Curetes, sacerdotes Cybeles, in insula Creta custodiebant Iovem recens natum, cymbalisque et armorum collisorum strepitu efficiebant, ne eius vox a Crono, vitae eius insidiante, audiri posset; cf. Lucret. 2, 633 sqq. | 152. Dictae mons Cretae. | 154. *sub legibus*, cf. vs. 158 sqq. | 157. *in mod. rep.*, in commune conferunt ad futurum usum, cf. 1, 127. A. 11, 335. | 158. *victu*, v. E. 5, 29. — *foedere pacto*, munia inter se certis legibus partitae. | 160. *lacrimam*, humorem dulcem, quem imus florum calyx exsudat. — *gluten*, resinam *corticis* arborum fruticumve. — Ex utroque (narcissi lacrima et glutine de cortice) fit tenacissima illa cera, qua fundamina („favorum stabilimentum“ Plin. 11, 7, 6) firmanantur. Apes opus incipiunt a summo paulatimque deducunt ad inferiora; itaque ea fundamenta, quae ponunt apes, contraria sunt iis, quibus superstruuntur aedificia ab hominibus. Illis igitur quasi fundamentis adglutinantur cellae sive inde suspenduntur. | 162. *spem g.*,

- 165 Sunt, quibus ad portas cecidit custodia sorti,  
Inque vicem speculantur aquas et nubila caeli,  
Aut onera accipiunt venientum, aut agmine facto  
Ignavam fucos pecus a praeseptibus arcent.  
Fervet opus, redolentque thymo fragrantia mella;
- 170 Ac veluti lentis Cyclopes fulmina massis  
Cum properant, alii taurinis folliibus auras  
Accipiunt redduntque, alii stridentia tinguunt  
Aera lacu; gemit inpositis incudibus Aetna;  
Illi inter sese magna vi braccia tollunt
- 175 In numerum, versantque tenaci forcipe ferrum:  
Non aliter, si parva licet componere magnis,  
Cecropias innatus apes amor urguet habendi,  
Munere quamque suo. Grandaevus oppida curae,  
Et munire favos, et daedala fingere tecta.
- 180 At fessae multa referunt se nocte minores,  
Crura thymo plenae; pascuntur et arbuta passim  
Et glaucas salices casiamque crocumque rubentem  
Et pinguem tiliam et ferrugineos hyacinthos.
- (203) Saepe etiam duris errando in cotibus alas  
(204) Attrivere, ultroque animam sub fasce dedere:  
(205) Tantus amor florum et generandi gloria mellis.  
Omnibus una quies operum, labor omnibus unus:
- 185 Mane ruunt portis; nusquam mora; rursus easdem  
Vesper ubi e pastu tandem decedere campis  
Admonuit, tum tecta petunt, tum corpora curant;  
Fit sonitus, mussantque oras et limina circum.  
Post, ubi iam thalamis se composuere, siletur

v. E. 1, 15. | 165. *sorti*, antiquior forma Ablativi, ut *parti*, *luci*, *civi*. | 166. cf. vs. 191 sq. | 167. *onera* illa, quae significantur vs. 181 sqq. — *agm. f.*, v. A. 1, 82. | 168. Colum. 9, 15, 1 „ad procreationem subolis conferre aliquid hi fuci videntur, insidentes seminibus (ovis), quibus apes figurantur. Itaque ad fovendam et educandam novam prolem familiarius admittuntur. Exclusis deinde pullis extra tecta proturbantur, et, ut Virgilius ait, a praeseptibus arcentur.“ | 173. *lacus* vas aquae plenum, in quam fabri candens ferrum, ut duretur, immergunt. — *imposit.*, Vulcanus, cum ventum erat ad aes cudendum, *ἔθηκεν ἐν ἀμφοτέροις μέγαν ἀμφοῖα* Hom. II. 18, 476. | 175. *In n.*, v. E. 6, 27. | 176 sq. Eadem est industria apum. | 177. *Cecropias*, Atticas, cf. vs. 270. v. E. 1, 55. Cecrops rex Atheniensium. Hymettus autem, mons Atticae, apibus abundabat mel praestantissimum facientibus. | 179. *munire favos* quid sit, disces e vs. 35—41. — *daedala t.*, cellas scilicet omnes habentia pares, artificiose in figuram sexangulam formatas. | 180. *minores*, gerulae a Plinio appellatae 11, 10, 10. | 181. *Crura plenae*, v. E. 3, 106. — flores, qui hoc et proximis versibus memorantur, alii sunt verni, alii aestivi, alii autumnales. | 203—205. Multae apes ne redeunt quidem, sed, dum aberrantes per noctem a via alas atterunt inter cotes, fessae onere opprimuntur. — *ultro* de eo, quod est etiam amplius, cf. A. 9, 127. — olim legebantur hi versus post vs. 202. | 188. *orae* foramina ad exitum introitumque patentia, *limina* tabellae oris praefixae, quibus commodius iassistant. | 189. *componere se* dicitur, qui vel ad mensam accumbit cenaturus,

- 190 In noctem, fessosque sopor suus occupat artus.  
Nec vero a stabulis pluvia inpendente recedunt  
Longius, aut credunt caelo adventantibus Euris;  
Sed circum tutae sub moenibus urbis aquantur,  
Excursusque brevis temptant, et saepe lapillos,  
195 Ut cymbae instabiles fluctu iactante saburram,  
Tollunt, his sese per inania nubila librant.  
Illum adeo placuisse apibus mirabere morem,  
Quod neque concubitu indulgent, nec corpora segnes  
In Venerem solvunt, aut fetus nixibus edunt;  
200 Verum ipsae e foliis natos et suavis herbis  
201 Ore legunt, ipsae regem parvosque Quirites  
202 Sufficiunt, aulasque et cerea regna refingunt.  
206 Ergo ipsas quamvis angusti terminus aevi  
'Excipiat; neque enim plus septuma ducitur aestas;  
At genus immortale manet, multosque per annos  
Stat fortuna domus, et avi numerantur avorum.  
210 Praeterea regem non sic Aegyptos et ingens  
Lydia, nec populi Parthorum aut Medus Hydaspes  
Observant. Rege incolumi mens omnibus una est;  
Amisso rupere fidem, constructaque mella  
Diripuerunt ipsae et cratis solvere favorum.  
215 Ille operum custos, illum admirantur, et omnes  
Circumstant fremitu denso, stipantque frequentes,  
Et saepe attollunt humeris, et corpora bello  
Obiectant pulchramque petunt per volnera mortem.  
His quidam signis atque haec exempla secuti  
220 Esse apibus partem divinae mentis et haustus  
Aetherios dixere; deum namque ire per omnis  
Terrasque tractusque maris caelumque profundum;  
Hinc pecudes, armenta, viros, genus omne ferarum,

ut A. 1, 698., vel procubuit somno se daturus, v. A. 1, 374., quique id facit modo ad rem accommodato.] 190. *suus*, iis utpote multo labore fessis, debitus. Aliter Servius „*suus*, sibi aptus (*sibi congruus* idem ad A. 6, 641) quia altum dormiunt pro natura mellis, A. 6, 420.“] 196. *inane* dicitur, quidquid sine corpore esse videtur, ut aer, nubes, ventus, umbrae mortuorum.] 197. *III. adeo*, v. A. 4, 533.] 198. v. E. 5, 29. — Particulae *neque* ... *nec* non solum locum habent in disiunctione rerum, sed interdum etiam ponuntur, ubi idem sensus bis, sed leviter variatus, exprimitur, cf. A. 3, 585. — *segnes*, quia segnitie inde sequitur. — Non gigni, sed ex floribus legi novellas apes, multi veterum putabant.] 200 sq. *ipsas* ... *ipsae*, solae ac nullo utentes marito.] 201. v. 3, 236.] 202. Alii *refingunt*.] 203—5. versus non suo loco positi et post vs. 183 in hac editione reiecti.] 211. *Hydaspes*, fluvius Indiae, Medus propterea dictus, quod in Paropamisio, Medorum monte, oritur.] 213. *fid.*, qua obstrictae fuerant inter se.] 214. *crat. fav.*, „textum“ apud Plin. 11, 10, 10.] 215. Eurip. Med. 1144 „δέσποινα δ, ἦν νῦν ἀντὶ σοῦ θανάζομεν,“ praecipua reverentia colimus; sic sapientes ab omnibus, sophistae a discipulis suis, vates sacerdotesque clari a populo θανάζονται.] 218. *Obiectant* pro illo.] 222. v. E. 4,

- Quemque sibi tenuis nascentem arcessere vitas;  
 225 Scilicet huc reddi deinde ac resoluta referri  
 Omnia, nec morti esse locum, sed viva volare  
 Sideris in numerum atque alto succedere caelo.  
 Si quando sedem angustam servataque mella  
 Thesauris relines, prius haustu sparsus aquarum  
 230 Ora fove, fumosque manu praetende sequacis.  
 Bis gravidos cogunt fetus, duo tempora messis,  
 Taygete simul os terris ostendit honestum  
 Plias et Oceani spretos pede reppulit amnis,  
 Aut eadem sidus fugiens ubi Piscis aquosi  
 235 Tristior hibernas caelo descendit in undas.  
 Illis ira modum suprà est, laesaeque venenum  
 Morsibus inspirant, et spicula caeca relinquunt  
 Adfixae venis, animasque in volnere ponunt.  
 Sin duram metues hiemem parcesque futuro  
 240 Contunsosque animos et res miserabere fractas:  
 At suffire thymo cerasque recidere inanis  
 Quis dubitet? nam saepe favos ignotus adedit  
 Stelio et lucifugis congesta cubilia blattis  
 Immunisque sedens aliena ad pabula fucus;  
 245 Aut asper crabro inparibus se inmiscuit armis,

51. et 3, 60. tum A. 6, 726. | 224. *tenuis*, quippe tenue quiddam et aetherium est anima. | 227. *Sideris in numerum*, inter sidera; imitatus poeta videtur Lucetianum illud 1, 437 „*Corporis* augebit numerum.“ *Corpus* hic, ut apud Virgilium *Sidus*, est collectivum; cf. Ovid. Trist. 2, 567 „inter tot *scripti* millia nostri.“ Eurip. Beller. fragm. 25 „*λόγῃς ἀριθμῷ πλείονος κρατούμεναι*.“ Aesch. Pers. 386. Bl. „*τάξις δὲ τὰξιν παρεκάλει νεῶς μακρὰς*.“ | 228—250. *De mellatione*. Hos versus Tittlerus et, qui huic adstipulatur, O. Ribbeckius, ex parte etiam Duebnerus, sic ordinant: 228—30. 236—38. 231—35. 248—50. 239—47. | 228. Alii *angustam*. | 229 sq. fove os, i. e. cura, ut A. 12, 420., nempe purgando, spargens illud aquae haustu; ingratus, est enim oris foetor apibus, et cf. 2, 135. — *sequaces*, v. 3, 565. Fumo abiguntur apes, ut impune possis mel colligere. — *m. praet.*, protenta manu prae te fer. | 231. Bis fit quotannis mellatio. — *cogunt*, sc. mellarii, et v. vs. 101. et 140. adde 3, 312. — *fetus* omne genus proventus significat, h. l. mel; *triticeos fetus* Ovid. Fast. 1, 693. | 232 sq. i. e. sub ortum Pleiadum, quarum una Taygete; hae X. Kal. Maias oriuntur. — *simul*, v. E. 4, 26. | 234 sq. et sub occasum; occidunt Pleiades VI. Idus Novembr. Sidus Piscium, quod hiberno tempore totam per noctem conspicitur, ipsam hiemem pluviasque et tempestates hibernas significat. | 236—238. Videntur hi versus in alienam sedem traieci et post vs. 230. collocandi. — Ira apum in mellatione vehementissime exardescit. | 238. haerentes in ea, quam pupugerunt, partemoriuntur. | 239—247. Sin res apum vel aestatis iniquitate vel alio casu fracta alveusque ita inops erit, ut parcendum sit futuro, i. e. conditioni apum per hiemem futurae consulendum, et, quidquid fuerit mellis, intactum sit relinquendum: attamen suffiendo exigendi sunt vermes et insecta apibus infesta et inanes cellae recidendae, in quibus illa solent delitescere; et suffitio quidem prodest etiam valetudini apum. | 242. *ignotus adedit*, *ἔλαθε τρώγων*. | 243. *Stelio* hic bisyllabum, „colore steljonino“ Toront. v. A. 1, 2. — *cubilia* adederunt, i. e. blattae frequentes cubilia in unum locum conferentes. | 244. *immunis*, *ἀεργός*, Hesiod. *Ægy.* 304. |

- Aut dirum, tiniae, genus, aut invisa Minervae  
 Laxos in foribus suspendit aranea casset.  
 Quo magis exhaustae fuerint, hoc acrius omnes  
 Incumbent generis lapsi sarcire ruinas,  
 250 Conplebuntque foros et floribus horrea textent.  
 Si vero, quoniam casus apibus quoque nostros  
 Vita tulit, tristi languebunt corpora morbo —  
 Quod iam non dubiis poteris cognoscere signis:  
 Continuo est aegris alius color; horrida voltum  
 255 Deformat macies; tum corpora luce carentum  
 Exportant tectis et tristitia funera ducunt;  
 Aut illae pedibus connexae ad limina pendent,  
 Aut intus clausis cunctantur in aedibus, omnes  
 Ignavaeque fame et contracto frigore pigrae.  
 260 Tum sonus auditur gravior, tractimque susurrant,  
 Frigidus ut quondam silvis inmurmurat Auster;  
 Ut mare sollicitum stridit refluentibus undis;  
 Aestuatur ut clausis rapidus fornacibus ignis.  
 Hic iam galbaneos suadebo incendere odores,  
 265 Mellaque arundineis inferre canalibus, ultro  
 Hortantem et fessas ad pabula nota vocantem.  
 Proderit et tunsum gallae admiscere saporem  
 Arentisque rosas, aut igni pingua multo  
 Defruta, vel Psithia passos de vite racemos  
 270 Cecropiumque thymum et grave olentia centaurea.  
 Est etiam flos in pratis, cui nomen amello  
 Fecere agricolae, facilis quaerentibus herba;  
 Namque uno ingentem tollit de caespite silvam,  
 Aureus ipse, sed in foliis, quae plurima circum  
 275 Funduntur, violae sublucet purpura nigræ;  
 Saepe deum nexis ornatae torquibus arae;

246 sq. de Arachne a Minerva in araneam mutata cf. Ovid. M. 6, 1 sqq. | 248. Quo plus mellis ademeris apibus, eo acrius cet. | 249. *gen. lapsi*, gravi damno rerum suarum affecti. | 250. *foros*, non illos proprie dictos intelliges, per quos commeant apes, sed lacunas, quas in mellatione fecit apiarius excisa aliqua favi parte. — *floribus*, v. vs. 1. || 251—280. *De morbis apum eorumque cura*. — *Si ... languebunt*: aut ἀναχόλουθος est oratio, aut incipit apodosis a vs. 264. | 255, *luce c.*, Hom. Il. 18, 11. | 257. *ped. conn.*, ita, ut sui cuiusque apis pedes inter se sint nexi, quemadmodum in morientibus insectis videre licet. | 259. *contracto*, frigori tribuitur poetice, quod tribuendum erat apibus, frigore contractis. | 260. *tractim*, „sine intermissione, iugiter“ Servius. | 261. v. 3, 279. | 262. *re-fluentibus*, ad litus allisis et inde reiectis. | 263. *foenacem* calcariam hic dici puta, quae undique clausam flammam sic continebat, ut unus fumo relictus esset in summa parte exitus. Ceterum cf. Hom. Il. 14, 394 sqq. | 267. *tunsum sap.*, proprie *tunsae gallae*; v. E. 9, 46. | 269. *Psithia*, v. 2, 93. | 270. v. vs. 177. | 273. *caespes* h. l. est radix fibris inter se in caespitis modum implexa; Plinius de saluina N. H. 21, 7, 20 „radici numerosae cohaeret, densa veluti manu pressa breviterque caespes sui generis.“ | 274. *ipse*, v. 2, 297. | 276. *nexis*,



- Asper in ore sapor; tonsis in vallibus illum  
 Pastores et curva legunt prope flumina Mellae.  
 Huius odorato radices incoque Baccho  
 280 *Pabulaque in foribus plenis adpone canistris.*  
     Sed si quem proles subito defecerit omnis,  
     Nec, genus unde novae stirpis revocetur, habebit,  
     Tempus et Arcadii memoranda inventa magistri  
     Pandere quoque modo caesis iam saepe iuvencis  
 285 *Insincerus apes tulerit cruor. Altius omnem*  
     *Expediam prima repetens ab origine famam.*  
     Nam qua Pellaei gens fortunata Canopi  
     Accolit effuso stagnantem flumine Nilum  
     Et circum pictis vehitur sua rura phaselis,  
 290 *Quaque pharetratae vicinia Persidis urguet,*  
     *Et diversa ruens septem discurrit in ora*  
     *Usque coloratis amnis devexus ab Indis,*  
     *Et viridem Aegyptum nigra fecundat arena,*  
     *Omnis in hac certam regio iacit arte salutem.*  
 295 *Exiguus primum atque ipsos contractus in usus,*  
     *Eligitur locus; hunc angustique imbrice tecti*  
     *Parietibusque premunt artis, et quattuor addunt,*  
     *Quattuor a ventis, obliqua luce fenestras.*  
     Tum vitulus bima curvans iam cornua fronte  
 300 *Quaeritur; huic geminae nares et spiritus oris*  
     *Multa reluctanti obstruitur, plagisque perempto*  
     *Tunsa per integram solvuntur viscera pellem.*  
     Sic positum in clauso linquunt, et ramea costis  
     Subiiciunt fragmenta, thymum, casiasque recentis.

sc. ex hoc amello.] 277. *tonsis in v. amellus* autumnno floret; faenisicii tempore caules florem progignentes nondum in lucem e terra prodierunt.] 278. *Mella* fluvius Galliae Cisalpinæ ad Brixiam.]] 281—314. *De reparandis e corpore bovino apibus.*] 283. *Arcadii*; cf. vs. 317 et v. 1, 14.] 285. *Insincerus*, ex putredine corruptus.] 287—293. Designatur his versibus totum, quod appellatur, Delta Nili, ita quidem, ut vs. 287 declarentur fines eius occidentales (nam ostium Canopicum e septem Nili ostiis longissime vergit in occasum), vs. 290 fines orientales (nam Persidis nomine terrae veteribus parum cognitae Aegyptum ab ea parte attingentes a poeta comprehendendi videntur), denique vs. 291 fines australes.] 287. Canopus urbs Aegypti non longe ab Alexandria, quae, utpote regibus e Macedonia oriundis subiecta, Pellaea appellatur, a Pella, urbe Macedonum nobilissima.] 292. *Indis*, Aethiopibus, nam latius patet nomen Indorum, maxime apud poetas.] 293. *arena*, ut *ψάμμος*, „putris glæba“ 1, 44. „Nigra terra ... et cui putre solum“ 2, 203 sq.] 295. *contractus*, coartatus, igitur fere id, quod *exiguus*, sed ab hoc eo differens, quod *exiguus* quidem *posse* eum locum exiguum esse, *contractus* vero etiam *debere* esse exiguum significat.] 296. *imbr. tecti*, i. e. tecto ex imbricibus facto.] 297. *premunt*, coangustant.] 298. fenestrae ipsae sint obliquae, ut nec excludant lucem auramque, nec nimis multam intro admittant.] 301. Geopon. 15, 2 „ἀποπεργάζω πᾶς τοῦ βοῦς νόρος ὁ θόναϊς καθαγαῖς καὶ λεπταῖς, πλοσῇ κεχυρισμέναις.“] 302. *solvuntur*, liquescunt tundendo, ita tamen, ut pellis maneat integra, neve sanguis per eam

- 305 Hoc geritur Zephyris primum inpellentibus undas,  
Ante novis rubeant quam prata coloribus, ante  
Garrula quam tignis nidum suspendat hirundo.  
Interea teneris tepefactus in ossibus humor  
Aestuat, et visenda modis animalia miris,
- 310 Trunca pedum primo, nox et stridentia pennis,  
Miscentur, tenuemque magis magis aera carpunt,  
Donec, ut aestivis effusus nubibus imber,  
Eruptere, aut ut, nervo pulsante, sagittae,  
Prima leves ineunt si quando proelia Parthi.
- 315 Quis deus hanc, Musae, quis nobis extudit artem?  
Unde nova ingressus hominum experientia cepit?  
Pastor Aristaeus fugiens Peneia Tempe,  
Amisissis, ut fama, apibus morboque fameque,  
Tristis ad extremi sacrum caput adstitit amnis,
- 320 Multa querens, atque hac adfatus voce parentem:  
Mater, Cyrene mater, quae gurgitis huius  
Ima tenes, quid me praeclara stirpe deorum —  
Si modo, quem perhibes, pater est Thymbraeus Apollo —  
Invisum fatis genuisti? aut quo tibi nostri
- 325 Pulsus amor? quid me caelum sperare iubebas?  
En etiam hunc ipsum vitae mortalis honorem,  
Quem mihi vix frugum et pecudum custodia sollers  
Omnia temptanti extuderat, te matre, relinquo.  
Quin age et ipsa manu felicis erue silvas,
- 330 Fer stabulis inimicum ignem atque interfice messis,  
Ure sata, et duram in vitis molire bipennem,  
Tanta meae si te ceperunt taedia laudis.  
At mater sonitum thalamo sub fluminis alti  
Sensit. Eam circum Milesia vellera Nymphae
- 335 Carpebant, hyali saturo fucata colore,  
Drymoque, Xanthoque, Ligeaque, Phyllodoceque,

exeat. | 308. *in ossibus*: videtur poeta hoc significare: calorem concipi primum a medulla (v. 3, 272) inde per reliqua propagari. | 310. prorsus ut in omni alveari videre licet: a regina, ut hodie constat, ova pariuntur ac singula in singulis cellis deponuntur; inde excluduntur albi vermiculi pedibus et alis carentes; ex his demum fiunt apes. | 311. v. 3, 325. | 312—314. densum significatur examen his imaginibus. | 313. *Erupt.*, cf. vs. 298. || 315—558. *Auctor huius inventi Aristaeus.* | 316. *ingressus*, exordia. | 317. v. vs. 283. Tempe, τὰ Τέμνη, amoenissima vallis Thessaliae, quam permeabat flumen Penēus, Πηνειός. | 319. *caput amnis*, fontem Penei, v. vs. 368. | 321. *quae ... tenes*, ut Nympha et Penei vel filia vel neptis. | 323. *Thymbra* in Troade fano Apollinis nobilis. | 325. *caelum*, locum inter deos; cf. A. 12, 795. | 327. cf. 1, 14. | 328. *te matre*, cum te deam matrem habeam, quae prohibere hoc vel possis vel debeas. | 329. *fel. silvas*, arbusta feliciū sive fructiferarum arborum. | 330. v. 2, 441. | 331. *molire*, v. 1, 329. | 333—351. cf. Hom. II. 18, 35—51. | 334. v. 3, 306. Desideratur autem in hoc versu, ut in aliis quibusdam, iudicium Virgilii. | 335.

- Caesariem effusae nitidam per candida colla,  
 [Nesaeae, Spioque, Thaliaque, Cymodoceque,]  
 Cydippeque et flava Lycorias, altera virgo,  
 340 Altera tum primos Lucinae experta labores,  
 Clioque et Beroe soror, Oceanitides ambae,  
 Ambae auro, pictis incinctae pellibus ambae,  
 Atque Ephyre, atque Opis, et Asia Deiopea,  
 Et tandem positis velox Arethusa sagittis.  
 345 Inter quas curam Clymene narrabat inanem  
 Volcani, Martisque dolos et dulcia furta,  
 Aque Chao densos divom numerabat amores.  
 Carmine quo captae dum fuis molliora pensa  
 Devolvunt, iterum maternas inpulit auris  
 350 Luctus Aristaei, vitreisque sedilibus omnes  
 Obstipuerunt; sed ante alias Arethusa sorores  
 Prospiciens summa flavum caput extulit unda  
 Et procul: O gemitu non frustra exterrita tanto,  
 Cyrene soror, ipse tibi, tua maxuma cura,  
 355 Tristis Aristaeus Penei genitoris ad undam  
 Stat lacrimans, et te crudelem nomine dicit.  
 Huic percussa nova mentem formidine mater,  
 Duc, age, duc ad nos; fas illi limina divom  
 Tangere, ait. Simul alta iubet discedere late  
 360 Flumina, qua iuvenis gressus inferret. At illum  
 Curvata in montis speciem circumstetit unda  
 Accepitque sinu vasto misitque sub amnem.  
 Iamque domum mirans genetricis et humida regna,  
 Speluncisque lacus clausos, lucosque sonantis,  
 365 Ibat, et ingenti motu stupefactus aquarum  
 Omnia sub magna labentia flumina terra

*hyali s. f. c.*, i. e. satis largo hyali colore tinota. | 337. *Caesariem effusae*, v. E. 3, 106. | 340. *Luc.*, v. 3, 60. | 342. *ambae pictis*, i. e. variis pellibus (ut venatrices, cf. vs. 344.; nam etiam ex Oceaninis Diana legit Nymphas venatrices, ut refert Callimachus Hymn. in Dian. 42.) alte cinctae, cf. A. 1, 320, zonamque auratam habentes. | 343. v. E. 2, 24. — *Asia*, v. G. 1, 383. | 344. *tandem*, venando fessa. | 345 sq. cf. Hom. Od. 8, 266 sqq. cura Vulcani cernitur in inveniendis conficiendisque artificiosis vinculis, quibus irretitum cum Venere Martem constringeret; ea cura dicitur inanis, utpote nihil profutura, cum Venus ea sit pulchritudine, ut ne tanto quidem decore deterreri posse videantur, qui amplexus eius petant, cf. Hom. I. 1. 339—42. Lucian. D. D. 17, 2 „ἐγὼ μὲν τοι (ait Mercurius) ἐφθόγουν τῷ Ἀρεϊ, μὴ μόνον φιλήσαντι τὴν καλλίστην θεῖαν, ἀλλὰ καὶ δεδεμένῳ μετ’ αὐτῆς.“ — *dolos*, quos ille struebat absentiae Vulcani. — *furta*, v. A. 6, 568. | 347. *A Chao*, a primis rerum temporibus. | 350. diis maris, fluviorum, fontium tribuitur suppellex e vitro, crystallo, succino, conchis, coraliis. | 354. v. E. 8, 6. | 355. *Penei* vel ex breviato Πηνεός, ut Ἀλφειός pro Ἀλφειός, vel ea synizesi contractum, qua vocativi Pompei et Vullei ap. Horat. C. 2, 6, 5. Ep. 1, 7, 29. | 356. te nomine tuo appellans vocat crudelem. | 357. v. E. 3, 106. | 361. cf. Hom. Od. 11, 243. | 362. *sinu*, caverna in sinus speciem facta. | 364. *lucos*,

- Spectabat diversa locis, Phasimque, Lycumque,  
 Et caput, unde altus primum se erumpit Enipeus,  
 Unde pater Tiberinus, et unde Aniena fluenta,  
 370 Saxosusque sonans Hypanis, Mysusque Caicus,  
 Et gemina auratus taurino cornua voltu  
 Eridanus, quo non alius per pingua culta  
 In mare purpureum violentior effluit amnis.  
 Postquam est in thalami pendentia pumice tecta  
 375 Perventum et nati fletus cognovit inanis  
 Cyrene, manibus liquidos dant ordine fontis  
 Germanae, tonsisque ferunt mantelia villis;  
 Pars epulis onerant mensas et plena reponunt  
 Pocula; Panchaeis adulescunt ignibus arae;  
 380 Et mater, Cape Maeonii carchesia Bacchi:  
 Oceano libemus, ait. Simul ipsa precatur  
 Oceanumque patrem rerum Nymphasque sorores,  
 Centum quae silvas, centum quae flumina servant.  
 Ter liquido ardentem perfudit nectare Vestam,  
 385 Ter flamma ad summum tecti subiecta reluxit.  
 Omine quo firmans animum sic incipit ipsa:  
 Est in Carpathio Neptuni gurgite vates,  
 Caeruleus Proteus, magnum qui piscibus aequor  
 Et iuncto bipedum curru metitur equorum.

similiter ut apud inferos, vs. 468. | 367. Phasis Colchidis, Lycus Ponti, Enipens Thessaliae, Hypanis Sarmatiae fluvius. | 370. alii *Saxorum*; v. 1, 163. et A. 2, 53. — Littera *s* crebro repetita imitatur strepitum stridentium undarum, ut A. 5, 866. | 371. v. E. 3, 106. Diis, qui praesidebant fluminibus, vel capita vel cornua taurina tribuebantur, cf. A. 8, 77, quo robur ac violentia fluminum indicari videtur, cf. vs. 373; veteres quidam interpretes vel murmur undarum, simile mugitui boum, vel flexus fluminum ea re significari putant. — *auratus*: pertinet hoc ad ramenta auri in Eridano (Pado) reperta, Plin. N. H. 33, 4, 21. | 372. v. 1, 482. | 373. *purp.*, quia fluctus maris illius, quod vulgo appellant mediterraneum, colorem purpurae similem referunt. | 374. *th. pend. pum. t.*, i. e. tecta thalami pumice pendenti concamerata. | 375. alii *gnati*. — *fletus inanes*, dolorem, cui facilis et parata medicina esset. | 376. cf. Hom. Odyss. 1, 145 sq. Cic. de Orat. 2, 60 „manus lava et cena.“ | 377. mantelia lintea, quibus manus tergerentur; ipsa autem lintea apud veteres erant villosa, quare, ut levia fierent, tondendi erant villi. | 378. *reponunt pocula*: sublata prima mensa appositaeque altera sive secunda, aliis etiam poculis appositis, i. e. poculis repositis, cf. A. 8, 175 et 279, libationes fiebant. | 379. v. 2, 139. | 380. *Maeonii*, Lydii; et v. 2, 98. | 381. v. E. 6, 26. | 382. Hom. Il. 14, 246 „Ὠκεανοῦ, ὅσπερ γένεος πάντεσσι τέτυκται.“ | 383. servare dicuntur sedem, qui nunquam aut raro inde discedunt. | 384. *Vestam*, ignem in foco incensum; v. 1, 295. | 385. *ad s. t. subiecta*, usque ad tectum emicans, v. E. 10, 74 et 8, 104. | 386. Postquam dii adnuerunt, sic fatur ipsa. | 387 sqq. cf. Hom. Odyss. 4, 384—470. — Mare Carpathium dictum a Carpatho, insula inter Cretam Rhodumque sita. | 388 sqq. Per pisces equosque unum hic animalium genus significatur, hippocampus. Servius „equi marini prima parte equi sunt, postrema resolvuntur in pisces.“ — *piscibus et curru equorum iuncto* poetice pro curru piscibus equisque iuncto. |

- 390 Hic nunc Emathiae portus patriamque revisit  
 Pallenen; hunc et Nymphae veneramur et ipse  
 Grandaevus Nereus; novit namque omnia vates,  
 Quae sint, quae fuerint, quae mox ventura trahantur;  
 Quippe ita Neptuno visum est, inmania cuius  
 395 Armenta et turpis pascit sub gurgite phocas.  
 Hic tibi, nate, prius vinclis capiendus, ut omnem  
 Expediat morbi caussam, eventusque secundet.  
 Nam sine vi non ulla dabit praecepta, neque illum  
 Orando flectes; vim duram et vincula capto  
 400 Tende; doli circum haec demum frangentur inanes.  
 Ipsa ego te, medios cum sol accenderit aestus,  
 Cum sitiunt herbae, et pecori iam gratior umbra est,  
 In secreta senis ducam, quo fessus ab undis  
 Se recipit, facile ut somno adgrediare iacentem.  
 405 Verum ubi correptum manibus vinclisque tenebis,  
 Tum variae eludent species atque ora ferarum.  
 Fiet enim subito sus horridus, atraque tigris,  
 Squamosusque draco, et fulva cervice leaena;  
 Aut acrem flammae sonitum dabit, atque ita vinclis  
 410 Excidet, aut in aquas tenuis dilapsus abibit.  
 Sed quanto ille magis formas se vertet in omnis,  
 Tanto, nate, magis contende tenacia vincla,  
 Donec talis erit mutato corpore, qualem  
 Videris, incepto tegeret cum lumina somno.
- 415 Haec ait, et liquidum ambrosiae diffundit odorem,  
 Quo totum nati corpus perduxit; at illi  
 Dulcis compositis spiravit crinibus aura,  
 Atque habilis membris venit vigor. Est specus ingens  
 Exesi latere in montis, quo plurima vento  
 420 Cogitur inque sinus scindit sese unda reductos,  
 Deprensus olim statio tutissima nautis;  
 Intus se vasti Proteus tegit obice saxi.

390. v. 1, 490. Pallene peninsula Macedoniae. | 392. Nereus unus ex antiquissimis diis, Ponti filius natu maximus, vates veracissimus; Hes. Th. 233 sqq. | 393. *Quae sint, novit*, etc. eadem orationis forma reddit A. 11, 256 sq. | 395. *turpes*, vel quod taeterrimi sunt odoris, vel quod contra aliorum piscium naturam pilosae. | 397. *event. sec.*, faciat, ut prospero utare eventu. | 400. *vincula tendere alicui est iniicere v.*, cf. A. 2, 236.; *vim tendere alicui est vim adhibere*. — *circum haec*, i. e. cum haec facies, cum vim adhibebis et vincula; Pindarus Pyth. 1, 22 „θέλει (ἡ λύρα) φρένας ἀμφὶ τε Αἰολίδα σοφίᾳ βαθυκόλπον τε Μοισᾶν“, i. e. cum Apollinis Musarumque carmina audiuntur. | 407. *atra*, v. 1, 129. | 408. *fulva cervice* (i. e. iubatā) *leaena?* | 415. *diffundit* per membra filii. | 416. *perduxit*, perunxit, cur? cf. vs. 418. | 417. v. 3, 251. | 420. v. A. 1, 161. | 421. *Deprensus* tempestate, Horat. Od. 2, 16, 2. — *olim iunge cum deprensus*: tum, cum deprensi sunt, uti solet accidere nautis, v. A. 5,

- Hic iuvenem in latebris aversum a lumine Nympha  
Collocat; ipsa procul nebulis obscura resistit.
- 425 Iam rapidus torrens sitientis Sirius Indos  
Ardebat caelo, et medium Sol igneus orbem  
Hauserat; arebant herbae, et cava flumina siccis  
Faucibus ad limum radii tepefacta coquebant:  
Cum Proteus consueta petens e fluctibus antra
- 430 Ibat; eum vasti circum gens humida ponti  
Exsultans rorem late dispergit amarum.  
Sternunt se somno diversae in litore phocae;  
Ipse, velut stabuli custos in montibus olim,  
Vesper ubi e pastu vitulos ad tecta reducit,
- 435 Auditisque lupos acuunt balatibus agni,  
Considit scopulo medius numerumque recenset.  
Cuius Aristaeo quoniam est oblata facultas,  
Vix defessa senem passus componere membra,  
Cum clamore ruit magno, manicisque iacentem
- 440 Occupat. Ille suae contra non inmemor artis  
Omnia transformat sese in miracula rerum,  
Ignemque, horribilemque feram, fluviumque liquentem.  
Verum ubi nulla fugam reperit fallacia, victus  
In sese redit, atque hominis tandem ore locutus:
- 445 Nam quis te, iuvenum confidentissime, nostras  
Iussit adire domos? quidve hinc petis? inquit. At ille:  
Scis, Proteu, scis ipse; neque est te fallere quicquam;  
Sed tu desine velle. Deum praecepta secuti  
Venimus hinc lapsis quaesitum oracula rebus.
- 450 Tantum effatus. Ad haec vates vi denique multa  
Ardentis oculos intorsit lumine glauco,  
Et graviter frendens sic fatis ora resolvit:  
Non te nullius exercent numinis irae;  
Magna luis commissa: tibi has miserabilis Orpheus
- 455 Haud quamquam ob meritum poenas, ni Fata resistant,

125. | 423. *aversum a. l.*, ergo loco tenebricoso. | 424. *neb. obscura*, utpote circumfusa nebulis. | 427. Ut de tempore (inter graves labores) confecto dicitur *exhausta nocte* Tac. Hist. 4, 29, sic de via Stat. Theb. 1, 369 „vastum haurit iter;“ medium sol hauserat orbem, i. e. confecerat medium (dimidium) cursum per orbem caelestem. | 428. *Faucibus*, ostiis; *ad limum*, ergo usque ad fundum, tepefacta. | 432. *somno*, tertius casus, ad somnum capiendum. — *diversus* modo i. q. diversis locis, ut hic, modo in loca diversa, ut A. 1, 70. | 433. *olim*, v. A. 5, 125. | 443. alii *pellacia*. | 445. *Nam quis*, i. e. Quisnam, ut A. 2, 373. | 446. *hinc*, i. e. a me, ut Terent. Ad. 3, 3, 7. | 447. *neque est cet.*, i. e. nec fieri potest, ut quicquam te fallat s. praetereat lateatque; Cic. de Orat. 1, 60 „Neque enim hoc te fallit, quam multa sint dicendi genera.“ | 448. *velle*, sc. me fallere. — *deum*, quorum? v. A. 6, 322. | 452. *fatis*, ad edenda fata, v. vs. 432. | 453. cf. vs. 532—534. — *nullius*, cf. A. 1, 668. 5, 853. 9, 610. — *non nullius*, i. e. gravis admodum numinis; cuius? docebit vs. 460 et 532—34. | 455. iunge: *Haud q. ob merit. miserabilis*. — *et perget sus-*

- Suscitat, et rapta graviter pro coniuge saevit.  
 Illa quidem, dum te fugeret per flumina praeceps,  
 Inmanem ante pedes hydram moritura puella  
 Servantem ripas alta non vidit in herba.
- 460 At chorus aequalis Dryadum clamore supremos  
 Implent montis; flerunt Rhodopeiae arces,  
 Altaque Pangaea, et Rhesi Mavortia tellus,  
 Atque Getae, atque Hebrus, et Actias Orithyia.  
 Ipse, cava solans aegrum testudine amorem,
- 465 Te, dulcis coniunx, te solo in litore secum,  
 Te veniente die, te decedente canebat.  
 Taenarias etiam fauces, alta ostia Ditis,  
 Et caligantem nigra formidine lucum  
 Ingressus Manisque adiit Regemque tremendum,
- 470 Nesciaque humanis precibus mansuescere corda.  
 At cantu commotae Erebi de sedibus imis  
 Umbrae ibant tenues simulacraque luce carentum,  
 Quam multa in foliis avium se milia condunt,  
 Vesper ubi aut hibernus agit de montibus imber,
- 475 Matres atque viri, defunctaque corpora vita  
 Magnanimum heroum, pueri innuptaeque puellae,  
 Inpositique rogis iuvenes ante ora parentum;  
 Quos circum limus niger et deformis arundo  
 Cocyti tardaque palus inamabilis unda
- 480 Alligat et noviens Styx. interfusa coerces.  
 Quin ipsae stupuere domus atque intima Leti  
 Tartara caeruleosque inplexae crinibus anguis  
 Eumenides, tenuitque inhians tria Cerberus ora,  
 Atque Ixionii vento rota constitit orbis.

*citare, ni F.r.* | 456. *rapta*, abrepta, mortua, cf. vs. 504. | 457. *illa ... puella*, Graeco, maxime Homericò, more, ut Il. 1, 488 „*Αὐτὰρ ὁ μῆνι νηυσὶ παρή-  
 μενος ὠκυπόροισιν ... Ἀχιλλεύς.*“ Soph. Ai. 780 sqq. „*ὁ δ' εὐθύς ἐξ ἔδρας  
 πέμπει με ... Τεύκρος.*“ Herod. 9, 55 „*ὁ δὲ ... Πανσάντης.*“ cf. A. 5,  
 609 sq. 12, 901 sq. | 457. *per fl.*, per ripas, Hebri puta, cf. vs. 463. | 458. v.  
 E. 6, 47. | 461. *Rhod.* v. E. 6, 30. — *arces*, v. 2, 535. — de hiatu v. E. 3,  
 79. | 462. *Παγγαῖον*, Pangaeus, mons Thraciae finitimus Macedoniae. — *Rhesus*, rex  
 Thraciae, qui Troianis adversus Graecos opem tulit; cf. A. 1, 471 sqq. — *Mav.*,  
 v. A. 3, 13. | 463. *Getae*, v. 3, 462. et E. 10, 13. — *Hebrus*, v. E. 10, 65.  
 — *Orithyia*, Erechthei, Athenarum regis, filia, rapta a Borea et in Thraciam ab-  
 ducta; *Actias*, i. e. Atheniensis; Attica enim olim *Ἀκτὴ* dicta. | 465. v. 1, 389. |  
 467. Per specum Taenarium, a Taenaro, promontorio Laconicae, dictum, aditus  
 ad inferos patere existimabatur. | 468. *nigra f.*, tenebris formidolosis. | 472.  
*ibant* imperfectum ostendit longo agmine ab omniq. parte, etiam remotissima,  
 alias post alias adfluentes; quae res non est uicini momenti; contra Perfectis  
 utitur poeta vs. 481—484, ubi, quid omnino factum sit, refert, non, quamdiu tenuerit. |  
 474. v. 1, 375. | 475. cf. vs. 255. | 480. *quos ... adligat*, cohibet, nec patitur  
 abire ex Orco. | 481. *int. L. T.*, loca Tartari interiora, ubi Letum habitat, quod  
 A. 6, 277 in primo Orci aditu sedem habere dicitur; nempe in eiusmodi rebus  
 liberius versantur poetae. | 482. *inplexae angues*, v. E. 3, 106. | 484. v. 3,

- 485 Iamque pedem referens casus evaserat omnis,  
 Redditaque Eurydice superas veniebat ad auras,  
 Pone sequens, — namque hanc dederat Proserpina legem —  
 Cum subita incautum dementia cepit amantem,  
 Ignoscenda quidem, scirent si ignoscere Manes:  
 490 Restitit, Eurydicenque suam, iam luce sub ipsa,  
 Inmemor, heu! victusque animi respexit. Ibi omnis  
 Effusus labor, atque inmitis rupta tyranni  
 Foedera, terque fragor stagnis auditus Avernis.  
 Illa, Quis et me, inquit, miseram, et te perdidit, Orphen,  
 495 Quis tantus furor? En iterum crudelia retro  
 Fata vocant, conditque natantia lumina somnus.  
 Iamque vale: feror ingenti circumdata nocte  
 Invalidasque tibi tendens, heu non tua, palmas!  
 Dixit, et ex oculis subito, ceu fumus in auras  
 500 Commixtus tenuis, fugit diversa, neque illum,  
 Prensantem nequiquam umbras et multa volentem  
 Dicere, praeterea vidit; nec portitor Orci  
 Amplius obiectam passus transire paludem.  
 Quid faceret? quo se rapta bis coniuge ferret?  
 505 Quo fletu Manis, qua Numina voce moveret?  
 Illa quidem Stygia nabat iam frigida cymba.  
 Septem illum totos perhibent ex ordine menses  
 Rupe sub aerea deserti ad Strymonis undam  
 Flevisse et gelidis haec evolvisse sub antris,  
 510 Mulcentem tigris et agentem carmine quercus;  
 Qualis populea maerens philomela sub umbra  
 Amissos queritur fetus, quos durus arator

38. — *vento*, cessante, qui hunc orbem circumagebat, vento, sopito illo per dulcedinem cantus; Hor. C. 1, 12, 10 „Orphea ... rapidos morantem Fluminum lapsus celeresque ventos;“ v. E. 2, 26. — *rota*, rotatio. | 487. *hanc legem*, cf. Ovid. Met. 10, 48—51. | 491. *victus animi*, qui est victi (hic quidem desiderio) animi; ita *praestans* vel *egregius animi*, qui est praestantis, egregii animi, A. 11, 417. 12, 19. adde G. 3, 289; similiter Plato „τέλειος τῆς ἀρετῆς.“ Sil. 17, 414 „Fervidus ingenii Masinissa et fervidus aevi,“ et A. 2, 638 *integer aevi sanguis*, sanguis aevi integri, s. qualis integro aevo, nondum affecta aetate, esse solet. | 492. *Effusus*, irritus factus; Grat. 233 „neve ... primos nequiquam effunderet actus.“ | 493. *Foedera*, lex, condicio a Plutone imposita. — *fragor*, nuntians iram dei. | 496. *natantia lumina*, incerto motu fluctuantia, ut moribundae. | 500. v. vs. 432. | 502 sq. *nec portitor O.* (A. 6, 298 sq.) *amplius* (praeterea, ἔτι) *passus est eum transire.* | 505 sq. Nullus restabat fletus, quo Manes, nullae preces, quibus alia, quaequae demum essent, numina moveret, quoniam illa iam Stygem trans mittebat. Servius „Dicitur bis eandem umbram evocari non licere.“ | 509. *haec*, casus suos. | 510. Nullae in Thracia tigres. Sed audaces in eiusmodi rebus inveniendis sunt artifices. Vidit igitur poeta fortasse in anaglyphis vel gemmis tigres, saevissimas bestiarum, auscultantes Orpheo, nisi forte, qui sciret in Macedonia Xerxis Herodotique aetate leones fuisse (Herod. 7, 115 sq.), haud dubitaverit etiam tigres illis regionibus adscribere; et leones et pardales et pantheras in Pangaeo Cithrae montibus inveniri scribit Xenoph. de Venat. c. 14. |



- Observans nido inplumis detraxit; at illa  
 Flet noctem, ramoque sedens miserabile carmen  
 515 Integrat, et maestis late loca questibus inplet.  
 Nulla Venus, non ulli animum flexere hymenaei.  
 Solus Hyperboreas glacies Tanaimque nivalem  
 Arvaque Rhipaeis numquam viduata pruinis  
 Lustrabat, raptam Eurydicen atque inrita Ditis  
 520 Dona querens; spretae Ciconum quo munere matres  
 Inter sacra deum nocturnique orgia Bacchi  
 Discerptum latos iuvenem sparsere per agros.  
 Tum quoque marmorea caput a cervice revulsum  
 Gurgite cum medio portans Oeagrius Hebrus  
 525 Volvèret, Eurydicen vox ipsa et frigida lingua,  
 Ah miseram Eurydicen! anima fugiente vocabat;  
 Eurydicen toto referebant flumine ripae.  
 Haec Proteus, et se iactu dedit aequor in altum,  
 Quaque dedit, spumantem undam sub vertice torsit.  
 530 At non Cyrene; namque ultro adfata timentem:  
 Nate, licet tristis animo deponere curas.  
 Haec omnis morbi caussa; hinc miserabile Nymphae,  
 Cum quibus illa choros lucis agitabat in altis,  
 Exitium misere apibus. Tu munera supplex  
 535 Tende petens pacem et facilis venerare Napaeas;  
 Namque dabunt veniam votis irasque remittent.  
 Sed modus orandi qui sit, prius ordine dicam.  
 Quattuor eximios praestanti corpore tauros,  
 Qui tibi nunc viridis depascunt summa Lycaei,  
 540 Delige, et intacta totidem cervice iuencas.  
 Quattuor his aras alta ad delubra dearum  
 Constitue, et sacrum iugulis demitte cruorem,  
 Corporaque ipsa boum frondoso desere luco.  
 Post, ubi nona suos Aurora ostenderit ortus,  
 545 Inferias Orphei Lethaea papavera mittes,

517. *Tanais* (Don) fluvius Scythiae. | 518. *Rhip.* v. 1, 240. | 520. *Cicones*, populus Thraciae ad ostia Hebri. — *quo munere spretae*: munus h. l. significat honorem mortuae Eurydicae ab Orpheo tributum, cf. A. 4, 624. 6, 886. 11, 26. et v. G. 3, 391.; illud autem munus cernebatur in impatienti coniugis amissae desiderio; eadem re effectum est, ut Orpheus, abhorrens a novo matrimonio, sperneret matronas Ciconum, popularium suorum. | 521. *nocturni*, quia orgia (ab ipso Orpheo instituta) noctu celebrabantur. | 524. *Oeagrius*, ab Oeagro, rege Thraciae, Orphei patre, dictus. | 525 sqq. *Eurydicen* ... *Euryd.*, v. A. 3, 523. | 529 *und. s. v. torsit*, dum submergitur, verticem effecit undam in orbem circumagendo. | 530. *At non Cyrene* deseruit Aristaeum, ut Proteus modo, consilii inopem destituit; et cf. vs. 424; praeterea v. 3, 349. | 535. *Tende*, protende, offer; cf. A. 2, 674. — *faciles*, placabiles. | 537. *ordine* dicit, qui singula ita exponit, ut ipse rerum ordo postulat. 539. *Lyc.*, v. E. 10, 15. G. 1, 14. 4, 283. | 540. *intacta iugo*. | 541. *alta*, quia gradibus ascendebatur ad templa; cf. A. 1, 448. | 542. *demitte* in aras. | 543. v. 2. 297. | 545. *Leth.* cf. 1, 78.

Et nigram mactabis ovem, lucumque revises;  
Placatam Eurydicen vitula venerabere caesa.

- Haud mora; continuo matris praecepta facessit;  
Ad delubra venit, monstratas excitat aras,  
550 Quattuor eximios praestanti corpore tauros  
Ducit et intacta totidem cervice iuvencae.  
Post, ubi nona suos Aurora induxerat ortus,  
Inferias Orphei mittit, lucumque revisit.  
Hic vero subitum ac dictu mirabile monstrum  
555 Aspiciunt, liquefacta boum per viscera toto  
Stridere apes utero et ruptis effervere costis,  
Inmensasque trahi nubes, iamque arbore summa  
Confluere et lentis uvam demittere ramis.

- Haec super arborum cultu pecorumque canebam  
560 Et super arboribus, Caesar dum magnus ad altum  
Fulminat Euphraten bello, victorque volentis  
Per populos dat iura, viamque adfectat Olympo.  
Illo Vergilium me tempore dulcis alebat  
Parthenope, studiis florentem ignobilis oti,  
565 Carmina qui lusi pastorum, audaxque iuventa,  
Tityre, te patulae cecini sub tegmine fagi.

— *papav.*, ut oblivio doloris capiat. Orpheum. Servius ad G. 1, 78 „Ceres (rapta a Plutone Proserpina) dicitur cibo papaveris orbitatis oblita.“ | 546<sup>sq.</sup> Leguntur hi versus in multis exemplaribus inverso ordine. — *Orphei*, ut *Mnesthei* A. 5, 184. | 547. Eurydicen (unam e Napaeis) placatam iam ante cum ceteris Napaeis vs. 535 praeterea vitula caesa venerabere. | 555. *Adspiciunt*, Aristaeus cum comitibus, ministris. | 556. v. 1, 456. — Infinitivi per appositionem adiecti sunt substantivo *monstrum*; Plat. Phaed. 146 extr. „δοκεῖ βέλτιον ... καὶ μὴ πράγματα ταῖς γυναῖξι παρέχειν νεκρὸν λούειν.“ | 557. cf. vs. 60. | 558. *uvam demittere*, in uvae speciem pendere; cf. Hom. II. 2, 89. | 560 sq. Significatur annus 724, quo Octavianus, ut refert Cassius Dio 51, 8, per Syriam in Asiam provinciam profectus hiberna ibi egit simulque et subditorum omnia negotia et Parthica composuit. Rem haud ita magnam magnifice auxit poeta, cui licentius fingendi potestas erat in rebus, quae quales quantaque essent, eo, quo haec scribebat, tempore sciri nondum poterat. — Euphrates illa aetate Syriam a regno Parthorum dividebat. — *victor.. volentes*, Servius „vincere virtutis est, iustitiae vero, non invitis, sed volentibus imperare.“ | 562. *Per p. d. iura*, leges imponit populis. — *Olympo*, v. vs. 325; Dativus motum indicans, ut A. 9, 712. | 563. *Vergilium*, haec antiqua est et vera huius nominis forma. | 564. Neapolis in Campania, ante ex cognomine Sirene ibi sepulta, ut fertur, Parthenope appellata. — *studiis florent.* illustrantur haec verbis Ovidii Tr. 4, 8, 7 sq. „Quaeque meae semper placuerunt otia menti, Carpere (debebam) et in studiis mollior esse meis.“ — *ignobilis*, cf. 2, 486. En ingenium poetae, de rebus Caesaris tam ample quam de suis modeste loquentis! | 565. *ludere* poetae dicuntur, qui in tenui argumento versantur, cf. E. 1, 10, et v. E. 6, 1. | 566. cf. E. 1, 1.

P. VIRGILI MARONIS  
AENEIDOS  
LIBER PRIMUS.

(*Aeneas relictâ Sicilia vi ventôrum ad litus Africae delatus Karthaginem venit ad Didonem ab eaque excipitur hospitio.*)

*Ille ego, qui quondam gracili modulatus avena  
Carmen, et, egressus silvis, vicina coegi  
Ut quamvis avido parerent arva colono,  
Gratum opus agricolis, at nunc horrentia Martis*

Arma virumque cano, Troiae qui primus ab oris  
Italiam fato profugus Laviniaque venit

**Aeneid. L. I. Prooemium.** *Ille ego:* Significat Virgilius, si is auctor est huius Prooemii, a bucolico et georgico carmine ad heroicum se procedere. — *qui modulatus sum et coegi arva vicina, ut parerent.* — *egr. silvis,* v. E. 1, 2. — *vicina silvis.* — *Ut q. a. p. a. col.,* ut responderet copia frugum votis agricolae messem vel uberrimam (quamvis uberem) optantis, v. G. 1, 47. 99 et cf. Ovid. Fast. 1, 677 sq. — *at n., at transitum a re levi ac tenui ad maiora et graviora, immo contraria, hic indicat.* — *horrentia arma* opponuntur a poeta nitido arborum cultui, qui cum grato adspectu delectet animum, arma eundem horrore afficiunt. || *Expositio propositi* vs. 1—7. — Fato ac voluntate deorum factum est, ut Aeneas domo profugus novam sedem in Italia conderet. Infensa Troianis Iuno cum convellere decreta fati nequeat, retardare saltem eventus rerum omni ope nititur. Itaque diu arcet Aeneam ab accessu fatalis terrae, et cum ille post multos errores classem eo appulisset, eiusdem opera implicatur gravissimo bello, quo profligato victoque adversario atrocissimo, Turno, rege Ardeae, tandem potitur votis. Conditur post hanc victoriam, in qua Aeneis ipsa finem capit, Lavinium Troianique cum populo regis Latini ita consociantur, ut Latinorum nomen utrosque complectatur, maneat etiam sermo moresque Latinorum, 12, 834 sqq., Latini autem sacra deosque Troianorum accipiant, 12, 192. Aliquot annis post filius Aeneae condidit Albam Longam, quae parens facta est illius inclitae Romae. | 1. Non sunt haec *arma virumque* ita discernenda inter se, ut duo diversa significari statuas: *arma cano* et *virum cano*; sed *arma virumque* ita in unum coalescunt, ut hominis bello clari notio efficiatur; cf. Ovid. Trist. 2, 533 „Ille tuae felix Aeneidos auctor Contulit in Tyrios arma virumque toros.“ infra 11, 747 „Arma virumque ferens,“ Venulum armatum. — *primus,* nam Patavium, quod Antenor ante adventum Aeneae condidit vs. 242—248, Venetiae fuit. | 2. Haud temere illud, quod *fato profugus venisse* dicitur, aut inventum esse a poeta aut creditum a Romanis persuadebunt gravissimi

- Litora, multum ille et terris iactatus et alto  
 Vi superum, saevae memorem Iunonis ob iram,  
 5 Multa quoque et bello passus, dum conderet urbem  
 Inferretque deos Latio, genus unde Latinum  
 Albanique patres atque altae moenia Romae.  
 Musa, mihi caussas memora, quo numine laeso,  
 Quidve dolens, regina deum tot volvere casus  
 10 Insignem pietate virum, tot adire labores  
 Impulerit. Tantaene animis caelestibus irae?  
 Urbs antiqua fuit, Tyrii tenuere coloni,  
 Karthago, Italiam contra Tiberinaque longe  
 Ostia, dives opum studiisque asperrima belli:  
 15 Quam Iuno fertur terris magis omnibus unam

auctores, Homerus; qui fatale Aeneae fuisse ait, ut superstes atrocissimo bello Troianis imperaret, Il. 20, 302—8., et Liv. 1, 1 „Aeneam, ad maiora initia rerum ducentibus *fatis*, primo in Macedoniam venisse“ *cet.* Fato autem cum summa rerum in hoc carmine expositarum gubernetur, fieri non potest, quia eae res ipsae fiant angustiores, legentes autem impleantur et reverentia tanti numinis et admiratione rei Romanae volente Fato et constitutae et ad eam, quae fuit Virgilii tempore, potentiam ac dignitatem evectae. — *Laviniaque v. L.*, similis epexegesis 6, 831. — *Lavinia* hic trisyllabum; durior etiam synizesis 6, 33. 7, 237. ] 3 et 4. *terris iactatus*, qui dum sedem certam quaerit, aliam terram ex alia adire vi deorum coactus fuerit. — Omnibus autem, quas perpressus est, rerum adversitatibus obruit eum insatiabilis ira Iunonis, omne nomen Troianum internecino persecuta odio, tum etiam aliorum, quos illa nacta est administros, deorum opera, cf. 6, 63 sq.; eodem spectat Ovid. Met. 14, 581 „Iamque deos omnes ipsamque Aeneia virtus Iunonem veteres finire coegerat iras.“ ] 5. *quoque et*, nec solum ille multum terra marique iactatus est, sed multa etiam bello passus. Cic. de Orat. 1, 35 „*mea quoque etiam causa rogo.*“ Terent. Hec. 5, 1, 36 „*ego quoque etiam hoc credidi.*“ — *dum conderet* voluntatem et studium denotat, ut G. 4, 457. A. 10, 800. — *urbem* fato promissam ... vs. 258 ... Lavinium. ] 6 sq. *unde*: quo factum est, ut Aborigines cum Troianis aequati communi Latinorum nomine sint comprehensi, utque ab Ascanio Alba sit condita et ex eius posteris urbis Romae conditores ortum habuerint. — *patres*: perite et secundum historiam; ut Romae initio, sic sine dubio Albae nulla fuit plebs; tenebant Albam patriciae gentes, patres, cum suis clientelis.

8—11. *Invocatio Musae*; 12—33. *Causae odii Iunonis*. ] 8. pro eo, quod dici solet „memora causas, quibus impulerit,“ poeta subiungit definitionem causarum bipartitam: „quo numine laeso“ et „quidve dolens.“ — *quo numine l.*, qua voluntate Iunonis neglecta; ergo quid factum contra eius voluntatem, quo commotus est eius animus? 2, 123 „*quae sint ea numina* divom,“ i. e. quae sit illa deorum voluntas oraculo significata. Atque ad haec ipsa *quo numine laeso* pertinent, quae vss. 12—22 exponuntur; laesum numen suum sentiebat Iuno, quod audierat futurum esse, ut a Carthaginiensibus longe sibi iucundissimis imperium ad posteros Aeneae transferretur. — *Quidve dolens*: explicantur haec vss. 25—28, et respondet verbo *dolens* id, quod vs. 25 positum est, *dolores*. ] 9. *volvere* est ita promovere, ut eadem pars per vices nunc inferior sit, nunc superior; hinc nata est significatio continua cuiusdam rerum vicissitudinis; *volvere casus*, alium ex alio tolerare; *volvere vices* 3, 375.; cf. etiam 1, 22. ] 10. *Ins. piet. v.*, ergo tali tantoque odio minime dignum. ] 12. *fuit*, non *erat*; etenim qualis fuerit postea, (non qualis Didonis tempore) indicat poeta; quamquam Iuno „iam tum tendebat,“ vs. 18, ut talis fieret. ] 13. *contra*, e regione. ] 15. *unam* hic auge

- Posthabita coluisse Samo; hic illius arma,  
 Hic currus fuit; hoc regnum dea gentibus esse,  
 Si qua fata sinant, iam tum tenditque fovetque.  
 Progeniem sed enim Troiano a sanguine duci  
 20 Audierat, Tyrias olim quae verteret arces;  
 Hinc populum late regem belloque superbum  
 Venturum excidio Libyae: sic volvere Parcas.  
 Id metuens veterisque memor Saturnia belli,  
 Prima quod ad Troiam pro caris gesserat Argis —  
 25 Necdum etiam caussae irarum saevique dolores  
 Exciderant animo; manet alta mente repostum  
 Iudicium Paridis spretaeque iniuria formae;  
 Et genus invisum, et rapti Ganymedis honores;  
 His accensa super iactatos aequore toto  
 30 Troas, reliquias Danaum atque inmitis Achilli,  
 Arcebat longe Latio, multosque per annos  
 Errabant, acti fati, maria omnia circum.  
 Tantae molis erat Romanam condere gentem.

Vix e conspectu Siculae telluris in altum  
 35 Vela dabant laeti et spumas salis aere ruebant,

vim comparativi, *magis*, ut Horat. Epod. 12, 4. | 16. *Samo*. Lactant. Inst. 1, 17 „Insulam Samum scribit Varro prius Partheniam nominatam, quod ibi Iuno adoleverit ibique etiam Iovi nupserit. Itaque nobilissimum et antiquissimum templum eius est Sami.“ | 17. *currus*, cf. Hom. II. 5, 720 sqq. | 18. *fovet*, significatur hoc verbo studium a blando quodam et quasi materno amore profectum. | 19. *sed enim*, Graecum ἀλλὰ γάρ, duo enuntiata ita inter se implicat, ut sua utrique particulae, *sed et enim*, vis perstet „Sed metuebat tum Carthagini (vs. 23.), audierat enim fore, ut posteri Troianorum eam everterent.“ infra 2, 164—170 „Sed cecidit postea spes Graecorum, offenderant enim Diomedes et Ulixes Minervam.“ 5, 395—400 „Sed iam deficient vires, senectus enim me tardat.“ 6, 28 sq. „Sed ipse Daedalus (miserabatur enim amorem reginae) ambages tecti resolvit.“ | 21. Hor. Od. 3, 17, 9 „late tyrannus“ | 22. *s. volv.* P., sic suo tempore et factorum ordine, per Parcas constituto, eventurum esse; v. vs. 9. | 24. *Prima*, tamquam dux faxque belli, et v. 3, 437. — Ceterum est haec oratio ἀνακόλουθός indicans animum commotiorem. Instituerat primo ita scribere poeta: *Id metuens — arcebat Danaos Latio* v. 31. | 27. *Iudic.* P., qui Venerem Iunone et Minerva pulchriorem esse iudicaverat. | 28. *invis.*, propter Dardanum, Iovis ex Electra, Iunoni invisae, filium, 8, 134 sq. cf. Ovid. Fast. 6, 41 sq. — Ganymedes, Trois fil.; vid. Ovid. Met. 10, 155—161. | 29. *His*, quae vss. 25—28. memorata sunt. — *super*, insuper, accedente ad metum (vs. 23) etiam dolore atque ira; v. 7, 462. | 31. cf. vs. 755. | 32. Sic factum est, ut circum omnia maria errarent acti fati, quae eos nusquam consistere patiebantur, antequam invenissent sedem destinatam.

34—80. *Iuno conspicata classem Troianam ab Sicilia venientem ac per mare Tyrrhenum navigantem integram plenamque ulacritatis ardens ira Aeolum adit, regem ventorum, precibusque ac promissis perpellit, ut tempestate atroci Troianos adoriatur.* | 34. v. 11, 903. | 35. *V. d. laeti*: ita solent nautae laetabundi et exire ex portu et navigatione feliciter confecta redire. — *sp. s. aere r.*, suscitabant mare aereis navium rostris ita, ut ageret spumas; et

- Cum Iuno, aeternum servans sub pectore volnus,  
 Haec secum: Mene incepto desistere victam,  
 Nec posse Italia Teucrorum avertere regem?  
 Quippe vetor fatis. Pallasne exurere classem  
 40 Argivom atque ipsos potuit submergere ponto,  
 Unius ob noxam et furias Aiakis Oilei?  
 Ipsa, Iovis rapidum iaculata e nubibus ignem,  
 Disiecitque rates evertitque aequora ventis,  
 Illum expirantem transfixo pectore flammās •  
 45 Turbine corripuit scopuloque infixit acuto;  
 Ast ego, quae divom incedo regina, Iovisque  
 Et soror et coniunx, una cum gente tot annos  
 Bella gero. Et quisquam numen Iunonis adorat  
 Praeterea, aut supplex aris inponet honorem?  
 50 Talia flammato secum dea corde volutans,  
 Nimborum in patriam, loca feta furentibus austris,  
 Aeoliam venit. Hic vasto rex Aeolus antro  
 Luctantis ventos tempestatesque sonoras  
 Imperio premit ac vinclis et carcere frenat.  
 55 Illi indignantes magno cum murmure montis  
 Circum claustra fremunt; celsa sedet Aeolus arce  
 Sceptra tenens, mollitque animos et temperat iras;  
 Ni faciat, maria ac terras caelumque profundum  
 Quippe ferant rapidi secum verrantque per auras.  
 60 Sed pater omnipotens speluncis abdidit atris,  
 Hoc metuens, molemque et montis insuper altos  
 Inposuit, regemque dedit, qui foedere certo  
 Et premere et laxas sciret dare iussus habenas.  
 Ad quem tum Iuno supplex his vocibus usa est:  
 65 Aeole, namque tibi divom pater atque hominum rex  
 Et mulcere dedit fluctus et tollere vento,  
 Gens inimica mihi Tyrrhenum navigat aequor,  
 Ilium in Italiam portans victosque Penatis:

cf. vs. 85. | 36. cf. vs. 25. | 39. *Quippe* ironiae servit. | 41. ob vim in Minervae templo factam Cassandrae. — *furias*: Hom. II. 20, 87, „Μοῖρα καὶ ἡεροφοῖτις Ἐρινὺς φρεσὶν ἐμβάλου ἄγχιον ἄτην.“ — *Oilei*, v. E. 6, 78. | 44. Stat. Theb. 11, 2 „expiravitque receptum Fulmen“ Capaneus. | 46. *incedo*, v. 5, 68. | 47. *una*, eādem; ego tot annos cum una eademque gente bella gero, nec potui eam opprimere. | 49. *praeterea*, posthac. Adverbia praeteriti futureve temporis non necessario requirant Verbum eiusdem temporis, Prop. 2, 7, 2 „quondam flemus“ pro *flevimus*. Iuven. 4, 97 „olim prodigio par est cum nobilitate senectus.“ Terent. Eun. 2, 3, 46 „Cras est mihi iudicium.“ Plaut. Trin. 3, 3, 87 „Ego sycphantam iam conduco.“ | 52. *Aeoliam*, quae una est ex insulis Vulcanis ad Siciliam. | 53. *Luctantes*, erumpere semper nitentes. | 54. v. 7, 737. | 58. *profundum*, altum. | 61. *molem et montes*, molem montium; similis epexegesis 3, 223. 7, 751. 775. 9, 354. 11, 22. 12, 869. — *insuper*, ὑπερθεν, cf. 3, 579. | 62. regem dedit, qui certis legibus adstrictus sciret iussa Iovis exsequi; v. G. 1, 60. | 63. *premere*, adducere. | 65. *πατὴρ ἀνδρῶν τε θεῶν τε*.

- Incute vim ventis submersasque obrue puppis,  
 70 Aut age diversos et disiice corpora ponto.  
 Sunt mihi bis septem praestanti corpore Nymphae,  
 Quarum quae forma pulcherrima Deiopea,  
 Connubio iungam stabili propriamque dicabo,  
 Omnis ut tecum meritis pro talibus annos  
 75 Exigat et pulchra faciat te prole parentem.  
 Aeolus haec contra: Tuus, o regina, quid optes,  
 Explorare labor; mihi iussa capessere fas est.  
 Tu mihi, quodcumque hoc regni, tu sceptrā Iovemque  
 Concilias, tu das epulis accumbere divom,  
 80 Nimborumque facis tempestatumque potentem.  
 Haec ubi dicta, cavum conversa cuspide montem  
 Impulit in latus: ac venti, velut agmine facto,  
 Qua data porta, ruunt et terras turbine perfliant.  
 Incubuere mari totumque a sedibus imis  
 85 Una Eurusque Notusque ruunt creberque procellis  
 Africus, et vastos volvunt ad litora fluctus.  
 Insequitur clamorque virum stridorque rudentum.  
 Eripiunt subito nubes caelumque diemque  
 Teucrorum ex oculis; ponto nox incubat atra.  
 90 Intonuerē poli, et crebris micat ignibus aether,  
 Praesentemque viris intentant omnia mortem.  
 Extemplo Aeneae solvuntur frigore membra;  
 Ingemit, et duplicis tendens ad sidera palmas  
 Talia voce refert: O terque quaterque beati,  
 95 Quis ante ora patrum Troiae sub moenibus altis  
 Contigit oppetere! o Danaum fortissime gentis,  
 Tydide! mene Iliacis occumbere campis  
 Non potuisse tuaque animam hanc effundere dextra?  
 Saevus ubi Aeacidae telo iacet Hector, ubi ingens

69. Uti premendo habenas (vs. 63) demere vim ventis, ita remittendo incutere dici potest Aeolus. | 70. v. G. 4, 432. | 73. *proprium*, ut perpetuo matrimonii vinculo teneatur; v. E. 7, 31. | 75. *parentem pulchra prole*: secundum consuetudinem diceret *par. pulchrae prolis*; similiter 5, 77 „mero carchesia Baccho;“ antiquis hunc usum Ablativi tribuit Servius. | 78. *quodcumque*, v. 9, 287.

81—123. *Atrox tempestas immittitur classi Troianorum*. — Compara cum his Hom. Od. 5, 291 sqq. | 81. *cuspide*, hasta, ut 12, 386, quam pro sceptro antiquissimi reges gestabant, Iustin. 43; 3. Ea hasta (sive sceptro, vs. 57) ad montem conversa Aeolus in propinqua arce (regia) habitans impellit latus eius montis, quo fit, ut claustra (vs. 56) laxentur ventisque detur exitus. | 82. *agmine facto*, proprie de militibus, qui densis ordinibus pergunt vel ad iter, vel ad proelium faciendum, 8, 595. G. 4, 167. et infra vs. 434. | 85. *creb. proc.*, procellosus. | 92. Hom. Od. 5, 297. Repentinus timor represso cursu sanguinis frigus atque horrorem incutit facitque, ut torpeant membra, palleat os; cf. 12, 905. | 94. Hom. I. 1. 306 sq. | 97. Respicitur certamen ab Hom. II. 5, 239—318 narratum. | 99. *saevus*, v. vs. 138. — *Aeacid.*, v. 6, 58. — *iacet*, periit, ut Gr. *xeirai*. Notabis usum Praesentis

- 100 Sarpedon, ubi tot Simois correpta sub undis  
 Scuta virum galeasque et fortia corpora volvit.  
 Talia iactanti stridens Aquilone procella  
 Velum adversa ferit, fluctusque ad sidera tollit.  
 Franguntur remi; tum, proram avertit et undis
- 105 Dat latus; insequitur cumulo praeruptus aquae mons.  
 Hi summo in fluctu pendent; his unda dehiscens  
 Terram inter fluctus aperit; furit aestus arenis.  
 Tris Notus abreptas in saxa latentia torquet —  
 Saxa vocant Itali, mediis quae in fluctibus, Aras,
- 110 Dorsum inmane mari summo — tris Eurus ab alto  
 In brevia et syrtis urguet, miserabile visu,  
 Inluditque vadis atque aggere cingit arenae.  
 Unam, quae Lycios fidumque vehebat Oronten,  
 Ipsius ante oculos ingens a vertice pontus
- 115 In puppim ferit: excutitur pronusque magister  
 Volvitur in caput; ast illam ter fluctus ibidem  
 Torquet agens circum, et rapidus vorat aequore vertex.  
 Adparent rari nantes in gurgite vasto;  
 Arma virum, tabulaeque, et Troia gaza per undas.
- 120 Iam validam Ilionei navem, iam fortis Achatae,  
 Et qua vectus Abas, et qua grandaevus Aletes,  
 Vicit hiemps; laxis laterum compagibus omnes  
 Accipiunt inimicum imbrem rimisque fatiscunt.  
 Interea magno misceri murmure pontum,
- 125 Emissamque hiemem sensit Neptunus et imis  
 Stagna refusa vadis, graviter commotus; et alto  
 Prospiciens, summa placidum caput extulit unda.  
 Disiectam Aeneae toto videt aequore classem,  
 Fluctibus oppressos Troas caelique ruina.

in re, cuius recens viget in animo memoria; cf. 2, 275. 663. 3, 8. 11, 172.] 100. cf. Hom. II. 12, 22 sq.] 102. *iactare* ubi significat *loqui*, *dicere*, adiunctam habet notionem commotioris animi, cf. 2, 588. 9, 621. 10, 95.] 103. *adversa*, a prora veniens.] 104. *avertit*, procella.] 105. *ins. cumulo*, i. e. mole aquae, s. aqua in speciem cumuli sublata; cf. 2, 498.] 106. *Hi*, horum naves.] 107. *arenis*, in fundo maris, miscens scilicet eas et sursum rapiens, cf. 3, 557 et Ovid. Met. 11, 499.] 109. *Saxa* inquam; saxorum enim, non insulae vocabulo Itali appellant Aras in mediis fluctibus (inter Siciliam, Carthaginiem et Sardiniam) sitas. Varro scribit Aras esse insulam in pelago latentem, Plinius scopulos verius dici, quam insulam.] 110. id dorsum est in mari summo, ut apparere non possit, nisi, ut auctor est Servius, cum mare ventis movetur.] 111. *brevia*, loca vadosa.] 114. *a vertice*, fluctus alte sublatus desuper incidit in navem, Hom. Od. 5, 313 „ἐλασεν μέγα χῆμα κατ’ ἄκρον.“] 115. *magister*, dux, Orontes, 6, 334.] 116. *Volv.*, v. 9, 433.] 118. rari (ἐνθα καὶ ἐνθα) emergunt, plerosque statim absorbuerat vertex.] 119. sc. apparent late dispersa. — *Arma*, puta, clipei cratibus texti, galeae coriaceae; eaque in puppibus suspensa erant, cf. vs. 183. 10, 80.] 120. *Ilion*. v. vs. 41.] 123. *imbr.*, aquam, ut G. 4, 115. 124—156. *Sentit sedatque tempestatem Neptunus.*] 126. *alto*, ex imo mari (ubi est regia Neptuni) prospicit.] 129. *caeli ruina*, imbris, et coniuncta cum



- 130 Nec latuere doli fratrem Iunonis et irae.  
 Eurum ad se Zephyrumque vocat, dehinc talia fatur:  
 Tantane vos generis tenuit fiducia vestri?  
 Iam caelum terramque meo sine numine, Venti,  
 Miscere et tantas audetis tollere moles?
- 135 Quos ego —! Sed motos praestat componere fluctus.  
 Post mihi non simili poena commissa luetis.  
 Maturate fugam, regique haec dicite vestro:  
 Non illi imperium pelagi saevumque tridentem,  
 Sed mihi sorte datum. Tenet ille inmania saxa,
- 140 Vestras, Eure, domos; illa se iactet in aula  
 Aeolus, et clauso ventorum carcere regnet.  
 Sic ait, et dicto citius tumida aequora placat,  
 Collectasque fugat nubes solemque reducit.  
 Cymothoe simul et Triton adnixus acuto
- 145 Detrudunt navis scopulo; levat ipse tridenti;  
 Et vastas aperit syrtis, et temperat aequor,  
 Atque rotis summas levibus perlabitur undas.  
 Ac veluti magno in populo cum saepe coorta est  
 Seditio, saevitque animis ignobile vulgus;
- 150 Iamque faces et saxa volant, furor arma ministrat;  
 Tum, pietate gravem ac meritis si forte virum quem  
 Conspectere, silent, arrectisque auribus adstant;  
 Ille regit dictis animos, et pectora mulcet:  
 Sic cunctus pelagi cecidit fragor, aequora postquam

his reliqua tempestatis foeditate.] 132. *generis*, inest in his quaedam contemptus significatio, aut quia ex humillimo sunt genere deorum, aut quod nati sunt ex Astraeo, qui contra deos arma sumpsit, uno ex Titanibus.] 133. *s. numine*, voluntate, 2, 777.] 135. *Quos ego!* vox gravem poenam minitantis; Terent. Andr. 1, 1, 137 „quem quidem ego! si sensero, ...!“] 136. *mihi*, v. E. 8, 6.] 138. *trident.*, insigne imperii maritimi. — *saevus* ad iram, furorem, vehementiam spectat; hinc ad bella, pugnas, fortitudinem, ad imperia, regna, iussa, ad mare, ventos, tempestates transfertur.] 140. v. 9, 525. — *illa ... regnet*, amantudo in singulis verbis!] 141. Hom. Il. 1, 179 sq. — *clauso* non i. q. postquam clauserit, sed: clausum tenens carcerem s. ea lege, ut clausum teneat, nos: *bei verschlossenem Kerker*, ut 7, 249 *Talibus Ilionis dictis, bei diesen Worten*, dum ille ita loquitur.] 142. Hom. Il. 19, 242.] 144. *Cym.*, Nereis.] 146. *aperit s.*, facit rursus navigabiles; *et temp. aequor*, ita moderatur, ut ne rursus naves illidantur vado vi fluctuum abreptae.] 148. Particulae *Ac veluti* servantur comparationi, qua praegressa illustrantur, 2, 626. 4, 402. 441., v. 6, 709.; et comparandi vim propriam esse particulae *ac*, vel ex illo notissimo *aquae ac cognoscis*. Praeterea iunges *veluti cum*, ut sexcentis apud Homerum *ως οτε* reliqua enuntiatia simpliciter ita adnecti solent in comparationibus, ut nullum eorum vim habeat apodoseos; nam *veluti cum* valet i. q. *ut fieri solet, cum*; cf. 2, 626—631. *ceu cum* 9, 792. Denique *saepe* in comparatione ita interpositum significat i. q. *ut saepe fit*, cf. 10, 723. G. 2, 279., etiam extra comparationem 8, 353.] 150. cf. 7, 507 sq. — *arma*, ipsas illas faces, ipsa saxa; quippe cum telo esse in Urbe civi Romano non licebat; Tac. Ann. 14, 45 „conglobata multitudo et saxa ac faces minitante.“] 152. *adstare*, i. e. certo quodam loco tamquam inhaerentem stare, vel in vestigio suo stare, 3, 123. 7, 181. 9, 677.] 153. *reg.*

- 155 Prospiciens genitor caeloque invectus aperto  
 Fleatit equos curruque volans dat lora secundo.  
 Defessi Aeneadae, quae proxuma litora, cursu  
 Contendunt petere, et Libyae vertuntur ad oras.  
 Est in secessu longo locus: insula portum
- 160 Efficit obiectu laterum, quibus omnis ab alto  
 Frangitur inque sinus scindit sese unda reductos.  
 Hinc atque hinc vastae rupes geminique minantur  
 In caelum scopuli, quorum sub vertice late  
 Aequora tuta silent; tum silvis scaena coruscis
- 165 Desuper horrentique atrum nemus imminet umbra;  
 Fronte sub adversa scopulis pendentibus antrum,  
 Intus aquae dulces vivoque sedilia saxo,  
 Nympharum domus; hic fessas non vincula navis  
 Ulla tenent, unco non alligat ancora morsu.
- 170 Huc septem Aeneas collectis navibus omni  
 Ex numero subit; ac magno telluris amore  
 Egressi optata potiuntur Troes arena  
 Et sale tabentis artus in litore ponunt.  
 Ac primum silici scintillam excudit Achates
- 175 Succcepitque ignem foliis atque arida circum  
 Nutrimenta dedit rapuitque in fomite flammam.  
 Tum Cererem corruptam undis Cerealiaque arma

*d. an. docendo, et p. m. sedando.* 155. *genitor*, v. G. 1, 163. 156. *curru volans secundo*, impetum equorum sequente.

157—222. *Troiani in proxima Libyae litora egressi curant corpora; Aeneas solando firmat animos suorum, qui post cenam sermonibus requirunt amissos socios.* 159 sq. Solinus c. 9 „*Euboea insula laterum obiectu efficit Aulidis portum.*“ 160. *lange: omnis ab alto unda*, sc. allabeas; et v. E. 1, 8. 161. *Excipit haec insula vim undarum*, quae in sinus eius intrantes retractos fractae scissaeque se insinuant, et ita portum praestat quietum; et d. G. 4, 420. 162. *minantur in caelum*, tam alti sunt, ut videantur tendere in c.; *minas murorum lafra* 4, 86 muros praecaltos dixit eaque re terrorem facientes, cf. 2, 240, quippe qui videantur subeuntem ruina oppressuri. 164. *Placidi Gloss. p. 501* „item scena dicitur arborum in se incumbentium quasi concamerata densatio.“ Iam vide eundem locum vss. 810 sq. descriptum. — *coruscis*, tremula luce per intervalla micantibus, dum vento moventur. 165. *horrenti umbra; horrentes* vel *horridae* dicuntur arbores, unde multi densique rami prominent, ut *seges horrens* a multitudine culmorum erectorum 3, 23 „*densis hastilibus horrida myrtus*“; iam *horrens umbra* dicitur, quae illa ramorum densitate effleat, ut *saxea umbra*, quam facit rupes, *viridis umbra*, quam viridinis. — *atrum*, sc. densum proptereaque obscurum. 166. *adversa* intro navigantibus. — *scopulis p.*, Ablativus rei efficientis; intelliges autem scopulos cavatos eoque pendere visos. 167. *in sed. saxo*, sedilia nata, non arte facta; cf. 3, 688. 168. *Hom. Od. 12, 817 sq.* — Hic, in hoc portu, non opus est vinculis aut ancoris; cf. *Hom. Od. 9, 136 sq.* 169. *unco morsu*, quia uncus ancorae est illud, quod mordet, fundum quasi morsu adpetit. 172. *arena*, litore. 173. *s. tab.*, sordibus aquae marinae fluentes. 176. *rap. in f. fl.*, celeri vibratione effecit, ut fomes, i. e. manipulus aridae frondis vel stipulae, qui scintillam exceptam condebat, ardere inciperet. 177. *Cererem*, fruges. — *C. arma*, instrumenta, quibus

- Expediunt fessi rerum, frugesque receptas  
 Et torrere parant flammis et frangere saxo.
- 180 Aeneas scopulum interea conscendit et omnem  
 Prospectum late pelago petit, Anthea si quem  
 lactatum vento videat Phrygiasque biremis,  
 Aut Capyn, aut celsis in puppibus arma Caici.  
 Navem in conspectu nullam, tris litore cervos
- 185 Prospicit errantis; hos tota armenta sequuntur  
 A tergo, et longum per vallis pascitur agmen.  
 Constitit hic, arcumque manu celerisque sagittas  
 Corripuit, fidus quae tela gerebat Achates,  
 Ductoresque ipsos primum, capita alta ferentis
- 190 Cornibus arboreis, sternit, tum volgus, et omnem  
 Miscet agens telis nemora inter frondea turbam;  
 Nec prius absistit, quam septem ingentia victor  
 Corpora fundat humi et numerum cum navibus aequet.  
 Hinc portum petit, et socios partitur in omnis.
- 195 Vina bonus quae deinde cadis onerarat Aestes  
 Litore Trinacrio dederatque abeuntibus heros,  
 Dividit, et dictis maerentia pectora mulcet:  
 O socii, — neque enim ignari sumus ante malorum —  
 O passi graviora, dabit deus his quoque finem.
- 200 Vos et Scyllaeam rabiem penitusque sonantis  
 Aestis scopulos, vos et Cyclopia saxa  
 Experti: revocate animos, maestumque timorem  
 Mittite; forsán et haec olim meminisse iuvabit.  
 Per varios casus, per tot discrimina rerum
- 205 Tendimus in Latium, sedes ubi fata quietas

opus est ad pinsendum coquendumque panem.] 178. *fessi r.*, fessi et qui sat  
 agissent rerum suarum; v. 12, 589.] 179. v. G. 1, 267.] 181. *pelago*, v. vs.  
 126. — *si*, v. E. 6, 57. — *si quem A.*, si forte quem eorum, qui amissi vide-  
 bantur, ut Anthem, aut Capyn, videat; Propert. 4, 11, 19 „Aut *si quis* posita  
 index sedet *Acacus* urna,“ i. e. si quis iudex sedet, qualem memorant *Acacum*.  
 Et magistrorum nomina posita pro navibus eorum; cuius quaeque esset, cognosci e  
 longinquo poterat ex armis in puppi suspensis, v. vs. 119.] 184. *cervos*: eo  
 nomine, ut etiam dammarum vocabulo, a Romanis appellantur ferae peregrinae  
 cervis similes, maxime quae hodie vocantur antilopae; in Libya nec silvae  
 erant, nec cervi, nec lupi; nisi forte poeta putavit licere sibi fingere, quae non  
 fuerunt, ut silvas vs. 552. 4, 399.] 187. *hic*, in valle, constitit, et deinde, vs.  
 191, eos persequens agit inter nemora.] 190. *arboreis*, ingentibus, ut 12, 888.]  
 193. cf. vs. 170.] 195. Ordo verborum: *deinde dividit vina, quae est.*; traiec-  
 tum *deinde* etiam 3, 609. — *vina onerare cadis*, quasi pro onere inferre, infun-  
 dere cadis; cf. 3, 465. 8, 180; proprie *cadēs onerare vino*. — De *Aeste*  
 cf. v. 38. — *bonus* indicat benignitatem liberaliter donantis.] 198. Hom. Od.  
 12, 208 sqq. — *ante malorum*, τὴν πρὶν κακῶν.] 200. accessistis, *accessis*,  
 ad scopulos *penitus son.*, intus latrantes, *innen tosend*. Illustrat haec 3, 566  
 „Ter scopuli clamorem inter cava saxa dedere;“ adde eiusdem libri vs. 424  
 et 431. Imitatur eadem Lucanus 6, 66 „rabidum latrare Pelorum.“] 201. G

Ostendunt; illic fas regna resurgere Troiae.  
Durate, et vosmet rebus servate secundis.

Talia voce refert, curisque ingentibus aeger  
Spem voltu simulat, premit altum corde dolorem.

- 210 Illi se praedae accingunt dapibusque futuris:  
Tergora deripiunt costis et viscera nudant;  
Pars in frusta secant veribusque trementia figunt;  
Litore aena locant alii flammasque ministrant.  
Tum victu revocant viris, fusique per herbam
- 215 Implentur veteris Bacchi pinguisque ferinae.  
Postquam exempta fames epulis mensaeque remotae,  
Amisso longo socios sermone requirunt,  
Spemque metumque inter dubii, seu vivere credant,  
Sive extrema pati nec iam exaudire vocatos.
- 220 Praecipue pius Aeneas nunc acris Oronti,  
Nunc Amyci casum gemit et crudelia secum  
Fata Lyci, fortemque Gyan, fortemque Cloanthum.  
Et iam finis erat, cum Iuppiter aethere summo  
Despiciens mare velivolum terrasque iacentis
- 225 Litoraue et latos populos, sic vertice caeli  
Constitit et Libyae defixit lumina regnis.  
Atque illum talis iactantem pectore curas  
Tristior et lacrimis oculos suffusa nitentis  
Adloquitur Venus: O qui res hominumque deumque
- 230 Aeternis regis inperiis, et fulmine terres,  
Quid meus Aeneas in te committere tantum,  
Quid Troes potuere, quibus, tot funera passis,  
Cunctus ob Italiam terrarum clauditur orbis?  
Certe hinc Romanos olim, volventibus annis,

*saxa*, litus Cycloporum saxosum in Sicilia. | 213. *aena locant*, ad aquam, qua laventur ante epulas, calefaciendam. — *ministrant*, suppeditant, subiiciunt ignem aenis. | 216 sq. cf. Hom. Od. 12, 308 sq. — *mensae remotae*, improprie, cf. vs. 214; intelliges dapum reliquias. | 217. *requirunt* desiderium declarat eorum, quibus aegre carent. | 219. *extr. pati*, perire. — *vocatos*, si vocentur. | 221. iunge *secum gemit*.

223—304. *Ad Iovem terras ac maria forte despicientem et in Libyam oculos conficientem accedit Venus queriturque casus Aeneae filii, vana Iovis promissa, invidiam Iunonis. Consolatur eam Iuppiter breviter complexus fata Aeneae eiusque posterorum. Quo facto Mercurius de caelo missus placata omnia praestat Trojanis.* | 224. *tacentes* vocantur, quia Iuppiter eas ex alto prospicit, infra se positas et porrectas. | 225. *lato populós*, sic posita intendunt vim adiectivi, cf. 5, 376. G. 3, 219. A. 2, 251. infra vs. 569. 4, 345. — sic post participium, *despiciens*, interpositum more Graecorum, ut Plat. Phaed. c. 5: *Σαφδρής καθεζόμενος οὕτως ἤδη τὰ λοιπὰ διελέγετο*, quo fit, ut narrata non solum audire, sed oculis cernere videamur; cf. 7, 668. 8, 488 et v. 2, 391. | 227. *tales curas*, dum, quae acciderant in mari Libyco, videt et iniquam Aeneae condicionem contemplatur. | 228. v. E. 3, 106. | 233. *ob It.*, ne ad Ital. accedant, cf. vs. 31. | 234. *volv. annis*, v. G. 1, 163, dum alter post alterum circumvolvitur, *περιπλομένον ἐνιαυτῶν* compares velim G. 2, 402 et infra vs. 269. |

- 235 Hinc fore ductores, revocato a sanguine Teucri,  
 Qui mare, qui terras omni ditione tenerent,  
 Pollicitus, quae te, genitor, sententia vertit?  
 Hoc equidem occasum Troiae tristisque ruinas  
 Solabar, fatis contraria fata rependens;
- 240 Nunc eadem fortuna viros tot casibus actos  
 Insequitur. Quem das finem, rex magne, laborum?  
 Antenor potuit, mediis elapsus Achivis,  
 Illyricos penetrare sinus atque intima tutus  
 Regna Liburnorum, et fontem superare Timavi,
- 245 Unde per ora novem vasto cum murmure montis  
 It mare proruptum et pelago premit arva sonanti.  
 Hic tamen ille urbem Patavi sedesque locavit  
 Teucrorum, et genti nomen dedit armaque fixit  
 Troia, nunc placida conpositus pace quiescit:
- 250 Nos, tua progenies, caeli quibus adnuis arcem,  
 Navibus, infandum! amissis, unius ob iram  
 Prodimur atque Italīs longe disiungimur oris.  
 Hic pietatis honos? sic nos in scepra reponis?  
 Olli subridens hominum sator atque deorum
- 255 Voltu, quo caelum tempestatesque serenat,

235. *Hinc*, v. E. 1, 54. — *rev. a s. T.*, e propagato genere T.; cf. 3, 107 sqq. 4, 230. | 236. *omni dic.*, summa potestate; est Homericum illud *ἴππιν ἀνάσσειν*. | 237. *Pollicitus*, exspectes *Pollicitum*: adverte anacoluthon commotae orationi pulchre conveniens. — Quod novum consilium vertit te, mutavit animum tuum? | 238. *Hoc*, istis promissis. | 239. *Solari aliquid*, dolorem ex aliqua re natum lenire. — *fatis c. f. rep.*, fatis (sive *cum fatis*) vs. 238 indicatis compensans (*ἀντιστοιχία*) fata his contraria, meliora igitur futura. | 242. Antenor et ipse Troia profugus, litora maris Adriatici legens primum Illyricum, cuius pars a Liburnis habitabatur, tum Timavum, qui in sinum Tergetinum infunditur, praetervectus ad eam terram appulit, quae postea dicta est Venetia, v. vs. 248; de eodem itinere exponit Liv. 1, 1. — *med. el. Achivis*, ut Aeneas cum suis 3, 282 sq. „invat evasisse tot urbes Argolicas mediosque fugam tenuisse per hostes.“ | 243. *intima*, ad intimum sinum maris Adriatici sita; Liv. 1, 1. de Antenore „venisse in intimum Adriatici maris sinum.“ | 245. *ora hic sunt fontes*. | 246. Timavus non tam fluvius, quam verum mare; tanta mole aquarum se prorumpit; quibus late diffusis (*pelago*) omnia circum operit. — Adiecit poeta versus 245 et 246 ipsius rei miraculo motus; similes egressionem habet Homerus, ut II. 2, 547 sqq. 594 sqq. | 247. *Hic*, quo ille, superato Timavo, pervenerat. — *tamen* rem extenuat, fere i. q. *saltem*, cf. E. 10, 31. Ille saltem certam sedem invenit Pataviumque condidit: Aeneae, cui multo maiora atque ipsum caelum pollicitus es, ne pedem quidem in Italia ponere contingit. | 248. *genti n. d.* Servius „Hi autem primis temporibus dicti sunt Antenoridae.“ Liv. 1, 1 „in quem ... *Antenor sum suis* ... primo egressi sunt locum, Troia vocatur, pagoque Troiano inde nomen est; gens universa Veneti appellati,“ nomen ab Henetis Paphlagonibus, Antenoritis comitibus, ut aiunt, ductum. — *a. fixit*, partē per pacem tranquillitate; figuntur, i. e. suspenduntur, arma bello finito; Eurip. Hec. 898. H. | 249. exoptatissimum hoc, mori in felicitate; *componi* dicebantur proprie, quorum cineres et ossa colligebantur et condebantur in sepulcro. | 251. *unius*, Iunonis | 252. *prod.*, per fraudes perdimur. | 253. *in scepra*, in promissum Italiae regnum. | 254. *Olli, ollis*, antiquae pro *illi, illis*, in narratione gravi ac sedata

- Oscula libavit natae, dehinc talia fatur:  
 Parce metu, Cytherea, manent inmoti tuorum  
 Fata tibi; cernes urbem et promissa Lavini  
 Moenia, sublimemque feres ad sidera caeli  
 260 Magnanimum Aenean; neque me sententia vertit.  
 Hic tibi — labor enim, quando haec te cura remordet,  
 Longius et volvens fatorum arcana movebo —  
 Bellum ingens geret Italia populósque ferocis  
 Contundet, moresque viris et moenia ponet,  
 265 Tertia dum Latio regnantem viderit aestas,  
 Ternaque transierint Rutulis hiberna subactis.  
 At puer Ascanius, cui nunc cognomen Iulo  
 Additur, — Ilus erat, dum res stetit Ilia regno —  
 Triginta magnos volvendis mensibus orbis  
 270 Imperio explebit, regnumque ab sede Lavini  
 Transferet, et longam multa vi muniet Albam.  
 Hic iam ter centum totos regnabitur annos  
 Gente sub Hectorea, donec regina sacerdos  
 Marte gravis geminam partu dabit Ilia prolem.  
 275 Inde lupae fulvo nutricis tegmine laetus  
 Romulus excipiet gentem, et Mavortia condet  
 Moenia Romanosque suo de nomine dicet.  
 His ego nec metas rerum nec tempora pono;  
 Imperium sine fine dedi. Quin aspera Iuno,  
 280 Quae mare nunc terrasque metu caelumque fatigat,  
 Consilia in melius referet, mecumque fovebit  
 Romanos, rerum dominos, gentemque togatam.

ponitur in Aeneide, numquam in orationibus. | 256. *osc. lib.*, leviter tetigit, contigit suo ore summa eius labella. | 257. *metu*, v. E. 5, 29 et G. 2, 389. | 260. v. vs. 237. | 261. *tibi*, v. E. 8, 6. | 262. Videtur Iuppiter hic ita loqui, quasi quendam librum fatalem manu teneat ac non tantum priores paginas introspectat, sed „longius volvens“ medias quoque et postremas. Arripuit haec verba Virgili Ovidius ac rhetorice, sed parum feliciter, exornavit Met. 15, 809—14. — *movebo*, ut Ovid. Met. 14, 20 „carmen ore move sacro.“ | 264. *mores*, iura, leges, constituet. | 266. *hiberna*, hibernorum tempora, hiemes. — *Rut. sub.*, tertius esse casus videtur: ex quo Rutuli subacti erunt; Demosth. in Mid. c. 24 „καταρροῦμεν ἥδη τῇ χρόσει διαγεγονότα ἐπὶ ὀκτώ.“ | 268. *regno* (sextus casus), regio, quo ea res continebatur, imperio; hoc enim everso nulla erat amplius res Ilia. | 269. *m. orbis*, annos. — *volv. mensibus*, dum se circumvolvunt, circumagunt; 9, 7. Cic. Off. 3, 16 „De iure praediorum sanctum apud nos est iure civili, ut his vendendis vitia dicerentur.“ i. e. cum ea venderentur. | 270. *Lavini*, v. E. 1, 93 et supra vs. 5. | 271. „longam Albam“, at 6, 766 „Longa Alba“, quo discrimine? | 272. *iam*, v. 8, 42. | 273. *Hectorea*, improprie, Troiana, ut 5, 190. — *regina*, i. e. regio sanguine orta; Rhea Silvia, virgo Vestalis, Ilia ob originem Troianam dicta. | 274. *M. gravis*, e M. grvida. | 275. gerens cassidem ex pelle lupina factam. | 276. Numitor et Amulius cum filios non reliquissent, propagavit post eos gentem Romulus. | 280. *terras caelumq.*, i. e. omnia; *fatigare*, affatim agitare, turbare; cf. 11, 400 sq. | 281.

- Sic placitum. Veniet lustris habentibus actas,  
 Cum domus Assaraci Phthiam clarasque Mycenae  
 285 Servitio premet ac victis dominabitur Argis.  
 Nascetur pulchra Troianus origine Caesar,  
 Imperium Oceano, famam qui terminet astris,  
 Iulius, a magno demissum nomen Iulo.  
 Hunc tu olim caelo, spoliis Orientis onustum,  
 290 Accipies securus; vocabitur hic quoque votis.  
 Aspera tum positis mitescent saecula bellis;  
 Cana Fides, et Vesta, Remo cum fratre Quirinus,  
 Iura dabunt; dirae ferro et compagibus artis  
 Claudentur Belli portae; Furor impius intus  
 295 Saeva sedens super arma et centum vinctus aenis  
 Post tergum nodis fremet horridus ore cruento.  
 Haec ait, et Maia genitum demittit ab alto,  
 Ut terrae, utque novae pateant Karthaginis arces  
 Hospitio Teucris, ne fati nescia Dido  
 300 Finibus arceret. Volat ille per aera magnum  
 Remigio alarum, ac Libyae citus adstitit oris.  
 Et iam iussa facit, ponuntque ferocia Poeni  
 Corda volente deo; in primis regina quietum  
 Accipit in Teucros animum mentemque benignam.

11, 425 sq. | 284 sq. Assaracus proavus Aeneae; Phthia oppidum Thessaliae, patria Achillis; Mycenis Agamemnon, Argis Diomedes regnabat; utraque urbs Peloponnesi. | 286. Caesar, i. e. Augustus. | 287. cf. vs. 379. | 288. *demissus*, quod ab Iulo, qui gentis Iuliae auctor habebatur, ad eum devenit. | 289. *sp. O. on.*, spectant haec ad bellum Antonianum; cf. 8, 678—688. | 290. *securus*, nullo intercedente, placata scilicet Iunone; et cf. G. 1, 42, ubi etiam, quid sit *votis*, exposuimus. — *hic quoque*, ut Aeneas, vs. 259 sq. | 291 sqq. Romani dii Romanaeque leges universum terrarum orbem component pacabantque. | 292. *Fides cuncta*, prisca, qualis a maioribus colebatur; Vesta cum Penatibus in Italiam advecta ab Aenea, quaedam quasi praeses religionum. Servius „Vesta Religio, quia nullum sacrificium sine igne est, unde et ipsa et Janus in omnibus sacrificiis invocantur.“ — Remum et Romulum, ex bellatoribus pacificatores factos et tanquam propositi compotes, fraterno animo conspirare in regenda re Romana significat poeta sine dubio certos quosdam auctores secutus, qui Remum non a Romulo, sed ab alio homine (Celerem appellat Servius ad 11, 603 et Ovid. *Past.* 4, 835 sqq.) occisum rettulerunt. | 297. cf. 8, 138 sq. — Dido metanae, ne Pygmalion cum infesta classe veniret, litus (vs. 564) praesidiis tuebatur; nec vanum fuisse hunc metum eo ostenditur, quod aliquanto post Anna, soror Didonia, eundem Pygmalionem fugiens Meliten insulam reliquit, Ovid. *F.* 3, 569—80. Itaque verendum erat, ne Troiani pro hostibus haberentur ac vi arcerentur ab litore. Huic periculo occurri non poterat, nisi dei alienius interventu. Sic factum est, ut, qui custodiebant litus, etsi primo arma mimitabantur, tamen lectos ex singulis navibus ovatores ad reginam ire paterentur. | 299. *ne fati nescia* ... *arceret*. Non hoc dicit poeta „ne nescia esset fati (neque enim tum attinebat Didonem id scire) et arceret Aeneam,“ sed hoc „ne Dido, cum nescia sit fati, arc. Aen.“ Iuppiter Aeneae res conquassatas volebat restitui, ut, quo fatum cum vocabat, salvus veniret in Italiam. | 301. *Rem. alarum*, ut 6, 12. *πτεροῖς ἐφέσει* Rarip.

- 305 At pius Aeneas, per noctem plurima volvens,  
 Ut primum lux alma data est, exire locosque  
 Explorare novos, quas vento accesserit oras,  
 Qui teneant, nam inculta videt, hominesne feraene,  
 Quaerere constituit, sociisque exacta referre.
- 310 Classem in convexo nemorum sub rupe cavata  
 Arboribus clausam circum atque horrentibus umbris  
 Occulit; ipse uno graditur comitatus Achate,  
 Bina manu lato crispans hastilia ferro.  
 Cui mater media sese tulit obvia silva,
- 315 Virginis os habitumque gerens et virginis arma,  
 Spartanæ, vel qualis equos Threissa fatigat  
 Harpalyce volucremque fuga praevertitur Hebrum.  
 Namque humeris de more habilem suspenderit arcum  
 Venatrix, dederatque comam diffundere ventis,
- 320 Nuda genu, nodoque sinus collecta fluentis.  
 Ac prior, Heus, inquit, iuvenes, monstrate, mearum  
 Vidistis si quam hic errantem forte sororum,  
 Succinctam pharetra et maculosæ tegmine lyncis,  
 Aut spumantis apri cursum clamore prementem.
- 325 Sic Venus; et Veneris contra sic filius orsus:  
 Nulla tuarum audita mihi neque visa sororum,  
 O — quam te memorem, virgo? namque haud tibi voltus  
 Mortalis, nec vox hominem sonat; o, dea certe;  
 An Phoebi soror? an Nympharum sanguinis una?
- 330 Sis felix, nostrumque leves, quaecumque, laborem,  
 Et, quo sub caelo tandem, quibus orbis in oris  
 Lactemur, doceas; ignari hominumque locorumque

305—417. *Postero die Aeneas exploranti regionem, in quam egressus erat, obviam se praebet Venus in speciem venatricis ornata, docet eum, quæ tum maxime eius intererat scire, iubetque bono animo esse et ad reginam Didonem pergere. Sero mater ab Aenea agnita abijt Paphum, Aeneam autem eiusque comites nebula circumfundit, quo ne conspici possint a quoquam.* 309. *exacta*, certa.] 310. *planus*: sub convexa rupe silvis consita.] 311. *horrentis*, v. vs. 165.] 313. *crisp. hast.*, gerens hastilia ab incessu ipsius nutantia. — *bina*, ex more heroum Homericorum, et cf. 12, 165. 488.] 316 sq. *Harpalyce*, filia Harpalycei regis Amymaeorum, populi Thracii. Hanc ne equites quidem insequentes assequi potuerunt, ut refert Servius. — *Praesentia fatigat et praevertitur* significant rem ex fabulis aut ex artis operibus notam, ut ap. Sil. 2, 73 sq. „Quales Threiciae Rhodopen .. lustrant .. cursuque fatigant Hebrum.“ adde Tib. 2, 4, 55. — *Hebrum*, v. E. 10, 65. Silius 3, 307 „cui cesserit incitus annis: Tanta fuga est.“] 318. *habilem*, qui facile haberi, i. e. geri, potest, ut 9, 305, propterea quæ aptum virgini.] 320. *Nuda g.*, Ovid. Met. 10, 536 „Nuda genu, vestem ritu succincta Dianæ.“ — *nodo*, v. 11, 776. Ceterum v. E. 3, 106.] 323. *Succingi* h. l. significat instrui aliqua re ita, ut ea cinctus ope adiungatur. Ceterum v. G. 4, 342.] 324. cf. G. 3, 413.] 327. Similis orationis forma apud Demosth. „Εἰς ὃ — τί ἂν εἰπῶν σέ τις ὁρθῶς προσέλποι;“] 330. v. E. 5, 65.] 332. v. G. 1, 295.]



- Erramus, vento huc vastis et fluctibus acti:  
 Multa tibi ante aras nostra cadet hostia dextra.
- 335 Tum Venus; Haud equidem tali me dignor honore;  
 Virginibus Tyriis mos est gestare pharetram,  
 Purpureoque alte suras vincire cothurno.  
 Punica regna vides, Tyrios et Agenoris urbem;  
 Sed fines Libyci, genus intractabile bello.
- 340 Imperium Dido Tyria regit urbe profecta,  
 Germanum fugiens. Longa est iniuria, longae  
 Ambages; sed summa sequar fastigia rerum.  
 Huic coniunx Sychaeus erat, ditissimus agri  
 Phoenicum, et magno miserae dilectus amore,
- 345 Cui pater intactam dederat, primisque iugarat  
 Ominibus. Sed regna Tyri germanus habebat  
 Pygmalion, scelere ante alios inmanior omnis.  
 Quos inter medius venit furor. Ille Sychaeum  
 Impius ante aras atque auri caecus amore
- 350 Clam ferro incautum superat, securus amorum  
 Germanae; factumque diu celavit, et aegram,  
 Multa malus simulans, vana spe lusit amantem.  
 Ipsa sed in somnis inhumati venit imago  
 Coniugis, ora modis attollens pallida miris;
- 355 Crudelis aras traiectaque pectora ferro  
 Nudavit, caecumque domus scelus omne retextit.  
 Tum celerare fugam patriaque excedere suadet,  
 Auxiliumque viae veteris tellure recludit  
 Thesauros, ignotum argenti pondus et auri.
- 360 His commota fugam Dido sociosque parabat.  
 Conveniunt, quibus aut odium crudele tyranni  
 Aut metus acer erat; navis, quae forte paratae,  
 Corripiunt, onerantque auro. Portantur avari  
 Pygmalionis opes pelago; dux femina facti.
333. Alii *et vastis*.| 334. v. G. 3, 562.| 335. *honore*, cf. vs. 49.| 337. cothurno venantes utebantur; cf. E. 7, 32.| 338. *Agenor*, rex Phoenices, cuius a progenie condita Carthago.| 339. Haec Tyrii tenent, mansueti homines, sed finitimi iis sunt feroces Afri; 4, 40 „Gaetulæ urbes, genus insuperabile bello.“| 340. *Imper. regit*, sic solent Nomina cum Verbis cognatae significationis iungi, ut *sinuare volumina* G. 3, 192. *partitionem distribuere, dividere partitiones* ap. Cic. Partit. or. c. 32 et 40; v. G. 1, 25.| 341 sq. longum est, referre iniuriam ab illo factam, rem exponam summam.| 345 *pater*, Belus.| 346. *Ominibus*, quia apud Romanos nuptiae fiebant captis auguriis.| 349. *aras*, cf. 4, 21.| 350. *sec. am.*, nihil curans amorem, quo soror ipsius illum amplectebatur.| 352. *Fingens nescio* quam fabulam profectum aliquo simulabat Sychaeum spemque faciebat reditarum.| 355. *Crud. a.*, scelus crudele ad aras in se commissum monstravit. Proprie dictum *pectora nudavit*, translate *aras nud.*| 356. *caecum*, passive dictum, quod nequit videri, occultum; cf. 3, 706.| 358. v. G. 4, 88.| 361. *od. crudele*, tale, quale proficiscitur ab ira recenti et quasi cruda, ergo asperissimum.| 364. *P. opes*, scilicet quas ille animo et spe praeceperat, cf. vs.

- 365 Devenere locos, ubi nunc ingentia cernis  
 Moenia surgentemque novae Karthaginis arcem,  
 Mercatique solum, facti de nomine Byrsam,  
 Taurino quantum possent circumdare tergo.  
 Sed vos qui tandem, quibus aut venistis ab oris,  
 370 Quove tenetis iter? Quaerenti talibus ille  
 Suspirans imoque trahens a pectore vocem:  
 O dea, si prima repetens ab origine pergam  
 Et vacet annalis nostrorum audire laborum,  
 Ante diem clauso componet Vesper Olympo.  
 375 Nos Troia antiqua, si vestras forte per auris  
 Troiae nomen iit, diversa per aequora vectos  
 Forte sua Libycis tempestas adpulit oris.  
 Sum pius Aeneas, raptos qui ex hoste Penatis  
 Classe veho mecum, fama super aethera notus.  
 380 Italiam quaero patriam et genus ab Iove summo.  
 Bis denis Phrygium conscendi navibus aequor,  
 Matre dea monstrante viam, data fata secutus;  
 Vix septem convulsae undis Euroque supersunt.  
 Ipse ignotus, egens, Libyae deserta peragro,  
 385 Europa atque Asia pulsus. Nec plura querentem  
 Passa Venus medio sic interfata dolore est:  
 Quisquis es, haud, credo, invisus caelestibus auras  
 Vitalis carpis, Tyriam qui adveneris urbem.  
 Perge modo, atque hinc te reginae ad limina perfer.  
 390 Namque tibi reduces socios classemque relatum  
 Nuntio et in tutum versis aquilonibus actam,  
 Ni frustra augurium vani docuere parentes.  
 Aspice bis senos laetantis agmine cycnos,

369. Justin. 18, 4. | 367. *Byrsam*, quia Graecum *βύρσα* detractam pellem significat; et Byrsa appellabatur arx Carthaginis. | 370. *talibus*, his verbis, s. ita, respondet; ut vs. 559 „Talibus Ilioneus“ locutus est. | 374. *componet* (alii *componat*) quasi fessum quieti tradet; nam componere se, membra sua, dicuntur in lectulo cubantes, v. G. 4, 189. — *Olympo*, porta caeli occidentali. | 376. *diu*, v. 3, 4. | 378. cf. Hom. Od. 9, 19 sq. — *raptos*, cum festinatione et periculo ablatos ex mediis hostibus omnia iam tenentibus, cf. 2, 298. 717. | 380. *Italiam* sedem proavorum meorum ab ipso Iove genus ducentium; cf. 3, 167 sqq. 7, 205 sqq. 240 sqq. | 382. *data f.*, i. e. ea, quae ex decreto aliquo fati constituta sunt a diis, Iove maxime; quare ita loquitur Iuppiter apud Val. Fl. 1, 584 „cum fata darem.“ — *Ceterum* cf. 2, 771 sqq. 3, 94 sqq. 154 sqq. | 386. *querentem* *Passa*, ut 7, 421 „tot incassum *fusus* *patiere* labores?“ 10, 426 „At non *perterrita* Lausus ... *sinit* agmina.“ | 387. cf. Hom. Odys. 3, 27 sq. | 388. *Tyriam* ... *urbem*, quippe ipsam diis caram. | 392. *vani*, decepti decipientesque. | 398 sqq. Duodecim cycnos (totidem numero, quot erant nares dissepiae) procul a litore sublimes supra mare volantes aquila caelo nacta aperto (libere et ad persequendum patenti) turbato agmine dissipabat (ut nares procella dissecerat); hi nunc ex fuga collecti longo ordine (ut nares unius classis, cum intrat pertum) conspiciuntur partim terras capere ... quod faciunt, qui in primo ordine volant ... partim captas ab illis iam despectare ex aere, quod faciunt extremi.

Aetheria quos lapsa plaga Iovis ales aperto  
 395 Turbabat caelo, nunc terras ordine longo  
 Aut capere aut captas iam despectare videntur:  
 Ut reduces illi ludunt stridentibus alis,  
 Et coetu cinxere polum cantusque dedere,  
 Haud aliter puppesque tuae pubesque tuorum  
 400 Aut portum tenet, aut pleno subit ostia velo.  
 Perge modo, et, qua te ducit via, dirige gressum.

Dixit, et avertens rosea cervice refulsit  
 Ambrosiaeque comae divinum vertice odorem  
 Spiravere, pedes vestis defluxit ad imos,  
 405 Et vera incessu patuit dea. Ille ubi matrem  
 Adgnovit, tali fugientem est voce secutus:  
 Quid natum totiens, crudelis tu quoque, falsis  
 Ludis imaginibus? cur dextrae iungere dextram  
 Non datur, ac veras audire et reddere voces?  
 410 Talibus incusat, gressumque ad moenia tendit.  
 At Venus obscuro gradientis aere saepsit,  
 Et multo nebulae circum dea fudit amictu,  
 Cernere ne quis eos, neu quis contingere posset,  
 Molirive moram, aut veniendi poscere caussas.  
 415 Ipsa Paphum sublimis abit sedesque revisit  
 Laeta suas, ubi templum illi, centumque Sabaeo  
 Ture calent arae sertisque recentibus halant.

Corripuere viam interea, qua semita monstrat.  
 Iamque ascendebant collem, qui plurimus urbi  
 420 Imminet adversasque adspectat desuper arces.  
 Miratur molem Aeneas, magalia quondam,  
 Miratur portas strepitumque et strata viarum.  
 Instant ardentes Tyrii; pars ducere muros,  
 Molirique arcem et manibus subvolvere saxa,  
 425 Pars optare locum tecto et concludere sulco;

Ut cycni illi reduces ac liberati periculo nunc gestiant et ut ibidem ante istam dissipationem congregati (*coetu*) et in orbem compositi (*cinxere*) in alto cecinere, sic, cum laetitia cantuque (v. vs. 85) classis tua aut rediit iam aut redit. Probe distinguenda sunt tempora verborum, PraeSENS *ludunt* et Perfecta *cinxere, dedere.* 402. *avertens*, v. G. 1, 163. 403. *Ambr.*, ambrosia, ut unguento decorum, delibatae. — *vertice spiravere*, i. e. a vertice, ut 10, 544 „*veniens* Marsorum montibus Umbro.“ 404. alte cinota ante Venus fuerat; palla vestis dearum; cf. vs. 320 et v. 5, 619. 405. v. E. 2, 53. — *incessu*, cf. Hom. II. 5, 778. 409. *veras*, ut tecum ita, ut filius cum matre, non ut alioquin cum aliena colloquar. 411 sqq. cf. Hom. Od. 7, 14 sqq. 418. v. G. 1, 57. 3, 18.

418—423. *Aeneas progreditur ad urbem, miratur, quae ibi vel factae sunt vel fiunt, opera, atque contemplatur pugnas ad Troiam commissas artis ope in templo effictas; quae res omnem, quoangebatur, motum eximit ex eius animo.* 418. *Corrip.* v., celeriter, raptim, fecerant iter. 420. v. G. 2, 536. 421. *molem* substructionum, Cic. pro Mil. 31. 425. *optare*, sibi eligere, ut 3, 109. — *sulco*, fossa, qua fundamenta ponantur. „Civitas enim, non domus,

- \*\*Iura magistratusque legunt sanctumque senatum;  
 Hic portus alii effodiunt; hic alta theatri  
 Fundamenta locant alii, inmanisque columnas  
 Rupibus excidunt, scaenis decora alta futuris.
- 430 Qualis apes aestate nova per florea rura  
 Exercet sub sole labor, cum gentis adultos  
 Educunt fetus, aut cum liquentia mella  
 Stipant et dulci distendunt nectare cellas,  
 Aut onera accipiunt venientum, aut agmine facto
- 435 Ignavum fucos pecus a praesepibus arcent;  
 Fervet opus, redolentque thymo fragrantia mella.  
 O fortunati, quorum iam moenia surgunt!  
 Aeneas ait et fastigia suspicit urbis.  
 Infert se saeptus nebula — mirabile dictu —
- 440 Per medios, miscetque viris, neque cernitur ulli.  
 Lucus in urbe fuit media, laetissimus umbrae,  
 Quo primum iactati undis et turbine Poeni  
 Effodere loco signum, quod regia Iuno  
 Monstrarat, caput acris equi; sic nam fore bello
- 445 Egregiam et facilem victu per saecula gentem.  
 Hic templum Iunoni ingens Sidonia Dido  
 Condebat, donis opulentum et numine divae,  
 Aerea cui gradibus surgebant limina nixaeque  
 Aere trabes, foribus cardo stridebat aenis.
- 450 Hoc primum in luco nova res oblata timorem

circumdatur sulco," ait Servius.] 426. Hic versus, qui videtur ab aliena manu interpositus, repugnat versui 507. — *Iura m. leg.*, zeugma, nam verbum *legunt* soli vocabulo *magistratus* convenit; iura, leges, non leguntur, sed constituuntur; cf. A. 2, 259. 780. 7, 444. 754. 10, 72. 12, 930 sq.] 427. *portus*, proprie, duos enim habebat Carthago sita in peninsula. — Theatrum eo quidem tempore fuit nullum; poetae obversabatur in ea re urbis Romanae magnificentia, qualis fuit aevo Augusteo.] 430. *nova*, v. E. 8, 29.] 431. cf. G. 4, 162 sqq.] 434. *agm. f.*, v. vs. 82.] 438. *f. s. u.*, puta, cum iam descendisset ex colle adverso in eoque esset, ut urbem ipsam intraret.] 441. *laetus* ubi copiam quandam et affluentiam significat, adiungit sibi Genetivum.] 442. *primum signum*, dum primum incipiunt (aedificandi causa) fodere, inventum, cf. 7, 528.] 443. *signum*, omen.] 444. *Sic nam*, per hoc signum, monstrabat s. portendebat. Iustius 18, 5 de eodem portento: „Ibi quoque equi caput repertum, *bellicosum potentemque* populum futurum significans, urbi auspicatam sedem dedit.“] 445. *facilem victu*, cui facile sit sibi parare, quidquid ad commodum vivendum optabile est.] 447. *numine*, per numen ad ferendam opem scilicet praesentissimum, *donis*, per dona propterea oblata. Sed pro *Condebat* fortasse malis scriptum *Condiderat*; et tum iam exaedificatum fuisse id templum persuadent ea, quae praeterea de eo commemorat poeta. Nempe posuit *condebat* respiciens ad praegressa. Ad ea relatum *condiderat* significaret conditum esse hoc templum ante effossum caput equi; *condebat* significat propter effossum Didonem cepisse consilium eius condendi; ergo ista res effecit, ut ibi conderet templum.] 448. v. G. 4, 541. — Surgebant aerea limina aeraeque trabes, nixae aereis columnis; putabimus autem et has columnas et has tecto suppositas trabes e ligno factas atque aere obductas fuisse, ut Romae olim in Pantheo. — Alii *noxae*.] 450. *Hoc*, in quo conditum erat illud

- Leniit, hic primum Aeneas sperare salutem  
 Ausus et adflictis melius confidere rebus.  
 Namque sub ingenti lustrat dum singula templo,  
 Reginam opperiens, dum, quae fortuna sit urbi,  
 455 Artificumque manus inter se operumque laborem  
 Miratur, videt Iliacas ex ordine pugnas  
 Bellaque iam fama totum volgata per orbem,  
 Atridas, Priamumque, et saevum ambobus Achillen.  
 Constitit, et lacrimans, Quis iam locus, inquit, Achate,  
 460 Quae regio in terris nostri non plena laboris?  
 En Priamus. Sunt hic etiam sua praemia laudi;  
 Sunt lacrimae rerum et mentem mortalia tangunt.  
 Solve metus; feret haec aliquam tibi fama salutem.  
 Sic ait, atque animum pictura pascit inani,  
 465 Multa gemens, largoque humectat flumine voltum.  
 Namque videbat, uti bellantes Pergama circum  
 Hac fugerent Graii, premeret Troiana iuventus;  
 Hac Phryges, instaret curru cristatus Achilles.  
 Nec procul hinc Rhesi niveis tentoria velis  
 470 Adgnoscat lacrimans, primo quae prodita somno  
 Tydides multa vastabat caede cruentus,  
 Ardentisque avertit equos in castra, prius quam  
 Pabula gustassent Troiae Xanthumque bibissent.  
 Parte alia fugiens amissis Troilus armis,  
 475 Infelix puer atque inpar congressus Achilli,  
 Fertur equis, curruque haeret resupinus inani,  
 Lora tenens tamen; huic cervixque comaeque trahuntur  
 Per terram, et versa pulvis inscribitur hasta.

templum; multis enim templis luci erant circumiecti. — *timor.*, cf. vs. 463.]  
 454. *Reg. opp.*, quam videlicet forte audierat venturam. — *fortuna*, pertinet  
 haec ad opulentiam, quae ex magnificentia eius templi apparet.] 455. Opera  
 cum vulgo dicantur, quae statuariorum et caelatorum labore effecta sunt, manus  
 artificum picturas hic dici cum Servio putabimus. — *inter* ~~se~~, dum modo has,  
 modo illa contemplatur.] 456 sqq. Quare haec in templo Iunonis? cf. vs. 24.]  
 458. *ambobus*, Atridis et Priamo, ut ap. Hom. Od. 4, 339 ἀμφοτέροις, i. e.  
 ἑλάττω καὶ νεβροῖς.] 462. *lacr. rerum*, cf. 2, 784 et Eurip. Hec. 743 „ὄρεξ  
 νεύρον τόνδ’, οὐ καταστάζω δάκρυ;“ i. e. ob quem fleo; A. 2, 413 „gemitu  
 atque ereptae virginis ira,“ i. e. dolore et ira ob ereptam virginem. — *rerum*,  
 puta: dignarum, quae desecantur.] 464. *inani*, quippe non ipsas res, sed tantum  
 imaginem rerum repraesentante.] 469. cf. Hom. Il. 10, 434 sqq. — *niv. tent.*  
*velis*: talia tentoria nondum fuerunt ista aetate. Graeci ad Troiam degebant  
 sub casis, qualem descripsit Hom. Il. 24, 448 sqq.] 470. *primo somno*, non  
 prima parte noctis, qua somnus sane est altissimus (cui explicationi adver-  
 satur Homerus Il. 10, 251—253); sed prima nocte, postquam ad Troiam venit  
 et priusquam equi eius „pabula gustassent Troiae“ *est*. His conveniunt, quae  
 loquitur Minerva ap. Eurip. Rhcs. 600 „ὅς (Rhesus) εἰ διολοίσει νύκτα τήνδ’  
 ἐς αὔριον“ x. r. λ.] 471. v. G. 4, 16.] 473. nam si gustassent, fatale erat  
 Troiam expugnari a Graecis non posse.] 474. *Troilus*, Priami fil. — *armis*,

- Interea ad templum non aequae Palladis ibant  
 480 Crinibus Iliades passis peplumque ferebant,  
 Suppliciter tristes et tunsae pectora palmis;  
 Diva solo fixos oculos aversa tenebat.  
 Ter circum Iliacos raptaverat Hectora muros,  
 Exanimumque auro corpus vendebat Achilles.  
 485 Tum vero ingentem gemitum dat pectore ab imo,  
 Ut spolia, ut currus, utque ipsum corpus amici,  
 Tendentemque manus Priamum conspexit inermis.  
 Se quoque principibus permixtum adgnovit Achivis,  
 Eoasque acies et nigri Memnonis arma.  
 490 Ducit Amazonidum lunatis agmina peltis  
 Penthesilea furens, mediisque in milibus ardet,  
 Aurea subnectens exsertae cingula mammae,  
 Bellatrix, audetque viris concurrere virgo.  
 Haec dum Dardanio Aeneae miranda videntur,  
 495 Dum stupet obtutuque haeret defixus in uno,  
 Regina ad templum, forma pulcherrima Dido,  
 Incessit magna iuvenum stipante caterva.  
 Qualis in Eurotae ripis aut per iuga Cynthi  
 Exercet Diana choros, quam mille secutae  
 500 Hinc atque hinc glomerantur Oreades; illa pharetram  
 Fert humero, gradiensque deas supereminet omnis;  
 Latonae tacitum pertemptant gaudia pectus:  
 Talis erat Dido, talem se laeta ferebat  
 Per medios, instans operi regnisque futuris.  
 505 Tum foribus divae, media testudine templi,  
 Saepta armis solioque alte subnixa resedit.  
 Iura dabat legesque viris, operumque laborem

clipeo, nam hastam tenebat, cf. vs. 478.] 479—482. Sumta haec sunt ex Hom. II. 6, 269—312. — *aequae*, v. 6, 129. — *peplus* inprimis usitatus inter munera Minervae oblata. ] 481. *Suppliciter tristes*, i. e. supplicantium modo tristes; Sil. 6, 572 „Sollicite laeti.“ — *tunsae*, v. G. 1, 206.] 483—487. cf. Hom. II. 24, 478 sqq. — *raptavit* spirantem adhuc, corpus mortui vendidit, v. 2, 273.] 489. *Eoas*, quia Memnon, Tithoni filius et Aurorae, Aethiops erat. — *arma*, fabrefacta illa a Vulcano, 8, 384.] 490. Amazonas Priamo auxilio venisse referant, qui post Homerum fuerunt, poetae.] 492. Dextra Amazonum mamma erat nudata.

494—578. *Ad idem templum venit Dido, veniunt etiam duces navium Troianarum in aliam partem litoris eiectarum, quaeque iniuriam a custodibus litoris sibi factam propitio responso Didenis placantur.*] 494. *Dardanio*, cuius quidem animum necesse esset his rebus in aliena terra nobilitatis penitus commoveri; cf. 7, 663. — *Aeneae* ... *vid.*, ab Aenea videntur.] 496. v. 2, 270.] 498. *Eurotas* fluvius Laconicus. — *Cynthi*, v. G. 3, 36.] 505. sub tecto templi testudinato resedit. *foribus d.*, i. e. in aditu cellae, in qua simulacrum erat Iunonis. — Ceterum Virgilius heroicæ ætati attribuit multa, quæ post inventa sunt, ut h. l. artem concamerandi et morem Romanorum in templis senatum habentium, ad fores templorum tribunalia ponentium.] 507. *Iura d. l. v.* Iura continentur legibus. Remulus ap. Liv. 1, 8 „vocata ad consilium multitudo, quæ coalescere in populi

- Partibus aequabat iustis aut sorte trahēbat:  
 Cum subito Aeneas concursu accedere magno  
 510 Anthea Sergestumque videt fortemque Cleonanthum,  
 Teucrorumque alios, ater quos aequore turbo  
 Dispulerat penitusque alias avexerat oras.  
 Obstipuit simul ipse, simul percussus Achates  
 Laetitiaque metuque; avidi coniungere dexteras  
 515 Ardebant; sed res animos incognita turbat.  
 Dissimulant, et nube cava speculantur amicti,  
 Quae fortuna viris, classem quo litore linquant,  
 Quid veniant cuncti; nam lecti navibus ibant,  
 Orantes veniam, et templum clamore petebant.  
 520 Postquam introgressi et coram data copia fandi,  
 Maximus Hioneus placido sic pectore coepit:  
 O Regina, novam cui condere Iuppiter urbem  
 Iustitiaque dedit gentis frenare superbas,  
 Troes te miseri, ventis maria omnia vecti,  
 525 Oramus: prohibe infandos a navibus ignis,  
 Parce pio generi, et propius res aspice nostras.  
 Non nos aut ferro Libyco populare Penatis  
 Venimus, aut raptas ad litora vertere praedas;  
 Non ea vis animo, nec tanta superbia victis.  
 530 Est locus, Hesperiam Graii cognomine dicunt,  
 Terra antiqua, potens armis atque ubere glabrae;  
 Oenotri coluere viri; nunc fama, minores  
 Italiam dixisse ducis de nomine gentem.  
 Hic cursus fuit:  
 535 Cum subito adsurgens fluctu nimbosus Orion  
 In vada caeca tulit, penitusque procacibus austris  
 Perque undas, superante salo, perque invia saxa  
 Dispulit; huc pauci vestris adnavimus oris.  
 Quod genus hoc hominum? quaeve hunc tam barbara morem  
 540 Permittit patria? hospitio prohibemur arenae;  
 Bella cient, primaque vetant consistere terra.

unius corpus nulla re, praeterquam legibus, poterat, iura dedit.“] 508. *sorte trahē. laborem*, sorte ducta suum cuique assignabat laborem.] 515. *res inc.*, causa ignota et illorum adventus, et Poenorum concursus.] 516. *Dissimulant*, dissimulatione utuntur, v. G. 1, 163. dissimulant autem illi praesentiam suam. — *cava*, v. 2, 360.] 518. *cuncti*, in unam videlicet legationem coniuncti; legatorum enim modo venire eos videbant, non exploratorum, qui alii alio discedunt, ut 7, 150.] 519. *veniam*, propitiā voluntatem, cf. 4, 435.] 521. *Maximus et aetate et dignitate*, ut princeps legationis.] 523. *sup.*, cf. vs. 539—41.] 524. *maria vecti*, ut vs. 67 et apud Cic. de Fin. 2, 34. „Xerxes cum *maria ambulasset terramque navigasset*.“] 525. *populare* hic idem, quod *vastare* vs. 471. Liv. 3, 6 „urbs Romana morbo populatur.“] 533. *gentem*, terram. Hom. Od. 17, 526 „*Θεσπρωτῶν ἐν πτόνι δῆμῳ*.“] 534. Alii *Huc c. f.*, v. 6, 18.] 535. *proprie mare* dicitur fluctu assurgere; id hoc loco Orioni tribuitur, quo oriente procellae mare turbare solent; et cf. 7, 719.] 536. v. vs. 356.] 540 sq. v. vs.

- Si genus humanum et mortalia temnitis arma;  
 At sperate deos memores fandi atque nefandi.  
 Rex erat Aeneas nobis, quo iustior alter  
 545 Nec pietate fuit, nec bello maior et armis.  
 Quem si fata virum servant, si vescitur aura  
 Aetherea, neque adhuc crudelibus occubat umbris,  
 Non metus, officio ne te certasse priorem  
 Paeniteat. Sunt et Siculis regionibus urbes  
 550 Arvaeque Troianoque a sanguine clarus Acestes.  
 Quassatam ventis liceat subducere classem  
 Et silvis aptare trabes et stringere remos,  
 Si datur Italiam, sociis et rege recepto,  
 Tendere, ut Italiam laeti Latiumque petamus,  
 555 Sin absumpta salus, et te, pater optume Teucrum,  
 Pontus habet Libyae, nec spes iam restat Iuli,  
 At freta Sicaniae saltem sedesque paratas,  
 Unde huc advecti, regemque petamus Acesten.  
 Talibus Ilioneus; cuncti simul ore fremebant  
 560 Dardanidae.

- Tum breviter Dido, voltum demissa, profatur:  
 Solvite corde metum, Teucri, secludite curas.  
 Res dura et regni novitas me talia cogunt  
 Moliri et late finis custode tueri.  
 565 Quis genus Aeneadum, quis Troiae nesciat urbem  
 Virtutesque virosque, aut tanti incendia belli?  
 Non obtusa adeo gestamus pectora Poeni,

297.] 543. *sperate*, lenius verbum pro graviore *metuite*; similiter *sperare dolorem* 4, 419. adde 11, 275.] 544. *iustior pietate*: veteres pietatem in parte iustitiae ponebant; Cic. de N. D. 1, 41 „est enim pietas iustitia adversum deos.“ Servius „pietas pars iustitiae est.“ Alii non post *fuit* interpungunt, sed post *alter*, ut e subiectis revocetur particula *nec*: quo *nec* iustior alter. Eurip. Troad. 481 „ὄς Τρωάς, οὗθ' Ἑλληνίς, οὐδὲ βάρβαρος γυνὴ τεκοῦσα κομπάσειεν ἂν ποτε,“ i. e. οὗς οὐτε Τρωάς. Infra 6, 692 „Quas ego te (*per*) terras, et quanta *per* aequora vectum Accipio.“ adde 2, 654. 5, 512. 6, 416. 8, 143. 7, 296; tum 11, 174 „(si) Esset par actas (Pallanti) et idem *si* robur ab annis.“] 546. *vesc. aura aeth.*, luce caelesti, cf. 10, 898. Stat. Theb. 1, 287 de Oedipo caeco: „nec iam amplius aethere nostro vescitur.“ Vocabulum *aura* apud Virgilium significat interdum radios quosdam a re lucente vel splendente (*auri aura* 6, 204) exeuntes sensumque videndi ferientes.] 547. *occ. umbris*, vi Orcina oppressus est; *umbris* Dativus, ut 2, 62 *occumbere morti*. — *crudelibus*, Horat. Od. 2, 3, 24 „Victima nil miserantis Orci.“] 548. Alii *nec te*.] 550. *urbes*, cognatas puta Troianis et amicas, id quod proximo versu indicatur; atque est ea res historiae monumentis testata. — De *Acestes* cf. 5, 38.] 551. v. 3, 71.] 552. s. *apt. tr.*, caesas in silvis arbores ad usum navium accommodare. — *string. r.*, cf. 4, 399. Hom. Od. 6, 269 „ἀποξύνουσιν ἑρετμά.“] 559. v. vs. 370. — Homer. „Ἐνθ' ἄλλοι μὲν πάντες ἐπενεφμήσαν Ἀχαιοί.“] 561. *volt. demissa*, Donatus „non solum propter femineam verecundiam, veram etiam propter obiecta vs. 539—41.“] 563. *Res dura*, v. vs. 297.] 567. *obt. adeo*, ut nihil curemus talia.] 568. non tam longe a cursu solis remoti, nec ad boreales partes



- Nec tam aversus equos Tyria Sol iungit ab urbe.  
 Seu vos Hesperiam magnam Saturniaque arva,  
 570 Sive Erycis finis regemque optatis Acesten,  
 Auxilio tutos dimittam, opibusque iuvabo.  
 Voltis et his mecum pariter considerare regnis:  
 Urbem quam statuo, vestra est; subducite navis;  
 Tros Tyriusque mihi nullo discrimine agetur.  
 575 Atque utinam rex ipse Noto compulsus eodem  
 Adforet Aeneas! Equidem per litora certos  
 Dimittam et Libyae lustrare extrema iubebo,  
 Si quibus eiectus silvis aut urbibus errat.

- His animum arrecti dictis et fortis Achates  
 580 Et pater Aeneas iamdudum erumpere nubem  
 Ardebant. Prior Aenean compellat Achates:  
 Nate dea, quae nunc animo sententia surgit?  
 Omnia tuta vides, classem sociosque receptos.  
 Unus abest, medio in fluctu quem vidimus ipsi  
 585 Submersum; dictis respondent cetera matris.  
 Vix ea fatus erat, cum circumfusa repente  
 Scindit se nubes et in aethera purgat apertum.  
 Restitit Aeneas claraque in luce refulsit,  
 Os humerosque deo similis; namque ipsa decoram  
 590 Caesariem nato genetrix lumenque iuventae  
 Purpureum et laetos oculis adflarat honores:  
 Quale manus addunt ebori decus, aut ubi flavo  
 Argentum Pariusve lapis circumdatur auro.  
 Tum sic reginam adloquitur, cunctisque repente  
 595 Improvisus ait: Coram, quem quaeritis, adsum,  
 Troius Aeneas, Libycis ereptus ab undis.  
 O sola infandos Troiae miserata labores,

reieci sumus, quo nulla harum rerum notitia perveniat.] 569. v. vs. 225 et G. 2, 173.] 570. *Eryx* mons Siciliae.] 572. v. G. 2, 519. — *pariter*, pari cum Poenis iure.] 573. ut Terent. Eunuch. 4, 3, 11 „*Eunuchum* quem dedisti nobis, quas turbas dedit!“] 575. Notus et Eurys apud poetas saepe omnino aliquem vehementiorem ventum indicant.] 576. *certos*, delectos, qui id cum cura fideque facere possint.] 578. *Si*, v. E. 6, 57.

579—656. *Aeneas rupta, qua circumdatus erat, nube in conspectum prodit, gratias agit Didoni salutaturque receptos socios. Dido benigno sermone excipit Aeneam, sociis eius, qui ad naves remanserant, mittit munera, instruit epulas in regis aedibus; Aeneas autem Ascanium adduci et insignia dona Didoni ex navibus afferri iubet.*] 584. cf. vs. 113 sqq.] 587. *purgat se*, solvitur, ut aer purus reddatur.] 589. Valer. Fl. 2, 490 sqq. de Hercule: „neque enim tam lata videbam Pectora, Neptunus muros cum iungeret astris, Nec tales humeros pharetramque gerebat Apollo.“ — afflando decoram reddidit caesariem.] 591. *honores*, gratiam, pulchritudinem.] 592 sq. Pulchritudo Aeneae aucta est, decore singulis partibus a Venere circumfuso, sicuti ebori aut argento aut marmori decus additur, cum manu artificis auro affabre ornatur; et cf. Hom. Od. 6, 229 sqq. — *aut ubi*, aut quale est decus, ubi *cet.*] 593. *Parius l.*, v. G. 3,

- Quae nos, reliquias Danaum, terraeque marisque  
 Omnibus exhaustos iam casibus, omnium egenos,  
 600 Urbe, domo, socias, grates persolvere dignas  
 Non opis est nostrae, Dido, nec quidquid ubique est  
 Gentis Dardaniae, magnum quae sparsa per orbem.  
 Di tibi, si qua pios respectant numina, si quid  
 Usquam iustitia est et mens sibi conscia recti,  
 605 Praemia digna ferant. Quae te tam laeta tulerunt  
 Saecula? qui tanti talem genuere parentes?  
 In freta dum fluvii current, dum montibus umbrae  
 Lustrabunt convexa, polus dum sidera pascet,  
 Semper honos nomenque tuum laudesque manebunt,  
 610 Quae me cumque vocant terrae. Sic fatus, amicum  
 Ilionea petit dextra, laevaque Serestum,  
 Post alios, fortemque Gyan, fortemque Cloanthum.  
 Obstipuit primo aspectu Sidonia Dido,  
 Casu deinde viri tanto, et sic ore locuta est:  
 615 Quis te, nate dea, per tanta pericula casus  
 Insequitur? quae vis inmanibus adplicat oris?  
 Tunc ille Aeneas, quem Dardanio Anchisae  
 Alma Venus Phrygii genuit Simoentis ad undam?  
 Atque equidem Teucrum memini Sidona venire  
 620 Finibus expulsum patriis, nova regna petentem  
 Auxilio Beli; genitor tum Belus opimam  
 Vastabat Cyprum et victor ditione tenebat.  
 Tempore iam ex illo casus mihi cognitus urbis  
 Troianae nomenque tuum regesque Pelasgi.  
 625 Ipse hostis Teucros insigni laude ferebat,  
 Seque ortum antiqua Teucrorum ab stirpe volebat.  
 Quare agite, o tectis, iuvenes, succedite nostris.  
 Me quoque per multos similis fortuna labores  
 Iactatam hac demum voluit consistere terra.  
 630 Non ignara mali miseris succurrere disco.  
 Sic memorat; simul Aenean in regia ducit  
 Tecta, simul divom templis indicit honorem.

34. | 598. cf. vs. 30. | 600. cf. 573 sq. | 601. *nec quidquid*, nec est opis Dardanorum, qui sunt. | 602. *sp. p. orb.*, cf. vs. 242 sq. 549 sq. 3, 190. 295 sqq. | 603. *si quid*, si quo est in honore iustitia et conscientia recti. | 604. alii *iustitiae*. | 607. *dum* in montibus umbrae cum solis flexu obibunt convexa; puta ipsos montes convexos. | 608. *polus d. s. p.*, dum sidera in polo pascentur, i. e. humoribus e terra ac mari surgentibus alentur, quae fuit veterum opinio. | 609. *manebunt*, nulla oblivione obterentur in iis terris, quae me cumque vocant. | 616. *inmanibus*, quarum immanes ferique incolae. | 617. v. E. 2, 24. | 619. Teucer, Aiaceis maioris frater, cum a Troia Salaminem reverteretur, a patre Telamone non admissus novas sedes novumque regnum sibi quaerebat. Beli beneficio Cyprum obtinuit. | 624. Pelasgi antiquissimi incolae Graeciae; hinc veteres Graeci a poetis interdum hoc nomine appellantur. | 632. *t. ind. hon.*, supplicationem decernit propter fel-

- Nec minus interea sociis ad litora mittit  
 Viginti tauros, magnorum horrentia centum  
 635 Terga suum, pinguis centum cum matribus agnos,  
 Munera laetitiamque dii.  
 At domus interior regali splendida luxu  
 Instruitur, mediisque parant convivia tectis:  
 Arte laboratae vestes ostroque superbo,  
 640 Ingens argentum mensis, caelataque in auro  
 Fortia facta patrum, series longissima rerum  
 Per tot ducta viros antiquae ab origine gentis.  
 Aeneas — neque enim patrius consistere mentem  
 Passus amor — rapidum ad navis praemittit Achaten,  
 645 Ascanio ferat haec, ipsumque ad moenia ducat;  
 Omnis in Ascanio cari stat cura parentis.  
 Munera praeterea, Iliacis erepta ruinis,  
 Ferre iubet, pallam signis auroque rigentem  
 Et circumtextum croceo velamen acantho,  
 650 Ornatus Argivae Helenae, quos illa Mycenis,  
 Pergama cum peteret inconcessosque hymenaeos,  
 Extulerat, matris Leda mirabile donum;  
 Praeterea sceptrum, Ilione quod gesserat olim,  
 Maxuma natarum Priami, colloque monile  
 655 Bacatum, et duplicem gemmis auroque coronam.  
 Haec celerans iter ad navis tendebat Achates.  
 At Cytherea novas artes, nova pectore versat  
 Consilia, ut faciem mutatus et ora Cupido  
 Pro dulci Ascanio veniat, donisque furem  
 660 Incendat reginam, atque ossibus implicet ignem;  
 Quippe domum timet ambiguam Tyriosque bilinguis,  
 Urit atrox Iuno, et sub noctem cura recursat.

cem Aeneae hospitis adventum. | 636. *laet. dii*, i. e. diei. Cum ea, quae vs. 634—35 commemorantur, ad usum multorum dierum sufficiant, Servius ait versu 636 alia munera significari, quae ad hunc potissimum diem hilariter exigendum comparata fuerint. — Alii *dei*. | 639 sqq. In narrandi describendique brevitate saepe Substantiva sola sine Verbis ponuntur; cf. 3, 216 sqq. 392. 4, 201 sq. 5, 822 sqq. 7, 732. 8, 678 sqq. 11, 633. G. 2, 473. — *vestes*, v. G. 2, 464. | 640. *Ingens* ad multitudinem vasorum argenteorum refertur. | 644. *praemittit*, mittit, ut ante illas, quas Dido parabat, epulas et nuntiet (*ferat*) haec Ascanio et adducat ipsum cum muneribus, cf. 6, 34. | 648. *signis auroque*, signis aureis intextis; v. G. 1, 173. | 654. *collo* Dativus. | 656. *duplicem*, quippe ex auro factam et gemmis distinctam.

657—696. *Venus perfidiam Poenorum timens pro Ascanio substituit Cupidinem, qui Didonis animo amore Aeneae incendat.* | 658. v. E. 3, 106. | 659. *furem*, ut furat amore; 4, 22 „animumque *labantem* Impulit,” i. e. impulit, ut iam labet; 2, 429 „nec te tua plurima, Panthu, *Labentem* pietas ... textit,” i. e. quin caderes. — Ceterum cf. vs. 714. | 660. Cic. de Divinat. 1, 36 „Dii vim suam naturis hominum *implicant*,” i. e. penitus immittunt. — *ossib.*, v. G. 3, 272. | 661. *dom. ambig.*, quippe scelere Pygmalionis adductam in perfidiae suspicionem. | 662. *Urit atr. I.*, cruciat Venerem Iunonis animus

- Ergo his aligerum dictis adfatur Amorem:  
 Nate, meae vires, mea magna potentia solus,  
 665 Nate, patris summi qui tela Typhoia temnis;  
 Ad te confugio et supplex tua numina posco.  
 Frater ut Aeneas pelago tuus omnia circum  
 Litora iactetur odiis Iunonis iniquae,  
 Nota tibi, et nostro doluisti saepe dolore.  
 670 Hunc Phoenissa tenet Dido blandisque moratur  
 Vocibus; et vereor, quo se Iunonia vertant  
 Hospitia; haud tanto cessabit cardine rerum.  
 Quocirca capere ante dolis et cingere flamma  
 Reginam meditor, nē quo se numine mutet,  
 675 Sed magno Aeneae mecum teneatur amore.  
 Qua facere id possis, nostram nunc accipe mentem:  
 Regius accitu cari genitoris ad urbem  
 Sidoniam puer ire parat, mea maxuma cura,  
 Dona ferens, pelago et flammis restantia Troiae;  
 680 Hunc ego sopitum somno super alta Cythera  
 Aut super Idalium sacrata sede recondam,  
 Ne qua scire dolos mediusve occurrere possit.  
 Tu faciem illius noctem non amplius unam  
 Falle dolo, et notos pueri puer indue voltus,  
 685 Ut, cum te gremio accipiet laetissima Dido  
 Regalis inter mensas laticemque Lyaeum,  
 Cum dabit amplexus atque oscula dulcia figet,  
 Occultum inspiret ignem fallasque veneno.  
 Paret Amor dictis carae genetricis, et alas  
 690 Exuit, et gressu gaudens incedit Iuli.  
 At Venus Ascanio placidam per membra quietem  
 Inrigat, et fotum gremio dea tollit in altos  
 Idaliae lucos, ubi mollis amarus illum  
 Floribus et dulci adspirans conplectitur umbra.  
 695 Iamque ibat dicto parens et dona Cupido  
 Regia portabat Tyriis, duce laetus Achate.

infestus Aeneae. — *sub n.*: nocte ingruente curae solent recrudescere, cf. 4, 531. Ovid. Met. 8, 81.] 664. *solus* nominandi casu, ut Ovid. Her. 14, 73 „Surge, age, Belide, de tot modo fratribus unus,“ cf. etiam 6, 836; omnino Vacativorum *une* et *sole* rarissima sunt exempla, Vocativorum *nulle* et *tote* et *ulle*, ut videtur, nulla.] 665. *Typhoia*, quibus Typhoeum prostravit, fulmina.] 668. v. G. 4, 453.] 669. *Nota*, Graeco more, pro *Notum est*.] 671. *Iunonia* h., hospitium in urbe Iunoni sacra.] 672. *cessabit*, Iuno, quod repetendum ex praegresso *Iunonia*, ut *πατήρ* ex *πατρώα* apud Eurip. Hec. 23. — *cardo* translate dicitur in omni re id, in quo maximum momentum positum est.] 673. *flamma*, cf. vs. 660.] 674. *ne q. s. n. mut.*, ne machinatione dei alicuius, Iunonis, mutetur animus eius.] 679. v. G. 4, 88.] 680. *super* ad supposita spectans locum motumve definit accuratius, quam *in* et *ad*, cf. vs. 700. 6, 203. 515. 7, 557. Ovid. Met. 15, 875.] 684. *Falle faciem*, mentire, simula; *μορφήν δολώσας* Soph. Phil. 129.] 688. *fall. veneno*, venenum instilles non sentienti.

- Cum venit, aulaeis iam se regina superbis  
 Aurea composuit sponda mediamque locavit,  
 Iam pater Aeneas et iam Troiana iuventus  
 700 Conveniunt, stratoque super discumbitur ostro.  
 Dant manibus famuli lymphas, Cereremque canistris  
 Expediunt, tonsisque ferunt mantelia villis.  
 Quinquaginta intus famulae, quibus ordine longam  
 Cura penum struere et flammis adolere Penatis;  
 705 Centum aliae totidemque pares aetate ministri,  
 Qui dapibus mensas onerent et pocula ponant.  
 Nec non et Tyrii per limina laeta frequentes  
 Convenere, toris iussi discumbere pictis.  
 Mirantur dona Aeneae, mirantur Iulum  
 710 Flagrantisque dei voltus simulataque verba,  
 Pallamque et pictum croceo velamen acantho.  
 Praecipue infelix, pesti devota futurae,  
 Expleri mentem nequit ardescitque tuendo  
 Phoenissa, et pariter puero donisque movetur.  
 715 Ille ubi complexu Aeneae colloque pendit  
 Et magnum falsi inplevit genitoris amorem,  
 Reginam petit. Haec oculis, haec pectore toto  
 Haeret et interdum gremio foveat, inscia Dido,  
 Insidat quantus miserae deus. At memor ille

697—756. *Initur convivium a Didone apparatus; inter sermones conviviales Dido petit ab Aenea, ut excidium Troiae suosque errores exponat.* | 697. *aulaeis*, puta loco in modum tentorii aulaeis intento. | 698. *Aurēā* sextus casus per synaeresim bisyllabus, cf. 7, 190. 5, 352. 6, 280. 7, 609. — *composuit*, v. G. 4, 189. — *mediam*: Sallust. ap. Donat. Sertorii convivium sic describit, ut hic, quia dominus fuit, in medio se collocarit. Adde Sall. Iug. 11. | 701 sq. v. G. 4, 376 sq. — *manibus* tertius casus sive ex *dant* suspensus, sive cum *lymphas* coniungendus. — *que ... que*, i. q. alii ... alii; cf. E. 1, 65 sqq. A. 10. 130 sq. 6, 16. 11, 76. 77. 206. 606. 2, 442 sq. Sophocl. Ai. 299. Br. „*ἐν γὰρ τῇ ἀρχαίᾳ*“, i. e. pecudes alias mactabat, aliarum spinam secabat; et v. 6, 567. | 701 sq. *C. c. exped.*, promunt panem ex canistris distribuuntque convivis. | 703 sq. Ipsum convivium erat in atrio; v. vs. 726; *intus* autem, in parte aedium interiore, erant famulae, quae *longam penum*, longam seriem dapum, struerent s. in singulos missus componerent (unde structores, i. e. ferculorum compositores, appellati) *ordine*, certa quadam ratione et ut fieri debet aut solet; eadem *flammis adolent Penates*, i. e. tus in focis accendunt ad habendum Penatibus honorem; G. 4, 379. E. 8, 65. Iam cf. Sil. Ital. 11, 276 sqq. „non una ministri Turba gregis: posuisse dapes his addita cura, His adolere focos, his ordine pocula ferre; Nec non et certis struitur penus.“ Ceterum alii legunt vs. 703 *ordine longo*, et vs. 706 *onerant et ponunt*. | 705. Tac. Ann. 15, 69 „Vestinus decora servitia et pari aetate habebat.“ | 708. *iussi*, *κέλευόμενοι*, v. G. 1, 206; convenere et iubenter discumbere. | 709. Verus verborum ordo erat: *Mirantur dona Aeneae, pallam* etc.; sed turbata rerum compositio significat Tyrios modo haec modo illum miratos esse. | 710. *Flagr. d. volt.*, genas oculosque fulgentes. | 712. *pesti*, amoris exitiali. | 713. *mentem*, Accusativus remotioris obiecti; *crematur virgo ornatum* 7, 74; v. etiam E. 3, 106. | 714. Alii *puero pariter donisque*. | 716. *inplevit*, satiavit. | 718. *Haeret* in puero. | 719. Alii *Insidat*.

- 720 *Matris Acidaliae paulatim abolere Sychaeum*  
 Incipit, et vivo temptat praevertere amore  
 Iam pridem resides animos desuetaque corda.  
 Postquam prima quies epulis, mensaeque remotae,  
 Crateras magnos statuunt et vina coronant.
- 725 Fit strepitus tectis, vocemque per ampla volutant  
 Atria; dependent lychni laquearibus aureis  
 Incensi, et noctem flammis funalia vincunt.  
 Hic regina gravem gemmis auroque poposcit  
 Inplevitque mero pateram, quam Belus et omnes
- 730 A Belo soliti; tum facta silentia tectis:  
 Iuppiter, hospitibus nam te dare iura loquuntur,  
 Hunc laetum Tyriisque diem Troiaque profectis  
 Esse velis, nostrosque huius meminisse minores.  
 Adsit laetitiae Bacchus dator et bona Iuno;
- 735 Et vos, o, coetum, Tyrii, celebrate faventes.  
 Dixit, et in mensam laticum libavit honorem,  
 Primaque, libato, summo tenus attigit ore;  
 Tum Bitiae dedit increpitans; ille impiger hausit  
 Spumantem pateram, et pleno se proluit auro;
- 740 Post alii proceres. Cithara crinitus Iopas  
 Personat aurata, docuit quem maxumus Atlas.  
 Hic canit errantem lunam solisque labores;  
 Unde hominum genus et pecudes; unde imber et ignes;  
 Arcturum pluviasque Hyadas geminosque Triones;
- 745 Quid tantum Oceano properent se tingere soles  
 Hiberni, vel quae tardis mora noctibus obstet.  
 Ingeminant plausu Tyrii, Troesque sequuntur.

720. *Acidalia* Venus, cui sacer est fons Acidalius, qui est ad Orchomenum in Boeotia. — *Sych.*, Sychaei memoriam. | 721. *praevertere*, tentat amore Aeneae Didonem ante incendere, quam prioris mariti memoria refricetur. *Vivus* autem amor veteri illi et intermortuo opponitur. | 723. v. G. 3, 130 et G. 2, 101. | 724. v. G. 2, 528. | 726. in atrio coenabant Romani antiquissimo tempore. | 729 sq. *omnes a Belo*, i. e. reges ex stirpe antiqui illius Beli, a quo reges Tyrriorum genus suum ducebant. | 731. *hosp. dare iura*, i. e., ut ita dicam, datorem esse iuris hospitalis, s. constituisse iura hospitum; v. E. 8, 45. | 733. *minores*, posteriores. | 734. *bona, propitia*; v. E. 5, 61. | 735. *coetum*, convivium. | 737. *libato*, postquam libatum est, s. postquam libavit; ut apud Caes. B. G. 7, 52 „*Exposito*, quid posset.“ Liv. 34, 31 „*ibi permissio*, seu dicere prius, seu audire mallet, ita coepit tyrannus.“ — Finitis epulis sollempne erat libare, cf. 8, 279. — s. t. a. ore, primoribus labris. Servius „Et verecundiam reginae ostendit et morem Romanum. Nam apud maiores nostros feminae non utebantur vino, nisi sacrorum causa certis diebus.“ | 738. *increpitans*, inclamans Bitiam et, ut biberet, adhortans. | 740. *crinitus*: ut Apollo, ita citharoedi comam alebant. | 741. Atlas astrologiae et rerum physicarum peritus habebatur. — Alii *quae*, cf. 5, 705. | 742. v. G. 2, 478—82. — *errantem*: quo errore scilicet fit, ut orbis eius modo totus, modo ex parte vel illuminetur vel obscuretur. | 743. *ignes* caelestes, fulmina. | 746. quae mora obstet noctibus (aestivis) easque tardas (ut tarde veniant) efficiat. | 747. *Ingem. plausu*, ut 9, 811 „*ingeminant hastis*,“ i. e. alias

- Nec non et vario noctem sermone trahebat  
 Infelix Dido, longumque bibebat amorem,  
 750 Multa super Priamo rogitans, super Hectore multa;  
 Nunc, quibus Aurorae venisset filius armis,  
 Nunc, quales Diomedis equi, nunc, quantus Achilles.  
 Immo age, et a prima dic, hospes, origine nobis  
 Insidias, inquit, Danaum, casusque tuorum  
 755 Erroresque tuos; nam te iam septuma portat  
 Omnibus errantem terris et fluctibus aestas.

## A E N E I D O S

### LIBER SECUNDUS.

(*Rogatu Didonis narrat Aeneas excidium Troiae dolo Graecorum captae.*)

- Conticuere omnes intentique ora tenebant.  
 Inde toro pater Aeneas sic orsus ab alto:  
 Infandum, Regina, iubes renovare dolorem,  
 Troianas ut opes et lamentabile regnum  
 5 Eruerint Danaï, quaeque ipse miserrima vidi,  
 Et quorum pars magna fui. Quis talia fando  
 Myrmidonum Dolopumve aut duri miles Ulixi  
 Temperet a lacrimis! et iam nox humida caelo  
 Praecipitat, suadentque cadentia sidera somnos.  
 10 Sed si tantus amor casus cognoscere nostros  
 Et breviter Troiae supremum audire laborem,  
 Quamquam animus meminisse horret luctuque refugit,  
 Incipiam.

Fracti bello fatisque repulsi

Ductores Danaum, tot iam labentibus annis,

super alias iaculantur hastas.] 749. cf. vs. 712 et v. 3, 50. — *longum*, quasi longo haustu. Atque haec *l. b. an.* sic interposita significant amorem eius plus plusque incrementi capere ex eo sermone, eoque curiosius interrogat multa.] 751. *Aur. fl.*, Memnon.

**Aeneid. L. II.** 1—13. *Silentio facto Aeneas, etsi, luctus praepediat et nox ad quietem invitet, tamen satisfacturum se voluntati Didonis profitetur.* | 1. *intenti o. t.*, ergo ut solent intenti; in ipso ore apparebat intentio. | 4. *ut*: renovatur dolor Aeneae *narrando* casus Troianorum; itaque *ut* ponitur, quasi ipsum verbum narrandi praecederet; v. vs. 121. 9, 66. Sic saepe ex verbis et vocabulis affectum animi significantibus pendent enuntiata relativa, maxime e verbo *mirandi*; miror, quid sit? i. e. miror, nam nescio, quid sit. | 6. *fando*, dum fatur; similiter Liv. 22, 14 „Qui modo, Saguntum oppugnari *indignando*, foedera et deos ciebamus;“ et apud eundem 8, 17 „Novi consules *populando* usque ad moenia atque urbem pervenerant.“ i. q. populabundi. | 7. *Myrm. Dol.*, Hom. II. 2, 684. 9, 484. | 9. *praecipitat*, descendens in Oceanum. | 12. Similiter Cicero: „*Refugit animus* eaque formidat dicere, quae — —.“

13—199. *Dolus Graecorum; equus Troianus; insidias Sinonis.*

- 15 Instar montis equum divina Palladis arte  
 Aedificant, sectaque intexunt abiete costas;  
 Votum pro reditu simulant; ea fama vagatur.  
 Huc delecta virum sortiti corpora furtim  
 Includunt caeco lateri penitusque cavernas
- 20 Ingentis utrumque armato milite complent.  
 Est in conspectu Tenedos, notissima fama  
 Insula, dives opum, Priami dum regna manebant,  
 Nunc tantum sinus et statio male fida carinis;  
 Huc se provecti deserto in litore condunt.
- 25 Nos abiisse rati et vento petiisse Mycenae.  
 Ergo omnis longo solvit se Teucra luctu.  
 Panduntur portae; iuvat ire et Dorica castra  
 Desertosque videre locos litusque relictum.  
 Hic Dolopum manus, hic saevus tendebat Achilles;
- 30 Classibus hic locus; hic acie certare solebant.  
 Pars stupet innuptae donum exitiale Minervae  
 Et molem mirantur equi; primusque Thymoetes  
 Duci intra muros hortatur et arce locari,  
 Sive dolo, seu iam Troiae sic fata ferebant.
- 35 At Capys, et quorum melior sententia menti,  
 Aut pelago Danaum insidias suspectaque dona  
 Praecipitare iubent, subiectisque urere flammis,  
 Aut terebrare cavas uteri et temptare latebras.  
 Scinditur incertum studia in contraria volgus.
- 40 Primus ibi ante omnis, magna comitante caterva,  
 Laocoon ardens summa decurrit ab arce,  
 Et procul: O miseri, quae tanta insania, cives?  
 Creditis avectos hostis? aut ulla putatis  
 Dona carere dolis Danaum? sic notus Ulixes?
- 45 Aut hoc inclusi ligno occultantur Achivi,  
 Aut haec in nostros fabricata est machina muros  
 Inspectura domos venturaque desuper urbi,  
 Aut aliquis latet error: equo ne credite, Teucri.

15. *divina*, ergo non sua, sed ea, quam dea, Pallas, iis monstraverat. cf. Hom. Odys. 8, 498. Il. 15, 71. | 17. Spargunt Graeci famam se novisse equum hunc Palladi, si salvis liceret in patriam redire. | 18. *Huc ... caeco lateri*, v. E. 1, 54. | 23. Nunc, quia Priami imperio subiecta erat, vastata est a Graecis nihilque commoditatis habet praeter sinum, qui stationem praebet navibus, sed eam ipsam parum tutam. | 29. *tend.*, tentoria habebat. | 31. *don. ex. Min.*, i. e. donum a Graecis Minervae per simulationem datum (vs. 17.) exitiale futurum Troianis. | 34. *dolo*, quia uxore filioque eius per Priamum occisis iustam causam proditiōis Thymoetes habere videbatur. | 37. Alii *subiectisve*; cf. Tibull. 1, 9, 49 sq.; et in mare praecipitari et cremari iubetur equus ille, alio scilicet aliter censente; v. etiam G. 1, 419. | 40. v. 3, 437. | 42. *O. mis.*, v. 11, 175. | 47. Ut hostis ex ea, tamquam ex turri, speculari urbem et desuper, ex altiore loco, in muros desilire possit. | 48. *error*, fraus; *aliquis*, quicumque is est, ut 9, 186. Cic. de



- Quidquid id est, timeo Danaos et dona ferentis.
- 50 Sic fatus validis ingentem viribus hastam  
In latius inque feri curvam conpagibus alvum  
Contorsit. Stetit illa tremens, uteroque recusso  
Insonuere cavae gemitumque dedere cavernae.  
Et, si fata deum, si mens non laeva fuisset,
- 55 Impulerat ferro Argolicas foedare latebras,  
Troiaque nunc staret, Priamique arx alta inaneres.  
Ecce, manus iuvenem interea post terga revinctum  
Pastores magno ad regem clamore trahebant  
Dardanidae, qui se ignotum venientibus ultro,
- 60 Hoc ipsum ut strueret Troiamque aperiret Achivis,  
Obtulerat, fidens animi, atque in utrumque paratus,  
Seu versare dolos, seu certae occumbere morti.  
Undique visendi studio Troiana iuventus  
Circumfusa ruit, certantque inludere capto.
- 65 Accipe nunc Danaum insidias, et crimine ab uno  
Disce omnis.  
Namque ut conspectu in medio turbatus, inermis,  
Constitit atque oculis Phrygia agmina circumspexit:  
Heu, quae nunc tellus, inquit, quae me aequora possunt
- 70 Accipere? aut quid iam misero mihi denique restat,  
Cui neque apud Danaos usquam locus, et super ipsi  
Dardanidae infensi poenas cum sanguine poscunt.  
Quo gemitu conversi animi compressus et omnis  
Impetus. Hortamur fari, quo sanguine cretus,
- 75 Quidve ferat; memoret, quae sit fiducia capto.  
Ille haec, deposita tandem formidine, fatur:

Orat. 2, 42 „Plura homines iudicant odio, aut amore, aut cupiditate, aut aliqua permotione mentis.“] 51. Contorsit hastam in eam lateris partem, in qua est alvus. In repetita Praepositione inest vehementioris ictus significatio. — *curv. conp. alv.*, in curvaturam alvi. — *feri*, equi, ut 5, 818.] 52. *recusso*, repercusso, i. e. sonum reddente.] 53. iunge: *cavae insonuere*, i. e. cavum quid sonuere, s. ita, ut res cavae solent; 5, 866 „*rauca* adsiduo sale saxa *sonabant*,“ i. e. raucum sonum edebant; adde G. 4, 370.] 54. *si fata fuissent*, ut detegerentur insidiae; cf. vs. 433 et v. 3, 717. — *laeva*, stulta, ut E. 1, 16.] 55. *Impulerat*, ἐκίνησεν ἄν. Indicativus in eiusmodi oratione indicat contrarium evenire vel evenisse: *impulerat*, *si fuissent*: at *non fuerunt*, ergo ille non potuit Troianos impellere; cf. 4, 19.] 56. Formam huius orationis tuetur imitatio Sillii 7, 562 sq. „*Mutassentque* solum sceptris Aeneia regna Nullaque nunc *stares* terracum vertice, Roma.“] 57. v. E. 3, 106.] 60. *Hoc ipsum*, ut adduceretur ad regem, *ut strueret*, dolo efficeret.] 61. v. G. 4, 491.] 62. *vers. d.*, dolos agitare et insidiis fallere. — *s. c. occ. m.*, ut unus ex hostibus.] 69 sqq. Quo iam fugiam omni spe salutis praecclusa?] 72. *poenas cum sanguine*, poenas poscunt et quidem sanguinem, s. vitam; est ea circumlocutio *supplicii*: vs. 366 „poenas dant sanguine“, s. vitā, i. e. moriuntur.] 73. *conversi*, mutati.] 75. *Quid. f.*, ὃ τι ἔχει λέγειν. — *quae fid.*, cuius rei fiducia, v. 171; qua re confusus veniam et salutem sperare possit; quae spes captivo homini aut nulla esse solet aut exigua.] 76. *formidine*, quam simulat.

- Cuncta equidem tibi, Rex, fuerit quodcumque, fatebor  
 Vera, inquit; neque me Argolica de gente negabo;  
 Hoc primum; nec, si miserum Fortuna Sinonem  
 80 Finxit, vanum etiam mendacemque improba finget.  
 Fando aliquod si forte tuas pervenit ad auris<sup>77</sup>  
 Belidae nomen Palamedis et incluta fama  
 Gloria, quem falsa sub proditio Pelasgi  
 Insontem infando indicio, quia bella vetabat,  
 85 Demisere *Neci*, nunc cassum lumine lugent:  
 Illi me comitem et consanguinitate propinquum  
 Pauper in arma pater primis huc misit ab annis.  
 Dum stabat regno incolumis regumque vigeat  
 Consiliis, et nos aliquod nomenque decusque  
 90 Gessimus. Invidia postquam pellacis Ulixi —  
 Haud ignota loquor — superis concessit ab oris,  
 Adfictus vitam in tenebris luctuque trahebam,  
 Et casum insontis mecum indignabar amici.  
 Nec tacui demens, et me, fors si qua tulisset,  
 95 Si patrios umquam remeassem victor ad Argos,  
 Promisi ultorem, et verbis odia aspera movi.  
 Hinc mihi prima mali labes, hinc semper Ulixes  
 Criminibus terrere novis, hinc spargere voces  
 In volgum ambiguas, et quaerere conscius arma.  
 100 Nec requievit enim, donec Calchante ministro —  
 Sed quid ego haec autem nequiquam ingrata revolvo?

77. *cuncta, quodcumque*, ut Gaeci πάντα, ὅ τι. | 79. *Hoc*, me esse Argivum, primum fateor. | 81. *aliquod* posuit, quia nescit, notumne sit ei hoc nomen necne. Explicatius hoc sic dixeris: Fuit aliquis, Palamedes dictus, et audisti fortasse nomen eius. Et cf. Ovid. Met. 15, 497. | 82. a Belo fit *Belides*, sed poetae paenultimam horum patronymicorum etiam producunt, uti ipse Virgilius 7, 484. Ovid. Ib. 503. Silius It. 1, 75. 3, 650. — Palamedes fuit filius Nauplii, regis Euboeae, qui genus suum ducebat a Belo, rege Aegypti. | 83. *falsa s. pr.*, sub falso crimine proditiōis; nam litteras a Priamo ad Palamedem datas, sed a se fictas, protulerat Ulixes. | 84. v. G. 2, 441. | 85. *Neci*, v. 8, 566. — *lumine*, vita. | 86 sq. Valent haec ad mitigandam iram Troianorum. Comes duci additus venit ad Troiam, non ipse unus e principibus; et venit nullo proprio Troianorum odio, sed quia consanguinitas cum Palamede coniunxit et quia paupertatis causa ad bellum missus est a patre; Terent. Heaut. 1, 1, 58 „Ego istuc aetatis ... in Asiam hinc abii propter pauperiem atque ibi simul rem et gloriam armis belli repperi.“ Item Achemenides, quia pauperem habebat patrem, ad Troiam profectus est, cf. 3, 614 sq. | 87. *primis annis*, sive primo tempore aetatis (Cic. de Legg. 1, 4) sive ineunte aetate (Cic. Off. 1, 34.), significatur adolescentia, cf. 8, 517. | 88. *regno*, regia dignitate; dum integra erat regia dignitate. | 90. *Ulixi*, v. G. 3, 91.; et cf. Ovid. Met. 13, 56—60. | 96. v. G. 2, 441. | 99. *quaer. arma*, Donatus „Quaerebat consiliorum tela, quibus me confoderet, occasionesque captabat.“ — *consciis* sui sibi sceleris, cuius ultorem me futurum promiseram. | 100. *enim*: Ulixen arma adversus me quaerere patebat; *nam* non requievit, donec invento sceleris administro, Calchante, cet. | 101. In eiusmodi interrogatione per *sed* abruptum sermo, per *autem* significatur miratio. Terent. Phorm. 4, 2, 11 „Sed quid pertinuit autem be-

- Quidve moror, si omnis uno ordine habetis Achivos,  
 Idque audire sat est? Iamdudum sumite poenas;  
 Hoc Ithacus velit, et magno mercentur Atridae.
- 105 Tum vero ardemus scitari et quaerere caussas,  
 Ignari scelerum tantorum artisque Pelasgae.  
 Prosequitur pavitans, et ficto pectore fatur:  
 Saepe fugam Danaï Troia cupiere relicta  
 Moliri et longo fessi discedere bello;
- 110 Fecissentque utinam! saepe illos aspera ponti  
 Interclusit hiemps, et terruit Auster euntis.  
 Praecipue, cum iam hic trabibus contextus acernis  
 Staret equus, toto sonuerunt aethere nimbi.  
 Suspensi Eurypylum scitantem oracula Phoebi
- 115 Mittimus, isque adytis haec tristia dicta reportat:  
 „Sanguine placastis ventos et virgine caesa,  
 Cum primum Iliacas, Danaï, venistis ad oras;  
 Sanguine quaerendi reditus, animaque litandum  
 Argolica.“ Volgi quae vox ut venit ad auris,
- 120 Obstipuerē animi, gelidusque per ima cucurrit  
 Ossa tremor, cui fata parent, quem poscat Apollo.  
 Hic Ithacus vatem magno Calchanta tumultu  
 Protrahit in medios; quae sint ea numina divom,  
 Flagitat. Et mihi iam multi crudele canebant
- 125 Artificis scelus, et taciti ventura videbant.  
 Bis quinos silet ille dies, tectusque recusat  
 Prodere voce sua quemquam aut opponere morti.  
 Vix tandem, magnis Ithaci clamoribus actus,  
 Composito rumpit vocem, et me destinat arae.
- 130 Adsensere omnes, et, quae sibi quisque timebat,  
 Unius in miseri exitium conversa tulere.

lra? — *ingrata*, Servius „quorum non libenter memini.“ | 102. quid moror vos hoc sermone, si omnes Achivos (puta: et eos, quibus merito infensi estis, et me, qui vera dicendo vobis profuturus sum) eodem loco habetis et si vestro iudicio satis est, id ... h. e. Achivum ... *audire*, h. e. appellari; Horat. Ep. 1, 7, 37 „rexque paterque audisti.“ | 103. *Iamd. s. p.*, i. e. sumite poenas iamdudum sumendas; idem ergo, quod *sumite p. sine mora*; Ovid. Met. 11, 482 „*Iamdudum demittite* cornua.“ | 104. v. 3, 629. | 107. *ficto pect.*, subdole. | 111. *euntis*, ire volentes, ut 12, 73. | 114. *Alii scitatum*. Phaedr. 1, 2, 22 „*ranae Alium rogantes regem misere ad Iovem*.“ Liv. 21, 6 „*legati a Saguntinis Romam missi auxilium orantes*.“ Xenoph. Cyrop. 5, 4, 24 „*ἡ ρυχα ἐπεμψε πρὸς αὐτὸν, λέγοντα, ὅτι* —“ Sophocl. Ai. 813 „*πῆμψον τιν' ἡμῖν ἄγγελον, κακὴν φάτιν Τεύκρω φέροντα*.“ | 115. v. G. 4, 88. | 116. *virgine*, Iphigenia. | 121. *ossa*, v. G. 3, 272. — *cui f. parent*, sc. illud, ut immoletur. Tremebant autem, quia *dubitabant*, ad quem responsum illud pertineret; itaque, quasi hoc ipsum verbum dubitandi praecederet, adiungitur interrogatio; v. vs. 4. | 123. v. A. 1, 8. | 124 sq. vaticinabantur me peti Ulixis crudeli scelere, tacitique praevidebant immolatum me iri. | 125. *multi* — et, i. e. multi — alii, ut E. 1, 66 *Pars* — et. | 131.

- Iamque dies infanda aderat; mihi sacra parari,  
 Et salsae fruges, et circum tempora vittae.  
 Eripui, fateor, leto me et vincula rupi,  
 135 Limosoque lacu per noctem obscurus in ulva  
 Delitui, dum vela darent, si forte dedissent.  
 Nec mihi iam patriam antiquam spes ulla videndi,  
 Nec dulcis natos exoptatumque parentem;  
 Quos illi fors et poenas ob nostra reposcent  
 140 Effugia, et culpam hanc miserorum morte piabunt.  
 Quod te per superos et conscia numina veri,  
 Per, si qua est, quae restet adhuc mortalibus usquam  
 Intemerata fides, oro, miserere laborum  
 .Tantorum, miserere animi non digna ferentis.  
 145 His lacrimis vitam damus, et miserescimus ultro.  
 Ipse viro primus manicas atque arta levare  
 Vincula iubet Priamus, dictisque ita fatur amicis:  
 Quisquis es, amissos hinc iam obliviscere Graios;  
 Noster eris; mihiq; haec edissere vera roganti:  
 150 Quo molem hanc inmanis equi statuere? quis auctor?  
 Quidve petunt? quae religio? aut quae machina belli?  
 Dixerat. Ille, dolis instructus et arte Pelasga,  
 Sustulit exutas vinclis ad sidera palmas:  
 Vos, aeterni ignes, et non violabile vestrum  
 155 Testor numen, ait, vos arae ensesque nefandi,  
 Quos fugi, vittaeque deum, quas hostia gessi:  
 Fas mihi Graiorum sacrata resolvere iura,  
 Fas odisse viros, atque omnia ferre sub auras,

*conversa t.*, converterunt et [trans]tulerunt in meum exit. | 132. *sacra* intellige ipsam immolationem, ut apud Ovid. Met. 13, 454 de Polyxena „sensitque sibi fera sacra parari.“ | 133. *salsae fr.*, mola salsa. | 134. Quae vincula? certe non ea, quae vs. 147 commemorantur. Videtur latus funis ei, cum, ut simulat, ad aram duceretur, iniectus esse, quo, si fugere conaretur, retineri posset. | 136. *si forte*, etsi non esset oblatum diis iussum sacrificium, *dedissent* vela, i. e. si futurum fuisset ut darent vela; sic supra vs. 94. *tulisset*; adde 3, 652. 6, 879. 9, 41. 704. Ceterum cf. 4, 546. | 137. *antiqu.*, longa consuetudine caram. | 139. *et*, etiam, nostrum *sogar*; *poenas* appositio relativi *quos*; iam cf. 6, 20 sq.; *quos poenas reposcent*, quos meo scilicet loco puniendos poscent. | 140. *Effugium* in re sacra dicitur fuga hostiae iam ad aram adductae. — *hanc*, i. e. meam s. quae mea est, non istorum; satis crebrum hoc in familiari potissimum sermone; *hic vir*, *ὁδε ἀνὴρ*, i. q. ego; *χεροῖν ταῖνδε*, his manibus, Soph. El. 1132 „animam hanc“ 3, 654 et 4, 652; „his auribus“ 4, 359. | 141. *Quod*, quapropter, ut 6, 363. | 142. *Per fidem*, *si qua est*; cf. 10, 597. 903. et v. 6, 459. | 145. *His lacr.*, Ablativus significans, qua re quis vel motus vel inductus (cf. vs. 195) aliquid faciat. — *ultro* hic de eo, quod est amplius: ad clementiam (quae significatur verbis *his l. v. damus*) accedit etiam misericordia; v. G. 4, 204. | 151. *quae rel.*, num fuit aliqua religio, qua permoti hunc equum statuerunt? cf. vs. 17. | 154. qui sint illi ignes, docet vs. 153. | 156. *v. deum*, quod „in honore deum“ G. 3, 486., sive in re divina s. sacrificio geruntur. | 157. *Gr. sacr. iura*, sacras illas leges, quae me Graecis obstrictum tenent. | 158. *ferre s. a.*, proferre, enuntiare. | 159. *tegunt* illi. —

- Si qua tegunt; teneor patriae nec legibus ullis.  
 160 Tu modo promissis maneat, servataque serves  
 Troia fidem, si vera feram, si magna rependam.  
 Omnis spes Danaum et coepti fiducia belli  
 Palladis auxiliis semper stetit. Impius ex quo  
 Tydides sed enim scelerumque inventor Ulixes,  
 165 Fatale adgressi sacrato avellere templo  
 Palladium, caesis summae custodibus arcis,  
 Corripuere sacram effigiem, manibusque cruentis  
 Virgineas ausi divae contingere vittas:  
 Ex illo fluere ac retro sublapsa referri  
 170 Spes Danaum, fractae vires, aversa deae mens.  
 Nec dubiis ea signa dedit Tritonia monstris.  
 Vix positum castris simulacrum: arsere coruscae  
 . Luminibus flammae arrectis, salsusque per artus  
 Sudor iit, terque ipsa solo — mirabile dictu —  
 175 Emicuit, parmamque ferens hastamque trementem.  
 Extemplo temptanda fuga canit aequora Calchas,  
 Nec posse Argolicis excindi Pergama telis,  
 Omina ni repetant Argis, numenque reducant,  
 Quod pelago et curvis secum avexere carinis.  
 180 Et nunc quod patrias vento petiere Mycenae,  
 Arma deosque parant comites, pelagoque remenso  
 Improvisi aderunt. Ita digerit omina Calchas.  
 Hanc pro Palladio moniti, pro numine laeso

*nec ... ullis fortius quam nullis*; auctor Ciris vs. 269 „Cui Parcae tribuere nec ullo vulnere laedi.“ Cic. Catil. 2, 4, 8 „Nemo, non modo Romae, sed nec ullo in angulo totius Italiae, oppressus aere alieno.“ 160. *prom. maeas*, i. q. stes promissis; cf. 8, 643. 164. v. A. 1, 19. 165. *fatale*, unde fata Troiae pendebant; cf. Ovid. F. 6, 427, qui id palladium fatale pignus imperii appellat vs. 445. 169. „*retro subl. ref.*“; sunt haec ab aestu maris recedente translata; itaque *fluere* proprio sensu dictum. 171. *ea*, i. e. eius rei, signa dedit, s. id significavit; 3, 505. *ea cura*, i. e. cura eius rei; 4, 237 *hic nuntius*, i. e. huius rei n.; adde 2, 75. 7, 595. 12, 468. 174. *Sud.*, cf. Cic. de Divinat. 2, 27 pr. 178. Respicitur mos imperatorum Romanorum, qui, si quid adversi accidisset aut si quid vitii in capiendis auspiciis obtigisset proficiscentibus ab urbe, e castris Romam reversi repetebant ibi auspicia, i. e. nova capiebant; ita certiores facti de voluntate deorum redibant in castra; hoc est, quod poeta vs. 181 dicit: *deos parant comites*. Ergo auspicia ante ipsam projectionem capta Calchas ait irrita facta esse ira offensae Minervae; repetenda erant igitur et nova afferenda, atque cum numine avecto, Palladio, placataque dea redeundum. Etsi autem non solet *numen* simpliciter dici de statua, tamen numen ac praesentia dei ita cum signo eius coniuncta videbantur, ut recte dicatur et avehi numen et reduci; cf. vs. 183 „pro Palladio, pro numine laeso“; adde 4, 204. Iam vide, quae diximus ad vs. 188. 180. *quod*, i. e. quod attinet ad id, quod; ut crebro apud ipsum Ciceronem. 182. *digerit*, disponit, ordinat, nempe dicens, quo quidque ordine secundum illud omen, sive ostentum vs. 172 sqq. commemoratum, faciendum sit: primum esse in Graeciam redeundum ibique hoc omen procurandum, tum, reconciliata deorum voluntate, ad Troiam revortendum. 183. *pro Palladio*, loco Palladii in insulam Tenedon' avecti. — *moniti*, a quo? cf. vs.

- Effigiem statuere, nefas quae triste piaret.  
 185 Hanc tamen immensam Calchas attollere molem  
 Roboribus textis caeloque educere iussit,  
 Ne recipi portis aut duci in moenia possit,  
 Neu populum antiqua sub religione tueri.  
 Nam si vestra manus violasset dona Minervae,  
 190 Tum magnum exitium — quod di prius omen in ipsum  
 Convertant! — Priami inperio Phrygibusque futurum;  
 Sin manibus vestris vestram ascendisset in urbem,  
 Ultro Asiam magno Pelopea ad moenia bello  
 Venturam, et nostros ea fata manere nepotes.  
 195 Talibus insidiis periurique arte Sinonis  
 Credita res, captique dolis lacrimisque coactis,  
 Quos neque Tydides, nec Larissaeus Achilles,  
 Non anni domuere decem, non mille carinae.  
 Hic aliud maius miseris multoque tremendum  
 200 Obiicitur magis, atque improvida pectora turbat.  
 Laocoon, ductus Neptuno sorte sacerdos,  
 Sollemnis taurum ingentem mactabat ad aras.  
 Ecce autem gemini a Tenedo tranquilla per alta —  
 Horresco referens — inmensis orbibus angues  
 205 Incumbunt pelago, pariterque ad litora tendunt;  
 Pectora quorum inter fluctus arrecta iubaeque  
 Sanguineae superant undas; pars cetera pontum  
 Pone legit sinuatque immensa volumine terga.  
 Fit sonitus spumante salo; iamque arva tenebant,  
 210 Ardentisque oculos suffecti sanguine et igni  
 Sibila lambebant linguis vibrantibus ora.  
 Diffugimus visu exsanguis. Illi agmine certo  
 Laocoonta petunt; et primum parva duorum  
 Corpora natorum serpens amplexus uterque  
 215 Implicat et miseros morsu depascitur artus;

185.] 186. *caelo*, ad caelum, v. E. 2, 30, i. e. tantam facere, ut caelum tangere videretur, v. 3, 619.] 188. ne effigies illa, si eadem (*antiqua*) religione colatur, qua antea cultum est, dum erat Troiae, Palladium, tueatur populum; quod ex opinione veterum equus iste extra urbem positus non poterat. — *sub r.*, praesidio religionis.] 189. *don. Min.*, donum oblatum Minervae; cf. Phaedr. fab. 4, 15, 5.] 190. *ipsum*, Calchantem.] 193. *ultro*, v. 10, 312.] 194. *ea f.*, cf. vs. 190 sq.] 195. v. vs. 145.]] 199—249. *Laocoontis exitium*; *equus ligneus in urbem ductus*.] 200. *inpr. p. t.*, turbat pectora ita, ut fierent improvida; ita enim praecipites egit ea res Troianos, ut omnia omni cautione facerent, quod Sinon optabat.] 201. Interemto sacerdote Neptuni Laocoon, ait Servius, Thymbraei Apollinis sacerdos, sorte ductus est, qui sacra faceret Neptuno; ut solet fieri, cum deest sacerdos certus.] 202. Sollemnes arae dictae a sollemnitate sacrificii.] 203. *alta*, raro ponitur huius voc. Pluralis pro Singulari.] 207. *sup. und.*, eminent supra undas; cf. vs. 219. Ovid. Met. 1, 317. Alii *exsuperant*.] 208. Alii *sinuant*.] 210, 219 et 221. v. E. 3, 106.] 212. *agmine*, intellige spiras ac volumina longumque eorum tractum; cf. 5, 90. G. 3, 423. — *certo*,

- Post ipsum, auxilio subeuntem ac tela ferentem,  
 Corripiunt, spirisque ligant ingentibus; et iam  
 Bis medium amplexi, bis collo squamea circum  
 Terga dati, superant capite et cervicibus altis.
- 220 Ille simul manibus tendit divellere podos,  
 Perfusus sanie vittas atroque veneno,  
 Clamores simul horrendos ad sidera tollit:  
 Qualis mugitus, fugit cum saucius aram  
 Taurus et incertam excussit cervice securim.
- 225 At gemini lapsu delubra ad summa dracones  
 Diffugiunt saevaeque petunt Tritonidis arcem,  
 Sub pedibusque deae clipeique sub orbe teguntur.  
 Tum vero tremefacta novus per pectora cunctis  
 Insinuat pavor, et scelus expendisse merentem
- 230 Laocoonta ferunt, sacrum qui cuspide robur  
 Laeserit et tergo sceleratam intorserit hastam.  
 Ducendum ad sedes simulacrum orandaque divae  
 Numina conclamant.  
 Dividimus muros et moenia pandimus urbis.
- 235 Accingunt omnes operi, pedibusque rotarum  
 Subiiciunt lapsus, et stuppea vincula collo  
 Intendunt. Scandit fatalis machina muros,  
 Feta armis. Pueri circum innuptaeque puellae  
 Sacra canunt, funemque manu contingere gaudent.
- 240 Illa subit, mediaeque minans inlabitur urbi.  
 O patria, o divom domus Ilium, et incluta bello  
 Moenia Dardanidum! quater ipso in limine portae  
 Substitit, atque utero sonitum quater arma dedere;  
 Instamus tamen inmemores caecique furore,
- 245 Et monstrum infelix sacrata sistimus arce.  
 Tunc etiam fatis aperit Cassandra futuris  
 Ora, dei iussu non umquam credita Teucris.

tanquam destinatum petentes, ut certa hasta vel sagitta.] 218 sq. iuugo circumdanti.] 223. *Qualis*, i. e. *quales*, sc. tollit, quod ex superiore versu repetendum. Ceterum v. G. 3, 387.] 225. *summa*, in arce posita, Hom. II. 6, 297.] 226. *Diffug.* non, ut vs. 212; sed abeunt fugiendo.] 227. Necesse est diversum hoc fuisse signum Minervae a Palladio supra commemorato.] 228. *novus*, cf. vs. 212.] 229. v. G. 1, 163. — *exp. scelus*, poenam sceleris.] 232. *sedes* divae s. deae.] 234. *moenia urbis*, urbs ipsa cum aedificiis; cf. vs. 252. 9, 196.] 235. *Accing.*, v. G. 1, 163.] 236. *rotar. lapsus*, rotas labentes, i. e. se circumvolventes.] 237. *Int.*, v. G. 4, 400.] 239. *Sacra*, s. carmina, hymnos.] 240. *minans*, v. 1, 162.] 242. *Dardanidum*, Dardanidarum, ut *Romulidum*, *Troiaenum*, *Caecicolum*, *Ausonidum*. — *in lim. subst.*, ominosum hoc; Tibull. 1, 3, 20 „O quoties ingressus iter mihi tristia dixi Offensum in porta signa dedisse pedem.“] 244. *inmemores* eius ominis.] 246. *fatis*, sc. canendis; est Casus tertius.] 247. Apollo Cassandrae artem vaticinandi tribuerat, sed ita, ut nemo ei crederet. — *ora non umq. credita*, ἀὲ ἀπιστοῦμενα, Ovid. Met. 15,

- Nos delubra deum miseri, quibus ultimus esset  
 Ille dies, festa velamus fronde per urbem.
- 250 Vertitur interea caelum et ruit oceano Nox,  
 Involvens umbra magna terramque polumque  
 Myrmidonumque dolos; fusi per moenia Teucri  
 Conticuere; sopor fessos conplectitur artus:  
 Et iam Argiva phalanx instructis navibus ibat
- 255 A Tenedo, tacitae per amica silentia lunae  
 Litora nota petens, flammās cum regia puppis  
 Extulerat, fatisque deum defensūs iniquis  
 Inclusos utero Danaos et pinea furtim  
 Laxat claustra Sinon. Illos patefactus ad auras
- 260 Reddit equus, laetique cavo se robore promunt  
 Thessandrus Sthenelusque duces et dirus Ulixes,  
 Demissum lapsi per funem, Acamasque, Thoasque,  
 Pelidesque Neoptolemus, primusque Machaon,  
 Et Menelaus, et ipse doli fabricator Epeos.
- 265 Invadunt urbem somno vinoque sepultam;  
 Caeduntur vigiles, portisque patentibus omnis  
 Accipiunt socios atque agmina conscia iungunt.  
 Tempus erat, quo prima quies mortalibus aegris  
 Incipit et dono divom gratissima serpit.
- 270 In somnis, ecce, ante oculos maestissimus Hector  
 Visus adesse mihi largosque effundere fletus,  
 Raptatus bigis ut quondam aterque cruento  
 Pulvere perque pedes traiectus lora tumentis.  
 Hei mihi, qualis erat! quantum mutatus ab illo
- 275 Hectore, qui redit exuvias indutus Achilli,

74 „primus talibus ora ... solvit non credita verbis.“ || 250—360. *Nocte inscuta redeunt Graeci a Tenedo et ab iis, qui equo ligneo inclusi fuerant, intromittuntur in urbem. Aeneas per quietem monitus ab Hectore, ut servet deos Troiae tutelares, abrupto somno, postquam urbem videt captam, cum paucis adgreditur hostem.* | 250. Vetus opinio fuit, ad oculorum sensum accommodata propterea-que a poetis retenta, circumagi vertique ipsum caelum cum sideribus; v. 8, 280, imprimisque cf. Ovid. Met. 2, 70 sq. — *ruit*, ut 6, 539. 8, 369, proruit, surgit; Ovid. Met. 6, 92 „aquis Nox surgit ab isdem.“ | 251. v. 1, 225. | 252. *fusi*, cf. G. 2, 527. | 254. *instr.*, ordinatis. | 255. Quomodo haec conciliabis cum vs. 251? v. vs. 340. — *tacitae*, cf. 4, 525. | 256. Fax e nave praetoria sublata erat signum adventantis classis Sinoni datum. | 257. Ad haec quoque *fatis* ... *laxat* pertinet illud vs. 254 positum *iam*. | 259. *Laxat* claustra et Danaos; zeugma, v. 1, 426; claustro laxato emittit Danaos. | 263. *primus*, qui primus aut inter primos egressus est. | 267. *agm. iung.*, sibi adiungunt; diversum est, quod legitur infra 4, 142. | 268. *m. aegr.*, δειλοῖσι βοροῖσιν Hom. | 270. *maestiss.* H.: eiusmodi Superlativi nominibus propriis adiecti, ut *pulcherrima Dido*, *maximus Atlas*, indicant absolutam aliquam et in suo genere perfectam speciem *maestitia* e, *pulchritudinis*, *magnitudinis*. | 272. qualis fuit quondam, raptatus bigis cet. | 273. v. E. 3, 106. — *tumentes*. Viva membra tument sic mulcata, non mortua. Vivum raptatum esse Hectorem etiam Sophocles refert Al. 1030 sq. Curt. 4, 28. | 274. Alii *Heu*. | 275. *redit*. v. 1, 99. — *exuv. Ach.*, arma



- Vel Danaum Phrygios iaculatus puppibus ignis!  
 Squalentem barbam et concretos sanguine crinis  
 Volneraque illa gerens, quae circum plurima muros  
 Accepit patrios. Ultro flens ipse videbar
- 280 Compellare virum et maestas expromere voces:  
 O lux Dardaniae, spes o fidissima Teucrum,  
 Quae tantae tenuere morae? quibus Hector ab oris  
 Exspectate venis? ut te post multa tuorum  
 Funera, post varios hominumque urbisque labores
- 285 Defessi aspiciamus! quae caussa indigna serenos  
 Foedavit voltus? aut cur haec volnera cerno?  
 Ille nihil, nec me quaerentem vana moratur,  
 Sed graviter gemitus imo de pectore ducens,  
 Heu fuge, nate dea, teque his, ait, eripe flammis.
- 290 Hostis habet muros; ruit alta a culmine Troia.  
 Sat patriae Priamoque datum: si Pergama dextra  
 Defendi possent, etiam hac defensa fuissent.  
 Sacra suosque tibi commendat Troia Penatis;  
 Hos cape fatorum comites, his moenia quaere,
- 295 Magna pererrato statues quae denique ponto.  
 Sic ait, et manibus vittas Vestamque potentem  
 Aeternumque adytis effert penetralibus ignem.  
 Diverso interea miscentur moenia luctu,  
 Et magis atque magis, quamquam secreta parentis
- 300 Anchisae domus arboribusque oblecta recessit,  
 Claescent sonitus, armorumque ingruit horror.  
 Excutior somno, et summi fastigia tecti  
 Ascensu supero, atque arrectis auribus adsto:  
 In segetem veluti cum flamma furentibus austris
- 305 Incidit, aut rapidus montano flumine torrens  
 Sternit agros, sternit sata laeta boumque labores,  
 Praecipitisque trahit silvas; stupet inscius alto  
 Accipiens sonitum saxi de vertice pastor.  
 Tum vero manifesta fides, Danaumque patescunt
- 310 Insidiae. Iam Deiphobi dedit ampla ruinam

Achillea Patrocle detracta. | 276. v. E. 2, 30. — Hom. II. 16, 122 sq. | 278. iunge circum muros. | 281. lux, quod, salus. | 283. iunge ut (quam) defessi. | 287. Ille nihil respondet ad haec. | 290. Alii alto; cf. Hom. II. 13, 772 sq. | 292. hac, mea, ut 8, 570. 9, 205. | 293. Penates publicos intellige, deos patrios; et v. vs. 320. | 296. vittas Vestamq., i. e. V. vittatam, v. G. 1, 173. | 298. Div., procul in alia parte urbis exorto. | 304. sqq. cf. Hom. II. 2, 455 sq. 4, 452 sqq. 5, 87 sqq. — Rei magnitudine et atrocitate ita abripitur animus poetae, ut comparatione utatur re paulo occultius indicata, ad quam spectat comparatio: inscius scilicet, ut pastor ingruente aliqua per agros cum magno strepitu repentina clade, Aeneas ex alto speculatur, quae causa sit sonitus ad aures suas perlatus. | 305. r. mont. fl., incitatus aquarum vi ex montibus decurrentium. | 306. v. G. 1, 325. | 309. fides, res fidem faciens, ut Soph. El. 887 τίς ἰδοῦσα

- Volcano superante domus, iam proximus ardet  
 Ucalegon; Sigea igni freta lata relucet.  
 Exoritur clamorque virum clangorque tubarum.  
 Arma amens capio; nec sat rationis in armis;  
 315 Sed glomerare manum bello et concurrere in arcem  
 Cum sociis ardent animi; furor iraque mentem  
 Praecipitant, pulchrumque mori succurrit in armis.  
 Ecce autem telis Panthus elapsus Achivom,  
 Panthus Othryades, arcis Phoebique sacerdos,  
 320 Sacra manu victosque deos parvumque nepotem  
 Ipse trahit, cursuque amens ad limina tendit.  
 Quo res summa loco, Panthu? quam prendimus arcem?  
 Vix ea fatus eram, gemitu cum talia reddit:  
 Venit summa dies et ineluctabile tempus  
 325 Dardaniae. Fuimus Troes, fuit Ilium et ingens  
 Gloria Teucrorum; ferus omnia Iuppiter Argos  
 Transtulit; incensa Danaï dominantur in urbe.  
 Arduus armatos mediis in moenibus adstans  
 Fundit equus, victorque Sinon incendia miscet  
 330 Insultans. Portis alii bipatentibus adsunt,  
 Milia quot magnis umquam venere Mycenis;  
 Obsedere alii telis angusta viarum  
 Oppositi; stat ferri acies mucrone corusco  
 Stricta, parata neci; vix primi proelia temptant  
 335 Portarum vigiles, et caeco Marte resistunt.  
 Talibus Othryadae dictis et numine divom

πίστιν.] 311. v. G. 1, 295.] 312. *Ucalegon*, i. e. domus eius; cf. 4, 671.] 314. *rat.*, consilii; non apparet, quid pugnando iam profici possit.] 315. *bello*, Dativus consilium indicans, i. q. ad pugnam; cf. 4, 599 et v. G. 2, 206.] 317. *succurrit*, subit animum, *παρίσταται*, cogitatio decorum esse mori pugnantem.] 318. *Panth.*, Πάνθοος, Πάνθους.] 319. *arcis Phoebiq.*, Apollinis, cuius templum erat in arce; cf. 7, 219 et 11, 477.] 320. *Sacra* quae sint, explicat poeta ipse verbis subiectis *victos deos*, i. e. simulacrum Apollinis, v. E. 3, 7, quod ab illo effertur, ne captivum in manus hostium veniat; v. vs. 351. Ceterum iunge *ipse manu*, ut G. 3, 395. A. 3, 372. 7, 143.] 321. *limina* Aeneae.] 322. quo in statu est summa res publica? quam pro amissa (nam amissam esse res ipsa indicat) prendimus arcem? i. e. qui locus nunc pro arce praesidioque nobis esse potest?] 323. *gemitu*, gemens, cum gemitu, cf. 3, 664. voce 10, 193. *clamore* 1, 519. 8, 216. 11, 609. *tonitru* 8, 391.] 324. *inel. t.* Eurip. Alcest. 892 „τύχη, τύχη δυσπάλαιστος ἦκει.“] 326. Argivis victoriam et rerum summam concessit.] 329. *victor*, compos propositi, cf. 7, 544. 10, 409. Ovid Met. 4, 509. — *miscet*, passim facit incendia.] 330. sqq. Alii per portas apertis geminis foribus patentes intrant urbem, tanto quidem numero, ut vix plures prima protectione e Graecia exisse putes; alii, qui iam advenerunt, vias obsident ac se opponunt fugientibus.] 334. *primi*, quippe qui in primo urbis introitu constituti fuissent; cf. vs. 613 et 12, 577.] 335. *Port. vig.*, ii scilicet, qui non cum ceteris occisi (vs. 266.) pugnabant recedentes. — *caeco M.*, proelio temere et sine spe suscepto.] 336. sq. *num. div.*, dei alicuius; neque enim sua sponte cepisset consilium tam temerarium; actus videlicet ab Erinye (vs. 337), auctore furoris; v. 6, 322.]

- In flammās et in arma feror, quo tristis Erinys,  
 Quo fremitus vocat et sublatus ad aethera clamor.  
 Addunt se socios Rhipeus et maximus armis  
 340 Epytus, oblatis per lunam, Hypanisque Dymasque,  
 Et lateri adglomerant nostro, iuvenisque Coroebus,  
 Mygdonides. Illis ad Troiam forte diebus  
 Venerat, insano Cassandrae incensus amore,  
 Et gener auxilium Priamo Phrygibusque ferebat,  
 345 Infelix, qui non sponsae praecepta furentis  
 Audierit.  
 Quos ubi confertos audere in proelia vidi,  
 Incipio super his: Iuvenes, fortissima frustra  
 Pectora, si vobis audentem extrema cupido  
 350 Certa sequi, quae sit rebus fortuna videtis;  
 Excessere omnes, adytis arisque relictis,  
 Di, quibus inperium hoc steterat; succurritis urbi  
 Incensae; moriamur et in media arma ruamus.  
 Una salus victis, nullam sperare salutem.  
 355 Sic animis iuvenum furor additus. Inde, lupi ceu  
 Raptores atra in nebula, quos improba ventris  
 Exegit caecos rabies, catulique relictī  
 Faucibus expectant siccis, per tela, per hostis  
 Vadimus haud dubiam in mortem mediaeque tenemus  
 360 Urbis iter; nox atra cava circumvolat umbra.

340. Luna illustratam fuisse hanc noctem discimus et ex hoc versu et ex vs. 255. Cui rei non videtur adversari vs. 250 „ruit oceano Nox involvens umbra magna terramque polumque;“ nam aut illunis fuit ea nox principio, aut facies rerum nocturna, comparata cum diurno splendore, etiam postquam luna in caelum evecta est, opaca et umbrosa recte dici potuit. At eadem nox atra dicitur, ergo omnis lucis expers, vs. 360, quamquam, quae vs. 340 et 360 relata legimus, brevissimo intervallo inter se discreta sunt; et rursus caeca appellatur ea nox vs. 397, obscura vs. 420; accedunt spissae umbrae noctis vs. 621. Nisi igitur Virgilium parum sibi in ea re constitisse putaveris, dicendum erit lunam subinde nubibus obductam fuisse. | 344. *gener* etiam qui *gener* esse *vult*; similiter *vir*, *maritus*, cf. 4, 35. Tibull. 3, 2, 14. | 345. v. vs. 247. | 347. *audere in pr.*, audacia incensus esse ad pugnandum; Grat. 498 „non omne meas genus audet in artes.“ | 348. *Incipio* fari, *his*, ad hos; *super*, insuper; audaciam, quam ipsi afferebant, insuper oratione incendo. | 348 sqq. O iuvenes, frustra fortes! si decrevistis me sequi audentem extrema s. in certissimum vitae discrimen me committentem, non celabo vos, id quod ipsi videtis, quo loco sit fortuna urbis; itaque qua una in re consistit salus victis hominibus, contemnentis mortem ruamus in medios hostes. Iustin. 20, 3 „nec alia causa victoriae fuit Locrensibus, quam quod desperaverunt.“ — *Si vobis cupido, videtis*: eadem orationis conformatio redit 9, 194 sq. | 351. *Excess.*, quippe captivitatem timentes; v. vs. 320. | 356. v. G. 1, 119. | 357. *caecos* adversus pericula. | 360. *cava*. Habent aer, aura, ventus hoc proprium, ut nihil solidi ac firmi contineant, neque, ut aliae res, spatium aliquod ita impleant, ut, ubi illa sunt, alia res esse non possit; propterea *inanes* saepe dicti a poetis; idem epitheton transfertur ad *nubes*, ut G. 4, 196, ubi vid. Not.; eadem significatione dicitur *nubes cava* 9, 671 et 10, 636; quia eiusmodi res facile cedit omnique rei sese circumfundit, *cavum* est etiam i. q. undique ambiens aliquid,

- Quis cladem illius noctis, quis funera fando  
 Explicet, aut possit lacrimis aequare labores?  
 Urbs antiqua ruit, multos dominata per annos;  
 Plurima perque vias sternuntur inertia passim  
 365 Corpora perque domos et religiosa deorum  
 Limina. Nec soli poenas dant sanguine Teucri;  
 Quondam etiam victis redit in praecordia virtus  
 Victoresque cadunt Danai. Crudelis ubique  
 Luctus, ubique pavor et plurima mortis imago.  
 370 Primus se Danaum, magna comitante caterva,  
 Androgeos offert nobis, socia agmina credens  
 Inscius, atque ultro verbis compellat amicis:  
 Festinate, viri. Nam quae tam sera moratur  
 Segnities? alii rapiunt incensa feruntque  
 375 Pergama; vos celsis nunc primum a navibus itis?  
 Dixit, et extemplo, neque enim responsa dabantur  
 Fida satis, sensit medios delapsus in hostis.  
 Obstipuit, retroque pedem cum voce repressit.  
 Inprovisum aspris veluti qui sentibus anguem  
 380 Pressit humi nitens, trepidusque repente refugit  
 Attollentem iras et caerula colla tumentem;  
 Haud secus Androgeos visu tremefactus abibat.  
 Inruimus, densis et circumfundimur armis,  
 Ignarosque loci passim et formidine captos  
 385 Sternimus; adspirat primo fortuna labori.  
 Atque hic successu exsultans animisque Coroebus,  
 O socii, qua prima, inquit, fortuna salutis  
 Monstrat iter, quaque ostendit se dextra, sequamur:  
 Mutemus clipeos, Danaumque insignia nobis  
 390 Aptemus. Dolus an virtus, quis in hoste requirat?  
 Arma dabunt ipsi. Sic fatus, deinde comantem

circumfusum, ut hoc loco; cf. inter se 1, 516 et 586, praeterea 5, 810.] 364. *inertia*, eorum, qui defendere inermes se non possunt.] 366. v. vs. 72.] 367. *Quond.*, ἔσθ' ὅτε. 368. *crudelia* appellantur, quae sunt cum magno dolore coniuncta, ut *crudelis vita* 8, 579. 9, 497.] 369. *imago*, forma, genus; Tac. Hist. 3, 28 „Integri cum sauciis, semineces cum exspirantibus volvuntur, varia pereuntium forma et omni imagine mortium.“]] 370—434. *Successus primi proelii*; *dolus Troianorum primo Graecis, deinde ipsis perniciosus*.] 373. v. G. 4, 445.] 374. *raperes* s. agere (captas pecudes vel homines) et *ferre* (res suis possessoribus ereptas) hostes praedabundi dicuntur; Xenoph. Hellen. 5, 4, 42 „ἐφερε καὶ ἦγε τὰς θήβας.“] 377. *sensit delapsus*, Graeco more, ἦσθετο ἐμπέσω. Catull. 63, 6, 7 „sensit terrae sola sanguine maculans.“ v. G. 2, 510.] 378. v. G. 1, 200.] 379. Hom. Il. 3, 33 sqq.] 381. v. G. 3, 421.] 383. *dens*, v. vs. 409.] 386. aliter dicitur *animis exsultare*, i. e. esse animo quam maxime fidenti, aliter *exsultare successu*, i. e. vehementer laetari s.] 389. *D. insignia*, arma Graecorum a Troicis diversa, clipeos maxime et galeas; cf. vs. 392 sq.] 391. *deinde*, ut Graecum εἰτα, participiis (h. l. *fatus*) subiicitur, cf. 8, 481, ut

- Androgei galeam clipeique insigne decorum  
 Induitur, laterique Argivum adcommodat ense.  
 Hoc Rhipheus, hoc ipse Dymas omnisque iuventus  
 395 Laeta facit; spoliis se quisque recentibus armat.  
 Vadimus inmixti Danaïs haud numine nostro,  
 Multaque per caecam congressi proelia noctem  
 Conserimus, multos Danaum demittimus Orco.  
 Diffugiunt alii ad navis, et litora cursu  
 400 Fida petunt; pars ingentem formidine turpi  
 Scandunt rursus equum et nota conduntur in alvo.  
 Heu nihil invitis fas quemquam fidere divi!  
 Ecce trahebatur passis Priameia virgo  
 Crinibus a templo Cassandra adytisque Minervae,  
 405 Ad caelum tendens ardentia lumina frustra,  
 Lumina, nam teneras arcebant vincula palmas.  
 Non tulit hanc speciem furiata mente Coroebus,  
 Et sese medium iniecit periturus in agmen.  
 Consequimur cuncti et densis incurrimus armis.  
 410 Hic primum ex alto delubri culmine telis  
 Nostrorum obruimur, oriturque miserrima caedes  
 Armorum facie et Graiarum errore iubarum.  
 Tum Danaï gemitu atque ereptae virginis ira  
 Undique collecti invadunt, acerrimus Ajax,  
 415 Et gemini Atridae, Dolopumque exercitus omnis;  
 Adversi rupto ceu quondam turbine venti  
 Configunt, Zephyrusque Notusque et laetus eois  
 Eurus equis; stridunt silvae, saevitque tridenti  
 Spumeus atque imo Nereus ciet aequora fundo.  
 420 Illi etiam, si quos obscura nocte per umbram  
 Fudimus insidiis totaque agitavimus urbe,  
 Adparent; primi clipeos mentitaque tela  
 Adgnoscent atque ora sono discordia signant.

etiam *tum* 5, 382. 12, 6 et *sic* 1, 225. | 392. *ins.*, cf. 7, 657. | 393. *Ind.*, quod fiebat loro clipei super humeros iniecto et manu sinistra ansae inserta; cf. vs. 671 et Hom. II. 14, 377. | 394. Videtur maior quaedam dignitas Dymanti a poeta tribui; id enim significat pronomen *ipse*; itaque saepe Iovis, aliorum etiam deorum, et ducum nominibus adicitur. | 396. v. G. 4, 22. | 400. *fida*, tutum praebentia perfugium. | 407. *Cor.*, cf. vs. 343. | 409. cf. 3, 222; *armis*, Ablativus hic significat id, quo quis instructus rem gerit; 3, 222 „Irruimus ferro;“ adde 5, 402 et 414. — *densis*, quia ipsi *densi*, conferti vs. 347, incurrunt. | 410. *delubri* Minervae; cf. vs. 425. | 412. *facie* ... *errore*, propter faciem, errorem, cf. 11, 151. | 413. v. 1, 462. | 414. *Ajax*, v. 1, 41. | 415. *Dol.*, v. vs. 7. | 416. *ruptus turbo*, qui subito prorupit; v. G. 3, 428. | 417. Equos tribuunt ventis etiam Horat. Od. 4, 4, 44 et Val. Fl. 1, 611. — *eois*, quia Eurus ab oriente flat. | 423. *ora s. d. s.*, soni quadam proprietate tamquam signo aliquo cognitam declarant diversitatem quandam oris ac loquelae, qua Troiani, qui et ipsi Graece loquuntur, discerni ab adversariis suis poterant; „nam sonis homines, ut aera


- Ilicet obruimur numero; primusque Coroebus  
 425 Penelei dextra divae armipotentis ad aram  
 Procumbit; cadit et Rhipeus, iustissimus unus  
 Qui fuit in Teucris et servantissimus aequi;  
 Dis aliter visum; pereunt Hypanisque Dymasque  
 Confixi a sociis; nec te tua plurima, Panthu,  
 430 Labentem pietas nec Apollinis infula texit.  
 Iliaci cineres et flamma extrema meorum,  
 Testor in occasu vestro nec tela nec ulla  
 Vitavisse vices Danaum, et, si fata fuissent,  
 Ut caderem, meruisse manu.  
 Divellimur inde;  
 435 Iphitus et Pelias mecum; quorum Iphitus aevo  
 Iam gravior, Pelias et volnere tardus Ulixi;  
 Protinus ad sedes Priami clamore vocati.  
 Hic vero ingentem pugnam, ceu cetera nusquam  
 Bella forent, nulli tota morerentur in urbe,  
 440 Sic Martem indomitum, Danaosque ad tecta ruentis  
 Cernimus obsessumque acta testudine limen.  
 Haerent parietibus scalae, postisque sub ipsos  
 Nituntur gradibus, clipeosque ad tela sinistris  
 Protecti obiciunt, prensant fastigia dextris.  
 445 Dardanidae contra turris ac tecta domorum  
 Culmina convellunt; his se, quando ultima cernunt,  
 Extrema iam in morte parant defendere telis;  
 Auratasque trabes, veterum decora alta parentum,

tinnitu, dignoscimus," ait Quintil. 11, 3, 31. | 424. *Ilicet*, continuo, *sqfort.* | 425. *ad aram*, puta in prona. | 426. *i. unus*, unus omnium maxime iustus; similiter *sola fidissima* 11, 821. | 428. *Dis al. v.*, dii non ita egerunt cum eo, ut cum homine omnium iustissimo; cf. Hom. Od. 1, 234. | 429. *P.*, v. vs. 318. | 430. v. 1, 659. | 432. Graeco more Nominativus cum Infinitivo positus; cf. 11, 503. Catal. 8, 1 „Sabinus ille ... ait fuisse multo celerimus.“ | 433. *vices*, „pugnas, quia per vicissitudinem pugnabatur,“ interpretatur Servius; et videtur hoc vocabulum in re gladiatoria locum habuisse; digladiantes enim alter alteri vicissim intentant ictus. Itaque per *vices* alternae petitiones, alterni assultus significari poterant (cf. G. 3, 220); nos dixerimus: *er habe keinen Gang mit den Danaern vermieden*. — Alii interpungunt: *V. vices; Danaum et, si f. f., Ut caderem meruisse m.*; admodum perplexe. | 434. *manu*, virtute, ut 11, 16, multis scilicet, antequam caderem, a me occisis; quod tamquam pretium est vitae pro patria projectae. || 434—558. *Oppugnatio excidiumque regiae; mors Priami.* | 441. *testud.*, facta ex clipeis, cf. 9, 505 et 517 sq. Liv. 34, 39, 44, 9. | 441 sq. Duplex est oppugnationis species: et in fastigium domus Priami evadere tentant Graeci, et per fores, ad quas aditus erat per gradus, irrumperere; ad hoc pertinent verba *obsessum limen et postes sub ipsos nituntur gradibus*, ad illud *Haerent p. scalae et clipeos ... dextris*. Ex solutae orationis consuetudine diceret: *alii* sub ipsos postes nituntur, *alii* clipeis protecti prensant fastigia; v. 1, 701. Item duplex defensionis modus, cf. vs. 445 et 449. — Ceterum si quid habet confusi ea ratio, convenit hoc fervori exponentis ea, quae simul facta sunt. | 443. *ad*, ut G. 2, 352. | 446. *ultima*, rem in extremum discrimen adductam. |



- Devolvunt; alii strictis mucronibus imas  
 450 Obsedere fores; has servant agmine denso.  
 Instaurati animi, regis succurrere tectis  
 Auxilioque levare viros, vimque addere victis.  
 Limen erat caecaeque fores et pervius usus  
 Tectorum inter se Priami, postesque relictī  
 455 A tergo, infelix qua se, dum regna manebant,  
 Saepius Andromache ferre incomitata solebat  
 Ad soceros et avo puerum Astyanacta trahebat.  
 Evado ad summi fastigia culminis, unde  
 Tela manu miseri iactabant inrita Teucri.  
 460 Turrin in praecipiti stantem summisque sub astra  
 Eductam tectis, unde omnis Troia videri  
 Et Danaum solitae naves et Achaia castra,  
 Adgressi ferro circum, qua summa labantis  
 Iuncturas tabulata dabant, convellimus altis  
 465 Sedibus, inpulimusque; ea lapsa repente ruinam  
 Cum sonitu trahit et Danaum super agmina late  
 Incidit. Ast alii subeunt, nec saxa, nec ullum  
 Telorum interea cessat genus.  
 Vestibulum ante ipsum primoque in limine Pyrrhus  
 470 Exsultat, telis et luce coruscus aena;  
 Qualis ubi in lucem coluber mala gramina pastus,

451. *Instaurati a.*, cf. vs. 315 sq. *animi... succurrere*, similiter „Perficere est animus“ 4, 639, nisi quod hic consilium a sola voluntate, illic consilium ab audacia profectum indicatur. Ceterum attende brevitatem sermonis; hoc enim dicere vult poeta: animi, adversa fortuna ante fracti, instaurati vertebantur ad auxilium regi ferendum. | 453 sqq. A tergo, s. postica parte regiae, limen erat caecaeque, s. ignotae aliis, fores postesque relictī, i. e. fere neglecti, qua nullus aut rarus erat transitus. Putabimus autem ingressis per has fores aditum patuisse communem ad omnia conclavia regiae; atque is est ille *pervius usus tectorum inter se.* | 456. *incomit.* nempe ex propinqua domo Hectoris ita latenter per illas fores accedere poterat ad soceros, ut solito duarum famularum comitatu non opus esset; cf. Hom. II. 3, 142 sq. | 457. *ad soceros*, Priamum et Hecubam, ut vs. 579 *patres* i. q. parentes. Liv. 26, 50 „apud soceros tuos.“ | 460. *in praecipiti st.*, in crepidine tecti, unde praecipitari poterat in subeuntes. | 463 sq. ubi summum tabulatum, cui imposita erat illa turris, praebat iuncturas (i. e. partes eas, quibus illa connexa erat tabulato) labantes s. facile collabefaciendas. | 467. *subeunt* in locum occisorum. | 469. Vestibulum locus, qui patebat ante aedes hunc in modum:



*a, b, c, d* parietes domus, *e* ianua, *f, g* platea. Statuis spoliisque instructum 7, 177—186. | 470. *l. aena*, ἀνὴν χαλκείην Hom. II. 13, 341 et v. 7, 463. | 471. *in lucem... convolvit*, v. G. 4, 82. — Ceterum compara cum his G. 3, 426.

- Frigida sub terra tumidum quem bruma tegebat,  
 Nunc, positis novus exuviis nitidusque iuventa,  
 Lubrica convolvit sublato pectore terga  
 475 Arduus ad solem et linguis micat ore trisulcis.  
 Una ingens Periphas et equorum agitator Achilles,  
 Armiger Automedon, una omnis Scyria pubes  
 Succedunt tecto et flammās ad culmina iactant.  
 Ipse inter primos correpta dura bipenni  
 480 Limina perrumpit, postisque a cardine vellit  
 Aeratos; iamque excisa trabe firma cavavit  
 Robora et ingentem lato dedit ore fenestram.  
 Adparet domus intus, et atria longa patescunt;  
 Adparent Priami et veterum penetralia regum,  
 485 Armatosque vident stantis in limine primo.  
 At domus interior gemitu miseroque tumultu  
 Miscetur, penitusque cavae plangoribus aedes  
 Femineis ululant; ferit aurea sidera clamor.  
 Tum pavidae tectis matres ingentibus errant,  
 490 Amplexaeque tenent postis atque oscula figunt.  
 Instat vi patria Pyrrhus; nec claustra, neque ipsi  
 Custodes sufferre valent; labat ariete crebro  
 Ianua, et emoti procumbunt cardine postes.  
 Fit via vi; rumpunt aditus, primosque trucidant  
 495 Inmissi Danai, et late loca milite complent.  
 Non sic, aggeribus ruptis cum spumeus amnis  
 Exiit oppositasque evicit gurgite moles,  
 Fertur in arva furens cumulo, camposque per omnis  
 Cum stabulis armenta trahit. Vidi ipse furem  
 500 Caede Neoptolemum geminosque in limine Atridas;  
 Vidi Hecubam centumque nurus, Priamumque per aras  
 Sanguine foedantem, quos ipse sacraverat, ignis.  
 Quinquaginta illi thalami, spes tanta nepotum,  
 Barbarico postes auro spoliisque superbi,  
 505 Procubuere; tenent Danai, qua deficit ignis.

487. 489. Hom. II. 22, 93 sqq.; notabis etiam contraria „in lucem ... sub terra“ et „frigida bruma ... ad solem“. | 477. Armiger Pyrrhi. — Scyrus, una ex Cyclobus, unde copias adduxerat Pyrrhus, ab avo Lycomedē acceptas. | 479. Ipse, cf. vs. 469. | 480. Praesentia, perrumpit et vellit, indicant rem coeptam; nam vs. 493 demum emoti cardine procumbunt postes. | 481. trabe, arbore, ut 9, 87, propinqua scilicet regiae; eaque pro ariete utitur, cf. vs. 492. | 487. Miscetur, resonat mixto ac vario feminarum gemitu. — cavae aedes cavaedium. | 490. cf. Val. Fl. 2, 168. | 494. rump. ad., ut Livius 2, 50 „rupere viam“, brachen sich Bahn. | 498. Fertur cumulo, v. 1, 105. | 499. Vidi, de tecto scilicet. | 501. quinquaginta erant filiorum uxores s. nurus, ad quas accedunt totidem filiae. | 504. Barbarico, Phrygio; similiter loquentem facit Andromacham Ennius a Cic. Disp. Tuscul. 1, 35 laud. Sic Persa Persas apud Aeschylum, sic Plautus Romanos vocat barbaros. — spol. sup., ex more Romano, cf. 7, 183. | 505. Tenent D., q. d. i., occupaverunt loca, ad quae ignis non pervasit. |



- Forsitan et, Priami fuerint quae fata, requiras.  
 Urbis uti captae casum convolsaque vidit  
 Limina tectorum et medium in penetralibus hostem,  
 Arma diu senior desueta trementibus aevo  
 510 Circumdat nequiquam humeris, et inutile ferrum  
 Cingitur, ac densos fertur moriturus in hostis.  
 Aedibus in mediis nudoque sub aetheris axe  
 Ingens ara fuit iuxtaque veterrima laurus,  
 Incumbens arae atque umbra complexa Penatis.  
 515 Hic Hecuba et natae nequiquam altaria circum,  
 Praecipites atra ceu tempestate columbae,  
 Condensae et divom amplexae simulacra sedebant.  
 Ipsum autem sumptis Priamum iuvenalibus armis  
 Ut vidit, Quae mens tam dira, miserrime coniunx,  
 520 Inpulit his cingi telis? aut quo ruis? inquit.  
 Non tali auxilio nec defensoribus istis  
 Tempus eget, non, si ipse meus nunc adforet Hector.  
 Huc tandem concede; haec ara tuebitur omnis,  
 Aut moriere simul. Sic ore effata recepit  
 525 Ad sese et sacra longaevum in sede locavit.  
 Ecce autem elapsus Pyrrhi de caede Polites,  
 Unus natorum Priami, per tela, per hostis  
 Porticibus longis fugit, et vacua atria lustrat  
 Saucius. Illum ardens infesto vulnere Pyrrhus  
 530 Insequitur, iam iamque manu tenet et premit hasta.  
 Ut tandem ante oculos evasit et ora parentum,  
 Concidit, ac multo vitam cum sanguine fudit.  
 Hic Priamus, quamquam in media iam morte tenetur,  
 Non tamen abstinuit, nec voci iraeque pepercit:  
 535 At tibi pro scelere, exclamat, pro talibus ausis,  
 Di, si qua est caelo pietas, quae talia curet,  
 Persolvant grates dignas et praemia reddant  
 Debita, qui nati coram me cernere letum  
 Fecisti et patrios foedasti funere voltus.

506. *quae fata*, cf. vs. 554. | 512. *Aed. in m.*, i. e. in impluvio, undique ab ipsis aedibus cincto, ubi Penates aram habebant apud Romanos. | 514. *compl. v. G.* 1, 293. | 516. *Praec.*, quae praecipiti volatu tata petierunt. | 517. *sedebant*, more supplicum, ut principio Oed. R. apud Soph.; cf. infra vs. 574. Alii *tenebant*. | 519. *mens dira*, consilium abominandum. | 521. *defens. istis*, telis; sic sublicas, truncis vel navibus ad pontem rumpendum devectis oppositas, defensores appellat Caesar B. G. 4, 17 „ut .. his defensoribus earum rerum via minueretur.“ | 529. *infesto v.*, proprie: infesto telo, quo eum vulneret, cf. 7, 533. | 530. *premit*, percutit, ut 9, 330. | 533. *med. morte*, praesenti mortis periculo. | 535. *At h. l.* est cum indignatione imprecantis; Terent. Hec. 1, 2, 59 „at te dii deaeque perdant cum tuo istoc odio.“ | 536. *pietas*, iustitia et respectus eorum, qui indigna patiuntur, cf. 4, 382. | 539. Re funebri pollui, incestari homines putabantur, cf. 6, 150.; gravius etiam verbum est *foedare*, quasi ad-

- 540 At non ille, satum quo te mentiris, Achilles  
 Talis in hoste fuit Priamo; sed iura fidemque  
 Supplicis erubuit, corpusque exsanguie sepulchro  
 Reddidit Hectoreum, meque in mea regna remisit.  
 Sic fatus senior, telumque inbelle sine ictu
- 545 Coniecit, rauco quod protinus aere repulsum  
 Et summo clipei nequiquam umbone pependit.  
 Cui Pyrrhus: Referes ergo haec et nuntius ibis  
 Pelidae genitori; illi mea tristia facta  
 Degeneremque Neoptolemum narrare memento.
- 550 Nunc morere. Hoc dicens altaria ad ipsa trementem  
 Traxit et in multo lapsantem sanguine nati,  
 Implēuitque comam laeva, dextraque coruscum  
 Extulit ac lateri capulo tenus abdidit ensem.  
 Haec finis Priami fatorum; hic exitus illum
- 555 Sorte tulit, Troiam incensam et prolapsa videntem  
 Pergama, tot quondam populis terrisque superbum  
 Regnatorem Asiae. Iacet ingens litore truncus,  
 Avolsūque humeris caput, et sine nomine corpus.

At me tum primum saevus circumstetit horror.

- 560 Obstipui: subiit cari genitoris imago,  
 Ut regem aequaevum crudeli volnere vidi  
 Vitam exhalantem; subiit deserta Creusa,  
 Et direpta domus, et parvi casus Iuli.  
 Respicio, et, quae sit me circum copia, lustrō.
- 565 Deseruere omnes defessi, et corpora saltū  
 Ad terram misere aut ignibus aegra dedere.  
 Iamque adeo super unus eram, cum limina Vestae  
 Servantem et tacitam secreta in sede latentem  
 Tyndarida aspicio; dant clara incendia lucem
- 570 Erranti passimque oculos per cuncta ferenti.  
 Illa sibi infestos eversa ob Pergama Teucros  
 Et poenas Danaum et deserti coniugis iras  
 Praemetuens, Troiae et patriae communis Erinys,

perso sanguine contaminare.] 541. Supplex sua iura habet a diis, Iove maxime, in eorundemque est *fide*, s. tutela; *erubuit* igitur s. reveritus est Achilles hanc sanctitatem supplicis.] 544. *sine ictu*, non icto, vulnerato eo, qui erat vulnerandus.] 548. *tristia*, crudelia.] 554. *finis fatorum*, ultima fata.] 555. *Sorte*, fato, ut ei erat fatale. — *tulit*, abstulit. — *videntem* per Appositionem relatum ad *illum*: isque exitus miserior fuit eo, quod moriens vidit incensam Troiam etc.] 556. *superbum populis*, imperio populorum.] 558. *sine nom.*, quia absciso capite iam cognosci non poterat, cuius esset corpus.]] 559—633. *Aeneas* horrore percussus meminit senis patris, coniugis parvique filii, ipse ab omnibus desertus. Conspecta sorte Helena exardescit ira casumque patriae statuit illius sanguine ulcisci. Mitigatus a matre Venere domum patriam repetit, Anchisen, Creusam, Ascanium erepturus e periculo.] 566. *aegra*, defessa pugnando.] 567. v. E. 6, 6.] 573. *Praemetuens* est, qui non opperiens malum, quod videtur imminere,

- Abdiderat sese atque aris invisa sedebat.  
 575 Exarsere ignes animo; subit ira cadentem  
 Ulcisci patriam et sceleratas sumere poenas.  
 Scilicet haec Spartam incolumis patriasque Mycenae  
 Aspiciet, partoquē ibit regina triumpho,  
 Coniugiumque domumque, patres natosque videbit,  
 580 Iliadum turba et Phrygiis comitata ministris?  
 Occiderit ferro Priamus, Troia arserit igni,  
 Dardanum totiens sudarit sanguine litus?  
 Non ita. Namque etsi nullum memorabile nomen  
 Feminea in poena est nec habet victoria laudem,  
 585 Exstinxisse nefas tamen et sumpsisse merentis  
 Laudabor poenas, animumque explesse iuvabit  
 Ultricis flammae, et cineres satiasset meorum.  
 Talia iactabam, et furiata mente ferebar,  
 Cum mihi se, non ante oculis tam clara, videndam  
 590 Obtulit et pura per noctem in luce refulsit  
 Alma parens, confessa deam, qualisque videri  
 Caelicolis et quanta solet, dextraque prehensum  
 Continuit, roseoque haec insuper addidit ore:  
 Nate, quis indomitas tantus dolor excitat iras?  
 595 Quid furis? aut quonam nostri tibi cura recessit?  
 Non prius aspicias, ubi fessum aetate parentem  
 Liqueris Anchisen? superet coniunxne Creusa  
 Ascaniusque puer? quos omnis undique Graiae  
 Circumerrant acies, et, ni mea cura resistat,  
 600 Iam flammae tulerint inimicus et hauserit ensis.

369

se ei subtrahit. | 574. v. vs. 517. — *aris*, in gradibus arae. — *invisa*, et suum et commune Helenae odium hac voce exprimit Aeneas. | 576. *scel.*, scelus futurum erat, interficere supplicem ad aras sedentem. | 577 sqq. Indignatur Aeneas, quod, cum perditum videat Priamum, perditam inclutam illam Troiam, Helenae, causae horum malorum, paratus videatur reditus in patriam, parata etiam quaedam gloria; sic verbis *occiderit ... arserit*, quae sunt futura exacta, causa indignationis Futuro simplici indicatae significatur. — Sunt autem haec omnia rhetorice composita et exornata; et tria (4. 5. 6.) tribus (1. 2. 3.) respondent inverso ordine: (4) „*Occiderit f. Priamus*“ ... (3) „*Coniug. d. patres n. v.*“, (5) „*Troia ars. i.*“ ... (2) „*parto ib. reg. triumpho*“, (6) „*Dard. tot. s. s. l.*“ ... (1) „*incolumis patr. Myc. aspiciet*“. — *patres* autem (v. vs. 457.) ait Aeneas, cum solus superstes esset Tyndarus, et *natos*, cum unam Helena filiam Hermionen haberet, quo extolleret felicitatem odiosae Helenae comparatam cum invidenda sorte eorum, qui, postquam domo diu auferunt, reduces omnia, quae in oculis sinuque gestant, reperiunt integra. | 583. *nullum*, gravius negat, quam *non*, ut 6, 405. 10, 592. | 585. *merentis*, sumi merentes s. merito sumendas. | 586 sq. *explere* Graeco more cum Genetivo iunctum. — *an. expl. ultr. fl.*, satisfacere animo per ultionem cupidissime expetitam; *flamma* enim significat vehementem cupiditatem. | 588. *iact.* v. 1, 102. | 595. *nostri cura*, ipsa negligi videtur, cum negligitur Anchises ab ipsa amatus neposque Ascanius cum matre. | 596. *ubi*, in qua fortuna. | 600. v. vs. 555. — *hauserit*, cf. Hom. II. 14, 517 „*δία*

- Non tibi Tyndaridis facies invisa Lacaenae  
 Culpatusve Paris, divom inclementia, divom,  
 Has evertit opes sternitque a culmine Troiam.  
 Aspice — namque omnem, quae nunc obducta tuenti  
 605 Mortalis hebetat visus tibi et humida circum  
 Caligat, nubem eripiam; tu ne qua parentis  
 Iussa time, neu praeceptis parere recusa —  
 Hic, ubi disiectas moles avolsaque saxis  
 Saxa vides mixtoque undantem pulvere fumum,  
 610 Neptunus muros magnoque emota tridentis  
 Fundamenta quatit totamque a sedibus urbem  
 Eruit. Hic Iuno Scaeas saevissima portas  
 Prima tenet, sociumque furens a navibus agmen  
 Ferro accincta vocat.  
 615 Iam summas arces Tritonia, respice, Pallas  
 Insedit, nimbo effulgens et Gorgone saeva.  
 Ipse Pater Danaïs animos virisque secundas  
 Sufficit, ipse deos in Dardana suscitât arma.  
 Eripe, nate, fugam, finemque inpone labori.  
 620 Nusquam abero, et tutum patrio te limine sistam.  
 Dixerat, et spissis noctis se condidit umbris.  
 Adparent dirae facies inimicaque Troiae  
 Numina magna deum.  
 Tum vero omne mihi visum considerare in ignis  
 625 Ilium et ex imo verti Neptunia Troia;  
 Ac veluti summis antiquam in montibus ornum  
 Cum ferro accisam crebrisque bipennibus instant  
 Eruere agricolae certatim; illa usque minatur  
 Et tremefacta comam concusso vertice nutat,  
 630 Volneribus donec paulatim evicta supremum  
 Congemuit traxitque iugis avolsa ruinam.

*δ' ἔντερά χαλκὸς ἄφυσεν*, v. G. 3, 105 et cf. 10, 314. Liv. 7, 10. | 601. *tibi*, v. G. 2, 206. | 603. v. vs. 290. | 606. Ex vulgari consuetudine ita instituas orationem: Ac ne forte matris iussa (quae vs. 619 sq. exponuntur) timeas, en omnem tibi eripiam nubem. | 613. *prima*, v. vs. 334. — iunge *furens vocat*, v. 5, 481. | 615. *Iam* respondet praegressae particulae *Hic* vs. 608 et 612, sed ita, ut animum vocet ad videnda maiora; adest in evertenda Troia etiam gravior numen, Pallas. — *respicere* dicitur saepe, qui in aliam partem vel ad aliam rem convertit oculos, cf. 3, 593. 6, 548. 7, 454. | 616. *nimbo eff.*: ita Venus acuit (va. 604 sqq.) oculos Aeneae, ut e nimbo, quo dii circumfusi ad terram descendere solent, v. 8, 608, effulgere deam possit cernere. — *Gorgone saevâ*, ut „saevus securi Torquatus“ 6, 825, intentans scilicet hostibus aegidem cum capite Gorgonia horrifero. — Alii legunt *limbo* et *saevâ*. | 617. *Ipse P.*, v. G. 1, 163. — *secundas*, quae eventum secudent. | 619. eripimus nos ex periculis; ergo *eripe* *fugam* videtur significare: fac fugias, cum periculum sit, ne mox potestas fugiendi sit nulla, a. fuge, dum licet. | 625. *Neptunia T.*, cf. Hom. Il. 7, 452 sq. 21, 446 sq. | 626. v. 1, 148. | 628. *Eruere*, perrumpendo radices scilicet; hinc paulo post: „iugis avolsa“ 5, 449 „radicibus eruta pinus.“ | 629. v. E. 3, 106.

Descendo, ac ducente deo flammam inter et hostis  
Expedior; dant tela locum, flammaeque recedunt.

Atque ubi iam patriae perventum ad limina sedis

635 Antiquasque domos, genitor, quem tollere in altos

Optabam primum montis primumque petebam,

Abnegat excisa vitam producere Troia

Exsiliūque pati. Vos o, quibus integer aevi

Sanguis, ait, solidaeque suo stant robore vires,

640 Vos agitate fugam.

Me si caelicolae voluissent ducere vitam,

Has mihi servassent sedes. Satis una superque

Vidimus excidia et captae superavimus urbi.

Sic o, sic positum adfati discedite corpus.

645 Ipse manu mortem inveniam; miserebitur hostis

Exuviasque petet. Facilis iactura sepulchri.

Iam pridem invisus divis et inutilis annos

Demoror, ex quo me divom pater atque hominum rex

Fulminis adflavit ventis et contigit igni.

650 Talia perstabat memorans, fixusque manebat.

Nos contra effusi lacrimis coniunxque Creusa

Ascaniusque omnisque domus, ne vertere secum

Cuncta pater fatoque urgenti incumbere vellet.

Abnegat, inceptoque et sedibus haeret in isdem.

632. deo, generis nomen, quo etiam deae comprehenduntur; nam Venus eum duxisse putanda est. || 634—725. *Anchises, diu reluctatus, tandem victus ostentis deorum comitem fugae se praebet.* | 635. *tollere*, ut debilem, cf. vs. 647 sqq. | 638. v. G. 4, 491. | 639. *stant.*, sustinent se, suo rob., naturali et illibato. | 640. *agitate fugam*, ea facere sedulo, quae pertinent ad fugam exsequendam. | 643. urbi ab Hercule captae, v. 8, 291 et cf. Hom. 5, 640 sqq. | 644. *sic positus* (ut 4, 681), quemadmodum mortui solent, rectus extensusque; Eurip. Hippol. 786 „Ὁρῶσαί ἐκτείνοντες ἄθλιον νέκυν.“ — *adfati* extremo illo *Vale, Vale, Vale*; cf. 6, 506. adde 11, 97. | 645. *mis. h. Exuv. p.*: Anchises in beneficii loco mortem ponit, quam hostis, exuvias petens, ipsi afferat. Sont quaedam apud Virgilium manifestae imitationes Ciceronis; quare nescio an h. l. poeta illa meminerit, quae Cicero, mortem optans, scripsit ad Att. Ep. 9, 12, 4 „ne quid optem quidem iam habeo, nisi ut aliqua inimici misericordia liberemur.“ | 646. *Fac. i. sep.* Hoc a summa rerum omnium desperatione profectum, ut ne sepulchri quidem iactura moveatur; cf. Stat. Theb. 8, 736 sqq. | 647. *invisus d.*, quod inter vina apud sodales glorius amoris Veneris, ob id ab love fulmine ictus; Hygin. fab. 94, et cf. Hom. Hymn. in Ven. 287 sqq. — *inutilis*, Aesch. Prom. 371 „ἀρρεῖον δέμας.“ | 648. *annos demoror*, vitam moror et quasi impatientem huius morae et invitam retineo. | 649. Epicurei dicebant ventis gravidas esse nubes et ipsum fulmen esse ventum igneum, Lucret. 6, 273—75., aut vi venti extrinsecus venientis excuti fulmen nubibus, Lucret. 6, 294—97. Unde intelligitur, quare 8, 430 Cyclopes fulmini informato radios rutili tres ignis et altis austri addiderint. — *adflavit*: Liv. 30, 6 „saucii adflatique incendio.“ | 651. *Eff. lacr.*, ut Val. Fl. 7, 34 „talique effunditur ira.“ Obtestati eum sumus cum multis lacrimis, ne ... vellet. | 652. *vert.*, evertere, perdere. | 653. *fato urg. incumb.*, ultro aggravare satum urgens. | 654. Prae-positio ad utrumque nomen pertinet: *in eodem incepto et in iisdem sedibus*; v.

- 655 Rursus in arma feror, mortemque miserrimus opto,  
 Nam quod consilium aut quae iam fortuna dabatur?  
 Mene efferre pedem, genitor, te posse relicto  
 Sperasti, tantumque nefas patrio excidit ore?  
 Si nihil ex tanta Superis placet urbe relinqui,  
 660 Et sedet hoc animo, perituraeque addere Troiae  
 Teque tuosque iuvat, patet isti ianua leto,  
 Iamque aderit multo Priami de sanguine Pyrrhus,  
 Gnatum ante ora patris, patrem qui obtruncat ad aras.  
 Hoc erat, alma parens, quod me per tela, per ignis  
 665 Eripis, ut mediis hostem in penetralibus, utque  
 Ascanium patremque meum iuxtaque Creusam  
 Alterum in alterius mactatos sanguine cernam?  
 Arma, viri, ferte arma; vocat lux ultima victos.  
 Reddite me Danais; sinite instaurata revisam  
 670 Proelia. Numquam omnes hodie moriemur inulti.  
 Hinc ferro accingor rursus clipeoque sinistram  
 Insertabam aptans meque extra tecta ferebam.  
 Ecce autem complexa pedes in limine coniunx  
 Haerebat, parvumque patri tendebat Iulum:  
 675 Si periturus abis, et nos rape in omnia tecum;  
 Sin aliquam expertus sumptis spem ponis in armis,  
 Hanc primum tutare domum. Cui parvus Iulus,  
 Cui pater et coniunx quondam tua dicta relinquer?  
 Talia vociferans gemitu tectum omne replebat,  
 680 Cum subitum dictumque oritur mirabile monstrum.  
 Namque manus inter maestorumque ora parentum  
 Ecce levis summo de vertice visus Iuli  
 Fundere lumen apex tactumque innoxia mollis  
 Lambere flamma comas et circum tempora pasci.  
 685 Nos pavidum trepidare metu, crinemque flagrantem  
 Excutere et sanctos restringere fontibus ignis.  
 At pater Anchises oculos ad sidera laetus  
 Extulit, et caelo palmas cum voce tetendit:

1, 544.] 656. *quae fort.*, quae salutis via.] 658. *t. nefas*, sermo suadens rem tam nefariam.] 663. v. 1, 99.] 667. cernam confundi sanguinem simul mactatorum.] 668. *Arma*, quae domum ingressus deposuerat.] 670. v. E. 3, 49.] 671 sq. v. vs. 393.] 673. c. p., γούρων ἀπαμύενη.] 678. *Cui relinquer?* sc. hostibus; et cf. 4, 323 sq.] 681. *inter* designat locum, in quo medio vel est vel fit aliquid: inter manus parentum Iulum amplectentium, ut 9, 502 inter manus gestantium. — *inter ora* invicem obversa.] 683. *apex*, flamma in apicis speciem acuminata. — *tactu innox.*, ut *mala tactu* G. 3, 416.] 688. *caelo*, v. E. 2, 30.] 690. *Aspice n. h. t.* Cuilibet Verbo adiungi potest Accusativus Substantivi significatione cum eo Verbo cognati, ut *ire iter s. viam*, *pugnam pugnare*, *furorem furere* 12, 680; similiter *aequora curro* 5, 235, quasi *curro cursum maritimum*; sed plerumque talis Substantivi loco ponitur Pronomen generis neutri, ut *id te hortor*, quasi *eum hortatum te hortor*; *quid me cogis?* *welchen Zwang thust du mir an?* Graece: τί, vel τίνα ἀνάγκην, ἀνγκάζεις με; infra 6, 466

- Juppiter omnipotens, precibus si flecteris ullis,  
 690 Aspice nos hoc tantum; et, si pietate meremur,  
 Da deinde auxilium, pater, atque haec omina firma.  
 Vix ea fatus erat senior, subitoque fragore  
 Intonuit laevum, et de caelo lapsa per umbras  
 Stella facem ducens multa cum luce cucurrit.  
 695 Illam, summa super labentem culmina tecti,  
 Cernimus Idaea claram se condere silva  
 Signantemque vias; tum longo limite sulcus  
 Dat lucem, et late circum loca sulfure fumant.  
 Hic vero victus genitor se tollit ad auras,  
 700 Adfaturque deos et sanctum sidus adorat.  
 Iam iam nulla mora est; sequor, et, qua ducis, adsum.  
 Di patrii, servate domum, servate nepotem.  
 Vestrum hoc augurium, vestroque in numine Troia est.  
 Cedo equidem, nec, nate, tibi comes ire recuso.  
 705 Dixerat ille; et iam per moenia clarior ignis  
 Auditur, propiusque aestus incendia volvunt.  
 Ergo age, care pater, cervici inponere nostrae;  
 Ipse subibo humeris, nec me labor iste gravabit;  
 Quo res cumque cadent, unum et commune periculum,  
 710 Una salus ambobus erit. Mihi parvus Iulus  
 Sit comes, et longe servet vestigia coniunx.  
 Vos, famuli, quae dicam, animis advertite vestris.  
 Est urbe egressis tumulus templumque vetustum  
 Desertae Cereris, iuxtaque antiqua cupressus,

„extremum fato, quod te adloquor, hoc est,“ i. e. extremam fatum mihi concessit hanc, *quam* te adloquor *adlocutionem*; v. etiam 8, 423. Eiusdem generis sunt *acerba sonare, crebra ferire, torva tueri, extrema gemere*. Itaque *aspice nos hoc tantum* i. q. hunc tantum aspectum nos aspice, τοῦτο μόνον ἡμᾶς ἐπιβλεῖν, eatenus duntaxat res nostras aspice, i. e. omnis Troianorum fortuna cum corruerit, hanc tantum eius partem aspice. *Aspicit* autem, qui est propitius, non, ut iratus, avertit oculos.] 691. Alii *Da d. augurium*, quae lectio incertum est utrum excogitata sit a Probo grammatico, an in aliquo vetere exemplari ab eo inventa. — *haec om. firma*: Servius: „non unum augurium vidisse sufficit, nisi confirmetur ex simili; nam si dissimilia sunt posteriora, solvantur priora.“ cf. 8, 78.] 692. *Vix ... quae*, Copulae *et, quae*, saepe res coniungunt, quae nullo prope temporis intervallo sese excipere significantur, maxime post Particulam *vix*, cf. 3, 8. 5, 857. 8, 520. 11, 296; post *ubi* 12, 81.] 693. Tonitrua a laeva parte venientia fausta habebantur apud Romanos.] 697. in ipso cursu ista stella s. fax caelestis (v. G. 1, 365.) signa quaedam cursus sui (fulgorem quandam intellige) relinquit, et postquam condita est, tum omnis eius via, sulci instar in caelo quasi impressa, luce effulget.] 699. *se toll. ad aur.*, sublevat se oculosque ac manus convertit ad caelum.] 703. *in (sub 9, 247.) vestro numine*, in vestra tutela. Significat Anchises rem Troianam nondum prorsus perditam ac meliore fortuna in novis sedibus usuram.] 705. *clarior*, cf. vs. 301.] 711. v. G. 1, 335. — *longe*, vs. 725 *pone*, ne, si multi una irent, animadvertenterentur ab hostibus, cf. etiam vs. 716.] 713. *Est tum. urbe egressis*, sc. adversus.] 714. Proprie templum Cereris desertum erat, i. e. loco positum infrequenti, s. quo homines raro (aut numquam) solent accedere; cf. 3, 646. 11,

- 715 Religione patrum multos servata per annos.  
Hanc ex diverso sedem veniemus in unam.  
Tu, genitor, cape sacra manu patriosque Penatis;  
Me, bello e tanto digressum et caede recenti,  
Attrectare nefas, donec me flumine vivo
- 720 Abluero.  
Haec fatus, latos humeros subiectaque colla  
Veste super fulvique insternor pelle leonis,  
Succedoque oneri; dextrae se parvus Iulus  
Implicuit sequiturque patrem non passibus aequis;
- 725 Pone subit coniunx.  
Ferimur per opaca locorum;  
Et me, quem dudum non ulla iniecta movebant  
Tela neque adverso glomerati ex agmine Graii,  
Nunc omnes terrent aurae, sonus excitat omnis  
Suspensum et pariter comitique onerique timentem.
- 730 Iamque propinquabam portis, omnemque videbar  
Evasisse viam, subito cum creber ad auris  
Visus adesse pedum sonitus, genitorque per umbram  
Prospiciens, Nate, exclamat, fuge, nate: propinquant;  
Ardentis clipeos atque aera micantia cerno.
- 735 Hic mihi nescio quod trepido male numen amicum  
Confusam eripuit mentem. Namque avia cursu  
Dum sequor et nota excedo regione viarum,  
Heu! misero coniunx fatone erepta Creusa  
Substitit, erravitne via, seu lassa resedit,
- 740 Incertum; nec post oculis est reddita nostris.  
Nec prius amissam respexi animumve reflexi,  
Quam tumulum antiquae Cereris sedemque sacratam  
Venimus; hic demum collectis omnibus una

843. Tibull. 1, 1, 11. | 717. v. vs. 320. | 719. *fl. vivo*, aqua profluente. | 721. v. 1, 225. — *subi. c.*, collum, quod subiticio recipiendo oneri. | 725. *P. s. coni.* cum suis comitibus, cf. vs. 744. | 725—804. *Aeneas dum fugit cum suis, Creusam uxorem amittit inter trepidationem. Repotenti urbem obvia fit umbra Creusae eumque de suis utriusque rebus consolatur. Deinde Aeneas revisit suos magnamque multitudinem videt affluisse paratam exsilio. Oriente luce socedit in montes.* | 726. Et h. l. inservit indicandae mirationi ex inexpectata rei mutatione natae. | 727. *adv. glom. ex agm.*, conferta multitudo ex hostili agmine collecta ad ipsam adoriendum. | 731. *Ev. viam*: videbar mihi iam omnem viam per urbem feliciter et sine periculo emensus; alii *Ev. vicem*. | 735. *male amicum*, infestum. | 736. *Conf. erip. m.*, confudit confusamque eripuit, ἐξέλετο φρενας. | 737. *regio* significat certum quendam tractum viae s. lineam quasi quandam, quam sequitur via, sive rectam sive obliquam, *die Richtung der Weges*; deflecto igitur de via nota s. vulgo trita, nec pergo ire, quo ea ducit; v. 9, 385. Liv. 21, 31 „recta regione iter instituit.“ | 738 sq. obscuritas ex brevitate latini sermonis; explicatius sic: fato est erepta, sive substitit, sive erravit via *cet.* Servius: „Ordo est: fato erepta Creusa substititne, erravitne via. Non enim dubitat fato esse sublatam, cf. vs. 777 sq.“ — *misero mihi*.



- Defuit, et comites natumque virumque fefellit.  
 745 Quem non incusavi amens hominumque deorumque?  
 Aut quid in eversa vidi crudelius urbe?  
 Ascanium Anchisenque patrem Teucrosque Penatis  
 Commendo sociis et curva valle recondo;  
 Ipse urbem repeto et cingor fulgentibus armis.  
 750 Stat casus renovare omnis, omnemque reverti  
 Per Troiam, et rursus caput obiectare periclis.  
 Principio muros obscuraque limina portae,  
 Qua gressum extuleram, repeto, et vestigia retro  
 Observata sequor per noctem et lumine lustrō.  
 755 Horror ubique animo, simul ipsa silentia terrent.  
 Inde domum, si forte pedem, si forte, tulisset,  
 Me refero. Inruerant Danaï, et tectum omne tenebant.  
 Illicet ignis edax summa ad fastigia vento  
 Volvitur; exsuperant flammae, furit aestus ad auras.  
 760 Procedo et Priami sedes arcemque reviso.  
 Et iam porticibus vacuis Iunonis asylo  
 Custodes lecti Phoenix et dirus Ulixes  
 Praedam adservabant. Huc undique Troia gaza  
 Incensis erepta adytis, mensaeque deorum,  
 765 Crateresque auro solidi, captivaeque vestis  
 Congeritur. Pueri et pavidæ longo ordine matres  
 Stant circum.  
 Ausus quin etiam voces iactare per umbram  
 Inplevi clamore vias, maestusque Creusam  
 770 Nequiquam ingeminans iterumque iterumque vocavi.  
 Quaerenti et tectis urbis sine fine furenti  
 Infelix simulacrum atque ipsius umbra Creusae  
 Visa mihi ante oculos et nota maior imago.  
 Obstipui, steteruntque comae et vox faucibus haesit.  
 775 Tum sic adfari et curas his demere dictis:  
 Quid tantum insano iuvat indulgere dolori,  
 O dulcis coniunx? non haec sine numine divom  
 Eveniunt; nec te comitem portare Creusam  
 Fas aut ille sinit superi regnator Olympi.

744. *fefellit*, ἔλαθε sc. μὴ συνεφεπομένη. | 754. *lum.*, oculis. | 756. *iteratum* si forte significat cupere nos fieri, quod sitae futurum, incertum est. | 758. *Illicet*, v. vs. 424. | 761. *asylo*, templo; nam templa (non autem omnia) iis, qui culpam aliquam commiserant, praebebant perfugium; erat autem Iunonis templum in arce. | 764. *mens. deor.*, mensam in templo Iunonis Olympiae positam commemorat Pausan. 5, 20. Servius ad 8, 279 „Apud antiquos inter vasorum supellectilem etiam mensam cum aris mos erat consecrari, quo die templum consecrabatur.“ | 765. v. 5, 663. et G. 2, 464. | 772. *Infelix* s., quia ipsa Creusa infelix Aeneae videtur. | 773. *maior*, sic putabantur imagines mortuorum apparere, cf. Ovid. Fast. 2, 503. | 775. v. 8, 35. | 779. *Fas*, fatum, ut 6, 438. non fatum nec interpretis fati, Iuppiter; similiter particula negativa, *non*, *nec*, sequente *aut* ad

- 780 Longa tibi exsilia, et vastum maris aequor arandum.  
 Et terram Hesperiam venies, ubi Lydius arva  
 Inter opima virum leni fluit agmine Thybris:  
 Illic res laetae regnumque et regia coniunx  
 Parta tibi. Lacrimas dilectae pelle Creusae.
- 785 Non ego Myrmidonum sedes Dolopumve superbas  
 Aspiciam, aut Graiis servitum matribus ibo,  
 Dardanis, et divae Veneris nurus;  
 Sed me magna deum Genetrix his detinet oris.  
 Iamque vale, et nati serva communis amorem.
- 790 Haec ubi dicta dedit, lacrimantem et multa volentem  
 Dicere deseruit, tenuisque recessit in auras.  
 Ter conatus ibi collo dare bracchia circum.  
 Ter frustra comprehensa manus effugit imago,  
 Par levibus ventis volucrique simillima somno.
- 795 Sic demum socios consumpta nocte reviso.  
 Atque hic ingentem comitum adfluxisse novorum  
 Invenio admirans numerum, matresque, virosque,  
 Collectam exsilio pubem, miserabile vulgus.  
 Undique convenere, animis opibusque parati,
- 800 In quascumque velim pelago deducere terras.  
 Iamque iugis summae surgebat Lucifer Idae  
 Ducebatque diem, Danaïque obsessa tenebant  
 Limina portarum, nec spes opis ulla dabatur:  
 Cessi et sublato montis genitore petivi.

duo verba refertur vs. 785. 3, 43. 4, 501. 10, 528. | 780. *exsilia*, sc. obeunda sunt; v. 1, 426. | 781. *Et*, scilicet ita iactatus variis erroribus venies in Hesperiam. — *Lydius*, ex Etruria veniens; nam Etrusci a Lydis orti falso credebantur. | 782. *arva virum* appellat poeta imitatus Homericum illud et Hesiodium *ἔργα ἀνδρῶν* s. *ἀνδρώπων*, quod dicitur de opere rustico. Non igitur in desertam aliquam terram venturum Aeneam dicit, sed in eam, quae culta sit navorum hominum industria, *θάλλουσαν ἔργοις ἀνδρώπων*. — *agm.*, v. G. 1, 322. | 784. v. 1, 462. | 786. *matribus*, matronis. | 788. *m. d. G.*, Cybele me hic detinet, ut sim una ex eius comitibus; id quod refert etiam Paus. 10, 26, 1. | 791. cf. 4, 278. | 792. cf. Hom. Od. 11, 206 sqq. | 798. *pubem*, populum, ut 7, 219. | 801—804. *Iamque ... Cessi*. Copulae *et*, quae ita praeponuntur enuntiatis tempus aliquod significantibus, ut animum attentiores reddant ad ea, quae eo tempore evenerunt, cf. 3, 356 cum 358; 5, 721 cum 722; 10, 256 cum 258. | 804. *Cessi*: cedimus inviti. — *montes*, cf. vs. 636 et 3, 6.

# A E N E I D O S

## LIBER TERTIUS.

(Errores Aeneas.)

- Postquam res Asiae Priamique evertere gentem  
 Inmeritam visum Superis ceciditque superbum  
 Ilium et omnis humo fumat Neptunia Troia,  
 Diversa exsilia et desertas quaerere terras  
 5 Auguriis agimur divom, classemque sub ipsa  
 Antandro et Phrygiae molimur montibus Idae,  
 Incerti, quo fata ferant, ubi sistere detur,  
 Contrahimusque viros. Vix prima inceperat aestas,  
 Et pater Anchises dare fatis vela iubebat,  
 10 Litora cum patriae lacrimans portusque relinquo  
 Et campos, ubi Troia fuit. Feror exsul in altum  
 Cum sociis natoque Penatibus et magnis dis.  
 Terra procul vastis colitur Mavortia campis,  
 Thraces arant, acri quondam regnata Lycurgo,  
 15 Hospitium antiquum Troiae sociique Penates,  
 Dum fortuna fuit. Feror huc, et litore curvo  
 Moenia prima loco, fatis ingressus iniquis,  
 Aeneadasque meo nomen de nomine fingo.

**Aeneid. L. III.** 1—72. *Aeneas iussu deorum novam quaerens patriam dum primum considit in Thracia, proterretur diris prodigiis per Polydorum oblati.* | 3. *fumat*, v. 1, 99. — *Neptunia*, v. 2, 625. | 4. *Diversa exs.*: positum in contraria parte orbis terrarum exsiliū locum, ut Ovid. *Trist.* 4, 2, 69 „procul Latio *diversum* missus in orbem;“ et cf. 1, 376. 11, 261. 12, 708. — *desertas* „a Dardano“ ait Servius; cf. vs. 94—97. 163—171. 7, 205—208. *Auguria*, quae Troianis obtigerant, ita interpretabantur, ut omnino statuerent terras quasdam diversas ac desertas petendas esse; desertas a Dardano significari, nondum sciebant; et quod Creusa 2, 781 sq. Aeneam in Hesperia ad Tiberim novum regnum conditurum dixerat, haec ipsa nomina Aeneae erant ignota, atque ipsum Hesperiae vocabulum, de quo aliquanto post certiora edocetur vs. 163 sqq., videri poterat nihil nisi plagam aliquam occidentalem indicare, praesertim cum *terram Hesperiam* nominasset Creusa, non simpliciter *Hesperiam*. | 6. *Antandrus* oppidum ad radices Idae. | 9. *Et*, v. 2, 692. — *fatis*: ut alias *ventis* dantur vela, ita h. l. *fatis*, cum, quibus danda essent ventis, non satis sciret Aeneas, cf. vs. 7. | 12. Penates ac dii magni sunt iidem; habet igitur copula h. l. vim declarandi, ut vs. 148. 336. 442. Hi penates cum praesides essent imperii (cf. vs. 158 sq., 8, 679 et v. 8, 636), ob eam ipsam causam videntur dii magni esse dicti; accedebat quaedam obscura religio, quod vulgo nesciebant, quibus nominibus singuli eorum appellarentur; quae ipsa obscuritas augere poterat venerationem, τὰ ἀδελὰ γὰρ δεινότερα. | 13. *Mavort.*, Thracia sedes Martis, Hom. *Od.* 8, 361. | 14. *acri*, quia Bacchum eiusque nutrices infestissimo odio persecutus est, Hom. *Il.* 6, 130 sqq. | 15. *socii*, foederati, quod ipsi Troiani et Thraces foedere erant iuncti. | 16. *fuit*, perstitit, integra fuit. | 17. *ingressus* Thraciam. | 18.

- Sacra Dionaeae matri divisque ferebam  
 20 Auspicious coeptorum operum, superoque nitentem  
 Caelicolum regi mactabam in litore taurum.  
 Forte fuit iuxta tumulus, quo cornea summo  
 Virgulta et densis hastilibus horrida myrtus.  
 Accessi, viridemque ab humo convellere silvam  
 25 Conatus, ramis tegerem ut frondentibus aras,  
 Horrendum et dictu video mirabile monstrum.  
 Nam, quae prima solo ruptis radicibus arbos  
 Vellitur, huic atro liquuntur sanguine guttae  
 Et terram tabo maculant. Mihi frigidus horror  
 30 Membra quatit, gelidusque coit formidine sanguis.  
 Rursus et alterius lentum convellere vimen  
 Insequor et caussas penitus temptare latentis:  
 Ater et alterius sequitur de cortice sanguis.  
 Multa movens animo Nymphas venerabar agrestis  
 35 Gradivumque patrem, Geticis qui praesidet arvis,  
 Rite secundarent visus omenque levarent.  
 Tertia sed postquam maiore hastilia nisu  
 Adgredior genibusque adversae obluxor arenae —  
 Eloquar, an sileam? — gemitus lacrimabilis imo  
 40 Auditur tumulo, et vox reddita fertur ad aures:  
 Quid miserum, Aenea, laceras? iam parce sepulto;  
 Parce pias scelerare manus. Non me tibi Troia  
 Externum tulit aut cruor hic de stipite manat.  
 Heu! fuge crudelis terras, fuge litus avarum.  
 45 Nam Polydorus ego. Hic confixum ferrea textit  
 Telorum seges et iaculis increvit acutis.  
 Tum vero ancipiti mentem formidine pressus  
 Obstipui, steteruntque comae et vox faucibus haesit.  
 Hunc Polydorum auri quondam cum pondere magno  
 50 Infelix Priamus furtim mandarant alendum  
 Threicio regi, cum iam diffideret armis  
 Dardaniae cingique urbem obsidione videret.

v. G. 1, 137. | 19. *Dion. m.*, Veneri, cuius mater Dione. — *divis*, v. 8, 103. | 21. v. 2, 242. | 25. *ram. t.*, frondibus velarem, ut mos erat; cf. 2, 248 sq. G. 4, 276. | 26. Donat.: „*Horrendum* propter sanguinem; *mirabile*, quod fuebatur de ligno.“ | 29 sq. v. 1, 92. | 34. *Nymph.*, quae fruteto illi praerant. | 36. *Rite*, videtur poeta hoc significare: solito diis more, cum novo ostento, quod sibi obtingere optat Aeneas, metum prioris volunt levare. — *visus*, Servius: „visa.“ | 40. *odi* vox dicitur, cum solius loquentis, *reddi*, cum etiam audientis ratio habetur. | 41. *iam. p.*, noli laerare amplius. | 43. *tulit*, protulit, genuit. — *aut*, v. 2, 779. | 46. *iaculis* tertius casus: seges illa crevit in iacula, proprie in hastilia, ex quibus conficiuntur iacula. | 47. v. E. 3, 106. — *ancipiti*, duplici, nata et ex viso sanguine et ex auditis verbis Polydori. | 50. *Infelix*, quia consilium Priami Polydorum in Thraciam, ut ibi tutus esset, mittentis infelicem habuit exitum; sic Dido *infelix* 1, 749, nescia, quid mali sibi impendat. | 51. *regi* Polycestori. | 51 sq. Cum iam, post prima proelia adversa, desperaret

- Ille, ut opes fractae Teucrum, et Fortuna recessit,  
 Res Agamemnonias victriciaque arma secutus,  
 55 Fas omne abrumpit; Polydorum obruncat, et auro  
 Vi potitur. Quid non mortalia pectora cogis,  
 Auri sacra fames! Postquam pavor ossa reliquit,  
 Delectos populi ad proceres primumque parentem  
 Monstra deum refero, et, quae sit sententia, posco.  
 60 Omnibus idem animus, scelerata excedere terra,  
 Linqui pollutum hospitium, et dare classibus austros.  
 Ergo instauramus Polydoro funus: et ingens  
 Aggeritur tumulo tellus; stant Manibus arae,  
 Caeruleis maestae vittis atraque cupresso,  
 65 Et circum Iliades crinem de more solutae;  
 Inferimus tepido spumantia cymbia lacte  
 Sanguinis et sacri pateras, animamque sepulchro  
 Condimus, et magna supremum voce ciemus.  
 Inde, ubi prima fides pelago, placataque venti  
 70 Dant maria et lenis crepitans vocat auster in altum,  
 Deducunt socii navis et litora complent.  
 Provehimur portu, terraeque urbesque recedunt.  
 Sacra mari colitur medio gratissima tellus  
 Nereidum matri et Neptuno Aegaeo,  
 75 Quam pius Arquitenens oras et litora circum  
 Errantem Mycono e celsa Gyaroque revinxit,  
 Inmotamque coli dedit et contemnere ventos.  
 Huc feror; haec fessos tuto placidissima porta  
 Accipit. Egressi veneramur Apollinis urbem.  
 80 Rex Anius, rex idem hominum Phoebique sacerdos,  
 Vittis et sacra redimitus tempora lauro

Graecos propelli et ab obsidione urbis prohiberi posse.] 55. *Fas o. abr.*, omnia divina iura susque deque habuit, violato iure hospitii.] 56. v. 2, 690 et Liv. 4, 26 „siquidem cogi aliquid consules possent.“] 57. v. G. 3, 272.] 61. *Linqui*, alii *Linquere*, v. E. 6, 85. — *d. class. a.*, dantur navibus venti, quasi vocati et postulati, cf. 4, 417.] 62. *et*, v. 4, 239.] 63. *tumulo*, in tumulum vs. 22 commemoratum. — *arae*, binae scilicet, cf. vs. 305 et E. 5, 67.] 64. *Caer.*, fuscis; et v. vs. 25.] 66. *Inf.*, proprie verbo usus est, unde dictae inferiae.] 67. *an. sep. Cond.*: vagabantur animae insepulchrorum corporum; facto tumulo oblatio inferiis desinebant vagari ac sepulchro continebantur quietae; cf. 6, 325 sqq.] 68. v. 2, 644.] 69. v. E. 2, 26.] 70. v. G. 1, 163.] 71. *Ded.*, ἐρποννύς εἰς ἄλλα, nempe ante, quiescente navigatione, in litas subductas trabasque fultas, Hom. II. 14, 75 sq. Horat. Od. 1, 4, 2.] 73—131. *Desferuntur Troiani ad insulam Delum, ubi cum consultis Apollo eos iacunabula gentis suae repetere iussisset, Anchises autem Cretam ostendi statisset, eo contendunt.*] 74. *N. m.*, Doridi. — *Aegaeo*, cf. Hom. II. 13, 20—22. — Ceterum v. E. 2, 24.] 75. cf. Hom. II. 1, 37.] 76. *Errant.*, significatur Deles insula, quam instabilem antea et tantam Apollo ibi natus stabilivit, eoque se pium erga illam praestitit. — revinxit autem Delum quasi catenis quibusdam e Mycono ac Gyaro aptis, ut media esset inter utramque; Petron. ed. Burm. I. p. 885 „Mox illam geminis deus catenis hac alta Gyaro ligavit, illac constanti Mycono dedit tenendam.“] 79. cf.

Occurrit; veterem Anchisen adgnoscit amicum.  
Iungimus hospitio dextras, et tecta subimus.

Templa dei saxo venerabar structa vetusto:

- 85 Da propriam, Thymbraee, domum; da moenia fessis  
Et genus et mansuram urbem; serva altera Troiae  
Pergama, reliquias Danaum atque inmitis Achilli.  
Quem sequimur? quove ire iubes? ubi ponere sedes?  
Da, pater, augurium, atque animis inlabere nostris.
- 90 Vix ea fatus eram: tremere omnia visa repente,  
Liminaque laurusque dei, totusque moveri,  
Mons circum, et mugire adytis cortina reclusis.  
Submissi petimus terram, et vox fertur ad auris:  
Dardanidae duri, quae vos a stirpe parentum
- 95 Prima tulit tellus, eadem vos ubere laeto  
Accipiet reduces. Antiquam exquirite matrem.  
Hic domus Aeneae cunctis dominabitur oris,  
Et nati natorum, et qui nascentur ab illis.  
Haec Phoebus; mixtoque ingens exorta tumultu
- 100 Laetitia, et cuncti, quae sint ea moenia, quaerunt,  
Quo Phoebus vocet errantis iubeatque reverti?  
Tum genitor, veterum volvens monumenta virorum,  
Audite, o proceres, ait, et spes discite vestras:  
Creta Iovis magni medio iacet insula ponto;
- 105 Mons Idaeus ubi, et gentis cunabula nostrae.  
Centum urbes habitant magnas, uberrima regna;  
Maxumus unde pater, si rite audita recorde,  
Teucrus Rhoeteas primum est advectus ad oras,  
Optavitque locum regno. Nondum Ilium et arces
- 110 Pergameae steterant; habitabant vallibus imis.  
Hinc mater cultrix Cybelae Corybantiaque aera

Ovid. Her. 21, 91s q. | 83. *hospitio*, iure veteris hospitii. | 85. *propr.*, v. E. 7, 31. — *Thymbr.*, v. G. 4, 323. | 86 sq. *serva alt. Troiae Perg.* *rel. D.*, i. e. nos, qui ex caede reliqui nova Pergama condituri sumus. | 88. *Quem s.*, quem (quod indicium?) ducem sequi nos iubes? | 91 sqq. En signa dei praesentis: tremunt limina, sc. cum ipso templo, laurus, quae est ante templum, mons vicinus, Cynthus, recluditur adytum, auditur sacerdotis ex tripode (cortina) vaticinantis vox pressa et mugienti similis; cf. Ovid. Met. 15, 684 sqq. | 91. v. E. 4, 51. | 92. *adytis*: „Caverna quaedam in templo Apollinis fuit, ad quam rapta Phoebas (i. e. sacerdos Apollinis) vaticinabatur.“ Servius. — *reclusis*, cf. 6, 81 sq. | 94. *Dard.*, Servius: „Dicendo *Dardanidae* ostendit Italiam, unde Dardanus fuit.“ cf. vs. 167. — *duri*, *πολυτλήμονες*, qui nullo labore aut casu frangi potuerunt, cf. 9, 468. | 97 sq. cf. Hom. Il. 20, 307 sq. | 102. *vet. volv. m. vir.*, repetens animo veterem memoriam nostrae gentis. | 106. cf. Hom. Il. 2, 649. | 107. *Maximus pater*, unde ipsi maiores orti, *ἀρχηγέτης τοῦ γένους*. — *si rite*, cf. vs. 180 sq. | 108. *Teucrus*, nepos Dardani. — *Rhoet.*, Troicas; Rhoeteum promontorium Troadis. | 109. v. I, 425. | 110. *steterant*, v. vs. 403. | 111 sqq. *Hinc*, ex Creta, traductus est cultus Magnae Matris decorum. — *Cybelae*, montis in Phrygia. — *aera*, cymbala. — *Hinc*, ab Ida

- Idaeumque nemus; hinc fida silentia sacris,  
 Et iuncti currum dominae subiere leones.  
 Ergo agite, et, divom ducunt qua iussa, sequamur;  
 115 Placemus ventos et Gnosia regna petamus.  
 Nec longo distant cursu; modo Iuppiter adsit,  
 Tertia lux classem Cretaeis sistet in oris.  
 Sic fatus meritos aris mactavit honores,  
 Taurum Neptuno, taurum tibi, pulcher Apollo,  
 120 Nigram Hiemi pecudem, Zephyris felicibus albam.  
 Fama volat pulsum regnis cessisse paternis  
 Idomenea ducem, desertaque litora Cretae,  
 Hoste vacare domos sedesque adstare relictas.  
 Linquimus Ortygiae portus pelagoque volamus,  
 125 Bacchatamque iugis Naxon viridemque Donyssam,  
 Olearon, niveamque Paron sparsasque per aequor  
 Cycladas et crebris legimus freta concita terris.  
 Nauticus exoritur vario certamine clamor;  
 Hortantur socii: Cretam proavosque petamus.  
 130 Prosequitur surgens a puppi ventus euntis,  
 Et tandem antiquis Curetum adlabimur oris.  
 Ergo avidus muros optatae molior urbis,  
 Pergameamque voco, et laetam cognomine gentem  
 Hortor amare focos arcemque attollere tectis.  
 135 Iamque fere sicco subductae litore puppes;  
 Connubiis arvisque novis operata iuventus;  
 Iura domosque dabam: subito cum tabida membris,

Cretensi, Ida, mons Phrygiae, appellata, in quo monte nemus erat Matris deorum; hinc *fida sil. sacris*, i. e. mysteria Idaea; *sacris*, in sacris; hinc etiam illud, quod sedens in curru a leonibus vecto repraesentatur. | 116. quare Iuppiter? quia is novam patriam ex fato assignavit Aeneae (ignotum illi adhuc, quam?) 1, 257 sqq.; quare non patitur eum desiderare Karthagine libro quarto, et infra vs. 171 „Dictaea negat tibi Iuppiter arva.“ | 118. *meritos*, cuique deo convenientes ac debitos. — *honores*, victimas; praeterea omnino ea, quae diis honoris causa offeruntur; cf. 1, 49. infra vs. 178. — *aris*, diis, quibus sacra fiunt in aris. | 120. *Hiemi*, v. 5, 772. | 125. v. G. 2, 487. Naxos Baccho sacra. — *iugis*, in iugis, montibus. | 126. *niveam*, candido marmore conspicuam. | 127. *c. fr. concita t.*, freta, in quibus magni concitantur fluctus, quippe qui propter vicinitatem multarum insularum se explicare lateque diffundere non possunt. Iam cf. Hor. C. 1, 14. 19 sq.: „Interfusa nitentes Vites aequora Cycladas.“ | 128 sq. *var. certamine*, dum alius cum alio certat studio classis propellendae. — *socii navales* qui dicuntur, *ναυτικοὶ λεῶς*. | 132—131. *Ibi peste ac fame vexante Troianos monitus a diis Penatibus Aeneas relictā Creta Italiam coepit petere.* | 132. *opt.*, unam ex urbibus desertis (vs. 123) optat sive legit, quam appellat Pergamum, eamque muris cingit additque arcem. | 133. *cognomine*, nomine urbis a pristina sua patria petito. | 134. *am. foc.*, adulescere novis tectis, *sich heimisch machen*; *focos*, quia focus pars est domus sanctissima. — *arc. att. tectis*, exaltare arcem aedificiis, s. arcem, locum in urbe editum munitionibusque saeptum vel saepiendum; quasi celsiorem reddere inaedificando. | 135. *Iam fere, ἤτοι, eben*, cf. 5, 835 et v. 5, 762. — Cur autem puppes non prius sunt subductae? puta, quia ante perficienda fuerant potiora. | 137. *Iura*, v. 1, 507. — *domos*, non tum demum

- Corrupto caeli tractu, miserandaque venit  
 Arboribusque satisque lues et letifer annus.  
 140 Linquebant dulcis animas, aut aegra trahebant  
 Corpora; tum sterilis exurere Sirius agros;  
 Arebant herbae et victum seges aegra negabat.  
 Rursus ad oraculum Ortygiae Phoebumque remenso  
 Hortatur pater ire mari, veniamque precari:  
 145 Quam fessis finem rebus ferat; unde laborum  
 Temptare auxilium iubeat; quo vertere cursus.  
 Nox erat, et terris animalia somnus habebat:  
 Effigies sacrae divom Phrygiiue Penates,  
 Quos mecum a Troia mediisque ex ignibus urbis  
 150 Extuleram, visi ante oculos adstare iacentis  
 In somnis, multo manifesti lumine, qua se  
 Plena per insertas fundebat luna fenestras;  
 Tum sic adfari et curas his demere dictis:  
 Quod tibi delato Ortygiam dicturus Apollo est,  
 155 Hic canit, et tua nos en ultro ad limina mittit.  
 Nos te, Dardania incensa, tuaque arma secuti,  
 Nos tumidum sub te permensi classibus aequor,  
 Idem venturos tollemus in astra nepotes,  
 Inperiumque urbi dabimus. Tu moenia magnis  
 160 Magna para, longumque fugae ne linque laborem.  
 Mutandae sedes. Non haec tibi litora suasit  
 Delius, aut Cretae iussit considerare, Apollo.  
 Est locus, Hesperiam Graii cognomine dicunt,  
 Terra antiqua, potens armis atque ubere glaebae;  
 165 Oenotri colluere viri; nunc fama minores  
 Italiam dixisse ducis de nomine gentem:  
 Hae nobis propriae sedes; hinc Dardanus ortus,  
 Iasiusque pater, genus a quo principe nostrum.  
 Surge age, et haec laetus longaevo dicta parenti  
 170 Haud dubitanda refer: Corythum terrasque requirat  
 Ausonias. Dictaea negat tibi Iuppiter arva.  
 Talibus attonitus visis et voce deorum —

domos dabat universis, sed domos ex nondum distributis assignabat iuvenibus, qui contrahentes matrimonia domo indigebant. 144. *veniam* erroris ex male intellecto oraculo, cf. vs. 181. | 145. Ex his „*veniam precari*“ elicies, quod desiderabis, „*simul percontari*“, id quod ipsa res suggerit (parum est enim *veniam precari*, nisi simul quaeras remedia malorum) et conformatio orationis. — *fessis*, afflictis; cf. 11, 335. | 148. v. vs. 12. | 151. Alii *Insomnis*, cf. 1, 353. | 152. *fenestras insertas*, foramina luminis intronmittendi causa in pariete facta vel potius relicta. | 158. *Idem*, v. E. 1, 33. — *t. in astra*, deos esse faciemus, Caesarem, Octavianum. | 162. *aut* saepe ponitur, ubi aliquid generaliter aut non satis accurate dictum explicatur verbis magis propriis ac definitis, ut h. l. *haec litora* vocabulo *Cretae*, i. e. in Creta. | 166. v. 1, 533. | 168. *Iasius*, frater Dardani. — *a quo*, Dardano. | 170. *Corythus*, conditor Cortonae; hic ipsa Cortona, urbs Etruriae,



- Nec sopor illud erat, sed coram agnoscere voltus  
 Velatasque comas praesentiaque ora videbar;  
 175 Tum gelidus toto manabat corpore sudor —  
 Corripio e stratis corpus, tendoque supinas  
 Ad caelum cum voce manus, et munera libo  
 Interemata focis. Perfecto laetus honore  
 Anchisen facio certum, remque ordine pando.  
 180 Adgnovit prolem ambiguam geminosque parentes,  
 Seque novo veterum deceptum errore locorum.  
 Tum memorat: Nate, Iliacis exercite fati,  
 Sola mihi talis casus Cassandra canebat.  
 Nunc repeto haec generi portendere debita nostro,  
 185 Et saepe Hesperiam, saepe Italia regna vocare.  
 Sed quis ad Hesperiae venturos litora Teucros  
 Crèderet? aut quem tum vates Cassandra moveret?  
 Cedamus Phoebo, et moniti meliora sequamur.  
 Sic ait; et cuncti dicto paremus ovantes.  
 190 Hanc quoque deserimus sedem, paucisque relictis  
 Vela damus vastumque cava trabe currimus aequos.  
 Postquam altum tenuere rates, nec iam amplius ullae  
 Adparent terrae, caelum undique et undique pontus,  
 Tum mihi caeruleus supra caput adstitit imber,  
 195 Noctem hiememque ferens, et inhorruit unda tenebris.  
 Continuo venti volvunt mare magnaue surgunt  
 Aequora; dispersi iactamur gurgite vasto;  
 Involvere diem nimbi, et nox humida caelum  
 Abstulit; ingeminant abruptis nubibus ignes.  
 200 Excutimur cursu, et caecis erramus in undis.

intelligenda, cf. 7, 209. | 173. *ὡς ὕπαρ εἶδον ὄνειρον*, Mosch. Idyll. 2, 16—19. | 174. *Velatas vittis*, cf. 2, 168. 296. | 178. *Intem. munera*, merum. — *honore*, v. vs. 118. | 180. *gem. par.*, cf. vs. 108. | 181. *novo veterum*, pertinet hoc ad ornatum poeticum, ut duo contraria ita componantur, ut alterum salva sententia abesse possit; Soph. Oed. R. 1 „ὡ τέκνα Κάδμου τοῦ πάλαι νέα τροφή“ infra vs. 716 „Sic pater Aeneas intentis *omnibus unus* Fata renarrabat divom.“ nisi forte dixeris primum erratum esse eo, quod in Thracia considerare voluerint, alterum iam (*novum*) errorem hunc esse, quod veteres proavorum sedes exquirere iussi, vs. 96, Cretam significari existimaverint. | 182. *Il. exerc. f.*, quem fata Iliaca aduenerunt ad tolerandas res adversas, cf. 5, 725. | 184. *repeto memoria*, eam port. | 190. Secundum historiam; Sall. Cat. c. 6 „Troiani Aenea duos profugi sedibus incertis vagabantur.“ — *paucisq. rel.*, pata eos ex Aeneae comitibus, qui Pergami (cf. vs. 133), oppido etiam Virgilii aetate superstiti, remanserunt. | 192—288. *In eo cursu Troiani oborta tempestate ad Strophades insulas appulsi infestantur ab Harpyiis acceptoque ab una earum horrendo vaticinio rursus in altum evolvunt, delatique ad litora Actiaca sollemnes ludos instituunt, quod salvi affugerant pericula ab hostibus Graecis undique imminencia.* | 195. inhorrescere dicitur mare agitari coeptum ac segetis vento impulsae instar fluctuans, cf. G. 3, 199. — *tenebris*, fluctibus nigricantibus. | 196. *magna s.*, alte adsurgunt, cf. G. 3, 28. | 199. nubes fulmine rumpi patabantur eoque effici tonitrua. | 200. *caecis*, incertis, nam cum nulla

- Ipse diem noctemque negat discernere caelo,  
 Nec meminisse viae media Palinurus in unda.  
 Tris adeo incertos caeca caligine soles  
 Erramus pelago, totidem sine sidere noctes.  
 205 Quarto terra die primum se attollere tandem  
 Visa, aperire procul montis, ac volvere fumum.  
 Vela cadunt, remis insurgimus; haud mora, nautae  
 Adnixa torquent spumas et caerula verrunt.  
 Servatum ex undis Strophadum me litora primum  
 210 Accipiunt, Strophades Graio stant nomine dictae,  
 Insulae Ionio in magno, quas dira Celaeno  
 Harpyiaequae colunt aliae, Phineia postquam  
 Clausa domus, mensasque metu liquere priores.  
 Tristius haud illis monstrum, nec saevior ulla  
 215 Pestis et ira deum Stygiis sese extulit undis.  
 Virginei volucrum voltus, foedissima ventris  
 Proluvies, uncaeque manus, et pallida semper  
 Ora fame.  
 Huc ubi delati portus intravimus, ecce  
 220 Laeta boum passim campis armenta videmus  
 Caprigenumque pecus nullo custode per herbas.  
 Inruimus ferro, et divos ipsumque vocamus  
 In partem praedamque Iovem; tum litore curvo  
 Exstruimusque toros dapibusque epulamur opimis.  
 225 At subitae horrifico lapsu de montibus adsunt  
 Harpyiae et magnis quatiant clangoribus alas,  
 Diripiuntque dapes contactuque omnia foedant  
 Inmundo; tum vox taetrum dira inter odorem.  
 Rursum in secessu longo sub rupe cavata,  
 230 Arboribus clausi circum atque horrentibus umbris,  
 Instruimus mensas arisque reponimus ignem:  
 Rursum ex diverso caeli caecisque latebris  
 Turba sonans praedam pedibus circumvolat uncis,  
 Polluit ore dapes. Sociis tunc, arma capessant,

apparerent sidera, incerti erant Troiani, qua in parte maris versarentur. | 203. *Tres adeo*, totos tres dies, cf. 7, 629 et v. 4, 533. — *incertos*, cum parum constare videatur, verseturne sol in caelo, an non; cf. 6, 270; *certus Titan*, sol nulla nubecula obtusus, ap. Valer. Fl. 2, 57. | 206. *volv. f.*, signum terrae habitatae, Hom. Od. 1, 58. 10, 99. | 207. *rem. insurg.*, elevato maiorem ad nixum corpore incumbimus remis. | 208. v. 4, 533. | 210. *stant* de perpetuitate nominis intelligendum; Valer. Fl. 8, 217 „Insula Sarmaticae Peuce stat nomine nymphae.“ | 211. v. E. 3, 79. | 212. postquam expulsae sunt ex domo Phineia a Zete et Calai. | 221. *nullo cust.*, ut armenta deo alicui sacra, ἀειμέλα, Harpyiis scilicet, cf. vs. 247. | 222. v. 2, 409. | 223. pars praedae diis voveri solebat, Liv. 5, 21 „in partem praedae vocati dii.“ | 224. *Exsta. t.*, congeriem caespitum in modum tororum struimus. | 226. Hom. Il. 3, 5 „καλῶν τάλῃ (γέροντι) πέρονται.“ | 230. v. 1, 165. | 231. cf. vs. 223.

- 235 Edico, et dira bellum cum gente gerendum.  
 Haud secus ac iussi faciunt, tectosque per herbam  
 Disponunt enses et scuta latentia condunt.  
 Ergo ubi delapsae sonitum per curva dedere  
 Litora, dat signum specula Misenus ab alta
- 240 Aere cavo. Invadunt socii, et nova proelia temptant,  
 Obscenae pelagi ferro foedare volucres.  
 Sed neque vim plumis ullam nec volnera tergo  
 Accipiunt, celerique fuga sub sidera lapsae  
 Semiesam praedam et vestigia foeda relinquunt.
- 245 Una in praeclsa consedit rupe Celaeno,  
 Infelix vates, rumpitque hanc pectore vocem:  
 Bellum etiam pro caede boum stratisque iuvencis,  
 Laomedontiadae, bellumne inferre paratis  
 Et patrio Harpyias insontis pellere regno?
- 250 Accipite ergo animis atque haec mea figite dicta.  
 Quae Phoebus pater omnipotens, mihi Phoebus Apollo  
 Praedixit, vobis Furiarum ego maxuma pando.  
 Italiam cursu petitis, ventisque vocatis  
 Ibitis Italiam portusque intrare licebit;
- 255 Sed non ante datam cingetis moenibus urbem,  
 Quam vos dira fames nostraeque iniuria caedis  
 Ambesas subigat malis absumere mensas.  
 Dixit, et in silvam pennis ablata refugit.  
 At sociis subita gelidus formidine sanguis
- 260 Deriguit; cecidere animi, nec iam amplius armis,  
 Sed votis precibusque iubent exposcere pacem,  
 Sive deae, seu sint dirae obscaeque volucres.  
 Et pater Anchises passis de litore palmis  
 Numina magna vocat, meritosque indicit honores:
- 265 Di, prohibete minas: di, talem avertite casum,  
 Et placidi servate pios! Tum litore funem  
 Deripere excussosque iubet laxare rudentis.  
 Tendunt vela Noti; fugimus spumantibus undis,  
 Qua cursum ventusque gubernatorque vocabat.
- 270 Iam medio adparet fluctu nemorosa Zacynthos

236. *Haud. s. ac. i. f.*, faciunt, ut imperatum est. | 237. *lat. cond.*, abscondunt, quo fit, ut lateant. | 239. *Mis.*, cf. 6, 164 sq. | 240. *nova*, quia novum est obscae p. f. f. v. | 241. *Obsc.*, v. G. 1, 470. | 247. *pro caede*, pro eo, quod greges nostros cecidistis, v. vs. 221. | 249. *patrio*, quod est patris nostri (sive Ponti sive Neptuni). | 250. *Acc. an.*, cf. Hom. Il. 1, 297. | 251. Aesch. Eum. 19 „*Διὸς προφητῆς ἐστὶ Λοξίας πατὴρ*.” | 253. *vocatis*, invocatis, ut secundum cursum; cf. 5, 772 sqq. 5, 59 „*Poscamus* ventos.” | 255. *datam*, fato vobis concessam. | 256. *caedis*, tentatae duntaxat. | 257. cf. 7, 112 sqq. | 260. *armis quaerere pacem*; hoc *quaerere* repetes ex verbo *exposcere*. | 262. *obscae*, v. vs. 241. — *pelagi*, v. vs. 249. | 265. *deest inquit*, ut 10, 279, *inquam* 2, 657. 675. | 266. *funem*, v. G. 1, 457. | 267. *excussos*, qui ante complicati fuerant. |

- Dulichiumque Sameque et Neritos ardua saxis.  
 Effugimus scopulos Ithacae, Laertia regna,  
 Et ~~terram~~ altricem saevi exsecramur Ulixi.  
 Mox et Leucatae nimbose cacumina montis  
 275 Et formidatus nautis aperitur Apollo.  
 Hunc petimus fessi et parvae succedimus urbi;  
 Ancora de prora iacitur, stant litore puppes.  
 Ergo insperata tandem tellure potiti  
 Lustramurque Iovi votisque incendimus aras,  
 280 Actiaque Iliacis celebramus litora ludis.  
 Exercent patrias oleo labente palaestras  
 Nudati socii; iuvat evasisse tot urbes  
 Argolicas mediosque fugam tenuisse per hostis.  
 Interea magnum sol circumvolvitur annum,  
 285 Et glacialis hiemps aquilonibus asperat undas;  
 Aere cavo clipeum, magni gestamen Abantis,  
 Postibus adversis figo, et rem carmine signo:  
 AENEAS HAEC DE DANAIS VICTORIBUS ARMA.  
 Linquere tum portus iubeo et considere transtris.  
 290 Certatim socii feriunt mare et aequora verrunt.  
 Protinus aerias Phaeacum abscondimus arces,  
 Litoraque Epiri legimus portuque subimus  
 Chaonio et celsam Buthroti accedimus urbem.

274. *Leuc.*, v. 8, 677. | 275. *Apollo*, templum Apollinis, quod ad Actium erat in promontorio. — *Liv.* 22, 19 „nondum aperientibus classem promontorii,” i. e. in conspectum dantibus. | 277. v. 10, 268. | 278. *insperata*, referendum hoc ad pericula vs. 282 sq. commemorata. | 279. Antequam ludorum sollemnia rite celebrari possint, expiatione et lustratione opus est; cui deo sacrum piaculare offerebatur, ei (hic *Iovi*) lustrari dicebantur; *Grat.* 491. — *votis*, donis ex voto debit. — *Ceterum* eadem verborum constructione usus est Aeschylus Agamemn. 91 „βαμολ δαφοισι φλέγονται.” | 280. Finxit hoc Virgilius Imperatori Augusto gratificaturus, qui victo ad Actium Antonio ludos ibi instituit celeberrimos, coniunctos fortasse cum antiquis illis, quos Callimachus et Strabo (l. 7. p. 325 extr.) memorarunt. | 281. *patrias*, quales in patria exercere solebant. — *oleo* l. certaturi, lucta maxime, oleo se ungebant; *labente*, diffuente. | 283. cf. vs. 272. | 284. circumvolvendo se sol *efficit* annum, itaque, hoc ipsum ut significetur, poeta ausus est dicere *sol circumvolvitur annum*, usus *συμράξει πρὸς τὸ ποιεῖν*, ut Horat. Ep. 2, 2, 125 „Satyrum movetur,” i. e. saltat (saltando imitatur) Satyrum. — *magnum*, cf. 1, 269. | 286. v. 5, 663. | 287. *postibus* templi. — *rem*, τὸ ποιοῦμενον. | 288. *haec*, vel *fixit* repetes ex superiore versu vel intelliges *dedicavit*, quod verbum in titulis donariorum solet omitti, ut E. 7, 29. — *de Danais*, i. e. Abanti, Graeco homini, a se ad Troiam occiso, erepta; *Liv.* 25, 29 „nostra de Atheniensibus Carthaginiensibusque tropaea, tua de nobis.” | 289—355. *Ab Actio profectus Aeneas venit ad Epirum, ubi ab Heleno vate, filio Priami, qui captivus Neoptolemum eo secutus erat et ducta in matrimonium Andromacha, prius Hectoris, post Neoptolemi uxore, tum ibi regnabat, benigne excipitur.* | 291. cf. Hom. Od. 5, 279 sq. — *Phaeac.* arces, montes Corcyrae. — *abscond.*, procul visa porro navigantibus interposito mari paulatim absconduntur et e conspectu abeunt; contrarium est *aperiri* vs. 275, adde 206. | 292. *portu*,

- Hic incredibilis rerum fama occupat auris  
 295 Priamiden Helenum Graias regnare per urbes,  
 Coniugio Aeacidae Pyrrhi sceptrisque potitum,  
 Et patrio Andromachen iterum cecidisse marito.  
 Obstipui, miroque incensum pectus amore,  
 Compellare virum et casus cognoscere tantos.  
 300 Progredior portu, classis et litora linquens,  
 Sollemnis cum forte dapes et tristia dona  
 Ante urbem in luco falsi Simoentis ad undam  
 Libabat cineri Andromache Manisque vocabat  
 Hectoreum ad tumulum, viridi quem caespite inanem  
 305 Et geminas, caussam lacrimis, sacraverat aras.  
 Ut me conspexit venientem et Troia circum  
 Arma amens vidit, magnis exterrita monstros  
 Deriguit visu in medio, calor ossa reliquit;  
 Labitur, et longo vix tandem tempore fatur:  
 310 Verane te facies, verus mihi nuntius adfers,  
 Nate dea? vivisne? aut, si lux alma recessit,  
 Hector ubi est? dixit, lacrimasque effudit et omnem  
 Inplevit clamore locum. Vix pauca furenti  
 Subiicio et raris turbatus vocibus hisco:  
 315 Vivo equidem, vitamque extrema per omnia duco;  
 Ne dubita, nam vera vides.  
 Heu! quis te casus delectam coniuge tanto  
 Excipit? aut quae digna satis fortuna revisit?  
 Hectoris Andromache Pyrrhin connubia servas?  
 320 Deiecit voltum et demissa voce locuta est:  
 O felix una ante alias Priameia virgo,  
 Hostilem ad tumulum Troiae sub moenibus altis

ut „subeant luco“ 8, 125. | 297. *cedere alicui dicuntur, quae in potestatem eius aut possessionem veniant; cf. vs. 338. 12, 17.* | 298. *amore, cf. 8, 184.* | 301. *dapes, intellige xois, mel cum vino et lacte.* | 302. *falsi, quia nomen a vero Simoente, flavio Troadis, ad hunc ab Helene translatum est, cf. vs. 336. 349 sq. et 497.* | 303. v. vs. 68. | 304. *inanem, significatur cenotaphium.* | 305. *geminas, v. vs. 63. — caus. l., quia adspectus tumuli ararumque desiderium ac dolorem refricat.* | 307. *monstros, re monstri simili.* | 308. v. G. 3. 272. | 310. *Adfersne te mihi ut (ὥς) vera facies viri, cuius speciem habes? ut verus nuntius rerum tuarum? cf. vs. 337 sqq. Secundum consuetudinem dicere veram faciem, verum nuntium, cf. 1, 314. 5, 373. 12, 860.* | 316. *extr. p. o., per summa pericula.* | 318. *revisit, oblitit tibi, cf. 11, 426. E. 1, 30. — Retinet Aeneas tamquam incredibile, vs. 294, quod audierat vs. 256, lecte tamen per verba aut ... revisit significans cupere se id verum esse.* | 319. *Hectoris Andr., ut apud Enaniam Hora Quirini, Plin. Ep. 2, 20, 2 Verania Pisonis, Quintil. 6, 3, 74 Domitia Passieni. — Ipsa res indicat non ignorasse Aeneas, quid Pyrrhus putaverit sibi licere in servam Andromacham, cf. vs. 325 sq., cui rei Aeneas honestum vocabulum connubii praetendit, sermone usus indignitatem fortuito Andromachae querente: esse adhuc (servas connubia) coniux Pyrrhi, deterrimi hostis, tu, cui olim gloriari licebat coniugio Hectoris?* | 321. *Pr. v., Polyxena;*

- Iussa mori, quae sortitus non pertulit ullos,  
 Nec victoris heri tetigit captiva cubile!  
 325 Nos, patria incensa diversa per aequora vectae  
 Stirpis Achilleae fastus iuvenemque superbum,  
 Servitio enixae, tulimus; qui deinde, secutus  
 Ledaeam Hermionen Lacedaemoniosque hymenaeos,  
 Me famulo famulamque Heleno transmisit habendam.  
 330 Ast illum, ereptae magno inflammatus amore  
 Coniugis et scelerum Furiis agitatus, Orestes  
 Excipit incautum patriasque obtruncat ad aras.  
 Morte Neoptolemi regnorum reddita cessit  
 Pars Heleno, qui Chaonios cognomine Campos  
 335 Chaoniamque omnem Troiano a Chaone dixit,  
 Pergamaque Iliacamque iugis hanc addidit arcem.  
 Sed tibi qui cursum venti, quae fata dedere?  
 Aut quisnam ignarum nostris deus adpulit oris?  
 Quid puer Ascanius? superatne? et vescitur aura,  
 340 Quae tibi iam Troia —  
 Ecqua tamen puero est amissae cura parentis?  
 Ecquid in antiquam virtutem animosque virilis  
 Et pater Aeneas et avunculus excitat Hector?  
 Talia fundebat lacrimans longosque ciebat  
 345 Incassum fletus, cum sese a moenibus heros

cf. Ovid. Met. 13, 439—448. | 323. sorte captivae suis heris assignabantur in partitione praedae. | 326. Servius: „*Stirpis Achilleae* cum magno dolore dictum, quia ab Achille Hector occisus est.“ | 327. *Serv. enixae*, peperit ei serva filium, Molossum. — *secutus*, cf. E. 2, 64 sq. | 329. me famulo suo transmisit et famulam me ei transmisit; atque ea re factum est, ut vel invita in matrimonium Heleni venire deberet. Ea, quae coniungi solent (huic in modum: *me famulo famulam transmisit*), copula interposita haud sine ratione diremit poeta, cf. 5, 447 „*Ipse gravis graviterque* concidit;“ v. G. 2, 290. | 331. *Coniugis*, Hermiones ei a patre desponsae. | 331 sq. Delphis ante aram patri Achilli, tamquam heroi, factam. Auson. Epit. Her. 9 „Impius ante aras quem fraude peremit Orestes; quid mirum? caesa iam genetrice furens.“ | 333. *reddita*, ad alium, nempe ad ipsum Helenum, translata. Servius tradit datam esse a moriente Neoptolemo partem Epiri Heleno, qui vera vaticinando illum prohibuerit, quominus una cum ceteris Graecis rediret, quo in reditu classem eorum offensa Minerva pessumdedit, cf. 1, 39 sqq. | 334. qui Campi antea dicti sunt, cognominavit Chaonios s. Chaonas, v. 12, 845. Servius „Epirum campos non habere omnibus notum est; sed constat ibi olim regem nomiae Campum fuisse eiusque posteros Campylidas dictos. Alii filiam Campi Cestriam ab Heleno ductam uxorem (tradunt) et de nomine soceri Campos, de nomine Chaonis Chaonas dixisse.“ | 335. *a Chaone*, qui vel frater Heleni fuisse traditur, vel, orta pestilentia, ex responso pro communi salute immolandum se obtulisse. | 336. v. vs. 12 et 302. | 339. v. 1, 546. | 340. Apertum est Andromacham velle aliquid quaerere de Creusa; quod sentiens Aeneas vultu motuque aliquo manus mortuam esse significare putandus est; itaque Andromacha orationem imperfectam relinquens pergit de Ascanio quaerere. Conveniunt talia dramatico poemati, non conveniunt epico. Sed non est dubium, quin hic locus inter emendandos relictus sit a Virgilio. | 343. Creusa fuerat soror Hectoris. | 344 sq. Servius: „*longos et incassum* bene addidit, ut

- Priamides multis Helenus comitantibus adfert,  
 Adgnoscitque suos, laetusque ad limina ducit,  
 Et multum lacrimas verba inter singula fundit.  
 Procedo, et parvam Troiam simulataque magnis  
 350 Pergama et arentem Xanthi cognomine rivum  
 Adgnosco, Scaeeaeque amplector limina portae.  
 Nec non et Teucri socia simul urbe fruuntur.  
 Illos porticibus rex accipiebat in amplis;  
 Aulai medio libabant pocula Bacchi,  
 355 Inpositis auro dapibus, paterasque tenebant.  
 Iamque dies alterque dies processit, et aurae  
 Vela vocant tumidoque inflatur carbasus austro:  
 His vatem adgredior dictis ac talia quaeso:  
 Troiugena, interpres divom, qui numina Phoebi,  
 360 Qui tripodas, Clarii laurus, qui sidera sentis  
 Et volucrum linguas et praepetis omina pennae,  
 Fare age — namque omnem cursum mihi prospera dixit  
 Religio, et cuncti suaserunt numine divi  
 Italiam petere et terras temptare repostas;  
 365 Sola novum dictuque nefas Harpyia Celaeno  
 Prodigium canit, et tristis denuntiat iras,  
 Obscenamque famem — quae prima pericula vito?  
 Quidve sequens tantos possim superare labores?  
 Hic Helenus, caesis primum de more iuvencis,  
 370 Exorat pacem divom, vittasque resolvit  
 Sacra capitis, meque ad tua limina, Phoebe,  
 Ipse manu multo suspensum numine ducit,  
 Atque haec deinde canit divino ex ore sacerdos:  
 Nate dea, — nam te maioribus ire per altum  
 375 Auspiciis manifesta fides: sic fata deum rex

femineos monstraret affectus.“| 348. Quomodo conciliabis has lacrimas cum laetitia vs. 347 commemorata? cf. Liv. 27, 17, 16 „gaudio lacrimantes.“| 351. ex-  
 osculari postes solebant in patriam reduces.| 354. *Aul. med.*, in atrio.| 355.  
 v. 9, 489. — *dapibus*, iis quidem, quae diis offerrentur.|| 356—462. *Helenus*  
*Aeneae praecipit, quae Italiam sedemque Troianis fato concessam petens vel*  
*observare, vel vitare, vel facere debeat.*| 356. v. 2, 801.| 357. *aurae Vela*  
*v.*, invitant, ut vela pandantur.| 359. cf. Hom. II. 6, 76.| 359 sq. *deum* sentit,  
 qui divino quodam spiritu afflatus futura praedicat; *tripodas*, qui tripodi insi-  
 dens, ut Pythia Delphis, vaticinatur; *Clarii laurus*, qui in luco Apollinis Clarii  
 edit oracula, sic quidem, ut ipsi illi tripodes ipsaeque lauri facultatem eius rei  
 tribuant. — *sidera*, cf. 4, 519.| 362 sq. *Religio*, auspicia atque oracula, *pro-*  
*spera*, res prosperas nuntians.| 363. *numine*, v. 8, 78.| 367. *Obsc.*, v. vs. 241  
 et G. 1, 470.| 370. Dum sacra facit, ex more vittatus est; idem resolvit vittas,  
 cum vaticinaturus est, quia in vaticinatione ut animus, ita corpus nulla re vinctum  
 atque impeditum esse debebat. Eae res in sacris veterum non erant mera, quae  
 vocamus, symbola, sed corporis animique ea existimabatur consociatio, ut animus  
 aequae eadem re afficeretur ac corpus.| 372. *multo susp. num.*, plenum horroris  
 nati ex efficacissima vi (*multo numine*) praesentis dei.| 374—380. Pauca tibi  
 expediam: docebo te ea, quae tutam tibi praestent navigationem; tum dicam signa,

- Sortitur volvitque vices, is vertitur ordo —  
 Pauca tibi e multis, quo tutior hospita lustres  
 Aequora et Ausonio possis considerare portu,  
 Expediam dictis; prohibent nam cetera Parcae  
 380 Scire Helenum farique vetat Saturnia Iuno.  
 Principio Italiam, quam tu iam rere propinquam  
 Vicinosque, ignare, paras invadere portus,  
 Longa procul longis via dividit invia terris.  
 Ante et Trinacria lentandus remus in unda,  
 385 Et salis Ausonii lustrandum navibus aequor  
 Infernique lacus Aeaeaeque insula Circae,  
 Quam tuta possis urbem componere terra.  
 Signa tibi dicam; tu condita mente teneto:  
 Cum tibi sollicito secreti ad fluminis undam  
 390 Litoreis ingens inventa sub ilicibus sus  
 Triginta capitum fetus enixa iacebit,  
 Alba, solo recubans, albi circum ubera nati,  
 Is locus urbis erit, requies ea certa laborum.  
 Nec tu mensarum morsus horresce futuros:  
 395 Fata viam invenient aderitque vocatus Apollo.  
 Has autem terras, Italique hanc litoris oram,  
 Proxima quae nostri perfunditur aequoris aestu,  
 Effuge; cuncta malis habitantur moenia Graiis.  
 Hic et Narycii posuerunt moenia Locri,  
 400 Et Sallentinos obsedit milite campos

quae monstrent locum, quo considas in Italia. Cetera prohibent Parcae me scire, quamquam illud quidem ex factorum ratione, vicibus et ordine (*Art und in einander greifender Gang*) manifesto apparet maioribus te resque maximas portendentibus auspiciis (sc. ipso Iove auspice) navigare. — *Sortitur v. vices*, sortiens fata vicissitudinem eorum constituit, v. 1, 9. — *e multis*, non quasi ipse multa sciat, sed quia videt multa dici posse ab eo, qui fata illa penitus norit. — *hospita*, peregrina, v. vs. 539, 6, 93. — *vetat fari*, nempe vetat Parcae ea fari Heleno. Alii interpungunt: *Scire, Helenum farique v.* | 382. *Vicinosque*, „cuiusque portus ut vicinos paras invadere,“ v. G. 3, 283; prorsus similiter 10, 243 „clipeum cape, quem dedit ipse Ignipotens atque (et cuius) oras ambiit auro“; adde 12, 944. — *ignare*, Donat.: „at ignarus putas“; ergo portus opinione tua vicinos. | 383. *dividit Italiam*, i. e. eam partem Italiae, quae tibi est petenda, longa via distinet (cf. E. 1, 67) ab Epiro; in eam enim partem qui classe pervenire vult, ei via interclusa (*invia*) est longis terris ante circumnavigandis, eoque ipsa fit *longa*. | 384. *lentandus*, Apollon. Rhod. 2, 593 „ἐπευνάμπτοντο δὲ κάραι, ἥντε χαμπύλα τόξα, βιάζομενων ἡρώων.“ Cat. 62, 183 „incurvas gurgite remos.“ | 386. *Inf. lac.*, lacus Avernus, cui propinqua spelunca, per quam patet descensus ad inferos; 6, 237. — *Ae. i. C.*, cf. Hom. Od. 10, 135 sq. | 387. *compon.*, et ponere et res eius ordinare. | 389. *secreti*, in parte secreta, ab hominum frequentia remota, fluminis Tiberis, cf. 8, 82. | 390 sq. cur potissimum sus apta ad tale prodigium? quia ut ait Cic. N. D. 2, 64, suae nihil genuit natura fecundius. — *triginta*, et Servius h. l. et ipse, ut videtur, poeta (8, 47) huic numerum refert ad Albam triginta post annis conditam. | 395. *Fata*, v. 1, 2. — *viam*, rationem expediendi illius oraculi. — *Apollo*, praeses oraculorum. | 399. *moenia*, Locros Epizephyrios, quae existimabatur colonia Locrorum Opuntiorum,



- Lyctius Idomeneus; hic illa ducis Meliboei  
 Parva Philoctetae subnixa Petelia muro.  
 Quin, ubi transmissae steterint trans aequora classes  
 Et positis aris iam vota in litore solves,  
 405 Purpureo velare comas adopertus amictu,  
 Ne qua inter sanctos ignis in honore deorum  
 Hostilis facies occurrat et omina turbet.  
 Hunc socii morem sacrorum, hunc ipse teneto;  
 Hac casti maneant in religione nepotes.  
 410 Ast ubi digressum Siculae te admoverit orae  
 Ventus et angustī rarescent claustra Pelori,  
 Laeva tibi tellus et longo laeva petantur  
 Aequora circuitu; dextrum fuge litus et undas.  
 Haec loca vi quondam et vasta convolsa ruina —  
 415 Tantum aevi longinqua valet mutare vetustas —  
 Dissiluisse ferunt, cum protinus utraque tellus  
 Una foret; venit medio vi pontus et undis  
 Hesperium Siculo latus abscidit, arvaeque et urbes  
 Litore diductas angusto interluit aestu.  
 420 Dextrum Scylla latus, laevum inplacata Charybdis  
 Obsidet, atque imo barathri ter gurgite vastos  
 Sorbet in abruptum fluctus, rursusque sub auras  
 Erigit alternos et sidera verberat unda.  
 At Scyllam caecis cohibet spelunca latebris,  
 425 Ora exsertantem et navis in saxa trahentem.  
 Prima hominis facies et pulchro pectore virgo  
 Pube tenus, postrema inmani corpore pistrix,  
 Delphinum caudas utero commissa luporum.  
 Praestat Trinacrii metas lustrare Pachyni  
 430 Cessantem, longos et circumflectere cursus,

quorum erat urbs Naryx. | 401. Lyctus oppidum Cretae, Meliboea Thessaliae. |  
 402. Servius „Multi ita intelligunt, non *Philoctetae Petelia*, sed *Philoctetae muro*“.  
 utrum verius? Idem Servius „ait Cato a Philocteta condita iam pridem civitate  
 murum tantum factum.“ — *subnixa*, vel confisa sive tuta, vel quod, ut auctor  
 est Coelius Antipater, imposita erat excelso muro. | 403. *steterint*, Futur. exact.  
 verbi *sisto*, ergo *stabunt*, ut *steterant* vs. 110 stabant. | 405. *velare*, Imperat.  
 Passivi, cf. vs. 545 et v. E. 3, 106. | 406. v. G. 3, 486. | 407. *occurrat*,  
 oculis tuis. — omina prospera disperdat, quae ex sacrificio sperare licuerit. |  
 408. *hunc morem* obnubendi capitis in sacris omnibus, praeterquam Herculis et  
 Saturni; et cf. vs. 545. | 411. proprie *angusta* cl. P., v. E. 9, 46. Et *claustra*  
 P. significant fretum Siculum; nam venientibus de mari Ionio propter curvaturam  
 litorum *clausae* videntur illae angustiae, quae ex appropinquantibus *paulatim*  
*aperiri*, *resciscere*, videntur. | 413. *undas*, sc. dextras; cf. 4, 11. | 414. *ruina*,  
 motu terrae. | 416. *protinus*, continue, *διηγεως*. | 417. *medio*, v. 1, 126. |  
 419. *ang. aestu*, aqua in angustis freti aestuante. | 420 sqq. de Charybdi cf.  
 Hom. Od. 12, 101 sqq., de Scylla Hom. Od. 12, 85 sqq. | 422. *Sorb.* in abr.,  
 cui contrarium illud de typhone apud Plin. N. H. 2, 48, 132 „sorbet in excelsum.“ |  
 426 sq. *Prima* — *postrema*, *πρῶσθεν* — *ὀπισθεν*. | 428. v. E. 3, 106. Scylla  
 inferiore sui parte luporum s. canum (vs. 432) *προτομαῖς* cincta erat et desinebat

- Quam semel informem vasto vidisse sub antro  
 Scyllam et caeruleis canibus resonantia saxa.  
 Praeterea, si qua est Heleno prudentia, vati  
 Si qua fides, animum si veris inplet Apollo,  
 435 Unum illud tibi, nate dea, proque omnibus unum  
 Praedicam, et repetens iterumque iterumque monebo:  
 Junonis magnae primum prece numen adora;  
 Iunoni cane vota libens dominamque potentem  
 Supplicibus supera donis: sic denique victor  
 440 Trinacria finis Italos mittere relictā.  
 Huc ubi delatus Cymaeam accesseris urbem  
 Divinosque lacus et Averno sonantia silvis,  
 Insanam vatem aspicias, quae rupe sub ima  
 Fata canit foliisque notas et nomina mandat.  
 445 Quaecumque in foliis descripsit carmina virgo,  
 Digerit in numerum atque antro seclusa relinquit.  
 Illa manent inmotā locis neque ab ordine cedunt;  
 Verum eadem, verso tenuis cum cardine ventus  
 Impulit et teneras turbavit ianua frondes,  
 450 Nunquam deinde cavo volitantia prendere saxo,  
 Nec revocare situs aut iungere carmina curat;  
 Inconsulti abeunt, sedemque odere Sibyllae.  
 Hic tibi ne qua morae fuerint dispendia tanti,  
 Quamvis increpitent socii, et vi cursus in altum  
 455 Vela vocet possisque sinus implere secundos,  
 Quin adeas vatem precibusque oracula poscas.  
 Ipsa canat, vocemque volens atque ora resolvat.  
 Illa tibi Italiae populos venturaque bella,  
 Et quo quemque modo fugiasque ferasque laborem,  
 460 Expediet, cursusque dabit venerata secundos.  
 Haec sunt, quae nostra liceat te voce moneri.  
 Vade age, et ingentem factis fer ad aethera Troiam.  
 Quae postquam vates sic ore effatus amico est,

in caudas delphinum.] 435. Cic. Ep. ad Att. 11, 9, 3 „Quibus in miseris una est pro omnibus.“ — alii *praeque*; cf. 12, 229. | 437. *primum*, praeter cetera, ut 4, 342. 5, 746. 6, 183. 11, 786. 12, 33; additur etiam interdum a poeta *ante omnes*, 2, 40. 5, 540. | 438. *cane*, vota verbis quibusdam certis sollemnibusque (*carminibus*) concipiebantur. | 439. *supera*, expugna, placā eius iram. — *victor*, compos voti. | 442. v. vs. 12. — *divinos*, sacros, Diti fortasse, quia per Avernū descensus ad inferos patere credebatur; v. vs. 386. | 443. *Ins. v.*, numinis plenam, *Ἐνθεον*, Sibyllam. | 444. „foliis palmarum“, Varro. — *not. et nom.*, litteras et verba. | 446. *in. num.*, ordinem. | 454. *vi cursus* i. a. V. v., quamvis iter institutum flagitet velificationem. | 455. *secundos*, ut secundo vento intumescant. | 457. *Ipsa*, cf. 6, 74—76. — *volens* significat animum paratum ad gratificandum; itaque frequentatur in illa precum formula *volens propitius adsis*, Liv. 7, 26; similiter *velis* 1, 733. | 459. v. G. 1, 419. | 462. redde factis tuis Troiam ingentem, ut gloria eius ad caelum efferatur. || 463—505.

- Dona dehinc auro gravia sectoque elephanto  
 465 Inperat ad navis ferri, stipatque carinis  
 Ingens argentum, Dodonaeosque lebetas,  
 Loricam consertam hamis auroque trilicem,  
 Et conum insignis galeae cristasque comantis,  
 Arma Neoptolemi. Sunt et sua dona parenti.  
 470 Addit equos, additque duces;  
 Remigium supplet; socios simul instruit armis.  
 Interea classem velis aptare iubebat  
 Anchises, fieret vento mora ne qua ferenti.  
 Quem Phoebi interpretes multo compellat honore:  
 475 Coniugio, Anchisa, Veneris dignate superbo,  
 Cura deum, bis Pergameis erepte ruinis,  
 Ecce tibi Ausoniae tellus; hanc arripe velis.  
 Et tamen hanc pelago praeterlabare necesse est;  
 Ausoniae pars illa procul, quam pandit Apollo.  
 480 Vade, ait, o felix nati pietate. Quid ultra  
 Provehor et fando surgentis demoror austros?  
 Nec minus Andromache, digressu maesta supremo,  
 Fert picturatas auri subtemine vestes,  
 Et Phrygiam Ascanio chlamydem, nec cedit honori,  
 485 Textilibusque onerat donis, ac talia fatur:  
 Accipe et haec, manuum tibi quae monumenta mearum  
 Sint, puer, et longum Andromachae testentur amorem,  
 Coniugis Hectoreae. Cape dona extrema tuorum,  
 O mihi sola mei super Astyanactis imago.

*Acceptis donis hospitalibus discedit Aeneas.* | 464. *gravia s.*, 12, 363 „Chloreaque Sybarimque“ et in metro choriambico Terent. Adelph. 4, 4, 4 „Membra metú; débilibú: sũnt; animús“ est. Ceterum cf. Hom. Odyss. 19, 564. | 465. *st. c.*, v. 1, 195. | 466. v. 1, 640. — *Dodon.* putabimus Dodonae olim nobilia opera ex aere facta esse. | 467. *Lor. c. h.*, ἀλυσιδωτόν, *aur. tril.* ipsi hami ex filis aureis triplicatis facti erant. | 468. *con. i. g.*, galeam puta cum insigni cono. | 470. *add. duces*, secundum historiam, cuius studiosissimus est Virgilius in rebus Aeneae exponendis; nam ἡγεμόνας τῆς ναυτίλλας συνεκπλεῦσαι Αἰνείας ex Epiro ait Dionys. 1, 32; neque obstant huic explicationi, quae leguntur vs. 569; putabimus enim duces ab Heleno datos esse, qui Adriaticum quidem mare, inprimis periculosum navigantibus, nossent, non etiam Siculum, quod nemo tum intrabat, nisi quem venti eo abripuissent. Alii duces volunt esse agasones. | 471. *Remig. suppl.*, addit remiges (qui succederent in locum eorum, qui aut invalidi essent, aut mortui, aut etiam relictii vs. 190) in supplementum, sive, ut ait Liv. 26, 39 „supplevit remigio haves.“ | 472. *aptare*, v. 4, 482. | 474. *hon.*, Iustin. 15, 1 „adiecto honore verborum.“ Sueton. Octav. 66. | 476. *bis*, v. 2, 643. | 477. *h. arripe*, ad hanc summum studio pertende eamque invade; cf. v. 13, 11, 531. | 484. Andromache donat auro intextas vestes Aeneae, puta, et Anchisae; Ascanio chlamydem illorum donorum honori, i. e. praestantiae et pulchritudini, non cedentem, praeterea eidem alia textilia plurima. | 486. *et haec*, praeter pretiosam illam chlamydem ex antiquis opibus sumtam, haec quoque dona textilia, per se quidem illis viliora, sed ipsius largientis manu facta. | 487. *longum*, quia nunquam desitura est Andromacha eum amare. | 488. *tuorum*, v. 12, 947. | 489. *super*, quae superes,

- 490 Sic oculos, sic ille manus, sic ora ferebat;  
 Et nunc aequali tecum pubesceret aevo.  
 Hos ego digrediens lacrimis adfabar obortis:  
 Vivite felices, quibus est fortuna peracta  
 Iam suâ; nos alia ex aliis in fata vocamur.
- 495 Vobis parta quies; nullum maris aequor arandum,  
 Arva neque Ausoniae semper cedentia retro  
 Quaerenda. Effigiem Xanthi Troiamque videtis,  
 Quam vestrae fecere manus, melioribus, opto,  
 Auspiciis, et quae fuerit minus obvia Graiis.
- 500 Si quando Thybrim vicinaque Hybridis arva  
 Intraro gentique meae data moenia cernam,  
 Cognatas urbes olim populosque propinquos,  
 Epiro, Hesperia, quibus idem Dardanus auctor  
 Atque idem casus, unam faciemus utramque
- 505 Troiam animis; maneat nostros ea cura nepotes.  
 Provehimur pelago vicina Ceraunia iuxta,  
 Unde iter Italiam cursusque brevissimus undis.  
 Sol ruit interea et montes umbrantur opaci.  
 Sternimur optatae gremio telluris ad undam,
- 510 Sortiti remos, passimque in litore sicco  
 Corpora curamus; fessos sopor inrigat artus.  
 Necdum orbem medium Nox horis acta subibat:  
 Haud segnis strato surgit Palinurus et omnis  
 Explorat ventos, atque auribus aera captat;
- 515 Sidera cuncta notat tacito labentia caelo,  
 Arcturum pluviasque Hyadas geminosque Triones,  
 Armatumque auro circumspicit Oriona.  
 Postquam cuncta videt caelo constare sereno,  
 Dat clarum e puppi signum; nos castra movemus
- 520 Temptamusque viam et velorum pandimus alas.

superstes, v. 4, 684.] 490. cf. Hom. Od. 4, 149 sq.] 496. cf. 6, 61.] 498 sq. ut melioribus, quam vera Troia, auspiciis condita sit, opto, et ut minus sit exposita hostibus.] 503. *Epiro, Hesperia*, τοὺς μὲν ἐν Ἠπείρῳ, τοὺς δ' ἐν Ἑσπερίῃ, v. 7, 226.] 505. v. 2, 171. — *nepotes*: Augustus condita in Epiro post victoriam Actiacam Nicopoli sanxit, ut Nicopolitani pro cognatis observarentur a Romanis.]] 506—587. *Provecti Troiani naves appellant ad Acroceraunium, promontorium Epiri; inde praeternavigant oram Italiae, appropinquant freto Siculo nocturne ignari vias accedunt ad litora Cyclopium Aetnae propinqua, ibique noctem horroris plenam transigunt.*] 509. *Stern.*, cf. G. 4, 432. — *gremio*, in gremium, v. E. 2, 30.] 510. *Sort. r.*, i. e. vices remorum, sive postquam, quibus proximo die vicibus remigaremus, sortiti eramus; quod quare iam tum faciendum fuerit, declarant ea, quae leguntur vs. 512—519. *Prop. 3 (4) 21, 12*, „Remorumque pares ducite sorte vices.“] 511. cf. 1, 692.] 512. *orbem*, caelum. — *horis acta*, Servius: „per horas suas decurrens.“ Alii *Horis*, quae praesunt vicissitudini temporum anni, non temporibus diurnis nocturnisque.] 514. *aur. a. capt.*, explorat auram auscultans strepitum maris.] 517. *Arm. auro*, Servius: „quia et balteus eius et gladius clarissimis fingitur stellis.“] 518.

- Iamque rubescebat stellis Aurora fugatis,  
 Cum procul obscuros collis humilemque videmus  
 Italiam. Italiam primus conclamat Achates,  
 Italiam laeto socii clamore salutant.
- 525 Tum pater Anchises magnum cratera corona  
 Induit inplevitque mero, divosque vocavit  
 Stans celsa in puppi:  
 Di maris et terrae tempestatumque potentes,  
 Ferte viam vento facilem et spirate secundi.
- 530 Crebrescunt optatae aerae, portusque patescit  
 Iam propior, templumque adparet in Arce Minervae.  
 Vela legunt socii, et proras ad litora torquent.  
 Portus ab Euroo fluctu curvatus in arcum;  
 Obiectae salsa spumant adspargine cautes;
- 535 Ipse latet; gemino demittunt brachia muro  
 Turriti scopuli, refugitque ab litore templum.  
 Quattuor hic, primum omen, equos in gramine vidi  
 Tondentis campum late, candore nivali.  
 Et pater Anchises: Bellum, o terra hospita, portas;
- 540 Bello armantur equi, bellum haec armenta minantur.  
 Sed tamen idem olim curru succedere sueti  
 Quadrupedes et frena iugo concordia ferre:  
 Spes et pacis, ait. Tum numina sancta precamur  
 Palladis armisonae, quae prima accepit ovantis,
- 545 Et capita ante aras Phrygio velamur amictu;  
 Praeceptisque Heleni, dederat quae maxuma, rite  
 Iunoni Argivae iussos adolemus honores.  
 Haud mora, continuo perfectis ordine votis,  
 Cornua velatarum obvertimus antennarum,

*constare*, composita et tranquilla esse. | 523 sq. *Italiam ... Italiam*, ut *θάλαττα! θάλαττα!* apud Xen. Anab. 4, 7, 24. Alius animi affectus cernitur in ter repetito nomine Eurydices G. 4, 525—27. | 525. cf. G. 2, 528. | 527. *in puppi*, ubi tutela collocata erat, h. e. simulacrum dei, cuius tutelae navis erat credita; quando in prora? v. 5, 775. | 528. Servius: „*Di maris*, per quod navigo; *terrae*, ad quam iturus sum.“ Ut Iunonem, inimicissimam sibi, Aeneas inprimis venerari iubetur vs. 437 sqq., ita Anchises alterum inimicum nomen, Minervam his terris praesidentem, non praetereundum sibi arbitratur. | 529. *F. v. vento f.*, date navigationem commoditate venti adiutam. — *sp. s.*, facite, ut spirent aerae secundae. | 530 sq. *Crebr.*, v. 5, 764. — Portus Veneris, qui erat ad Hydruntum in Apulia; imminet ei Arx s. Castrum Minervae. | 535 sq. Portus, qui ex alto accedentium adspectui patescit (vs. 530), propius admotis litusque legentibus (vs. 532) occulitur (*latet*) per rupes (brachia ab utroque latere portum amplectentia et quasi muros efficientia) obiectas, templumque, quod ab alto intuentibus in litore situm videtur, quasi retrocedit appropinquantibus, utpote in colle positum. | 537. *pr. om.*, quod Italia primum obtulit. | 539. *hosp.*, v. 3, 377. | 541. v. E. 5, 29. G. 1, 305. | 542. *iugo*, cum sunt eidem curru iuncti, id quod dicimus *im Gespanne*. | 544. cf. vs. 531. | 545. cf. vs. 405. | 546. cf. vs. 436 sqq. | 548. *ordine*, rite. | 549. *obvert.*, terrae, ut ventus a terra veniens implere vela posset.

- 550 Graiugenumque domos suspectaque linquimus arva.  
Hinc sinus Herculei, si vera est fama, Tarenti  
Cernitur; attollit se diva Lacinia contra,  
Caulonisque arces et navifragum Scylaceum.  
Tum procul e fluctu Trinacria cernitur Aetna,  
555 Et gemitum ingentem pelagi pulsataque saxa  
Audimus longe fractasque ad litora voces,  
Exsultantque vada, atque aestu miscentur arenae.  
Et pater Anchises: Nimirum haec illa Charybdis;  
Hos Helenus scopulos, haec saxa horrenda canebat.  
560 Eripite, o socii, pariterque insurgite remis.  
Haud minus ac iussi faciunt, primusque rudentem  
Contorsit laevas proram Palinurus ad undas;  
Laevam cuncta cohors remis ventisque petivit.  
Tollimur in caelum curvato gurgite, et idem  
565 Subducta ad Manis imos desedimus unda.  
Ter scopuli clamorem inter cava saxa dedere;  
Ter spumam elisam et rorantia vidimus astra.  
Interea fessos ventus cum sole reliquit,  
Ignarique viae Cyclopum adlabimur oris.  
570 Portus ab accessu ventorum inmotus et ingens  
Ipse; sed horrificis iuxta tonat Aetna ruinis,  
Interdumque atram prorumpit ad aethera nubem,  
Turbine fumantem piceo et candente favilla,  
Attollitque globos flammaram et sidera lambit;  
575 Interdum scopulos avolsaque viscera montis  
Erigit eructans, liquefactaque saxa sub auras  
Cum gemitu glomerat, fundoque exaestuat imo.  
Fama est Enceladi semiustum fulmine corpus  
Urgueri mole hac, ingentemque insuper Aetnam  
580 Inpositam ruptis flammam exspirare caminis;  
Et fessum quotiens mutet latus, intremere omnem  
Murmure Trinacriam et caelum subtexere fumo.

— *velatarum*, velis indutarum. | 551. *si v. e. f.*, si verum est ab Hercule (non a Tarante, filio Neptuni) conditum esse. | 552. in promontorio Lacinio erat celebre templum Iunonis Laciniae. | 554. *e fl.*, ab alto. | 556. *fract. voces*, fragorem maris, cf. vs. 669. | 557. *misc.*, agitantur in fundo maris et mixtae inter se sursum trahuntur. | 558 sq. *haec illa* (*αὕτη ἐκεῖνη*). sic loquuntur Romani, cum ex rerum certarum recordatione coniecturam capiunt haud dubiam, cf. vs. 410—421 et v. 7, 255. | 560. *Erip.* nos e periculo. | 561. v. vs. 236. — *rud.*, graviter gementem, quippe summa vi contortam. | 564. *curv. g.*, cf. Hom. II. 4, 426. — *idem*, v. E. 1, 33. | 565. *desed.*, Perfectum verbi *desido*, cf. 5, 841. 10, 301. E. 7, 1. | 567. *rorant. a.*, aquam alte eiectam roris instar guttatim deferri vidimus, v. vs. 619. | 571. *portus ipse*, i. e. solus per se spectatus, tranquillus est, sed Aetna in vicina tonans implet eum horrore. — *tonat ruinis*, fragore resonat, quem faciunt ruinae viscerum montis, cf. vs. 575 sqq. | 579. *mole hac*: in soluta oratione diceret: mole ingenti huius montis, qui illi (Encelado) impositus exspiret fl. — *insuper*, v. 1, 61. | 580. *flammam* ab Encelado proflatam, quae

- Noctem illam tecti silvis inmania monstra  
 Perferimus, nec, quae sonitum det caussa, videmus.  
 585 Nam neque erant astrorum ignes, nec lucidus aethra  
 Siderea polus, obscuro sed nubila caelo,  
 Et lunam in nimbo nox intempesta tenebat.  
 Postera iamque dies primo surgebat Eoo,  
 Humentemque Aurora polo dimoverat umbram:  
 590 Cum subito e silvis, macie confecta suprema,  
 Ignoti nova forma viri miserandaque cultu  
 Procedit supplexque manus ad litora tendit.  
 Respicimus. Dira inluvies inmissaque barba,  
 Consertum tegumen spinis; at cetera Graius,  
 595 Et quondam patriis ad Troiam missus in armis.  
 Isque ubi Dardanios habitus et Troia vidit  
 Arma procul, paulum aspectu conterritus haesit,  
 Continuitque gradum; mox sese ad litora praeceps  
 Cum fletu precibusque tulit: Per sidera testor,  
 600 Per superos atque hoc caeli spirabile lumen,  
 Tollite me, Teucri; quascumque abducite terras;  
 Hoc sat erit. Scio me Danaïs e classibus unum,  
 Et bello Iliacos fateor petiisse Penatis.  
 Pro quo, si sceleris tanta est iniuria nostri,  
 605 Spargite me in fluctus, vastoque inmergite ponto.  
 Si pereo, hominum manibus periisse iuvabit.  
 Dixerat, et genua amplexus genibusque volutans  
 Haerebat. Qui sit, fari, quo sanguine cretus,  
 Hortamur; quae deinde agitet fortuna, fateri.  
 610 Ipse pater dextram Anchises, haud multa moratus,  
 Dat iuveni, atque animum praesenti pignore firmat.  
 Ille haec, deposita tandem formidine, fatur:  
 Sum patria ex Ithaca, comes infelicis Ulixi,  
 Nomen Achemenides, Troiam genitorē Adamasto  
 615 Paupere — mansissetque utinam fortunale — profectus.  
 Hic me, dum trepidi crudelia limina linquunt,  
 Inmemores socii vasto Cyclopi in antro

perrupit montem caminosque sibi fecit.] 583. monstri instar Troianis erat strepitus ille ab Aetna editus, cum nocte oppressi, prospectu etiam per silvam prohibito, causam eius rei cognoscere nondum potuissent.] 585. *neque ... nec*, v. G. 4, 198.]] 588—654. *Proximo mane Aeneas Achemenidem, socium Ulixis ibi relictum, recipit supplicem, isque de Cyclopium, ea loca tenentium, maxime Polyphemi, immanitate exponit.*] 593. *Resp.*, convertimus oculos ad eum, v. 2, 615.] 594. *cat. Gr.* Servius: „habet enim unaquaeque gens incesum et vocem propriam;“ adde formam oris.] 595. Rescuiisset haec poeta, si licuisset retractare; potuit enim ea res ipsi nota esse, Aeneae nondum potuit. — *in armis*, indutus arma, cf. 4, 518 et v. 5, 37.] 600. *lumen*, auram, quippe pellucidam.] 606. v. E. 2, 53.] 607. v. G. 1, 163.] 609. v. 1, 195.] 611. *pignore*, data dextra; *praesenti*, pollenti, i. e. in quo magna est fides.] 614 sq. v. 2, 86.] 615. *mans.*

- Deseruere. Domus sanie dapibusque cruentis  
 Intus, opaca, ingens; ipse arduus, altaque pulsat  
 620 Sidera — Di, talem terris avertite pestem! —  
 Nec visu facilis nec dictu adfabilis ulli.  
 Visceribus miserorum et sanguine vescitur atro.  
 Vidi egomet, duo de numero cum corpora nostro  
 Prensa manu magna medio resupinus in antro  
 625 Frangeret ad saxum, sanieque exspersa natarent  
 Limina; vidi atro cum membra fluentia tabo  
 Manderet, et tepidi tremerent sub dentibus artus.  
 Haud inpune quidem; nec talia passus Ulixes,  
 Oblitusve sui est Ithacus discrimine tanto.  
 630 Nam simul expletus dapibus vinoque sepultus  
 Cervicem inflexam posuit, iacuitque per antrum  
 Immensus, saniem eructans et frustra cruento  
 Per somnum commixta mero, nos, magna precati  
 Numina sortitique vices, una undique circum  
 635 Fundimur, et telo lumen terebramus acuto,  
 Ingens, quod torva solum sub fronte latebat,  
 Argolici clipei aut Phoebeae lampadis instar,  
 Et tandem laeti sociorum ulciscimur umbras.  
 Sed fugite, o miseri, fugite, atque ab litore funem  
 640 Rumpite.  
 Nam qualis quantusque cavo Polyphemus in antro  
 Lanigeras claudit pecudes atque ubera pressat,  
 Centum alii curva haec habitant ad litora volgo  
 Infandi Cyclopes et altis montibus errant.  
 645 Tertia iam Lunae se cornua lumine complent,  
 Cum vitam in silvis inter deserta ferarum  
 Lustra domosque traho, vastosque ab rupe Cyclopas  
 Prospicio, sonitumque pedum vocemque tremesco.

*ut. fort., utinam pauper, ergo domi, manere maluissem.* | 618. *sanie, dapibus*, Ablativi qualitatis; domus foeda dapibus et sanie; similiter *vestes ostro superbo* 1, 639. Hom. Od. 9, 289 sq.: *σὺν δὲ δῶμα μάργας ... ποτὶ γαλῆ κοπῆ· ἐκ δ' ἐγκέφαλος χαμάδις ῥέει, δέυει δὲ γαῖαν*, et 373 sq.: *φάρυγγος δ' ἐξέσσοντο οἶνος ψαμοὶ τ' ἀνδρόμεοι· ὁ δ' ἐρευνγετο οἶνοβαρέων*. | 619 sq. cf. vs. 665. Ut Manium nomine (vs. 565) locum profundissimum, ita caeli (2, 186. 3, 678. 4, 89. 8, 99), astrorum (3, 567. 5, 759) et siderum (3, 574) vocabulis immensam altitudinem significant poetae. | 621. Stat. S. 3, 3, 72 „Terribilem adfatu visuque tyrannum.“ | 624. *resupinus*, Servius „magnitudo virium ostenditur, quod una manu, quod resupinus [humi iacens], quod frangeret, quod elideret non in terram, sed ad saxum sublimitis quateret.“ | 627. *tepidi*, quippe calorem vitalem adhuc retinentes, id quod Ach. etsi non videre, scire tamen potuit; tremunt enim, quod sunt adhuc tepidi. | 629. Ithacus appellatur a Virgilio Ulixes, ubi tangitur eius vafrities, tamquam hoc traxerit a patria; cf. 2, 104. 122 et v. 6, 511. | 634. Hom. Od. 9, 331 sq. — *vices*, quod cuique esset agendum. | 637. Clipeus ab Argivis inventus rotundus erat et magnus. | 639. v. G. 1, 457. | 643. *volgo*, passim, cf. 6, 288. | 646. v. 2, 714. | 647. „ab rupe prospicio,“ quia „in silvis“ arbores



- Victum infelicem, bacas lapidosaque corna,  
 650 Dant rami, et volsis pascunt radicibus herbae.  
 Omnia conlustrans hanc primum ad litora classem  
 Conspexi venientem. Huic me, quaecumque fuisset,  
 Addixi: satis est gentem effugisse nefandam;  
 Vos animam hanc potius quocumque absumite leto.  
 655 Vix ea fatus erat, summo cum monte videmus  
 Ipsum inter pecudes vasta se mole moventem  
 Pastorem Polyphemum et litora nota petentem,  
 Monstrum horrendum, informe, ingens, cui lumen ademptum.  
 Trunca manu pinus regit et vestigia firmat;  
 660 Lanigeræ comitantur oves; ea sola voluptas  
 Solamenque mali.  
 Postquam altos tetigit fluctus et ad aequora venit,  
 Luminis effossi fluidum lavit inde cruorem,  
 Dentibus infrendens gemitu, graditurque per aequor  
 665 Iam medium, necdum fluctus latera ardua tinxit.  
 Nos procul inde fugam trepidi celerare, recepto  
 Supplice sic merito, tacitique incidere funem;  
 Verrimus et proni certantibus aequora remis.  
 Sensit, et ad sonitum vocis vestigia torsit.  
 670 Verum ubi nulla datur dextra adfectare potestas,  
 Nec potis Ionios fluctus aequare sequendo,  
 Clamorem immensum tollit, quo pontus et omnes  
 Contremuere undae, penitusque exterrita tellus  
 Italiae, curvisque inungiit Aetna cavernis.  
 675 At genus e silvis Cyclopum et montibus altis  
 Excitum ruit ad portus et litora complent.  
 Cernimus adstantis nequiquam lumine torvo  
 Aetnaeos fratres, caelo capita alta ferentis,  
 Concilium horrendum: quales cum vertice celso  
 680 Aeriae quercus, aut coniferae cyparissi  
 Constiterunt, silva alta Iovis, lucusve Dianae.

prospectum adimebant.] 650. vols. rad. h., i. e. radices herbarum.] 652. fuisset, v. 2, 136.] 653. Addixi tamquam proprium.] 654. an. hanc, v. 2, 140.]] 655—718. Viso ipso Polyphemo occitisque eius clamore Cyclopibus Troiani solvunt naves, ac litora Siciliae legentes perveniunt Drepanum, ubi Anchises diem obit supremum. Inde cum repetissent mare, in Africam tempestate auferuntur.] 658. v. G. 2, 441.] 659. regit eum, ut vs. 650 pascunt sc. me. — manu, quae est in manu eius, quam gerit manu; v. G. 1, 430.] 662. ad a. v., in altum processit.] 663. inde, sumpta ex mari aqua.] 664. gemitu, v. 2, 323.] 667. sic m., hoc ipsum (ut reciperetur) merito.] 669. v. vs. 556. — ad s., eo, unde sonitus auditus.] 670. adfect., attingere, navem scilicet.] 671. aequare sequendo: non potest ita sequi, s. non tanta est ipsius celeritas, ut aequare possit, nedum superare, celeritatem, qua fluctus classem propellebant.] 677. nequiqu., quia nocere non poterant abeantibus nobis.] 679. qu. cum, v. E. 8, 85.] 681. s. a. Iovis, v. G. 2, 15 et cf. G. 3, 332. — Diana infera, s. Proserpina, cui

- Praecipitis metus acer agit quocumque rudentis  
 Excutere, et ventis intendere vela secundis.  
 [Contra iussa monent Heleni, Scyllam atque Charybdim  
 685 Inter, utramque viam leti discrimine parvo,  
 Ni teneant cursus; certum est dare lineae retro.]  
 Ecce autem Boreas angusta ab sede Pelori  
 Missus adest. Vivo praetervehor ostia saxo  
 Pantagiae Megarosque sinus Thapsumque iacentem.  
 690 [Talia monstrabat relegens errata retrorsus  
 Litora Achemenides, comes infelicis Ulixi.]  
 Sicanio praetenta sinu iacet insula contra  
 Plemyrion undosum; nomen dixere priores  
 Ortygiam. Alpheum fama est huc Elidis amnem  
 695 Occultas egisse vias subter mare; qui nunc  
 Ore, Arethusa, tuo Siculis confunditur undis.  
 Iussi numina magna loci veneramur; et inde  
 Exsupero praepingue solum stagnantis Helori.  
 Hinc altas cautes proiectaque saxa Pachyni  
 700 Radimus, et fatis numquam concessa moveri  
 Adparet Camarina procul campique Geloi,  
 [Inmanisque Gela fluvii cognomine dicta.]  
 Arduus inde Acragas ostentat maxuma longe  
 Moenia, magnanimum quondam generator equorum;

cypressus sacra.] 682 sq. *quoc. ... secundis*, abire, quocumque venti ferant.] 684—686. Ladewigius haec (ut taceam alios acutos homines, qui ea explicare conati sunt) in hunc fere modum interpretatur: „Acer metus subigit socios Aeneae naves vento permittere. Cum autem futurum esset, ut Euronotus, quem tum flavisse ostendat versus 671, ad Scyllam et Charybdim classem reliceret, Aeneas socios praesentiore periculo percussos frustra iubet meminisse praecepta Heleni. Tum exortus repente Boreas omni periculo Troianos exsolvit. Verbis *certum est ... retro* pertinaciam sociorum indicari statuit Ladewig.; utramque, Scyllam, ac Charybdim, dici viam, quae tenui limite Troianos a leto separet; denique *ni* esse i. q. *ne*.“ — Praestiterit fortasse iungere *viam leti* et verbis *discr. parvo* eam subicere sententiam, ut neget (vide, quam lepide!) quisquis est horum versuum artifex, multum interesse, a Charybdi absorbearis an voreris a canibus Scyllae.] 687. *caelo*, v. E. 2, 30.] 687. *angusta*, quia Pelorum ad angustias maris erat positum, cf. vs. 411. — Ceterum ad nomen Pelori ceteraque, quae proximis versibus posita sunt nomina, referre licet illud, quod legitur 6, 777 „Haece tam nomina erunt, nunc sunt sine nomine terrae.“] 688. Pantagiae fluvii ostium altis utrimque rupibus cingitur; et v. 1, 167.] 692. *sinu*, v. E. 5, 29. — *contra*, e regione Plemyrion.] 693. v. G. 1, 137.] 695. cf. E. 10, 1 et 4.] 696. *Ore*, fonte; per fontem tum erumpens.] 697. *Iussi*, ab Anchise?] 699. *proi* s. Hom. Od. 13, 97 sq.] 700. Camarinam paludem, a qua Camarina oppidum nomen accepit, cum contra responsum Apollinis (*μη κλειει Καμαρίναν ακίνητος γαρ αμείνων*) exsiccassent Camarinenses, oppidum ab hostibus per exsiccata ingressis captum est. — *moveri* dicuntur, in quibus aliquid novatur, mutatur.] 702. *Inmanis fluvii*, Ovid. Fast. 4, 470 „vorticibus non adeunde Gela.“ *fl. cogn. d.*, cognominis fluvio. — Ceterum corripitur a Romanis altera syllaba nominis *Gela*; nec *fluvii*, quod illa aetate *fluvii* et scribebatur et pronuntiabatur, locum habet in Virgiliano carmine.] 704. Spectat poeta ad Agrigentinarum stadia

- 705 Teque datis linquo ventis, palmosa Selinus,  
 Et vada dura lego saxis Lilybeia caecis.  
 Hinc Drepani me portus et inlaetabilis ora  
 Accipit. Hic, pelagi tot tempestatibus actus,  
 Heu genitorem, omnis curae casusque levamen,  
 710 Amitto Anchisen. Hic me, pater optume, fessum  
 Deseris, heu, tantis nequiquam erepte periclis!  
 Nec vates Helenus, cum multa horrenda moneret,  
 Hos mihi praedixit luctus, non dira Celaeno.  
 Hic labor extremus, longarum haec meta viarum.  
 715 Hinc me digressum vestris deus adpulit oris.  
 Sic pater Aeneas intentis omnibus unus  
 Fata renarrabat divom, cursusque docebat.  
 Conticuit tandem, factoque hic fine quievit.

## A E N E I D O S

### LIBER QUARTUS.

(*Dido amore Aeneae capta spe coniugii amissa mortem sibi consciscit.*)

- At regina gravi iamdudum saucia cura  
 Volnus alit venis, et caeco carpitur igni.  
 Multa viri virtus animo, multusque recursat  
 Gentis honos; haerent infixi pectore voltus  
 5 Verbaque, nec placidam membris dat cura quietem.  
 Postera Phoebea lustrabat lampade terras  
 Humentemque Aurora polo dimoverat umbram,  
 Cum sic unanimam adloquitur male sana sororem:  
 Anna soror, quae me suspensam insomnia terrent!

equos alendi, quos ad ludos Olympiacos, Pythios, alios, certandi causa mitterent.] 706. *dura saxis caecis*, fundum scopulosum habentia. — *caecis*, latentibus 1, 108; et v. 1, 356.] 707. *inlaet.*, quia is ager arenosus erat et sterilis.] 711. quare *nequiquam*?] 716. v. vs. 181.] 717. *Fata divom*, a diis constituta, ut 4, 614; *vota deum* 11, 4. ea, quae diis vovimus. — *renarrab.*, non iterum narrabat, sed quasi re praesentabat ea, quae evenerant, narrando; cf. 7, 167.] 718. *quievit*, non cubitum ivit, sed finita narratione rediit ad habitum compositum et quietum.

**Aeneid. L. IV. 1—89.** *Dido*, animo opera Cupidinis labefactato (1, 720 sqq.) primum afficitur perturbatione illa (*cura*), qua occipientes amare, sed dissimulantes amorem, agitantur; deinde, *Annae sororis sermone confirmata*, iam tota est in amore.] 1 sq. saucii esse, vulnus habere, sive alere, quod verbum perpetuitatem quandam significat, dicuntur amantes vel amare occipientes, quippe sagittis Cupidinis fixi. — *venis*, in venis; quippe proditur illa animi affectio commotis venis sive concitatione sanguinis. — *caeco*, v. G. 3, 210.] 3. *Multa ... multus rec.*, i. e. multum recursat.] 4. *gentis*, cf. vs. 12, 10, 228.] 6. *Aurora* h. l. facere dicitur, quod fit matutino tempore; cf. vs. 607.] 9. *in-*

- 10 Quis novus hic nostris successit sedibus hospes,  
 Quem sese ore ferens, quam forti pectore et armis!  
 Credo equidem, nec vana fides, genus esse deorum:  
 Degeneres animos timor arguit: heu, quibus ille  
 Iactatus fatis! quae bella exhausta canebat!
- 15 Si mihi non animo fixum inmotumque sederet,  
 Ne cui me vinclo vellem sociare iugali,  
 Postquam primus amor deceptam morte fefellit;  
 Si non pertaesum thalami taedaeque fuisset,  
 Huic uni forsant potui succumbere culpa.
- 20 Anna, fatebor enim, miseri post fata Sychaei  
 Coniugis et sparsos fraterna caede Penatis,  
 Solus hic inflexit sensus, animumque labantem  
 Inpulit. Adgnosco veteris vestigia flammae.  
 Sed mihi vel tellus optem prius ima dehiscat,
- 25 Vel Pater omnipotens adigat me fulmine ad umbras,  
 Pallentis umbras Erebi noctemque profundam,  
 Ante, Pudor, quam te violo, aut tua iura resolvo.  
 Ille meos, primus qui me sibi iunxit, amores  
 Abstulit; ille habeat secum servetque sepulchro.
- 30 Sic effata sinum lacrimis inplevit obortis.  
 Anna refert: O luce magis dilecta sorori,  
 Solane perpetua maerens carpere iuventa,  
 Nec dulcis natos, Veneris nec praemia noris?  
 Id cinerem aut Manis credis curare sepultos?
- 35 Esto: aegram nulli quondam flexere mariti,  
 Non Libyae, non ante Tyro; despectus Iarbas

*somn.*, „βαρεῖς ὄνειροι“, quales terrent amantem Medeam apud Apoll. Rhod. 3, 636. — *susp. terr.*, terrent suspensamque reddunt, v. vs. 298. | 11. *Quem s. o.* f., quanta est in ore eius dignitas, v. 5, 273. — *armis*, v. 3, 413; et intelliges armos, humeros, ut 11, 644, non arma. Ceterum cf. Val. Fl. 1, 434 „humeri fortes spatiumque superbi pectoris.“ Ulixes apud Hom. Il. 3, 194 „εὐρύτερος ὤμοισιν ἰδὲ στέρνοισι ἰδέσθαι.“ et cf. Odys. 6, 235. Ipsa Venus pueri Aeneae pulchritudinem praedicat Hymn. in Ven. 279 sq. | 12. *nec v. f.*, nec vanum est, quod aiunt. | 13. *Deg.*, ignobiles vilesque; cf. Tac. Ann. 12, 63. | 14. *can.*, v. 9, 621. | 17. amor fefellit me (diuturnum scilicet coniugium sperantem), morte Sychaei deceptam meaque spe deiectam. | 19. *potui*, v. G. 3, 453. A. 2, 55. — culpa cernitur in amore, qui fidei erga Sychaeum adversari videatur. | 21. cf. 1, 349. | 22. cf. 11, 609. | 24. Notum est illud Homericum: τότε μοι χάνοι εὐρεῖα χθών. | 26. Alii *Erebo*. | 27. Propert. 2, 25, 25 „Aut prius infecto deposcit praemia cursu, Septima quam metam triverit ante rota.“ — Pudor h. l. spectat ad reverentiam priori coniugio habitam, et laudi erat matronis apud Romanos, uno marito contentas esse. | 28 sq. *meos amores abstulit*, nihil igitur loci novo amori reliquit. | 32. *maer. carp.*, carperis maerore. — *Sola*, cf. vs. 82. | 33. *Ven. praem.*, δῶρα Ἀφροδίτης, φίλια δῶρα Κυπρίδας ap. Pind. Ol. 1, 120. | 34. *Man. sep.*, Manes sepulchorum, nihil iam curantium res humanas. | 35. *aegram* dolore amissi pristini coniugis. — *mariti*, v. 2, 344. | 36. *Tyro*, a Tyro, Tyrii, ut „*Curibus Clausus*“ 10, 345. adde 10, 183. Caes. B. Civ. 1, 24 „*Cn.*

- Ductoresque alii, quos Africa terra triumphis  
 Dives alit: placitone etiam pugnabis amor?  
 Nec venit in mentem, quorum consederis arvis?  
 40 Hinc Gaetulae urbes, genus insuperabile bello,  
 Et Numidae infreni cingunt et inhospita Syrtis;  
 Hinc deserta siti regio, lateque furentes  
 Barcae. Quid bella Tyro surgentia dicam  
 Germanique minas?  
 45 Dis equidem auspiciis reor et Iunone secunda  
 Hunc cursum Iliacas vento tenuisse carinas.  
 Quam tu urbem, soror, hanc cernes, quae surgere regna  
 Coniugio tali! Teucrum comitantibus armis  
 Punica se quantis attollet gloria rebus!  
 50 Tu modo posce deos veniam, sacrisque litatis  
 Indulge hospitio, caussasque innecte morandi,  
 Dum pelago desaevit hiemps et aquosus Orion,  
 Quassataeque rates, dum non tractabile caelum.  
 His dictis incensum animum inflammavit amore,  
 55 Spemque dedit dubiae menti, solvitque pudorem.  
 Principio delubra adeunt, pacemque per aras  
 Exquirunt; mactant lectas de more bidentis  
 Legiferae Cereri Phoeboque patrique Lyaeo,  
 Iunoni ante omnis, cui vincla iugalia curae.  
 60 Ipsa, tenens dextra pateram, pulcherrima Dido  
 Candentis vaccae media inter cornua fundit,  
 Aut ante ora deum pinguis spatiat ad aras,  
 Instauratque diem donis, pecudumque reclusis  
 Pectoribus inhians spirantia consulit exta.  
 65 Heu vatum ignarae mentes! quid vota furentem,

*Matius Cremona.* " | 37. *triumphis dives*, bellis inter incolas assidue agitatibus infestata proptereaque dives triumphis. | 41. *infreni*, frenis ad regendos equos non utentes. — *inhospita* ob crebras Nasamonum in illa maris parte praedationes; Lucan. 9, 440 „Nasamon, quem mundi barbara damnis Syrtis alit.“ | 42. *deserta*, infrequenter habitata, v. 2, 714. | 44. cf. 1, 361 sq. | 45. cf. vs. 59. | 46. Alii *Huc*, v. 6, 18. | 49. *rebus* a coniuncto utroque populo gerendis, cf. 3, 462. | 50. *veniam*, favorem, et cf. vs. 9. | 51. *Ind. hosp.*, operam da colendo demerendoque hospitii. | 53. cf. 1, 551. | 55. *Sp. d. d. m.*, cf. vs. 9. — *solv. pud.*, v. vs. 27. | 56. *pac.*, cf. 3, 370. — *per a.*, cf. vs. 58 sq. Praepositione *per* significantur arae diversis locis positae. | 57. *mact. de more bid.*, ovis sollemne in placandis diis sacrificium. Oves anniculae binos dentes gignunt ceteris eminentiores, bimae quattuor; unde intelligitur et quae causa vocabuli bidens fuerit et quae aetas ovium apta sacrificiis habita sit. Servius 6, 39 iungens *lectas de more* „De more antiquo, inquit: ne habeant caudam aculeatam, ne linguam nigram, ne aurem fissam.“ | 58. *Leg. C.*, *θεσμοπόρε*: Calvus poeta: „Et leges sanctas docuit (Ceres) et cara iugavit Corpora connubiis et magnas condidit urbes.“ | 63. Dido *instaurat diem donis*. Instaurare sacrificia dicitur, qui ea repetit, maxime, ut hoc loco, si non est perlitatum; *dona* sunt sacra diis oblata; instaurant diem, qui iteratis eodem die sacrificiis perlitare tandem cupiunt. | 64. v. G. 3, 189. | 65 sq. Noli iungere *mentes vatum*, sed *ignarae vatum*, quippe non videntes, quae tali cupid-

- Quid delubra iuvant? est mollis flamma medullas  
 Interea, et tacitum vivit sub pectore volnus.  
 Uritur infelix Dido totaque vagatur  
 Urbe furens, qualis coniecta cerva sagitta,  
 70 Quam procul incautam nemora inter Cresia fixit  
 Pastor agens telis, liquitque volatile ferrum  
 Nescius; illa fuga silvas saltusque peragrat  
 Dictaeos; haeret lateri letalis arundo.  
 Nunc media Aenean secum per moenia ducit,  
 75 Sidoniasque ostentat opes urbemque paratam;  
 Incipit effari, mediaque in voce resistit;  
 Nunc eadem labente die convivia quaerit,  
 Iliacosque iterum demens audire labores  
 Exposcit, pendetque iterum narrantis ab ore.  
 80 Post, ubi digressi, lumenque obscura vicissim  
 Luna premit suadentque cadentia sidera somnos,  
 Sola domo maeret vacua, stratisque relictis  
 Incubat. Illum absens absentem auditque videtque,  
 Aut gremio Ascanium, genitoris imagine capta,  
 85 Detinet, infandum si fallere possit amorem.  
 Non coepatae adsurgunt turres, non arma iuventus  
 Exercet, portusve aut propugnacula bello  
 Tuta parant; pendent opera interrupta minaeque  
 Murorum ingentes aequataque machina caelo.  
 90 Quam simul ac tali persensit peste teneri  
 Cara Iovis coniunx, nec famam obstare furori,  
 Talibus adgreditur Venerem Saturnia dictis:  
 Egregiam vero laudem et spolia ampla refertis  
 Tuque puerque tuus; magnum et memorabile numen,  
 95 Una dolo divom si femina victa duorum est.  
 Nec me adeo fallit veritam te moenia nostra

tate obstricta sit, ei non esse opus vatibus atque extispicio, nihil igitur prodesse suscepta vota, nihil adita delubra; „sua cuique deus fit dira cupido“ 9, 185. — *vatum ignarus* 8, 627, sed non eodem sensu. | 75. *opes*, magnificum ornatum urbis, testem opum. — *paratam* recipiendis Troianis sede carentibus; cf. 1, 557 et 573 sq. | 80 sq. *lum. premit*, condit, dum occidit; occidente sole (vs. 77) coepta convivia, luna vicissim (nos: *ihrerseits*, Galli: *de sa part*) occidente digrediantur. | 82 sq. *stratis relictis*, ab Aenea modo scilicet digresso. | 85. *detinemus*, quem, ut diutius nobiscum esse velit, delenimus blanditiis, illecebris. — *fallit amorem*, qui facit, ut in praesens minus sentiat amor. | 86. *arma*, ferrum, unde fiant arma, cf. 8, 424. | 88. *pendere* dicuntur ea, quae intermittuntur. — *minae*, v. 1, 162. | 89. *machina*, turres per murum dispositae. || 90—128. *Iuno, quo Aeneam avertat ab Italia, agit cum Venere, ut cum bona eius venia liceat Aeneae Didonem uxorem ducere; quoque id commodius fieri possit, se opportunitatem oblaturam ostendit.* | 94. *cavillans* puerum appellat Iuno, quem filium appellari decebat. — *magn. et m. numen*, magnum et m. divinae potentiae signum est. Alii *nomen*. | 96. *Nec me adeo f.*, nec, ut tu reris, me fugit. Per Particulas *nec adeo* (nostrum *nicht etwa*) reiicitur interdum cum quadam vi, quod

- Suspectas habuisse domos Karthaginis altae.  
 Sed quis erit modus, aut quo nunc certamina tanta?  
 Quin potius pacem aeternam pactosque hymenaeos  
 100 Exercemus? habes, tota quod mente petisti:  
 Ardet amans Dido traxitque per ossa furorem.  
 Communem hunc ergo populum paribusque regamus  
 Auspiciis; liceat Phrygio servire marito,  
 Dotalisque tuae Tyrios permittere dextrae.  
 105 Olli — sensit enim simulata mente locutam,  
 Quo regnum Italiae Libycas averteret oras —  
 Sic contra est ingressa Venus: Quis talia demens  
 Abnuat, aut tecum malit contendere bello?  
 Si modo, quod memoras, factum fortuna sequatur.  
 110 Sed fatis incerta feror, si Iuppiter unam  
 Esse velit Tyriis urbem Troiaque profectis,  
 Miscerive probet populos, aut foedera iungi.  
 Tu coniunx; tibi fas animum temptare precando.  
 Perge; sequar. Tum sic excepit regia Iuno:  
 115 Mecum erit iste labor. Nunc qua ratione, quod instat,  
 Conferri possit, paucis, adverte, docebo.  
 Venatum Aeneas unaque miserrima Dido  
 In nemus ire parant, ubi primos crastinus ortus  
 Extulerit Titan radiisque retexerit orbem.  
 120 His ego nigrantem commixta grandine nimbum,  
 Dum trepidant alae saltusque indagine cingunt,  
 Desuper infundam, et tonitru caelum omne ciebo.  
 Diffugient comites et nocte tegentur opaca:  
 Speluncam Dido dux et Troianus eandem

putamus ab aliis cogitari. Plant. Rud. prol. 36 „Neque is adeo propter malitiam patria caret.“ | 101. v. G. 3, 272. | 102. *paribus auspiciis*, communi aequalique imperio; petium hoc a magistratibus Romanorum, qui cum imperio coniunctum habebant auspicium; propterea auspicium saepe i. q. ipsum imperium. Ceterum v. G. 2, 290. | 103 sq. En fastidiosam improbationem coniugii cum peregrino (et Phryge, in viso Iunoni, et exsule) initi, quale displicebat cum aliis, tum Romanis. — *liceat Didonem servire*. | 104. *Dot.*, quasi dotis nomine traditos. — *dextrae*, fidei ac tutelae tuae. | 106. quo fieret, ut non Karthagini Italia imperaret, sed Italiae Karthago. | 109. *fact.*, ubi id effectum fuerit, cf. vs. 99. | 110. *fatis inc. f.*, i. e. fatis fit, ut ferar incerta, sive: quae mea est scientia fatorum, incerta sum, si *est*, cf. 1, 261 sqq. *Ferri* autem dicitur interdum, cui mens vagatur adempta verum certumque videndi potestate, ut 10, 630 „ego veri vana feror.“ | 115. *Mecum erit i. l.*, *συνέσται ἕκινος ὁ πόνος ἐμοί*, i. q. *ἐγὼ συνέσσομαι ἕκινον πόνον*, i. e. meus erit; ut apud Liv. 23, 33 „*tertia victoria cum Poenis erat*.“ Terent. Phorm. 5, 8, 90 sq.: „una iniuria est *tecum*, .... altera est *tecum*, Chreme,“ i. e. tua. | 115. *quod instat*, *τὸ προεχθόμενον*, id quod iam peragendum est. | 117. *miserrima*, misere amans. | 121. *alae*, equites dici ait Servius; quippe, ut alarii equites in acie peditatui, sic hi Didoni atque Aeneae a latere circumfusi erant, „*alae venantum*“ Sil. Il. 2, 419, aperta imitatione Virgillii vestigia persecutus. — *Dum trepidant*, dum hi equites, comites venationis, toti sunt in negotio, dilapsi in omnes partes vel ad observanda retia, ut vult Donatus, vel

- 125 Devenient. Adero, et, tua si mihi certa voluntas,  
Connubio iungam stabili propriamque dicabo;  
Hic Hymenaeus erit. — Non adversata petenti  
Adnuit, atque dolis risit Cytherea repertis.  
Oceanum interea surgens Aurora reliquit.
- 130 It portis iubare exorto delecta iuventus;  
Retia rara, plagae, lato venabula ferro,  
Massylique ruunt equites et odora canum vis.  
Reginam thalamo cunctantem ad limina primi  
Poenorum expectant, ostroque insignis et auro
- 135 Stat sonipes ac frena ferox spumantia mandit.  
Tandem progreditur magna stipante caterva,  
Sidoniam picto chlamydem circumdata limbo.  
Cui pharetra ex auro; crines nodantur in aurum;  
Aurea purpuream subnectit fibula vestem.
- 140 Nec non et Phrygii comites et laetus Iulus  
Incedunt. Ipse ante alios pulcherrimus omnis  
Infert se socium Aeneas atque agmina iungit.  
Qualis ubi hibernam Lyciam Xanthique fluenta  
Deserit ac Delum maternam invisit Apollo
- 145 Instauratque choros, mixtique altaria circum  
Cretesque Dryopesque fremunt pictique Agathyrsi;  
Ipse iugis Cynthi graditur, mollique fluentem  
Fronde premit crinem fingens atque implicat auro,  
Tela sonant humeris: haud illo signior ibat
- 150 Aeneas; tantum egregio decus enitet ore.  
Postquam altos ventum in montis atque invia lustra,  
Ecce ferae; saxi deiectae vertice, caprae  
Decurrere iugis; alia de parte patentis  
Transmittunt cursu campos atque agmina cervi

ad silvam corona claudendam.] 126. v. 1, 73.] 127. *Hic H. e.*, hic adierit (mecum) Hymen.] 128. *dolis ris.*, ut aliqua re gaudere, dolere. — *reperitis*, ab Iunone excogitatis.]] 129—172. *Dido et Aeneas una venatum profecti subita tempestate ab Iunone concitata oppressi veniunt in comitati in idem antrum ibique connubio iunguntur.*] 131. *rara* dicantur filis aut virgis ita raris (non condensatis) et inter se distantibus texta, ut crebra relinquuntur intervalla; cf. Ovid. Met. 12, 437. — *plagis*, quae crassiore filo et angustis erant maculis, validiores ferae capiebantur.] 132. *od. can. vis*, quorum vis inprimis in sagacitate spectatur; tractum hoc ex consuetudine Homeri, apud quem est *βῆν Πριάμοιο, βῆν Ἡρακλῆτη, μένος Ἀλκινόοιο*.] 138. in nodum collectus capillus, *κόρυμβος*, fascia vel retiole aureo continebatur.] 139. *fibula* cinguli scilicet; cf. 1, 492. 11, 776.] 142. *agm. iung.*, adiungit suum agmen agmini Didonis; cf. 2, 267. 11, 145.] 143. Hieme Patavis in Lycia exacta verno tempore Apollo Delum ad festorum sollemnitatem venit.] 146. Undique enim confluebant homines ad sacra Apollinis Delii celebranda. — Pompon. Mela 2, 1, 10 „Agathyrsi (Sarmatae) ora artusque pingunt iisdem omnes notis, et sic, ut abluī nequeant.“] 148. *Ang.*, componens. — *inpl. a.*, aureo diademate cingit.] 149 sq. tam alacri gressu et tam pulcher incedebat Aeneas. *Tela s. h.*, cf. Hom. 1, 46.] 152. *deiectae*, praec-



- 155 Pulverulenta fuga glomerant montisque relinquunt.  
 At puer Ascanius mediis in vallibus acri  
 Gaudet equo, iamque hos cursu, iam praeterit illos  
 Spumantemque dari pecora inter inertia votis  
 Optat aprum, aut fulvum descendere monte leonem.
- 160 Interea magno misceri murmure caelum  
 Incipit; insequitur commixta grandine nimbus;  
 Et Tyrii comites passim et Troiana iuventus  
 Dardaniusque nepos Veneris diversa per agros  
 Tecta metu petiere; ruunt de montibus amnes.
- 165 Speluncam Dido dux et Troianus eandem  
 Deveniunt. Prima et Tellus et pronuba Iuno  
 Dant signum; fulsere ignes et conscius aether  
 Connubiis, summoque ulularunt vertice Nymphae.  
 Ille dies primus leti primusque malorum
- 170 Causa fuit; neque enim specie famave movetur  
 Nec iam furtivum Dido meditatur amorem;  
 Coniugium vocat; hoc praetexit nomine culpam.  
 Extemplo Libyae magnas it Fama per urbes,  
 Fama, malum qua non aliud velocius ullum;
- 175 Mobilitate viget, virisque adquirit eundo;  
 Parva metu primo; mox sese attollit in auras,  
 Ingrediturque solo et caput inter nubila condit.  
 Illam Terra parens, ira inritata deorum,  
 Extremam, ut perhibent, Coeo Enceladoque sororem
- 180 Progenit, pedibus celerem et pernicipibus alis,  
 Monstrum horrendum, ingens, cui, quot sunt corpore plumae,  
 Tot vigiles oculi subter, mirabile dictu,  
 Tot linguae, totidem ora sonant, tot subrigit auris.  
 Nocte volat caeli medio terraeque per umbram,
- 185 Stridens, nec dulci declinat lumina somno;  
 Luce sedet custos aut summi culmine tecti,

capiti saltu delatae.] 155. *fuga gl.*, glomeratim fugiunt per campos. — in soluta oratione dices *montibus relictis*, cf. 2, 749.] 158. *dari*, offerri sibi.] 166 sqq. *Prima T.*, antiquissima deorum, Hes. Theog. 44. sq., quae, ut prima coniugio iuncta parensque omnium, et ipsa praesidebat nuptiis. — Dato signo fiunt ea, quae continentur verbis „*fulsere* ... *Nymphae*.“ — *fulsere ignes et aether*, i. e. aether fulsit ignibus. — *Ignes illi caelestes* sunt pro facibus, quae in nuptiis praeferebantur, laetus ululatus Nympharum pro hymenaeo. — *Connubiis*, tertius casus; Ovid. Met. 6, 588 „*nox conscia sacris*.“] 170. *specie non movetur*, oblita est decoris.]] 173—278. *Postquam ex rumore a Fama disperso rem comperit Iarbas vicinus regulus, unus e prociis Didonis*, vs. 36, *Iuppiter precibus eius auditis mittit Mercurium, qui Aeneam iubeat relictis Karthagine Italiam petere*.] 174 sqq. Alii quo. — Iuvabit comparare Ovid. Met. 12, 39 sqq.] 176. Principio (v. E. 6, 1) parva est metu, metuens scilicet, ne redarguatur.] 177. cf. Hom. Il. 4, 442 sq.] 178. *ira inr. d.*, irata diis propter Titanos in Tartarum coniectos et oppressos Gigantas. Coeus e Titanum, Enceladus ex Gigantum numero.] 181. v. G. 2, 441.] 186. *custos*, „speculatrix, ne quid eam

- Turribus aut altis, et magnas territat urbes,  
 Tam ficti pravique tenax, quam nuntia veri.  
 Haec tum multiplici populos sermone replebat  
 190 Gaudens et pariter facta atque infecta canebat:  
 Venisse Aenean, Troiano sanguine cretum,  
 Cui se pulchra viro dignetur iungere Dido;  
 Nunc hiemem inter se luxu, quam longa, fovere  
 Regnorum inmemores turpique cupidine captos.  
 195 Haec passim dea foeda virum diffundit in ora.  
 Protinus ad regem cursus detorquet Iarban,  
 Incenditque animum dictis atque aggerat iras.  
 Hic Hammone satus, rapta Garamantide Nympha,  
 Templa Iovi centum latis inmania regnis,  
 200 Centum aras posuit, vigilemque sacraverat ignem,  
 Excubias divom aeternas, pecudumque cruore  
 Pingue solum et variis florentia limina sertis.  
 Isque amens animi et rumore accensus amaro  
 Dicitur ante aras media inter numina divom  
 205 Multa Iovem manibus supplex orasse supinis:  
 Iuppiter omnipotens, cui nunc Maurusia pictis  
 Gens epulata toris Lenaeum libat honorem,  
 Aspicias haec? an te, genitor, cum fulmina torques,  
 Nequiquam horremus, caecique in nubibus ignes  
 210 Terrificant animos et inania murmura miscent?  
 Femina, quae nostris errans in finibus urbem  
 Exiguum pretio posuit, cui litus arandum  
 Cuique loci leges dedimus, connubia nostra  
 Reppulit ac dominum Aenean in regna recepit.

praetereat" Servius. — *tecti* ... *turribus*, hoc significat domos principum, illud domos civium; hoc spectat ad res publicas, illud ad privatas. | 193. cf. 8, 86. — *hiemem fovere* breviter dictum pro: fovere se, molliter se habere per hiemem. | 194. *Regnorum*, haec Karthaginis immemor, ille Italiae, cf. vs. 267. | 200 sq. *vig. i. Exc. d. aet.*, Donatus: „hoc est, qui semper necessariis nutrimentis fatus exstingui non posset proindeque excubias diis continuas exhiberet.“ — Ex consuetudine diceret *posuerat* ... *sacraverat*; sed *posuit* scripsit poeta, usus principali Tempore, quod verbis *templa centum posuit* res primaria continetur, ad quam inprimis attendere vult legentem. | 202. *solum* et *limina* sunt Nominativi, v. 1, 639. | 203. *mens* ea pars animi, in qua ratio et consilium consistit; quare est apud antiquiores poetas (Lucret. 3, 615. 6, 118. Catull. 65, 4) *mens animi*, quos imitatus Virgilius *amentem animi* eum dixit, qui est animi dolore iraque perturbati; et v. G. 4, 491. 2, 441. | 204. *int. numina d.*, inter praesentium deorum simulacra; v. 2, 178. | 206. *nunc*, postquam me auctore te (Iovem Hammoneem) colere instituerunt, cf. vs. 199 sq. | 207. *epulata*, quia post epulas libationes fiebant. | 209 sq. *caeci*, ut non feriant eos maxime, quos debent ferire; *inania*, ut non terream, quos debent, improbos. — ut mare, cum turbatur, *misceri* dicitur, sic *murmura* tonitruum, quia percusso turbatoque aere excitantur. | 212. *pretio* soluto, cf. 1, 367. — *litus*, terram puta infecundam et angustam. | 213. *leges*, ius, imperium. | 214. *in regna*, in societatem regni, cf. vs. 102 sq. et

- 215 Et nunc ille Paris cum semiviro comitatu,  
 Maeonia mentum mitra crinemque madentem  
 Subnixus, raptō potitur: nos munera templis  
 Quippe tuis ferimus, famamque fovemus inanem.  
 Talibus orantem dictis arasque tenentem
- 220 Audiit omnipotens, oculosque ad moenia torsit  
 Regia et oblitos famae melioris amantis.  
 Tum sic Mercurium adloquitur ac talia mandat:  
 Vade age, nate, voca Zephyros et labere pennis,  
 Dardaniumque ducem, Tyria Karthagine qui nunc
- 225 Exspectat, fatisque datas non respicit urbes,  
 Adloquere et celeris defer mea dicta per auras.  
 Non illum nobis genetrix pulcherrima talem  
 Promisit Graiumque ideo bis vindicat armis;  
 Sed fore, qui gravidam inperii belloque frementem
- 230 Italiam regeret, genus alto a sanguine Teucri  
 Proderet, ac totum sub leges mitteret orbem.  
 Si nulla accendit tantarum gloria rerum  
 Nec super ipse sua molitur laude laborem,  
 Ascanione pater Romanas invidet arces?
- 235 Quid struit? aut qua spe inimica in gente moratur,  
 Nec prolem Ausoniam et Lavinia respicit arva?  
 Naviget! haec summa est; hic nostri nuntius esto.  
 Dixerat. Ille patris magni parere parabat  
 Inperio; et primum pedibus talaria nectit,
- 240 Aurea, quae sublimem alis sive aequora supra  
 Seu terram rapido pariter cum flamine portant;  
 Tum virgam capit; hac animas ille evocat Orco

374.] 215—217. *ille P.*, molliculus et γυναιμαρής. — *semiviro*, propter vestitum cultumque Phrygium, qui mulieribus potius conveniens muliebrem etiam animum prodere videbatur Romano homini, cf. 9, 614—20. 12, 99 sq. — *Phryges* (quo nomine saepe Troiani appellantur a poetis) et, ut Servius tradit, *Maeones* s. *Lydi* utebantur mitra, i. e. pileo quodam incurvo, unde pendebant fasciae, quae subter mentum colligari solebant; itaque *mentum cr. m. Subn.* i. q. mitra subligatum habens mentum crinemque unguentis madentem; quidquid autem subligatam sibi habet aliquam rem, id subnixum ea re videri potest; alii *sub-nexus*. — *raptō*, uxore mihi praerepta.] 218. *quippe* locum habet in ironia. — *famam originis*, cf. vs. 198.] 219. precantes solebant aram manibus tangere, cf. 6, 124.] 223. *v. Zeph.*, qui te celeriter deferant, cf. 5, 607. — *pennis*, significantur talaria, calceamenta alata Mercurii.] 225. cf. 1, 258.] 228. *bis*, semel cum Diomede congressum, cf. Hom. Il. 5, 311 sqq., tum in excidio Troiae.] 229. *grav. inp.*, multos habituram populos potentes, quibuscum postea Romani de imperio certarunt, Latinos, Etruscos, Samnites, Campanos.] 231. *prod.*, propagaret. — *sub l. m. o.*, orbi victo leges imponeret, per posteros suos scilicet.] 232. si nulla est tantarum rerum gloria, quae animum accendat.] 235. *v. E.* 2, 53.] 236. cf. 6, 763 sqq.] 237. *hic n. n. o.*, haec nuntia meo nomine; et v. 2, 171.] 238 sqq. cf. Hom. Od. 5, 43 sqq. 24, 1 sqq.] 239. *et* ponitur interdum, ubi res aliqua universae significata (*parere parabat*) dividitur in suas partes, ut 3, 62 sqq.] 240. *alis*, v. vs. 223.] 242. *evoc. O.*, ut Protesilaum, et cf. Aesch. Pers. 682

- Pallentis, alias sub Tartara tristia mittit,  
 Dat somnos adimitque, et lumina morte resignat.
- 245 Illa fretus agit ventos et turbida tranat  
 Nubila; iamque volans apicem et latera ardua cernit  
 Atlantis duri, caelum qui vertice fulcit,  
 Atlantis, cinctum adsidue cui nubibus atris  
 Piniferum caput et vento pulsatur et imbri;
- 250 Nix humeros infusa tegit; tum flumina mento  
 Praecipitant senis, et glacie riget horrida barba.  
 Hic primum paribus nitens Cyllenius alis  
 Constitit; hinc toto praeceps se corpore ad undas  
 Misit, avi similis, quae circum litora, circum
- 255 Piscosos scopulos humilis volat aequora iuxta.  
 [Haud aliter terras inter caelumque volabat  
 Litus arenosum ad Libyae ventosque secabat  
 Materno veniens ab avo Cyllenia proles.]  
 Ut primum alatis tetigit magalia plantis,
- 260 Aenean fundantem arces ac tecta novantem  
 Conspicit. Atque illi stellatas iaspide fulva  
 Ensis erat, Tyrioque ardebat murice laena  
 Demissa ex humeris, dives quae munera Dido  
 Fecerat et tenui telas discreverat auro.
- 265 Continuo invadit: Tu nunc Karthaginis altae  
 Fundamenta locas, pulchramque uxorius urbem  
 Exstruis? heu regni rerumque oblite tuarum!  
 Ipse deum tibi me claro demittit Olympo  
 Regnator, caelum et terras qui numine torquet;
- 270 Ipse haec ferre iubet celeris mandata per auras:  
 Quid struis? aut qua spe Libycis teris otia terris?  
 Si te nulla movet tantarum gloria rerum  
 Nec super ipse tua moliris laude laborem,  
 Ascanium surgentem et spes heredis Iuli
- 275 Respice, cui regnum Italiae Romanaque tellus  
 Debentur. Tali Cyllenius ore locutus

sq. H. | 243. *Ἐρμῆς ψυχοκομπός.* | 244. *Dat somnos, ut προστάτης ἔπρου,*  
 cf. Hom. Od. 24, 2—4, eosdemque adimit, quodque plus est, resignat lumina  
 mortuis (*morte* ablativus temporis), i. e. aperit oculos morte clausos, s. revocat  
 mortuos in vitam. | 245. *Illā fretus,* illius ope *agit,* impellit, ut volatum suum  
 secundent. | 252. *par. alis,* expansis tantummodo, non commotis; quippe leni  
 titur volatu demittens se ad terram, prorsus ut aves sidere volentes. Iridi (9,  
 14) satis est ad volandum expandere tantum alas aequaliter. — *Cyllen.*, v. 8,  
 138 sq. | 253. *toto corp.*, omni libramento corporis. — 254. *avi, λαῖος* est apud  
 Hom. l. 1. | 261. *Atque* in re non exspectata, necopinata, mirationem faciente,  
 v. E. 7, 7. Plant. Capt. 3, 1, 19 sqq.: „Quo imus una ad prandium? atque illi  
 tacent... Ubi cenamus, inquam? atque illi abnuunt.“ | 264. v. 9, 489. | 265. v. G. 3,  
 163. | 268. *deum, qui casus?* | 269. *torquet,* versat. Cic. Acad. 2, 39 „terra circum  
 axem se summa celeritate convertit et *torquet.*“ cf. 9, 93. | 274. cf. 1, 267. | 276.

Mortalis visus medio sermone reliquit,  
Et procul in tenuem ex oculis evanuit auram.

- At vero Aeneas aspectu obmutuit amens,  
280 Arrectaeque horrore comae, et vox faucibus haesit.  
Ardet abire fuga dulcisque relinquere terras,  
Attonitus tanto monitu inperioque deorum.  
Heu quid agat? quo nunc reginam ambire furem  
Audeat adfatu? quae prima exordia sumat?  
285 Atque animum nunc huc celerem, nunc dividit illuc,  
In partisque rapit varias perque omnia versat.  
Haec alternanti potior sententia visa est:  
Mnesthea Sergestumque vocat fortemque Serestum,  
Classem aptent taciti sociosque ad litora cogant,  
290 Arma parent, et, quae rebus sit caussa novandis,  
Dissimulent; sese interea, quando optuma Dido  
Nesciat et tantos rumpi non speret amores,  
Temptaturum aditus, et quae mollissima fandi  
Tempora, quis rebus dexter modus. Ocius omnes  
295 Inperio laeti parent ac iussa facessunt.

- At regina dolos — quis fallere possit amantem? —  
Praesensit, motusque excepit prima futuros,  
Omnia tuta timens. Eadem impia Fama furenti  
Detulit armari classem cursumque parari.  
300 Saevit inops animi, totamque incensa per urbem  
Bacchatur, qualis commotis excita sacris

*tali ore, oratione, sic.* | 277. *medio*, v. 9, 657. || 279—392. *Aeneas parat discessum. Infelix Dido frustra primo ad preces, deinde ad iram vertitur.* | 282. *deorum*, Iovis, v. E. 3, 7. | 283. quibus verborum delentimentis circumveniat furem. | 285. diversa quoniam divisa sunt, non coniuncta; propterea ipsum animum diversa cogitantem *dividi* ait. Homerus: *διάνδιχα μεμνημένην*. — *celer.*, Cic. Tusc. 1, 19 „nulla est celeritas, quae possit cum animi celeritate contendere.“ | 387. *alternanti*, utrum iter iam decretum clam paret an palam, aperte rem enuntiet Didoni an per ambages quasdam eam aggrediatur. Ergo unum de duobus dumtaxat consiliis capiendum fuit. Cum autem, utrumcumque facturus erat Aeneas, ex variis efficiendi rationibus eligenda esset maxime idonea, propterea dicitur animum in varias partes rapuisse perque omnia versasse. Similiter 11, 550 omnia de multiplici via expediendae rei dictum. — Ceterum cf. Hom. II. 14, 23. | 293. *aditus* h. l. via aliqua apta ad conciliandum sibi placandumve aliquem; Cic. Off. 2, 9 „Sed est alius quoque quidam aditus ad multitudinem, ut in universorum animos tamquam influere possimus.“ — *mollis.*, temptaturum se, quando mollissime (cum minimo eius dolore) exponere ei possit suum de discessu consilium; iam cf. vs. 423 et Horat. Sat. 1, 9, 56 sqq.: „Difficiles aditus primos habet; ... tempora quaeram,“ *τοὺς καιροὺς τῶν προσαγορεύσεων* Lucian. Tom. I. p. 736 ed. Hemsterh. | 297. *motus futuros*, quid moturus, acturus, esset Aeneas; Liv. 1, 17 „Cum sensissent ea moveri (agi) Patres.“ | 298. *Omn. t. t.*, timeas etiam quae minime timenda erant. — *furenti* per prolepsin adiectum, nam eo nuntio fit, ut furat. 7, 626 „*spicula lucida* tergunt Arvina pingui;“ tergendum enim efficitur, ut fiant lucida; Aesch. Prom. 311 H. „*μεθάφροται τροπὸς νέους*“ et v. G. 2, 482. | 301—303. *orgia τριητηρία*, tertio quoque anno a Thebanis *noctu* (cf. vs. 490. 8, 465.

- Thyas, ubi audito stimulant trieterica Baccho  
 Orgia nocturnusque vocat clamore Cithaeron.  
 Tandem his Aenean compellat vocibus ultro:
- 305     Dissimulare etiam sperasti, perfide, tantum  
 Posse nefas, tacitusque mea decedere terra?  
 Nec te noster amor, nec te data dextera quondam,  
 Nec moritura tenet crudeli funere Dido?  
 Quin etiam hiberno moliris sidere classem,
- 310 Et mediis properas aquilonibus ire per altum,  
 Crudelis? Quid? si non arva aliena domosque  
 Ignotas peteres et Troia antiqua maneret,  
 Troia per undosum peteretur classibus aequor?  
 Mene fugis? Per ego has lacrimas dextramque tuam te —
- 315 Quando aliud mihi iam miserae nihil ipsa reliqui —  
 Per connubia nostra, per inceptos hymenaeos,  
 Si bene quid de te merui, fuit aut tibi quicquam  
 Dulce meum, miserere domus labentis et istam,  
 Oro, si quis adhuc precibus locus, exue mentem.
- 320 Te propter Libycae gentes Nomadumque tyranni  
 Odere, infensi Tyrii; te propter eundem  
 Exstinctus pudor et, qua sola sidera adibam,  
 Fama prior. Cui me moribundam deseris, hospes?  
 Hoc solum nomen quoniam de coniuge restat.
- 325 Quid moror? an mea Pygmalion dum moenia frater  
 Destruat, aut captam ducat Gaetulus Iarbas?  
 Saltem si qua mihi de te suscepta fuisset  
 Ante fugam suboles, si quis mihi parvulus aula  
 Luderet Aeneas, qui te tamen ore referret,
- 330 Non equidem omnino capta ac deserta viderer.  
       Dixerat. Ille Iovis monitis inmotus tenebat  
 Lumina, et obnixus curam sub corde premebat.  
 Tandem pauca refert: Ego te, quae plurima fando  
 Enumerare vales, numquam, Regina, negabo

G. 3, 538) in monte Cithaerone celebrata. — *commotis*: moveri sacra dicebantur, cum sollemnibus diebus aperiebantur templa Bacchi, cistae ac vasa proferebantur, cf. Horat. Od. 1, 18, 11—23; hoc erat initium caerimoniae; tum „audito Baccho“ (i. e. noto illo clamore io Bacche) turba Baccharum, cincta nebridibus, thyrsos quatiens et tundens palmis tympana ferebatur persultans in Cithaeronem. | 309. *moliris* de reficienda armandaque classe h. l. intelligendum, cf. vs. 53 et 289 et 3, 6. | 315. *nihil aliud*, nisi ut lacrimis et precibus te obtester. | 316. *connubia* h. l. fartivum indicant amorem et quasi praelusionem hymenaei, i. e. iusti coniugii mox ineundi, incepti igitur, nondum initi. | 318. *meum*, ὁ ἐναδὲς ὡς ἐμὸν. | 320. Festus: „Numidas dicimus, quos Graeci Νομάδας;“ et cf. Sallust. Iug. c. 18. Plin. N. H. 5, 3, 2. | 322. pudor et fama duae res non dissociabiles, Stat. Theb. 3, 273 „hoc fama pudorque relictus“ — *sid. ad.*, magna et clara habebat; cf. E. 5, 43. | 323. v. 2, 678. | 325. *Quid moror* mori; cf. vs. 323. | 327. *suscepta* in lucem, nata; Ovid. Ib. 409 „de Philopemene natus.“ | 329. *tamen*, v. E. 10, 31. | 330. *capta*, cf. E. 10, 31. | 333—335. *de me promeritam esse ea*,

- 335 Promeritam; nec me meminisse pigebit Elissae,  
 Dum memor ipse mei, dum spiritus hos regit artus.  
 Pro re pauca loquar. Neque ego hanc abscondere furto  
 Speravi, ne finge, fugam, nec coniugis umquam  
 Praetendi taedas aut haec in foedera veni.
- 340 Me si fata meis paterentur ducere vitam  
 Auspiciis et sponte mea componere curas,  
 Urbem Troianam primum dulcisque meorum  
 Reliquias colerem, Priami tecta alta manerent,  
 Et recidiva manu posuissem Pergama victis.
- 345 Sed nunc Italiam magnam Gryneus Apollo,  
 Italiam Lyciae iussere capessere sortes;  
 Hic amor, haec patria est. Si te Karthaginis arces,  
 Phoenissam, Libyaeque aspectus detinet urbis,  
 Quae tandem, Ausonia Teucros considerare terra,
- 350 Invidia est? Et nos fas extera quaerere regna.  
 Me patris Anchisae, quotiens humentibus umbris  
 Nox operit terras, quotiens astra ignea surgunt,  
 Admonet in somnis et turbida terret imago;  
 Me puer Ascanius capitisque iniuria cari,
- 355 Quem regno Hesperiae fraudo et fatalibus arvis.  
 Nunc etiam interpretes divom, Iove missus ab ipso —  
 Testor utrumque caput — celeris mandata per auras  
 Detulit; ipse deum manifesto in lumine vidi  
 Intrantem muros, vocemque his auribus hausi.
- 360 Desine meque tuis incendere teque querelis:  
 Italiam non sponte sequor.  
 Talia dicentem iamdudum aversa tuetur,

quae pl. f. En. vales. — *Elissa* alterum nomen Didonis.] 336. *spiritus*, vis vitalis, per omnes partes corporis fusa, *θυμός*, Hom. II. 12, 386 „λίπε δ' ὅστέα θυμός," 22, 68 „ῥέθειάων ἐκ θυμὸν ἐλέσθαι" Tac. Ann. 15, 70 „Ann. Lucanus, profuente sanguine, ubi frigesce pedes manusque et paulatim ab extremis cedere spiritum, servido adhuc et compote mentis pectore, intelligit" *cf.* ibid. 16, 34 „de natura animae et dissociatione spiritus corporisque inquirebat." Ovid. Tr. 1, 5, 11 „Spiritus in tepido deseret ossa rogo." Et *ψυχή* apud Homerum, alias ἀμειβομένη ἔρκος ὀδόντων in morte, κατ' οὐταμένην ὠτειλήν ἔσσιν' ἐπειγομένη II. 14, 518. Denique *cf.* 6, 726 sq.] 337. *Pro re*, pro causa mea; Sall. Iug. 102, 12 „Pauca pro delicto suo verba facit." 338 sq. numquam coniugis taedas (taedas iugales s. faces nuptiales, quae novae nuptae praeferebantur, v. E. 8, 29), i. e. iustas nuptias prae me tuli, sive coniugio iunctas tibi videri volui. — *aut h. i. f. v.*, nec talem ego petii coniunctionem.] 340. *meis Auspiciis*, meo quasi ductu, mea voluntate; v. vs. 102.] 342 sq. *primum*, v. 3, 437. — *reliquias meorum*, i. e. reliquias eorum, quae mei tenuerunt, eversam scilicet patriam colerem (ἐπεμελούμην αὖν) reficiendamque curarem. — *manerent*, sc. restituta a me.] 345. *Gryn. A.*, v. E. 6, 72.] 346. *Lyciae*, v. vs. 143.] 357. *utrumque*, meum ac tuum.] 358. *man. in lum.*, ἐναγῶς, *cf.* 3, 151.] 361. *non sponte* cave putes esse id quod *invitus*! 362—64. Responsum Aeneae sedatum, grave ac tale, quale minime expectaverat Dido, incendit eam ira, eaque primo signis spei frustratae convenientibus se prodit.] 362. *aversa t.*, obliquis ac

- Huc illuc volvens oculos, totumque pererrat  
 Luminibus tacitis, et sic accensa profatur:
- 365 Nec tibi diva parens, generis nec Dardanus auctor,  
 Perfide; sed duris genuit te cautibus horrens  
 Caucasus, Hyrcanaeque admorunt ubera tigres.  
 Nam quid dissimulo? aut quae me ad maiora reservo?  
 Num fletu ingemuit nostro? num lumina flexit?
- 370 Num lacrimas victus dedit, aut miseratus amantem est?  
 Quae quibus anteferam? Iam iam nec maxuma Iuno,  
 Nec Saturnius haec oculis pater aspicit aequis.  
 Nusquam tuta fides. Eiectum litore, egentem  
 Excepi et regni demens in parte locavi;
- 375 Amissam classem, socios a morte reduxi.  
 Heu furiis incensa feror! Nunc augur Apollo,  
 Nunc Lyciae sortes, nunc et Iove missus ab ipso  
 Interpres divom fert horrida iussa per auras.  
 Scilicet is Superis labor est, ea cura quietos
- 380 Sollicitat. Neque te teneo, neque dicta refello;  
 I, sequere Italiam ventis, pete regna per undas.  
 Spero equidem mediis, si quid pia numina possunt,  
 Supplicia hausurum scopulis, et nomine Dido  
 Saepe vocaturum. Sequar atris ignibus absens,
- 385 Et, cum frigida mors anima seduxerit artus,  
 Omnibus umbra locis adero. Dabis, inprobe, poenas.  
 Audiam, et haec Manis veniet mihi fama sub imos.  
 His medium dictis sermonem abrumpit, et auras  
 Aegra fugit, seque ex oculis avertit et aufert,
- 390 Linquens multa metu cunctantem et multa parantem

torvis oculis; expressit his verbis poeta Homericum illud ὑπόδρα ἰδών. | 364. *L. tac.*, ipsa tacet quasi attonita fandique nondum potens. | 365 sqq. cf. Hom. II. 16, 33 sqq. | 368. quid dissimulo, quod sentio? (quid autem sentiat, prolocuta est vs. 365—67) aut quae restat maior iniuria, quam, si haec dissimulem, cavere possim? | 369. avertit ab eo, qui sibi iam alienior factus esset, sermonem, *ingemuit* dicens, non *ingemuisti*. — *fletu*, v. E. 5, 29. — Ceterum hic versus et proximus spectant ad illud „*quid dissimulo*,” causamque dissimulandi nullam esse ostendunt. | 371. *Quae q. a.*, quibus rebus tamquam durioribus quas tamquam leniores praeferam? hoc dici solet, ubi omnia et paria et magna sunt. Et refert haec *Quae quib. antef.* ad illud (vs. 368) quae me ad maiora reservo? — *Iam iam n. m. I. cet.*: eo perventum est, ut iam dii desierint „oculis mortalia iustis adspicere,” ut est ap. Ovid. M. 13, 70. | 373. *Nusquam* „nec apud deum, nec apud hominem” Servius. — *litore*, in litore, uti est apud Ovid. Met. 13, 536. Caes. B. G. 5, 10, pro eo, quod vulgo dicitur *in litus*. | 375. Convenit hoc perturbato Didonis animo, sententias cognatas ita efferre, ut Verbum ad priorem pertinens, *servavi*, supprimat; similiter comparata sunt, quae vs. 376—378 leguntur. | 376. *feror* de ea, quae se totam permittit furori. | 379. v. 2, 171. | 380. *ventis ... undas*, cf. 5, 848—851. | 382. *pia*, v. 2, 536. | 384. *Sequ. atr. ign. abs.*, tamquam aliqua Furia, persequens nocentem facesque intentans, absens absentem Aeneam (imagine scilicet proditae Didonis ubique se animo eius obtrudente) ex cruciatura est. — *atris*, v. G. 2, 309. | 388. *med.*, v. 9, 657. — *auras*, lucem, in thalamum scilicet se receptura. | 390. *metu*, ne dolorem et iram



Dicere. Suscipiunt famulae, conlapsaque membra  
Marmoreo referunt thalamo stratisque reponunt.

- At pius Aeneas, quamquam lenire dolentem  
Solando cupit et dictis avertere curas,  
395 Multa gemens magnoque animum labefactus amore,  
Iussa tamen divom exsequitur, classemque revisit.  
Tum vero Teucri incumbunt et litore celsas  
Deducunt toto navis. Natat uncta carina,  
Frondentisque ferunt remos et robora silvis  
400 Infabricata, fugae studio.  
Migrantis cernas, totaque ex urbe ruentis.  
Ac velut ingentem formicae farris acervum  
Cum populant, hiemis memores, tectoque reponunt;  
It nigrum campis agmen, praedamque per herbas  
405 Convectant calle angusto; pars grandia trudunt  
Obnixae frumenta humeris; pars agmina cogunt  
Castigantque moras; opere omnis semita fervet.  
Quis tibi tum, Dido, cernenti talia sensus!  
Quosve dabas gemitus, cum litora fervere late  
410 Prospiceres arce ex summa, totumque videres  
Misceri ante oculos tantis clamoribus aequor!  
Inprobe Amor, quid non mortalia pectora cogis!  
Ire iterum in lacrimas, iterum temptare precando  
Cogitur, et supplex animos submittere Amori,  
415 Ne quid inexpertum frustra moritura relinquat.  
Anna, vides toto properari litore? circum  
Undique convenere; vocat iam carbasus auras,  
Puppibus et laeti nautae inposuere coronas.  
Hunc ego si potui tantum sperare dolorem,  
420 Et perferre, soror, potero. Miserae hoc tamen unum  
Exsequere, Anna, mihi; solam nam perfidus ille  
Te colere, arcanos etiam tibi credere sensus;  
Sola viri mollis aditus et tempora noras:

Didonis se purgando augetur. || 393—473. *Relicta Karthagine Aeneas redit ad classem, cumque iam in eo est ut solvat ex portu, Dido, ultimam spem experiens, Annam sororem mittit, quae saltem dilationem aliquam profectionis ab Aenea petat. Frustra. Tum Dido, etiam visis monitisque horrificis exterrita, decrevit mori.* | 399. v. 1, 184 et 552. | 400. *abire festinantes, fugae studio, petunt materiem ex silvis, cum navalia non haberent, unde sumerent praeparatam.* | 402. v. 1, 148. | 405. *trudunt, quae portare non possunt.* | 407. *ferret, „concelebratur“ ait Servius ad 1, 436; translatus hoc verbum ab aqua bulliente, quae omnis multo motu agitur atque inter se miscetur, vel ad opera sedulae turbae, ut G. 4, 169 et cf. 9, 693, vel ad locum talis operis plenum, ut hic, vs. 409. 567 et 8, 677.* | 411. v. 2, 487. | 414. *animos, altos ac superbos spiritus.* | 415. *Ne quid inexp. relinquat frustra, i. e. sine iusta causa, moriendi consilium cepit.* | 417. *vocat, exspectat et quasi optat, v. 3, 61.* | 418. *laeti,* v. 1, 35 et cf. G. 1, 304. | 419. v. 1, 543. | 422. v. G. 1, 200. | 423. v. vs.

- I, soror, atque hostem supplex adfare superbum:  
 425 Non ego cum Danais Troianam excindere gentem  
 Aulide iuravi, classemve ad Pergama misi,  
 Nec patris Anchisae cinerem Manisve revelli:  
 Cur mea dicta negat duras demittere in auris?  
 Quo ruit? extremum hoc miserae det munus amanti:  
 430 Exspectet facilemque fugam ventosque ferentis.  
 Non iam coniugium antiquum, quod prodidit, oro,  
 Nec pulchro ut Latio careat regnumque relinquat;  
 Tempus inane peto, requiem spatiumque furori,  
 Dum mea me victam doceat fortuna dolere.  
 435 Extremam hanc oro veniam — miserere sororis —;  
 Quam mihi cum dederis, cumulatam morte remittam.  
 Talibus orabat, talisque miserrima fletus  
 Fertque refertque soror. Sed nullis ille movetur  
 Fletibus, aut voces ullas tractabilis audit;  
 440 Fata obstant, placidasque viri deus obstruit auris.  
 Ac velut annoso validam cum robore quercum  
 Alpini Boreae nunc hinc nunc flatibus illinc  
 Eruere inter se certant; it stridor, et altae  
 Consternunt terram concusso stipite frondes;  
 445 Ipsa haeret scopulis, et, quantum vertice ad auras  
 Aetherias, tantum radice in Tartara tendit:  
 Haud secus adsiduis hinc atque hinc vocibus heros  
 Tunditur, et magno persentit pectore curas;  
 Mens innotata manet; lacrimae volvuntur inanes.  
 450 Tum vero infelix fatis exterrita Dido  
 Mortem orat; taedet caeli convexa tueri.  
 Quo magis inceptum peragat lucemque relinquat,  
 Vidit, turicremis cum dona inponeret aris —  
 Horrendum dictu — latices nigrescere sacros  
 455 Fusaque in obscenum se vertere vina cruorem.

293.] 424. *hostem*, quia laesa est Dido ab eo; *superbum*, quia precibus eius non cesserat.] 427. proprie dicuntur sepulcra revelli, eaque re violantur Manes.] 428. *dicta*, preces.] 434. *dolere*, omisso furore (s. *victam*) ad dolorem, leniorem affectum, descendere; cf. Ovid. Heroid. 7, 177—180.] 436. *cumulatam remittam*, quod mihi gratum feceris, remunerabor ita, ut plus feras a me, quam ego a te accepero. — *morte*, cum moriar. — Nota sunt inofficiosa testamenta; igitur haud scio an haec oratio pertineat ad gratam officiosamque pietatem per testamentum probandam. Quae interpretatio si cui visa erit a nostris sensibus abhorrire, is velim meminerit non potuisse mentione talis rei animum Annae offendi, quia ex more Romano, quem sequi videtur poeta, fratres, sorores, alii propinqui, sperare et debebant et consueverant se non praeteritum iri a testatore.] 438. *Fertq. refertq.*, iterum iterumque fert; cf. vs. 447.] 441. *robore*, trunco.] 449. lacrimas fundit Aeneas, ut causae Didonis nihil profuturas, ita tamen mitem ac misericordem animum testificantes.] 450. *fatis ext.*, agnoscens fata sua perterretur.] 451. Soph. Ai. 840 „ὦ Θάνατε, Θάνατε, νῦν μ' ἐπιλαχέψαι μοιῶν!“] 452. Quo magis inceptum peragat, eo impellitur, quod vidit cet.] 455. *obscenum*, v.

- Hoc visum nulli, non ipsi effata sorori.  
 Praeterea fuit in tectis de marmore templum  
 Coniugis antiqui, miro quod honore colebat,  
 Velleribus niveis et festa fronde revinctum;  
 460 Hinc exaudiri voces et verba vocantis  
 Visa viri, nox cum terras obscura teneret;  
 Solaque culminibus ferali carmine bubo  
 Saepe queri et longas in fletum ducere voces;  
 Multaque praeterea vatum praedicta piorum  
 465 Terribili monitu horrificant. Agit ipse furemtem  
 In somnis ferus Aeneas; semperque relinqui  
 Sola sibi, semper longam incommitata videtur  
 Ire viam et Tyrios deserta quaerere terra.  
 Eumenidum veluti demens videt agmina Pentheus,  
 470 Et solem geminum et duplicis se ostendere Thebas;  
 Aut Agamemnonius scaenis agitatus Orestes  
 Armata facibus matrem et serpentibus atris  
 Cum fugit, ultricesque sedent in limine Dirae.  
 Ergo ubi concepit furias evicta dolore  
 475 Decrevitque mori, tempus secum ipsa modumque  
 Exigit, et, maestam dictis adgressa sororem,  
 Consilium voltu tegit, ac spem fronte serenat:  
 Inveni, germana, viam, — gratare sorori —  
 Quae mihi reddat eum, vel eo me solvat amantem.  
 480 Oceani finem iuxta solemque cadentem  
 Ultimus Aethiopum locus est, ubi maxumus Atlas  
 Axem humero torquet stellis ardentibus aptum:  
 Hinc mihi Massylae gentis monstrata sacerdos,  
 Hesperidum templi custos; epulasque draconi  
 485 Quae dabat et sacros servabat in arbore ramos,  
 Spargens humida mella soporiferumque papaver.

G. 1, 470. | 457. *templ. coni. ant.*, sacellum Manibus Sychaei dicatum. | 459. *Vell. niv.*, vittis laneis. | 462. *bubo*, cf. Ovid. Met. 10, 453. | 464. „pii vates et Phoebus digna locuti,” 6, 662. | 470. cf. Eurip. Bacch. 876 sq. | 471. *scaenis*, fabulis scenicarum pactarum; tragici enim in fabulis suis Orestem agitari faciunt; fuit autem hoc multarum tragoediarum argumentum. | 473. Servius: „A Pacuvio Orestes inducitur propter vitandas Furias Pyladis admonitu ingressus Apollinis templum; unde cum vellet exire, invadebatur a Furiis; hinc ergo est: *Sedent in limine Dirae*.” || 474—583. *Dido celans sororem, quod meditabatur, exstructa in impluvio pyra sacrum magicum parat. Nocte acrius stimulaturs cura, amore, ira. Denique subducta ratione revertitur ad consilium moriendi. Interea Aeneas exterritus insomniis cum classe in altum evahitur.* | 477. *spem fr.*, laetam spem in fronte ostendit. | 482. Axem, caelum, torquentem se et vertentem sustinet. — *aptum*, instructum; Ennius apud Cic. Off. 3, 29 „O Fides alma, *apta pennis*.” Hinc *aptare*, i. q. instruere, ut 3, 472. 8, 80. | 484. Ex vulgari consuetudine diceret: quae custos erat templi et draconi dabat epulas. Laron is draco dictus, cf. Apoll. Rh. 4, 1396. Hes. Theog. 333. | 486. *draconem hume tantae feritatis fuisse putabimus, ut vel custodi illi terribilis esset; dabat*

- Haec se carminibus promittit solvere mentes,  
 Quas velit, ast aliis duras inmittere curas;  
 Sistere aquam fluviis, et vertere sidera retro;  
 490 Nocturnosque movet Manis; mugire videbis  
 Sub pedibus terram, et descendere montibus ornos.  
 Testor, cara, deos et te, germana, tuumque  
 Dulce caput, magicas invitam accingier artis.  
 Tu secreta pyram tecto interiore sub auras  
 495 Erige, et arma viri, thalamo quae fixa reliquit  
 Impius, exuviasque omnis, lectumque iugalem,  
 Quo perii, superinponant: abolere nefandi  
 Cuncta viri monumenta iuvat monstratque sacerdos.  
 Haec effata silet; pallor simul occupat ora.  
 500 Non tamen Anna novis praetexere funera sacris  
 Germanam credit, nec tantos mente furores  
 Concipit, aut graviora timet, quam morte Sychaei.  
 Ergo iussa parat.  
 At regina, pyra penetrali in sede sub auras  
 505 Erecta ingenti taedis atque ilice secta,  
 Intenditque locum sertis et fronde coronat  
 Funerea; super exuvias ensemque relictum  
 Effigiemque toro locat, haud ignara futuri.  
 Stant arae circum, et crinis effusa sacerdos  
 510 Ter centum tonat ore deos, Erebumque Chaosque  
 Tergeminamque Hecaten, tria virginis ora Dianae.

igitur ei papaver, non quo sopiretur, sed quo mitigaretur. | 487. *solvere*, curis s. amore. | 489. cf. Apoll. Rhod. 3, 532 sq. | 490. *Noct.*, v. vs. 303. — *movet*, evocat. — *mugire videbis*, ut Aesch. Sept. ad Th. 100 „*κῦνον δ' ἔδοξα*.“ | 492 sq. Causam huius excusationis aperit Servius: „Cum multa sacra susceperant Romani, magica semper damnarunt.“ | 494. *secreta* pro Adverbio *secreto*; nempe quod ad Verbum erat referendum, refertur ad Nomen; cf. 5, 387. 7, 404. 11, 864. — *tecto interiore* (*medio tecti* 7, 59), eo loco ab ipsis aedibus circumcluso, qui impluvium dicitur Romanis. | 496. *exuvias*, cf. vs. 648 et 651 et v. E. 8, 91. | 500. et *praetexere alicui rei aliquid* dicitur et *praet. aliquid aliqua re*, multaque similiter, ut vs. 506. 5, 536. 6, 229. G. 3, 399 eodemque modo *excussa magistro navis* infra 6, 353. | 502. *aut*, v. 2, 779. — *quam* quae acciderant *morte S.*: et significatur gravissimus ille luctus Didonis, qui mortem Sychaei consecutus erat. | 504. cf. vs. 494. | 507. *Fun.*, cupressina. | 508. *Effigiem* Aeneae, quia, ut ait Servius, solent magi effigies eorum (absentium scilicet) facere, propter quos sacrum instituunt; v. E. 8, 73. Solebant eae effigies vel laneae esse vel cereae. | 510. *Ter centum*, multos, plurimos, ut 8, 716. numerus et ternarius et centenarius (v. G. 3, 18) sollemnis in re sacra; itaque apud Liv. 22, 8 „ludi magni voti aeris trecentis triginta tribus millibus, trecentis triginta tribus triente.“ — *tonat*, magna voce invocat. — *Chaos* infinitum, quod erat antequam quicquam creatum esset, spatium; tum ingens vastusque Orcus, Ovid. Met. 10, 30. Chaos in causa ad inferos spectante invocatur ab ipso Virgilio 6, 265. E Chao natus Erebus. | 511. Diana triceps est eadem, quae Hecate; duobus igitur nominibus h. l. eadem dea significatur, sed ita, ut vires et potestates eius diversae declararentur. Servius: „Cum super terras est, creditur esse Luna,

- Sparserat et latices simulatos fontis Averni,  
 Falcibus et messae ad lunam quaeruntur aenis  
 Pubentes herbae nigri cum lacte veneni;  
 515 Quaeritur et nascentis equi de fronte revolsus  
 Et matri praereptus amor.  
 Ipsa mola manibusque piis altaria iuxta,  
 Unum exuta pedem vinclis, in veste recincta,  
 Testatur moritura deos et conscia fati  
 520 Sidera; tum, si quod non aequo foedere amantis  
 Carae numen habet iustumque memorque, precatur.  
 Nox erat, et placidum carpebant fessa soporem  
 Corpora per terras, silvaeque et saeva quierant  
 Aequora; cum medio volvuntur sidera lapsu,  
 525 Cum tacet omnis ager, pecudes pictaeque volucres,  
 Quaeque laeus late liquidos, quaeque aspera dumis  
 Rura tenent, somno positae sub nocte silenti(:)  
 [Lenibant curas et corda oblita laborum:]  
 At non infelix animi Phoenissa, nec umquam  
 530 Solvitur in somnos, oculisque aut pectore noctem  
 Accipit: ingeminant curae, rursusque resurgens  
 Saevit amor, magnoque irarum fluctuat aestu.  
 Sic adeo insistit, secumque ita corde volutat:  
 En, quid ago? rursusne procos inrisa priores  
 535 Experiar, Nomadamque petam connubia supplex,  
 Quos ego sim totiens iam dedignata maritos?  
 Iliacas igitur classis atque ultima Teucrum

cum in terris, Diana, cum sub terris, Proserpina.“| 512. *simulatos*, Servius „in sacris quae exhiberi non poterant, simulabantur et erant pro veris. Et per Avernum, descensus est ad inferos.“| 514. *Pubent.*, adultas succique plenas. — *herbae* cum l. v., i. e. herbae venenatae. — *nigra*, ut *atra*, v. G. 1, 129. | 515 sq. significatur hippomanes, caruncula in fronte nascentis equi, quam equa mater post partum devorare credebatur. — *amor*, h. e. quod amorem conciliat, philtrum. | 517. *Ipsa*, Dido. — *mola* ... *Testatur*, mola (farre tosto molitoque et sale) in ignem coniecta et manibus sublatis, v. G. 4, 82. — *piis*, castis, puris, cf. 2, 719. Tibull. 1, 3, 25. | 518. *vinclis*, calceo; et v. 3, 595. Servius „In sacris nihil solet esse praeligatum, praecipue eius, quae amore vult solvi.“ v. 3, 370 et cf. Ovid. Met. 7, 182 sq. | 519. cf. 9, 429. | 520. *non aeq. f. a.*, quorum amori non respondet amor mutuus. | 523. *quierant*, coeperant quiescere, ut 7, 6. | 527. *s. pos.*, compositae ad somnum capiendum, v. G. 4, 432. | 529. *At non Phoenissa* quiescit. Ceterum v. G. 4, 491. | 530. *noctem*, quietem nocturnam. | 531. *ing. cur.*, v. 1, 662. | 533. Particula *adeo* vim addit vocabulis, quibus adiecta est, maxime Pronominibus, ut *tu*, *hic*, *ille*, *ipse*, tum Adverbii temporis, ut *nunc*, *iam*, *tunc*, etiam loci (*hinc* E. 9, 59), porro Nominibus numeralibus cognatisque Adiectivis *multus* et *omnis*, denique huic ipsi particulae *sic*, licetque fere interpretari *eben*, *gerade*. Dum igitur animus Didonis iactatur cura, amore, ira, invenit denique, quibus adeo cogitationibus propositisque insistat, i. e. in quibus ipsis perseveret. | 534. *En, quid ago?* reprehendit Dido ipsa varios istos motus animi, commemoratos vs. 531 sq. cf. vs. 595. — *inrisa* ob id ipsum, quod eorum, quos spreverat praelato Aenea, iam ultro appetat matrimonium. | 537. *ultima i.*, quibus nihil potest gravius esse (ut *ultima poena*), qualibus utuntur domini in

- Iussa sequar? quiane auxilio iuvat ante levatos,  
 Et bene apud memores veteris stat gratia facti?  
 540 Quis me autem, fac velle, sinet, ratibusve superbis  
 Invisam accipiet? nescis heu, perdita, necdum  
 • Laomedontae sentis periuria gentis?  
 Quid tum? sola fuga nautas comitabor ovariantis?  
 An Tyriis omnique manu stipata meorum  
 545 Inferar, et, quos Sidonia vix urbe revelli,  
 Rursus agam pelago, et ventis dare vela iubebo?  
 Quin morere, ut merita es, ferroque averte dolorem.  
 Tu lacrimis evicta meis, tu prima furentem  
 His, germana, malis oneras atque obicis hosti.  
 550 Non licuit thalami expertem sine crimine vitam  
 Degere, more ferae, talis nec tangere curas!  
 Non servata fides cineri promissa Sychaeo!  
 Tantos illa suo rumpebat pectore questus.  
 Aeneas celsa in puppi, iam certus eundi,  
 555 Carpebat somnos rebus iam rite paratis.  
 Huic se forma dei vultu redeuntis eodem  
 Obtulit in somnis, rursusque ita visa monere est,  
 Omnia Mercurio similis, vocemque coloremque  
 Et crinis flavos et membra decora iuventa:  
 560 Nate dea, potes hoc sub casu ducere somnos,  
 Nec, quae te circum stent deinde pericula, cernis?  
 Demens! nec Zephyros audis spirare secundos?  
 Illa dolos dirumque nefas in pectore versat,  
 Certa mori, varioque irarum fluctuat aestu.  
 565 Non fugis hinc praeceps, dum praecipitare potestas?  
 Iam mare turbare trabibus saevasque videbis  
 Conlucere faces, iam fervere litora flammis,  
 Si te his attigerit terris Aurora morantem.  
 Heia age, rumpe moras. Varium et mutabile semper  
 570 Femina. Sic fatus nocti se inmiscuit atrae.  
 Tum vero Aeneas, subitis exterritus umbris,

servos, cf. vs. 326.] 541. invisus nobis esse coepit, cui provocati beneficiis malefecimus.] 542. v. G. 1, 502.] 545. *Inf.*, cf. 11, 742.] 548. *lacrimis*, cf. vs. 30. — *prima malis oneras*, tu es horum malorum *causa*: nam *primus* saepe refertur ad causas auctoresque rerum; cf. vs. 31 sqq. Flebile hoc inprimis, quod soror optima atque carissima causa harum rerum exstitit, quas scilicet dissuadendo avertere poterat.] 551. *more ferae*, solitariam scilicet, non socialem vitam degere. Quintil. 9, 2, 64 „Quamquam de matrimonio queritur Dido, tamen hic erupit eius affectus, ut sine thalamis vitam non hominum putet, sed ferarum.“] 552. Alii *Sychaei*. — Ceterum v. 6, 346.] 559. Alii *iuventas*.] 561. *deinde*, ex eo casu s. postquam res ita ceciderunt, v. 12, 889.] 566. *Iam*, v. 8, 42. — *trabibus*, ut 3, 191. Ovid. Ep. ex Pont. 1, 3, 76. — *turbare*, cf. 8, 689 sq.] 567. *faces*, quibus naves tuae incenduntur, cf. vs. 594. — *fervere*, v. vs. 407. — Ergo et e navibus et e litore iaculabuntur ignes.] 569. v. E. 3, 80.] 571.

- Corripit e somno corpus sociosque fatigat:  
 Praecipites vigilate, viri, et considite transtris;  
 Solvite vela citi. Deus aethere missus ab alto  
 575 Festinare fugam tortosque incidere funis  
 Ecce iterum stimulat. Sequimur te, sancte deorum,  
 Quisquis es, inperioque iterum paremus ovantes.  
 Adsis o placidusque iuves, et sidera caelo  
 Dextra feras. Dixit, vaginaque eripit ensem  
 580 Fulmineum, strictoque ferit retinacula ferro.  
 Idem omnis simul ardor habet, rapiuntque ruuntque;  
 Litora deseruere; latet sub classibus aequor;  
 Adnixi torquent spumas et caerula verrunt.  
 Et iam prima novo spargebat lumine terras  
 585 Tithoni croceum linquens Aurora cubile.  
 Regina e speculis ut primum albescere lucem  
 Vidit e aequatis classem procedere velis,  
 Litoraue et vacuos sensit sine remige portus,  
 Terque quaterque manu pectus percussa decorum  
 590 Flaventisque abscissa comas, Pro Iuppiter! ibit  
 Hic, ait, et nostris inluserit advena regnis?  
 Non arma expedient totaque ex urbe sequentur,  
 Deripientque rates alii navalibus? Ite,  
 Ferte citi flammās, date tela, inpellite remos! —  
 595 Quid loquor? aut ubi sum? quae mentem insania mutat?  
 Infelix Dido! nunc te facta impia tangunt?  
 Tum decuit, cum sceptrā dabas. — En dextra fidesque,  
 Quem secum patrios aiunt portare Penatis,

umbra, viso nocturno.] 572. *fatigat*, urget hortando.] 573. *Praecipites*: quid praecipiter fieri velit Aeneas, declaratur verbis subiectis *et considite transtris*. Magna hic vis in hyperbato. Similia habet Theocr. buc. 28, 6 „ὅπως ξείνον ἔμον τέρωσι“ ἰδὼν κἀντιφιλήσομαι Νικίαν.“ et epigr. 19, 1 „Ἀρχίλοχον καὶ στάθι καὶ εἰσιδε τὸν πάλαι ποιητάν.“ Xenoph. Hell. 7, 3, 7 „ὕμεις τοὺς περὶ Ἀρχίαν οὐ ψῆφον ἀνεμείνατε, ἀλλὰ ἐτιμωρήσασθε.“] 575. v. G. 1, 457.] 576. *sancte deorum*, ut apud Ennium *sancta deorum*, *δια δαίων*.] 577. De certo nomine deorum, quorum opem implorabant, dubitantes Romani dicere solebant: Quisquis es.] 578. *sidera* regere tempestatem credebantur; fac, ut sidera sint navigantibus nobis propitia.] 581. *rapiunt*, nos: *rasch greifen sie zu*; cum rapida festinatione manus admovent ad omnia, quae pertinent ad naves solvendas promovendasque.] 583. Servius: „Ita remus agitur, ut fluctus torqueatur.“] 584—705. *Didonis abeuntem classem prospicientis ultimus furor, diras execrationes, mors*.] 584. Hom. Od. 5, 1.] 586. *e spec.*, ex edita aedium parte.] 587. *aequatis velis*, omnes naves utebantur pari velificatione, quo apparebat communiter eas abire eodemque omnes ferri.] 588. *vacuos sine rem.*, ut Hom. Il. 21, 50 „γυμνὸν ἄτερ κόρυθός τε καὶ ἀσπίδος.“ — *sens.*, cf. vs. 408.] 590 sq. v. 2, 578. — *regnis nostris*, mihi reginae.] 594. *date tela*, nostrum *Waffen herbei!* cf. 9, 37. Alii *vela*.] 595. *ubi sum?* Terent. Heaut. 5, 1, 48 „Prae iracundia non sum apud me.“] 596. *facta imp.*, perfidia, qua scilicet omne genus Troianum infame fuit, cf. vs. 542.] 597. Tum, cum Aeneae fidei me meaque credebam, suspectam eam haberi oportuit. — *fides-*

- Quem subiisse humeris confectum aetate parentem!
- 600 Non potui abreptum divellere corpus et undis  
 Spargere? non sociis, non ipsum absumere ferro  
 Ascanium patriisque epulandum ponere mensis? —  
 Verum anceps pugnae fuerat fortuna. — Fuisset:  
 Quem metui moritura? Faces in castra tulissem,
- 605 Inplessemque foros flammis, natumque patremque  
 Cum genere extinxem, memet super ipsa dedissem. —  
 Sol, qui terrarum flammis opera omnia lustras,  
 Tuque harum interpretis curarum et conscia Iuno,  
 Nocturnisque Hecate triviis ululata per urbes,
- 610 Et Dirae ultrices, et di morientis Elissae,  
 Accipite haec, meritumque malis advertite numen,  
 Et nostras audite preces. Si tangere portus  
 Infandum caput ac terris adnare necesse est,  
 Et sic fata Iovis poscunt, hic terminus haeret:
- 615 At bello audacis populi vexatus et armis,  
 Finibus extorris, complexu avolsus Iuli,  
 Auxilium inploret, videatque indigna suorum  
 Funera; nec, cum se sub leges pacis iniquae  
 Tradiderit, regno aut optata luce fruatur,
- 620 Sed cadat ante diem mediaque inhumatus arena.  
 Haec precor, hanc vocem extremam cum sanguine fundo.  
 Tum vos, o Tyrii, stirpem et genus omne futurum  
 Exercete odiis, cinerique haec mittite nostro  
 Munera. Nullus amor populis nec foedera sunt.
- 625 Exoriare aliquis nostris ex ossibus ultor,  
 Qui face Dardanios ferroque sequare colonos,  
 Nunc, olim, quocumque dabunt se tempore vires.  
 Litora litoribus contraria, fluctibus undas  
 Inprecor, arma armis; pugnent ipsique nepotesque.

que eius, Quem *cet.* v. E. 2, 71. | 600. *abreptum*, vi abductum. — cf. 3, 605 et v. E. 2, 30. | 603. *fuisset*, licebat esse ancipitem, s. nihil id curassem. | 604. *castra*, nautica, naves. | 606. *cum genere*, ut nihil ex eo genere reliquum esset. — *dedissem*, coniecissem, in flammis; nam „Quem metui moritura?“ vs. 604. | 607. Hom. II. 3, 277. Deo Soli commendantur puniendi, qui nefarie fecerunt, Inscriptt. Orell. 4791 sq. | 608. *interpr. curar.*, Servius „media (mediatrix) et conciliatrix;“ cf. vs. 59. | 609. *Noct.*, v. vs. 303. — *ululata*, cum ululatu invocata. | 610. *di morientis*, morienti propitii, ultores mortis, cf. vs. 520 sq. | 611. *Accipite animis* (ἐν θυμῷ αἰεῖσθε) haec mala, et vim vestram (*numen*) meritam, i. e. tamquam debitam mihi iniusta patienti, vertite ad ea, ulciscenda scilicet. | 614. *fata I.*, v. 3, 717. — *hic term.*, terminus navigationis, Italia; *haeret*, fixus est et immutabilis. | 616. *Fin. ext.*: spectant haec verba ad castra in Latio posita, ab Aenea, cum ad Euandrum auxilii petendi causa proficisceretur, relicta. | 617. *suorum*, Servius „Pallantis et ceterorum.“ | 618. *iniquae*, cf. 12, 819—828. | 619. Tres tantum annos regnasse Aeneas fertur. | 620. *med. inh. ar.*: quia corpus mortui Aeneae nusquam inventum est. | 621. *c. sangu.*, cum ipsa vita mea. | 623. cf. G. 4, 453. | 625. Ostenditur his verbis Hannibal. — *ossib.*, cinera. | 627. v. G. 1, 287. | 629. *ipsi*, qui nunc (vs. 627) sunt



- 630 Haec ait, et partis animum versabat in omnis,  
Invisam quaerens quam primum abrumpere lucem.  
Tum breviter Barcen nutricem adfata Sychaei;  
Namque suam patria antiqua cinis ater habebat:  
Annam cara mihi nutrix huc siste sororem;
- 635 Dic corpus properet fluviali spargere lympha,  
Et pecudes secum et monstrata piacula ducat;  
Sic veniat; tuque ipsa pia tege tempora vitta.  
Sacra Iovi Stygio, quae rite incepta paravi,  
Perficere est animus, finemque inponere curis,
- 640 Dardaniique rogam capitis permittere flammae.  
Sic ait. Illa gradum studio celerabat anilem.  
At trepida et coeptis inmanibus effera Dido,  
Sanguineam volvens aciem, maculisque tremantis  
Interfusa genas, et pallida morte futura,
- 645 Interiora domus inrumpit limina, et altos  
Conscendit furibunda rogos, ensemque recludit  
Dardanium, non hos quaesitum munus in usus.  
Hic, postquam Iliacas vestes notumque cubile  
Conspexit, paulum lacrimis et mente morata
- 650 Incubuitque toro dixitque novissima verba:  
Dulces exuviae, dum fata deusque sinebat,  
Accipite hanc animam, meque his exsolvite curis.  
Vixi, et, quem dederat cursum fortuna, peregi;  
Et nunc magna mei sub terras ibit imago.
- 655 Urbem praeclaram statui; mea moenia vidi;  
Ulti virum poenas inimico a fratre recepi;  
Felix, heu nimium felix, si litora tantum  
Numquam Dardaniae tetigissent nostra carinae!  
Dixit, et, os inpressa toro, Moriemur inultae,
- 660 Sed moriamur, ait. Sic, sic iuvat ire sub umbras.  
Hauriat hunc oculis ignem crudelis ab alto  
Dardanus, et nostrae secum ferat omina mortis.  
Dixerat; atque illam media inter talia ferro  
Conlapsam aspiciunt comites, ensemque cruere

Carthaginenses et Aeneadae. Ceterum hoc loco vi versus hypermetri indicatur impetus irae se superfundentis; similis huic versus 7, 470; et v. G. 1, 295. | 633. *cinis habebat*, i. q. redacta erat in cinerem. | 635. quia pure casteque sacra facere decet; cf. 2, 719. | 636. *monstrata* a sacerdote, cf. vs. 498. | 638. *Iovi St.*, Plutoni, cf. 6, 138. — *incepta*, vs. 504 sqq. | 640. *Dard. rog. cap.*, cf. vs. 508. | 641. *studio*, studiose, ut 6, 681. — *Alii aniki.* | 645. cf. vs. 494 et 504. | 647. *quaesitum*, paratum, cf. vs. 261 sq. 495. | 651. *deus*, ut *θεός*; et *δαίμων*, saepe omnino divina illa vis res humanas regens. | 652. *animam*, vitam, cum sanguine scilicet profundendam. | 654. *mei*, Ovid. Met. 1, 30 „Et pressa est gravitate sui tellus.“ | 656. cf. 1, 360—364. | 659. *os inpr. toro*, doloris signum, nati ex comparatione pristinae felicitatis cum praesenti infelicitate. | 660. *Sic*, sic i., adeo s. tantum iuvat. | 663. *med.*, v. 9, 657. | 664. *comites*, famulae ex

- 665 Spumantem sparsasque manus. It clamor ad alta  
Atria; concussam bacchatur fama per urbem.  
Lamentis gemituque et femineo ululatu  
Tecta fremunt; resonat magnis plangoribus aether.  
Non aliter, quam si inmissis ruat hostibus omnis
- 670 Karthago aut antiqua Tyros, flammaeque furentes  
Culmina perque hominum volvantur perque deorum.  
Audiit exanimis, trepidoque exterrita cursu  
Unguibus ora soror foedans et pectora pugnis  
Per medios ruit, ac morientem nomine clamat:
- 675 Hoc illud, germana, fuit? me fraude petebas?  
Hoc rogos iste mihi, hoc ignes araeque parabant?  
Quid primum deserta querar? comitemne sororem  
Sprevisti moriens? Eadem me ad fata vocasses;  
Idem ambas ferro dolor atque eadem hora tulisset.
- 680 His etiam struxi manibus, patriosque vocavi  
Voce deos, sic te ut posita crudelis abessem?  
Exstincti te meque, soror, populumque patresque  
Sidonios urbemque tuam. Date, volnera lymphis  
Abluam, et, extremus si quis super halitus errat,
- 685 Ore legam. Sic fata gradus evaserat altos,  
Semianimemque sinu germanam amplexa fovebat  
Cum gemitu, atque atros siccatat veste cruores.  
Illa, gravis oculos conata attollere, rursus  
Deficit; infixum stridit sub pectore volnus.
- 690 Ter sese attollens cubitoque adnixa levavit;  
Ter revoluta toro est, oculisque errantibus alto  
Quaesivit caelo lucem, ingemuitque reperta.  
Tum Iuno omnipotens, longum miserata dolorem  
Difficilisque obitus, Irim demisit Olympto,

more ei comitantes, ignarae illae, quid pararet Dido; praesentes fuisse docet verbum aspiciunt, quod dicitur de iis, qui rem vident oculis subiectam seque offerentem.] 669. cf. II. 22, 410 sq.] 671. v. 2, 312.] 675. *Hoc ill. fuit, hoc agitabas, cum illud apparabas.*] 678. *vocasses*, debebas me vocare, utinam me vocasses; 10, 854. Cic. pr. Sulla c. 8 „sileretur,“ i. e. debebat sileri; idem pr. Sext. c. 20 „réstitisses, réppugnasses, vitam pugnantis óppetisses,“ tetrameter ex Ennii Telamone vel ex Teucro Pacuvii repetitus.] 680. *struxi* rogum.] 681. *Voce vocare*, i. e. *magna* voce v., et cf. 5, 161. — *sic posita*, v. 2, 644. — *crudelis*, v. 12, 873.] 682. *te meque*, non solum te, sed etiam me.] 683 sq. *Date*, v. l. *Abl.* pro vulgari oratione: *date lymphas, quibus volu.* *Abl.* Imperativus a Graecis Romanisque scriptoribus interdum sic ponitur, ut subiiciatur audus Coniunctivus consilium indicans, ut a Terent. Heautont. 2, 3, 32 „*Mane*, hoc quod coepi, primum *enarrem*.“ Hom. II. 6, 340 „ἀλλ' ἄγε νῦν ἐπ' ἔμεινον, Ἀργῆα τεύχεα δ' ὕω.“ ib. 22, 450 „Δεῦτε, δῶω μοι ἐπεσθον, ἰδωμ', ὅτιν ἔργα τέτυκται.“ et v. infra 6, 884.] 684. propinqui extremum morientis halitum ore excipere solebant apud Romanos. — *si q. s. h. e.*, si quis halitus superest, qui oberret in ore Didonis; v. 3, 489.] 691 sq. Oculi morientum caligine obscurati diem recipere laborant, sed aegre colligunt solis radios.] 692. *ingem.* Caritas

- 695 Quae luctantem animam nexosque resolveret artus.  
 Nam quia nec fato, merita nec morte peribat,  
 Sed misera ante diem, subitoque accensa furore,  
 Nondum illi flavum Proserpina vertice crinem  
 Abstulerat Stygioque caput damnaverat Orco.  
 700 Ergo Iris croceis per caelum roscida pennis,  
 Mille trahens varios adverso sole colores,  
 Devolat, et supra caput adstitit: Hunc ego Diti  
 Sacrum iussa fero, teque isto corpore solvo.  
 Sic ait, et dextra crinem secat: omnis et una  
 705 Dilapsus calor, atque in ventos vita recessit.

# AENEIDOS

## LIBER QUINTUS.

*(Reversus in Siciliam Aeneas, cum anno exacto redisset dies, qui supremus fuerat Anchisae patri, ludos facit apparatissimos. — Amisso incendio quattuor navibus, omni imbelli multitudine in Sicilia apud hospitem Aecetam relicta, petit Italiam.)*

- Interea medium Aeneas iam classe tenebat  
 Certus iter, fluctusque atros aquilone secabat,  
 Moenia respiciens, quae iam infelicis Eliissae  
 Conlucent flammis. Quae tantum accenderit ignem,  
 5 Causa latet; duri magno sed amore dolores  
 Polluto, notumque, furens quid femina possit,  
 Triste per augurium Teucrorum pectora ducunt.  
 Ut pelagus tenuere rates, nec iam amplius ulla

vitalis in ipso articulo mortis; cf. 12, 952 et v. 10, 819 sq. | 695. Lucret. 2, 949 „Vitalis animae nodos e corpore solvit.“ | 703. cf. 11, 829. | 705. in v. v. rec., dum expiratur scilicet anima; in ventos, in aera, cf. 5, 512. 527.

*Aeneid. L. V. 1—103. Aeneas vi ventorum in Siciliam delatus et ab Aeceta benigne exceptus sacrum anniversarium ludosque instituit Anchisae patri.* | 1. *medium* dici solet, quod iam rite aggressi, in quo ipso occupati sumus, G. 3, 486. | 2. *Certus*, tendens, uti decreverat, eo, quo volebat, in Italiam, etsi aquilo (illo tempore continuus, cf. 4, 310.) officiebat cursui. — *atros aquil.*, Gell. 2, 30 „Austri spirantibus mare fit glaucum et caeruleum, aquilonibus obscurius atriusque.“ | 6. *pollui* dicitur res, quae sacra putatur, aliquo modo laesa, ut hospitium 3, 61. pax 7, 467. h. l. amor, qui iam coniugium appellari poterat, 4, 172. — *notumque*, i. e. idque quod notum est; nos dixerimus: *die bekannte Erfahrung*. Liv. 27, 37 „mentes turbavit rursum *nuntiaturum* infantem natum esse quadrimo parem.“ Tacit. Hist. 2, 82 „Sufficere adversus Vitellium videbatur Vespasiani nomen et nihil *arduum* fatis.“ | 8. *pelagus*, ea pars maris, quae vel

- Occurrit tellus, maria undique et undique caelum:  
 10 Olli caeruleus supra caput adstitit imber,  
 Noctem hiememque ferens, et inhorruit unda tenebris.  
 Ipse gubernator puppi Palinurus ab alta:  
 Heu! quianam tanti cinxerunt aethera nimbi?  
 Quidve, pater Neptune, paras? Sic deinde locutus  
 15 Colligere arma iubet validisque incumbere remis,  
 Obliquatque sinus in ventum, ac talia fatur:  
 Magnanime Aenea, non, si mihi Iuppiter auctor  
 Spondeat, hoc sperem Italiam contingere caelo.  
 Mutati transversa fremunt et vespere ab atro  
 20 Consurgunt venti, atque in nubem cogitur aer.  
 Nec nos obniti contra, nec tendere tantum  
 Sufficimus. Superat quoniam Fortuna, sequamur,  
 Quoque vocat, vertamus iter. Nec litora longe  
 Fida reor fraterna Erycis portusque Sicanos,  
 25 Si modo rite memor servata remetior astra.  
 Tum pius Aeneas: Equidem sic poscere ventos  
 Iamdudum et frustra cerno te tendere contra.  
 Flecte viam velis. An sit mihi gratior ulla,  
 Quove magis fessas optem demittere navis,  
 30 Quam quae Dardanium tellus mihi servat Acesten  
 Et patris Anchisae gremio complectitur ossa?  
 Haec ubi dicta, petunt portus, et vela secundi  
 Intendunt Zephyri; fertur cita gurgite classis,  
 Et tandem laeti notae advertuntur arenae.  
 35 At procul ex celso miratus vertice montis  
 Adventum sociasque rates occurrit Acestes,  
 Horridus in iaculis et pelle Libystidis ursae,

maiore, ut hic, vel minore intervallo a litoribus distat; 5, 165. 9, 81. | 10. *Olli*, v. 1, 254. | 14. *S. deinde l.*, Deinde, postquam sic locutus est; cf. vs. 400, 7, 135. | 15. *arma*, vela; *colligere* „breviari, ait Donatus; exponit poeta, quid factum sit, dicendo *Obliquatque s. i. v.*“ | 16. *Obliquat sinus* velorum *in ventum*, quod nostri appellant *laviren*; quod cum fit, ventus adversus non totis velis, sed tantum ex obliquo accipitur, ne is magna vi irruens navem nimium de cursu deflectat. | 17. *auctor*, cf. G. 1, 432. | 19. *transv. fr.* Magis proprie dicuntur talia, quale est *acerba, dira fremere*, v. G. 3, 149., audacius hoc *transversa fr.*, i. e. in transversam partem; quod ad Nomen referendum erat (ipsi enim venti erant transversii), refertur ad Verbum sive ad actum rei. | 20. *cogitur*, densatur, cf. G. 4, 36. Cic. de Nat. Deor. 2, 39 „aer tum fusus et extenuatus sublime fertur, tum autem concretus in nubes cogitur.“ | 21. *tantum*, quantum opus est ad vincendam tempestatem. | 24. *fraterna*, Eryx enim, qui Erycem urbem in Sicilia condidit, filius fuit Veneris, frater ergo Aeneae. | 25. Si positum astrorum, quae a Sicilia profecti (1, 34) observavimus, recte meminisse nunc, cum iter (quod per illa regitur) a contraria parte (Africa) remetior. | 28. *velis*, puta; mutata velificatione. | 30. *Acest.*, cf. 1, 195 sq. | 31. cf. 3, 710. | 35. Alii *excelso*. | 37. *horrida* dicuntur, quae rigida sunt atque erecta, tum quae hirsuta; *horridus in iaculis*, rigidis iaculis instructus (bina autem gestabant singuli, 1, 313), *horridus in pelle*, hirsuta pelle amictus. Ceterum cf. Ovid. Trist. 4, 6, 33

- Troia Crimiso conceptum flumine mater  
 Quem genuit. Veterum non inmemor ille parentum  
 40 Gratatur reduces et gaza laetus agresti  
 Excipit, ac fessos opibus solatur amicis.  
 Postera cum primo stellas Oriente fugarat  
 Clara dies, socios in coetum litore ab omni  
 Advocat Aeneas, tumulique ex aggere fatur:  
 45 Dardanidae magni, genus alto a sanguine divom,  
 Annuus exactis completur mensibus orbis,  
 Ex quo reliquias divinique ossa parentis  
 Condidimus terra maestasque sacravimus aras.  
 Iamque dies, nisi fallor, adest, quem semper acerbum,  
 50 Semper honoratum — sic di voluistis — habebo.  
 Hunc ego Gaetulis agerem si Syrtibus exsul  
 Argolicove mari deprensus et urbe Mycenae,  
 Annua votâ tamen sollemnisque ordine pompas  
 Exsequeretur, strueremque suis altaria donis.  
 55 Nunc ultro ad cineres ipsius et ossa parentis,  
 Haud equidem sine mente reor, sine numine divom,  
 Adsumus et portus delati intramus amicos.  
 Ergo agite, et laetum cuncti celebremus honorem;  
 Poscamus ventos, atque haec me sacra quot annis  
 60 Urbe velit posita templis sibi ferre dicatis.  
 Bina boum vobis Troia generatus Acestes  
 Dat numero capita in navis; adhibete Penatis  
 Et patrios epulis et quos colit hospes Acestes.  
 Praeterea, si nona diem mortalibus alnum  
 65 Aurora extulerit radiisque retexerit orbem,  
 Prima citae Teucris ponam certamina classis;  
 Quique pedum cursu valet, et qui viribus audax

„nitidis gladiator in armis.“ Aesch. Prom. 424 H. „ὄξυπρόποισι βρέμων ἐν αἰχμαῖς.“ | 38. Alii *Troica*. — Crimisus fluvius Siciliae. | 40. *gaza agr.*, epulis rusticanis. | 45. ipse Dardanus filius Iovis fuerat. | 50. dies honoratus dicitur dies status, quo diis honorem (v. 3, 118) offerimus, recolentes memoriam rei gratae ingrataeve, quae eo anni die nobis obtigit. — *sic di v.*, vox doloris plena; maluisset enim vivo patri officia pietatis exhibere, quam mortuo. | 52. *deprensus*, si is dies me deprehenderet. — *et*, v. G. 1, 419. | 53. *pompas* funebres ducerem. — *ordine*, v. 1, 703. | 54. *struerem*, tamquam strue facta cumlarem. — *altaria* tamquam inter superos deos recepto Anchisae. | 55. *ultro*, v. 9, 7. | 56. v. 1, 133. | 58. *honorem*, sacra in honorem Anchisae facienda. | 59. peracta hac sollemnitate poscamus ventos, v. 3, 253, et delati in Italiam eadem sacra instauremus. | 64. *si* Futuro iunctum coniungit interdum cum condicionali potestate temporalem *quando*, ut 6, 829. Horat. Epist. 1, 7, 10 „Quod si bruma nives Albanis illinet agris, Ad mare descendet vates tuus.“ — *nona*: nonus dies afferebat finem parentandi apud Romanos; eo die celebrabantur ludi epulaeque funebres. | 67 sq. Nullum infra proponitur certamen iaculandi; sed iidem, qui boni erant iaculatores, videntur boni sagittarii fuisse, cf. 10, 754.; certe ars iaculandi ab arte sagittandi magis specie differt, quam genere; utraque autem

- Aut iaculo incedit melior levibusque sagittis,  
 Seu crudo fidit pugnam committere caestu,  
 70 Cuncti adsint, meritaque exspectent praemia palmae.  
 Ore favete omnes, et cingite tempora ramis.  
 Sic fatus velat materna tempora myrto.  
 Hoc Helymus facit, hoc aevi maturus Acestes,  
 Hoc puer Ascanius, sequitur quos cetera pubes.  
 75 Ille e concilio multis cum milibus ibat  
 Ad tumulum, magna medius comitante caterva.  
 Hic duo rite mero libans carchesia Baccho  
 Fundit humi, duo lacte novo, duo sanguine sacro,  
 Purpureosque iacit flores, ac talia fatur:  
 80 Salve, sancte parens, iterum: salvete, recepti  
 Nequiquam cineres, animaeque umbraeque paternae.  
 Non licuit finis Italos fataliaque arva  
 Nec tecum Ausonium, quicumque est, quaerere Thybrim.  
 Dixerat haec, adytis cum lubricus anguis ab imis  
 85 Septem ingens gyros, septena volumina traxit,  
 Amplexus placide tumulum lapsusque per aras,  
 Caeruleae cui terga notae maculosus et auro  
 Squamam incendebat fulgor, ceu nubibus arcus  
 Mille iacit varios adverso sole colores.  
 90 Obstipuit visu Aeneas. Ille agmine longo  
 Tandem inter pateras et levia pocula serpens  
 Libavitque dapes, rursusque innoxius imo  
 Successit tumulo et depasta altaria liquit.  
 Hoc magis inceptos genitori instaurat honores,  
 95 Incertus, Geniumne loci famulumne parentis

multum requirebat virium, et cf. vs. 500.] 68 sq. *Aut ... seu*, ubi consuetudo postulat *aut* ... *aut*; sed *seu*, i. e. *vel si (quis)*, subiungit Aeneas, quia non satis certum erat, futurene essent, qui ad tale certamen accederent, cf. vs. 378. — *incedit* hic quandam fiduciae notionem adiunctam habet, dignitatis l, 46, ut *ingredi* gloriae ac superbiae vs. 543, quae omnia incesso se produnt.] 69. *crudo*, qui factus e crudo corio bubulo; cf. vs. 404 sq.] 71. *Ore fav.*, εὐφημῆϊρε.] 72. *mat.*, v. G. 1, 28.] 73. *Helymus*, Troianus, cum Acesta in Siciliam venerat. — *aevi m.*, v. G. 4, 491.] 77 sq. cf. 3, 66 sq. — *iunge mero carch. Baccho*; similia v. 3, 618.] 80 sq. „*iterum*, nam quo tempore sepeliit eum, dixit sine dubio salve et vale“, Servius. — *receptos* dicit, ad quos rediit; *nequiquam* doloris significationem habet, quod nihil ipsi Aeneae profuturus erat reditus ad eum, quem vivum vellet secum ducere in Italiam. — *animae* sc. salvete.] 82. v. 1, 2.] 83. *quic. est*, ut *quisquis es* l, 387, de ignotis.] 84. *adytum* sanctissima quaedam ac remotissima pars templi, quo accedere praeter sacerdotes nemini licebat; ea vox ad sepulcrum translata significat eximiam quandam sanctitatem loci, quippe a deo Anchisa habitati.] 85. septem gyros in se replicatos.] 87 sq. *Caer. c. t. notae* distinguebant; hoc enim aut simile verbum repetes ex verbo *incendebat*. — maculis aureis squama incendebatur, i. e. exsplendescibat; Silius 15, 678 „*clipeumque accenderat auro*.“] 90. v. 2, 212.] 94. *instaurat*, repetit visa re inexpectata interruptos.] 95. Serpentes et Geni locorum esse et deorum quorundam famuli credebantur; talis erat „famulus sororum

- Esse putet; caedit binas de more bidentis,  
 Totque sues, totidem nigrantis terga iuencos;  
 Vinaque fundebat pateris, animamque vocabat  
 Anchisae magni Manisque Acheronte remissos.  
 100 Nec non et socii, quae cuique est copia, laeti  
 Dona ferunt, onerant aras, mactantque iuencos;  
 Ordine aena locant alii, fusique per herbam  
 Subiiciunt veribus prunas et viscera torrent.  
 Expectata dies aderat nonamque serena  
 105 Auroram Phaethontis equi iam luce vehebant,  
 Famaque finitimos et clari nomen Acestae  
 Excierat; laeto conplebant litora coetu,  
 Visuri Aeneadas, pars et certare parati.  
 Munera principio ante oculos circoque locantur  
 110 In medio, sacri tripodes viridesque coronae  
 Et palmae pretium victoribus, armaque et ostro  
 Perfusae vestes, argenti auriue talentum;  
 Et tuba commissos medio canit aggere ludos.  
 Prima pares ineunt gravibus certamina remis  
 115 Quattuor ex omni delectae classe carinae.  
 Velocem Mnestheus agit acri remige Pristim,  
 Mox Italus Mnestheus, genus a quo nomine Memmi,  
 Ingentemque Gyas ingenti mole Chimaeram,  
 Urbis opus, triplici pubes quam Dardana versu  
 120 Inpellunt, terno consurgunt ordine remi;  
 Sergestusque, domus tenet a quo Sergia nomen,  
 Centauro invehitur magna, Scyllaque Cloanthus  
 Caerulea, genus unde tibi, Romane Cluenti.

Naiadum“ apud Silium 6, 288. Val. Fl. 3, 457 „placidi quas (*dapes*) protenus angues, Umbrarum famuli, linguis rapuere coruscis.“ | 97. *terga*, v. 1, 718. — Solos iuencos appellat nigros, quo simul indicatur oves suesque una mactatas coloris fuisse eiusdem. | 98. *vocabat*, ut adesset sacrisque oblati frueretur; et cf. Hom. II. 23, 219—21; eo spectat *remissos* vs. 99; v. G. 4, 88. | 100. *quae* c. e. *cop.*, pro sua quisque copia s. facultate. | 101. *alii* onerant a., alii disponunt aena lavandi causa, v. 1, 213. || 104—285. *Conveniunt undique ad spectandos ludos. Proponuntur in medio praemia. Certamen navale.* | 105. *Phaethon* h. l. ipse Sol, *Ἥλιος φαίδων*. | 109. *circo*, novo modo universe dictum de eo loco, quo convenerant vel certaturi vel certamina spectaturi. | 110. *sacri*, quales diis pro munere offerri solebant; cf. Hom. II. 23, 702. — v. *cor.*, eas lemniscatas fuisse docet vs. 269. | 112. *alii talenta*, cf. vs. 248. | 113. *Et* post plura (vs. 110—112) interposita continuat orationem, ut 9, 179. — *tuba*, Romano more, quamquam ne Homero quidem incognita fuit, cf. II. 18, 219. 21, 388. — *commissos*, v. G. 1, 206. | 114. *delectae sunt pares*, puta celeritate, non remis; cf. vs. 153. | 116. *Pristim*, unde id nomen navi? v. 10, 158. 166. | 117. Nempe ut Mnestheus a Verbo *μνησθαι* originem ducere credebatur, ita Memmius a Verbo latino *meminisse*. | 118. *ingentem ... ingenti*, Gossrau: „Duplicato adiectivo magnitudo navis extollitur.“ Veteres interpretes *mole* volunt esse id, quod *motu*. | 119. *Urb. opus*, urbi similis magnitudine. — *versu*, ordine; fuit scilicet triremis. | 122. *magna*, feminino genere, quia *navis* nomen est Centaurus h. l.; sic *Eunuchus (fabula)* acta est; item

- Est procul in pelago saxum spumantia contra  
 125 Litora, quod tumidis submersum tunditur olim  
 Fluctibus, hiberni condunt ubi sidera Cori;  
 Tranquillo silet, inmotaque attollitur unda  
 Campus et apricis statio gratissima mergis.  
 Hic viridem Aeneas frondenti ex ilice metam  
 130 Constituit signum nautis pater, unde reverti  
 Scirent et longos ubi circumflectere cursus.  
 Tum loca sorte legunt, ipsique in puppibus auro  
 Ductores longe effulgent ostroque decori;  
 Cetera populea velatur fronde iuventus  
 135 Nudatosque humeros oleo perfusa nitescit.  
 Considunt transtris, intentaque bracchia remis;  
 Intenti exspectant signum, exsultantiaque haurit  
 Corda pavor pulsans laudumque arrecta cupido.  
 Inde, ubi clara dedit sonitum tuba, finibus omnes,  
 140 Haud mora, prosiluire suis; ferit aethera clamor  
 Nauticus, adductis spumant freta versa lacertis.  
 Infundunt pariter sulcos, totumque dehiscit  
 Convolsum remis rostrisque tridentibus aequor.  
 Non tam praecipites biugo certamine campum  
 145 Corripuere ruuntque effusi carcere currus,  
 Nec sic inmissis aurigae undantia lora  
 Concussere iugis pronique in verbera pendent.  
 Tum plausu fremituque virum studiisque faventum  
 Consonat omne nemus, vocemque inclusa volutant  
 150 Litora, pulsati colles clamore resultant.  
 Effugit ante alios primisque elabitur undis  
 Turbam inter fremitumque Gyas; quem deinde Cloanthus  
 Consequitur, melior remis, sed pondere pinus  
 Tarda tenet. Post hos aequo discrimine Pristis

*mea Glycerium.* | 125. *olim ... ubi*, praeclare Servius: „Tunc fere, cum cori nubibus abscondunt et obruunt sidera.“ cf. 8, 391. G. 4, 421. 433. Lucret. 6, 148 „calidis candens ferrum e fornacibus olim Stridit, ubi in gelidum demersimus imbrem.“ Et ponitur hoc *olim* in re ita fieri solita, quod Servius indicat adverbio *fere*; quare idem 8, 391 „*olim*, fere, ut solet; nam non est adverbium temporis.“ | 127. *Tranquillo*, ut *immota unda*, Ablativ. absolutus, γαλήνης οὐρανός, Liv. 28, 17 „conspectae duae quinquereemes, haud cuiquam *dubio*, quin hostium essent.“ Tacit. Annal. 1, 6 „iuxta *periculoso*, ficta seu vera promeret.“ | 128. *apr.*, amantibus apricari. | 134. *populus sacra Herculi*, 8, 276. 286. E. 7, 61. Servius: „quia ludi funebres sunt et haec arbor ab Hercule ab inferis allata est, cum canem Cerberum extraheret.“ | 135. v. 3, 281. | 137. v. G. 3, 105. | 139. *finibus suis*, ex sua quisque sede per sortem constituta ac definita; cf. vs. 132 et 328. | 144. *biugo cert.*, certamine bigarum. | 145. v. G. 1, 49 et cf. Hom. Odyss. 13, 81 sqq. Il. 23, 362 sqq. | 146. *iugis*, equis iugalibus, v. 8, 708. | 147. cf. G. 3, 106 sq. | 148. *stud. fav.*, clamore favorem, quo alii alium certantem prosequerantur, declarante. | 149. *inclusa*, nemore et collibus. | 152. *Turb. int. fr.*, dum ceteri, qui Gyan elabentem vident, turbulentur



- 155 Centaurusque locum tendunt superare priorem;  
Et nunc Pristis habet, nunc victam praeterit ingens  
Centaurus, nunc una ambae iunctisque feruntur  
Frontibus et longa sulcant vada salsa carina.  
Iamque propinquabant scopulo metamque tenebant,
- 160 Cum princeps medioque Gyas in gurgite victor  
Rectorem navis compellat voce Menoeten:  
Quo tantum mihi dexter abis? huc dirige gressum;  
Litus ama, et laevas stringat sine palmula cautes;  
Altum alii teneant. Dixit; sed caeca Menoetes
- 165 Saxa timens proram pelagi detorquet ad undas.  
Quo diversus abis? iterum, Pete saxa, Menoete!  
Cum clamore Gyas revocabat; et ecce Cloanthum  
Respicit instantem tergo, et propiora tenentem.  
Ille inter navemque Gyae scopulosque sonantis.
- 170 Radit iter laevum interior, subitoque priorem  
Praeterit et metis tenet aequora tuta relictis.  
Tum vero exarsit iuveni dolor ossibus ingens,  
Nec lacrimis caruere genae, segnemque Menoeten,  
Oblitus decorisque sui sociumque salutis,
- 175 In mare praecipitem puppi deturbat ab alta;  
Ipse gubernaclo rector subit, ipse magister,  
Hortaturque viros, clavumque ad litora torquet.  
At gravis, ut fundo vix tandem redditus imo est,  
Iam senior madidaque fluens in veste Menoetes
- 180 Summa petit scopuli siccaque in rupe resedit.  
Illum et labentem Teucri et risere natantem,  
Et salsos rident revomentem pectore fluctus.  
Hic laeta extremis spes est accensa duobus,  
Sergesto Mnestheique, Gyan superare morantem.
- 185 Sergestus capit ante locum scopuloque propinquat,  
Nec tota tamen ille prior praeceunte carina;  
Parte prior; partem rostro premit aemula Pristis.  
At media socios incedens nave per ipsos  
Hortatur Mnestheus: Nunc, nunc insurgite remis,
- 190 Hectorei socii, Troiae quos sorte suprema  
Delegi comites; nunc illas promite viris,  
Nunc animos, quibus in Gaetulis Syrtibus usi  
Ionioque mari Maleaeque sequacibus undis.

et cum fremitu naves suas propellant.] 155. *l. superare pr.*, altera nave superanda priorem locum tenere.] 161. *voce*, v. 4, 681.] 163. *L. ama*, sedulo cave litus deseras.] 164. v. 3, 706.] 165. v. vs. 8.] 170. *interior*, v. 11, 695.] 171. *tuta*: in reditu non utitur periculosa illa, qua modo usus erat, via vs. 169.] 172. v. G. 3, 272.] 178. v. G. 4, 88.] 179. *in v.*, ut 7, 167 *ignota in veste*.] 184. v. G. 4, 546.] 190. v. 1, 273. — *sorte s.*, tempore excidii.] 192. cf. 1, 111. 3, 211.] 193. Malea extremae Laconiae promontorium ex Aegaeo

- Non iam prima peto Mnestheus, neque vincere certo;  
 195 Quamquam o! — Sed superent, quibus hoc, Neptune, dedisti;  
 Extremos pudeat rediisse; hoc vincite, cives,  
 Et prohibete nefas. Olli certamine summo  
 Procumbunt; vastis tremit ictibus aerea puppis,  
 Subtrahiturque solum; tum creber anhelitus artus  
 200 Aridaque ora quatit; sudor fluit undique rivis.  
 Attulit ipse viris optatum casus honorem.  
 Namque furens animi dum proram ad saxa suburguet  
 Interior spatioque subit Sergestus iniquo,  
 Infelix saxis in procurrentibus haesit.  
 205 Concussae cautes, et acuto in murice remi  
 Obnixa crepuere, inlisaque prora pependit.  
 Consurgunt nautae et magno clamore morantur,  
 Ferratasque trudes et acuta cuspide contos  
 Expediunt, fractosque legunt in gurgite remos.  
 210 At laetus Mnestheus successuque acrior ipso  
 Agmine remorum celeri ventisque vocatis  
 Prona petit maria et pelago decurrit aperto.  
 Qualis spelunca subito commota columba,  
 Cui domus et dulces latebroso in pumice nidi,  
 215 Fertur in arva volans, plausumque exterrita pennis  
 Dat tecto ingentem, mox aere lapsa quieto  
 Radit iter liquidum, celeris neque commovet alas:  
 Sic Mnestheus, sic ipsa fuga secat ultima Pristis  
 Aequeora, sic illam fert impetus ipse volantem.  
 220 Et primum in scopulo luctantem deserit alto  
 Sergestum brevibusque vadis frustraue vocantem  
 Auxilia et fractis discentem currere remis.  
 Inde Gyan ipsamque ingenti mole Chimaeram  
 Consequitur; cedit, quoniam spoliata magistro est.  
 225 Solus iamque ipso superest in fine Cloanthus:  
 Quem petit, et summis adnixus viribus arguet.

mari venientibus circumnavigandum, exitiosum nautis. — *sequ. u.*, alio fluctu alium trudente. | 194. *prima*, τὰ πρῶτα. | 195. *Quamquam o* utinam vincere liceat! | 196. *hoc vinc. nefas*, in hoc cernatur victoria vestra, ut ne extremi redeamus, quod est ingentis dedecoris. | 198. *Procumb.*, prona incumbunt remis. | 199. *Subtr.* s., sulco facto dehiscit mare, cf. vs. 142 sq. | 201. Pronomen *ipse* distinguit casum, id quod minus est, a labore atque contentione sociorum navalium, quod est maius. | 202. v. G. 4, 491. | 203. v. 11, 695. | 207. *morantur*, Servius „retro agunt;“ est igitur verbum nauticum; et quo id efficiant, trudes contosque expediunt. | 211. *agmine*, motu, ut 2, 782 „leni fuit agmine Thybris,“ et 12, 687 „Fertur magno mons improbus actu.“ | 212. *prona m.*, ad litus tendentia, navis igitur cursu suo adiuvantia; et significatur liberum mare, diversum ab ea parte, quae circumfusa erat scopulo, in quo haesit Sergestus. | 214. *dulces*, propter pullos, v. E. 1, 3. | 218. *ultima*, metae proxima. | 220. *alto*, ex fundo maris ad eam altitudinem assurgente, ut prope superficiem maris tangat. | 224. *codit*,

- Tum vero ingeminat clamor, cunctique sequentem  
 Instigant studiis, resonatque fragoribus aether.  
 Hi proprium decus et partum indignantur honorem  
 230 Ni teneant, vitamque volunt pro laude pacisci;  
 Hos successus alit: possunt, quia posse videntur.  
 Et fors aequatis cepissent praemia rostris,  
 Ni palmas ponto tendens utrasque Cloanthus  
 Fudissetque preces, divosque in vota vocasset:  
 235 Di, quibus imperium pelagi est, quorum aequora curro,  
 Vobis laetus ego hoc candentem in litore taurum  
 Constituam ante aras, voti reus, extaque salsos  
 Porriciam in fluctus et vina liquentia fundam.  
 Dixit, eumque imis sub fluctibus audit omnis  
 240 Nereidum Phorcique chorus Panopeaque virgo,  
 Et pater ipse manu magna Portunus euntem  
 Impulit: illa Noto citius volucrique sagitta  
 Ad terram fugit, et portu se condidit alto.  
 Tum satus Anchisa, cunctis ex more vocatis,  
 245 Victorem magna praeconis voce Cloanthum  
 Declarat, viridique advelat tempora lauro;  
 Muneraque in navis ternos optare iuencos  
 Vinaque et argenti magnum dat ferre talentum.  
 Ipsis praecipuos ductoribus addit honores:  
 250 Victori chlamydem auratam, quam plurima circum  
 Purpura Maeandro duplici Meliboea cucurrit,  
 Intextusque puer frondosa regius Ida  
 Velocis iaculo cervos cursuque fatigat,  
 Acer, anhelanti similis; quem praepes ab Ida  
 255 Sublimem pedibus rapuit Iovis armiger uncis;  
 Longaevi palmas nequiquam ad sidera tendunt  
 Custodes, saevitque canum latratus in auras.  
 At qui deinde locum tenuit virtute secundum,

praeteriri se sinit. | 227. *sequ.*, Mnesteum, qui sequitur Cloanthum. | 228. v. vs. 148. | 229. *proprium*, quod iam sine controversia suum putant. | 230. cf. 9, 206. | 231. *videntur*, sibi. | 232. *aequ. rostris*, aequ. proris, aequato cursu una ad litus redeuntes. | 233. *ponto*, versus pontum; v. E. 2, 30. — *palmas utrasque*, τὰ χεῖρε, ut 6, 685. | 234. *in vota*, ad promissa munera, quibus fruarentur, cf. vs. 236, et est idem, quod *votis* (Dativus) *vocare deos*. | 235. v. 2, 690 et cf. G. 2, 146. | 238. v. vs. 776. — Alii *Proiciam*. | 240. *Panopea* una ex Nereidibus, v. 9, 811. | 241. Servius „Portunus, deus marinus, qui portabatur praest; et bene impulit eum ipse iam vicinum portui.“ | 244. *cunctis*, qui certaverant, ad se vocatis. | 247. *in nav.*, in suam cuiusque navem. — *opt.*, v. 1, 425. | 248. *magnum*, quia magnum est pondus. | 249. *praecip.*, diversos sc. ab illis muneribus (vs. 247), quae sociorum communia esse voluit. | 251. *purpura* in modum fluvii Maeandri flexuosa. — *Meliboea*, Meliboeensis. Lucr. 2, 499 „Meliboeaque fulgens Purpura Thessalico concharum tincta colore.“ Meliboea oppidum Thessaliae. | 252—257. Duplex in ea veste fuit pictura, una Ganymedem

- Levibus huic hamis consertam auroque trilicem  
 260 Loricam, quam Demoleo detraxerat ipse  
 Victor apud rapidum Simoenta sub Illo alto,  
 Donat habere viro, decus et tutamen in armis.  
 Vix illam famuli Phegeus Sagarisque ferebant  
 Multiplicem, connixi humeris; indutus at olim  
 265 Demoleos cursu palantis Troas agebat.  
 Tertia dona facit geminos ex aere lebetas,  
 Cymbiaque argento perfecta atque aspera signis.  
 Iamque adeo donati omnes opibusque superbi  
 Puniceis ibant evincti tempora taeniis,  
 270 Cum saevo e scopulo multa vix arte revolsus,  
 Amissis remis atque ordine debilis uno,  
 Inrisam sine honore ratem Sergestus agebat.  
 Qualis saepe viae deprensus in aggere serpens,  
 Aerea quem obliquum rota transiit, aut gravis ictu  
 275 Seminecem liquit saxo lacerumque viator;  
 Nequiquam longos fugiens dat corpore tortus,  
 Parte ferox, ardensque oculis, et sibila colla  
 Arduus attollens; pars vulnere clauda retentat  
 Nixantem nodis seque in sua membra plicantem.  
 280 Tali remigio navis se tarda movebat;  
 Vela facit tamen, et velis subit ostia plenis.  
 Sergestum Aeneas promisso munere donat,  
 Servatam ob navem laetus sociosque reductos.  
 Olli serva datur, operum haud ignara Minervae,  
 285 Cressa genus, Pholoe, geminique sub ubere nati.  
 Hoc pius Aeneas misso certamine tendit  
 Gramineum in campum, quem collibus undique curvis  
 Cingebant silvae, mediaque in valle theatri  
 Circus erat; quo se multis cum milibus heros  
 290 Consessu medium tulit exstructoque resedit.

venantem, altera ab aquila raptum repraesentans. | 259. v. 3, 467. | 261. v. E. 3, 79. | 262. v. vs. 521. | 264. *Mult.*, plurimis annulis consertam. | 267. *asp.* s., anaglypha; Pindar. Isthm. 6, 58 „*φιάλαν χρυσὴν περιχυῖαν*.“ | 268. v. 4, 588. | 269. *taeniis* extremis syllabis in unam contractis, ut in *Paeoniis* 7, 769. Taeniis autem religatas puta coronas vs. 110 et 494 commemoratas. | 271. *ordine* remorum. | 273. *saepe*, v. A. 1, 148. — Aggeris instar erant viae a Romanis munitae. | 274 sq. *grav. ictu*, forti ictu usus; cuius autem generis fuerit is ictus, indicat adiectum *saxo*, quod pendet ex *seminecem*. | 276. *dat.* *dare* apud poetas saepe est *facere*, sed ita, ut ea res, quae fit, oculos vel alium sensum moveat, ut *dare cuneum, fenestram, motum, fugam, saltum, stragem, cantum, gemitum, plausum, sonum, vocem, nidorem*. | 279. *Nix. nodis*, quantumvis nodis nitatur; ut aves alis, homines quadrupedesque pedibus, ita serpentes nituntur nodis s. inflexis in se membris. Alii *Nexantem nodos*. | 280. *tarda*, v. 4, 494. | 282. *promisso*, cf. vs. 70 et 305. | 284. *datur*, o., v. E. 9, 66. | 286—361. *Certatur cursu*. cf. Hom. Il. 23, 740 sqq. | 288. *theatri*, cuius quaedam species per colles ac medium inter eos campum effecta erat. | 290.

- Hic, qui forte velint rapido contendere cursu,  
 Invitat pretiis animos, et praemia ponit.  
 Undique conveniunt Teucrici mixtique Sicani,  
 Nisus et Euryalus primi,  
 295 Euryalus forma insignis viridique iuventa,  
 Nisus amore pio pueri; quos deinde secutus  
 Regius egregia Priami de stirpe Diore;  
 Hunc Salius simul et Patron, quorum alter Acarnan,  
 Alter ab Arcadio Tegeaeae sanguine gentis;  
 300 Tum duo Trinacrii iuvenes, Helymus Panopesque,  
 Adsueta silvis, comites senioris Acestae;  
 Multi praeterea, quos fama obscura recondit.  
 Aeneas quibus in mediis sic deinde locutus:  
 Accipite haec animis, laetasque advertite mentes:  
 305 Nemo ex hoc numero mihi non donatus abibit.  
 Gnosis bina dabo levato lucida ferro  
 Spicula caelatamque argento ferre bipennem;  
 Omnibus hic erit unus honos. Tres praemia primi  
 Accipient, flavaque caput nectentur oliva.  
 310 Primus equum phaleris insignem victor habeto,  
 Alter Amazoniam pharetram plenamque sagittis  
 Threiciis, lato quam circumplectitur auro  
 Balteus, et tereti subnectit fibula gemma;  
 Tertius Argolica hac galea contentus abito.  
 315 Haec ubi dicta, locum capiunt, signoque repente  
 Corripiunt spatia audito limenque relinquunt,  
 Effusi nimbo similes, simul ultima signant.  
 Primus abit longeque ante omnia corpora Nisus  
 Emicat, et ventis et fulminis oclor alis;  
 320 Proxumus huic, longo sed proxumus intervallo,  
 Insequitur Salius; spatio post deinde relicto  
 Tertius Euryalus;  
 Euryalumque Helymus sequitur; quo deinde sub ipso

extracto in modum caveae consessu. | 292. *animos* eorum, qui forte velint, v. E. 2, 71. — *pr. ponit*, locat in medio, cf. vs. 314; ut hic *pretia* et *praemia*, sic infra in eadem causa distinguuntur *honos* et *praemia* vs. 308. | 296. *pueri*, Euryali adolescentuli. | 302. Cave putes fictis nominibus poetam esse usum; sunt ea ex veterum historiarum monumentis sumpta. | 308. *unus*, idem; 9, 182. „*unus* amor,“ qui idem est in duobus. Plaut. Mostell. 3, 1, 147. „Iterum iam ad unum saxum me fluctus ferunt.“ | 311. *Amas.*, quali Amazones utuntur. | 312. *Threic.*, qualibus utuntur Thraces, imprimis boni sagittarii. | 312 sq. ea pharetra pendebat e balteo aurato gemmata fibula infra nexo. | 314. cf. 2, 389. 390. 412. et putabis hanc galeam e spoliis fuisse; cf. 3, 286. | 316. v. G. 8, 203. — *limen*, cf. vs. 139. | 317. *nimbo sim.*, ut nimbus densam vim aquarum subito effundens; nec ad celeritatem hoc referendum, sed ad multitudinem una se propipientium. — *ult. s.*, oculos animumque intendunt ad metam. | 319. fulmina alata conspiciuntur in nummis. Val. Fl. 2, 97 de Vulcano: „haec templa, peracta Aegide et horribili formati fulminis alis, Laetus edit.“ | 323. Imitatur Virgil.

- Ecce volat calcemque terit iam calce Diores,  
 325 Incumbens humero; spatia et si plura supersint,  
 Transeat elapsus prior, ambiguumve relinquat.  
 Iamque fere spatio extremo fessique sub ipsam  
 Finem adventabant, levi cum sanguine Nisus  
 Labitur infelix, caesis ut forte iuvenis  
 330 Fusus humum viridisque super madefecerat herbas.  
 Hic iuvenis iam victor ovans vestigia presso  
 Haud tenuit titubata solo, sed pronus in ipso  
 Concidit inmundoque fimo sacroque cruore.  
 Non tamen Euryali, non ille oblitus amorum;  
 335 Nam sese opposuit Salio per lubrica surgens;  
 Ille autem spissa iacuit revolutus arena.  
 Emicat Euryalus, et munere victor amici  
 Prima tenet, plausuque volat fremituque secundo.  
 Post Helymus subit et nunc tertia palma Diores.  
 340 Hic totum caveae consessum ingentis et ora  
 Prima patrum magnis Salius clamoribus inplet,  
 Ereptumque dolo reddi sibi poscit honorem.  
 Tutatur favor Euryalum lacrimaeque decorae  
 Gravior et pulchro veniens in corpore virtus.  
 345 Adiuvat et magna proclamat voce Diores,  
 Qui subiit palmae, frustra ad praemia venit  
 Ultima, si primi Salio reddantur honores.  
 Tum pater Aeneas, Vestra, inquit, munera vobis  
 Certa manent, pueri, et palmam movet ordine nemo;  
 350 Me liceat casus miserari insontis amici.  
 Sic fatus tergum Gaetuli immane leonis  
 Dat Salio, villis onerosum atque unguibus aureis.  
 Hic Nisus, Si tanta, inquit, sunt praemia victis,  
 Et te lapsorum miseret, quae munera Niso

Homerum II. 23, 759—766 „ἐπὶ δ' ὤρνυτο δῖος Ὀδυσσεὺς ἄγχι μᾶλα (sub ipso) . . . αὐτὰρ ὀπισθεν ἵχνια τύπτε πόδεσσι, πάρος κόνιν ἀμφιχυθῆναι.“  
 326. *ambig.*, qui ambiguum est sitne prior an posterior, cf. Hom. II. 23, 382. | 327. v. G. 2, 290. | 328. *levi*, lubrico, et cf. vs. 333. | 329. *ut forte*, ὡς ἐτυχε προεχόμενος *cel.* | 331 sq. *tenet vestigia*, qui incedentem se sustinet; presso pedibus. | 334. *amores*, hic, ut 4, 28, denotat omnem mutui amoris sensum et affectum. | 336. *arena*, at vs. 287 et 330 eum campum herbidum fuisse, non arenosum, legimus; ergo *arena* h. l. est humus, ut G. 1, 105. 4, 293, ac significatur locus sanguine concreto lutosus. *spissus* de concreto sanguine Ovid. M. 11, 367 „lupus Oblitus et spumis et spisso sanguine rictus;“ noster supra 2, 277 „concretos sanguine crines.“ | 337. *Em.*, cf. vs. 318 sq. — *Euryahis*, v. G. 3, 189. | 338. *secundo*, favente et alacritatem currentis adiuvante, cf. vs. 491. 10, 266. | 339. *iunge nunc tertia*. — *palma*, v. G. 1, 59. E. 7, 16. | 340. *ora pr. p.*, patrum primas sedes tenentium. | 344. *veniens*, sese offerens. | 346. *sub. p.*, accessit ad palmam, tertius inter primos, cf. vs. 308. | 347. Alii *redduntur*. | 349. Ut semel constitutum est (i. e. *ordine*, cf. vs. 308), ita dabuntur palmae. | 352.

- 355 Digna dabis? primam merui qui laude coronam,  
 Ni me, quae Salium, fortuna inimica tulisset.  
 Et simul his dictis faciem ostentabat et udo  
 Turpia membra fimo. Risit pater optumus olli,  
 Et clipeum efferri iussit, Didymaonis artis,  
 360 Neptuni sacro Danais de poste refixum.  
 Hoc iuvenem egregium praestanti munere donat.  
 Post, ubi confecti cursus, et dona peregit:  
 Nunc, si cui virtus animusque in pectore praesens,  
 Adsit, et evinctis attollat bracchia palmis.  
 365 Sic ait et geminum pugnae proponit honorem,  
 Victori velatum auro vittisque iuencum,  
 Ensem atque insignem galeam solatia victo.  
 Nec mora; continuo vastis cum viribus effert  
 Ora Dares, magnoque virum se murmure tollit;  
 370 Solus qui Paridem solitus contendere contra,  
 Idemque ad tumulum, quo maxumus occubat Hector,  
 Victorem Buten inmani corpore, qui se  
 Bebrycia veniens Amyci de gente ferebat,  
 Perculit et fulva moribundum extendit arena.  
 375 Talis prima Dares caput altum in proelia tollit,  
 Ostenditque humeros latos, alternaque iactat  
 Bracchia protendens, et verberat ictibus auras.  
 Quaeritur huic alius; nec quisquam ex agmine tanto  
 Audet adire virum manibusque inducere caestus.  
 380 Ergo alacris, cunctosque putans excedere palma,  
 Aeneae stetit ante pedes, nec plura moratus  
 Tum laeva taurum cornu tenet, atque ita fatur:  
 Nate dea, si nemo audet se credere pugnae,

v. 1, 698. | 355. *laude*, v. 9, 252. | 356. Ni inimice acceptus essem a fortuna; *ferre*, translatum, ut videtur, a ludibrio ventorum, h. l. lusum fortunae significat; similiter Graeci εὖ et κακῶς φέρεσθαι, Aesch. S. ad Th. 821 „πατρός κατ' εὐχὰς δυσπότμους φορούμενοι.“ | 357. Iunge *simul his d.*, non *simul ostentabat*, v. 10, 856. | 359. *artes*, Pluralis indicans praestantiam, ut Hes. Sc. 312 „τέλπος, κλυτὰ ἔργα περίφρονος Ἥφαίστιο.“ | 360. Intelligemus clipeum voti causa in foribus templi alicuius Neptuno sacri fixum, a Danais ablatum s. refixum, qui postea in potestatem Troianorum venit; cf. 3, 286—288. || 362—484. *Pugilum certamen*. cf. Hom. II. 23, 651 sqq. | 363. *an. praesens*, qui se non sinit perterreret instanti periculo; nam periculosum erat hoc genus certaminis. | 364. *evinctis* caestu scilicet. | 366. *vel. a. vitt.*, aurata cornua habentem vittisque ornatum. | 369. v. G. 1, 214. | 273. Amycus rex Bebrycum, populi Bithyniae, nobilis pugil, victus a Polluce; Apollon. Rh. 2, 1 sqq. Theocr. 22, 27 sqq. — *veniens se ferebat*, non simpliciter i. q. venerat, sed iunct in his verbis notio dignitatis, hic quidem superbiae, in ipso incessu conspicuae, ut 1, 503. 4, 11. Ceteram v. 3, 310. | 375. *prima in proel.*, primus huius generis proelio se offerens, v. E. 9, 46. | 379. *adire* interdum dicitur in re ardua ac periculosa, unde *adire periculum*; cf. 1, 10. | 380. *exc. p.*, decedere sibi de victoria. | 382. *Tum*, v.

- Quae finis standi? quo me decet usque teneri?  
 385 Ducere dona iube. Cuncti simul ore fremebant  
 Dardanidae, reddique viro promissa iuebant.  
 Hic gravis Entellum dictis castigat Acestes,  
 Proxumus ut viridante tōro consederat herbae:  
 Entelle, heroum quondam fortissime frustra,  
 390 Tantane tam patiens nullo certamine tolli  
 Dona sines? ubi nunc nobis deus ille magister,  
 Nequiquam memoratus Eryx? ubi fama per omnem  
 Trinacriam, et spolia illa tuis pendentia tectis?  
 Ille sub haec: Non laudis amor, nec gloria cessit  
 395 Pulsa metu; sed enim gelidus tardante senecta  
 Sanguis hebet, frigentque effetae in corpore vires.  
 Si mihi, quae quondam fuerat, quaque inprobus iste  
 Exsultat fidens, si nunc foret illa iuventas,  
 Haud equidem pretio inductus pulchroque iuvenco  
 400 Venissem, nec dona moror. Sic deinde locutus  
 In medium geminos inmani pondere caestus  
 Proiecit, quibus acer Eryx in proelia suetus  
 Ferre manum duroque intendere brachia tergo.  
 Obstipuere animi: tantorum ingentia septem  
 405 Terga boum plumbo insuto ferroque rigeant.  
 Ante omnis stupet ipse Dares, longeque recusat;  
 Magnanimusque Anchisiades et pondus et ipsa  
 Huc illuc vinclorum immensa volumina versat.  
 Tum senior talis referebat pectore voces:  
 410 Quid, si quis caestus ipsius et Herculis arma  
 Vidisset tristemque hoc ipso in litore pugnam?  
 Haec germanus Eryx quondam tuus arma gerebat; —  
 Sanguine cernis adhuc sparsoque infecta cerebro; —  
 His magnum Alciden contra stetit; his ego suetus,  
 415 Dum melior viris sanguis dabat, aemula necdum

2, 391.] 384. *teneri*, in expectatione esse.] 386. *reddi* dicuntur res debitaе, promissae.] 387. *gravis*, i. e. graviter, v. 4, 494.] 388. ergo otiose sedentem Ent.] 389. *frustra*, quandoquidem nunc iners desides. Aliter accipies 2, 348.] 391. ubi nunc est illa gloria, quod magistro usus es Eryx, quem olim iactabas? et v. E. 8, 6. — *deus*, cf. vs. 483.] 395. v. 1, 19.] 400. *nec moror*, nec curo. — *deinde*, v. vs. 14.] 402. *quibus*, v. 2, 409. Hom. Il. 17, 530 „ἐκφείεσθ' αὐτοσχεδὸν ὀρμηθήτην.“] 403. v. G. 3, 283.] 404. *tantorum*, nam maximorum; ut G. 1, 149 *tam multa*, nam plurima; v. E. 1, 12. — Ergo is caestus ex corio septem maximorum boum factus erat.] 406. *longe recusare* dicitur ut *longe abhorrere*.] 407 sq. Caestus ex uno loro satis longo constabat, quo, tamquam vinculo ac volumine, manus et brachia religabantur; volumina igitur haec ipsum significant caestum, quibus huc illuc versandis pondus eius explorat Aeneas.] 409. *senior*, senex Entellus. — *ref. p.*, v. G. 2, 520.] 410. *caestus et arma*, caestum, quo armatus erat Hercules.] 411. *trist. pugnam*, qua interfectus est Eryx ab Hercule.] 412. v. vs. 24.] 413. *sanguine* eorum, quos vicit Eryx.] 415. *aemula*, quae, cum subtrahit robur, quasi invidet homini; Ovid. Met. 15,



- Temporibus geminis canebat sparsa senectūs.  
 Sed si nostra Dares haec Troiūs arma recusat,  
 Idque pio sedet Aeneae, probat auctor Acestes,  
 Aequemus pugnas. Erycis tibi terga remittit;  
 420 Solve metus; et tu Troianos exue caestus.  
 Haec fatus duplicem ex humeris reiecit amictum,  
 Et magnos membrorum artus, magna ossa lacertosque  
 Exuit, atque ingens media consistit arena.  
 Tum satus Anchisa caestus pater extulit aequos,  
 425 Et paribus palmas amborum innexuit armis.  
 Constitit in digitos extemplo arrectus uterque,  
 Bracchiaque ad superas interritus extulit auras.  
 Abduxere retro longe capita ardua ab ictu,  
 Inmiscuntque manus manibus, pugnamque lacessunt.  
 430 Ille pedum melior motu fretusque iuventa,  
 Hic membris et mole valens; sed tarda trementi  
 Genua labant, vastos quatit aeger anhelitus artus.  
 Multa viri nequiquam inter se volnera iactant,  
 Multa cavo lateri ingeminant et pectore vastos  
 435 Dant sonitus, erratque auris et tempora circum  
 Crebra manus, duro crepitant sub vulnere malae.  
 Stat gravis Entellus nisuque inmotus eodem,  
 Corpore tela modo atque oculis vigilantibus exit.  
 Ille, velut celsam oppugnat qui molibus urbem  
 440 Aut montana sedet circum castella sub armis,  
 Nunc hos, nunc illos aditus, omnemque pererrat  
 Arte locum, et variis adsultibus inritus urguet.  
 Ostendit dextram insurgens Entellus et alte  
 Extulit: ille ictum venientem a vertice velox  
 445 Praevидit, celerique elapsus corpore cessit;  
 Entellus viris in ventum effudit, et ultro  
 Ipse gravis graviterque ad terram pondere vasto  
 Concidit: ut quondam cava concidit aut Erymantho  
 Aut Ida in magna radicibus eruta pinus.

234 „Tempus edax rerum, tuque, invidiosa senectus, Omnia destruitis.“ | 417. *Troius*, tamquam qui se non possit comparare Siculo homini, certe in hoc genere pugnae. | 418. cf. 2, 660. — *auctor*, qui me ad hoc certamen excitavit. | 419. *terga*, cf. vs. 405. | 420. *Troian.*, i. e. tuos. | 421. *dupl. am.*, abollam, duplici seniori et caloris experti. | 422. v. G. 1, 295. | 426. „πόδεσσιν ἐπ' ἀκροτάτοισιν ἀερόθεις“, Apollon. Rh. 2, 90. | 433. Hom. Il. 5, 795 „ἔλκος ἀναψύχοντα, τὸ μιν βάλε Πάνδαρος ἰψ̄.“ | 437. *gravis* mole corporis, cf. 10, 771., tum 10, 207. 12, 458. — *nis*. i. *eod.*, firmiter insistens vestigio suo. | 439 sqq. Ille modo rem vi gerit et similis est oppugnanti urbem, modo quietior occasionem captat similis circumsedenti castella montana. — *molibus*, operibus et machinis. | 440. *sub armis*, armatus, ut vs. 585. adde 7, 434. 11. 464. | 446 sq. *ultro ipse*, nulla sua culpa, sed sua ipse mole gravatus procidit. | 447. v. G. 2, 290. |

- 450 Consurgunt studiis Teucris et Trinacria pubes;  
 It clamor caelo, primusque accurrit Acestes,  
 Aequaevumque ab humo miserans attollit amicum.  
 At non tardatus casu neque territus heros  
 Acrior ad pugnam redit ac vim suscitât ira;
- 455 Tum pudor incendit viris et conscia virtus,  
 Praecipitemque Daren ardens agit aequore toto,  
 Nunc dextra ingeminans ictus, nunc ille sinistra;  
 Nec mora, nec requies: quam multa grandine nimbi  
 Culminibus crepitant, sic densis ictibus heros
- 460 Creber utraque manu pulsât versatque Dareta.  
 Tum pater Aeneas procedere longius iras  
 Et saevire animis Entellum haud passus acerbis;  
 Sed finem inposuit pugnae, fessumque Dareta  
 Eripuit, mulcens dictis, ac talia fatur:
- 465 Infelix, quae tanta animum dementia cepit?  
 Non viris alias conversa quae numina sentis?  
 Cede deo. Dixitque et proelia voce diremit.  
 Ast illum fidi aequales, genua aegra trahentem,  
 Iactantemque utroque caput, crassumque cruorem
- 470 Ore eiectantem mixtosque in sanguine dentes,  
 Ducunt ad navis; galeamque ensemque vocati  
 Accipiunt; palmam Entello taurumque relinquunt.  
 Hic victor, superans animis tauroque superbus:  
 Nate dea, vosque haec, inquit, cognoscite, Teucris,
- 475 Et mihi quae fuerint iuvenali in corpore vires,  
 Et qua servetis revocatum a morte Dareta.  
 Dixit, et adversi contra stetit ora iuveni,  
 Qui donum adstabat pugnae, duosque reducta  
 Libravît dextra media inter cornua caestus,
- 480 Arduus, effracto in ossa cerebro.  
 Sternitur exanimis tremens procumbit humi bos.  
 Ille super talis effundit pectore voces:  
 Hanc tibi, Eryx, meliorem animam pro morte Daretis  
 Persolvo; hic victor caestus artemque repono.
- 485 Protinus Aeneas celeri certare sagitta  
 Invitat qui forte velint, et praemia ponit,

450. *studiis*, studium prae se ferentes, quo prosequabantur Entellum. | 451. *caelo*, v. E. 2, 30. | 455. *Tum p.*, accedit pudor, qui cet., cf. 3, 141. — *incend.* v., v. 10, 895. | 457. v. G. 2, 435. | 466. *alias*, divinas, Eryce Entellum invante, cf. vs. 391 sq. et 483. — *conversa*, mutata, tibi non propitia. | 471. cf. vs. 367. | 473. *sup. an.*, cui spiritus abunde est, quippe victoria elato. | 478. *reducta*, i. e. alte post caput sublata, ut 12, 307. | 480. Alii *intisit ossa sine in.* | 481. *lunge tremens bos* et *exanimis procumbit*; cf. 2, 613 sq. G. 1, 449. | 483. *meliozem*: melius est hanc, taurinam, animam persolvere, quam Daretis; contrariam in partem idem dicitur 12, 296. | 484. v. E. 7, 24. || 485—544. *Sagit-*

- Ingentique manu malum de nave Seresti  
 Erigit, et volucrem trajecto in fune columbam,  
 Quo tendant ferrum, malo suspendit ab alto.  
 490 Convenere viri, deiectamque aerea sortem  
 Accepit galea; et primus clamore secundo  
 Hyrtacidae ante omnis exit locus Hippocoontis;  
 Quem modo navali Mnestheus certamine victor  
 Consequitur, viridi Mnestheus evinctus oliva.  
 495 Tertius Eurytion, tuus, o clarissime, frater,  
 Pandare, qui quondam, iussus confundere foedus,  
 In medios telum torsisti primus Achivos.  
 Extremus galeaque ima subsedit Acestes,  
 Ausus et ipse manu iuvenum temptare laborem.  
 500 Tum validis flexos incurvant viribus arcus  
 Pro se quisque viri et depromunt tela pharetris.  
 Primaque per caelum nervo stridente sagitta  
 Hyrtacidae iuvenis volucris diverberat auras;  
 Et venit, adversique infigitur arbore mali.  
 505 Intremuit malus, timuitque exterrita pennis  
 Ales, et ingenti sonuerunt omnia plausu.  
 Post acer Mnestheus adducto constitit arcu,  
 Alta petens, pariterque oculos telumque tetendit.  
 Ast ipsam miserandus avem contingere ferro  
 510 Non valuit; nodos et vincula linea rupit,  
 Quis innexa pedem malo pendebat ab alto;  
 Illa notos atque atra volans in nubila fugit.  
 Tum rapidus, iamdudum arcu contenta parato  
 Tela tenens, fratrem Eurytion in vota vocavit,  
 515 Iam vacuo laetam caelo speculatus, et alis  
 Plaudentem nigra figit sub nube columbam.  
 Decidit exanimis, vitamque reliquit in astris  
 Aetheriis, fixamque refert delapsa sagittam.  
 Amissa solus palma superabat Acestes;  
 520 Qui tamen aerias telum contendit in auras,

*tandi certamen.* cf. Hom. II. 23, 850 sqq. | -487. *ingenti manu*, magna, qualis  
 tribuitur diis atque heroibus, *χειρὶ παχείῃ*. | 488. *traiectus funis* significat  
 nodum, quo columba vincitur, cf. vs. 510 sq. | 491. v. vs. 338. — Hom. II. 3,  
 316—325 „*κλήρους ἐν κυνέῃ χαλκήρεϊ πᾶλλον, ... ὀππότερος δὴ πρόσθεν  
 ἀφείη χάλκεον ἔγχος ... Πάριος δὲ θοῶς ἐκ κλήρος ὄρουσεν*.“ | 493. *victor*,  
 quippe fuit unus ex numero victorum, accepit enim *τὰ δευτερεῖα*, cf. vs. 258 sqq. |  
 494. v. vs. 110. | 496. Hom. II. 4, 88 sqq. — *confundere*: „*ἐπεὶ σὺν  
 γ' ὄρεϊ ἔχευαν*“ Hom. vs. 269. | 498. v. G. 2, 290. | 504. *Et*: Copulae in-  
 terdum rem statim consecutam indicant, ut 1, 82. 6, 547. 8, 124. 9, 22. 117.  
 10, 495. 877. G. 3, 252. | 505. *t. ext. p.*, timorem terroremque suum pennis,  
 s. alarum tremore, significavit. | 506. *plausu* alarum columbae, cf. vs. 516. |  
 511. *pedem*, v. E. 3, 106. | 512. v. 1, 544 et 4, 705. | 513. *rapidus*, *σπερχό-  
 μενος* in eadem re dixit Hom. II. 23, 870. | 514. v. vs. 234. | 517. v. 3, 619. |

- Ostentans artemque pater arcumque sonantem.  
 Hic oculis subitum obicitur magnoque futurum  
 Augurio monstrum; docuit post exitus ingens,  
 Seraque terrifici cecinerunt omina vates.
- 525 Namque volans liquidis in nubibus arsit arundo,  
 Signavitque viam flammis, tenuisque recessit  
 Consumpta in ventos; caelo ceu saepe refixa  
 Transcurren crinemque volantia sidera ducunt.  
 Attonitis haesere animis, Superosque precati
- 530 Trinacrii Teucrique viri; nec maxumque omen  
 Abnuat Aeneas; sed laetum amplexus Acesten  
 Muneribus cumulat magnis, ac talia fatur:  
 Sume, pater; nam te voluit rex magnus Olympi  
 Talibus auspiciis exsortem ducere honorem.
- 535 Ipsius Anchisae longaevi hoc munus habebis,  
 Cratera inpressum signis, quem Thracius olim  
 Anchisae genitori in magno munere Cisseus  
 Ferre sui dederat monumentum et pignus amoris.  
 Sic fatus cingit viridanti tempora lauro,
- 540 Et primum ante omnis victorem appellat Acesten.  
 Nec bonus Eurytion praelato invidit honori,  
 Quamvis solus avem caelo deiecit ab alto.  
 Proxumus ingreditur donis, qui vincula ruit,  
 Extremus, volucri qui fixit arundine malum.
- 545 At pater Aeneas, nondum certamine misso,  
 Custodem ad sese comitemque inpubis Iuli

521. *pater* ita praegresso Pronomini (*Qui*) subiicitur, ut dignitas hominis ostendatur, ut *viro* supra vs. 262, *senior* 12, 401. — *artem*, quae ipsa cernitur in sagitta fortiter et cum gravi sono arcus emittenda. | 523 sq. vates, omen illud interpretantes, aliquanto post gravi cum rerum conversione eventum habiturum canebant; et gratum Aeneae fuisse docet vs. 530—32. Monstratur eo augurio apotheosis C. Iulii Caesaris, cuius anima credebatur in stellam crinitam (cf. vs. 528) conversa. Sueton. Iul. 88 „Ludis, quos primo consecratos ei (*Caesari*) Augustus edebat, stella cœnita fulsit, creditumque est animam esse Caesaris in caelum recepti.“ Compara haec cum his versibus Virgilianis: utrobique ludi divo parenti consecrati, utrobique stella crinita. Ac prope manifestum est, ludis ab Augusto editis visaeque eo tempore stellae crinitae deberi haec scite inventa a Virgilio. Nec haerendum in eo, quod Acestae obtigit illud ostentum; nam et ipse Troianus fuit, et, id quod maximum est, evenerunt haec in honore Anchisae, proavi Divi Iulii. | 525. Servius „*Nubes* pro aere posuit; nubes enim liquidæ esse non possunt.“ | 527. v. 4, 705 et G. 1, 365. | 534. *voluit*, ostendit *his auspiciis* se velle exsorti, i. e. extra sortem dato s. extraordinario ac praecipuo aliquo, honore te affici. | 536. cf. vs. 267 et v. 4, 500. | 537. *in m. m.*, quod esset in numero magnorum munerum habendum. — *Cisseus*, rex Thraciae, pater Hecubae. | 540. v. 3, 437. | 541. *prael. honori*, quippe ipsius honori praelatus est honor Acestae. | 543. v. vs. 68. || 545—603. *Ludicrum Troiae*. | 545. *cert. m.*, certantium ac spectantium turba dimissa. — Describitur autem puerorum in equis concertatio, qui ludus postea *Troia* appellatus est, retentus diu, ut a Sulla (Plut. Cat. min. 3), a Iul. Caesare (Sueton. c. 39), ab

- Epytiden vocat, et fidam sic fatur ad aurem:  
 Vade age, et Ascanio, si iam puerile paratum  
 Agmen habet secum cursusque instruxit equorum,  
 550 Ducat avo turmas, et sese ostendat in armis, •  
 Dic, ait. Ipse omnem longo decedere circo  
 Infusum populum, et campos iubet esse patentis.  
 Incedunt pueri, pariterque ante ora parentum  
 Frenatis lucent in equis, quos omnis euntis  
 555 Trinacriae mirata fremit Troiaeque iuventus.  
 Omnibus in morem tonsa coma pressa corona;  
 Cornea bina ferunt praefixa hastilia ferro,  
 Pars levis humero pharetras; it pectore summo  
 Flexilis obtorti per collum circulus auri.  
 560 Tres equitum numero turmae, ternique vagantur  
 • Ductores; pueri bis seni quemque secuti  
 Agmine partito fulgent paribusque magistris.  
 Una acies iuvenum, ducit quam parvus ovantem  
 Nomen avi referens Priamus, tua clara, Polite,  
 565 Progenies, auctura Italos; quem Thracius albis  
 Portat equus bicolor maculis, vestigia primi  
 Alba pedis frontemque ostentans arduus albam.  
 Alter Atys, genus unde Atii duxere Latini,  
 Parvus Atys, pueroque puer dilectus Iulo.  
 570 Extremus formaque ante omnis pulcher Iulus  
 Sidonio est invectus equo, quem candida Dido  
 Esse sui dederat monumentum et pignus amoris.  
 Cetera Trinacriis pubes senioris Acestae  
 Fertur equis.  
 575 Excipiunt plausu pavidos, gaudentque tuentes  
 Dardanidae, veterumque agnoscunt ora parentum.  
 Postquam omnem laeti consessum oculosque suorum  
 Lustravere in equis, signum clamore paratis

Augusto (Suet. c. 43.) multisque Imperatoribus. | 547. *Epyt.*, Periphantem. | 550. *avo*, in honorem Anchisae, avi. | 553. *pariter*, pari ornatu paribusque armis. | 556. *in morem*, ex more, *tonsa*, v. G. 3, 21. Ea corona imposita erat galeae, cf. 7, 751, non ipsi comae, quae ita dicitur premi, ut omnis res subiecta alteri, etsi inter utramque aliquid (h. l. galea) intersit medium. | 559. *obtorti*, *στρογγύον*. Significatur torques, dictus ab auro in annulos inter se implicatos contorto. | 562. *agmine partito* sic puta, ut singuli cuiusque agminis ordines ex binis pueris constiterint. — *magistris*, cf. vs. 548 et 669. — *paribus* inter se numero, sic ut bini cum singulis turmis fuerint. — Ceterum verbum *fulgent* mendosum videtur. | 563. v. 1, 639. | 565. *auct. It.*, qui (Priamus ille minor) futurum erat ut genus suum in Italia propagaret. Huius patrem Politorium in Latio condidisse Cato in Origg. tradidit; contra Virgilius 2, 526 sqq. Politen ex excidio Troiae occisum scribit; quare haec videtur esse mens poetae: oppidum illud a filio Polittae conditum esse et paterni honoris causa ita appellatum. | 569. *puero p. dil. I.*: datum hoc honori gentis Atiae, unde materna origo Augusti,

- Epytides longe dedit insonuitque flagello.  
 580 Olli discurrere pares, atque agmina terni  
 Diductis solvere choris, rursusque vocati  
 Convertere vias infestaque tela tulere.  
 Inde alios ineunt cursus aliosque recursus  
 Adversi spatiis, alternosque orbibus orbis  
 585 Impediunt, pugnaeque cient simulacra sub armis;  
 Et nunc terga fuga nudant, nunc spicula vertunt  
 Infensi, facta pariter nunc pace feruntur.  
 Ut quondam Creta fertur Labyrinthus in alta  
 Parietibus textum caecis iter ancipitemque  
 590 Mille viis habuisse dolum, qua signa sequendi  
 Falleret indeprensus et inremeabilis error;  
 Haud alio Teucrum nati vestigia cursu  
 Impediunt, texuntque fugas et proelia ludo,  
 Delphinum similes, qui per maria humida nando  
 595 Carpathium Libycumque secant [luduntque per undas].  
 Hunc morem cursus atque haec certamina primus  
 Ascanius, Longam muris cum cingeret Albam,  
 Rettulit et Priscos docuit celebrare Latinos,  
 Quo puer ipse modo, secum quo Troia pubes;  
 600 Albani docuere suos; hinc maxuma porro  
 Accepit Roma, et patrium servavit honorem;

Sueton. Octav. 4. | 580 sq. *Discurrunt*, omnes turmae (*pares*) pariter, ita quidem, ut suum quaeque turma agmen in duas aequales partes solvat, quarum una dextrorsum discedit, altera sinistrorsum, hi sunt *chori diducti*. Pro *Diductis* alii *Ded.* — *vocati* a pueris ductoribus. | 582—87. Postquam binae illae partes (*chori*) infestis (v. 9, 512) telis inter se concurrerunt, instituunt alios cursus, recurrunt deinde conversi inter se, i. e. *adversi* sp. Ex vs. 586 sq. intelligitur tria esse potissimum, quae faciant post primum congressum: fugiunt, denuo congregiuntur velut pugnaturs, binas partes rursus in singulas turmas confundunt. Pars autem fugiens cum, quo eluderet, ut fit, sequentem, in orbes quosdam equitaret, necesse erat etiam insectationem suos habuisse anfractus, qui secarent illos orbes et quodammodo suis orbibus implicarent; sic alternatim orbibus orbes impediunt. Ceterum fieri non potuit, quin in eiusmodi cursu ars et peritia equitandi ab utraque parte ostenderetur. | 584. Alii *Adversi* et *alternis*. | 585. proprie ipsa pugna certi dicitur. — *sub a.*, v. vs. 440. | 587. *pariter*, nempe in unum agmen coniuncti. | 588. de Labyrintho cf. Ovid. Met. 8, 159 sqq. | 589 sq. *P. t. caec.*, iter perplexum inter parietes, qui varios flexus eius videre prohibent. — *anc. M. v. h. dol.*, mille viis fallacibus effecisse, ut semper anceps sis, quo debeas pergere. — *qua*, v. G. 1, 90. — *signa s. Falleret*, error, qui efficeret, ut laterent sive nulla apparerent signa, quae quis sequeretur. | 591. *indepr.*, carens certis notis, quibus animadversis ex eo te expedire possis. — *irremeab.*, qui reditu, ergo exitu, destitutus est. | 593. *Imp.*, cf. vs. 585. | 595. Designatur celeritas delphinorum (cf. Cic. de Nat. Deor. 2, 85), qua modo ex Carpathio mari in Libycum, modo ex hoc in illud transeunt. | 598. *Rett.*, instauravit. — *priscos an Priscos?* Et Prisci Latini dicebantur illi antiquissimi Latini, quorum urbes (30) iam multo ante Romam ipsamque Albam conditam foedere inter se iunctae erant; postea principem inter has foederatas civitates locum Alba obtinuit. | 601. *patr. hon.*, ludum illum, qui fuit apud maiores suos, Troianos,

- Troiaque nunc, pueri Troianum dicitur agmen.  
 Hac celebrata tenus sancto certamina patri.  
 Hic primum Fortuna fidem mutata novavit.
- 605 Dum variis tumulo referunt sollemnia ludis,  
 Irim de caelo misit Saturnia Iuno  
 Iliacam ad classem, ventosque adspirat eunti,  
 Multa movens, necdum antiquum saturata dolorem.  
 Illa, viam celerans per mille coloribus arcum,
- 610 Nulli visa cito decurrit tramite virgo.  
 Conspicit ingentem consessum, et litora lustrat  
 Desertosque videt portus classemque relictam.  
 At procul in sola secretae Troades acta  
 Amisum Anchisen flebant, cunctaeque profundum
- 615 Pontum adspectabant fientes. Heu tot vada fessis  
 Et tantum superesse maris! vox omnibus una.  
 Urbem orant; taedet pelagi perferre laborem.  
 Ergo inter medias sese haud ignara nocendi  
 Coniicit, et faciemque deae vestemque reponit;
- 620 Fit Beroe, Marii coniunx longaeva Dorycli,  
 Cui genus et quondam nomen natique fuissent,  
 Ac sic Dardanidum mediam se matribus infert.  
 O miserae, quas non manus, inquit, Achaica bello  
 Traxerit ad letum patriae sub moenibus! o gens
- 625 Infelix, cui te exitio Fortuna reservat?  
 Septuma post Troiae excidium iam vertitur aestas,  
 Cum freta, cum terras omnis, tot inhospita saxa  
 Sideraque emensae ferimur, dum per mare magnum  
 Italiam sequimur fugientem et volvimur undis.
- 630 Hic Erycis fines fraterni atque hospes Acestes:  
 Quis prohibet muros iacere et dare civibus urbem?  
 O patria et rapti nequiquam ex hoste Penates,  
 Nullane iam Troiae dicentur moenia? nusquam

in honore.] 602. ad Troia repetes ex vs. 596 *is cursus, id ludicrum*. — dicitur, numero Verbi ad Praedicatum applicato, ut apud Liv. 1, 1 „Gens universa Veneti appellati.“] 603. *Hac c. tenus*, per tmesin pro *Hactenus cel.*] 604—699. *Dolo lunonis classis Troiana incenditur a Troadibus; quattuor naves igne absumptae*. Nec hoc inventum a poeta, sed tractum ex historia, cf. Dion. Hal. 1, 52.] 604. *primum*, cum ante nihil turbarum ludis obiecisset. — *fid. nov.*, facta est infida.] 607. v. 4, 223.] 608. v. E. 3, 106.] 609. *Illā ... virgo*, v. G. 4, 457.] 613. *acta, ἀκτῆς*. — Non decebat scilicet mulieres eiusmodi ludis interesse.] 619. Deae vestibus utebantur ad imos pedes demissis, cf. 1, 404; praeterea Iridis propria est vestis versicolor.] 620. *Marii*, qui patrem habuit Μάρκος, Marum, quod nomen est ap. Sil. 6, 74. 98. 136; Μάρκος audit unus o principibus Troianis Hom. Il. 17, 319: — Alii *Tmarii, Ismarii*.] 621. *Cui, Doryclo*. — Coniunctivum posuit poeta, quo causam indicaret, cur Iris Beroes formam sibi induere voluisset.] 626. *vertitur*, inclinat se.] 628. *Sidera*, puta iter, quod sit, dum certa quaedam sidera navigantibus inimica tempestates concitant. — *emensae*, v. G. 1, 206.] 629. *Jug.*, cf. 3, 496.] 630. v. vs. 24.] 631. Alii *Quid.*] 632.

- Hectoreos amnis, Xanthum et Simoenta, videbo?  
 635 Quin agite et mecum infaustas exurite puppis.  
 Nam mihi Cassandrae per somnum vatis imago  
 Ardentis dare visa faces: Hic quaerite Troiam;  
 Hic domus est, inquit, vobis. Iam tempus agi res,  
 Nec tantis mora prodigiis: en quattuor arae  
 640 Neptuno; deus ipse faces animumque ministrat.  
 Haec memorans prima infensum vi corripit ignem,  
 Sublataque procul dextra connixa coruscat,  
 Et iacit. Arrectae mentes stupefactaque corda  
 Iliadum. Hic una e multis, quae maxuma natu,  
 645 Pyrgo, tot Priami natorum regia nutrix:  
 Non Beroe vobis, non haec Rhoeteia, matres,  
 Est Dorycli coniunx; divini signa decoris  
 Ardentisque notate oculos; qui spiritus illi,  
 Qui voltus, vocisque sonus, vel gressus eunti.  
 650 Ipsa egomet dudum Beroen digressa reliqui  
 Aegram, indignantem, tali quod sola careret  
 Munere, nec meritos Anchisae inferret honores.  
 Haec effata.  
 At matres primo ancipites, oculisque malignis  
 655 Ambiguae spectare rates miserum inter amorem  
 Praesentis terrae fatisque vocantia regna:  
 Cum dea se paribus per caelum sustulit alis  
 Ingentemque fuga secuit sub nubibus arcum.  
 Tum vero attonitae monstris actaeque furore  
 660 Conclamant, rapiuntque focis penetralibus ignem;  
 Pars spoliant aras, frondem ac virgulta facesque  
 Coniiciunt. Furit inmissis Volcanus habenis  
 Transtra per et remos et pictas abiete puppis.  
 Nuntius Anchisae ad tumulum cuneosque theatri  
 665 Incensas perfert navis Eumelus, et ipsi

vs. 1, 378. | 634. novam patriam, novam quasi Troiam; et v. vs. 756. | 639. *tant. prodig.*, rei per somnum tam manifesto monstratae. | 640. *an.*, audaciam. | 643. *Et iacit*, v. 12, 730. | 646. Rhoetum promontorium Troadis, itaque *Rhoeteia* i. q. Troiana, et cf. vs. 620. | 649. v. 1, 405. | 652. *tali Munere*, sacrificio caerimoniisque inferiarum tam sollemnibus. — *inferret*, non interesset ferendis Anchisae inferiis. | 654 sqq. *ancipites*: primum omnino ac simpliciter ancipites, dubiae, appellantur, tum, quod universe pronuntiatum erat, in suas partes distributum explicatur: ambigebant, utrum in Sicilia manere mallet, an navigare in Italiam. | 655. *mis. am.*, ut apud Terentium: „eam (puellam) *misere amat*,” misere amare autem est i. q. vehementer et cum cruciatu quodam cupere id, quo nondum sis potitus. | 656. *fatis*, quod ex fato promissum erat regnum in Italia Troianis. | 657. v. 4, 252. | 658. *secuit arc.*, v. 12, 368. supra vs. 609 „Iris ... viam celerans per mille coloribus arcum.” | 660. *penetr.*, qui erant in interioribus partibus domorum proximarum. | 662. v. G. 1, 295. — *inm. hab.*, ergo quasi effrenatus. | 663. *pict.*, *νήας μιλτοπαρήους* Homer. — *abiete*, Ablativus materiam significans, ex qua quid factum, ut 2, 765. 3, 286. 10, 636. 784.



- Respiciunt atram in nimbo volitare favillam.  
 Primus et Ascanius, cursus ut laetus equestris  
 Ducebat, sic acer equo turbata petivit  
 Castra, nec exanimis possunt retinere magistri.  
 670 Quis furor iste novus? quo nunc, quo tenditis, inquit,  
 Heu miserae cives? non hostem inimicaque castra  
 Argivom, vestras spes uritis. En, ego vester  
 Ascanius! — galeam ante pedes proiecit inanem,  
 Qua ludo indutus belli simulacra ciebat.  
 675 Adcelerat simul Aeneas, simul agmina Teucrum.  
 Ast illae diversa metu per litora passim  
 Diffugiunt, silvasque et sicubi concava furtim  
 Saxa petunt; piget incepti lucisque, suosque  
 Mutatae adgnoscent, excussa pectore Iuno est.  
 680 Sed non idcirco flammae atque incendia viris  
 Indomitas posuere; udo sub robore vivit  
 Stuppa vomens tardum fumum, lentusque carinas  
 Est vapor, et toto descendit corpore pestis,  
 Nec vires heroum infusaque flumina prosunt.  
 685 Tum pius Aeneas humeris abscindere vestem,  
 Auxilioque vocare deos et tendere palmas:  
 Iuppiter omnipotens, si nondum exosus ad unum  
 Troianos, si quid pietas antiqua labores  
 Respicit humanos, da flammam evadere classi  
 690 Nunc, Pater, et tenuis Teucrum res eripe Leto.  
 Vel tu, quod superest, infesto fulmine Morti,  
 Si mereor, demitte, tuaque hic obrue dextra.  
 Vix haec ediderat, cum effusis imbris atra  
 Tempestas sine more furit, tonitruque tremescunt  
 695 Ardua terrarum et campi; ruit aethere toto  
 Turbidus imber, aqua densisque nigerrimus austris;  
 Implenturque super puppes; semiusta madescent  
 Robora; restinctus donec vapor omnis, et omnes,  
 Quattuor amissis, servatae a peste carinae.

669. *castra nautica*, classem. — *mag.*, v. vs. 562. | 671. *miserae*, v. 11, 175. | 673. *gal. inanem*, „vacuam,” Servius, utpote exutam capiti, ut facile agnosci posset Ascanius. | 674. v. vs. 585. | 677. *iunge furtim petunt.* | 678. cf. 4, 451. | 679. *Iuno*, furor ab Iunone iniectus, cf. vs. 659; Silius 7, 496 „*Fabium exuerat mente.*” | 681. *vivit*: „ignae vivite inextincti,” Ovid. Fast. 3, 428. | 687. *ad un.*, i. e. ad unum omnes. Cic. Ep. ad Fam. 10, 16 „sunt assensi *ad unum.*” id. Lael. c. 23 „de amicitia *omnes ad unum* idem sentiunt.” — Ceterum ut praegresso pronomine *Tu* omittitur verbum *es* (Tib. 4, 13, 11 sq. „Tu mihi curarum requies, tu nocte vel atra Lumen, et in solis tu mihi turba locis.” adde Virg. Ecl. 5, 4. 34. 8, 48. 50.), ita Vocativo praecedente recte omitti poterat. | 688. *pietas ant.*, solita clementia et misericordia tua. | 691. *quod superest*, reliquam classem, cf. vs. 796. | 692. *dem. M.*, ut vs. 690 „res eripe Leto.” | 693. *eff.*, v. G. 2, 352. | 694. *sine more*, immoderate. | 696. *densis*, v. G. 3, 196. — *nig.*, quo densiores sunt pluviae, eo videntur nigriores. | 697.

- 700 At pater Aeneas, casu concussus acerbo,  
Nunc huc ingentis, nunc illuc pectore curas  
Mutabat versans, Siculisne resideret arvis,  
Oblitus fatorum, Italasne capesseret oras.  
Tum senior Nautes, unum Tritonia Pallas  
705 Quem docuit multaue insignem reddidit arte —  
Haec responsa dabat, vel quae portenderet ira  
Magna deum, vel quae fatorum posceret ordo —  
Isque his Aenean solatus vocibus inquit:  
Nate dea, quo fata trahunt retrahuntque, sequamur;  
710 Quidquid erit, superanda omnis fortuna ferendo est.  
Est tibi Dardanius divinae stirpis Acestes:  
Hunc cape consiliis socium et coniunge volentem;  
Huic trade, amissis superant qui navibus, et quos  
Pertaesum magni incepti rerumque tuarum est;  
715 Longaeuosque senes ac fessas aequore matres,  
Et quidquid tecum invalidum metuensque pericli est,  
Delige, et his habeant terris sine moenia fessi;  
Urbem appellabunt permissio nomine Acestam.  
Talibus incensus dictis senioris amici,  
720 Tum vero in curas animo diducitur omnis.  
Et Nox atra polum bigis subvecta tenebat:  
Visa dehinc caelo facies delapsa parentis  
Anchisae subito talis effundere voces:  
Nate mihi vita quondam, dum vita manebat,

*super, ὑπερθεῖν, et significantur stegae navium.* || 700—761. *Nocte insequenti Anchises apparet Aeneae clade partis navium suarum perculso eumque Iovis verbis hortatur, ut Nautae consilium secutus omnem turbam imbellem in Sicilia apud Acesten relinquat, ipse cum robore iuvenum in Italiam naviget, duce Sibylla ad inferos descendat atque ex ore parentis ibi cognoscat, quae scire eum maxime intersit. Morem gerit Aeneas consiliis paternis; designatur nova urbs Acesta (sive Segesta), quam condant relictī Troiani, templum in Eryce Veneri fundatur, tumulto Anchisae additur lucus et sacerdos.* | 702. *Mutabat* sc. eas, nunc hanc nunc illam volvens animo. | 703. v. vs. 656. | 704. *Nautes*, a quo gens Nautia originem ducebat, Palladium secum Troia asportasse narrabatur. Ipse fuit sacerdos Minervae, idque sacerdotium apud gentem Nautiam remansit. — *unum* omnium maxime; Cic. Verr. l. 4, 1, 3 „*quae tibi una in amore atque in deliciis fuit.*“ | 706. *Haec*, Pallas, non solum erudierat Nauten, sed consulta ab eo etiam *resp. dabat*; *respondere* est deorum consultorum. | 708. *Per Isque* reditur ad orationem duobus versibus interpositis interruptam. — *solatus*, v. G. 1, 206. | 709. *trah. retrah.*, id est: iterum iterumque trahunt. | 710. *Quidquid erit*, quidquid obvenerit. | 711. *div.*, cf. vs. 38 sq. | 712. *volentem*, v. 3, 457. | 713. *superant*, quibus recipiendis naves post quattuor amissas reliquae non sufficiunt. | 715. *Long. s.*, ut Tibull. 1, 8, 50 „*veteres senes*,“ ductum ex Homericō illo γεραῖοι παλαιγενέες, Il. 17, 561. — *matres*, ergo non etiam iuniores feminas, cf. 11, 35. | 718. *perm. nom.* Gloriam quaerebant novarum urbium conditores ex eo, ut ex ipsorum nominibus eas appellarent; eam gloriam, quae videbatur Aeneae deberi, Acestae permitti vult Nautes. | 720. *Tum vero* indicat insignem effectum ex causa modo memorata natum. Liv. 2, 29 „*Quo repulso tum vero*“ cet. v. etiam 2, 391. | 721. *Et*, v. 2, 801. | 722.

- 725 Care magis, nate Iliacis exercite fati,  
Inperio Iovis huc venio, qui classibus ignem  
Depulit et caelo tandem miseratus ab alto est.  
Consiliis pare, quae nunc pulcherrima Nautes  
Dat senior; lectos iuvenes, fortissima corda,  
730 Defer in Italiam. Gens dura atque aspera cultu  
Debellanda tibi Latio est. Ditis tamen ante  
Infernas accede domos, et Averna per alta  
Congressus pete, nate, meos. Non me impia namque  
Tartara habent tristesve umbrae, sed amoena piorum  
735 Concilia Elysiumque colo. Huc casta Sibylla  
Nigrarum multo pecudum te sanguine ducet.  
Tum genus omne tuum, et quae dentur moenia, disces.  
Iamque vale; torquet medios Nox humida cursus,  
Et me saevus equis Oriens adflavit anhelis.  
740 Dixerat, et tenuis fugit ceu fumus in auras.  
Aeneas, Quo deinde ruis? quo proripis? inquit,  
Quem fugis? aut quis te nostris complexibus arcet?  
Haec memorans cinerem et sopitos suscitatur ignis,  
Pergameumque Larem et canae penetralia Vestae  
745 Farre pio et plena supplex veneratur acerra.  
Extemplo socios primumque arcessit Acesten,  
Et Iovis inperium et cari praecepta parentis  
Edocet, et quae nunc animo sententia constet.  
Haud mora consiliis, nec iussa recusat Acestes.  
750 Transcribunt urbi matres, populumque volentem  
Deponunt, animos nil magnae laudis egentis.  
Ipsi transtra novant, flammisque ambesa reponunt  
Robora navigiis, aptant remosque rudentisque,  
Exigui numero, sed bello vivida virtus.  
755 Interea Aeneas urbem designat aratro  
Sortiturque domos; hoc Ilium et haec loca Troiam

facies quaedam in similitudinem Anchisae efficta, cf. vs. 735. | 725. *Il. ex. f.*, v. 3, 182. | 727. v. 3, 182. | 730. *asp. c.*, asperos colens mores; atque ut hoc morum est, ita illud *dura* naturae; iam cf. 9, 604—613. | 732. v. 3, 386 et 442. | 734. *tristesve u.*, significatur locus heroibus assignatus tristis ac sole carens, uti appellatur a Deiphobo 6, 534 et 545. | 736. cf. 6, 243—254. | 739. Donatus: „Non permittitur mortuis loqui, cum sol fuerit exortus. — *saevus*, quoniam iavium separat a filio.“ Ceterum v. G. 1, 250. | 741. *deinde*, post brevem hunc sermonem, antequam amplexum tuum petere potui. | 744. *p. V.*, Vestam in penetralibus positam, quo veneraturus eam accessisse putandus est; eam *canam* dicit ut unam ex diis antiquissimis. | 745. Somnia procurabantur pio farre, i. e. mola salsa (sancta ap. Tibull. 1, 5, 14) et ture; Plaut Amphitr. 2, 2, 108. Tibull. 3, 4, 9 sq. | 746. v. 3, 437. | 749. *consiliis* accipiendis. | 751. *Depon.*, ut inutile onus. — *nil* gravius negat, quam *non*. | 752. *rep.*, cum integris permutant. | 753. *aptant*, v. G. 2, 359. | 754. *b. v. v.*, i. e. tales, quibus est vivida ad bellum virtus, viri fortes ac strenui; cf. 11, 338 sq. | 755. Locum condendae urbis salco includere solebant Romani. | 756. *Sort.*, sorte assignat. — *Ilium* urbs,

- Esse iubet. Gaudet regno Troianus Acestes,  
Indicique forum et patribus dat iura vocatis.  
Tum vicina astris Erycino in vertice sedes
- 760 Fundatur Veneri Idaliae, tumuloque sacerdos  
Ac lucus late sacer additur Anchiseo.
- Iamque dies epulata novem gens omnis, et aris  
Factus honos: placidi straverunt aequora venti,  
Creber et adspirans rursus vocat Auster in altum.
- 765 Exoritur procurva ingens per litora fletus;  
Complexi inter se noctemque diemque morantur.  
Ipsae iam matres, ipsi, quibus aspera quondam  
Visa maris facies et non tolerabile numen,  
Ire volunt omnemque fugae perferre laborem.
- 770 Quos bonus Aeneas dictis solatur amicis  
Et consanguineo lacrimans commendat Acestae.  
Tris Eryci vitulos et Tempestatibus agnam  
Caedere deinde iubet solvique ex ordine funem.  
Ipse, caput tonsae foliis evinctus olivae,
- 775 Stans procul in prora pateram tenet, extaque salsos  
Porricit in fluctus ac vina liquentia fundit.  
Prosequitur surgens a puppi ventus euntis.  
Certatim socii feriunt mare et aequora verrunt.
- At Venus interea Neptunum exercita curis
- 780 Adloquitur, talisque effundit pectore questus:  
Iunonis gravis ira nec exsaturabile pectus  
Cogunt me, Neptune, preces descendere in omnis;

*Troia regio; et flavios, qui erant in ea parte Siciliae, Scamandrum et Simoenta appellasse fertur Aeneas.* | 758. *Ind. f.*, locum tempusque exercendorum iudiciorum designat. — *p. d. i. v.*, iis, quos legerat patres s. senatores, leges deliberandas proponit. | 762—826. *Discessus Troianorum. Neptunus precibus Veneris exoratus navigantibus tutum praestat mare.* | 762. Particulis *Iam, Iamque* saepe subiicitur enuntiatum a coniunctione *cum* incipiens, ut 7, 104. 3, 135. 7, 160 et 166, sed omittitur eadem interdum, ut 9, 459. | 763. *v. E.* 2, 26. | 764. Ordinabis verba hunc in modum: *Et vocat creber* (i. e. validior nec intermissus, cf. 3, 530) *adspirans*; *v. G.* 1, 163. | 766. *Conpl. i. s.*, cf. *Liv.* 7, 42. *Cic. Ep. ad Att.* 6, 1 „Cicerones pueri amant inter se.“ *v. G.* 1, 163. | 768. *numen.* Mare inter deos numerat Hygin. fab. praefat. „Ex Aethere et Die Terra, Caelum, Mare,“ et paulo post: „Ex Ponto et Mari Oceanitides.“ Uno vocabulo Maris complectitur numina marina Virgilius 12, 197. Ac numen eius intolerabile hic dicitur iis, qui, experti eius violentiam, horrent se ei denuo committere. Intolerandus, immanis, vesanus, a Plauto dicitur Neptunus *Trin.* 4, 1, 7. — Alii *nomen.* | 769. cf. 1, 2. | 772. *Eryci*, *v. vs.* 24. — „Tempestates populi Romani ritibus consecratae sunt,“ *Cic. Nat. D.* 3, 20. *Horat. Epod.* 10, 23 et cf. 3, 120. | 773. *ex ord.*, ita, ut solvat alia navis post aliam. — *fun.*, *v. G.* 1, 457. | 774. *v. G.* 3, 21. — *olivae*, quia pacem deorum implorat. | 775. alias sacrae fiunt in puppi, hic in prora, quia discedit e portu. | 776. *Cic. Nat. D.* 3, 20 „Nostri quidem duces mare ingredientibus immolare hostiam fluctibus consueverunt.“ | 782. *in omn. puta etiam in humillimas*; humile est enim, supplicare etiam adversario, cf. *vs.* 810 sq. 2, 610. *Hom. Il.*

- Quam nec longa dies, pietas nec mitigat ulla,  
Nec Iovis inperio fatisque infracta quiescit.
- 785 Non media de gente Phrygum exedissee nefandis  
Urbem odiis satis est, nec poenam traxe per omnem:  
Reliquias Troiae, cineres atque ossa peremptae  
Insequitur. Causas tanti sciat illa furoris.  
Ipse mihi nuper Libycis tu testis in undis
- 790 Quam molem subito excierit: maria omnia caelo  
Miscuit, Aeoliis nequiquam freta procellis,  
In regnis hoc ausa tuis.  
Per scelus ecce etiam Troianis matribus actis  
Exussit foede puppis, et classe subegit
- 795 Amissa socios ignotae linquere terrae.  
Quod superest, oro, liceat dare tuta per undas  
Vela tibi, liceat Laurentem attingere Thybrim,  
Si concessa peto, si dant ea moenia Parcae.  
Tum Saturnius haec domitor maris edidit alti:
- 800 Fas omne est, Cytherea, meis te fidere regnis,  
Unde genus ducis. Merui quoque; saepe furores  
Compressi et rabiem tantam caelique marisque.  
Nec minor in terris, Xanthum Simoentaque testor,  
Aeneae mihi cura tui. Cum Troia Achilles
- 805 Exanimata sequens inpingeret agmina muris,  
Milia multa daret leto, gementque repleti  
Amnes, nec reperire viam atque evolvere posset  
In mare se Xanthus, Pelidae tunc ego forti  
Congressum Aenean nec dis nec viribus aequis
- 810 Nube cava rapui, cuperem cum vertere ab imo  
Structa meis manibus periurae moenia Troiae.  
Nunc quoque mens eadem perstat mihi; pelle timorem.  
Tutus, quos optas, portus accedet Averni.  
Unus erit tantum, amissum quem gurgite quaeret;
- 815 Unum pro multis dabitur caput.  
His ubi laeta deae permulsit pectora dictis,  
Iungit equos auro Genitor, spumantiaque addit  
Frena feris, manibusque omnis effundit habenas.  
Caeruleo per summa levis volat aequora curru,
- 820 Subsidunt undae, tumidumque sub axe tonanti

20, 34.] 783. *pietas*, cf. 3, 547.] 784. *infracta*, v. 12, 1. — *Alii fativae.*  
789. cf. 1, 50 sqq.] 791. *nequiq.*, cf. 1, 131 sqq.] 793. *Per se. actis*, ut *di ὕβρεως*  
*μολούσαι s. ἀγομεναι* apud Tragicos Graecos.] 796. *Quod s.*, reliqua classis.]  
797. *tibi*, v. G. 2, 5.] 798. *ea*, ibi, ad Tiberim, condenda; v. 6, 18.] 801. *Unde g.*  
*d.*, Hes. Theog. 168—198.] 805. Videtur poeta respexisse Homericum illud *ἔλασ*  
*κατὰ ἄστυ* Il. 21, 225.] 807. cf. Hom. Il. 21, 218.] 808 sqq. cf. Hom. Il. 20,  
318 sqq.] 810. v. 2, 360.] 811. v. 3, 3. — *periurae*, v. G. 1, 502.] 813.  
*port. Av.*, Camas, 6, 2.] 814. *Unus*, Palinurus; cf. vs. 833 sqq.] 817. *auro*,  
*aureo curru.*] 818. *feris*, v. 2, 51.] 820 sq. v. 8, 89; *sed, nisi versus excidit*,

- Sternitur aequor aquis, fugiuntque ex aethere nimbi.  
 Tum variae comitum facies, inmania cete,  
 Et senior Glauci chorus, Inousque Palaemon,  
 Tritonesque citi, Phorcique exercitus omnis;  
 825 Laeva tenet Thetis et Melite Panopeaque virgo,  
 Nesaeae Spioque Thaliaque Cymodoceque.  
 Hic patris Aeneae suspensam blanda vicissim  
 Gaudia pertemptant mentem; iubet ocius omnis  
 Attolli malos, intendi bracchia velis.  
 830 Una omnes fecere pedem, pariterque sinistros,  
 Nunc dextros solvere sinus; una ardua torquent  
 Cornua detorquentque; ferunt sua flamina classem.  
 Princeps ante omnis densum Palinurus agebat  
 Agmen; ad hunc alii cursum contendere iussi.  
 835 Iamque fere mediam caeli Nox humida metam  
 Contigerat; placida laxabant membra quiete  
 Sub remis fusi per dura sedilia nautae:  
 Cum levis aetheriis delapsus Somnus ab astris  
 Aera dimovit tenebrosum et dispulit umbras,  
 840 Te, Palinure, petens, tibi somnia tristia portans  
 Insoniti; puppique deus consedit in alta,  
 Phorbanti similis, funditque has ore loquelas:  
 Iaside Palinure, ferunt ipsa aequora classem;  
 Aequatae spirant aurae; datur hora quieti.  
 845 Pone caput, fessosque oculos furare labori.  
 Ipse ego paulisper pro te tua munera inibo.  
 Cui vix attollens Palinurus lumina fatur:  
 Mene salis placidi voltum fluctusque quietos  
 Ignorare iubes? mene huic confidere monstro?  
 850 Aenean credam quid enim fallacibus auris,

non tumidum, sed placidum videtur poeta scripsisse. | 823. *sen. Gl. chor.*, Glaucus cum aliis diis marinis, qui quidem omnes et aetate et facie erant senili. | 824. *exercitus*, dii marini, qui Phorco solent comitari, cf. vs. 240. || 827—871. *In eo itinere Palinurus a Somno oppressus praecipitatur in mare. Aeneas succedit vicarius eius muneri.* Ea quoque res fidem habet historicam, cf. 6, 381. | 829. *bracchia*, antennae. | 830 sq. *pedes* dicuntur duo funes, quibus a puppi religatis intenditur velum, quod illis, tamquam pedibus, innititur. Cum ventus ab ipsa puppi fiat, utroque pede, cum a dextra sinistrave, uno, vel dextro vel sinistro, cum variat ventus (id quod tum accidisse apparet), modo dextro, modo sinistro navigatur. — *pariter*, una, ut 9, 182. — *sin. N. dextr. s. s.*, vela explicavere ita, ut versus ventum obliquata nunc a dextra nunc a sinistra venientem sinu suo exciperent. | 831 sq. *t. C. det.*, cornua, extremitates antennarum (ergo ipsas antennae), prouti opus erat, huc et illuc torquent. | 832. *sua*, v. G. 4, 22. | 835. v. 3, 135. | 840. *somn. tr.*, secundum Servium et Donatum: soporem exitalem. | 841. *consed.*, v. 3, 565. | 844. *Aequ.*, aequali flamine. | 845. *oculos*, cf. vs. 853. — *furqre*, subtrahe furtim s. ob brevitatem temporis latenter, ut labor non videatur omissus. | 850. Alii interpungunt: „Aenean credam — quid enim? —, fallac. auris Et caeli“ *cet.*, suppleta hunc in modum oratione: „Aenean

- Et caeli totiens deceptus fraude sereni?  
 Talia dicta dabat, clavumque affixus et haerens  
 Nusquam amittebat, oculosque sub astra tenebat.  
 Ecce deus ramum Lethaeo rore madentem
- 855 Vique soporatum Stygia super utraque quassat  
 Tempora, cunctantique natantia lumina solvit.  
 Vix primos inopina quies laxaverat artus:  
 Et superincumbens cum puppis parte revolsa  
 Cumque gubernaculo liquidas proiecit in undas
- 860 Praecipitem ac socios nequiquam saepe vocantem;  
 Ipse volans tenuis se sustulit ales ad auras.  
 Currit iter tutum non setis aequore classis,  
 Promissisque patris Neptuni interrita fertur.  
 Iamque adeo scopulos Sirenum advecta subibat,
- 865 Difficilis quondam multorumque ossibus albos,  
 Tum rauca adsiduo longe sale saxa sonabant:  
 Cum pater amisso fluitantem errare magistro  
 Sensit et ipse ratem nocturnis rexit in undis,  
 Multa gemens, casuque animum concussus amici:
- 870 O nimium caelo et pelago confise sereno,  
 Nudus in ignota, Palinure, iacebis arena.

credam huic monstro?" Nimis id durum.] 851. cum praesertim toties iam deceptus sim serenitate caeli; 9, 783 „Unus homo et vestris undique saeptus Aggeribus.“] 853. v. G. 4, 453.] 854 sq. ros Lethaeus affert obliviosum somnum, vis Stygia exitiosum.] 856. v. 4, 496. — *solvit*: solvuntur corpora, lumina, cum remittitur illa vis, qua agitantur.] 857. *Vix ... Et*, v. 2, 692. — *prim.* v. G. 3, 130.] 865. *Siren.*, cf. Hom. Od. 12, 39 sqq.] 866. Servius: „*Tum rauca*, ac si diceret: antehac delectabili voce resonabant, tunc fluctibus solis,“ nimirum postquam Sirenes in ea saxa conversae sunt, quod factum est praetervecto incolumi Ulixee vel, ut est apud alios, Orpheo. — Ceterum v. G. 4, 370 et iunge *rauca sonabant*, v. 2, 53.] 868. *rexit*: qui facere id potuit revulso gubernaculo vs. 859? videtur usus esse vicario gubernaculo in talem casum praeparato.] 870 sq. Sunt haec verba Aeneae rem actam ignorantis; sic tollitur repugnantia, quae videtur intercedere inter haec et ea, quae leguntur vs. 848—851.] 871. *Nudus*, insepultus. — Fuerunt, qui primos duo versus libri sexti quinto libro adicerent.

# AENEIDOS.

## LIBER SEXTUS.

(*Ad Cumas appulsa classe Aeneas adit templum Apollinis Sibyllamque vatem, qua duce, patris auctoritati obsecutus, descendit ad inferos. — Res inferorum.*  
— *Anchises docet Aeneam cum alia tum fata populi ab eo condendi.*)

- Sic fatur lacrimans, classique inmittit habenas,  
Et tandem Euboicis Cumarum adlabitur oris.  
Obvertunt pelago proras; tum dente tenaci  
Ancora fundabat navis, et litora curvae  
5 Praetexunt puppes. Iuvenum manus emicat ardens  
Litus in Hesperium; quaerit pars semina flammae  
Abstrusa in venis silicis, pars densa ferarum  
Tecta rapit silvas, inventaque flumina monstrat.  
At pius Aeneas arces, quibus altus Apollo  
10 Praesidet, horrendaeque procul secreta Sibyllae,  
Antrum inmane, petit, magnam cui mentem animumque  
Delius inspirat vates aperitque futura.  
Iam subeunt Triviae lucos atque aurea tecta.  
Daedalus, ut fama est, fugiens Minoia regna,  
15 Praepetibus pennis ausus se credere caelo,  
Insuetum per iter gelidas enavit ad Arctos,  
Chalcidicaque levis tandem super adstitit arce.  
Redditus his primum terris, tibi, Phoebe, sacravit

**Aeneid. L. VI.** 1—76. *Aeneas in litus Cumanum egressus templum Apollinis antrumque Sibyllae petit; iussa ab ea sacra facit, vota nuncupat Sibyllamque orat, ut oraculum viva voce sibi edat.* | 1. *Sic fatur l.*: similia apud Homerum exordia librorum II. 7. Od. 9. 13. — *cl. i. hab.*, v. 8, 708. | 2. Liv. 8, 22 „Cumani ab Chalcide Euboica originem trahunt.“ | 3—5. v. 10, 268. | 7 sq. alii ligna sarmentaque arida, quibus ignem nutrant, raptim collecta afferunt ex densa, quae ibi erat, proptereaue ferarum plena silva; cf. va. 179; alii inventa flumina monstrant, v. 1, 701. Et igne indigere poterant ad torrendas fruges, ut 1, 179, aqua vel ad lustrationes vel ad alios usus. (Sunt, qui *rapit* referant ad silvas venandi causa percursas, quod certe a Virgiliana consuetudine abhorret.) | 9. *arces*, v. G. 2, 535. Erat templum Apollinis ad Cumas monti impositum. — *altus*, ut 10, 875. | 10. *horrendas* ipso adspectu, qualis furore correptae vatis esse solet, cf. vss. 47—51. 77—80. — Aeneas cum comitibus quibusdam (vs. 40 et 41) petit templum antrumque, procul ab eo loco sita, ubi ceteri Troiani in alio negotio occupati erant. | 11. *mentem animumque*: mens, propria facultas intelligendi, ita cum animo coniungitur, ut comprehendatur omnis vis, quae viget in animo. *magna* autem ita adicitur, ut indicetur motus animi ultra solitum concitatus; significatur autem *ὑπερσυσσμός* vatum. | 13. *aur. t.*, templum Apollinis in luco Hecatae s. Triviae. | 16. *ad*, versus. | 17. v. vs. 2. — *levis*, avium omnino volantium et eorum, qui celeri cursu feruntur, epitheton; cf. 5, 819. 838. 11, 868. | 18. Pronomina



- Remigium alarum, posuitque inmania templa.  
 20 In foribus letum Androgeo; tum pendere poenas  
 Caeopidae iussi — miserum! — septena quot annis  
 Corpora natorum: stat ductis sortibus urna.  
 Contra elata mari respondet Gnosia tellus:  
 Hic crudelis amor tauri, suppositaque furto  
 25 Pasiphae, mixtumque genus prolesque biformis  
 Minotaurus inest, Veneris monumenta nefandae;  
 Hic labor ille domus et inextricabilis error;  
 Magnum reginae sed enim miseratus amorem  
 Daedalus ipse dolos tecti ambagesque resolvit,  
 30 Caeca regens filo vestigia. Tu quoque magnam  
 Partem opere in tanto, sineret dolor, Icare, haberes.  
 Bis conatus erat casus effingere in auro;  
 Bis patriae cecidere manus. Quin protinus omnia  
 Perlegerent oculis, ni iam praemissus Achates  
 35 Adforet atque una Phoebi Triviaeque sacerdos,  
 Deiphobe Glauci, fatur quae talia regi:  
 Non hoc ista sibi tempus spectacula poscit;  
 Nunc grege de intacto septem mactare iuencos  
 Praestiterit, totidem lectas de more bidentis.  
 40 Talibus adfata Aenean — nec sacra morantur  
 Iussa viri — Teucros vocat alta in templa sacerdos.

is, hic, interdum funguntur vice Adverbiorum loci; his terr. redd., i. e. ibi redditus est terris; 1, 534 „Hic cursus fuit,” i. e. Huc curs. f.; adde 4, 46 et v. 5, 798.] 19. v. 1, 310.] 20—30. Vide omnia ex ordine ipsarum rerum effecta:

| Fores             |                                 |
|-------------------|---------------------------------|
| Athenae           | Creta                           |
| letum Androgei    | Pasiphae cum tauro et Minotauro |
| sortitio puerorum | Labyrinthus cum Theseo          |

[20. *Ἀνδρόγεως*, Genit. *Ἀνδρόγεω*. Rem ipsam lege ap. Catull. 64, 73 sq. — *pend. poenas* ... corpora, v. 2, 139.] 22. *st. d. s. urna*, ex qua ductae erant sortes, quibus destinabantur, qui Cretam mitterentur ac Minotauro obliicerentur.] 24 sq. Pasiphae erat filia Solis, qui adulterium Martis et Veneris indicavit Vulcano, quapropter haec omne genus Solis odio persequabatur. Illa autem flagrans amore tauri formosissimi a Daedalo in ligneam vaccam corio iuvencae obductam inclusa est et ita tauro illi furtim (*furto*) supposita (*χρυφίους γάμοις μυσῖσα*) peperit Minotaurum; cf. 7, 283. *Crudelis* appellatur is amor, quia a Venere (a Neptuno aiunt alii) offensas suas

*crudeliter* ulciscente Pasiphae iniectus est.] 26. v. G. 1, 295.] 27. *lab. domus*, labor, quem ipse labyrinthus creat exitum quaerentibus.] 28. *reginae*, Ariadnes, filiae regis Minois. — *sed enim*, v. 1, 19.] 29 sq. fallaciam viarum inter se implicatarum expedit monstrato scilicet per filum, quod dubios gressus (Thesei) regeret, exitu.] 31. *sin. dol.*, v. G. 2, 519.] 33. *omnia* bisyllabum, v. 1, 2.] 34. v. 1, 644.] 36. *Deiphobe*, Sibylla Cumana, *Glauci* (fortasse dei illius marini inter deos fatidicos habiti) filia. Eurip. Iphig. Aul. 1570 „ὦ Λιὸς Ἀρεμὶς θηροκτόνε.” v. etiam 3, 319.] 37. *ista spect.*, spectationem istarum rerum.] 38. *βοῦς ἀδμήτους*, cf. Hom. Od. 3, 383.] 39. v. 4, 57.] 41. *in templa* Apollinis. — Lucan. 5, 170 de Pythia: „vittasque dei Phoebeaque sorta

- Excisum Euboicae latus ingens rupis in antrum,  
 Quo lati ducunt aditus centum; ostia centum;  
 Unde ruunt totidem voces, responsa Sibyllae.  
 45 Ventum erat ad limen, cum virgo, Poscere fata  
 Tempus, ait; deus, ecce, deus! Cui talia fanti  
 Ante fores subito non voltus, non color unus,  
 Non comptae mansere comae; sed pectus anhelum,  
 Et rabie fera corda tument; maiorque videri  
 50 Nec mortale sonans, adflata est numine quando  
 Iam propiore dei. Cessas in vota precesque,  
 Tros, ait, Aenea? cessas? neque enim ante dehiscunt  
 Attonitae magna ora domus. Et talia fata  
 Conticuit. Gelidus Teucris per dura cucurrit  
 55 Ossa tremor, funditque preces rex pectore ab imo:  
 Phoebe, gravis Troiae semper miserate labores,  
 Dardana qui Paridis direxti tela manusque  
 Corpus in Aeacidæ, magnas obeuntia terras  
 Tot maria intravi duce te penitusque repostas  
 60 Massylum gentis praetentaque Syrtibus arva,  
 Iam tandem Italiae fugientis prendimus oras;  
 Hac Troiana tenus fuerit fortuna secuta.  
 Vos quoque Pergameae iam fas est parcere genti,  
 Dique deaeque omnes, quibus obstitit Ilium et ingens  
 65 Gloria Dardaniae. Tuque, o sanctissima vates,  
 Praescia venturi, da, non indebita posco  
 Regna meis fatis, Latio considerare Teucros  
 Errantisque deos agitataque numina Troiae.  
 Tum Phoebo et Triviae solido de marmore templum  
 70 Instituam festosque dies de nomine Phoebi.  
 Te quoque magna manent regnis penetralia nostris.

Erectis discussa comis ... Ancipiti cervice rotat. 42. *Eub.*, v. vs. 2. — Templum Apollinis ita fuit praecisae rupi applicatum, ut ea pro pariete templi postico esset. Ex eo pariete plurima (*centum*) ostia foribus clausa (vs. 47 et 52) totidem aditus (vs. 43) ad antrum Sibyllae praebebant. Ad limen eius antri (vs. 45) Teucris in templum Apollinis (vs. 41) vocati resistunt. Ante fores antri, in ipso templo, arae (vs. 124) constitutae fuerunt. Sibyllae antrum ingressae responsa ex eo ad Teucros feruntur per auras, vs. 82, quo significatur vox foras perlata. 45. *Posc. fata*, cf. vs. 66—68. 50. cf. 1, 328. — *adflata numine dei*, vi et vehementia spiritus divini. 51. *C. in vota*, cessas vota facere? Et vota facit vs. 69 sqq., preces 56 sqq. 52. *ante sc. quam feceris vota*. 53. Sentit etiam domus praesentiam dei et quasi stupens torpensque fores retinet clausas; cf. vs. 81. 58. Aeacides, Achilles, nepos Aeaci. 61. v. 5, 629. 62. Desinat iam Troiana fortuna, adversa scilicet, nos persequi. 64. *obstitit*, invisum fuit; nam invisae sunt, quae consiliis nostris obstant; dii autem credebantur favere modicis rebus, v. vs. 870 sq. 66. *dare* vaticinantes dicuntur, quae sciunt datum iri a diis; cf. vs. 84 sq. 69 sq. Templum in Palatio ab Augusto conditum ludosque Apollinæ significari Aeneamque ex posteriorum persona vota facere ait Servius. Signum Apollinis in eo templo medium inter Latonam et Dianam (Triviam) stetit. 71 sqq. Significantur libri

Hic ego namque tuas sortes arcanaque fata  
 Dicta meae genti ponam, lectosque sacrobo,  
 Alma, viros. Foliis tantum ne carmina manda,  
 75 Ne turbata volent rapidis ludibria ventis;  
 Ipsa canas oro. Finem dedit ore loquendi.

At, Phoebi nondum patiens, inmanis in antro  
 Bacchatur vates, magnum si pectore possit  
 Excussisse deum; tanto magis ille fatigat

80 Os rabidum, fera corda domans, fingitque premendo.  
 Ostia iamque domus patuere ingentia centum  
 Sponte sua vatisque ferunt responsa per auras:

O tandem magnis pelagi defuncte periclis, —  
 Sed terrae graviora manent — in regna Lavini

85 Dardanidae venient; mitte hanc de pectore curam;  
 Sed non et venisse volent. Bella, horrida bella,  
 Et Thybrim multo spumantem sanguine cerno.

Non Simois tibi, nec Xanthus, nec Dorica castra  
 Defuerint; alius Latio iam partus Achilles,

90 Natus et ipse dea; nec Teucris addita Iuno  
 Usquam aberit, cum tu supplex in rebus egenis  
 Quas gentis Italum aut quas non oraveris urbes!  
 Causa mali tanti coniunx iterum hospita Teucris  
 Externique iterum thalami.

95 Tu ne cede malis, sed contra audentior ito,  
 Quam tua te fortuna sinet. Via prima salutis,  
 Quod minime reris, Graia pandetur ab urbe.

Talibus ex adyto dictis Cymaea Sibylla

Horrendas canit ambages antroque remugit,

100 Obscuris vera involvens: ea frena furenti

Sibyllini (prius in Capitolio servati, postea in templum Apollinis Palatini translati) et Quindecimviri (primo Duumviri, post Decemviri), qui iussu senatus eos inspicerent atque interpretarentur. | 74. *Foliis t. n. c. m.*, cf. 3, 44 sqq. || 77—155. *Accepto oraculo Aeneas patrem Anchisen conventurus petit a Sibylla, ut se doceat iter ad inferos. Haec ei primum praecipit, quae sint ante peragenda, quam eo descendat.* | 77 sqq. Grave est plenumque cruciatus, Dei numen pectore recipere; itaque reluctatur Sibylla conaturque Deum se insinuantem excutere. | 78. *inmanis*, v. 4, 494. | 78. *si*, v. E. 6, 57. | 79 sq. Ab equis ferocibus haec translata, qui exercendo sive fatigando domantur; iidem dicuntur fingi (ad voluntatem equitis componi) premique (frenis coerceri). | 84. *terrae*, sc. pericula, quod vocabulum ex superiore versu repetes. — *r. Lav.*, cf. 1, 2. | 86. Sed erit etiam, cur velint non venisse; nam *et.* | 89. *alius Ach.*, i. e. Latium quoque habet aliquem Achillem; non alter partus est, quia Latini nullum ante habuerunt, sed alius, Latinus quippe, non Graecus, Turnus, filius Veniliae deae. | 90. *Teucris addita*, προσηγορία, Macrob. Sat. 6, 4 „addita, i. e. affixa et per hoc infesta. Hoc iam dixerat Lucil. l. 14 „Si mihi non praetor siet additus atque agitet me.“ | 93. *hospita*, non Troiana, v. 3, 377.; significatur Lavinia, Latini filia, primum Turno, tum Aeneae promissa. | 95 sq. ea audentior obsiste malis, quo minus res tuae te sinere videbuntur. | 97. *Graia ab u.*, Pallanteo, urbe Euandri, cf. 8, 49 sqq. | 100 sq. ea frena cono. et eos stimulos s. p.

- Concutit et stimulos sub pectore vertit Apollo.  
 Ut primum cessit furor et rabida ora quierunt,  
 Incipit Aeneas heros: Non ulla laborum,  
 O virgo, nova mi facies inopinave surgit;  
 105 Omnia praecepi atque animo mecum ante peregi.  
 Unum oro: quando hic inferni ianua regis  
 Dicitur et tenebrosa palus Acheronte refuso,  
 Ire ad conspectum cari genitoris et ora  
 Contingat; doceas iter et sacra ostia pandas.  
 110 Illum ego per flammās et mille sequentia tela  
 Eripui his humeris medioque ex hoste recepi;  
 Ille meum comitatus iter maria omnia mecum  
 Atque omnis pelagique minas caelique ferebat,  
 Invalidus, viris ultra sortemque senectae.  
 115 Quin, ut te supplex peterem et tua limina adirem,  
 Idem orans mandata dabat. Gnatique patrisque,  
 Alma, precor, miserere; — potes namque omnia, nec te  
 Nequiquam lucis Hecate praefecit Avernis; —  
 Si potuit Manis arcessere coniugis Orpheus,  
 120 Threicia fretus cithara fidibusque canoris,  
 Si fratrem Pollux alterna morte redemit,  
 Itque reditque viam totiens. Quid Thesea magnum,  
 Quid memorem Alciden? et mi genus ab Iove summo.  
 Talibus orabat dictis arasque tenebat,  
 125 Cum sic orsa loqui vates: Sate sanguine divom,  
 Tros Anchisiada, facilis descensus Averno;  
 Noctes atque dies patet atri ianua Ditis;  
 Sed revocare gradum superasque evadere ad auras,  
 Hoc opus, hic labor est. Pauci, quos aequus amavit  
 130 Iuppiter aut ardens evexit ad aethera virtus,  
 Dis geniti potuere. Tenent media omnia silvae,  
 Cocytosque sinu labens circumvenit atro.  
 Quod si tantus amor menti, si tanta cupido,  
 Bis Stygios innare lacus, bis nigra videre

v. A., i. e. ita temperat Apollo concitatum Sibyllae pectus, ut ei non liceat simplicem rerum veritatem promere, sed ut ambagum obscuritate involvat verum. | 101. *vertit*, figit intorquens, quo altius penetrent. | 104 sq. cf. 3, 458. 5, 730 sq. | 107. palus Acherusia Cumis vicina, quam ex Acheronte exundante (*refuso*) ortam putabant. | 115 sq. cf. 5, 735 sq. | 118. *luc. Av.*, per quos aditus est ad inferos, cf. vs. 131. | 119. Iunge: *miserere* ... *Si*, v. G. 1, 7. — Res ipsa narratur G. 4, 467 sqq. | 121. cf. Hom. Odys. 11, 300—304. | 122 sq. *Thesea* ... *Alciden*, qui non, ut Orpheus et Pollux, aliqua deorum misericordia confisi, sed suis viribus freti descenderunt ad inferos. | 123. *Et m. g. ab I. s.*: ergo mihi, spero, idem licebit. Erat autem Aeneas nepos Iovis ex Dione, matre Veneris. | 124. v. 4, 219. | 126. *Averno*, in loca infera, v. E. 2, 30. | 129 sq. *aequus*, propitius. — *quos aequ. am. I.*, Orpheus et Pollux, *aut ard. ev. ad aeth.* v., Theseus et Hercules; et v. 3, 158. | 134. cf. Hom. Odys. 12, 21 sq. |

- 135 Tartara et insano iuvat indulgere labori,  
Accipe, quae peragenda prius. Latet arbore opaca  
Aureus et foliis et lento vimine ramus,  
Iunoni infernae dictus sacer; hunc tegit omnis  
Lucus et obscuris claudunt convallibus umbrae.
- 140 Sed non ante datur telluris operta subire,  
Auricomos quam qui decerpserit arbore fetus.  
Hoc sibi pulchra suum ferri Proserpina munus  
Instituit. Primo avolso non deficit alter  
Aureus, et simili frondescit virga metallo.
- 145 Ergo alte vestiga oculis, et rite repertum  
Carpe manu; namque ipse volens facilisque sequetur,  
Si te fata vocant; aliter non viribus ullis  
Vincere, nec duro poteris convellere ferro.  
Praeterea iacet exanimum tibi corpus amici —
- 150 Heu nescis — totamque incestat funere classem,  
Dum consulta petis nostroque in limine pendes.  
Sedibus hunc refer ante suis et conde sepulchro.  
Duc nigras pecudes; ea prima piacula sunt.  
Sic demum lucos Stygis et regna invia vivis
- 155 Aspicies. Dixit, pressoque obmutuit ore.  
Aeneas maestus defixus lumina voltu  
Ingreditur, linquens antrum, caecosque volutat  
Eventus animo secum. Cui fidus Achates  
It comes, et paribus curis vestigia figit.
- 160 Multa inter sese vario sermone serebant,  
Quem socium exanimem vates, quod corpus humanum  
Diceret. Atque illi Misenum in litore sicco,  
Ut venere, vident indigna morte peremptum,  
Misenum Aeoliden, quo non praestantior alter
- 165 Aere ciere viros Martemque accendere cantu.  
Hectoris hic magni fuerat comes, Hectora circum  
Et lituo pugnas insignis obibat et hasta.

137. *vimine*, virga. | 138. *Iun. inf.*, cf. vs. 142 et 4, 638. — *dictus*, dicatus. — *omnis*, longe lateque circumdatus. | 141. Quod dici poterat *quam decerpseris*, id ad omnes, qui vivi ad inferos ire vellent, relatum poeta sic extulit *quam qui decerpserit*. Alii *quis*. | 145 sq. Iunge *rite carpe manu*, quippe *oportebat* eum ramum manu avelli, non cultro aut falce abscidi. | 147. *Si t. f. v.*, si fatale est tibi, inferos adire. | 150. v. 2, 539. | 151. *cons.*, consilia. | 152. v. vs. 328. | 153. *Duc*, ad aras scilicet. — *prima sunt*, ante fiant. Antequam ad inferos quis descenderet, sacro piaculari placandi erant Manes, idque sacrum ex praecepto Sibyllae factum describitur vs. 235—254. || 156—211. *Digressus Aeneas Misenum peremptum invenit in litore iacentem. In silva propinqua, unde Troiani ligna petunt ad rogi Miseni struendum, Aeneas cupienti aureus ille ramus se ostendit, quo qui potitus est, veniam nanciscitur adeundi loca infera.* | 157. *caecos*, ignotos, vs. 149 sq. significatos. | 162. *Atque*, v. E. 7, 7. | 163. *indigna*, Servius: „miserabili, non congrua eius meritis.“ | 165.

- Postquam illum vita victor spoliavit Achilles,  
 Dardanio Aeneae sese fortissimus heros  
 170 Addiderat socium, non inferiora secutus.  
 Sed tum, forte cava dum personat aequora concha,  
 Demens, et cantæ vocat in certamina divos,  
 Aemulus exceptum Triton, si credere dignum est,  
 Inter saxa virum spumosa inmerserat unda.  
 175 Ergo omnes magno circum clamore fremebant,  
 Praecipue pius Aeneas. Tum iussa Sibyllae,  
 Haud mora, festinant flentes, aramque sepulchri  
 Congerere arboribus caeloque educere certant.  
 Itur in antiquam silvam, stabula alta ferarum;  
 180 Procumbunt piceae, sonat icta securibus ilex,  
 Fraxineaeque trabes cuneis et fissile robur  
 Scinditur, advolvunt ingentis montibus ornos.  
 Nec non Aeneas opera inter talia primus  
 Hortatur socios, paribusque accingitur armis.  
 185 Atque haec ipse suo tristi cum corde volutat,  
 Adspectans silvam immensam, et sic forte precatur:  
 Si nunc se nobis ille aureus arbore ramus  
 Ostendat nemore in tanto! quando omnia vere  
 Heu nimium de te vates, Misene, locuta est.  
 190 Vix ea fatus erat, geminae cum forte columbae  
 Ipsa sub ora viri caelo venere volantes  
 Et viridi sedere solo. Tum maxumus heros  
 Maternas adgnoscit aves laetusque precatur:  
 Este duces, o, si qua via est, cursumque per auras  
 195 Dirigite in lucos, ubi pinguem dives opacat  
 Ramus humum, tuque, o, dubiis ne defice rebus,  
 Diva parens. Sic effatus vestigia pressit,  
 Observans, quae signa ferant, quo tendere pergant.  
 Pascentes illae tantum prodire volando,  
 200 Quantum acie possent oculi servare sequentum.  
 Inde ubi venere ad fauces grave olentis Averni,  
 Tollunt se celeres, liquidumque per aera lapsae  
 Sedibus optatis gemina super arbore sidunt,  
 Discolor unde auri per ramos aura refulsit.

*Aere*, tuba vel lituo; et v. 5, 113. | 171. *concha*, organo proprio Tritonis, cf. 10, 209 sqq. | 173. *except.*, insidiis circumventum oppressumque; cf. 3, 332. | 177. *aram sep.*, rogum, similem arae; cf. vs. 215. | 178. *caelo*, v. E. 2, 30. | 183. v. 3, 437. | 185. *ipse s. t. c. c. v.*, id quod vulgo dicimus: tristis ipse secum volvit. | 186. Alii voce *prec.* | 187. v. G. 1, 430. | 191. *sub o.*, sub adspectum. | 192. *sed.*, v. 3, 565. | 197. *vest. pr.*, inhibuit incessum, i. e. substitit, cf. vs. 331. | 198. *quae s. f.*, cf. vs. 202 sq. | 200. *serv.*, G. 1, 335. | 203. *optatis*, quibus eas considerare optaverat Aeneas. — *gemina*, Donatus: „quae frondem duplicem portabat;“ *διπλῆς*. Ceterum v. 1, 680. | 204. *aura* hic denotat repercussum fulgorem; Priscian. Perieg. 1020 „*aura viridi* splendet iaspis;“ et

- 205 Quale solet silvis brumali frigore viscum  
Fronde virere nova, quod non sua seminat arbos,  
Et croceo fetu teretis circumdare truncos:  
Talis erat species auri frondentis opaca  
Ilice, sic leni crepitabat brattea vento.
- 210 Corripit Aeneas extemplo, avidusque refringit  
Cunctantem et vatis portat sub tecta Sibyllae.  
Nec minus interea Misenum in litore Teucri  
Flebant, et cineri ingrato suprema ferebant.  
Principio pinguem taedis et robore secto
- 215 Ingentem struxere pyram, cui frondibus atris  
Intexunt latera, et feralis ante cupressos  
Constituunt, decorantque super fulgentibus armis.  
Pars calidos latices et aena undantia flammis  
Expediunt, corpusque lavant frigentis et unguunt.
- 220 Fit gemitus. Tum membra toro defleta reponunt,  
Purpureasque super vestes, velamina nota,  
Coniiciunt. Pars ingenti subiere feretro,  
Triste ministerium, et subiectam more parentum  
Aversi tenuere facem. Congesta cremantur
- 225 Turea dona, dapes, fuso crateres olivo.  
Postquam conlapsi cineres et flamma quievit,  
Reliquias vino et bibulam lavere favillam,  
Ossaque lecta cado texit Corynaeus aeno.  
Idem ter socios pura circumtulit unda,
- 230 Spargens rore levi et ramo felicis olivae,  
Lustravitque viros, dixitque novissima verba.  
At pius Aeneas ingenti mole sepulchrum  
Inponit suaque arma viro remumque tubamque  
Monte sub aereo, qui nunc Misenus ab illo
- 235 Dicitur, aeternumque tenet per saecula nomen.

γράφος ἀντιμή Callim. H. in Dian. 117, et v. 1, 546. | 206. quod n. s. s. a., natum in aliena arbore. | 211. Cunctantem: at cf. vs. 146; nimirum tanta est aviditas Aeneae, ut non decerpere, sed vi refringere eum ramum, tanquam cunctantem, fingatur. Ita fere Servius. || 212—263. Postquam iusta facta sunt Miseni, Aeneas mactatis hostiis deos, quos par est, veneratus Sibylla duce per faucibus Averni descendit ad inferos. | 221. Nec minus et Nec minus interea crebra est apud Virgilium formula transeundi ad aliam rem vel similem vel dissimilem, quae fit eodem tempore, quo res ante commemorata. | 213. ingrato, gratiam nec sentienti nec referenti. | 215. atris, nigricantibus, cupressinis aut similibus. | 217 et 221. cf. 11, 193—196. | 221. nota, v. 11, 195. | 225. dapes, victimae, cf. 11, 197 sqq. — crateres fuso (infuso) olivo, ut E. 5, 68 crateres olivi. | 227 sq. cf. Hom. II. 23, 250 sqq. | 229. v. 4, 500. Est haec facto funere sollempnis lustratio. | 230. felicis ol., ut arboris fructiferae propterea etiam usum habentis in sacris, quae sunt superis diis; contra infelicio, in qua neutrum horum est. | 231. noviss. v., Servius: „Ilicet;“ quo verbo dimittebantur, qui exsequias ierant. | 233. cf. Hom. Odyss. 12, 15. — Inpmit sepulcr., ponit in illo loco tumulum terra aggesta. — suaq. a. viro, i. e. et

- His actis propere exsequitur praecepta Sibyllae.  
 Spelunca alta fuit vastoque inmanis hiatu,  
 Scrupea, tuta lacu nigro nemorumque tenebris,  
 Quam super haud ullae poterant inpune volantes  
 240 Tendere iter pennis: talis sese halitus atris  
 Faucibus effundens supera ad convexa ferebat:  
 [Unde locum Graii dixerunt nomine Aornon.]  
 Quattuor hic primum nigrantis terga iuencos  
 Constituit frontique invergit vina sacerdos,  
 245 Et summas carpens media inter cornua saetas  
 Ignibus inponit sacris, libamina prima,  
 Voce vocans Hecaten, Caeloque Ereboque potentem.  
 Supponunt alii cultros, tepidumque cruorem  
 Succipiunt pateris. Ipse atri velleris agnam  
 250 Aeneas matri Eumenidum magnaeque sorori  
 Ense ferit, sterilemque tibi, Proserpina, vaccam.  
 Tum Stygio regi nocturnas inchoat aras,  
 Et solida inponit taurorum viscera flammis,  
 Pingue super oleum infundens ardentibus extis.  
 255 Ecce autem, primi sub lumina solis et ortus  
 Sub pedibus mugire solum, et iuga coepta moveri  
 Silvarum, visaeque canes ululare per umbram,  
 Adventante dea. Procul o, procul este, profani,  
 Conclamat vates, totoque absistite luco;  
 260 Tuque invade viam, vaginaque eripe ferrum;  
 Nunc animis opus, Aenea, nunc pectore firmo.  
 Tantum effata, furens antro se inmisit aperto;  
 Ille ducem haud timidus vadentem passibus aequat.  
 Di, quibus interium est animarum, Umbraeque silentes,  
 265 Et Chaos, et Phlegethon, loca nocte tacentia late,  
 Sit mihi fas audita loqui; sit numine vestro  
 Pandere res alta terra et caligine mersas.

arma, quae ille gerebat; v. 9, 273.] 236. *præc. S.*, vs. 153.] 238. *tuta*, ad quam difficilis accessus.] 244. Servius „*fundere* (4, 61) est supina manu libare, quod fit in sacris supernis; *vergere* autem est conversa in sinistram partem manu ita fundere, ut patera convertatur, quod in infernis sacris fit.“] 247. *Voce v.*, v. 4, 681. — *Caelo*, v. 4, 511.] 248. v. G. 3, 492.] 250. *matri E.*, Nocti et huius sorori Terrae.] 252. *nocturn.*, quia diis inferis noctu sacra sunt.] 253. *solida visc.*, totam victimam; diis inferis fiunt holocausta.] 254. *super ol.*, v. E. 9, 66. — *superinfundens*, Soph. Antig. 426 ἐκ τ' εὐχρηστοῦ χαλκῆς ἀρδην πρόχου χοαῖσι τριαπόνοισι τὸν νέκυν στέπει.] 257. *canes infernae*, comites Hecatae, ut etiam Furiarum.] 258. *Procul ... profani*, solus scilicet ex ceteris, qui aderant, Troianis Aeneas praesentiam Hecates ferre poterat propter aureum ramum ex eius luco decerptum.] 260. *vag. er. f.*, ad deterrenda monstra, quae ei obvia futura erant; cf. Hom. Odyss. 11, 48 sqq.]] 264—336. *Invocatis ante diis inferis poeta coepit explicare res inferorum. Via per loca obscura. Ante vestibulum Orci sedes Luctus, Curarum similiumque decorum ac variorum monstrorum. Acheron. Cocytus. Charon. Animae ad Stygem errantes.*] 265. *Chaos*, v. 4, 510.] 266. *sit n. v.*, per vestrum



- Ibant obscuri sola sub nocte per umbram,  
 Perque domos Ditis vacuas et inania regna:  
 270 Quale per incertam lunam sub luce maligna  
 Est iter in silvis, ubi caelum condidit umbra  
 Iuppiter, et rebus nox abstulit atra colorem.  
 Vestibulum ante ipsum primisque in faucibus Orci  
 Luctus et ultrices posuere cubilia Curae;  
 275 Pallentesque habitant Morbi, tristisque Senectus,  
 Et Metus, et malesuada Fames, ac turpis Egestas,  
 Terribiles visu formae, Letumque, Labosque;  
 Tum consanguineus Leti Sopor, et mala mentis  
 Gaudia mortiferumque adverso in limine Bellum  
 280 Ferreique Eumenidum thalami et Discordia demens,  
 Vipereum crinem vittis innexa cruentis.

- In medio ramos annosaeque brachia pandit  
 Ulmus opaca, ingens, quam sedem Somnia volgo  
 Vana tenere ferunt, foliisque sub omnibus haerent.  
 285 Multaque praeterea variarum monstra ferarum  
 Centauri in foribus stabulant Scyllaeque bifformes  
 Et centumgeminus Briareus ac belua Lernae,  
 Horrendum stridens, flammisque armata Chimaera,  
 Gorgones Harpyiaeque et forma tricorporis umbrae.  
 290 Corripit hic subita trepidus formidine ferrum  
 Aeneas, strictamque aciem venientibus offert,  
 Et, ni docta comes tenuis sine corpore vitas  
 Admoneat volitare cava sub imagine formae,  
 Inruat, et frustra ferro diverberet umbras.

numen sit mihi fas s. liceat. | 268. *sola*, per quam nemo obviam fit euntibus. | 270. *incert.*, v. 3, 203. | 274. In introitu Orci habitant dii quidam auctores malorum, quae vel arcessunt mortem, vel (*Sopor*) antecedunt. — *Curae*, conscientiae. | 276. *malesuada F.*, cf. Hom. Odys. 17, 286 sqq. — *turpis Eg.*, quae reddit macilentos cultuque corporis deformes; Sil. 13, 585 „Et deforme malum ac sceleri proclivis Egestas.“ | 277. *Letum*, v. G. 4, 481. | 278. Hom. Il. 14, 231 Ὕπνος ... κασιγνήτος Θανάτοιο. — *mala m. G.*, ea gaudia, quae a mala mente proficiuntur. | 279. *adv. in l.*, in ipso limine Orci, quod est exadversum vestibulo. | 280. v. 1, 698. — *Infra* vs. 571 in Tartaro versatur Tisiphone, una ex Eumenidibus. Fortasse distinctas iis attribuit poeta sedes pro ratione muneris earum; cum munere plerorumque, quae vss. 274—280 commemorantur, numinum hoc commune habent Eumenides, quod salutem hominum pervertunt, praesidentes quippe diris imprecationibus ac mentem ad prava consilia consternantes. | 281. v. E. 3, 106. | 283. *volgo*, v. 3, 643. | 284. v. G. 3, 283. | 286. *in for.*, in ipso aditu Orci. — *Scyllae*, eiusmodi monstra, qualis fuit Scylla bicorpor. | 287. *cent. Br.*, cf. 10, 565 sqq. Hom. Il. 1, 402 sq. — *belua L.*, bestiarum quoque animae in Orcum descendunt, cf. Theocr. 25, 271, ubi leonis Nemeaei ψυχὴν πελώριον ἔλλαχεν ἕδης, capella ap. Theocr. Epigr. 6, 3, passer ap. Catull. 3, 11 sq. | 289. *Gorgonēs*, Nominativum Plural. tertiae Declinat. Graecorum nominum ex constanti more corripuerunt Latini poetae. — *forma tr. u.*, Geryon. | 290 sqq. idem facit Hercules ap. Apollod. 2, 5, 12, similiterque a Mercurio admonetur. | 293. Ut umbris mortuorum non tam loquela, quam stridor quidam tribui solet, Hom. Od. 24, 5 et 9. Il. 23, 101, sic eadem

- 295 Hinc via, Tartarei quae fert Acherontis ad undas.  
 Turbidus hic caeno vastaue voragine gurgēs  
 Aestuāt atque omnem Coccyto eructat arenam.  
 Portitor has horrendus aquas et flumina servat  
 Terribili squalore Charon, cui plurima mento  
 300 Canities inculta iacet, stant lumina flamma,  
 Sordidus ex humeris nodo dependet amictus.  
 Ipse ratem conto subigit velisque ministrat,  
 Et ferruginea subvectat corpora cymba,  
 Iam senior, sed cruda deo viridisque senectus.  
 305 Huc omnis turba ad ripas effusa ruebat,  
 Matres atque viri, defunctaque corpora vita  
 Magnanimum heroum, pueri innuptaeque puellae,  
 Inpositique rogis iuvenes ante ora parentum:  
 Quam multa in silvis autumnī frigore primo  
 310 Lapsa cadunt folia, aut ad terram gurgite ab alto  
 Quam multae glomerantur aves, ubi frigidus annus  
 Trans pontum fugat et terris inmittit apricis.  
 Stabant orantes primi transmittere cursum,  
 Tendebantque manus ripae ulterioris amore.  
 315 Navita sed tristis nunc hos nunc accipit illos,  
 Ast alios longe submotos arcet arena.  
 Aeneas miratus enim motusque tumultu  
 Dic, ait, o virgo, quid volt concursus ad amnem?  
 Quidve petunt animae? vel quo discrimine ripas  
 320 Hae linguunt, illae remis vada livida verrunt?  
 Olli sic breviter fata est longaeva sacerdos:  
 Anchisa generate, deum certissima proles,

non tam incedunt, quam volitant, ἀφασσοῦσιν, Odyss. 10, 495. — cava, v. 2, 360. | 296. Turbidus vastaue voragine gurgēs, v. G. 1, 142. | 297. Coccyto, v. E. 2, 30. | 300. iacet neglectum significat. — st. l. fl., stare saepe dicuntur, quae horrent ac rigent; itaque stat pulvere caelum 12, 407, i. e. caelum riget pulvere s. plenum est pulvere quasi immobili nec rursus desidente; lumina stant fl., rigent s. plena sunt flamma immobili, s. ipsa sunt flammea atque immota. | 301. nodo (non, ut apud cultiores, fibula) adstrictum pendet amicalum; isque nodus in laevo humero factus est. | 302. ministrat, operam dat, cf. 10, 218. Stat. Theb. 7, 752 „ministrat habenis.“ | 304. cf. Hom. II. 23, 791. | 306. cf. Hom. Odyss. 11, 38—41 et supra G. 4, 473 sqq. | 310. Cic. Off. 1, 22 „Consiliis diligentiaque nostra celeriter de manibus audacissimorum civium delapsa arma ipsa ceciderunt.“ — ad t. g. ab a., a mari versus terram. | 311. cf. Hom. II. 3, 2 sqq. Apoll. Rh. 4, 238 sqq. | 313. or. pr. transm. cursum, orant, ut sibi liceat primis transire; nam transmittere hic i. q. transire, transcurrere; ut autem dicimus ire viam, currere iter 5, 862 (et v. 2, 690), sic licebit dicere cursum transmittere sive, ut loquitur Cicero, non eodem quidem sensu, Brut. 81, cursum transcurrere. | 317. enim, v. 8, 84. | 322. Servius: „deum certiss. pr. ex eo, quod subire inferos potuit.“ — deum, Veneris; sic enim totum genus interdum pro singulis ponitur, ubi minus refert, quis sit ille, i. e. quod sit eius nomen, quem significamus, quam qualis sit; divina, non humana, matre natus praedicatur Aeneas; sic 4, 282 „imperio deorum“ i. e. divino, Iovis;

- Cocyti stagna alta vides Stygiamque paludem,  
 Di cuius iurare timent et fallere numen.
- 325 Haec omnis, quam cernis, inops inhumataque turba est;  
 Portitor ille Charon; hi, quos vehit unda, sepulti.  
 Nec ripas datur horrendas et rauca fluenta  
 Transportare prius, quam sedibus ossa quierunt.  
 Centum errant annos volitantque haec litora circum;
- 330 Tum demum admissi stagna exoptata revisunt.  
 Constitit Anchisa satus et vestigia pressit,  
 Multa putans, sortemque animi miseratus iniquam.  
 Cernit ibi maestos et mortis honore carentis  
 Leucaspim et Lyciae ductorem classis Oronten,
- 335 Quos simul a Troia ventosa per aequora vectos  
 Obruit Auster, aqua involvens navemque virosque.  
 Ecce gubernator sese Palinurus agebat,  
 Qui Libyco nuper cursu, dum sidera servat,  
 Exciderat puppi mediis effusus in undis.
- 340 Hunc ubi vix multa maestum cognovit in umbra,  
 Sic prior adloquitur: Quis te, Palinure, deorum  
 Eripuit nobis medioque sub aequore mersit?  
 Dic age. Namque mihi, fallax haud ante repertus,  
 Hoc uno responso animum delusit Apollo,
- 345 Qui fore te ponto incolumem finisque canebat  
 Venturum Ausonios. En haec promissa fides est?  
 Ille autem: Neque te Phoebi cortina fefellit,  
 Dux Anchisiada, nec me deus aequore mersit.  
 Namque gubernaculum multa vi forte revolsum,
- 350 Cui datus haerebam custos cursusque regebam,  
 Praecipitans traxi mecum. Maria aspera iuro  
 Non ullum pro me tantum cepisse timorem,  
 Quam tua ne, spoliata armis, excussa magistro,  
 Deficeret tantis navis surgentibus undis.
- 355 Tris Notus hibernas inmensa per aequora noctes  
 Vexit me violentus aqua; vix lumine quarto  
 Prospexi Italiam summa sublimis ab unda.

adde 2, 336. 11, 784 sq. „superos“, Apollinem. 7, 98. 10, 79. 12, 60.] 324. 12, 816. Hesiod. Theog. 400 et 792 sqq. Hom. Odys. 5, 185 sq.] 325. cf. Hom. Od. 23, 71 sqq.] 328. *sedibus*, sepulcro, cf. vs. 152. 371. — *quierunt*, v. 4, 523.] 331. v. vs. 197.] 332. *animi* Casus locativus, quem appellant, ut *humi*, cf. 10, 686. Alii *animo*.] 334. cf. 1, 113.] 335. *vectos*, πορρομεύους, v. G. 1, 206.]] 337—383. *Palinurus*. Poetae haec fingenti obversata sunt ea, quae de Elpenore narrantur ab Homero Od. 11, 51 sqq.] 337. *se agebat*, incedebat, ut 8, 465. 9, 696.] 338. *servat*, v. G. 1, 335.] 346. *promittere fidem*, promissis fidem obstringere, 4, 552. Ovid. Fast. 3, 366. 6, 549.] 348. *nec me d. a. m.*: ergo non senserat insidias Somni Palinurus.] 352. *pro me*, v. 12, 48.] 353. *armis*, gubernaculo. — *exc. mag.*, v. 4, 500.] 355 sq. Qui factum est, ut non mergeretur? 356. *viol. aqua*, violentos excitans fluctus. — Classe in portum invecta putabimus ortam esse tempestatem.] 357. cf. Hom. Odys. 5,

- Paulatim adnabam terrae; iam tuta tenebam,  
 Ni gens crudelis madida cum veste gravatum  
 360 Prensantemque uncis manibus capita aspera montis  
 Ferro invasisset, praedamque ignara putasset.  
 Nunc me fluctus habet, versantque in litore venti.  
 Quod te per caeli iucundum lumen et auras,  
 Per genitorem oro, per spes surgentis Iuli,  
 365 Eripe me his, invicte, malis: aut tu mihi terram  
 Iniice, namque potes, portusque require Velinos;  
 Aut tu, si qua via est, si quam tibi diva creatrix  
 Ostendit — neque enim, credo, sine numine divom  
 Flumina tanta paras Stygiamque innare paludem —  
 370 Da dextram misero, et tecum me tolle per undas,  
 Sedibus ut saltem placidis in morte quiescam.  
 Talia fatus erat, coepit cum talia vates:  
 Unde haec, o Palinure, tibi tam dira cupido?  
 Tu Stygias inhumatus aquas amnemque severum  
 375 Eumenidum aspicias, ripamve iniussus adibis?  
 Desine fata deum flecti sperare precando.  
 Sed cape dicta memor, duri solatia casus.  
 Nam tua finitimi, longe lateque per urbes  
 Prodigiiis acti caelestibus, ossa piabunt,  
 380 Et statuent tumulum, et tumulto sollemnia mittent,  
 Aeternumque locus Palinuri nomen habebit.  
 His dictis curae emotae pulsusque parumper  
 Corde dolor tristi; gaudet cognomine terra.  
 Ergo iter inceptum peragunt fluvioque propinquant.  
 385 Navita quos iam inde ut Stygia prospexit ab unda  
 Per tacitum nemus ire pedemque advertere ripae,

393.] 358 sq. tenebam, et obtinuissem, Ni cet. v. 8, 522.] 359. mad. cum v. gr., Plin. N. H. 7, 20, 19 „vehicula cum culleis onusta.“ Soph. Oed. R. 17 οἱ δὲ οὖν γῆρα βαρεῖς. Nempe cum veste est, qui est veste indutus; Cic. pro Sest. 38, 82 „mulionicam paenulam arripuit, cum qua primum Romam ad comitia venerat.“] 360. capita montis, saxa in radicibus montis prominentia, v. G. 2, 355.] 361. pr. ign. p., nesciens, quo casu in mare praecipitatus essem, putabat scilicet me naufragium fecisse et, quidquid ex opibus servare potuissem, mecum gestare.] 362. Nunc me, interfectum scilicet ab istis praedonibus.] 363. Quod, v. 2, 141.] 366. port. Vel., portum a Velia (non iam condita, sed aliquanto post condenda) dictum, ubi iacebat corpus Palinuri.] 371. in morte, mortuus, ut vs. 444. Noli iungere saltem in m.] 374. sever., a severitate Eumenidum hoc epitheton translatus est ad amnem.] 376. fata deum significant, quidquid certa et immutabili deorum voluntate constitutum est.] 378 sqq. Servius: „Lucanis pestilentia laborantibus respondit oraculum manes Palinuri caso placandos. Ob quam rem non longe a Velia et lucum et cenotaphium ei dederant.“ — finitimi, qui propinqua portui Velino loca tenent; significatur omnis populus Lucanorum aut certe magna pars.] 380. cf. 3. 63—67.] 381. locus, Palinuri promontorium portusque.] 382. parumper, utpote paulo post rediturus.] 383. cognomine pro cognomini, ut Ovid. Met. 15, 743 „specie caeleste resumpta;“ adde eiusd. Heroid. 16, 277. Fast. 3, 654.]] 384—425. Aeneas

- Sic prior adgreditur dictis, atque increpat ultro:  
 Quisquis es, armatus qui nostra ad flumina tendis,  
 Fare age, quid venias; iam istinc; et comprime gressum.
- 390 Umbrarum hic locus est, Somni Noctisque soporae;  
 Corpora viva nefas Stygia vectare carina.  
 Nec vero Alciden me sum laetatus euntem  
 Accepisse lacu, nec Thesea Pirithoumque,  
 Dis quamquam geniti atque invicti viribus essent.
- 395 Tartareum ille manu custodem in vincla petivit,  
 Ipsius a solio regis, traxitque trementem;  
 Hi dominam Ditis thalamo deducere adorti.  
 Quae contra breviter fata est Amphrysia vates:  
 Nullae hic insidiae tales; absiste moveri;
- 400 Nec vim tela ferunt; licet ingens ianitor antro  
 Aeternum latrans exsanguis terreat umbras,  
 Casta licet patrui servet Proserpina limen.  
 Troius Aeneas, pietate insignis et armis,  
 Ad genitorem imas Erebi descendit ad umbras.
- 405 Si te nulla movet tantae pietatis imago,  
 At ramum hunc — aperit ramum, qui veste latebat —  
 Adgnoscas. Tumida ex ira tum corda residunt.  
 Nec plura his. Ille admirans venerabile donum  
 Fatalis virgae, longo post tempore visum,
- 410 Caeruleam advertit puppim ripaeque propinquat.  
 Inde alias animas, quae per iuga longa sedebant,  
 Deturbat laxatque foros; simul accipit alveo  
 Ingentem Aenean. Gemuit sub pondere cymba  
 Sutilis, et multam accepit rimosa paludem.
- 415 Tandem trans fluvium incolumis vatemque virumque  
 Informi limo glaucaque exponit in ulva.  
 Cerberus haec ingens latratu regna trifauci  
 Personat, adverso recubans inmanis in antro.  
 Cui vates, horrere videns iam colla colubris,
- 420 Melle soporatum et medicatis frugibus offam

*placato a Sibylla Charonte traiecit Stygem. Sopitur Cerberus.* | 389. *iam istinc* sc. fare, ex eo loco, in quo modo pedem posuisti. | 392. Servius: „Quando Hercules ad inferos descendit, Charon territus eum statim suscepit. Ob quam rem anno integro in compedibus fuit.“ — *Iunge euntem lacu*, i. e. vectorem. | 394. „*quamquam* (uti sciebam) *essent* Dis geniti.“ | 395. *manu in v. p.*, manu iniecta vinxit et abduxit. | 396. *a solio*, quo, viso Hercule territus, confugerat. | 397. *dom.*, Proserpinam. | 398. *Amphr.*, ab Apolline artem vaticinandi docta; *Amphrysius* enim Apollo dici poterat vel ab Amphryso flumine Thessaliae, v. G. 3, 2, vel ab Amphryso oppido Delphis vicino. | 402. Signum putabatur castitatis muliebris servare limen, i. e. intra domum se continere. | 405. v. 2, 583. | 408. Nec plura his acta inter eos. | 409. *Fat. v.*, cf. vs. 146 sq. | 411. *alias*, ut iam apud Hom. II. 5, 517 οὐ γὰρ ἔα πόντος ἄλλος, i. e. ἄλλο τι, πόντος δηλονότι. | 414. *Sutilis*, facta ex corio; plerumque iuncea fuisse dicitur. | 415. *incolumis*, incolumes. | 416. v. 1, 544. | 420. In-

- Obiicit. Ille fame rabida tria guttura pandens  
 Corripit obiectam, atque inmania terga resolvit  
 Fusus humi, totoque ingens extenditur antro.  
 Occupat Aeneas aditum custode sepulto,  
 425 Evaditque celer ripam inremeabilis undae.  
 Continuo auditae voces vagitus et ingens  
 Infantumque animae fientes in limine primo,  
 Quos dulcis vitae exsortis et ab ubere raptos  
 Abstulit atra dies et funere mersit acerbo.  
 430 Hos iuxta falso damnati crimine mortis.  
 Nec vero hae sine sorte datae, sine iudice, sedes:  
 Quaesitor Minos urnam movet; ille silentum  
 Conciliumque vocat vitasque et crimina discit.  
 Proxuma deinde tenent maesti loca, qui sibi letum  
 435 Insontes peperere manu lucemque perosi  
 Proiecere animas. Quam vellent aethere in alto  
 Nunc et pauperiem et duros perferre labores!  
 Fas obstat, tristisque palus inamabilis unda  
 Alligat, et noviens Styx interfusa coerct.  
 440 Nec procul hinc partem fusi monstrantur in omnem  
 Lugentes campi; sic illos nomine dicunt.  
 Hic, quos durus amor crudeli tabe peredit,  
 Secreti celant calles et myrtea circum  
 Silva tegit; curae non ipsa in morte relinquunt.  
 445 His Phaedram Procrimque locis, maestamque Eriphylen,  
 Crudelis nati monstrantem volnera, cernit,  
 Euadnenque et Pasiphaen; his Laodamia

tellige placentam melle conditam et soporatam frugibus medicatis, papavere aliisque granis vim medicam, puta soporiferam, habentibus.] 422. *resolv.*, cf. 9, 236.] 424. *sep.*, cf. 2, 265.]] 426—476. *Prima, quo accedit traiecta Stygo Aeneas, loca tenent animae infantum, sequuntur sedes falso crimine capitis damnatorum, tum eorum, qui nulla culpa admissa mortem ipsi sibi attulerunt, deinde eorum, quibus amor causa pereundi fuit; in his est Dido.*] 427. *lim. pr.* Peragratiss scilicet iis locis, quae erant ante vestibulum (vs. 273) Orci, ipsum quasi vestibulum limenque ingreditur Aeneas.] 431. *sine s. d. s. iud.*, sine iudicibus sortito datis; sumunt hoc, ut etiam proxima, *Quaes. M. v. movet* (*versat*), a sortitione iudicum apud Romanos; sortiebatur quaesitor, i. e. is, qui exercendis questionibus praeerat. — Ceterum Minoi hoc muneris datur a poeta, ut suam quaeque animae sedem apud inferos attribuat, impios, facto quodam praedicio, ad Rhadamanthum mittat, qui sontibus omnem culpam fateri coactis (vs. 567 sqq.) pro merito cuiusque poenarum genera modumque constituit.] 432 sq. *sil. Conc. v.*, animas citat ad iudicium.] 438. *Fas*, v. 2, 779.] 439. *Lucan.* 2, 50 „Massageten Scythicus non adliget Ister.“] 440. amplissimi sunt hi campi, quia tales animae amant solitudinem.] 442. Sed non solos miseros amantes ibi versari, docet qui deinde sequitur nominum index.] 444. *in m.*, v. vs. 371.] 445. *Phaedra*, uxor Thesei, *Ovid. Heroid.* 4. — *Procris*, *Ovid. Metam.* 7, 707—862 et *Art. Amat.* 3, 695—746. — *Eriphyle*, dono Polynicia, aureo monili, capta persuasit Amphiarao, marito suo, ut bellum inferret Eteocli, quo in bello ipse periit; illa ab Alcmaeone filio interempta.] 447. *Euadne*, Capanei uxor, immisit se in ardentem coniugis sui rogam, *Propert.* 1, 15, 21 sq.

- It comes, et iuvenis quondam, nunc femina, Caeneus,  
 Rursus et in veterem fato revoluta figuram.
- 450 Inter quas Phoenissa recens a vulnere Dido  
 Errabat silva in magna; quam Troius heros  
 Ut primum iuxta stetit adgnovitque per umbram  
 Obscuram, qualem primo qui surgere mense  
 Aut videt aut vidisse putat per nubila lunam,
- 455 Demisit lacrimas dulcique adfatus amore est:  
 Infelix Dido, verus mihi nuntius ergo  
 Venerat extinctam ferroque extrema secutam?  
 Funeris heu tibi caussa fui? Per sidera iuro,  
 Per superos et si qua fides tellure sub ima est,
- 460 Invitus, regina, tuo de litore cessi.  
 Sed me iussa deum, quae nunc has ire per umbras,  
 Per loca senta situ cogunt noctemque profundam,  
 Inperiis egere suis; nec credere quivi  
 Hunc tantum tibi me discessu ferre dolorem.
- 465 Siste gradum, teque aspectu ne subtrahe nostro.  
 Quem fugis? extremum fato, quod te adloquor, hoc est.  
 Talibus Aeneas ardentem et torva tuentem  
 Lenibat dictis animum lacrimasque ciebat.  
 Illa solo fixos oculos aversa tenebat,
- 470 Nec magis incepto voltum sermone movetur,  
 Quam si dura silex aut stet Marpesia cautes.  
 Tandem corripuit sese atque inimica refugit  
 In nemus umbriferum, coniunx ubi pristinus illi  
 Respondet curis aequatque Sychaeus amorem.
- 475 Nec minus Aeneas, casu concussus iniquo,  
 Prosequitur lacrimans longe et miseratur euntem.

— *Laodamia*, Ovid. Heroid. 13, quae cum a diis impetrasset, ut umbra mortui coniugis sibi in conspectum veniret, ea visa exspiravit. | 448. *Caeneus*, Ovid. Met. 12, 171—209 et 470—532. Alii *Caenis*. | 451. *quam ... iuxta ... adfatus est*, nec haerebis in hyperbato, v. 4, 573. | 453. *qualem videt lunam*, qui eam primo mense (i. e. *νοῦμβριλῆς* tempore) per nubila surgere videt, v. G. 1, 104. | 456. *nuntius*, cf. 5, 3—7. | 459. *si q. f. t. s. i. e.*, si quid est, per quod iurantes inferi fidem verbis suis afferant; cf. 2, 142. | 462. *senta situ*, *situs* h. l. est incultae, proptereaue sentibus ac dumis obductae, telluris squalor et horror; Homerus dixit *Ἰδὼν δόμον εὐρώεντα* Odys. 10, 512. Liv. 22, 16 „stagna perhorrida situ.“ | 465. *aspectu*, v. E. 5, 29. | 466. *Quem?* scilicet non hostem, sed amantem tui. — *extr. q. t. a., h. e.*, v. 2, 690. — *fato*, Servius „quia post mortem tenebit alium circulum, viris fortibus scilicet, non amantibus datum.“ | 467. *torva t.*, v. G. 3, 149. | 468. *animus ardens* h. l. significat iracundiam, quae cum per torvum adspectum declarari soleat, ausus est poeta dicere *animum torva tuentem*. — *Lenibat ... ciebat*, conabatur lenire ... lacrimas Didoni (cf. 476) ciere; Verba finita interdum solum conatum, studium, voluntatem indicant, ut 10, 801. 12, 152. 394. | 470. *incepto*: nam reliqua, quae addere voluerat Aeneas, Dido auditura non erat. | 471. *Marpesia* s. *Marpesus* mons Pari insulae. — *stet* quare *πονηχώτερον*, quam *sit*? | 473 sq. *illi Resp. c.*, illius ameri suo amore respondet; Silius de

- Inde datum molitur iter. Iamque arva tenebant  
 Ultima, quae bello clari secreta frequentant.  
 Hic illi occurrit Tydeus, hic inclutus armis  
 480 Parthenopaeus et Adrasti pallentis imago;  
 Hic multum fleti ad saeperos belloque caduci  
 Dardanidae, quos ille omnis longo ordine cernens  
 Ingemuit, Glaucumque Medontaque Thersilochumque,  
 Tris Antenoridas, Cererique sacrum Polyphoeten,  
 485 Idaeumque, etiam currus, etiam arma tenentes.  
 Circumstant animae dextra laevaue frequentes.  
 Nec vidisse semel satis est; iuvat usque morari,  
 Et conferre gradum, et veniendi discere caussas.  
 At Danaum proceres Agamemnoniaeque phalanges  
 490 Ut videre virum fulgentiaque arma per umbras,  
 Ingenti trepidare metu; pars vertere terga,  
 Ceu quondam petiere rates; pars tollere vocem  
 Exiguam: inceptus clamor frustratur hiantis.  
 Atque hic Priamiden laniatum corpore toto  
 495 Deiphobum videt et lacerum crudeliter ora,  
 Ora manusque ambas; populataque tempora raptis  
 Auribus, et truncas inhonesto vulnere naris.  
 Vix adeo agnovit pavitantem ac dira tegentem  
 Supplicia, et notis compellat vocibus ultro:  
 500 Deiphobe armipotens, genus alto a sanguine Teucri,  
 Quis tam crudelis optavit sumere poenas?  
 Cui tantum de te licuit? Mihi fama suprema  
 Nocte tulit fessum vasta te caede Pelasgum  
 Procubuisse super confusae stragis acervum.  
 505 Tunc egomet tumulum Rhoeteo in litore inanem  
 Constitui et magna Manis ter voce vocavi.  
 Nomen et arma locum servant; te, amice, nequivi

eodem Sychaeo 8, 148 „curas cupiens aequare priores.“ || 477—547. *Pergit Aeneas ad sedem eorum, qui bello gloriam adepti sunt. Deiphobus.* || 477. *datum*, fato concessum, cf. vs. 147. — *molitur*, rem scilicet difficilem, necdum ab eo tentatam. | 479 sq. *Tydeus*, Caledonius, pater Diomedis, *Parthenop.*, Arcas, et *Adrastus*, rex Argorum idemque socer Polynicis, ex septem illis erant ducibus, qui Thebas bello petebant. | 481. *ad*, apud. | 484. *Tr. Ant.*, cf. Hom. Il. 11, 59 sq. — *Cor. sacr.*, sacerdotem Cereris. | 485. *Id.*, cf. Hom. Il. 5, 9—11 et 24, 325. — Et v. G. 3, 189. | 486. *Circumst.*, Aeneas scilicet. | 491. cf. Hom. Odyss. 11, 605 sq. | 492. *voc. Ex.*, cf. Hom. Odyss. 24, 5—9 et Ovid. F. 5, 458. | 493. conantur quasi pugnaturi clamorem tollere, sed voce destituti hiant tantum. | 494 sq. laniatio cernitur in latius adactis vulneribus, laceratio, quae est exquisitoris crudelitatis, in mutilatione. — *ora*, labra ac iunctas his genas puta. Ceterum v. E. 3, 106. | 498. *pavit*, quia prae pudore nolebat agnosci. — *tegent.*, Servius „tegere volentem; nam truncatis manibus quid poterat tegere?“ v. vs. 468. | 501. *optavit sumere*, elegit, quas sumeret; hinc *potius optare* i. q. malle, *προελέσθαι*, ut apud Terent. And. 4, 5, 2 sq. | 505. v. 3, 304. | 506. v. 2, 644. | 507. Nomen tuum inscriptum et arma tua imposita (cf. vs. 233) servant locum, inviolatum praestant ut consecratum,



- Conspicere et patria decedens ponere terra.  
 Ad quae Priamides: Nihil o tibi amice relictum;  
 510 Omnia Deiphobo solvisti et funeris umbris.  
 Sed me fata mea et scelus exitiale Lacaenae  
 His mersere malis; illa haec monumenta reliquit.  
 Namque ut supremam falsa inter gaudia noctem  
 Egerimus, nosti; et nimium meminisse necesse est.  
 515 Cum fatalis equus saltu super ardua venit  
 Pergama et armatum peditem gravis attulit alvo,  
 Illa, chorum simulans, euantis orgia circum  
 Ducebat Phrygias; flammam media ipsa tenebat  
 Ingentem et summa Danaos ex arce vocabat.  
 520 Tum me, confectum curis somnoque gravatum,  
 Infelix habuit thalamus, pressitque iacentem  
 Dulcis et alta quies placidaeque simillima morti.  
 Egregia interea coniunx arma omnia tectis  
 Amovet et fidum capiti subduxerat ensem;  
 525 Intra tecta vocat Menelaum et limina pandit,  
 Scilicet id magnum sperans fore munus amanti,  
 Et famam extinguere veterum sic posse malorum.  
 Quid moror? inrumpunt thalamo; comes additur una  
 Hortator scelerum Aeolides. Di, talia Graiis  
 530 Instaurate, pio si poenas ore reposco.  
 Sed te qui vivum casus, age fare vicissim,  
 Attulerint. Pelagine venis erroribus actus,  
 An monitu divom? an quae te fortuna fatigat,  
 Ut tristis sine sole domos, loca turbida, adires?  
 535 Hac vice sermonum roseis Aurora quadrigis

roque memoriam tuam tuentur, cf. 7, 3. — *tē*, amice, v. E. 8, 108. | 508. Iunge: *ponere patr. terra*, humare in patria. | 510. *funeris*, mortui corporis; ut 9, 491. *Deiphobo et fun. umbris* i. q. mihi mortuo. | 511. Per particulam *Sed* remittitur ad vs. 501, v. E. 1, 19. — *Lacaena* cum opprobrio dicitur, „quasi omnes, ut ait Donatus, quae inde oriuntur, tales sint, ut decipiant maritos et fallant;“ cf. 2, 601 et v. 3, 629. | 512. *haec monum.*, cf. 5, 538. | 513. cf. 2, 248 sq. | 515. *saltu venit*, *ἀνέβη*, ut in eadem re Ennius „maximo saltu superavit gravidus armatis equus.“ — *super*, v. 1, 680. | 516. *grav.*, cf. 2, 238. | 517 sq. iunge *circumducebat euantis* (cum laeto clamore ... *εὐάν* ... celebrantes) *orgia*; cf. Sophocli. Antig. 148 sqq. | 519. *Dan. voc.*, face (quam tenebat ut *ὀφθαλμοῦσα*, cf. 7, 397) signum ex arce dabat Danaos, ut solverent a Tenedo. | 523. Occiso Paride Helena nupserat Deiphobo. | 524. Amovet arma, postquam ensem subduxerat. — *capiti subd.*, cf. 7, 460. Theocr. 24, 43 „*ἔλπος*, *ὃ οἱ ὑπερθεῖν κλινίτης κεδρίνου περὶ πασσάλῳ αἰὲν ἄωρο*.“ adde Eurip. Hec. 898. | 529. *Aeolides*: Sisyphum, Aeoli filium, patrem Ulixis fuisse quidam ferebant. | 530. *Inst.*, iterum evenire facite, sed Graecis. | 532. *actus* scilicet ad fines Oceani, ubi descensus ad inferos patere antiquissimi homines putabant; Hom. Odys. 11, 13 „*Η (γῆς) δ' ἐς πέλας ἔκανε βαθυρόου Ὠκεανοῖο*,“ „*ἐνδ' ἀκτὴ τε λάχεια καὶ ἄλσέα Περσεφονείης*“ 10, 509. | 533. *an quae*: an alia te fatigat fortuna? et quae est ea? | 534. *turbida*, tenebrosa, *trüba*. | 535. *Hac v. serm.*, cf. Hom. Odys. 11, 81. | 535 sq. Auroram mane ab orien-

- Iam medium ætherio cursu traiecerat axem;  
 Et fors omne datum traherent per talia tempus;  
 Sed comes admonuit breviterque adfata Sibylla est:  
 Nox ruit, Aenea; nos flendo ducimus horas.
- 540 Hic locus est, partis ubi se via findit in ambas:  
 Dextera quae Ditis magni sub moenia tendit,  
 Hac iter Elysium nobis; at laeva malorum  
 Exercet poenas et ad impia Tartara mittit.  
 Deiphobus contra: Ne saevi, magna sacerdos;
- 545 Discedam, explebo numerum, reddarque tenebris.  
 I decus, i, nostrum; melioribus utere fatis.  
 Tantum effatus et in verbo vestigia torsit.
- Respicit Aeneas subito, et sub rupe sinistra  
 Moenia lata videt, triplici circumdata muro,
- 550 Quae rapidus flammis ambit torrentibus amnis,  
 Tartareus Phlegethon, torquetque sonantia saxa.  
 Porta adversa ingens solidoque adamante columnae,  
 Vis ut nulla virum, non ipsi exscindere bello  
 Caelicolae valeant; stat ferrea turris ad auras,
- 555 Tisiphoneque sedens, palla succincta cruenta,  
 Vestibulum exsomnia servat noctesque diesque.  
 Hinc exaudiri gemitus et saeva sonare  
 Verbera; tum stridor ferri, tractaeque catenae.  
 Constitit Aeneas strepituque exteritis haesit.
- 560 Quae scelerum facies? o virgo, effare; quibusve  
 Urgentur poenis? quis tantus plangor ad auras?  
 Tum vates sic orsa loqui: Dux inclute Teucrum,  
 Nulli fas casto sceleratum insistere limen;  
 Sed me cum lucis Hecate praefecit Avernus,
- 565 Ipsa deum poenas docuit, perque omnia duxit.

tali parte profectam totum iter per caelum una cum Sole emetiri veteres statu-  
 bant; significatur igitur h. l. tempus iam ad vesperam vergens. Cum prima luce  
 ingressus erat iter Aeneas, cf. vs. 255. | 539. *ruit*, v. 2, 250. | 540. *in ambas*,  
 non *duas*, quia notum erat non esse plures; nam deerat tertius locus, quo tertia  
 duceret. | 542. *via laeva* dicitur poenas malorum exercere, quod ea via malos  
 ducit ad Tartarum, ubi poenae eorum exercentur. | 545. *numerum* animarum s.  
 umbrarum, a quibus parumper discesserat; Sall. Cat. 32 „C. Manlius ex suo  
 (suorum) numero legatos misit.“ — *redd. ten.* Ventum erat ad bivium vs. 541,  
 ubi ob propinquitatem Elysii suo sole collustrati (vs. 640 sq.) iam aliqua species  
 diei apparebat. | 547. *T. effatus et ... torsit*, cave intelligas *est*; potius  
 Homeri exemplo sic scripsisse Virgilium putabimus, Il. 22, 247 „Ως φημὲν ἡ  
 καὶ κερδοσύνη ἡγήσατ' Ἀθήνη“, quo significatur factum orationem statim con-  
 secutum; v. etiam 5, 504. — *in verbo*, ὅμα εἰπὼν, v. 10, 856. | 548—627.  
*Tartarus*. | 548. *Resp.*, v. 2, 615. | 549. v. 2, 234. | 551. v. G. 3, 283. | 552.  
 cf. Hom. Il. 8, 15 et v. G. 2, 441. | 554. *ad auras* surgere, tolli, stare dicuntur  
 ea, quae vel minus vel magis alte sese efferunt, elata sunt, cf. vs. 554. | 558.  
 v. 1, 639. | 560 sq. cf. vs. 626 sq. | 563. *scol.* similiter dicebatur iste, qui  
 Romae fuit, vicus et campus sceleratus. | 565. *deum p.*, a diis constitutas. |

Gnosius haec Rhadamanthus habet, durissima regna,  
Castigatque auditque dolos, subigitque fateri,  
Quae quis apud superos, furto laetatus inani,  
Distulit in seram commissa piacula mortem.

- 570 Continuo sontis ultrix accincta flagello  
Tisiphone quatit insultans, torvosque sinistra  
Intentans anguis vocat agmina saeva sororum.  
Tum demum horrisono stridentes cardine sacrae  
Panduntur portae. Cernis, custodia qualis  
575 Vestibulo sedeat? facies quae limina servet?  
Quinquaginta atris inmanis hiatibus Hydra  
Saevior intus habet sedem. Tum Tartarus ipse  
Bis patet in praeceps tantum tenditque sub umbras,  
Quantus ad aetherium caeli suspectus Olympum.  
580 Hic genus antiquum Terrae, Titania pubes,  
Fulmine deiecti fundo volvuntur in imo.  
Hic et Aloidas geminos inmania vidi  
Corpora, qui manibus magnum rescindere caelum  
Adgressi, superisque Iovem detrudere regnis.  
585 Vidi et crudelis dantem Salmonea poenas.  
Dum flammas Iovis et sonitus imitatur Olympi,

566. de munere Rhadamanthi diverso a munere Minois v. vs. 431. | 567. *doli* in eiusmodi quaestione sunt i. q. malo dolo commissa, quo qui usi sunt, perfidi, improbi, malitiosi appellantur a Cic. Off. 3, 14. Iam Rhadamanthus alios, dolum confessos, castigat, alios audit confidentes, alios tormentis adhibitis cogit fateri; et v. 1, 701. | 568. *furto* l. i., frustra gavisus ea, quae commisit, latere; *furta* saepe dicuntur a poetis, quae quis furtim doloseque fecit et latere posse putat; furtum i. q. furtiva caedes 10, 735, furtivi amores G. 4, 346. — *comm. piac.*, scelera expianda s. expiationem scelerum. | 570. *Continuo*, post factum iudicium scilicet. | 571. *quatit*, *ἐλαύνει*, Cic. Nat. D. 2, 42 „Arctophylax prae se quatit Arctum.“ | 574. Rerum ordo hic est: Aeneas (vs. 548—551) videt moenia triplici muro circumdata, Phlegethontem illa ambientem, Tisiphonen vestibulum custodientem. Rhadamanthus intus exercet iudicia; qui postquam fontes coarguit, panduntur portae illae sacrae (exsecrabiles), per quas sontibus iter est in Tartarum; ante eas portas est vestibulum (diversum ab eo, quod vs. 556 commemoratur); ibi sedet Megaera, ut auctor est Servius; hoc quoque vestibulum licebat Aeneae ex eo loco, quo constitutus erat, cernere; intus, post has portas, sedem habet Hydra, monstrum Lernaee simile ipsaque Megaera saevius; ingressis denique eas portas ipse se aperit Tartarus. | 577 sqq. cf. Hom. Ill. 8, 16. Hesiod. Theog. 720 sqq. | 579. *caeli susp.*, prospectus per aera a terrae ad *Olympum* i. e. caelum. | 580 sqq. *genus ... deiecti ... volvuntur*, Synesis generis ac numeri, ut *pars caesi*, *pars capti sunt*, cf. vs. 660. 11, 887 sqq. | 582. *Alóidas*, Otum et Ephialten, cf. Hom. Odyss. 11, 305—320. G. 1, 280 sqq. | 585. *Salmoneus*, Aeoli regis Thessaliae filius, frater Sisyphei, rex Elidis, qua erat superbia, deum se haberi voluit. | 585 sq. *dum* interdum significat id, ex quo quid (h. l. punitio) consecutum est, ut Cic. Tusc. 1, 42 „Dic, hospes, Spartae, nos te hic vidisse iacentes, Dum sanctis patriae legibus obsequimur.“ | 586. Nervosior hic verborum ordo, quam vulgaris ille: Hic, dum imitatur *cef.* Ovid. M. 7, 131—33 „Quos ubi viderunt hastas torquere... Demisere metu voltumque animumque Pelasgi.“ — Ceteri editores post poenas comma, post *Olympi* punctum ponunt; sunt etiam, qui versum 586 electum velint. |

- Quattuor hic invecus equis et lampada quassans  
 Per Graium populos mediaeque per Elidis urbem  
 Ibat ovans, divomque sibi poscebat honorem,  
 590 Demens! qui nimbos et non imitabile fulmen  
 Aere et cornipedum pulsu simularet equorum.  
 At pater omnipotens densa inter nubila telum  
 Contorsit, non ille faces nec fumea taedis  
 Lumina, praecipitemque inmani turbine adegit.  
 595 Nec non et Tityon, Terrae omniparentis alumnum,  
 Cernere erat, per tota novem cui iugera corpus  
 Porrigitur, rostroque inmanis voltur obunco  
 Immortale iecur tondens fecundaque poenis  
 Viscera rimaturque epulis habitatque sub alto  
 600 Pectore, nec fibris requies datur ulla renatis.  
 Quid memorem Lapithas, Ixiona Pirithoumque?  
 Quos super atra silex iam iam lapsura cadentique  
 Imminet adsimilis; lucent genialibus altis  
 Aurea fulcra toris, epulaeque ante ora paratae  
 605 Regifico luxu; Furiarum maxuma iuxta  
 Accubat, et manibus prohibet contingere mensas,  
 Exsurgitque facem attollens atque intonat ore.  
 Hic, quibus invisi fratres, dum vita manebat,  
 Pulsatusve parens, et fraus innexa clienti,  
 610 Aut qui divitiis soli incubuere repertis,  
 Nec partem posuere suis, quae maxuma turba est,  
 Quique ob adulterium caesi, quique arma secuti

587. *Quatt. equis*, tamquam deus. | 588. Sive Salmonen ab ipso Salmoneo conditam, sive Olympiam, quod facit Servius (idque verius), intelligis, utraque in media Elide sita erat. | 591. *aere*, aereo curru, quo, ut auctor est Manil. 5, 92, per pontes item aereos vehebatur; idque ipsum poeta significat verbis subiectis *pulsu equorum*. | 593. *ille*, v. G. 2, 435. — *fum. taedis*, s. eo, quod proficiscebantur a taedis; *atrum lumen* 7, 457, *piceum* 9, 75, appellatur, quale est taedae vel picis atrum fumum edentis, et v. G. 2, 309. | 594. *adegit*, sc. in profunditatem Tartari. | 595. Alii *omnipotentis al.* — *Tityos*, Τιτυός υἱός Hom. Od. 7, 324, vim adferre Latonae conatus, cf. Hom. Odyss. 11, 576—581. *alumn.*, vel quod a parente Terra in tantam proceritatem est educatus, vel quod, ut quidam tradunt, Jovis et Elarae fuit filius, quam Iuppiter irae Iunonis subtrahens gravidam sub terra occuluit. | 598. *fec. p. Visc.*, cf. vs. 600. | 599. *epulis*, v. 2, 315. | 601. *Ixion*, pater Pirithoi, rex Lapitharum, Iunonem tentare ausus. — *Pirith.*, v. vs. 397. | 602. Simili igitur poena hi affecti sunt secundum Virgilium ac Tantalus; vulgarem famam sequitur poeta G. 3, 38. 4, 484. — Ceterum v. G. 1, 295. | 603 sq. genialis lectus h. l. is, in quo accumbimus, cum diem festum inter epulas hilariter agere, Genio indulgere, decrevimus. — *toris*, tertius an sextus casus? | 605. *Fur. max.*, ut videtur, Allecto. | 608. *quibus inv. fratr.*, ut Atrous et Thyestes, Eteocles et Polynices. | 609. sive proprie pulsatus (quo spectat lex XII Tabularum: „Qui patrem pulsaverit, manus ei praecidatur“), sive omnino scelere aliquo laesus. — In iisdem Tabulis scriptum erat „Patronus si clienti fraudem fecerit, sacer esto.“ | 610. cf. G. 2, 507. — *soli*, tamquam soli habitantes cum divitiis suis. | 612 sq. *ob adult. caesi*; videtur poeta ad certos quosdam homines ac notos spectavisse, quos in adulterio deprehensos a

- Impia nec veriti dominorum fallere dextras,  
 Inclusi poenam expectant. Ne quaere doceri,  
 615 Quam poenam, aut quae forma viros fortunave mersit.  
 Saxum ingens volvunt alii, radiisque rotarum  
 Districti pendent; sedet, aeternumque sedebit,  
 Infelix Theseus; Phlegyasque miserrimus omnis  
 Admonet et magna testatur voce per umbras:  
 620 „Discite iustitiam moniti, et non temnere divos.“  
 Vendidit hic auro patriam, dominumque potentem  
 Inposuit; fixit leges pretio atque refixit;  
 Hic thalamum invasit natae vetitosque hymenaeos;  
 Ausi omnes inmane nefas, ausoque potiti.  
 625 Non, mihi si linguae centum sint oraque centum,  
 Ferrea vox, omnis scelerum comprehendere formas,  
 Omnia poenarum percurrere nomina possum.  
 Haec ubi dicta dedit Phoebi longaeva sacerdos:  
 Sed iam age, carpe viam et susceptum perface munus;  
 630 Adceleremus, ait; Cyclopum educta caminis  
 Moenia conspicio atque adverso fornice portas,  
 Haec ubi nos praecepta iubent deponere dona.  
 Dixerat, et pariter, gressi per opaca viarum,  
 Corripiunt spatium medium foribusque propinquant.  
 635 Occupat Aeneas aditum, corpusque recenti  
 Spargit aqua, ramumque adverso in limine figit.  
 His demum exactis, perfecto munere divae,  
 Devenere locos laetos et amoena virecta

maritis adulterarum verberibus caesos constaret, ut Sallustium a Milone. — *quique ... dextras*, spectant haec ad bellum servile annis 681—83 gestum. — *dom. dextras*, fidem dominis debitam. | 614 sq. *expectant* pertinet ad totum genus eorum, qui tales vel similes *sunt*, quales modo dicti; *mersit* spectat ad eos, qui tales *fuērunt*, quique iam luunt poenas. — *quae forma v. fortunave m.*, quae suppliciorum species, quae miseriae eos obruerint; pauca ex his exempli causa proximis versibus 616—620 proponit Sibylla; vs. autem 621 redit eo, unde fuerat digressa, i. e. ad varia scelerum genera. | 616. Alii *radiisve*, v. 1, 701. | 617 sqq. Theseus et Pirithous (cf. vs. 397) ad rupem alligati sedebant apud inferos; „ἐνιοὶ τῶν μυθολογῶν παρὶν ἀμφοτέρους μὴ τυχεῖν τοῦ νοσίου“ ait Diod. Sic. 4, 63. — Phlegyas, pater Ixionis, templum Apollinis, quod erat Delphi, incenderat. Valer. Fl. 2, 193 sq. „Accubat attonitum Phlegyan ... iuxta Tisiphonae saevasque dapes et pocula libat ... et nigris amplectitur hydria.“ | 619. *m. testatur v.*, clamat testimonio suae miseriae comprobans illud, quod iam sequitur, monitum. | 620. *moniti* meo exemplo. | 621 sq. Probabile est Virgilium, haec cum scriberet, de M. Antonio cogitasse, qui et tributum suum Caesari et in consulatu multis decreta falsa vendidit. — Tabulae legum aereae figebantur in parietibus Capitolii. | 623. Significatur fortasse Thyestes. | 625. cf. Hom. Il. 2, 488—490. | 628—702. *Ramus aureus Proserpinae consecratus ab Aenea. Elysium. Congressus cum Anchise.* | 629. quod munus? cf. vs. 632 et 636 sq. | 630. *cam.*, ferro in Cyclopum fabricis (*caminis*) cuso. | 632. *praecepta* deae, cf. vs. 142 sq. | 635 sq. *corp. r. Sp. a.*: sumtum hoc ab aqua lustrali ramisque lustralibus, qui erant in aditu templorum. | 637

- Fortunatorum nemorum sedesque beatas.  
 640 Largior hic campos aether et lumine vestit  
 Purpureo, solemque suum, sua sidera norunt.  
 Pars in gramineis exercent membra palaestris,  
 Contendunt ludo et fulva luctantur arena;  
 Pars pedibus plaudunt choreas et carmina dicunt.  
 645 Nec non Threicius longa cum veste sacerdos  
 Obloquitur numeris septem discrimina vocum,  
 Iamque eadem digitis, iam pectine pulsat eburno.  
 Hic genus antiquum Teucri, pulcherrima proles,  
 Magnanimi heroes, nati melioribus annis,  
 650 Ilusque Assaracusque et Troiae Dardanus auctor.  
 Arma procul currusque virum miratur inanis.  
 Stant terra defixae hastae, passimque soluti  
 Per campum pascuntur equi. Quae gratia currum  
 Armorumque fuit vivis, quae cura nitentis  
 655 Pascere equos, eadem sequitur tellure repostos.  
 Conspicit, ecce, alios dextra laevaque per herbam  
 Vescentis laetumque choro Paean canentis  
 Inter odoratum lauri nemus, unde superne  
 Plurimus Eridani per silvam volvitur amnis.  
 660 Hic manus ob patriam pugnando volnera passi,  
 Quique sacerdotes casti, dum vita manebat,  
 Quique pii vates et Phoebæ digna locuti,  
 Inventas aut qui vitam excoluere per artis,  
 Quique sui memores alios fecere merendo;  
 665 Omnibus his nivea cinguntur tempora vitta.  
 Quos circumfusus sic est adfata Sibylla,

sq. de Elysio cf. Hom. Od. 4, 563 sqq. | 640. *Largior*, patentior nullisque nubibus obductus. — Ceterum v. G. 2, 290. | 641. *Purp.*, quod est singulari candore; Horat. Od. 4, 1, 10 „olores purpurei,“ Pædo in obit. Maec. 62 „Brachia purpurea candidiora nive.“ — *solem*, v. G. 1, 290. | 644. *plaudunt ch.*, ducunt choreas cum plausu pedum; „πέπληγον δὲ χορόν θεῖον ποσὶν“ Hom. Od. 8, 264. | 645. *sacerdos* Orpheus dicitur propter orgia et mysteria instituta. — *longa c. v.*, qualis erat citharoedorum et vatium. | 646. Ad numeros modosque saltantium illorum et canentium accommodat (*obloquitur, ἀντιφωνεῖ*) cantum lyrae ἐπιταχόρδου. | 647. *pectine*, quo chordae impellantur fortius. | 649. *nati m. a.*, cf. Catull. 61, 22. | 651. *inanes*, non enim sunt veri solidique, sed tantum species quaedam et quasi εἰδῶλα currum, ut pleraque apud inferos; miratur autem ista non quia inania sunt, sed quod ibi videt eundem apparatus, quo vivi in terris gavisi fuerant. | 653. *gratia*, delectatio et studium. — *currum* pro *curruum*, ut *manum* 7, 490. Martial. 2, 5, 3 „duo millia passum.“ | 658. *superne*, Servius „ad superos.“ | 659. *Plur.*, v. G. 3, 28. — *per silv.*, popalifer Padus, Ovid. Am. 2, 17, 32. — Ceterum cf. G. 4, 366—373. | 660. v. vs. 580. | 661. Sacerdotibus, in summam contemtionem apud Romanos adductis, Augustus pristinum splendorem restituere summo opere studebat; velificatur ei studio Virgilius, post eos, qui pro patria occubuerunt, sacerdotibus primis assignans locum in Elysio. | 662. cf. E. 7, 22 sq. | 665. „*Omnibus his* cet. per quod eos ostendit meruisse divinos honores,“ Servius; praeter vates et sacerdotes dii quoque vittati

- Musaeum ante omnis; medium nam plurima turba  
 Hunc habet atque humeris exstantem suspicit altis:  
 Dicite, felices animae, tuque, optume vates,  
 670 Quae regio Anchisen, quis habet locus? illius ergo  
 Venimus et magnos Erebi tranavimus amnis.  
 Atque huic responsum paucis ita reddidit heros:  
 Nulli certa domus; lucis habitamus opacis,  
 Riparumque toros et prata recentia rivis  
 675 Incolimus. Sed vos, si fert ita corde voluntas,  
 Hoc superate iugum, et facili iam tramite sistam.  
 Dixit, et ante tulit gressum, camposque nitentis  
 Desuper ostentat; dehinc summa cacumina linqunt.  
 At pater Anchises penitus convalle virenti  
 680 Inclusas animas superumque ad lumen ituras  
 Lustrabat studio recolens, omnemque suorum  
 Forte recensebat numerum carosque nepotes,  
 Fataque fortunasque virum moresque manusque.  
 Isque ubi tendentem adversum per gramina vidit  
 685 Aenean, alacris palmas utrasque tetendit,  
 Effusaeque genis lacrimae, et vox excidit ore:  
 Venisti tandem, tuaque exspectata parenti  
 Vicit iter durum pietas? datur ora tueri,  
 Nate, tua, et notas audire et reddere voces?  
 690 Sic equidem ducebam animo rebarque futurum,  
 Tempora dinumerans, nec me mea cura fefellit.  
 Quas ego te terras et quanta per aequora vectum  
 Accipio! quantis iactatum, nate, periclis!  
 Quam metui, ne quid Libyae tibi regna nocerent!  
 695 Ille autem: Tua me, genitor, tua tristis imago,  
 Saepius occurrens, haec limina tendere adegit;  
 Stant sale Tyrrheno classes. Da iungere dextram,

erant. | 667. Musaeus, aequalis Orpheo, vates apud Athenienses, populares suos, in summo honore habitus, religiones ac teletas instituisse et oracula scripta reliquisse fertur. | 669. *optimo* in blanda compellatione ponitur, ὦ λῶστέ. | 674. *rip. tori* sunt ripae in tori speciem surgentes, supinae. | 676. *facili*, facile iter praebente. | 681. Lustrabat *oculis*, recolens *mente*, considerans (id quod et saepe, *rec...*, et studiose, *studio*, faciebat) scilicet, quis qualisque esset quisque eorum futurus apud superos. Idque faciebat, quia spe iam praecipiebat instantem adventum Aeneae, cf. vs. 690 sq., cui ostenturus erat has animas; ergo *forte* non est casu, sed i. q. hoc ipso tempore, quo accedebat Aeneas, nostrum *eben*, *gerade*, Gallicum *justement*. | 683. *Fata*, quibus summa totius vitae regitur; *fortunas*, casus intervenientes vel secundos vel adversos. — *manus*, virtutem per facta comprobendam. | 685. *p. utr.*, v. 5, 233. | 686. *Servius* „*genis*, palpebris; Ennius de dormiente „Imprimitque genae genam.“ | 687. *exspectata* pietas dicitur, quae id effecit, quod dudum optaverat Anchises, cf. 5, 731 sqq. | 688. *vicit* dixit, quod audaciae est, suscipere tale iter, multi laboris, conficere. | 691. *cura*, spes cum nonnulla sollicitudine coniuncta. | 692. v. 1, 544. | 694. nempe metuerat, ne Dido spesque regni Libyci animum Aeneae ab

- Da, genitor, teque amplexu ne subtrahe nostro.  
 Sic memorans largo fletu simul ora rigabat.
- 700 Ter conatus ibi collo dare bracchia circum,  
 Ter frustra comprehensa manus effugit imago,  
 Par levibus ventis volucrique similissima somno.
- Interea videt Aeneas in valle reducta  
 Seclusum nemus et virgulta sonantia silvis,
- 705 Lethaeumque, domos placidas qui prae-natat, amnem.  
 Hunc circum innumerae gentes populique volabant;  
 Ac velut in pratis ubi apes aestate serena  
 Floribus insidunt variis et candida circum  
 Lilia funduntur; strepit omnis murmure campus.
- 710 Horrescit visu subito caussasque requirit  
 Inscius Aeneas, quae sint ea flumina porro,  
 Quive viri tanto conplerint agmine ripas.  
 Tum pater Anchises: Animae, quibus altera fato  
 Corpora debentur, Lethaei ad fluminis undam
- 715 Securos latices et longa obliviae potant.  
 Has equidem memorare tibi atque ostendere coram,  
 Iampridem hanc prolem cupio enumerare meorum,  
 Quo magis Italia mecum laetere reperta.  
 O pater, anne aliquas ad caelum hinc ire putandum est
- 720 Sublimis animas, iterumque ad tarda reverti  
 Corpora? quae lucis miseris tam dira cupido?  
 Dicam equidem, nec te suspensum, nate, tenebo;  
 Suscipit Anchises, atque ordine singula pandit.
- Principio caelum ac terras camposque liquentis
- 725 Lucentemque globum Lunae Titaniaque astra  
 Spiritus intus alit, totamque infusa per artus

Italia aversura esset. | 698. v. E. 5, 29. | 700 sqq. cf. 2, 792 sqq. Hom. Odyss. 11, 204 sqq. | 702. *somno*, imagini per quietem oblatae, et cf. Hom. Od. 11, 207. || 703—751. *Lothe. Purgatio animarum. Reditus earum in nova corpora.* | 703. v. *red.*, in anfractu vallis, 8, 609. | 704. *puta silvis* significari densitatem istorum virgultorum, cf. 3, 22—25; sonant autem *silvis*, i. e. sua densitate, qua fit, ut vento mota crebrius vehementiusque inter se collidantur; similiter „virgulta sonantia lauro“ 12, 522. | 706. cf. vs. 748—750. | 707. *Ac velut*, v. 1, 148. | 709. *murmure* apum, non animarum. | 711. *porro*, procul, in *der Ferne*, Plin. Ep. 5, 6, 18 „campi deinde *porro*.“ | 716 sq. *Iampridem (cupio)* emphasis habet ab ipso, quem tenet in versu, loco, et, ut *cupio*, bis intelligendum est, sed ita, ut alteri enuntiato plus conciliet ponderis; similiter iteranda sunt similiter posita *Semper* G. 1, 248. Tibull. 3, 6, 2, et *Sola* infra 11, 504. | 719. *ad cael.*, ad superas auras. | 720. *Subl.*, in altam tendentes, et iunge *ire sublimas*, cf. 1, 415. | 721. *lucis*, vitae in terris scilicet agenda, et v. vs. 888. | 724. *Principio*, i. e. ut ab hoc ordiar s. sumam principium; Cic. de Fin. 1, 6 „Principio in physicis Epicurus totus est alienus.“ — *camp. liqu.*, similiter *πόντιον ἄλσος* Aesch. Pers. 115. *Neptunia prata* Cic. Arat. 373. | 725. Sol et Luna erant Titanes; *Luna Titaniaque astra*, quasi diceret: luna, ac non sola luna, sed utrumque astrum Titanium. | 726 sq. Spiritus quidam, s. anima mundi, *alit* haec, i. e. vivere et vigere facit, Servius „vegetat.“ *Spiritus et Mons* „*πνεῦμα*



- Mens agitat molem et magno se corpore miscet.  
 Inde hominum pecudumque genus vitaeque volantum  
 Et quae marmoreo fert monstra sub aequore pontus.
- 730 Igneus est ollis vigor et caelestis origo  
 Seminibus, quantum non noxia corpora tardant  
 Terrenique hebetant artus moribundaeque membra.  
 Hinc metuunt cupiuntque, dolent gaudentque, neque auras  
 Discipiunt clausae tenebris et carcere caeco.
- 735 Quin et supremo cum lumine vita relinquit,  
 Non tamen omne malum miseris nec funditus omnes  
 Corporeae excedunt pestes, penitusque necesse est  
 Multa diu concreta modis inolescere miris.  
 Ergo exercentur poenis, veterumque malorum
- 740 Supplicia expendunt: aliae panduntur inanis  
 Suspensae ad ventos; aliis sub gurgite vasto  
 Infectum eluitur scelus, aut exuritur igni.  
 Quisque suos patimur Manis; exinde per amplum  
 Mittimur Elysium, et pauci laeta arva tenemus,
- 745 Donec longa dies, perfecto temporis orbe,  
 Concretam exemit labem, purumque relinquit  
 Aetherium sensum atque aurai simplicis ignem.

νοερὸν καὶ πυρῶδες,“ ut Posidonio, „νοῦς κόσμου πυρινός,“ ut Zenoni videbatur. — *inf. p. artus*, ut etiam per artus hominum, v. 4, 336. | 727. misceri dicitur res et rei et re, cf. 12, 838. | 728. *Inde* vitae omnium animantium. | 729. *marm.*, cf. Hom. II. 14, 273. | 730. *Igne.*, quia ipsa illa anima mundi igneae s. aetheriae est naturae, v. vs. 726. | 731. *Sem.*, animantibus ex anima mundi vitam trahentibus. | 733 sqq. Hi sunt illi πρὸ τῆς ψυχῆς τῆς αὐτῶν ὀφθαλμοὺς καὶ ὅτα καὶ ὅλον τὸ σῶμα προεκαλυμμένοι apud Plat. Gorg. s. 79. Ex contagione corporis nascitur omnis perturbatio animi, omnisque error mentis. — *auras*, lucem, v. 1, 546. — *clausae*, repete *animae* ex vs. 720; similiter 8, 270 revocabis Subiectum e vs. 256, et vs. 558 e vs. 515, 9, 580 e vs. 578, vs. 733 e vs. 728 et vs. 749 e vs. 740, 7, 243 e vs. 221. | 740. Pro ratione peccatorum aliis lenius, aliis acrius adhibetur genus purgationis. — *inanes*, v. G. 4, 196. | 742. *Inf. sc.* labes sceleris, Cic. ad Att. 1, 13 „hoc, quod infectum est,“ i. e. labes adpersa reipublicae. | 743. „*Manes* supplicia apud Manes,“ Servius; „Poenas infernales“ scholiastes Statii Theb. 8, 84. Differunt inter se, etsi saepe non distinguuntur, vocabula *manes* et *umbræ*, id quod cum aliunde cognoscitur, tum ex Ovid. Trist. 5, 14, 12 „Nil feret ad manes divitis umbra suos.“ Quod in vivo homine corpus est, id in mortuo umbra, quod animas, manes; poenas sentit umbra; quidquid autem delinquimus, animus est causa; itaque *manes suos pati*, quandoquidem agitur de suppliciis, interpretabimur: poenas libidinum atque omnis pravitatis suae pati. — *per* de loco amplo ad peragrandum. | 744. *pauci*, quia plerique ita sunt vitiis infecti, nulla ut eos purgatio liberare ab illis possit. Aliter Servius „*pauci*, qui enim minus purgantur, statim redeunt ad corpora,“ et paulo post; „quae (animae) male vixerunt, statim redeunt, quae melius, tardius,“ cuius doctrinae nullum est vestigium apud Virgilium. | 745. *perf. temp. orbe*, mille annis vs. 748. — Ergo nondum finita est omnis purgatio, cum animae intrant Elysium; ipsa, quae ibi est, cf. vs. 640, purior aura poterat, quidquid supererat labis, paulatim abstergere. | 747. *aur. s. i.*, cf. Cic. Tusc. 1, 18 „calidior est vel potius ardentior animus,

Has omnis, ubi mille rotam volvere per annos,  
 Lethaeum ad fluvium deus evocat agmine magno,  
 750 Scilicet inmemores supera ut convexa revisant  
 Rursus et incipiant in corpora velle reverti.

Dixerat Anchises, natumque unaque Sibyllam  
 Conventus trahit in medios turbamque sonantem,  
 Et tumulum capit, unde omnis longo ordine posset  
 755 Adversos legere, et venientum discere voltus.

Nunc age, Dardaniam prolem quae deinde sequatur  
 Gloria, qui maneant Itala de gente nepotes,  
 Inlustris animas nostrumque in nomen ituras,  
 Expediam dictis, et te tua fata docebo.

760 Ille, vides, pura iuvenis qui nititur hasta,  
 Proxima sorte tenet lucis loca, primus ad auras  
 Aetherias Italo commixtus sanguine surget,  
 Silvius, Albanum nomen, tua postuma proles,  
 Quem tibi longaevo serum Lavinia coniunx

765 Educet silvis regem regumque parentem,  
 Unde genus Longa nostrum dominabitur Alba.  
 Proxumus ille Procas, Troianae gloria gentis,  
 Et Capys, et Numitor, et qui te nomine reddet  
 Silvius Aeneas, pariter pietate vel armis

770 Egregius, si umquam regnandam acceperit Albam.  
 Qui iuvenes! quantas ostentant, aspice, viris!  
 Atque umbrata gerunt civili tempora quercu:  
 Hi tibi Nomentum et Gabios urbemque Fidenam,  
 Hi Collatinas inponent montibus arces,

775 [Laude pudicitiae celebris, addentque superbos]  
 Pometios Castrumque Inui Bolamque Coramque.

quam est hic aer crassus atque concretus.“] 748. *u. m. rot. volv. p. a.*, ubi per mille annos exegerant tempus in orbem rediens; similiter Cic. Somn. Scip. 2 „cum aetas tua septenos octies solis anfractus reditusque converterit.“] 751. non incipiunt reverti, sed incipiunt velle reverti, quia non iam in eo est, ut revertantur, sed incipiunt velle, quod suo anima quaeque tempore factura est.]] 752—902. *Ex tumulo ad eam rem capto Anchises ostendit filio nobilissimas animas in corporibus posteriorum eius olim habitaturas; postremo, quae bella eum in Latio exceptura sint, docet. His actis Aeneas ab inferis revertitur relictisque Cumis Caietam petit.*] 753. *sonant.*, cf. vs. 709. ] 755. *legere*, oculis cernere. ] 757. *qui man. It. de g. nep.*, qui tibi futuri sint ex Lavinia nepotes. ] 758. *nostr. i. n. il.*, nominis nostri heredes. ] 759 *te tua f. d.*, cf. 891 sqq. ] 760. *pura*, non praefixa ferro, praemium fortitudinis bello spectatae, Suet. Claud. 28. ] 761. *Prox.* s. t. l. l., proximus est, qui in lucem prodeat sive vitam adipiscatur; et v. vs. 888. ] 763. *Alb. n.*, v. 12, 515. ] 765. Silvius et natus et educatus in silvis ferebatur. ] 766. *dom. Alba*, mortuo Ascanio, qui (cf. 1, 271) Albam cecidit, sed caruit liberis, successit Silvius. ] 767—69. Hi quoque reges Albae Longae. ] 770. *si unqu. cet. Servius* „Recepit autem a tutore, qui eius invasit imperium, quod ei vix anno quinquagesimo tertio restituit.“] 772 sqq. Atque

- Haec tum nomina erunt, nunc sunt sine nomine terrae.  
 Quin et avo comitem sese Mavortius addet  
 Romulus, Assaraci quem sanguinis Ilia mater  
 780 Educet. Viden, ut geminae stant vertice cristae,  
 Et pater ipse suo superum iam signat honore?  
 En, huius, nate, auspiciis illa incluta Roma  
 Inperium terris, animos aequabit Olympo,  
 Septemque una sibi muro circumdabit arces,  
 785 Felix prole virum: qualis Berecynthia mater  
 Invehitur curru Phrygias turrita per urbes,  
 Laeta deum partu, centum complexa nepotes,  
 Omnis caelicolas, omnis supera alta tenentis.  
 Huc geminas nunc flecte acies, hanc aspice gentem  
 790 Romanosque tuos. Hic Caesar et omnis Iuli  
 Progenies, magnum caeli ventura sub axem.  
 Hic vir, hic est, tibi quem promitti saepius audis,  
 Augustus Caesar, Divi genus, aurea condet  
 Saecula qui rursus Latio regnata per arva  
 795 Saturno quondam, super et Garamantas et Indos  
 Proferet inperium; iacet extra sidera tellus,  
 Extra anni solisque vias, ubi caelifer Atlas  
 Axem humero torquet stellis ardentibus aptum.  
 Huius in adventum iam nunc et Caspia regna  
 800 Responsis horrent divom et Maeotia tellus,

*idem* civicas gerunt coronas, nam deducunt cives in colonias. | 778. Quin etiam ista, ceteris insignior, anima, Romuli futura in terris, prodibit in vitam, avum Numitorem prosecutura. | 779. Assaracus avus Anchisae. *Assaracus sanguis*, ut *Pompilius sanguis* apud Horat. A. P. 292. | 780. *gem. cr.*, galea, perpetuum insigne Romuli, cum duplici crista. | 781. *Iunge: pat. ipse sup.*, Iuppiter. — *suo s. hon.*, conspicuum facit ea dignitate oris, quae in ipso, Iove, exsplendescit, cf. G. 2, 392. | 782. *hui. auspiciis ... aequabit*, ab huius auspiciis proficiscetur illa magnitudo imperii Romani et magnanimitas ipsorum Romanorum. Nempe condebantur urbes auspicate, et nota sunt auspicia Romuli. | 783. imperio suo amplectetur orbem terrarum, virtute par erit diis. | 784. non una praeter ceteras; sed ita solet unus adiacere vocabulis multitudinem aliquam significantibus, quo magis appareat vis et notio eius multitudinis. — *arces*, v. G. 2, 535. | 785. *Ber. m.*, Cybele sive Rhea, mater deorum. — *Berecynthus* mons Phrygiae. | 789. *nunc*, quoniam ab Albanis rebus transit ad Romanas. | 793. *Divi*, in numerum deorum recepti, Caesaris per adoptionem filius. | 793 sqq. Laus Augusti propter pacem Romanis restitutam 793 sq., propter prolatos fines imperii victoriasque ex remotissimis gentibus reportatas, priscis vaticiniis promissas, 795—801, denique propter longinqua itinera maxime ad constituendas provincias suscepta 802—806. | 794 sq. cf. 8, 319 sqq. | 795 sqq. Augustus imperium proferet ultra terminos illos orbis terrarum, quos norunt Romani. — *Gar.*, v. E. 8, 44. | 796 sq. fervore quodam poetico abreptus neglexit poeta usitatum sententiarum iuncturam, quam talem esse oportebat: ac super illas terras (proferet imperium), quae iacent extra sidera, i. e. quae sunt ultra zodiacum cyclumque tropicum (australem), ergo etiam extra eas vias, quas sol obliquo decursu peragrans anni regit vicissitudines. | 798. v. 4, 482. | 799. *Hui. in adv.*, animis in expectationem adventus

- Et septemgemi turbant trepida ostia Nili.  
 Nec vero Alcides tantum telluris obivit,  
 Fixerit aripedem cervam licet, aut Erymanthi  
 Pacarit nemora et Lernam tremefecerit arcu;  
 805 Nec, qui pampineis victor iuga flectit habenis,  
 Liber, agens celso Nysae de vertice tigris.  
 Et dubitamus adhuc virtutem extendere factis,  
 Aut metus Ausonia prohibet consistere terra?  
 „Quis procul ille autem ramis insignis olivae  
 810 Sacra ferens?“ Nosco crinis incanaque menta  
 Regis Romani, primam qui legibus urbem  
 Fundabit, Curibus parvis et paupere terra  
 Missus in imperium magnum. Cui deinde subibit,  
 „Otia qui rumpet patriae residues movebit  
 815 Tullus in arma viros et iam desueta triumphis  
 Agmina. Quem iuxta sequitur iactantior Ancus,  
 Nunc quoque iam nimium gaudens popularibus auris.  
 Vis et Tarquinius reges, animamque superbam  
 Ultoris Bruti, fascesque videre receptos?  
 820 Consul is imperium hic primus saevasque secures  
 Accipiet, natosque pater nova bella moventis  
 Ad poenam pulchra pro libertate vocabit,  
 Infelix! Utcumque ferent ea facta minores,  
 Vincet amor patriae laudumque inmensa cupido.  
 825 Quin Decios Drusosque procul saevumque securi

Augusti intentis. — *Caspia regna, Maeotia tellus, Nilus*, omnino Oriens. | 801. *turbant*, v. G. 1, 163. | 803 sq. „At, inquires, haec omnia intra solam Peloponnesum acta.“ Secutus est h. l. poeta Pindarum, nisi forte potius Heracleam Pisandri Camirensis. Pindarus Herculem, dum sequitur cervam Cerynitidem, ad Hyperboreos venisse tradit. Horum terra immane quantum distare credebatur a Peloponneso. In Peloponneso, ut quidam tradunt, natus erat Hercules, certe plurimum in ea versabatur, ibique et cepit aprum Erymanthium et Lernaeam hydram interfecit; ex eadem profectus ad Hyperboreos venit, idque spatium, quod interest inter Peloponnesum et Hyperboreos, significatur a Virgilio. | 805. Bacchus domitor Indiae. — *pamp.*, pampino involutis. — *iuga*, puta biuges tigres; Valer. Max. 4, 4, 5 „Quaeque manus modo arantium bouum *iugum rexerant*, triumphalis carrus habenas retinuerunt.“ | 806. *Nysa* urbs et mons Indiae, ubi puer Bacchus a nymphis educatus fertur. | 807. *dubitamus* pro *dubitas*, et admiscet Anchises suam personam, quo leniatur obiurgatio, quae inest in his verbis; cf. G. 2, 433. — *virtutem*, virtutis scilicet famam, ut 10, 468 „*famam extendere factis*.“ | 809. v. G. 3, 21. | 811. *Regis*, Numae. — *primam fundat legibus*, primum constituit firmatque legibus, v. E. 6, 1. | 816 sq. Pomponius Sabinus „Ancus Marcium vivente Tullo aegre ferebat. cum e stirpe regia se *iactaret* (erat autem nepos Numae), praelatum sibi Tullum. Itaque statuerat, *savore populari*, Tullum regem cum tota familia occidere.“ | 818. *superbam*, magnam et excelsam. | 819. *receptos*, translatos ad se omninoque ad Consules. | 823 sq. in quamcumque partem hoc interpretabatur posterius, plus apud Brutum valebit amor patriae et studiose appetita laus recte facti, quam caritas liberorum. | 825. *Decios*, v. G. 2, 169. — *Drusos* Liviae, uxoris Augusti, ex ea gente ortae

- Aspice Torquatum et referentem signa Camillum.  
 Illae autem, paribus quas fulgere cernis in armis,  
 Concordes animae nunc et dum nocte premuntur,  
 Heu quantum inter se bellum, si lumina vitae  
 830 Attigerint, quantas acies stragemque ciebunt!  
 Aggeribus socer Alpinis atque arce Monoeci  
 Descendens, gener adversis instructus Eois.  
 Ne, pueri, ne tanta animis adsuescite bella,  
 Neu patriae validas in viscera vertite viris;  
 835 Tuque prior, tu parce, genus qui ducis Olympo,  
 Proice tela manu, sanguis meus! —  
 Ille triumphata Capitolia ad alta Corintho  
 Victor aget currum, caesis insignis Achivis.  
 Eruet ille Argos Agamemnoniasque Mycenae,  
 840 Ipsumque Aeaciden, genus armipotentis Achilli,  
 Ultus avos Troiae, templa et temerata Minervae.  
 Quis te, magne Cato, tacitam, aut te, Cosse, relinquat?  
 Quis Gracchi genus, aut geminos, duo fulmina belli,  
 Scipiadae, cladem Libyae, parvoque potentem  
 845 Fabricium, vel te sulco, Serrane, serentem?  
 Quo fessum rapitis, Fabii? tu Maxumus ille es,  
 Unus qui nobis cunctando restituis rem.  
 Excudent alii spirantia mollius aera,  
 Credo equidem, vivos ducent de marmore voltus,

causa laudat; ex his M. Livius Salinator caeso ad Senam Hasdrubale clarus, Liv. 27, 48. | 826. *Torquat.*, cf. Liv. 8, 7. — *signa* Romanorum, quae amissa in pugna Alliensi Camillus victis Gallis recepit, Liv. 5, 49. | 827. *paribus*: imparia erant utrimque arma in bellis non civilibus. — *fulgere*, v. G. 1, 456. — Significantur autem Caesar (socer) et Pompeius (gener). | 828. *nocte*, v. vs. 888. | 829. *si*, v. 5, 64. | 831. *Agger.*, quod Alpes sunt tamquam propugnacula Italiae. — *arx Monoeci* promontorium Liguria cum templo et portu Herculis Monoeci; is portus hodie *Monaco* vocatur. — Ceterum v. 1, 2. | 832. *Eois*, legionibus et auxiliis ex Oriente contractis. | 833. *Ne, p.*, cf. Hom. Il. 7, 832. — Liv. 21, 33, „in via ac devia adsueta.“ | 835 sq. cf. 1, 286 sqq. | 836. v. 1, 664. | 837. *Ille*, L. Mummius. | 839. *ille*, L. Aemilius Paulus victor Persei, ab Achille (Aeacida) genus suum repetentis, eversorque regni Macedonici. Per Argos ac Mycenae omnis Graecia significatur. Sed effusius poeta favet Paulo, cuius quidem opera etiam ad res Graecorum aliquo modo pertinebat, Liv. 45, 31, sed minime talis fuit, qualis a Virgilio praedicatur. Videntur haec (ut alia) a poeta inter emendanda relicta esse. | 841. *templ. tem.* M., v. 1, 41. | 842. *Cato* ille Censorius. — *Cosse*, v. Liv. 4, 19 sq. Propert. 4, 10, 23 sqq. — *Gracchi genus*, respicitur maxime Ti. Sempronius Gracchus bello Punico secundo clarus. | 844. *Scip.*, puta Scipionem Africanum et maiorem et minorem. — *p. potentem*, in parva re domestica *divitem*; Plaut. Epid. 1, 2, 50 „Est Euboicus miles locuples, multo auro *potens*.“ | 845. *Fabricium* illum, qui legatus ad Pyrrhum missus est. — C. Attilium *Serranum* (a serendo, ut tradunt, dictum), qui eum a senatu missi ad imperium populi Romani suscipiendum arcescebant, semina spargentem invenerunt. | 847. Nobilis versus Ennii. Cic. Off. 1, 24. Liv. 30, 26. | 848. *alii*, qui? — *spir.*, v. G. 3, 34. — *molliora* signa dicuntur ita artificiose ad similitudinem verorum corporum facta, ut molliora, s. ad tactum cedentia, et flexibilia

- 850 Orabunt caussas melius, caelique meatus  
 Describent radio et surgentia sidera dicent:  
 Tu regere imperio populos, Romane, memento;  
 Hae tibi erunt artes; pacisque imponere morem,  
 Parcere subiectis, et debellare superbos.
- 855 Sic pater Anchises, atque haec mirantibus addit:  
 Aspice, ut insignis spoliis Marcellus opimis  
 Ingreditur, victorque viros supereminet omnis!  
 Hic rem Romanam, magno turbante tumultu,  
 Sistet, eques sternet Poenos Gallumque rebellem,
- 860 Tertiaque arma patri suspendet capta Quirino.  
 Atque hic Aeneas; una namque ire videbat  
 Egregium forma iuvenem et fulgentibus armis,  
 Sed frons laeta parum, et deiecto lumina voltu:  
 Quis, pater, ille, virum qui sic comitatur euntem?
- 865 Filius, anne aliquis magna de stirpe nepotum?  
 Quis strepitus circa comitum! quantum instar in ipso!  
 Sed nox atra caput tristi circumvolat umbra.  
 Tum pater Anchises, lacrimis ingressus obortis:  
 O gnate, ingentem luctum ne quaere tuorum;
- 870 Ostendent terris hunc tantum fata, neque ultra  
 Esse sinent. Nimium vobis Romana propago  
 Visa potens, Superi, propria haec si dona fuissent.  
 Quantos ille virum magnam Mavortis ad urbem  
 Campus aget gemitus! vel quae, Tiberine, videbis
- 875 Funera, cum tumulum praeterlabere recentem!  
 Nec puer Iliaca quisquam de gente Latinos  
 In tantum spe tollet avos, nec Romula quondam  
 Ullo se tantum tellus iactabit alumno.  
 Heu pietas, heu prisca fides, invictaque bello

videantur, non dura et rigida, cf. Cic. Brut. c. 18.] 851. v. E. 3, 41.] 853. *pacis morem*, „des Friedens Sitte“ *impon.*, victos adsuefacere vitae pacatae.] 856. Liv. Epit. 20. Propert. 4, 10, 39 sqq.] 859. *eques*. Servius „hic Gallos et Poenos equestri certamine superavit.“ Clarissima fuit M. Claudii Marcelli victoria prope tota equestris, quam ex Gallis caeso duce Viridomaro lectisque spoliis opimis reportavit, Plut. Marc. p. 300 Ed. Fr. Ad Nolam quoque cum primus Romanorum vinceret Hannibalem, egregiam praestitit equitatus operam, Plut. p. 303. Liv. 23, 16. Ab Hannibale gladius (*spada d' Italia*) appellatus est Marcellus.] 860. Primus Romulus Iovi opima spolia consecravit, Liv. 1, 10; altera Marti Cossus, de quo v. vs. 842.] 862. Significatur Marcellus, Octaviae sororis Augusti filius, ab Augusto adoptatus ipsique et populo propter miram iucunditatem morum imprimis gratus.] 866. *qu. instar*, quanta species et dignitas oris.] 868. *ingressus*, cf. 4, 107.] 872. *propr.*, v. E. 7, 31.] 873. sepultus est Marcellus in Campo Martio.] 874. *Camp. a.*, scilicet ager, qui tum erunt in Campo.] 875. *tum rec.*, Mausoleum Augusti in Campo Martio ad ripam Tiberis, quod Augustus ipse anno u. 726 exstruxerat; in hoc illatus est Marcellus.] 877. *In t. s. t. a.*, tantam spem avorum de se excitabit.] 879. *Heu pietas* cet.; ita loquitur, qui cum summo desiderio cogitat, quantum amissum sit in adolescente

- 880 *Dextera! non illi se quisquam inpune tulisset*  
*Obvius armato, seu cum pedes iret in hostem,*  
*Seu spumantis equi foderet calcaribus armos.*  
*Heu, miserande puer, si qua fata aspera rumpas!*  
*Tu Marcellus eris, Manibus date lilia plenis,*
- 885 *Purpureos spargam flores, animamque nepotis*  
*His saltem accumulem donis, et fungar inani*  
*Munere. — Sic tota passim regione vagantur*  
*Aeris in campis latis, atque omnia lustrant.*  
*Quae postquam Anchises natum per singula duxit,*
- 890 *Incenditque animum famae venientis amore,*  
*Exin bella viro memorat quae deinde gerenda,*  
*Laurentisque docet populos urbemque Latini,*  
*Et quo quemque modo fugiatque feratque laborem.*  
*Sunt geminae Somni portae, quarum altera fertur*
- 895 *Cornea, qua veris facilis datur exitus Umbris;*  
*Altera candenti perfecta nitens elephanto,*  
*Sed falsa ad caelum mittunt insomnia Manes.*  
*His ubi tum natum Anchises unaque Sibyllam*  
*Prosequitur dictis, portaque emittit eburna,*
- 900 *Ille viam secat ad navis sociosque revisit;*  
*Tum se ad Caietae recto fert litore portum.*  
*Ancora de prora iacitur; stant litore puppes.*

tantae pietatis, fidei, fortitudinis. | 880. v. 2, 136. | 883. *si q. f. a. r.*, utinam tibi liceat aliqua ratione effugere hanc duritiem fati! | 884 sqq. *Tu* (nunc anima) *Marcellus eris* (apud superos). Vide artem poetae, qui splendidissime ornatis virtutibus Marcelli et summa concitata exspectatione nunc demum nomen eius ponit, quo omnes istas laudes adolescentis desideratissimi tamquam in unum collectas amplectatur. — date lilia purpurea, ut ea spargam, ut accumulem *cof.*, v. 4, 683. — Et quorsum flores? cf. 5, 79. — Plin. N. H. 21, 5 „Est et *rubens* lilium, quod Graeci *ῥοδὸν* vocant; alii florem eius cynorrhodon. Sunt et *purpurea* lilia.“ | 888. *Aer. in c.*, in campis caliginosis; et *ἄηρ* atque *ἡερόεις* saepe de nubibus et tenebris apud Homerum. Et cum loca infera ex more a veteribus tenebricosa dicantur, non dubitavit et hic (etsi Elysium suo sole collustratur vs. 640) et vs. 827 more semel usitato loqui poeta; similiterque ii, qui sunt in Elysio, aetheris et lucis vocabulis utuntur ad supera loca significanda, cf. vs. 436. 721. 761 sq. 828. | 894 sqq. cf. Hom. Odyss. 19, 562—567. etiam Ovid. Met. 11, 623—628. — In soluta oratione diceres: His dictis tum prosecutus Aeneam ex altera Somni porta — nam geminae sunt... — emittit; cf. 1, 530—34. 3, 163—67. 7, 563—71. | 895. *Umbris* vita functorum, quales dormientium animis obversantur. | 897. cf. Tibull. 2, 6, 37. | 899. v. 12, 368. | 901. *recto litore*, recta secundum litus via, v. 8, 57. Alii *limite*.

# A E N E I D O S

## LIBER SEPTIMUS.

(*Tandem pervenit Aeneas, quo intenderat, in Latium. — Status rerum antiqui Latii. — Latinus rex promittit Aeneae Laviniam, unicam filiam, in matrimonium. Sed Iunonis consiliis turbantur omnia. Populus Latinus cum Turno, rege Rutulorum, praereptam sibi ab Aenea Laviniam indigne ferente, bellum apparat. — Recensus populorum Italiae castra Turni sequentium.*)

- Tu quoque litoribus nostris, Aeneia nutrix,  
 Aeternam moriens famam, Caieta, dedisti;  
 Et nunc servat honos sedem tuus, ossaque nomen  
 Hesperia in magna, si quā est ea gloria, signant.
- 5 At pius exsequiis Aeneas rite solutis,  
 Aggere composito tumuli, postquam alta quierunt.  
 Aequora, tendit iter velis, portumque relinquit.  
 Adspirant aerae in noctem, nec candida cursus  
 Luna negat, splendet tremulo sub lumine pontus.
- 10 Proxima Circaeae raduntur litora terrae,  
 Dives inaccessos ubi Solis filia lucos  
 Adsiduo resonat cantu, tectisque superbis  
 Urit odoratam nocturna in lumina cedrum,  
 Arguto tenuis percurrrens pectine telas.
- 15 Hinc exaudiri gemitus iraeque leonum  
 Vincula recusantum et sera sub nocte rudentum,  
 Saetigerique sues atque in praeseptibus ursi  
 Saevire, ac formae magnorum ululare luporum,  
 Quos hominum ex facie dea saeva potentibus herbis
- 20 Induerat Circe in voltus ac terga ferarum.

**Aeneld. L. VII.** 1—36. *Caieta. Insula Circes. Appellunt Troiani ad ripam Tiberis.* | 1. *Tu quoque*, ut Misenus ac Palinurus 6, 234 et 381. | 3 sq. v. 6, 507. — *honos tuus*, qui tibi debetur habeturque. — *ossa nomen signant*, ossa tua imponunt et quasi imprimunt ei loco nomen, tamquam signum aliquod, quo ille noscatur. — *A Caieta nomen habet et urbs et promontorium.* | 4. *si q. e. e. gl.*, quae scilicet est amplissima, cf. Ovid. F. 6, 27 „Est aliquid nupsisse Iovi.“ — *Alii signat.* | 6. v. 4, 523. *turbidum interea fuisse mare discimus* ex 6, 355 sq. | 7. *velis*, velificatione. | 10. *Circei*, promontorium Latii, tum Circes insula, postea (uti tradunt Theophrastus, Varro, alii) coniuncta cum terra continenti. | 11 sqq. cf. Hom. Odyss. 10, 135 sqq. — *inaccess.*, quo accedere periculosum est. | 13. cf. Hom. Odyss. 5, 59 sqq. — *noct. in l.*, ut noctem collustret. | 14. cf. G. 1, 293 sq. | 17. *praesep.*, stabulis, ut vs. 275. | 18. *Saev.*, saevas voces edere. — Vocabulum *forma* interdum designat portentosam magnitudinem bestiarum ut Ovid. Met. 2, 78, etiam deorum, ut Ov. Met. 1, 73. |



- Quae ne monstra pii paterentur talia Troes  
 Delati in portus, neu litora dira subirent,  
 Neptunus ventis inplevit vela secundis  
 Atque fugam dedit et praeter vada fervida vexit.
- 25 Iamque rubescebat radiis mare et aethere ab alto  
 Aurora in roseis fulgebat lutea bigis:  
 Cum venti posuere omnisque repente resedit  
 Flatus et in lento luctantur marmore tonsae.  
 Atque hic Aeneas ingentem ex aequore lucum
- 30 Prospicit. Hunc inter fluvio Tiberinus amoeno  
 Verticibus rapidis, et multa flavus arena  
 In mare prorumpit. Varias circumque supraque  
 Adsuetae ripis volucres et fluminis alveo  
 Aethera mulcebant cantu lucoque volabant.
- 35 Flectere iter sociis terraeque advertere proras  
 Inperat, et laetus fluvio succedit opaco.
- Nunc age, qui reges, Erato, quae tempora rerum,  
 Quis Latio antiquo fuerit status, advena classem  
 Cum primum Ausoniis exercitus adpulit oris,
- 40 Expediam, et primae revocabo exordia pugnae.  
 Tu vatem, tu, diva, mone. Dicam horrida bella,  
 Dicam acies actosque animis in funera reges,  
 Tyrrhenamque manum, totamque sub arma coactam  
 Hesperiam. Maior rerum mihi nascitur ordo,
- 45 Maius opus moveo. Rex arva Latinus et urbes  
 Iam senior longa placidas in pace regebat.  
 Hunc Fauno et nympha genitum Laurente Marica  
 Accipimus; Fauno Picus pater; isque parentem  
 Te, Saturne, refert; tu sanguinis ultimus auctor.
- 50 Filius huic fato divom prolesque virilis  
 Nulla fuit, primaque oriens erepta iuventa est.  
 Sola domum et tantas servabat filia sedes,  
 Iam matura viro, iam plenis nubilis annis.  
 Multi illam magno e Latio totaque petebant
- 55 Ausonia; petit ante alios pulcherrimus omnis  
 Turnus, avis atavisque potens, quem regia coniunx

21. *ne monstra pat. tal.*, ne talem in monstra conversionem subirent. | 26. *lūda*, *κροκόπεπλος* Hom. II. 8, 1. | 27. *posuere*, sc. se, cf. 10, 108. | 28. *marm.*, Hom. II. 14, 273. | 29. *Atque*, v. E. 1, 7. | 37—106. *Status antiqui Latii. Latinus rex. Oraculum Fauni velat filiam Latini, Laviniam, homini Latino in matrimonium dari.* | 37. *q. temp. r.*, quae rerum condicio. | 40. cf. vs. 542. | 42. *a. in fun. r.*: perierunt eo bello Mezentius ac Turnus. | 43. *tot. s. a. c. H.*, *ὑπερβολή*, nam non ultra Latium Etruriamque serpsit id bellum. | 44. v. E. 9, 46. | 50. *fat. div.*, v. 6, 367. | 51. et quae esse coepit, ea erepta est ei. | 52. *Sola supererat Latino filia (Lavinia) domus regnique heres.* | 56. *av. at. pot.*, cui genus antiquissimum est multique iique nobilissimi maiores, Daunus (pater), Pilumnus (avus), tum ex Venilia nympha matre aviaque Danae Acrisius, Inachus,

- Adjungi generum miro properabat amore;  
 Sed variis portenta deum terroribus obstant.  
 Laurus erat tecti medio in penetralibus altis,  
 60 Sacra comam, multosque metu servata per annos,  
 Quam pater inventam, primas cum conderet arces,  
 Ipse ferebatur Phoebo sacrasse Latinus,  
 Laurentisque ab ea nomen posuisse colonis.  
 Huius apes summum densae — mirabile dictu —  
 65 Stridore ingenti liquidum trans aethera vectae,  
 Obsedere apicem, et pedibus per mutua nexis  
 Examen subitum ramo frondente pependit.  
 Continuo vates, Externum cernimus, inquit,  
 Adventare virum, et partis petere agmen easdem  
 70 Partibus ex isdem, et summa dominarier arce.  
 Praeterea, castis adolet dum altaria taedis  
 Et iuxta genitorem adstat Lavinia virgo,  
 Visa, nefas, longis comprehendere crinibus ignem,  
 Atque omnem ornatum flamma crepitante cremari,  
 75 Regalisque accensa comas, accensa coronam,  
 Insignem gemmis; tum fumida lumine fulvo  
 Involvi ac totis Vulcanum spargere tectis.  
 Id vero horrendum ac visu mirabile ferri:  
 Namque fore inlustrem fama fatisque caneant  
 80 Ipsam, sed populo magnum portendere bellum.  
 At rex sollicitus monstris oracula Fauni,  
 Fatidici genitoris, adit, lucosque sub alta  
 Consulit Albunea, nemorum quae maxuma sacro  
 Fonte sonat, saevamque exhalat opaca mephitim.  
 85 Hinc Italae gentes omnisque Oenotria tellus  
 In dubiis responsa petunt; huc dona sacerdos  
 Cum tulit et caesarum ovium sub nocte silenti

Oceanus, et v. 6, 844. — *reg. c.*, Amata coniux Latini. | 57. *proper.*, valde studebat, ut vs. 264. | 59. *tecti med.*, v. 4, 494 et cf. Tibull. 3, 3, 15. — *penetr. altis*, quae altis parietibus inclusa sunt. | 60. *Sacra c.*, ergo intactis frondibus. | 61. *pr. c. c. a.*, cum primum arcem (Laurentum) conderet, v. G. 3, 130. | 63. *Laurentis* Accusat. Plur., v. G. 1, 137. — *et ab ea*, et a qua; Cic. Orat. 3, species pulchritudinis eximia quaedam, *quam* intuens in *ea*que defixus“ *est.* | 64. *subitum*, id quod, maxime in re mira, repente ac praeter expectationem accidit. — Uva ab apibus facta dirum ostentum existimatur, Plin. N. H. 11, 18, 55, similiterque examen apum in foro visum hostium adventum portendit ap. Liv. 24, 10. | 69. *part. easdem*, urbem ac regiam Latini. | 70. *Part. ex isd.*, a partibus maris inferi. | 71. *cast. taed.* Plin. N. H. 16, 19, 44 „taeda, flammis ac luminis sacrorum grata.“ — *adolet* genitor, Latinus. | 74. *ornatum capitis*; et v. 1, 713. | 75. v. E. 4, 6. | 77. *tectis*, v. 2, 512. | 78. v. G. 2, 441. | 83 sq. *Albunea* silva cum fonte aquae sulfureae hodie *Acqua solforata d' Altieri* dicto; huic silvae in montibus sitae, *altae*, subiacebat lucus isto Fanno sacer; cf. 8, 599. — *opaca*, quae opacat, ut 6, 673 „lucis habitamus opacis;“ nec praetor rationem adiectum esse hoc epitheton decet Servius „mephitis ... de aquis nascitur

- Pellibus incubuit stratis somnosque petivit,  
 Multa modis simulacra videt volitantia miris,  
 90 Et varias audit voces, fruiturque deorum  
 Conloquio, atque imis Acheronta adfatur Avernis.  
 • Hic et tum pater ipse petens responsa Latinus  
 Centum lanigeras mactabat rite bidentis,  
 Atque harum effultus tergo stratisque iacebat  
 95 Velleribus: subita ex alto vox reddita luco est:  
 Ne pete connubiis natam sociare Latinis,  
 O mea progenies, thalamis neu crede paratis;  
 Externi venient generi, qui sanguine nostrum  
 Nomen in astra ferant, quorumque ab stirpe nepotes  
 100 Omnia sub pedibus, qua Sol utrumque recurrens  
 Aspicit Oceanum, vertique regique videbunt.  
 Haec responsa patris Fauni monitusque silenti  
 Nocte datos non ipse suo premit ore Latinus,  
 Sed circum late volitans iam Fama per urbes  
 105 Angonias tulerat, cum Laomedontia pubes  
 Gramineo ripae religavit ab aggere classem.  
 Aeneas primique duces et pulcher Iulus  
 Corpora sub ramis deponunt arboris altae,  
 Instituuntque dapes, et adorea liba per herbam  
 110 Subiiciunt epulis, — sic Iuppiter ille monebat —  
 Et Cereale solum pomis agrestibus augent.  
 Consumptis hic forte aliis, ut vertere morsus  
 Exiguam in Cererem penuria adegit edendi  
 Et violare manu malisque audacibus orbem

sulphuratis et est in nemoribus gravior ex densitate silvarum.“ 88. *incubuit*, unde incubatio, *ἐγκοιμήσεις*, dicta est haec ratio petendi oracula. 91. *Acher.*, deos inferos et Manes. — *Avernus*, v. 6, 126. 95. v. 3, 40. 97. *paratis*, cf. vs. 56 sq. 98. *generi*, aliquis generi futurus, v. 6, 322. — Alii *veniunt*. 99. *quor. ab st. n.*, et qui ab horum stirpe nascentur nepotes. 100. *sub ped.*, suntum hoc ab illa imagine, quae victores cervicibus victi pedem imponentes repraesentat, cf. G. 2, 492. Ovid. Trist. 3, 12, 48. — *recurrens* ad quotidianum iter faciendum, ergo et oriens et occidens. 101. *verti*, Cic. Act. Verr. 1, 7 „Omnia in unius potestate ac moderatione *vertentur*.“ Ceterum cf. vs. 258. 103 sq. *non* — *Sed*: adversative elocutus est poeta, quod copulative dici solet: nec Latinus premit, et Fama iam tulerat. 107—147: *Comensarum mensarum ostentum docet Troianos venire ad sedem sibi destinatam.* 110. *ille*, hoc Pronomine admonemur rei praeteritae: pertinebat ista res ad illud, quod Iuppiter olim, ut meminimus, monebat sive futurum esse praedixerat per Harpyiam 3, 255—257. Terent. Phorm. 2, 1, 32 „Lenem patrem *illum* factum me esse acerrimum.“ Atque in iis comparisonibus, quae referuntur ad quandam rerum praeteritarum memoriam, ut adverbio *olim* utitur poeta, 8, 391. G. 4, 433, ita, sed cum quadam vi monstrandi, pronomine *ille* 10, 707. 11, 809. 111. *aug.*, cumulant, tamquam mensas. 114. Totum hoc habet comicum quiddam, id quod ipse poeta indicat per verbum *alludens* vs. 117, et, tamquam sacrilegium commissum esset, gravibus utitur et in ea re propriis verbis *violare et audax* (Tibull. 3, 5, 8); mensae autem sacrae habitae a veteribus; Donatus fere sic

- 115 Fatalis crustī patulis nec parcere quadris:  
 Heus, etiam mensas consumimus! inquit Iulus;  
 Nec plura adludens. Ea vox audita laborum  
 Prima tulit finem, primamque loquentis ab ore  
 Eripuit pater, ac stupefactus numine pressit.
- 120 Continuo, Salvē fatis mihi debita Tellus,  
 Vosque, ait, o fidi Troiae salvete Penates:  
 Hic domus, haec patria est. Genitor mihi talia namque,  
 Nunc repeto, Anchises fatorum arcana reliquit:  
 Cum te; nate, fames ignota ad litora vectum
- 125 Accisis coget dapibus consumere mensas,  
 Tum sperare domos defessus ibique memento  
 Prima locare manu molirique aggerē tecta.  
 Haec erat illa fames; haec nos suprema manebat,  
 Exitiis positura modum.
- 130 Quare agite et primo laeti cum lumine solis,  
 Quae loca, quive habeant homines, ubi moenia gentis,  
 Vestigemus, et a portu diversa petamus.  
 Nunc pateras libate Iovi, precibusque vocate  
 Anchisen genitorem, et vina reponite mensis.
- 135 Sic deinde effatus frondenti tempora ramo  
 Implicat, et Geniumque loci primamque deorum  
 Tellurem Nymphasque et adhuc ignota precatur  
 Flumina, tum Noctem Noctisque orientia Signa  
 Idaeumque Iovem Phrygiamque ex ordine Matrem
- 140 Invocat, et duplicis Caeloque Ereboque parentes.  
 Hic pater omnipotens ter caelo clarus ab alto  
 Intonuit, radiisque ardentem lucis et auro  
 Ipse manu quatiens ostendit ab aethere nubem.  
 Diditur hic subito Troiana per agmina rumor,

„Iulus ingemuit famem illo usque perductam, ut hanc sacrilegio extinguere laborarent et, quod venerari soliti essent, irreverenter absumerent.“ | 115. *Fat.*, cf. 3, 255—257. | 117. *N. pl. adl.*, nec plura locutus est iocans et in nomine rei ludens. | 118. *primam*, ut primum exiit ex eius ore, statim. | 119. *Eripuit ... pressit*, celeriter excepit et ad animum admissam paulisper tacitus (cf. vs. 103) mente volutavit. — *stup. numine*, stupefactus vi divina, quae oraculum illud horrendum tam facili via expedit. | 121. *fidi*, servantes fidem promissorum, cf. 3, 148 sqq. | 122 sqq. Portentum illud mensarum comedendarum Anchises ipse deprecatur 3, 265. Itaque putabimus Anchisen, qui post mortem insignem prodit rerum futurarum scientiam, ea, quae h. l. legimus, tum aperuisse, cum apud inferos versabatur Aeneas, cf. 6, 891—893. — *reliquit* non ante primum discessum, i. e. ante mortem, sed ante illum alterum. | 127. *mol. aggere t.*, urbem aedificare, quod fit ducto vallo. | 129. *Exitiis*, gravissimis malis damnisque (10, 850) ex eorum scilicet genere, quae adhuc perpersi sumus; nam „terrae graviora manent“ 6, 84. | 134. v. G. 4, 378. | 135. v. 5, 14. | 136. *primam*, v. 4, 166. | 138. *Noctem*, „quoniam, die consumpto, ipsa iam fuerat ventura“ Donatus. | 139. *ex ordine*, deinceps. — *Matrem* deorum, Cybelen. | 140. Venerem atque Anchisen; et v. vs. 226. | 141 sq. Laetum plerumque hoc

- 145 Advenisse diem; quo debita moenia condant.  
 Certatim instaurant epulas, atque omine magno  
 Crateras laeti statuunt et vina coronant.  
 Postera cum prima lustrabat lampade terras  
 Orta dies, urbem et finis et litora gentis
- 150 Diversi explorant; haec fontis stagna Numici,  
 Hunc Thybrim fluvium, hic fortis habitare Latinos.  
 Tum satus Anchisa delectos ordine ab omni  
 Centum oratores augusta ad moenia regis  
 Ire iubet, ramis velatos Palladis omnis,
- 155 Donaque ferre viro, pacemque exposcere Teucris.  
 Haud mora, festinant iussi rapidisque feruntur  
 Passibus. Ipse humili designat moenia fossa,  
 Moliturque locum, primasque in litore sedes,  
 Castrorum in morem pinnis atque aggere cingit.
- 160 Iamque iter emensi turris ac tecta Latinorum  
 Ardua cernebant iuvenes, muroque subibant.  
 Ante urbem pueri et primaevae flore iuventus  
 Exercentur equis, domitantque in pulvere currus,  
 Aut acris tendunt arcus, aut lenta lacertis
- 165 Spicula contorquent, cursuque ictuque lacesunt:  
 Cum praevectus equo longaevis regis ad auris  
 Nuntius ingentis ignota in veste reportat  
 Advenisse viros. Ille intra tecta vocari  
 Inperat, et solio medius consedit avito.
- 170 Tectum augustum, ingens, centum sublime columnis,  
 Urbe fuit summa, Laurentis regia Pici,  
 Horrendum silvis et religione parentum.  
 Hic sceptrum accipere et primos attollere fasces  
 Regibus omen erat; hoc illis curia templum,

augurium; Hom. Od. 20, 103 sq. — *clarus*, serenus, i. e. caelo sereno. | 145. *debita*, cf. v. 120. | 146. *instaurare epulas* est rursus epulari rei sacrae causa, v. 4, 63. — *omine*, cf. vs. 141. | 147. *v. cor.*, v. G. 2, 528. || 148—194. *Explorantur vicina. Mittuntur centum legati ad regem Latinum. Regia Pici.* | 148. v. G. 3, 130. | 149. *urbem*, Laurentum. | 150. *div.*, cf. vs. 132. — Numicius rivalis ex stagno profluens. | 151. *habitare* sc. resciscunt, v. vs. 256. 508. | 152. *ord. ab o. Servius*, „ex omni qualitate dignitatum, quod apud Romanos in legatione mittenda hodieque servatur.“ | 154. *ramis velatos*, ramos vittatos manibus gerentes, cf. vs. 237. 8, 116. 128. 11, 101. 332. — *Pall.*, cf. G. 1, 18. | 157. *fossa*, proprie sulco, v. 1, 425 et 5, 755. | 158. *Mol. loc.*, aedificia in eo exstruit, cf. vs. 290. — *primas*: primum quidem, quod condidit Aeneas, oppidum Troia appellatum; deinde Lavinium est ab eodem conditum; cf. Liv. 1, 1. | 160. *Iamque ... Cum*, v. 5, 762. — Alii *Latini*. | 164. *lenta*, ex lenta (id est h. l. difficili ad flectendum, dura firmaeque) materie facta, qualis est corni, myrti, cf. 9, 698. G. 2, 447 sq. | 165. *que ... que*, v. 1, 701. — *lacs.*, ad certandum provocant. — *ictu*, iaculatione. | 167. *in v.*, v. 5, 179. — *rep.*, v. 3, 717. | 169. *medius*, sive i. q. *aulae medio* 3, 354. sive medius inter adstantes assidentesve amicos, ut 11, 237. | 171. *Urbe summa*, ἐν τῇ ἀκροπόλει. | 173. *fasces* praeferebunt novo regi. | 174.

- 175 Hae sacris sedes epulis; hic ariete caeso  
 Perpetuis soliti patres considerare mensis.  
 Quin etiam veterum effigies ex ordine avorum  
 Antiqua e cedro, Italusque paterque Sabinus  
 Vitigator, curvam servans sub imagine falcem,  
 180 Saturnusque senex Ianique bifrontis imago,  
 Vestibulo adstabant, alique ab origine reges,  
 Martiaque ob patriam pugnando volnera passi.  
 Multaque praeterea sacris in postibus arma,  
 Captivi pendunt currus, curvaeque secures,  
 185 Et cristae capitum, et portarum ingentia claustra,  
 Spiculaque clipeique ereptaeque rostra carinis.  
 Ipse Quirinali lituo parvaeque sedebat  
 Succinctus trabea, laevaue ancile gerebat  
 Picus, equum domitor; quem capta cupidine coniunx  
 190 Aurea percussum virga versumque venenis  
 Fecit avem Circe sparsitque coloribus alas.  
 Tali intus templo divom patriaque Latinus  
 Sede sedens Teucros ad sese in tecta vocavit;  
 Atque haec ingressis placido prior edidit ore:  
 195 Dicite, Dardanidae, neque enim nescimus et urbem  
 Et genus, auditique advertitis aequore cursum,  
 Quid petitis? quae caussa rates, aut cuius egentis  
 Litus ad Ausonium tot per vada caerula vexit?  
 Sive errore viae, seu tempestatibus acti,  
 200 Qualia multa mari nautae patiuntur in alto,  
 Fluminis intrastis ripas portuque sedetis,  
 Ne fugite hospitium, neve ignorete Latinos  
 Saturni gentem, haud vinclo nec legibus aequam,

*omen e.*, fausti principii loco erat. — *erat*: *h.*, v. E. 1, 39. | 175. *ar. c.*, facto sacrificio. | 176. *Perpet.*, recta linea continuatis. — *consid.*: Antiquitus Romani sedentes epulabantur. | 178. *cedro*: *It.*, v. E. 10, 13. | 179. cum falce vinitoria in basi eius simulcari. | 181. *Vestibulum*, v. 2, 469. — *adstab.*, v. 1, 152. — Verbis *ab origine* videntur reges Aboriginum significari, v. 11, 603 et infra vs. 203. | 182. Alii *Martia qui*. | 183. v. 2, 504. — *sacris*, cf. vs. 172—173. | 184. securis agrestium Italicorum telum, ab Homero inter belli instrumenta semel commemoratum *ἐν τῇ περὶ ναυὸς μάχῃ*, cf. Il. 13, 612. 15, 711. | 186. *Spiculaque*, v. E. 4, 51. | 187. *Ipse*, v. 2, 394. — *Quir. lituo*, Ablativus habitum significans, ut 11, 711 „*Ense pedes nudo*,” i. e. instructus lituo, ense. — *lituus*, qui erat augurum, insigne Romuli in deos relati seu Quirini; *trabea* communis veterum regum ornatus. | 189. *coniunx*, i. q. amans, v. E. 8, 18. | 190. *Aurea*, v. 1, 698. | 191. Picus in avem picum mutatus, Ovid. Met. 14, 320—396. | 195—285. *Placida oratio Latini. Ad eam respondet Ilioneus; exponit, quid petentes veniant, traditque munera. Promittit Latinus benigne, quod petitur, ultroque Aeneae offert Laviniam in matrimonium. Peracta legatione Troiani muneribus ornati redeunt.* | 196. *auditi*, fama noti. | 203. *h. vinclo n. leg. ae.*, nulla legum aut alia necessitate iustitiam colentem, v. G. 1, 173. — Hi sunt Aborigines illi, de quibus Sall. Cat. c. 6 „*genus hominum*

- Sponte sua veterisque dei se more tenentem.
- 205 Atque equidem mentiri — fama est obscurior annis —  
 Auruncos ita ferre senes, his ortus ut agris  
 Dardanus Idaeos Phrygide penetrarit ad urbes  
 Threiciamque Samon, quae nunc Samothesia fertur.  
 Hinc illum Corythi Tyrrhena ab sede profectum
- 210 Aurea nunc solio stellantis regia caeli  
 Accipit et numerum divorum altaribus addit.  
 Dixerat; et dicta Ilioneus sic voce secutus:  
 Rex, genus egregium Fauni, nec fluctibus actos  
 Atra subegit hiemps vestris succedere terris,
- 215 Nec sidus regione viae litusve fefellit;  
 Consilio hanc omnes animisque volentibus urbem  
 Adferimur, pulsi regnis, quae maxuma quondam  
 Extremo veniens Sol aspiciebat Olympo.  
 Ab Iove principium generis; Iove Dardana pubes
- 220 Gaudet avo; rex ipse Iovis de gente suprema,  
 Troius Aeneas, tua nos ad limina misit.  
 Quanta per Idaeos saevis effusa Mycenis  
 Tempestas ierit campos, quibus actus uterque  
 Europae atque Asiae fatis concurrerit orbis,
- 225 Audiit, et si quem tellus extrema refuso  
 Submovet Oceano, et si quem extenta plagarum  
 Quattuor in medio dirimit plaga Solis iniqui.  
 Diluvio ex illo tot vasta per aequora vecti  
 Dis sedem exigua patriis litusque rogamus
- 230 Innocuum et cunctis undamque auramque patentem.  
 Non erimus regno indecores, nec vestra feretur  
 Fama levis tantique abolescet gratia facti,  
 Nec Troiam Ausonios gremio excepisse pigebit.  
 Fata per Aeneae iuro dextramque potentem,
- 235 Sive fide seu quis bello est expertus et armis:

agreste, sine legibus, sine imperio, liberum atque solutum.“] 204. *se tenent*; vitam suam moderantem, *vet. dei more*, more a Saturno instituto, cf. Ovid. Met. 1, 89 sqq.] 206. Auruncis imperasse Latinum intelligitur ex 11, 316—19.] 209. v. E. 1, 54. — Corythus, Cortona Etruriae, cf. 3, 170. — *Hinc ab sede Tyrrh.*, v. E. 1, 54.] 211. numerum altaribus deorum addit, quia et ipsi altaria instituantur, ut deo. — *Alii altar. auget.*] 215. nullus error nec in observandis sideribus admissus, nec ex ignoratione litorum terrarumque ortus nos alio, quam quo tendebamus, abduxit; v. 2, 737.] 218. *Extr. Ol.*, ab orientali parte caeli.] 219. Stemma: Iuppiter, Dardanus, Laomedon, Priamus.] 220. v. 10, 350.] 225. *refuso*, ἀπορροή, terras ambiente et in se ipsum redeunte.] 226. *Oceano* est Ablativus loci: si quem litora Oceani habitantem *cet.*; similiter vs. 140 „duplices Caeloque Ereboque parentes“, qui sunt in Caelo, Erebo; vs. 269. *monstra caelo*, i. e. ostenta de caelo s. a diis missa; *aurum collo* vs. 351, adde 450? *Epiro, Hesperia* 3, 503. 8, 419. *flumine*, ad flumen, 8, 610. — Ceterum v. E. 10, 13.] 227. *Iunge: in medio quattuor plagarum*, et cf. G. 1, 233 sqq.] 230. *Innoc.*, quod sine molestia et periculo aliorum taceamus.] 234 sq. — Cic. Ep. ad Div. 7, 5, 11

- Multi nos populi, multae — ne temne, quod ultro  
 Praeferimus manibus vittas ac verba precantia —  
 Et petiere sibi et volvere adiungere gentes;  
 Sed nos fata deum vestras exquirere terras  
 240 Inperiis egere suis. Hinc Dardanus ortus;  
 Huc repetit iussisque ingentibus urguet Apollo  
 Tyrrhenum ad Thybrim et fontis cada sacra Numici.  
 Dat tibi praeterea fortunae parva prioris  
 Munera, reliquias Troia ex ardente receptas.  
 245 Hoc pater Anchises auro libabat ad aras;  
 Hoc Priami gestamen erat, cum iura vocatis  
 More daret populis, sceptrumque sacerque tiaras  
 Iliadumque labor vestes.  
 Talibus Ilionei dictis defixa Latinus  
 250 Obtutu tenet ora, soloque immobilis haeret,  
 Intentos volvens oculos. Nec purpura regem  
 Picta movet, nec scepra movent Priameia tantum,  
 Quantum in connubio natae thalamoque moratur;  
 Et veteris Fauni volvit sub pectore sortem:  
 255 Hunc illum fatis externa ab sede profectum  
 Portendi generum, paribusque in regna vocari  
 Auspiciis; huic progeniem virtute futuram  
 Egregiam, et totum quae viribus occupet orbem.  
 Tandem laetus ait: Di nostra incepta secudent  
 260 Auguriumque suum! Dabitur, Troiane, quod optas.  
 Munera nec sperno. Non vobis, rege Latino,  
 Divitis uber agri Troiaeve opulentia deerit.  
 Ipse modo Aeneas, nostri si tanta cupido est,  
 Si iungi hospitio properat sociusque vocari,  
 265 Adveniat, voltus neve exhorrescat amicos.  
 Pars mihi pacis erit dextram tetigisse tyranni.

„manum tuam (Caesaris) et victoria et fide praestantem.“ | 237. v. vs. 154. —  
 „ae verba, cum verbis, cf. vs. 431. 8, 93. — *precantia*, ut Ovid. Met. 15, 718  
*Antium*, v. 1, 2. | 238. Quam Troiani nunc sibi per legatos petunt a Latino  
 amicitiam, eam alii populi sibi petierant (per legatos puta) a Troianis; in  
 petendo vel maxime vertitur munus legatorum. | 239. v. 6, 376. | 241. *Huc ...*  
*ad Thybrim*, v. E. 1, 54. — *rep.*, Cic. pro Dom. c. 57. „Vos, qui maxime me  
 repetistis atque revocastis.“ | 243. *Dat*, sc. Aeneas, v. 6, 734. | 246. *gestamen*  
 quod fuerit, ipsa poeta dicit subiecta interpretatione *sceptrum, tiaras, vestes*. —  
*iura daret*, iudicia exerceret. | 247. *sacer*, quia regum atque augustum id orna-  
 mentum. | 248. *vestes*, v. vs. 251. | 249. v. E. 6, 78. — *Talibus dictis*, v. 1,  
 141. | 250. *Obt.* Sil. It. 17, 184 „torvo obtutu defixus.“ | 251. *purp. picta*,  
 vestes purpureae acu pictae vel auro intextae. | 254. cf. vs. 96 sqq. | 255. *Hunc*  
*ill.*, hunc esse illum, quem fata portendant generum; cf. 4, 675 et v. 3, 558. |  
 256. *Portendi* et videt, sibi persuadet; v. vs. 151. — *paribus Auspiciis*, tam-  
 quam regni socium, cf. 11, 322 et v. 4, 102. | 264. v. vs. 57. | 266. *pacis*,  
 foederis, haec pars erit; foedera iungebantur non solum dextris datis, sed etiam  
 condicionibus utrimque laetis acceptisque maximeque diis auctoribus per sacra



- 145 Advenisse diem; quo debita moenia condant.  
Certatim instaurant epulas, atque omine magno  
Crateras laeti statuunt et vina coronant.  
Postera cum prima lustrabat lampade terras  
Orta dies, urbem et finis et litora gentis
- 150 Diversi explorant; haec fontis stagna Numici,  
Hunc Thybrim fluvium, hic fortis habitare Latinos.  
Tum satus Anchisa delectos ordine ab omni  
Centum oratores augusta ad moenia regis  
Ire iubet, ramis velatos Palladis omnis,
- 155 Donaue ferre viro, pacemque exposcere Teucris.  
Haud mora, festinant iussi rapidisque feruntur  
Passibus. Ipse humili designat moenia fossa,  
Moliturque locum, primasque in litore sedes,  
Castrorum in morem pinnis atque aggere cingit.
- 160 Iamque iter emensi turris ac tecta Latinorum  
Ardua cernebant iuvenes, muroque subibant.  
Ante urbem pueri et primaevae flore iuventus  
Exercentur equis, domitantque in pulvere currus,  
Aut acris tendunt arcus, aut lenta lacertis
- 165 Spicula contorquent, cursuque ictuque lacessunt:  
Cum praevectus equo longaevi regis ad auris  
Nuntius ingentis ignota in veste reportat  
Advenisse viros. Ille intra tecta vocari  
Inperat, et solio medius\*consedit avito.
- 170 Tectum augustum, ingens, centum sublime columnis,  
Urbe fuit summa, Laurentis regia Pici,  
Horrendum silvis et religione parentum.  
Hic sceptras accipere et primos attollere fasces  
Regibus omen erat; hoc illis curia templum,

augurium; Hom. Od. 20, 103 sq. — *clarus*, serenus, i. e. caelo sereno. | 145. *debita*, cf. v. 120. | 146. *instaurare epulas* est rursus epulari rei sacrae causa, v. 4, 63. — *omine*, cf. vs. 141. | 147. v. *cor.*, v. G. 2, 528. || 148—194. *Explorantur vicina. Mittuntur centum legati ad regem Latinum. Regia Pici.* | 148. v. G. 3, 130. | 149. *urbem*, Laurentum. | 150. *div.*, cf. vs. 132. — Numicius rivulus ex stagno profuens. | 151. *habitare* sc. resciscunt, v. vs. 256. 538. | 152. *ord. ab o.* Servius „ex omni qualitate dignitatum, quod apud Romanos in legatione mittenda hodieque servatur.“ | 154. *ramis velatos*, ramos vittatos manibus gerentes, cf. vs. 237. 8, 116. 128. 11, 101. 332. — *Pall.*, cf. G. 1, 18. | 157. *fossa*, proprie sulco, v. 1, 425 et 5, 755. | 158. *Mol. loc.*, aedificia in eo extruit, cf. vs. 290. — *primas*: primum quidem, quod condidit Aeneas, oppidum Troia appellatum; deinde Lavinium est ab eodem conditum; cf. Liv. 1, 1. | 160. *Iamque* ... *Cum*, v. 5, 762. — Alii *Latini*. | 164. *lenta*, ex lenta (id est h. l. difficili ad flectendum, dura firmaque) materie facta, qualis est corni, myrti, cf. 9, 698. G. 2, 447 sq. | 165. *que* ... *que*, v. 1, 701. — *lacess.*, ad certandum provocant. — *ictu*, iaculatione. | 167. *in v.*, v. 5, 179. — *rep.*, v. 3, 717. | 169. *medius*, sive i. q. *aulai medio* 3, 354. sive medius inter adstantes assidentesve amicos, ut 11, 237. | 171. *Urbe summa*, ἐν τῇ ἀκροπόλει. | 173. *fasces* praefereandos novo regi. | 174.

- Troia viros? medias actes mediosque per ignis  
 Invenere viam. At, credo, mea numina, tandem  
 Fessa iacent, odiis aut exsaturata quievi —  
 Quin etiam patria excussos infesta per undas  
 300 Ausa sequi, et profugis toto me opponere ponto.  
 Absumptae in Teucros vires caelique marisque.  
 Quid syrtes aut Scylla mihi, quid vasta Charybdis  
 Profuit? optato conduntur Thybridis alveo,  
 Securi pelagi atque mei. Mars perdere gentem  
 305 Inmanem Lapithum valuit; concessit in iras  
 Ipse deum antiquam genitor Calydonā Dianae;  
 Quod scelus aut Lapithas tantum, aut Calydonā merentem?  
 Ast ego, magna Iovis coniunx, nil linquere inausum  
 Quae potui infelix, quae memet in omnia verti,  
 310 Vincor ab Aenea. Quod si mea numina non sunt  
 Magna satis, dubitem haud equidem implorare quod usquam est.  
 Flectere si nequeo Superos, Acheronta movebo.  
 Non dabitur regnis, esto, prohibere Latinis,  
 Atque inmota manet fati Lavinia coniunx:  
 315 At trahere, atque moras tantis licet addere rebus;  
 At licet amborum populos excindere regum.  
 Hac gener atque socer coeant mercede suorum.  
 Sanguine Troiano et Rutulo dotabere, virgo,  
 Et Bellona manet te pronuba. Nec face tantum  
 320 Cisseis praegnans ignis enixa iugalis;  
 Quin idem Veneri partus suus et Paris alter,  
 Funestaeque iterum recidiva in Pergama taedae.  
 Haec ubi dicta dedit, terras horrenda petivit;

maxime pertinentia. | 296. v. 1, 544. | 297. Pluralis *numina* ubi non ad plures deos, sed ad unum pertinet, significat aut variis rebus comprobata, aut, ut hic et vs. 310, imprimis magnam et insignem eius dei potentiam. | 299. Non est ita, sed ausa sum etiam *cel.* | 302. *syrtes*, cf. 1, 111. | 304. Servius „Pirithous Lapitharum rex cum uxorem deduceret, vicinos populos Centauros, etiam sibi cognatos, et deos omnes excepto Marte ad convivium convocavit. Unde iratum numen immisit furorem, quo Centauri et Lapithae in bella venerunt.“ | 305. v. 2, 242. — *conc. in iras*, conc. ulciscendam. | 306. cf. Hom. Il. 9, 529 sqq. Ovid. Met. 8, 270 sqq. — *antiquam*, Plin. Ep. 8, 24 „reverere gloriam veterem et hanc ipsam senectutem, quae in homine venerabilis, in urbibus sacra est.“ | 307. *scelus merere*, scelus in se admittere; Terent. 5, 8, 25 „esse in hac re culpam meritam non nego.“ | 309. *potui*, sustinui, v. G. 3, 459. — *me in omnia verti*, omnes quasi personas nocendique partes suscepi ad istos perdendos. | 314. *im. man. fat. L. cont.*, immutabili fato decreta Aeneae est coniux Lav.; proprie ipsa fata dicuntur immota, ut 1, 257. | 317. *coeant*, foedere et matrimonio Aeneae et Laviniae coniungantur. | 319. cf. 4, 166. — *face praegnans*, cf. Ovid. Heroid. 16, 43—49. Cic. de Divin. 1, 21. | 320 sqq. *Cisseis*, v. 5, 537. — Non sola Hecuba enixa est ignes iugales, i. e. peperit in matrimonio filium, qui incendium Asiae erat futurus (Ovid. l. l. vs. 49), sed etiam Veneri filius suus similis (*idem*) erit ignis alterque Paris, fax funesta reuascanti patriae, cf.

- Luctificam Allecto dirarum ab sede dearum  
 325 Infernisque ciet tenebris, cui tristia bella  
 Iraeque insidiaeque et crimina noxia cordi.  
 Odit et ipse pater Pluton, odere sorores  
 Tartareae monstrum: tot sese vertit in ora,  
 Tam saevae facies, tot pullulat atra colubris.  
 330 Quam Iuno his acuit verbis ac talia fatur:  
 Hunc mihi da proprium, virgo sata Nocte, laborem,  
 Hanc operam, ne noster honos infractave cedat  
 Fama loco, neu connubiis ambire Latinum  
 Aeneadae possint, Italesve obsidere finis.  
 335 Tu potes unanimos armare in proelia fratres  
 Atque odiis versare domos, tu verbera tectis  
 Funereasque inferre faces, tibi nomina mille,  
 Mille nocendi artes. Fecundum concute pectus,  
 Dissice compositam pacem, sere crimina belli;  
 340 Arma velit poscatque simul rapiatque iuventus.  
 Exin Gorgoneis Allecto infecta venenis  
 Principio Latium et Laurentis tecta tyranni  
 Celsa petit, tacitumque obsedit limen Amatae,  
 Quam super adventu Teucrum Turnique hymenaeis  
 345 Femineae ardentem curaeque iraeque coquebant.  
 Huic dea caeruleis unum de crinibus anguem

4, 344.] 324. Alii *sororum*.] 327. v. E. 4, 6.] 328. cf. vs. 415 sq.] 331. *proprium*, cuius fructu ipsa sola gaudeam. Non petit Iuno aliis, sed sibi soli; quod autem ita petimus, id et instantius petimus, et, si datur, gratissimum esse solet. — *laborem* ... *operam*, laborem positum in opera (gratia) mihi praestanda.] 332. *infr.*, v. 12, 1. — *cedere loco* proprie dicitur gladiator vel miles, qui pugna inferior est; „ne honos ac fama mea non teneatur locum suum, s. ne se non sustineat.“] 333. *connub. amb. Lat.*, ut apud Tac. Germ. 18 „pauci, qui ob nobilitatem plurimis nuptiis ambiuntur.“] 334. *Aeneadae*, quod non soli Aeneae coniux petitur, sed ius conubii omnibus Troianis.] 336. *versare*, exagitare, perturbare. — *verbera* oriuntur e rixis discordisque domesticis, e verberibus caedes et funera.] 337. pro varia potestate, qua quisque erat deus, variis appellabatur nominibus, *πολυωνυμος*. Ac multa singulorum deorum nomina coacervata deprehendes in Hymnis Orphicis, ut in LXIX. sq., qui scripti sunt in ipsas Eumenidas. Pomponius Sab. „quot sunt mala, tot sunt illius nomina.“] 338. *fec. conc. p.*, excita animum ad invenienda consilia fecundum.] 339. *Dissicere* antiquae pro *dissiccare* dixerunt; sic multi libri mss. 12, 308 „securi frontem mentumque dissicit.“ Plaut. Curc. 3, 53 „elephantum machaera dissicit.“ Lactantius quoque Inst. 2, 7, 8 „Cape igitur hanc cotem eamque novacula dissice.“ (cf. Liv. 1, 36.)] 340. uno eodemque tempore et cupiat arma et poscat et rapiat.]] 341—406. *Primum Allecto furiis infecta Amatam, uxorem Latini regis.*] 341. *Gorg. inf. ven.*, caput eius, ut Gorgonis Medusae, serpentibus veneno infectis cinctum erat.] 343. *tacitum*, quo sola secesserat Amata curis intenta.] 345. *cura* et *ira* fervere, fervida esse, proptereaque hominem coquere (animum eius incendere) dicitur; Ennius „Quae (*cura*) nunc te coquit et versat sub pectore fixa.“ Silius It. 14, 103 „quos ira metusque coquebat.“] 346. *Huic*, v. E. 2, 30. — *caeruleis*: constant crines eius anguibus caeruleis, atris.]

- Adjungi generum miro properabat amore;  
 Sed variis portenta deum terroribus obstant.  
 Laurus erat tecti medio in penetralibus altis,  
 60 Sacra comam, multosque metu servata per annos,  
 Quam pater inventam, primas cum conderet arces,  
 Ipse ferebatur Phoebo sacrasse Latinus,  
 Laurentisque ab ea nomen posuisse colonis.  
 Huius apes summum densae — mirabile dictu —  
 65 Stridore ingenti liquidum trans aethera vectae,  
 Obsedere apicem, et pedibus per mutua nexis  
 Examen subitum ramo frondente pependit.  
 Continuo vates, Externum cernimus, inquit,  
 Adventare virum, et partis petere agmen easdem  
 70 Partibus ex isdem, et summa dominarier arce.  
 Praeterea, castis adolet dum altaria taedis  
 Et iuxta genitorem adstat Lavinia virgo,  
 Visa, nefas, longis comprehendere crinibus ignem,  
 Atque omnem ornatum flamma crepitante cremari,  
 75 Regalisque accensa comas, accensa coronam,  
 Insignem gemmis; tum fumida lumine fulvo  
 Involvi ac totis Vulcanum spargere tectis.  
 Id vero horrendum ac visu mirabile ferri:  
 Namque fore inlustrem fama fatisque caneant  
 80 Ipsam, sed populo magnum portendere bellum.  
 At rex sollicitus monstribus oracula Fauni,  
 Fatidici genitoris, adit, lucosque sub alta  
 Consulit Albunea, nemorum quae maxuma sacro  
 Fonte sonat, saevamque exhalat opaca mephitim.  
 85 Hinc Italiae gentes omnisque Oenotria tellus  
 In dubiis responsa petunt; huc dona sacerdos  
 Cum tulit et caesarum ovium sub nocte silenti

Oceanus, et v. 6, 844. — *reg. c.*, Amata coniux Latini. | 57. *proper.*, valde studebat, ut vs. 264. | 59. *tecti med.*, v. 4, 494 et cf. Tibull. 3, 3, 15. — *penetr. altis*, quae altis parietibus inclusa sunt. | 60. *Sacra c.*, ergo intactis frondibus. | 61. *pr. c. c. a.*, cum primum arcem (Laurentum) conderet, v. G. 3, 130. | 63. *Laurentis* Accusat. Plur., v. G. 1, 137. — *et ab ea*, et a qua; Cic. Orat. 3, species pulchritudinis eximia quaedam, *quam* intuens in eaque defixus“ *cot.* | 64. *subitum*, id quod, maxime in re mira, repente ac praeter expectationem accidit. — Uva ab apibus facta dirum ostentum existimatur, Plin. N. H. 11, 18, 55, similiterque examen apum in foro visum hostium adventum portendit ap. Liv. 24, 10. | 69. *part. easdem*, urbem ac regiam Latini. | 70. *Part. ex isd.*, a partibus maris inferi. | 71. *cast. taed.* Plin. N. H. 16, 19, 44 „taeda, flammis ac luminis sacrorum grata.“ — *adolet* genitor, Latinus. | 74. *ornatum capitis*; et v. 1, 713. | 75. v. E. 4, 6. | 77. *tectis*, v. 2, 512. | 78. v. G. 2, 441. | 83 sq. *Albunea* silva cum fonte aquae sulfureae hodie *Acqua solforata d' Altieri* dicto, huic silvae in montibus sitae, *altas*, subiacebat lucus iste Fanno sacer; cf. 8, 599. — *opaca*, quae opacat, ut 6, 673 „lucis habitamus opacis;“ nec praeter rationem adiectum esse hoc epitheton docet Servius „mephitis... de aquis nascitur

- Pellibus incubuit stratis somnosque petivit,  
 Multa modis simulacra videt volitantia miris,  
 90 Et varias audit voces, fruiturque deorum  
 Conloquio, atque imis Acheronta adfatur Avernis.  
 • Hic et tum pater ipse petens responsa Latinus  
 Centum lanigeras mactabat rite bidentis,  
 Atque harum effultus tergo stratisque iacebat  
 95 Velleribus: subita ex alto vox reddita luco est:  
 Ne pete connubiis natam sociare Latinis,  
 O mea progenies, thalamis neu crede paratis;  
 Externi venient generi, qui sanguine nostrum  
 Nomen in astra ferant, quorumque ab stirpe nepotes  
 100 Omnia sub pedibus, qua Sol utrumque recurrens  
 Aspicit Oceanum, vertique regique videbunt.  
 Haec responsa patris Fauni monitusque silenti  
 Nocte datos non ipse suo premit ore Latinus,  
 Sed circum late volitans iam Fama per urbes  
 105 Ausonias tulerat, cum Laomedontia pubes  
 Gramineo ripae religavit ab aggere classem.  
 Aeneas primique duces et pulcher Iulus  
 Corpora sub ramis deponunt arboris altae,  
 Instituuntque dapes, et adorea liba per herbam  
 110 Subiiciunt epulis, — sic Iuppiter ille monebat —  
 Et Cereale solum pomis agrestibus augment.  
 Consumptis hic forte aliis, ut vertere morsus  
 Exiguam in Cererem penuria adegit edendi  
 Et violare manu malisque audacibus orbem

sulphuratis et est in nemoribus gravior ex densitate silvarum.“] 88. *incubuit*, unde incubatio, *ἐγκοιμήσις*, dicta est haec ratio petendi oracula.] 91. *Acher.*, deos inferos et Manes. — *Avernus*, v. 6, 126.] 95. v. 3, 40.] 97. *paratis*, cf. vs. 56 sq.] 98. *generi*, aliquis generi futurus, v. 6, 322. — *Alii veniunt*.] 99. *quor. ab st. n.*, et qui ab horum stirpe nascentur nepotes.] 100. *sub ped.*, sumtum hoc ab illa imagine, quae victores cervicibus victi pedem imponentes repraesentat, cf. G. 2, 492. Ovid. Trist. 3, 12, 48. — *recurrens* ad quotidianum iter faciendum, ergo et oriens et occidens.] 101. *verti*, Cic. Act. Verr. 1, 7 „Omnia in unius potestate ac moderatione *vertentur*.“ Ceterum cf. vs. 258.] 103 sq. *non* — *Sed*: adversative elocutus est poeta, quod copulative dici solet: nec Latinus premit, et Fama iam tulerat.]] 107—147. *Comensarum mensarum ostentum docet Troianos venire ad sedem sibi destinatam*.] 110. *ille*, hoc Pronomine admonemur rei praeteritae: pertinebat ista res ad illud, quod Iuppiter olim, ut meminimus, monebat sive futurum esse praegixerat per Harpyiam 3, 255—257. Terent. Phorm. 2, 1, 32 „Lenem patrem *illum* factum me esse acerrimum.“ Atque in iis comparisonibus, quae referuntur ad quandam rerum praeteritarum memoriam, ut adverbio *olim* utitur poeta, 8, 391. G. 4, 433, ita, sed cum quadam vi monstrandi, pronomine *ille* 10, 707. 11, 809.] 111. *aug.*, cumulant, tamquam mensas.] 114. Totum hoc habet comicum quiddam, id quod ipse poeta indicat per verbum *alludens* vs. 117, et, tamquam sacrilegium commissum esset, gravibus utitur et in ea re propriis verbis *violare* et *audax* (Tibull. 3, 5, 8); mensae autem sacrae habitae a veteribus; Donatus fore sic

- 115 Fatalis crusti patulis nec parcere quadris:  
 Heus, etiam mensas consumimus! inquit Iulus;  
 Nec plura adludens. Ea vox audita laborum  
 Prima tulit finem, primamque loquentis ab ore  
 Eripuit pater, ac stupefactus numine pressit.
- 120 Continuo, Salve fatis mihi debita Tellus,  
 Vosque, ait, o fidi Troiae salvete Penates:  
 Hic domus, haec patria est. Genitor mihi talia namque,  
 Nunc repeto, Anchises fatorum arcana reliquit:  
 Cum te; nate, fames ignota ad litora vectum
- 125 Accisis coget dapibus consumere mensas,  
 Tum sperare domos defessus ibique memento  
 Prima locare manu molirique aggerē tecta.  
 Haec erat illa fames; haec nos suprema manebat,  
 Exitis positura modum.
- 130 Quare agite et primo laeti cum lumine solis,  
 Quae loca, quive habeant homines, ubi moenia gentis,  
 Vestigemus, et a portu diversa petamus.  
 Nunc pateras libate Iovi, precibusque vocate  
 Anchisen genitorem, et vina reponite mensis.
- 135 Sic deinde effatus frondenti tempora ramo  
 Implicat, et Geniumque loci primamque deorum  
 Tellurem Nymphasque et adhuc ignota precatur  
 Flumina, tum Noctem Noctisque orientia Signa  
 Idaeumque Iovem Phrygiamque ex ordine Matrem
- 140 Invocat, et duplicis Caeloque Ereboque parentes.  
 Hic pater omnipotens ter caelo clarus ab alto  
 Intonuit, radiisque ardentem lucis et auro  
 Ipse manu quatiens ostendit ab aethere nubem.  
 Diditur hic subitoq Troiana per agmina rumor,

„Iulus ingemuit famem illo usque perductam, ut hanc sacrilegio extinguere laborarent et, quod venerari soliti essent, irreverenter absumerent.“ | 115. *Fat.*, cf. 3, 255—257. | 117. *N. pl. adl.*, nec plura locutus est iocans et in nomine rei ludens. | 118. *primam*, ut primum exiit ex eius ore, statim. | 119. *Eripuit ... pressit*, celeriter excepit et ad animum admissam paulisper tacitus (cf. vs. 103) mente volutavit. — *stup. numine*, stupefactus vi divina, quae oraculum illud horrendum tam facili via expedit. | 121. *fidi*, servantes fidem promissorum, cf. 3, 148 sqq. | 122 sqq. Portentum illud mensarum comedendarum Anchises ipse deprecatur 3, 265. Itaque putabimus Anchisen, qui post mortem insignem prodit rerum futurarum scientiam, ea, quae h. l. legimus, tum aperuisse, cum apud inferos versabatur Aeneas, cf. 6, 891—893. — *reliquit* non ante primum discessum, i. e. ante mortem, sed ante illum alterum. | 127. *mol. aggerē t.*, urbem aedificare, quod fit ducto vallo. | 129. *Exitis*, gravissimis malis damnisque (10, 850) ex eorum scilicet genere, quae adhuc perpassi sumus; nam „terrae graviora manent“ 6, 84. | 134. v. G. 4, 378. | 135. v. 5, 14. | 136. *primam*, v. 4, 166. | 138. *Noctem*, „quoniam, die consumpto, ipsa iam fuerat ventura“ Donatus. | 139. *ex ordine*, deinceps. — *Matrem* deorum, Cybelen. | 140. Venerem atque Anchisen; et v. vs. 226. | 141 sq. Laetum plerumque hoc

- 145 Advenisse diem; quo debita moenia condant.  
 Certatim instaurant epulas, atque omine magno  
 Crateras laeti statuunt et vina coronant.  
 Postera cum prima lustrabat lampade terras  
 Orta dies, urbem et finis et litora gentis
- 150 Diversi explorant; haec fontis stagna Numici,  
 Hunc Thybrim fluvium, hic fortis habitare Latinos.  
 Tum satius Anchisa delectos ordine ab omni  
 Centum oratores augusta ad moenia regis  
 Ire iubet, ramis velatos Palladis omnis,
- 155 Donaue ferre viro, pacemque exposcere Teucris.  
 Haud mora, festinant iussi rapidisque feruntur  
 Passibus. Ipse humili designat moenia fossa,  
 Moliturque locum, primasque in litore sedes  
 Castrorum in morem pinnis atque aggere cingit.
- 160 Iamque iter emensi turris ac tecta Latinorum  
 Ardua cernebant iuvenes, muroque subibant.  
 Ante urbem pueri et primaevae flore iuventus  
 Exercentur equis, domitantque in pulvere currus,  
 Aut acris tendunt arcus, aut lenta lacertis
- 165 Spicula contorquent, cursuque ictuque lacessunt:  
 Cum praevectus equo longaevis regis ad auris  
 Nuntius ingentis ignota in veste reportat  
 Advenisse viros. Ille intra tecta vocari  
 Inperat, et solio medius consedit avito.
- 170 Tectum augustum, ingens, centum sublime columnis,  
 Urbe fuit summa, Laurentis regia Pici,  
 Horrendum silvis et religione parentum.  
 Hic sceptras accipere et primos attollere fasces  
 Regibus omen erat; hoc illis curia templum,

augurium; Hom. Od. 20, 103 sq. — *clarus*, serenus, i. e. caelo sereno. | 145. *debita*, cf. v. 120. | 146. *instaurare epulas* est rursus epulari rei sacrae causa, v. 4, 63. — *omine*, cf. vs. 141. | 147. *v. cor.*, v. G. 2, 528. || 148—194. *Explorantur vicina. Mittuntur centum legati ad regem Latinum. Regia Pici.* | 148. v. G. 3, 130. | 149. *urbem*, Laurentum. | 150. *div.*, cf. vs. 132. — Numicius rivulus ex stagno profluens. | 151. *habitare* sc. resciscunt, v. vs. 256. 503. | 152. *ord. ab o.* Servius, „ex omni qualitate dignitatum, quod apud Romanos in legatione mittenda hodieque servatur.“ | 154. *ramis velatos*, ramos vittatos manibus gerentes, cf. vs. 237. 8, 116. 128. 11, 101. 332. — *Pall.*, cf. G. 1, 18. | 157. *fossa*, proprie sulco; v. 1, 425 et 5, 755. | 158. *Mol. loc.*, aedificia in eo exstruit, cf. vs. 290. — *primas*: primum quidem, quod condidit Aeneas, oppidum Troia appellatum; deinde Lavinium est ab eodem conditum; cf. Liv. 1, 1. | 160. *Iamque* ... *Cum*, v. 5, 762. — Alii *Latini*. | 164. *lenta*, ex lenta (id est h. l. difficili ad flectendum, dura firmaeque) materie facta, qualis est corni, myrti, cf. 9, 698. G. 2, 447 sq. | 165. *que* ... *que*, v. 1, 701. — *lacess.*, ad certandum provocant. — *ictu*, iaculatione. | 167. *in v.*, v. 5, 179. — *rep.*, v. 3, 717. | 169. *medius*, sive i. q. *aulae medio* 3, 354. sive medius inter adstantes assidentesve amicos, ut 11, 237. | 171. *Urbe summa*, ἐν τῇ ἀκροπόλει. | 173. *fasces* praefereandos novo regi. | 174.

- 175 Hae sacris sedes epulis; hic ariete caëso  
 Perpetuis soliti patres considerare mensis.  
 Quin etiam veterum effigies ex ordine avorum  
 Antiqua e cedro, Italusque paterque Sabinus  
 Vitaeator, curvam servans sub imagine falcem,  
 180 Saturnusque senex Ianique bifrontis imago,  
 Vestibulo adstabant, alique ab origine reges,  
 Martiaque ob patriam pugnando volnera passi.  
 Multaque praeterea sacris in postibus arma,  
 Captivi pendunt currus, curvaeque secures,  
 185 Et cristae capitum, et portarum ingentia claustra,  
 Spiculaque clipeique ereptaue rostra carinis.  
 Ipse Quirinali lituo parvaque sedebat  
 Succinctus trabea, laevaue ancile gerebat  
 Picus, equum domitor; quem capta cupidine coniunx  
 190 Aurea percutsum virga versumque venenis  
 Fecit avem Circe sparsitque coloribus alas.  
 Tali intus templo divom patriaque Latinus  
 Sede sedens Teucros ad sese in tecta vocavit;  
 Atque haec ingressis placido prior edidit ore:  
 195 Dicite, Dardanidae, neque enim nescimus et urbem  
 Et genus, auditique advertitis aequore cursum,  
 Quid petitis? quae caussa rates, aut cuius egentis  
 Litus ad Ausonium tot per vada caerulea vexit?  
 Sive errore viae, seu tempestatibus acti,  
 200 Qualia multa mari nautae patiuntur in alto,  
 Fluminis intrastis ripas portuque sedetis,  
 Ne fugite hospitium, neve ignorete Latinos  
 Saturni gentem, haud vinclo nec legibus aequam,

*omen e.*, fausti principii loco erat. — *erāt*: *h.*, v. E. 1, 39. | 175. *ar. c.*, facto sacrificio. | 176. *Perpet.*, recta linea continuatis. — *consid.*: Antiquitus Romani sedentes epulabantur. | 178. *cedro*; *It.*, v. E. 10, 13. | 179. cum falce vinitoria in basi eius simulcari. | 181. *Vestibulum*, v. 2, 469. — *adstab.*, v. 1, 152. — Verbis *ab origine* videntur reges Aboriginum significari, v. 11, 603 et infra vs. 203. | 182. Alii *Martia qui*. | 183. v. 2, 504. — *sacris*, cf. vs. 172—173. 192. | 184. securis agrestium Italorum telum, ab Homero inter belli instrumenta semel commemoratum ἐν τῇ περὶ ναυοὶ μάχῃ, cf. Il. 13, 612. 15, 711. | 186. *Spiculaque*, v. E. 4, 51. | 187. *Ipse*, v. 2, 394. — *Quir. lituo*, Ablativus habitum significans, ut 11, 711 „*Ense pedes nudo*,” i. e. instructus lituo, ense. — *lituus*, qui erat augurum, insigne Romuli in deos relati seu Quirini; trabea communis veterum regum ornatus. | 189. *coniunx*, i. q. amans, v. E. 8, 18. | 190. *Aurea*, v. 1, 698. | 191. Picus in avem picam mutatus, Ovid. Met. 14, 320—396. | 195—285. *Placida oratio Latini. Ad eam respondet Ilioneus; exponit, quid potentes veniant, traditque munera. Pronittit Latinus benigne, quod petitur, ultroque Aenaeae offert Laviniam in matrimonium. Peracta legatione Troiani muneribus ornati redeunt.* | 196. *auditi*, fama noti. | 203. *h. vinclo n. leg. ae.*, nulla legum aut alia necessitate iustitiam colentem, v. G. 1, 173. — Hi sunt Aborigines illi, de quibus Sall. Cat. c. 6 „genus hominum



- Sponte sua veterisque dei se more tenentem.
- 205 Atque equidem mentini — fama est obscurior anhis —  
 Auruncos ita ferre senes, his ortus ut agris  
 Dardanus Idaeas Phrygiæ penetrarit ad urbes  
 Threiciamque Samon, quæ nunc Samothesia fertur.  
 Hinc illum Corythi Tyrrhena ab sede profectum
- 210 Aurea nunc solio stellantis regia caeli  
 Accipit et numerum divorum altaribus addit.  
 Dixerat; et dicta Ilioneus sic voce secutus:  
 Rex, genus egregium Fauni, nec fluctibus actos  
 Atræ subegit hiemps vestris succedere terris,
- 215 Nec sidus regione viae litusve fefellit;  
 Consilio hanc omnes animisque volentibus urbem  
 Adferimur, pulsi regnis, quæ maxuma quondam  
 Extremo veniens Sol aspiciebat Olympo.  
 Ab Iove principium generis; Iove Dardana pubes
- 220 Gaudet avo; rex ipse Iovis de gente suprema,  
 Troius Aeneas, tua nos ad limina misit.  
 Quanta per Idaeos saevis effusa Mycenis  
 Tempestas ierit campos, quibus actus uterque  
 Europæ atque Asiae fati concurrerit orbis,
- 225 Audiit, et si quem tellus extrema refuso  
 Submovet Oceano, et si quem extenta plagarum  
 Quattuor in medio dirimit plaga Solis iniqui.  
 Diluvio ex illo tot vasta per aequora vecti  
 Dis sedem exiguum patriis litusque rogamus
- 230 Innocuum et cunctis undamque auramque patentem.  
 Non erimus regno indecores, nec vestra feretur  
 Fama levis tantique abolescet gratia facti,  
 Nec Troiam Ausonios gremio excepisse pigebit.  
 Fata per Aeneae iuro dextramque potentem,
- 235 Sive fide seu quis bello est expertus et armis:

agreste, sine legibus, sine imperio, liberum atque solutum.“] 204. *se tenent*, vitam suam moderantem, *vet. dei more*, more a Saturno instituto, cf. Ovid. Met. 1, 89 sqq.] 206. Auruncis imperasse Latinum intelligitur ex 11, 316—19.] 209. v. E. 1, 54. — Corythus, Cortona Etruriae, cf. 3, 170. — *Hinc ab sede Tyrrh.*, v. E. 1, 54.] 211. numerum altaribus deorum addit, quia et ipsi altaria instituuntur, ut deo. — *Alii altar. auget.*] 215. nullus error nec in observandis sideribus admissus, nec ex ignoratione litorum terrarumque ortus nos alio, quam quo tendebamus, abduxit; v. 2, 737.] 218. *Extr. Ol.*, ab orientali parte caeli.] 219. Stemma: Iuppiter, Dardanus, Laomedon, Priamus.] 220. v. 10, 350.] 225. *refuso*, ἀπορροή, terras ambiens et in se ipsum redeunte.] 226. *Oceano* est Ablativus loci: si quem litora Oceani habitantem *cet.*; similiter vs. 140 „duplices Caeloque Ereboque parentes,“ qui sunt in Caelo, Erebo; vs. 269. *monstra caelo*, i. e. ostenta de caelo s. a diis missa; *aurum collo* vs. 351, adde 450. *Epiro, Hesperia* 3, 503. 8, 419. *flumine*, ad flumen, 8, 610. — *Ceterum* v. E. 10, 13.] 227. *Iunge: in medio quattuor plagarum*, et cf. G. 1, 233 sqq.] 230. *Innoc.*, quod sine molestia et periculo aliorum teneamus.] 234 sq. Cic. Ep. ad Div. 7, 5, 11

- 175 Hae sacris sedes epulis; hic ariete caeso  
 Perpetuis soliti patres considerare mensis.  
 Quin etiam veterum effigies ex ordine avorum  
 Antiqua e cedro, Italusque paterque Sabinus  
 Vitigator, curvam servans sub imagine falcem,  
 180 Saturnusque senex Ianique bifrontis imago,  
 Vestibulo adstabant, aliique ab origine reges,  
 Martiaque ob patriam pugnando volnera passi.  
 Multaque praeterea sacris in postibus arma,  
 Captivi pendunt currus, curvaeque secures,  
 185 Et cristae capitum, et portarum ingentia claustra,  
 Spiculaque clipeique ereptaque rostra carinis.  
 Ipse Quirinali lituo parvaque sedebat  
 Succinctus trabea, laevaue ancile gerebat  
 Picus, equum domitor; quem capta cupidine coniunx  
 190 Aurea percussum virga versumque venenis  
 Fecit avem Circe sparsitque coloribus alas.  
 Tali intus templo divom patriaue Latinus  
 Sede sedens Teucros ad sese in tecta vocavit;  
 Atque haec ingressis placido prior edidit ore:  
 195 Dicite, Dardanidae, neque enim nescimus et urbem  
 Et genus, auditique advertitis aequore cursum,  
 Quid petitis? quae caussa rates, aut cuius egentis  
 Litus ad Ausonium tot per vada caerula vexit?  
 Sive errore viae, seu tempestatibus acti,  
 200 Qualia multa mari nautae patiuntur in alto,  
 Fluminis intrastis ripas portuque sedetis,  
 Ne fugite hospitium, neve ignorete Latinos  
 Saturni gentem, haud vincolo nec legibus aequam,

*omen e.*, fausti principii loco erat. — *erat*: h., v. E. 1, 39. | 175. *ar. c.*, facto sacrificio. | 176. *Perpet.*, recta linea continuatis. — *consid.*: Antiquitus Romani sedentes epulabantur. | 178. *cedro*; *It.*, v. E. 10, 13. | 179. cum falce victoria in basi eius simulcari. | 181. *Vestibulum*, v. 2, 469. — *adstab.*, v. 1, 152. — Verbis *ab origine* videntur reges Aboriginum significari, v. 11, 603 et infra vs. 203. | 182. Alii *Martia qui*. | 183. v. 2, 504. — *sacris*, cf. vs. 172—173. | 184. securis agrestium Italarum telum, ab Homero inter belli instrumenta semel commemoratum *ἐν τῇ περὶ ναυὸς μάχῃ*, cf. Il. 13, 612. 15, 711. | 186. *Spiculaquē*, v. E. 4, 51. | 187. *Ipse*, v. 2, 394. — *Quir. lituo*, Ablativus habitum significans, ut 11, 711 „*Ense pedes nudo*,” i. e. instructus lituo, ense. — *lituus*, qui erat augurum, insigne Romuli in deos relati seu Quirini; trabea communis veterum regum ornatus. | 189. *coniunx*, i. q. amans, v. E. 8, 18. | 190. *Aurea*, v. 1, 698. | 191. Picus in avem picum mutatus, Ovid. Met. 14, 320—396. | 195—285. *Placida oratio Latini. Ad eam respondet Nioneus; exponit, quid potentes veniant, traditque munera. Promittit Latinus benigna, quod petitur, ultroque Aeneae offert Laviniam in matrimonium. Peracta legatione Troiani muneribus ornati redeunt.* | 196. *auditi*, fama noti. | 203. *h. vincolo n. leg. ae.*, nulla legum aut alia necessitate iustitiam colentem, v. G. 1, 173. — Hi sunt Aborigines illi, de quibus Sall. Cat. c. 6 „genus hominum

- Sponte sua veterisque dei se more tenentem.  
 205 Atque equidem mentini — fama est obscurior anhis —  
 Auruncos ite ferre senes, his ortus ut agris  
 Dardanus Idaeas Phrygiæ penetrarit ad urbes  
 Threiciamque Samon, quæ nunc Samothracia fertur.  
 Hinc illum Corythi Tyrrhena ab sede profectum  
 210 Aurea nunc solio stellantis regia caeli  
 Accipit et numerum divorum altaribus addit.  
 Dixerat; et dicta Ilioneus sic voce secutus:  
 Rex, genus egregium Fauni, nec fluctibus actos  
 Atræ subegit hiemps vestris succedere terris,  
 215 Nec sidus regione viae litusve fefellit;  
 Consilio hanc omnes animisque volentibus urbem  
 Adferimur, pulsî regnis, quæ maxuma quondam  
 Extremo veniens Sol aspiciebat Olympo.  
 Ab Iove principium generis; Iove Dardana pubes  
 220 Gaudet avo; rex ipse Iovis de gente suprema,  
 Troius Aeneas, tua nos ad limina misit.  
 Quanta per Idaeos saevis effusa Mycenis  
 Tempestas ierit campos, quibus actus uterque  
 Europæ atque Asiae fati concurrerit orbis,  
 225 Audiit, et si quem tellus extrema refuso  
 Submovet Oceano, et si quem extenta plagarum  
 Quattuor in medio dirimit plaga Solis iniqui.  
 Diluvio ex illo tot vasta per aequora vecti  
 Dis sedem exiguum patriis litusque rogamus  
 230 Innocuum et cunctis undamque auramque patentem.  
 Non erimus regno indecores, nec vestra feretur  
 Fama levis tantique abolescet gratia facti,  
 Nec Troiam Ausonios gremio excepisse pigebit.  
 Fata per Aeneae iuro dextramque potentem,  
 235 Sive fide seu quis bello est expertus et armis:

agreste, sine legibus, sine imperio, liberum atque solutum.“] 204. *se tenent*; vitam suam moderantem, *vet. dei more*, more a Saturno instituto, cf. Ovid. Met. 1, 89 sqq.] 206. Auruncis imperasse Latinum intelligitur ex 11, 316—19.] 209. v. E. 1, 54. — Corythus, Cortona Etruriae, cf. 3, 170. — *Hinc ab sede Tyrrh.*, v. E. 1, 54.] 211. numerum altaribus deorum addit, quia et ipsi altaria instituantur, ut deo. — Alii *altar. auget*.] 215. nullus error nec in observandis sideribus admissus, nec ex ignoratione litorum terrarumque ortus nos alio, quam quo tenebamus, abduxit; v. 2, 737.] 218. *Extr. Ol.*, ab orientali parte caeli.] 219. Stemma: Iuppiter, Dardanus, Laomedon, Priamus.] 220. v. 10, 350.] 225. *refuso*, ἀπορροή, terras ambiente et in se ipsum redeunte.] 226. *Oceano* est Ablativus loci: si quem litora Oceani habitantem *cet.*; similiter vs. 140 „duplices Caeloque Ereboque parentes,“ qui sunt in Caelo, Erebo; vs. 269. *monstra caelo*, i. e. ostenta de caelo s. a diis missa; *aurum collo* vs. 351, adde 450. *Epiro, Hesperia* 3, 503. 8, 419. *flumine*, ad flumen, 8, 610. — Ceterum v. E. 10, 13.] 227. *lunge: in medio quattuor plagarum*, et cf. G. 1, 233 sqq.] 230. *Innoc.*, quod sine molestia et periculo aliorum teneamus.] 234 sq. — Cic. Ep. ad Div. 7, 5, 11

- Troia viros? medias actes mediosque per ignis  
 Invenere viam. At, credo, mea numina, tandem  
 Fessa iacent, odiis aut exsaturata quievi —  
 Quin etiam patria excussos infesta per undas  
 300 Ausa sequi, et profugis toto me opponere ponto.  
 Absumptae in Teucros vires caelique marisque.  
 Quid syrtes aut Scylla mihi, quid vasta Charybdis  
 Profuit? optato conduntur Thybridis alveo,  
 Securi pelagi atque mei. Mars perdere gentem  
 305 Inmanem Lapithum valuit; concessit in iras  
 Ipse deum antiquam genitor Calydonia Dianae;  
 Quod scelus aut Lapithas tantum, aut Calydonia merentem?  
 Ast ego, magna Iovis coniunx, nil linquere inausum  
 Quae potui infelix, quae inemet in omnia verti,  
 310 Vincor ab Aenea. Quod si mea numina non sunt  
 Magna satis, dubitem haud equidem inplorare quod usquam est.  
 Flectere si nequeo Superos, Acheronta movebo.  
 Non dabitur regnis, esto, prohibere Latinis,  
 Atque inmota manet fatis Lavinia coniunx:  
 315 At trahere, atque moras tantis licet addere rebus;  
 At licet amborum populos excindere regum.  
 Hac gener atque socer coeant mercede suorum.  
 Sanguine Troiano et Rutulo dotabere, virgo,  
 Et Bellona manet te pronuba. Nec face tantum  
 320 Cisseis praegnans ignis enixa iugalis;  
 Quin idem Veneri partus suus et Paris alter,  
 Funestaeque iterum recidiva in Pergama taedae.  
 Haec ubi dicta dedit, terras horrenda petivit;

maxime pertinentia. | 296. v. 1, 544. | 297. Pluralis *numina* ubi non ad plures deos, sed ad unum pertinet, significat aut variis rebus comprobata, aut, ut hic et vs. 310, imprimis magnam et insignem eius dei potentiam. | 299. Non est ita, sed ausa sum etiam *cel.* | 302. *syrtes*, cf. 1, 111. | 304. Servius „Pirithous Lapitharum rex cum uxorem deduceret, vicinos populos Centauros, etiam sibi cognatos, et deos omnes excepto Marte ad convivium convocavit. Unde iratum numen immisit furorem, quo Centauri et Lapithae in bella venerunt.“ | 305. v. 2, 242. — *conc. in iras*, conc. ulciscendam. | 306. cf. Hom. II. 9, 529 sqq. Ovid. Met. 8, 270 sqq. — *antiquam*, Plin. Ep. 8, 24 „reverere gloriam veterem et hanc ipsam senectutem, quae in homine venerabilis, in urbibus sacra est.“ | 307. *scelus merere*, scelus in se admittere; Terent. 5, 8, 25 „esse in hac re culpam meritam non nego.“ | 309. *potui*, sustinui, v. G. 3, 453. — *me in omnia verti*, omnes quasi personas nocendique partes suscepi ad istos perdendos. | 314. *im. man. fat. L. con.*, immutabili fato decreta Aeneae est coniux Lav.; proprie ipsa fata dicuntur immota, ut 1, 257. | 317. *coeant*, foedere et matrimonio Aeneae et Laviniae coniungantur. | 319. cf. 4, 166. — *face praegnans*, cf. Ovid. Heroid. 16, 43—49. Cic. de Divin. 1, 21. | 320 sqq. *Cisseis*, v. 5, 537. — Non sola Hecuba enixa est ignes iugales, i. e. peperit in matrimonio filium, qui incendium Asiae erat futurus (Ovid. l. l. vs. 49), sed etiam Veneri filius suus similis (*idem*) erit ignis alterque Paris, fax funesta reuascanti patriae, cf.

- Luctificam Allecto dirarum ab sede dearum  
 325 Infernisque ciet tenebris, cui tristia bella  
 Iraeque insidiaque et crimina noxia cordi.  
 Odit et ipse pater Pluton, odere sorores  
 Tartareae monstrum: tot sese vertit in ora,  
 Tam saevae facies, tot pullulat atra colubris.  
 330 Quam lupo his acuit verbis ac talia fatur:  
 Hunc mihi da proprium, virgo sata Nocte, laborem,  
 Hanc operam, ne noster honos infractave cedat  
 Fama loco, neu connubiis ambire Latinum  
 Aeneadae possint, Italosve obsidere finis.  
 335 Tu potes unanimos armare in proelia fratres  
 Atque odiis versare domos, tu verbera tectis  
 Funereasque inferre faces, tibi nomina mille,  
 Mille nocendi artes. Fecundum concute pectus,  
 Dissice conpositam pacem, sere crimina belli;  
 340 Arma velit poscatque simul rapiatque iuventus.  
 Exin Gorgoneis Allecto infecta venenis  
 Principio Latium et Laurentis tecta tyranni  
 Celsa petit, tacitumque obsedit limen Amatae,  
 Quam super adventu Teucrum Turnique hymenaeis  
 345 Femineae ardentem curaeque iraeque coquebant.  
 Huic dea caeruleis unum de crinibus anguem

4, 344.] 324. Alii *sorum*.] 327. v. E. 4, 6.] 328. cf. vs. 415 sq.] 331. *proprium*, cuius fructu ipsa sola gaudeam. Non petit luno aliis, sed sibi soli; quod autem ita petimus, id et instantius petimus, et, si datur, gratissimum esse solet. — *laborem* ... *operam*, laborem positum in opera (gratia) mihi praestanda.] 332. *infr.*, v. 12, 1. — *cedere loco* proprie dicitur gladiator vel miles, qui pugna inferior est; „ne honos ac fama mea non tueatur locum suum, s. ne se non sustineat.“] 333. *connub. amb. Lat.*, ut apud Tac. Germ. 18 „pauci, qui ob nobilitatem plurimis nuptiis ambiuntur.“] 334. *Aeneadae*, quod non soli Aeneae coniux petitur, sed ius connubii omnibus Troianis.] 336. *versare*, exagitare, perturbare. — *verbera* oriuntur e rixis discordiisque domesticis, e verberibus caedes et funera.] 337. pro varia potestate, qua quisque erat deus, variis appellabatur nominibus, *πολυωνυμος*. Ac multa singulorum deorum nomina coacervata deprehendes in Hymnis Orphicis, ut in LXIX. sq., qui scripti sunt in ipsas Eumenidas. Pomponius Sab. „quot sunt mala, tot sunt illius nomina.“] 338. *fec. conc. p.*, excita animum ad invenienda consilia fecundum.] 339. *Dissicere* antiquae pro *dissecare* dixerunt; sic multi libri mss. 12, 308 „securi frontem mentumque dissicit.“ Plaut. Curc. 3, 53 „elephantum machaera dissicit.“ Lactantius quoque Inst. 2, 7, 8 „Cape igitur hanc cotem eamque novacula dissice.“ (cf. Liv. 1, 36.)] 340. uno eodemque tempore et cupiat arma et poscat et rapiat.]] 341—405. *Primum Allecto furiis inficit Amatam, uxorem Latini regis.*] 341. *Gorg. inf. ven.*, caput eius, ut Gorgonis Medusae, serpentibus veneno infectis cinctum erat.] 343. *tacitum*, quo sola secesserat Amata curis intenta.] 345. *cura* et *ira* fervere, fervida esse, propterea quoque hominem coquere (animum eius incendere) dicitur; Ennius „Quae (*cura*) nunc te coquit et versat sub pectore fixa.“ Silius It. 14, 103 „quos ira metusque coquebat.“] 346. *Huic*, v. E. 2, 30. — *caeruleis*: constant crines eius anguibus caeruleis, atris.]

- Coniicit inque sinum praecordia ad intima subdit,  
 Quo furibunda domum monstro permisceat omnem.  
 Ille, inter vestes et levia pectora lapsus,  
 350 Volvitur attactu nullo, fallitque furem  
 Vipeream inspirans animam; fit tortile collo  
 Aurum ingens coluber, fit longae taenia vittae,  
 Innectiturque comas, et membris lubricus errat.  
 Ac dum prima lues udo sublapsa veneno  
 355 Pertemptat sensus atque ossibus implicat ignem  
 Necdum animus toto percepit pectore flammam,  
 Mollius, et solito matrum de more, locuta est,  
 Multa super natae lacrimans Phrygiisque hymenaeis:  
 Exsulibusne datur ducenda Lavinia Teucris,  
 360 O genitor? nec te miseret gnataeque tuique?  
 Nec matris miseret, quam primo aquilone relinquet  
 Perfidus, alta petens abducta virgine praedo?  
 An non sic Phrygius penetrat Lacedaemona pastor  
 Ledaeamque Helenam Troianas vexit ad urbes?  
 365 Quid tua sancta fides? quid cura antiqua tuorum  
 Et consanguineo totiens data dextera Turno?  
 Si gener externa petitur de gente Latinis,  
 Idque sedet, Faunisque premunt te iussa parentis,  
 Omnem equidem sceptris terram quae libera nostris  
 370 Dissidet, externam reor, et sic dicere divos.  
 Et Turno, si prima domus repetatur origo,  
 Inachus Acrisiusque patres mediaeque Mycenae.  
 His ubi nequiquam dictis experta Latinum  
 Contra stare videt, penitusque in viscera lapsum  
 375 Serpentis furiale malum, totamque pererrat,

347. in sinum, cui respondet, quod vs. 349 legitur, *inter vestes et pectora*; et ita labitur ad praecordia, „loca cordi vicina, ut ait Servius, quibus percipitur sensus.“ | 350 sq. *fall. f. Vip. insp. an.*, i. e. clam inspirat furem animam *vip.*, ἔλαθεν αὐτὴν πνεῦμα ὁμιόνεον εἰσπνέων, Eurip. Heracl. 339 „μὴ λάθῃ με προσπνέων.“ Horat. Ep. 1, 17, 10 „Nec vixit male, qui *natus moriensque fefellit*.“ | 351. vs. 753 „graviter spirantibus hydrys.“ — collo, v. vs. 226. | 352. „taenia est vittarum extremitas“ Servius. — vittae, v. vs. 403. | 354. *prima ... veneno*, pestis primo furtim se in corpus insinuas udo veneno, i. e. udo halitu venenatae viperae. | 355. v. 1, 660. | 359. v. E. 3, 7. | 361. *primo*, ubi primum flare aquilo (ventus ab Italia solventibus secundus) coeperit. | 363. Alii *At non sic*: quasi non simili modo Spartam venerit Paris; et at particula apta est ironiae, sarcasmo et irrisioni. — Per Praecons, *penetrat*, res praeterita ita in memoriam revocatur, ut quasi nunc geri fierique videatur. | 365. *Quid tua fides?* nulla iam est. | 366. *consangu.*, est enim filius Veniliae, sororis Amatae. | 367. *Latinis*, ut 11, 472 „generamque adsciverit urbi“, nempe ut consortem imperii, et cf. supra vs. 255—57. | 368. *premunt*, urgent. | 372. cf. vs. 409—411 et v. vs. 56. Argivi reges, ex quibus unus erat Acrisius, pater Danaes, genus ducebant ab Inacho. — *mediae M.*, ergo ex media (cui nihil cum Italia commune) Argolide repetit Turnus originem; Mycenae et

- Tum vero infelix, ingentibus excita monst̄is,  
 Immensam sine more furit lymphata per urbem:  
 Ceu quondam torto volitans sub verbere turbo,  
 Quem pueri magno in gyro vacua atria circum  
 380 Intenti ludo exercent; ille actus habena  
 Curvatis fertur spatiis; stupet inscia supra  
 Inpubesque manus, mirata volabile buxum;  
 Dant animos plagae. Non cursu segnior illo  
 Per medias urbes agitur populosque ferocis.  
 385 Quin etiam in silvas, simulato numine Bacchi,  
 Maius adorta nefas maioremque orsa furorem,  
 Evolat, et natam frondosis montibus abdit,  
 Quo thalamum eripiat Teucris taedasque moretur,  
 Euae Bacche, fremens, solum te virgine dignum  
 390 Vociferans: etenim mollis tibi sumere thyrsos,  
 Te lustrare choro, sacrum tibi pascere crinem.  
 Fama volat, furiisque accensas pectore matres  
 Idem omnis simul ardor agit, nova quaerere tecta;  
 Deseruere domos, ventis dant colla comasque.  
 395 Ast aliae tremulis ululatibus aethera complent,  
 Pampineasque gerunt incinctae pellibus hastas;  
 Ipsa inter medias flagrantem fervida pinum  
 Sustinet, ac natae Turnique canit hymenaeos,  
 Sanguineam torquens aciem, torvumque repente  
 400 Clamat: Io matres, audite, ubi quaeque, Latinae:  
 Si qua piis animis manet infelicitis Amatae  
 Gratia, si iuris materni cura remordet,

Argi saepe a poetis confunduntur, utraque urbs Argolidis. | 376. *monstra* h. l. sunt terrores et phantasmata animo Amatae obiecta. | 377. *Immensam*, modestius *totam* dixit 4, 300; fingit scilicet immensam Romaeque, qualis ipsius aetate fuit, similiorem facit, quo latius pateat spatium huic furori Amatae. — *sine more*, ἀνόσμως. | 378. *sub v.*, Callim. Ep. 1, 9 sq.: „ὕπὸ πλῆγῃσι θεῶς βέμβυκας ἔχοντες ἔστρεπον.“ Herod. 7, 56 „Ἐθέξης ἐθνεῖτο τὸν στρατὸν ὑπὸ μαστίλων διαβαλόντα.“ | 379. *circ. atria*, per atria huc et illuc. | 381. *inscia*, quid sit, quod ita in gyrum turbo vertatur. — *supra*, designantur pueri turbini intenti seque supra eum inclinantes. | 383. *dant turbini animos*, motum concitatorum. | 385 sqq. simulat se Bacchi vi ac potentia correptam id agere, ut filiam orgiis initiet. | 388. *taedas* iugales, v. E. 8, 29. | 390. *Vociferatur* filiam tibi, in tuum honorem, *mollis*, pampinis vestitos, s. th. v. vs. 396. | 391. *Te lustr. ch.*, choros circum te, tamquam praesentem, ducere. — *pascit crinem*, qui cum non resecat; in sacris Bacchicis coma promissa et soluta habebatur. | 393. *nova tecta*, puta silvas. | 394. *vent. d. c. c.*, Maenadum modo, cf. vs. 403. | 395. *Dum aliae tr. ul. aeth. complent*, Ipsa (vs. 397) Amata pinum sustinet. | 396. *Pamp. hastas*, v. E. 5, 31. — *pell.*, nebride. | 397. *pinum*, facem pineam. | 398. *canit h.*, v. E. 1, 39. Ceterum aut verum consilium nunc aperit Amata, diversum ab eo, quod ante (vs. 389) simulavit, aut expressa sunt his verbis, ut statuit Servius, signa mentis alienatae; et fictum principio (vs. 385) furorem Bacchicum deinde conversum esse in verum probat vs. 405. | 399. cf. 4, 643. — *torv.*, torva voce, ut „torvo tonitru“ apud Attium. | 402. *si iur. mat. c. rem.*: admonet eas, quid ipsis communicato cum Troianis connubio spe-

- 115 Fatalis crusti patulis nec parcere quadris:  
 Heus, etiam mensas consumimus! inquit Iulus;  
 Nec plura adludens. Ea vox audita laborum  
 Prima tulit finem, primamque loquentis ab ore  
 Eripuit pater, ac stupefactus numine pressit.
- 120 Continuo, Salvē fatis mihi debita Tellus,  
 Vosque, ait, o fidi Troiae salvete Penates:  
 Hic domus, haec patria est. Genitor mihi talia namque,  
 Nunc repeto, Anchises fatorum arcana reliquit:  
 Cum te; nate, fames ignota ad litora vectum
- 125 Accisis coget dapibus consumere mensas,  
 Tum sperare domos defessus ibique memento  
 Prima locare manu molirique aggerē tecta.  
 Haec erat illa fames; haec nos suprema manebat,  
 Exitii positura modum.
- 130 Quare agite et primo laeti cum lumine solis,  
 Quae loca, quive habeant homines, ubi moenia gentis,  
 Vestigemus, et a portu diversa petamus.  
 Nunc pateras libate Iovi, precibusque vocate  
 Anchisen genitorem, et vina reponite mensis.
- 135 Sic deinde effatus frondenti tempora ramo  
 Implicat, et Geniumque loci primamque deorum  
 Tellurem Nymphasque et adhuc ignota precatur  
 Flumina, tum Noctem Noctisque orientia Signa  
 Idaeumque Iovem Phrygiamque ex ordine Matrem
- 140 Invocat, et duplicis Caeloque Ereboque parentes.  
 Hic pater omnipotens ter caelo clarus ab alto  
 Intonuit, radiisque ardentem lucis et auro  
 Ipse manu quatiens ostendit ab aethere nubem.  
 Diditur hic subitoq Troiana per agmina rumor,

„Iulus ingemuit famem illo usque perductam, ut hanc sacrilegio extinguere laborarent et, quod venerari soliti essent, irreverenter absumerent.“] 115. *Fat.*, cf. 3, 255—257. | 117. *N. pl. adl.*, nec plura locutus est iocans et in nomine rei ludens. | 118. *primam*, ut primum exiit ex eius ore, statim. | 119. *Eripuit ... pressit*, celeriter excepit et ad animum admissam paulisper tacitus (cf. vs. 103) mente volutavit. — *stup. numine*, stupefactus vi divina, quae oraculum illud horrendum tam facili via expedit. | 121. *fidi*, servantes fidem promissorum, cf. 3, 148 sqq. | 122 sqq. Portentum illud mensarum comedendarum Anchises ipse deprecatur 3, 265. Itaque putabimus Anchisen, qui post mortem insignem prodit rerum futurarum scientiam, ea, quae h. l. legimus, tum aperuisse, cum apud inferos versabatur Aeneas, cf. 6, 891—893. — *reliquit* non ante primum discessum, i. e. ante mortem, sed ante illum alterum. | 127. *mol. aggere t.*, urbem aedificare, quod fit ducto vallo. | 129. *Exitii*, gravissimis malis damnisque (10, 850) ex eorum scilicet genere, quae adhuc perpassi sumus; nam „terrae graviora manent“ 6, 84. | 134. v. G. 4, 378. | 135. v. 5, 14. | 136. *primam*, v. 4, 166. | 138. *Noctem*, „quoniam, die consumpto, ipsa iam fuerat ventura“ Donatus. | 139. *ex ordine*, deinceps. — *Matrem* deorum, Cybelen. | 140. Venerem atque Anchisen; et v. vs. 226. | 141 sq. Laetum pleramque hoc



- Tum vero infelix, ingentibus excita monst'ris,  
 Immensam sine more furit lymphata per urbem:  
 Ceu quondam tor'to volitans sub verberibus turbo,  
 Quem pueri magno in gyro vacua atria circum  
 380 Intenti ludo exercent; ille actus habena  
 Curvatis fertur spatiiis; stupet inscia supra  
 Inpubesque manus, mirata volubile buxum;  
 Dant animos plagae. Non cursu segnior illo  
 Per medias urbes agitur populosque ferocis.  
 385 Quin etiam in silvas, simulato numine Bacchi,  
 Maius adorta nefas maioremque orsa furorem,  
 Evolat, et natam frondosis montibus abdit,  
 Quo thalamum eripiat Teucris taedasque moretur,  
 Euae Bacche, fremens, solum te virgine dignum  
 390 Vociferans: etenim mollis tibi sumere thyrsos,  
 Te lustrare choro, sacrum tibi pascere crinem.  
 Fama volat, furiisque accensas pectore matres  
 Idem omnis simul ardor agit, nova quaerere tecta;  
 Deseruere domos, ventis dant colla comasque.  
 395 Ast aliae tremulis ululatibus aethera complent,  
 Pampineasque gerunt incinctae pellibus hastas;  
 Ipsa inter medias flagrantem fervida pinum  
 Sustinet, ac natae Turnique canit hymenaeos,  
 Sanguineam torquens aciem, torvumque repente  
 400 Clamat: Io matres, audite, ubi quaeque, Latinae:  
 Si qua piis animis manet infelicitis Amatae  
 Gratia, si iuris materni cura remordet,

Argi saepe a poetis confunduntur, utraque urbs Argolidis. | 376. *monstra* h. l. sunt terrores et phantasmata animo Amatae obiecta. | 377. *Immensam*, modestius *totam* dixit 4, 300; fingit scilicet immensam Romaque, qualis ipsius aetate fuit, similiorem facit, quo latius pateat spatium huic furori Amatae. — *sine more*, ἀνόσμως. | 378. *sub v.*, Callim. Ep. 1, 9 sq.: „ὕπὸ πλὴγῇσι θεῶς βέμβυξας ἔχοντες ἔστρεπον.“ Herod. 7, 56 „Ἐξέρξης ἐθνεῖτο τὸν στρατὸν ὑπὸ μαστίγων διαβαλόντα.“ | 379. *circ. atria*, per atria huc et illuc. | 381. *inscia*, quid sit, quod ita in gyrum turbo vertatur. — *supra*, designantur pueri turbini intenti seque supra eum inclinantes. | 383. *dant* turbini *animos*, motum concitatorum. | 385 sqq. simulat se Bacchi vi ac potentia correptam id agere, ut filiam orgiis initiet. | 388. *taedas* iugales, v. E. 8, 29. | 390. *Vociferatur* filiam *tibi*, in tuum honorem, *mollis*, pampinis vestitos, *s. th. v. vs. 396.* | 391. *Te lustr. ch.*, choros circum te, tamquam praesentem, ducere. — *pascit* crinem, qui eum non resecat; in sacris Bacchicis coma promissa et soluta habebatur. | 393. *nova tecta*, puta silvas. | 394. *vent. d. c. c.*, Maenadum modo, cf. vs. 403. | 395. Dum aliae tr. ul. aeth. complent, Ipsa (vs. 397) Amata pinum sustinet. | 396. *Pamp. hastas*, v. E. 5, 31. — *pell.*, nebride. | 397. *pinum*, facem pineam. | 398. *canit h.*, v. E. 1, 39. Ceterum aut verum consilium nunc aperit Amata, diversum ab eo, quod ante (vs. 389) simulavit, aut expressa sunt his verbis, ut statuit Servius, signa mentis alienatae; et fictum principio (vs. 385) furorem Bacchicum deinde conversum esse in verum probat vs. 405. | 399. cf. 4, 643. — *torv.*, torva voce, ut „torvo tonitru“ apud Attium. | 402. *si iur. mat. c. rem.*: admonet eas, quid ipsis communicato cum Troianis connubio spe-

- 175 Hae sacris sedes epulis; hic ariete caeso  
 Perpetuis soliti patres considerare mensis.  
 Quin etiam veterum effigies ex ordine avorum  
 Antiqua e cedro, Italusque paterque Sabinus  
 Vitigator, curvam servans sub imagine falcem,  
 180 Saturnusque senex Ianique bifrontis imago,  
 Vestibulo adstabant, alique ab origine reges,  
 Martiaque ob patriam pugnando volnera passi.  
 Multaque praeterea sacris in postibus arma,  
 Captivi pendunt currus, curvaeque secures,  
 185 Et cristae capitum, et portarum ingentia claustra,  
 Spiculaque clipeique ereptaque rostra carinis.  
 Ipse Quirinali lituo parvaeque sedebat  
 Succinctus trabea, laevaue ancile gerebat  
 Picus, equum domitor; quem capta cupidine coniunx  
 190 Aurea percussum virga versumque venenis  
 Fecit avem Circe sparsitque coloribus alas.  
 Tali intus templo divom patriaque Latinus  
 Sede sedens Teucros ad sese in tecta vocavit;  
 Atque haec ingressis placido prior edidit ore:  
 195 Dicite, Dardanidae, neque enim nescimus et urbem  
 Et genus, auditique advertitis aequore cursum,  
 Quid petitis? quae caussa rates, aut cuius egentis  
 Litus ad Ausonium tot per vada caerulea vexit?  
 Sive errore viae, seu tempestatibus acti,  
 200 Qualia multa mari nautae patiuntur in alto,  
 Fluminis intrastis ripas portuque sedetis,  
 Ne fugite hospitium, neve ignorete Latinos  
 Saturni gentem, haud vinclo nec legibus aequam,

*omen e.*, fausti principii loco erat. — *erat*: *h.*, v. E. 1, 39. | 175. *ar. c.*, facto sacrificio. | 176. *Perpet.*, recta linea continuatis. — *consid.*: Antiquitus Romani sedentes epulabantur. | 178. *cedro*: *It.*, v. E. 10, 13. | 179. cum falce vinitoria in basi eius simulcari. | 181. *Vestibulum*, v. 2, 469. — *adstab.*, v. 1, 152. — Verbis *ab origine* videntur reges Aboriginum significari, v. 11, 603 et infra vs. 203. | 182. Alii *Martia qui*. | 183. v. 2, 504. — *sacris*, cf. vs. 142—175. 192. | 184. *securis* agrestium Italorum telum, ab Homero inter belli instrumenta semel commemoratum ἐν τῇ περὶ ναυὸς μάχῃ, cf. Il. 13, 612. 15, 711. | 186. *Spiculaque*, v. E. 4, 51. | 187. *Ipse*, v. 2, 394. — *Quir. lituo*, Ablativus habitum significans, ut 11, 711 „*Ense pedes nudo*”; i. e. instructus lituo, ense. — *lituus*, qui erat augurum, insigne Romuli in deos relati seu Quirini; trabea communis veterum regum ornatus. | 189. *coniunx*, i. q. amans, v. E. 8, 18. | 190. *Aurea*, v. 1, 698. | 191. Picus in avem picum mutatus, Ovid. Met. 14, 820—896. | 196—285. *Placida oratio Latini*. Ad eam respondet *Thioneus*; exponit, quid potentes veniant, traditque munera. Pronittit *Latinus* benigno, quod petitur, ultroque *Aeneas* offert *Laviniam* in matrimonium. *Peracta legatione Troiani muneribus ornati redeunt*. | 196. *auditi*, fama noti. | 203. *h. vinclo n. leg. ae.*, nulla legum aut alia necessitate iustitiam colentem, v. G. 1, 178. — Hi sunt Aborigines illi, de quibus Sall. Cat. c. 6 „genus hominum

- Sponte sua veterisque dei se more tenentem.
- 205 Atque equidem mentini — fama est obscurior anhis —  
 Auruncos ita ferre senes, his ortus ut agris  
 Dardanus Idaeos Phrygiæ penetrarit ad urbes  
 Threiciamque Samon, quæ nunc Samothracia fertur.  
 Hinc illum Corythi Tyrrhena ab sede profectum
- 210 Aurea nunc solio stellantis regia caeli  
 Accipit et numerum divorum altaribus addit.  
 Dixerat; et dicta Ilioneus sic voce secutus:  
 Rex, genus egregium Fauni, nec fluctibus actos  
 Atræ subegit hiemps vestris succedere terris,
- 215 Nec sidus regione viae litusve fefellit;  
 Consilio hanc omnes animisque volentibus urbem  
 Adferimur, pulsî regnis, quæ maxuma quondam  
 Extremo veniens Sol aspiciebat Olympo.  
 Ab Iove principium generis; Iove Dardana pubes
- 220 Gaudet avo; rex ipse Iovis de gente suprema,  
 Troius Aeneas, tua nos ad limina misit.  
 Quanta per Idaeos saevis effusa Mycenis  
 Tempestas ierit campos, quibus actus uterque  
 Europæ atque Asiae fati concurrerit orbis,
- 225 Audiit, et si quem tellus extrema refuso  
 Submovet Oceano, et si quem extenta plagarum  
 Quattuor in medio dirimit plaga Solis iniqui.  
 Diluvio ex illo tot vasta per aequora vecti  
 Dis sedem exiguam patriis litusque rogamus
- 230 Innocuum et cunctis undamque auramque patentem.  
 Non erimus regno indecores, nec vestra feretur  
 Fama levis tantique abolescet gratia facti,  
 Nec Troiam Ausonios gremio excepisse pigebit.  
 Fata per Aeneae iuro dextramque potentem,
- 235 Sive fide seu quis bello est expertus et armis:

agreste, sine legibus, sine imperio, liberum atque solutum.“ 204. *se tenent*;  
 vitam suam moderantem, *vet. dei more*, more a Saturno instituto, cf. Ovid. Met.  
 1, 89 sqq. 206. Auruncis imperasse Latinum intelligitur ex 11, 316—19. 209.  
 v. E. 1, 54. — Corythus, Cortona Etruriae, cf. 3, 170. — *Hinc ab sede Tyrrh.*,  
 v. E. 1, 54. 211. numerum altaribus deorum addit, quia et ipsi altaria insti-  
 tuuntur, ut deo. — *Alii altar. auget.* 215. nullus error nec in observandis sideribus  
 admissus, nec ex ignoratione litorum terrarumque ortus nos alio, quam quo ten-  
 debamus, abduxit; v. 2, 737. 218. *Extr. Ol.*, ab orientali parte caeli. 219.  
 Stemma: Iuppiter, Dardanus, Laomedon, Priamus. 220. v. 10, 350. 225. *refuso*,  
 ἀπορροή, terras ambiente et in se ipsum redeunte. 226. *Oceano* est Ablativus  
 loci: si quem litora Oceani habitantem *cet.*; similiter vs. 140 „duplices Caeoque  
 Ereboque parentes“, qui sunt in Caelo, Erebo; vs. 269. *monstra caelo*, i. e.  
 ostenta de caelo s. a diis missa; *aurum collo* vs. 351, adde 450. *Epiro, Hesperia*  
 3, 503. 8, 419. *flumine*, ad flumen, 8, 610. — *Ceterum* v. E. 10, 13. 227.  
*Iuag: in medio quattuor plagarum*, et cf. G. 1, 233 sqq. 230. *Innoc.*, quod  
 sine molestia et periculo aliorum teneamus. 234 sq. — Cic. Ep. ad Div. 7, 5, 11

- 175 Hae sacris sedes epulis; hic ariete caeso  
 Perpetuis soliti patres considerare mensis.  
 Quin etiam veterum effigies ex ordine avorum  
 Antiqua e cedro, Italusque paterque Sabinus  
 Vitiator, curvam servans sub imagine falcem,  
 180 Saturnusque senex Ianique bifrontis imago,  
 Vestibulo adstabant, aliique ab origine reges,  
 Martiaque ob patriam pugnando volnera regis.  
 Multaque praeterea sacris in postibus arma,  
 Captivi pendunt currus, curvaeque secures,  
 185 Et cristae capitum, et portarum ingentia claustra,  
 Spiculaque clipeique ereptaue rostra carinis.  
 Ipse Quirinali lituo parvaque sedebat  
 Succinctus trabea, laevaque ancile gerebat  
 Picus, equum domitor; quem capta cupidine coniunx  
 190 Aurea percussum virga versumque venenis  
 Fecit avem Circe sparsitque coloribus alas.  
 Tali intus templo divom patriaque Latinus  
 Sede sedens Teucros ad sese in tecta vocavit;  
 Atque haec ingressis placido prior edidit ore:  
 195 Dicite, Dardanidae, neque enim nescimus et urbem  
 Et genus, auditique advertitis aequore cursum,  
 Quid petitis? quae caussa rates, aut cuius egentis  
 Litus ad Ausonium tot per vada caerula vexit?  
 Sive errore viae, seu tempestatibus acti,  
 200 Qualia multa mari nautae patiuntur in alto,  
 Fluminis intrastis ripas portuque sedetis,  
 Ne fugite hospitium, neve ignorete Latinos  
 Saturni gentem, haud vinclo nec legibus aequam,

*omen* e., fausti principii loco erat. — *erát*: h., v. E. 1, 39. | 175. *ar. c.*, facto sacrificio. | 176. *Perpet.*, recta linea continuatis. — *consid.*: Antiquitus Romani sedentes epulabantur. | 178. *cedro*: *It.*, v. E. 10, 13. | 179. cum falce vinitoria in basi eius simulcari. | 181. *Vestibulum*, v. 2, 469. — *adstab.*, v. 1, 152. — Verbis *ab origine* videntur reges Aboriginum significari, v. 11, 603 et infra vs. 203. | 182. Alii *Martia qui*. | 183. v. 2, 504. — *sacris*, cf. vs. 172—173. | 184. *securis* agrestium Italorum telum, ab Homero inter belli instrumenta semel commemoratum *ἐν τῇ περὶ ναυολ μάχῃ*, cf. Il. 13, 612. 15, 711. | 186. *Spiculaque*, v. E. 4, 51. | 187. *Ipse*, v. 2, 394. — *Quir. lituo*, Ablativus habitum significans, ut 11, 711 „*Ense pedes nudo*,” i. e. instructus lituo, ense. — *lituus*, qui erat augurum, insigne Romuli in deos relati seu Quirini; *trabea* communis veterum regum ornatus. | 189. *coniunx*, i. q. amans, v. E. 8, 18. | 190. *Aurea*, v. 1, 698. | 191. *Picus* in avem picum mutatus, Ovid. Met. 14, 820—396. | 195—285. *Placida oratio Latini*. *Ad eam respondet Ilioneus*; exponit, quid petentes veniant, traditque munera. *Promittit Latinus benigne, quod petitur, ultroque Aeneas offert Laviniam in matrimonium. Peracta legatione Troiani muneribus ornati redeunt.* | 196. *auditi*, fama noti. | 203. *h. vinclo n. leg. ae.*, nulla legum aut alia necessitate iustitiam colentem, v. G. 1, 178. — Hi sunt Aborigines illi, de quibus Sall. Cat. c. 6 „genus hominum

- Sponte sua veterisque dei se more tenentem.
- 205 Atque equidem meminini — fama est obscurior annis —  
 Auruncos ita ferre senes, his ortus ut agris  
 Dardanus Idaeos Phrygide penetrarit ad urbes  
 Threiciamque Samon, quae nunc Samoethracia fertur.  
 Hinc illum Corythi Tyrrhena ab sede profectum
- 210 Aurea nunc solio stellantis regia caeli  
 Accipit et numerum divorum altaribus addit.  
 Dixerat; et dicta Ilioneus sic voce secutus:  
 Rex, genus egregium Fauni, nec fluctibus actos  
 Atra subegit hiemps vestris succedere terris,
- 215 Nec sidus regione viae litusve fefellit;  
 Consilio hanc omnes animisque volentibus urbem  
 Adferimur, pulsi regnis, quae maxuma quondam  
 Extremo veniens Sol aspiciebat Olympo.  
 Ab Iove principium generis; Iove Dardana pubes
- 220 Gaudet avo; rex ipse Iovis de gente suprema,  
 Troius Aeneas, tua nos ad limina misit.  
 Quanta per Idaeos saevis effusa Mycenis  
 Tempestas ierit campos, quibus actus uterque  
 Europae atque Asiae fatis concurrerit orbis,
- 225 Audiit, et si quem tellus extrema refuso  
 Submovet Oceano, et si quem extenta plagarum  
 Quattuor in medio dirimit plaga Solis iniqui.  
 Diluvio ex illo tot vasta per aequora vecti  
 Dis sedem exigua patriis litusque rogamus
- 230 Innocuum et cunctis undamque auramque patentem.  
 Non erimus regno indecores, nec vestra feretur  
 Fama levis tantique abolescet gratia facti,  
 Nec Troiam Ausonios gremio excepisse pigebit.  
 Fata per Aeneae iuro dextramque potentem,
- 235 Sive fide seu quis bello est expertus et armis:

agreste, sine legibus, sine imperio, liberum atque solutum.“ | 204. *se tenent*; vitam suam moderantem, *vet. dei more*, more a Saturno instituto, cf. Ovid. Met. 1, 89 sqq. | 206. Auruncis imperasse Latinum intelligitur ex 11, 316—19. | 209. v. E. 1, 54. — Corythus, Cortona Etruriae, cf. 3, 170. — *Hinc ab sede Tyrrh.*, v. E. 1, 54. | 211. numerum altaribus deorum addit, quia et ipsi altaria instituantur, ut deo. — *Alii altar. auget.* | 215. nullus error nec in observandis sideribus admissus, nec ex ignoratione litorum terrarumque ortus nos alio, quam quo tendebamus, abduxit; v. 2, 737. | 218. *Extr. Ol.*, ab orientali parte caeli. | 219. Stemma: Iuppiter, Dardanus, Laomedon, Priamus. | 220. v. 10, 350. | 225. *refuso*, ἀπορροή, terras ambiente et in se ipsum redeunte. | 226. *Oceano* est Ablativus loci: si quem litora Oceani habitantem *cet.*; similiter vs. 140 „duplices Caeloque Ereboque parentes“, qui sunt in Caelo, Erebo; vs. 269. *monstra caelo*, i. e. ostenta de caelo s. a diis missa; *aurum collo* vs. 351, adde 450. *Epiro, Hesperia* 3, 503. 8, 419. *flumine*, ad flumen, 8, 610. — Ceterum v. E. 10, 13. | 227. *Iuuge: in medio quattuor plagarum*, et cf. G. 1, 233 sqq. | 230. *Innoc.*, quod sine molestia et periculo aliorum teneamus. | 234 sq. — Cic. Ep. ad Div. 7, 5, 11

- Adjungi generum miro properabat amore;  
 Sed variis portenta deum terroribus obstant.  
 Laurus erat tecti medio in penetralibus altis,  
 60 Sacra comam, multosque metu servata per annos,  
 Quam pater inventam, primas cum conderet arces,  
 Ipse ferebatur Phoebo sacrasse Latinus,  
 Laurentisque ab ea nomen posuisse colonis.  
 Huius apes summum densae — mirabile dictu —  
 65 Stridore ingenti liquidum trans aethera vectae,  
 Obsedere apicem, et pedibus per mutua nexis  
 Examen subitum ramo frondente pependit.  
 Continuo vates, Externum cernimus, inquit,  
 Adventare virum, et partis petere agmen easdem  
 70 Partibus ex isdem, et summa dominarier arce.  
 Praeterea, castis adolet dum altaria taedis  
 Et iuxta genitorem adstat Lavinia virgo,  
 Visa, nefas, longis comprehendere crinibus ignem,  
 Atque omnem ornatum flamma crepitante cremari,  
 75 Regalisque accensa comas, accensa coronam,  
 Insignem gemmis; tum fumida lumine fulvo  
 Involvi ac totis Volcanum spargere tectis.  
 Id vero horrendum ac visu mirabile ferri:  
 Namque fore inlustrem fama fatisque canebant  
 80 Ipsam, sed populo magnum portendere bellum.  
 At rex sollicitus monstris oracula Fauni,  
 Fatidici genitoris, adit, lucosque sub alta  
 Consulit Albunea, nemorum quae maxuma sacro  
 Fonte sonat, saevamque exhalat opaca mephitim.  
 85 Hinc Italiae gentes omnisque Oenotria tellus  
 In dubiis responsa petunt; huc dona sacerdos  
 Cum tulit et caesarum ovium sub nocte silenti

Oceanus, et v. 6, 844. — *reg. c.*, Amata coniux Latini. | 57. *proper.*, valde studebat, ut vs. 264. | 59. *tecti med.*, v. 4, 494 et cf. Tibull. 3, 3, 15. — *penetr. altis*, quae alta parietibus inclusa sunt. | 60. *Sacra c.*, ergo intactis frondibus. | 61. *pr. c. c. a.*, cum primum arcem (Laurentum) conderet, v. G. 3, 130. | 63. *Laurentis Accusatus*. Plur., v. G. 1, 137. — *et ab ea*, et a qua; Cic. Orat. 3 „species pulchritudinis eximia quaedam, quam intuens in eaque defixus“ *cet.* | 64. *subitum*, id quod, maxime in re mira, repente ac praeter expectationem accidit. — Uva ab apibus facta dirum ostentum existimatur, Plin. N. H. 11, 18, 55, similiterque examen apum in foro visum hostium adventum portendit ap. Liv. 24, 10. | 69. *part. easdem*, urbem ac regiam Latini. | 70. *Part. ex isd.*, a partibus maris inferi. | 71. *cast. taed.* Plin. N. H. 16, 19, 44 „taeda, flammis ac lumini sacrorum grata.“ — *adolet* genitor, Latinus. | 74. *ornatum capitis*; et v. 1, 713. | 75. v. E. 4, 6. | 77. *tectis*, v. 2, 512. | 78. v. G. 2, 441. | 83 sq. *Albunea* silva cum fonte aquae sulfureae hodie *Acqua solforata d' Altieri* dicto, huic silvae in montibus sitae, *altae*, subiacebat lucus iste Fauno sacer; cf. 8, 599. — *opaca*, quae opacat, ut 6, 673 „lucis habitamus opacis;“ nec praeter rationem adiectum esse hoc epitheton docet Servius „mephitis ... de aquis nascitur

- Pellibus incubuit stratis somnosque petivit,  
 Multa modis simulacra videt volitantia miris,  
 90 Et varias audit voces, fruiturque deorum  
 Conloquio, atque imis Acheronta adfatur Avernis.  
 • Hic et tum pater ipse petens responsa Latinus  
 Centum lanigeras mactabat rite bidentis,  
 Atque harum effultus tergo stratisque iacebat  
 95 Velleribus: subita ex alto vox reddita luco est:  
 Ne pete connubiis natam sociare Latinis,  
 O mea progenies, thalamis neu crede paratis;  
 Externi venient generi, qui sanguine nostrum  
 Nomen in astra ferant, quorumque ab stirpe nepotes  
 100 Omnia sub pedibus, qua Sol utrumque recurrens  
 Aspicit Oceanum, vertique regique videbunt.  
 Haec responsa patris Fauni monitusque silenti  
 Nocte datos non ipse suo premit ore Latinus,  
 Sed circum late volitans iam Fama per urbes  
 105 Ausonias tulerat, cum Laomedontia pubes  
 Gramineo ripae religavit ab aggere classem.  
 Aeneas primique duces et pulcher Iulus  
 Corpora sub ramis deponunt arboris altae,  
 Instituuntque dapes, et adorea liba per herbam  
 110 Subiiciunt epulis, — sic Iuppiter ille monebat —  
 Et Cereale solum pomis agrestibus augent.  
 Consumptis hic forte aliis, ut vertere morsus  
 Exiguam in Cererem penuria adegit edendi  
 Et violare manu malisque audacibus orbem

sulphuratis et est in nemoribus gravior ex densitate silvarum.“| 88. *incubuit*, unde incubatio, *ἐνχολῦσις*, dicta est haec ratio petendi oracula.| 91. *Acher.*, deos inferos et Manes. — *Avernis*, v. 6, 126.| 95. v. 3, 40.| 97. *paratis*, cf. vs. 56 sq.| 98. *generi*, aliquis gener futurus, v. 6, 322. — *Alii veniunt.*| 99. *quor. ab st. n.*, et qui ab horum stirpe nascentur nepotes.| 100. *sub ped.*, sumtum hoc ab illa imagine, quae victores cervicibus victi pedem imponentes repraesentat, cf. G. 2, 492. Ovid. Trist. 3, 12, 48. — *recurrens* ad quotidianum iter faciendum, ergo et oriens et occidens.| 101. *verti*, Cic. Act. Verr. 1, 7 „Omnia in unius potestate ac moderatione *vertentur*.“ Ceterum cf. vs. 258.| 103 sq. *non — Sed*: adversative elocutus est poeta, quod copulative dici solet: nec Latinus premit, et Fama iam tulerat.|| 107—147. *Comensarum mensarum ostentum docet Troianos venire ad sedem sibi destinatam.*| 110. *ille*, hoc Pronomine admonemur rei praeteritae: pertinebat ista res ad illud, quod Iuppiter olim, ut meminimus, monebat sive futurum esse praedixerat per Harpyiam 3, 255—257. Terent. Phorm. 2, 1, 32 „Lenem patrem *illum* factum me esse acerrimum.“ Atque in iis comparationibus, quae referuntur ad quandam rerum praeteritarum memoriam, ut adverbio *olim* utitur poeta, 8, 391. G. 4, 433, ita, sed cum quadam vi monstrandi, pronomine *ille* 10, 707. 11, 809.| 111. *aug.*, cumulant, tamquam mensas.| 114. Totum hoc habet comicum quiddam, id quod ipse poeta indicat per verbum *alludens* vs. 117, et, tamquam sacrilegium commissam esset, gravibus utitur et in ea re propriis verbis *violare* et *audac* (Tibull. 3, 5, 8); mensae autem sacrae habitae a veteribus; Donatus fere sic

- Troia viros? medias actes mediosque per ignis  
 Invenere viam. At, credo, mea numina, tandem  
 Fessa iacent, odiis aut exsaturata quievi —  
 Quin etiam patria excussos infesta per undas  
 300 Ausa sequi, et profugis toto me opponere ponto.  
 Absumptae in Teucros vires caelique marisque.  
 Quid syrtes aut Scylla mihi, quid vasta Charybdis  
 Profuit? optato conduntur Thybridis alveo,  
 Securi pelagi atque mei. Mars perdere gentem  
 305 Inmanem Lapithum valuit; concessit in iras  
 Ipse deum antiquam genitor Calydonia Dianae;  
 Quod scelus aut Lapithas tantum, aut Calydonia merentem?  
 Ast ego, magna Iovis coniunx, nil linquere inausum  
 Quae potui infelix, quae inemet in omnia verti,  
 310 Vincor ab Aenea. Quod si mea numina non sunt  
 Magna satis, dubitem haud equidem inplorare quod usquam est.  
 Flectere si nequeo Superos, Acheronta movebo.  
 Non dabitur regnis, esto, prohibere Latiniis,  
 Atque inmota manet fatis Lavinia coniunx:  
 315 At trahere, atque moras tantis licet addere rebus;  
 At licet amborum populos excindere regum.  
 Hac gener atque socer coeant mercede suorum.  
 Sanguine Troiano et Rutulo dotabere, virgo,  
 Et Bellona manet te pronuba. Nec face tantum  
 320 Cisseis praegnans ignis enixa iugalis;  
 Quin idem Veneri partus suus et Paris alter,  
 Funestaeque iterum recidiva in Pergama taedae.  
 Haec ubi dicta dedit, terras horrenda petivit;

maxime pertinentia. | 296. v. 1, 544. | 297. Pluralis *numina* ubi non ad plures deos, sed ad unum pertinet, significat aut variis rebus comprobata, aut, ut hic et vs. 310, imprimis magnam et insignem eius dei potentiam. | 299. Non est ita, sed ausa sum etiam *cel.* | 302. *syrtes*, cf. 1, 111. | 304. Servius „Pirithous Lapitharum rex cum uxorem deduceret, vicinos populos Centauros, etiam sibi cognatos, et deos omnes excepto Marte ad convivium convocavit. Unde iratum numen immisit furorem, quo Centauri et Lapithae in bella venerunt.“ | 305. v. 2, 242. — *conc. in iras*, conc. ulciscendam. | 306. cf. Hom. Il. 9, 529 sqq. Ovid. Met. 8, 270 sqq. — *antiquam*, Plin. Ep. 8, 24 „reverere gloriam veterem et hanc ipsam senectutem, quae in homine venerabilis, in urbibus sacra est.“ | 307. *scelus merere*, scelus in se admittere; Terent. 5, 8, 25 „esse in hac re culpam meritam non nego.“ | 309. *potui*, sustinui, v. G. 3, 458. — *me in omnia verti*, omnes quasi personas nocendique partes suscepi ad istos perdendos. | 314. *im. man. fat. L. con.*, immutabili fato decreta Aeneae est coniux Lav.; proprie ipsa fata dicuntur immota, ut 1, 257. | 317. *coeant*, foedere et matrimonio Aeneae et Laviniae coniungantur. | 319. cf. 4, 166. — *face praegnans*, cf. Ovid. Heroid. 16, 43—49. Cic. de Divin. 1, 21. | 320 sqq. *Cisseis*, v. 5, 537. — Non sola Hecuba enixa est ignis iugales, i. e. peperit in matrimonio filium, qui incendium Asiae erat futurus (Ovid. l. l. vs. 49), sed etiam Veneri filius suus similis (*idem*) erit ignis alterque Paris, fax funesta reuascanti patriae, cf.



- 145 Advenisse diem; quo debita moenia condant.  
 Certatim instaurant epulas, atque omine magno  
 Crateras laeti statuunt et vina coronant.  
 Postera cum prima lustrabat lampade terras  
 Orta dies, urbem et finis et litora gentis
- 150 Diversi explorant; haec fontis stagna Numici,  
 Hunc Thybrim fluvium, hic fortis habitare Latinos.  
 Tum satus Anchisa delectos ordine ab omni  
 Centum oratores augusta ad moenia regis  
 Ire iubet, ramis velatos Palladis omnis,
- 155 Donaue ferre viro, pacemque exposcere Teucris.  
 Haud mora, festinant iussi rapidisque feruntur  
 Passibus. Ipse humili designat moenia fossa,  
 Moliturque locum, primasque in litore sedes  
 Castrorum in morem pinnis atque aggere cingit.
- 160 Iamque iter emensi turris ac tecta Latinorum  
 Ardua cernebant iuvenes, muroque subibant.  
 Ante urbem pueri et primaevae flore iuventus  
 Exercentur equis, domitantque in pulvere currus,  
 Aut acris tendunt arcus, aut lenta lacertis
- 165 Spicula contorquent, cursuque ictuque lacescunt:  
 Cum praevectus equo longaevi regis ad auras  
 Nuntius ingentis ignota in veste reportat  
 Advenisse viros. Ille intra tecta vocari  
 Imperat, et solio medius consedit avito.
- 170 Tectum augustum, ingens, centum sublime columnis,  
 Urbe fuit summa, Laurentis regia Pici,  
 Horrendum silvis et religione parentum.  
 Hic sceptrum accipere et primos attollere fasces  
 Regibus omen erat; hoc illis curia templum,

augurium; Hom. Od. 20, 103 sq. — *clarus*, serenus, i. e. caelo sereno. | 145. *debita*, cf. v. 120. | 146. *instaurare epulas* est rarsus epulari rei sacrae causa, v. 4, 63. — *omine*, cf. vs. 141. | 147. *v. cor.*, v. G. 2, 528. || 148—194. *Explorantur vicina. Mittuntur centum legati ad regem Latinum. Regia Pici.* | 148. v. G. 3, 130. | 149. *urbem*, Laurentum. | 150. *div.*, cf. vs. 132. — Numicius rivulus ex stagno profluens. | 151. *habitare* sc. resciscunt, v. vs. 256. 503. | 152. *ord. ab o.* Servius „ex omni qualitate dignitatum, quod apud Romanos in legatione mittenda hodieque servatur.“ | 154. *ramis velatos*, ramos vittatos manibus gerentes, cf. vs. 237. 8, 116. 128. 11, 101. 332. — *Pall.*, cf. G. 1, 18. | 157. *fossa*, proprie sulco, v. 1, 425 et 5, 755. | 158. *Mol. loc.*, aedificia in eo extruit, cf. vs. 290. — *primas*: primum quidem, quod condidit Aeneas, oppidum Troia appellatum; deinde Lavinium est ab eodem conditum; cf. Liv. 1, 1. | 160. *Iamque* ... *Cum*, v. 5, 762. — Alii *Latini*. | 164. *lenta*, ex lenta (id est h. l. difficili ad flectendum, dura firmaque) materie facta, qualis est corni, myrti, cf. 9, 698. G. 2, 447 sq. | 165. *que* ... *que*, v. 1, 701. — *laccess.*, ad certandum provocant. — *ictu*, iaculatione. | 167. *in v.*, v. 5, 179. — *rep.*, v. 3, 717. | 169. *medius*, sive i. q. *aulae medio* 3, 354. sive medius inter adstantes assidentesve amicos, ut 11, 237. | 171. *Urbe summa*, ἐν τῇ ἀκροπόλει. | 173. *fasces* praefereandos novo regi. | 174.

- Coniicit inque sinum praecordia ad intima subdit,  
 Quo furibunda domum monstro permisceat omnem.  
 Ille, inter vestes et levia pectora lapsus,  
 350 Volvitur affectu nullo, fallitque furentem  
 Vipeream inspirans animam; fit tortile collo  
 Aurum ingens coluber, fit longae taenia vittae,  
 Innectitque comas, et membris lubricus errat.  
 Ac dum prima lues udo sublapsa veneno  
 355 Pertemptat sensus atque ossibus implicat agnem  
 Necdum animus toto percepit pectore flammam,  
 Mollius, et solito matrum de more, locuta est,  
 Multa super natae lacrimans Phrygiisque hymenaeis:  
 Exsulisne datur ducenda Lavinia Teucris,  
 360 O genitor? nec te miseret gnataeque tuique?  
 Nec matris miseret, quam primo aquilone relinquet  
 Perfidus, alta petens abducta virgine praedo?  
 An non sic Phrygius penetrat Lacedaemona pastor  
 Ledaeamque Helenam Troianas vexit ad urbes?  
 365 Quid tua sancta fides? quid cura antiqua tuorum  
 Et consanguineo totiens data dextera Turno?  
 Si gener externa petitur de gente Latinis,  
 Idque sedet, Faunisque premunt te iussa parentis,  
 Omnem equidem sceptris terram quae libera nostris  
 370 Dissidet, externam reor, et sic dicere divos.  
 Et Turno, si prima domus repetatur origo,  
 Inachus Acrisiusque patres mediaeque Mycenae.  
 His ubi nequiquam dictis experta Latinum  
 Contra stare videt, penitusque in viscera lapsum  
 375 Serpentis furiale malum, totamque pererrat,

347. in sinum, cui respondet, quod vs. 349 legitur, *inter vestes et pectora*; et ita labitur ad praecordia, „loca cordi vicina, ut ait Servius, quibus percipitur sensus.“ | 350 sq. *fall. f. Vip. insp. an.*, i. e. clam inspirat furenti animam *vip.*, *ἐλαθεν αὐτὴν πνεῦμα ὀφιόνεον εἰσπνέων*, Eurip. Heracl. 339 „μὴ λάθῃ με προσπνέων.“ Horat. Ep. 1, 17, 10 „Nec vixit male, qui *natus moriensque fefellit*.“ | 351. vs. 753 „graviter spirantibus hydrys.“ — *collo*, v. vs. 226. | 352. „*taenia* est vittarum extremitas“ Servius. — *vittae*, v. vs. 403. | 354. *prima ... veneno*, pestis primo furtim se in corpus insinuas udo veneno, i. e. udo halitu venenatae viperae. | 355. v. 1, 660. | 359. v. E. 3, 7. | 361. *primo*, ubi primum flare aquilo (ventus ab Italia solventibus Veniliae, sororis Amatae. | 363. Alii *At non sic*: quasi non simili modo Spartam venerit Paris; et *at* particula apta est ironiae, sarcasmo et irrisioni. — Per Praesens, *penetrat*, res praeterita ita in memoriam revocatur, ut quasi nunc geri fierique videatur. | 365. *Quid tua fides?* nulla iam est. | 366. *consangu.*, est enim filius Veniliae, sororis Amatae. | 367. *Latinis*, ut 11, 472 „generamque adsciverit urbi“, nempe ut consortem imperii, et cf. supra vs. 255—57. | 368. *premunt*, urgent. | 372. cf. vs. 409—411 et v. vs. 56. Argivi reges, ex quibus unus erat Acrisius, pater Danaes, genus ducebant ab Inacho. — *mediae M.*, ergo ex media (cui nihil cum Italia commune) Argolide repetit Turnus originem; Mycenae et

- Tum vero infelix, ingentibus excita monst̄is,  
 Immensam sine more furit lymphata per urbem:  
 Ceu quondam t̄orto volitans sub verberē turbo,  
 Quem pueri magno in gyro vacua atria circum  
 380 Intenti ludo exercent; ille actus habena  
 Curvatis fertur spat̄iis; stupet inscia supra  
 Inpubesque manus, mirata volabile buxum;  
 Dant animos plagae. Non cursu segnior illo  
 Per medias urbes agitur populosque ferocis.  
 385 Quin etiam in silvas, simulato numine Bacchi,  
 Maius adorta nefas maioremque orsa furorem,  
 Evolat, et natam frondosis montibus abdit,  
 Quo thalamum eripiat Teucris taedasque moretur,  
 Euoe Bacche, fremens, solum te virgine dignum  
 390 Vociferans: etenim mollis tibi sumere thyrsos,  
 Te lustrare choro, sacrum tibi pascere crinem.  
 Fama volat, furiisque accensas pectore matres  
 Idem omnis simul ardor agit, nova quaerere tecta;  
 Deseruere domos, ventis dant colla comasque.  
 395 Ast aliae tremulis ululatibus aethera complent,  
 Pampineasque gerunt incinctae pellibus hastas;  
 Ipsa inter medias flagrantem fervida pinum  
 Sustinet, ac natae Turnique canit hymenaeos,  
 Sanguineam torquens aciem, torvumque repente  
 400 Clamat: Io matres, audite, ubi quaeque, Latinae:  
 Si qua piis animis manet infelicitis Amatae  
 Gratia, si iuris materni cura remordet,

Argi saepe a poetis confunduntur, utraque urbs Argolidis. | 376. *monstra* h. l. sunt terrores et phantasmata animo Amatae obiecta. | 377. *Immensam*, modestius *totam* dixit 4, 300; fingit scilicet immensam Romaeque, qualis ipsius aetate fuit, similiorem facit, quo latius pateat spatium huic furori Amatae. — *sine more*, ἀνόσμως. | 378. *sub v.*, Callim. Ep. 1, 9 sq.: „ὕπὸ πλὴγῇσι θεῶς βέμβυξας ἔχοντες ἔστρεπον.“ Herod. 7, 56 „Ἐξέρξης ἐθνεῖτο τὸν στρατὸν ὑπὸ μαστίγων διαβαλόντα.“ | 379. *circ. atria*, per atria huc et illuc. | 381. *inscia*, quid sit, quod ita in gyrum turbo vertatur. — *supra*, designantur pueri turbini intenti seque supra eum inclinantes. | 383. *dant* turbini *animos*, motum concitatiorem. | 385 sqq. simulat se Bacchi vi ac potentia correptam id agere, ut filiam orgiis initiet. | 388. *taedas* iugales, v. E. 8, 29. | 390. *Vociferatur* filiam *tibi*, in tuum honorem, *mollis*, pampinis vestitos, *s. th. v. vs. 396.* | 391. *Te lustr. ch.*, choros circum te, tamquam praesentem, ducere. — *pascit* crinem, qui eum non resecat; in sacris Bacchicis coma promissa et soluta habebatur. | 393. *nova tecta*, puta silvas. | 394. *vent. d. c. c.*, Maenadum modo, cf. vs. 403. | 395. *Dum aliae tr. ul. aeth. complent*, Ipsa (vs. 397) Amata pinum sustinet. | 396. *Pamp. hastas*, v. E. 5, 31. — *pell.*, nebride. | 397. *pinum*, facem pineam. | 398. *canit h.*, v. E. 1, 39. Ceterum aut verum consilium nunc aperit Amata, diversum ab eo, quod ante (vs. 389) simulavit, aut expressa sunt his verbis, ut statuit Servius, signa mentis alienatae; et fictum principio (vs. 385) furorem Bacchicum deinde conversum esse in verum probat vs. 405. | 399. cf. cf. 4, 643. — *torv.*, torva voce, ut „torvo tonitru“ apud Attium. | 402. *si iur. mat. c. rem.*: admonet eas, quid ipsis communicato cum Troianis connubio spe-

- Solvite crinalis vittas, capite orgia mecum.  
 Talem inter silvas, inter deserta ferarum,  
 405 Reginam Allecto stimulis agit undique Bacchi.  
 Postquam visa satis primos acuisse furores,  
 Consiliumque omnemque domum vertisse Latini,  
 Protinus hinc fuscis tristis dea tollitur alis  
 Audacis Rutuli ad muros, quam dicitur urbem  
 410 Acrisioneis Danae fundasse colonis,  
 Praecipiti delata Noto. Locus Ardea quondam  
 Dictus avis; et nunc magnum tenet Ardea nomen;  
 Sed fortuna fuit. Tectis hic Turnus in altis  
 Iam mediam nigra carpebat nocte quietem.  
 415 Allecto torvam faciem et furialia membra  
 Exiit; in voltus sese transformat anilis  
 Et frontem obscenam rugis arat; induit albos  
 Cum vitta crinis; tum ramum innectit olivae;  
 Fit Calybe Iunonis anus templique sacerdos;  
 420 Et iuveni ante oculos his se cum vocibus offert:  
 Turne, tot incassum fusos patiēre labores,  
 Et tua Dardaniis transcribi scepra colonis?  
 Rex tibi coniugium et quaesitas sanguine dotes  
 Abnegat, externusque in regnum quaeritur heres.  
 425 I nunc, ingratis offer te, 'inrise, perichis;  
 Tyrrhenas, i, sterne acies; tege pace Latinos.  
 Haec adeo tibi me, placida cum nocte iaceres,  
 Ipsa palam fari omnipotens Saturnia iussit.  
 Quare age et armari pubem portisque moveri  
 430 Laetus in arma iube, et Phrygios, qui flumine pulchro  
 Consedere, duces pictasque exure carinas.  
 Caelestum vis magna iubet. Rex ipse Latinus,  
 Ni dare coniugium et dicto parere fatetur,  
 Sentiat et tandem Turnum experiatur in armis.

randum sit; v. vs. 334.] 403. Vittā ornamentum matronale et insigne muliebris pudoris.] 404. Talem, v. 4, 494.] 405. undique explicant „ex alio loco in alium;“ nescio an verius interpreteris „ab omni parte animi ab ea obsessi,“ quo ducit illud *totamque pererrat* vs. 375; planius dixeris: stimulis ad omnem partem animi admotis.]] 406—474. *Ardeam delata Allecto Turni animum perturbat et ad bellum inflammat.*] 406. *primos* respondet voci *principio* vs. 342 et simplex sententia horum verborum haec est: Contenta hoc principio se confort Ardeam.] 410. v. vs. 372.] 412. *tenet*, alii *manet*.] 413. *fuit*, cf. 2, 325. Ardea olim florens opibus (Liv. 1, 57) Virgillii aetate solo aequata erat.] 418. *ram. inn. ol.*, tamquam sacerdos, v. G. 3, 21.] 419. *anus sacerdos.*, ut *cerva anus* Ovid. A. A. 1, 766; *anus testa* apud Martial. 1, 106, 4. — *Iunonis templique*, v. 2, 319.] 423. *sanguine*, ergo bella gesserat pro Latino, quod comprobant vs. 425 sq. — *dotes*, cf. 11, 369.] 425. *ingratis*, quorum nulla est gratia sive merces.] 427. *H. adeo*, v. 4, 533.] 430. *L. in arma*, in pugnam.] 431. *exure naves cum vectoribus*, v. vs. 237. — *pict.*, v. 5, 663.] 432. *Caes. vis m.*, magnum aliquod numen, Iuno.] 433. *dicto par. fat.*, promissis satisfacere se velle profitetur, cf. vs. 366.] 434. Valer. Fl. 4, 745 „Nos quoque, nos

- 435   Hic iuvenis, vatem iridens, sic orsa vicissim  
 Ore refert: Classis invectas Thybridis undam  
 Non, ut røre, meas effugit nuntius auris;  
 Ne tantos mihi finge metus; nec regia Iuno  
 Inmemor est nostri;
- 440 Sed te victa situ verique effeta senectus,  
 O mater, curis nequiquam exercet et arma  
 Regum inter falsa vatem formidine ludit.  
 Cura tibi, divom effigies et templa tueri,  
 Bella viri pacemque gerant, quis bella gerenda.
- 445   Talibus Allecto dictis exarsit in iras.  
 At iuveni oranti subitus tremor occupat artus;  
 Deriguerunt oculi: tot Erinys sibilat hydrys,  
 Tantaque se facies aperit; tum flammea torquens  
 Lumina cunctantem et quaerentem dicere plura
- 450 Reppulit, et geminos erexit crinibus anguis,  
 Verberaque insonuit, rabidoque haec addidit ore:  
 En ego victa situ, quam veri effeta senectus  
 Arma inter regum falsa formidine ludit;  
 Respice ad haec: adsum dirarum ab sede sororum;
- 455 Bella manu letumque gero.  
 Sic effata facem iuveni coniecit et atro  
 Lumine fumantis fixit sub pectore taedas.  
 Olli somnum ingens rumpit pavor, ossaque et artus  
 Perfudit toto proruptus corpore sudor.
- 460 Arma amens fremit, arma toro tectisque requirit;  
 Saevit amor ferri et scelerata insania belli,  
 Ira super: magno veluti cum flamma sonore

Amycum ... *Sensimus*. — in *arm.*, v. 5, 440. | 435 sq. *orsa* verba, oratio; *sic orsa refert*, tali oratione respondet. | 436. Alii *Thybr. alveo*, cf. 8, 714 sq. | 436—440. Hoc dicit Turnus „Novi, quod narras de classe Tiberim ingressa; non est ea res tam terribilis, quam tu fingis. Illud etiam scio, me Iunoni, cuius te nuntiam esse iactas, curae esse; sed“ *cf.* | 440. *situs* proprie significat squalorem ex diuturno neglectu contractum; inde transfertur ad vitia animi sive desidia sive diuturnitate vitae obtusi, in quibus est vana quaedam sollicitudo. — *effeta est* proprie, quae peperit, tum quae vires pariendo amisit; quare maxime vetulae dicuntur effetae; *veri effeta*, quae senectutis vitio vim veri videndi amisit; et cf. 10, 630. | 441. Iunge *inter arma regum*; ergo in rebus, quae regibus curandae sunt, non tibi. | 444. v. 1, 426. Sallust. lug. 46 „*pacem an bellum gerens* perniciosior esset.“ — Alii *gerent*. — Ceterum cf. Hom. II. 5, 428—30. 6, 490—93. | 446. *oranti*, loquenti. | 447. *tot*, v. E. 1, 12. | 450. *crinibus*, in fronte, v. vs. 226. — Furiae in multis antiquae artis operibus ita effetae visuntur, ut capillum anguineum serpentibus, tamquam vitta, in fronte in nodum collectis habeant redimitum; ex eo nodo prominent bini vel plures serpentes; tales sunt, quos hic erigit Allecto; cf. Lucan. 9, 634. | 451. *V. inson.*, fecit flagellum resonare, increpuit flagello; cf. 6, 570. | 454. *Resp.*, v. 2, 615. | 456. *facem*, cf. 6, 607; existimanda igitur Allecto una manu flagellum, altera facem gessisse. — *iuveni*, v. vs. 346. — *atro*, v. 6, 593. | 459. v. G. 3, 272. | 460. *toro*, cf. 6, 524. | 461. *ins.*, insana cupiditas. | 462. *super*, sive Praepositio est, sive Adver-

- Virgea suggeritur costis undantis aeni  
 Exsultantque aestu latices; furit intus aquai  
 465 Fumidus atque alte spumis exuberat amnis;  
 Nec iam se capit unda; volat vapor ater ad auras.  
 Ergo iter ad regem polluta pace Latinum  
 Indicit primis iuvenum et iubet arma parari,  
 Tutari Italiam, detrudere finibus hostem;  
 470 Se satis ambobus Teucrisque venire Latinisque.  
 Haec ubi dicta dedit divosque in vota vocavit,  
 Certatim sese Rutuli exhortantur in armâ.  
 Hunc decus egregium formae movet atque iuventae,  
 Hunc atavi reges, hunc claris dextera factis.  
 475 Dum Turnus Rutulos animis audacibus inplet,  
 Allecto in Teucros Stygiis se concitat alis.  
 Arte nova speculata locum, quo litore pulcher  
 Insidiis cursuque feras agitabat Iulus,  
 Hic subitam canibus rabiem Cocytia virgo  
 480 Obiicit et noto naris contingit odore,  
 Ut cervum ardentes agerent; quae prima laborum  
 Causa fuit belloque animos accendit agrestis.  
 Cervus erat forma praestanti et cornibus ingens,  
 Tyrrhidae pueri quem matris ab ubere raptum  
 485 Nutribant Tyrrhusque pater, cui regia parent  
 Armenta et late custodia credita campi.  
 Adsuetum inperiis soror omni Silvia cura  
 Mollibus intexens ornabat cornua sertis,  
 Pectebatque ferum puroque in fonte lavabat.  
 490 Ille manum patiens mensaeque adsuetus herili

bium, interdum refertur ad insignem aliquam accessionem, ut infra vs. 808. 1, 29. 8, 308. 9, 283. 11, 226. Ad insanum istum belli amorem Turno iniectum accedebat etiam maius irritamentum, summa ira ex amissione operati coniugii nata. — Cum comparatione, quae sequitur, cf. Hom. II. 21, 362 sqq. | 463. *Virgea flamma, stuppea* 8, 694, *pineus ardor* 11, 786, ut *lux aena* 2, 470, *viridis et saxea umbra* E. 9, 20 et G. 3, 145. *ater odor* 12, 591. | 465. *amnis*, ut 12, 417. | 467. v. 5, 6. | 470. Se satis valere unum adversus utrosque, cf. 8, 447 sq. Silius It. 7, 63 „Quod (quantum) tibi sit Libyaeque satis, certaverit unus.“ et v. 4, 629. | 471. v. 5, 234. | 472 sqq. Rutuli se acuunt ad bellum, alii pulchritudine Turni, alii nobilitate eius aut virtutis fama ducti. || 475—571. *Inde Troianos petit Allecto obiicitque Ascânio venanti cervum mansuetum, delicias Tyrrhi, regii armentarii, eiusque liberorum. Quo confixo concurrunt agrestes undique impetumque in Troianos faciunt. Ita conflato bello, caesis in pugna Almone, filio Tyrrhi natu maximo, ac sene Galäeso, homine divitiis iustitiisque inter populares suos florente, redit Allecto iubente Iunone eo, unde excita erat.* | 477. *Arte nova speculata est locum ... et rabiem canibus obiicit.* Itaque explicatius hoc sic dices: Utitur illa alia fraude; speculatur enim locum cet. et rabiem canibus obiicit. | 478. *Insidiis*, cf. G. 3, 371 sq. | 481 sq. Hom. II. 22, 116 „ἦτ' ἐπλετο νεκρεὸς ἀρχή.“ | 482. *agr.*, cf. vs. 504. | 484. *Tyrrhidae*, v. 2, 82. | 485. c. r. parent A., pastori armentorum reg., v. E. 8, 45. | 490. *manum*, i. e. manuum, v. 6, 653. |

- Errabat silvis rursusque ad limina nota  
 Ipse domum sera quamvis se nocte ferebat.  
 Hunc procul errantem rabidae venantis Iuli  
 Commovere canes, fluvio cum forte secundo  
 495 Deflueret ripaque aestus viridante levaret.  
 Ipse etiam, eximiae laudis succensus amore,  
 Ascanius curvo direxit spicula cornu;  
 Nec dextrae erranti deus afuit, actaque multo  
 Perque uterum sonitu perque ilia venit arundo.  
 500 Saucius at quadrupes nota intra tecta refugit,  
 Successitque gemens stabulis, questuque cruentus  
 Atque inploranti similis tectum omne replebat.  
 Silvia prima soror, palmis percussa lacertos,  
 Auxilium vocat et duros conclamat agrestis.  
 505 Olli, pestis enim tacitis latet aspera silvis,  
 Improvisi adsunt, hic torre armatus obusto,  
 Stipitis hic gravidi nodis; quod cuique repertum  
 Rimanti, telum ira facit. Vocat agmina Tyrrhus,  
 Quadrifidam quercum cuneis ut forte coactis  
 510 Scindebat, rapta spirans inmane securi.  
 At saeva e speculis tempus dea nacta nocendi  
 Ardua tecta petit stabuli et de culmine summo  
 Pastorale canit signum, cornuque recurvo  
 Tartaream incendit vocem, qua protinus omne  
 515 Contremuit nemus et silvae insonuere profundae;  
 Audiit et Triviae longe lacus, audiit annis  
 Sulfurea Nar albus aqua fontesque Velini,  
 Et trepidae matres pressere ad pectora natos.  
 Tum vero ad vocem celeres, qua bucina signum  
 520 Dira dedit, raptis concurrunt undique telis  
 Indomiti agricolae; nec non et Troia pubes  
 Ascanio auxilium castris effundit apertis.  
 Direxere acies. Non iam certamine agresti,  
 Stipitibus duris agitur sudibusve praeustis,  
 525 Sed ferro ancipiti decernunt, atraque late

492. *Ipse*, v. E. 4, 21.] 495. Cervus dum defuit, aestum levabat ut ipsius aquae frigore, ita umbrâ, qua ripa viridans fluvium obumbrabat.] 496. *Ipse etiam*: Non solum canes cum cervum excitarunt, sed *ipse etiam* Ascanius sagittâ petiit.] 498. *erranti*, i. e. inconstantem fugientis cervi cursum sequenti. — *deus*, Allecto, ait Servius; potius *θεῖα τις τύχη*. *θεός*, deus, *la divinité*, vis quaedam divina regens ea, quae non ad certum aliquem deum referuntur, cf. 11, 118.] 503. *prima*, cf. vs. 508 et 513.] 505. *pestis*, Allecto, quae istos stimulat.] 506 sq. cf. vs. 524. — *Improvisi*, Troianis, multi contra paucos.] 508. cf. 1, 150.] 509. *coactis*, adactis.] 512. *arduum stabulum* h. l. est tugurium pastoris ex more in altum apicem fastigatum.] 513. *cornu r.*, cf. vs. 519.] 516. *Triv. l.*, lacus Aricius cum nemore et templo Dianae, nunc *lago di Nemi*. — Ceterum v. E. 4, 6.] 517. *albus*, quippe sulfure infectus. — *f. Vel.*, fluvius Velinus cum lacu cognomini.] 519. *ad. v.*, simulatque audita vox est, ut 3, 669.] 525. *ferro*

- Horrescit strictis seges ensibus, aeraque fulgent  
 Sole lacessita et lucem sub nubila iactant:  
 Fluctus uti primo coepit cum albescere vento,  
 Paulatim sese tollit mare et altius undas  
 530 Erigit, inde imo consurgit ad aethera fundo.  
 Hic iuvenis primam ante aciem stridente sagitta,  
 Natorum Tyrrhi fuerat qui maxumus, Almo,  
 Sternitur; haesit enim sub gutture vulnus et udae  
 Vocis iter tenuemque inclusit sanguine vitam.  
 535 Corpora multa virum circa, seniorque Galaesus,  
 Dum paci medium se offert, iustissimus unus  
 Qui fuit Ausoniisque olim ditissimus arvis:  
 Quinque greges illi balantum, quina redibant  
 Armenta, et terram centum vertebat aratris.  
 540 Atque ea per campos aequo dum Marte geruntur,  
 Promissi dea facta potens, ubi sanguine bellum  
 Imbuit et primae commisit funera pugnae,  
 Deserit Hesperiam, et caeli conversa per auras  
 Iunonem victrix adfatur voce superba:  
 545 En, perfecta tibi bello discordia tristi;  
 Dic, in amicitiam coeant et foedera iungant.  
 Quandoquidem Ausonio respersi sanguine Teucros,  
 Hoc etiam his addam, tua si mihi certa voluntas:  
 Finitimas in bella feram rumoribus urbes,  
 550 Accendamque animos insani Martis amore,  
 Undique ut auxilio veniant; spargam arma per agros.  
 Tum contra Iuno: Terrorum et fraudis abunde est:  
 Stant belli caussae; pugnatur comminus armis;  
 Quae fors prima dedit, sanguis novus imbuit arma.  
 555 Talia coniugia et talis celebrent hymenaeos  
 Egregium Veneris genus et rex ipse Latinus.  
 Te super aetherias errare licentius auras  
 Haud Pater ille velit, summi regnator Olympi.  
 Cede locis. Ego, si qua super fortuna laborum est,

*anc.*, bipennibus, ut ait Servius. — *atra*, v. G. 1, 129. | 526. cf. Hom. Il. 13, 339. | 528. cf. Hom. Il. 4, 422 sqq. — *primo*, primum surgente, v. 1, 442. | 531. *prim. a. ac.*, ἐν προμάχοις. | 532. *fuerat*: Plusquamperfectum significat id, quod desiit esse; occisus iam desiit esse maximus; Cic. de Orat. 1, 7 „socer eius qui fuerat;“ et cf. 8, 358 | 533. *vulnus*, res vulnus faciens, spiculum, cf. 2, 529. — *udae*: quia per udum iter emissa vox exit sonantior, propterea ipsa vocatur uda, quasi udum quid sonans. | 534. *ten. incl. vitam*, spiritum vitalem praecusit. | 535. *que*, v. 9, 811. | 536. *medium*, mediatorem, ut loquantur barbari. — Ceterum v. 2, 426. | 540. *aequo Marte*: Commisso praelio, nondum inclinante in alterutram partem victoria, abit Allecto. | 541. *Prom. pot.*, postquam effecit, quae promiserat. Valer. Fl. 6, 680 „*Incepti iam Iuno potens*.“ — *sangu. bell. imbuit*, caede initium belli fecit. | 543 sq. v. G. 4, 82. | 544. *victrix*, v. 2, 329. | 546. *Dic coeant*, nihil iam agas, si iubeas coire *cet.* | 554. *nov.*, v. E. 8, 29. | 557. *super*, v. 1, 680. | 559. si quid forte rerum agendum superest,



- 560 Ipsa regam. Talis dederat Saturnia voces;  
 Illa autem attollit stridentis anguibus alae,  
 Cocytique petit sedem, supera ardua linquens.  
 Est locus Italiae medio sub montibus altis,  
 Nobilis et fama multis memoratus in oris,
- 565 Amsancti valles; densis hunc frondibus atrum  
 Urguet utrimque latus nemoris, medioque fragosus  
 Dat sonitum saxis et torto vertice torrens.  
 Hic specus horrendum et saevi spiracula Ditis  
 Monstrantur, ruptoque ingens Acheronte vorago
- 570 Pestiferas aperit fauces, quis condita Erinys,  
 Invisum numen, terras caelumque levabat.  
 Nec minus interea extremam Saturnia bello  
 Inponit regina manum. Ruit omnis in urbem  
 Pastorum ex acie numerus caesosque reportant,
- 575 Almonem puerum foedatque ora Galaesi,  
 Implorantque deos, obtestanturque Latinum.  
 Turnus adest, medioque in crimine caedis et igni  
 Terrorem ingeminat: Teucros in regna vocari;  
 Stirpem admisceri Phrygiam: se limine pelli.
- 580 Tum, quorum attonitae Baccho nemora avia matres  
 Insultant thiasis, — neque enim leve nomen Amatae, —  
 Undique collecti coeunt Martemque fatigant.  
 Illicet infandum cuncti contra omina bellum,  
 Contra fata deum, perverso numine poscunt.
- 585 Certatim regis circumstant tecta Latini;  
 Ille velut pelagi rupes inmota resistit,  
 Ut pelagi rupes magno veniente fragore,  
 Quae sese, multis circum latrantibus undis,

iis ipsa praero; v. E. 6, 6.] 563. *It. medio* in Hirpinis. Aliud est *in media*, aliud *media Italia*. Illud proprie medium, i. e. a finibus undique pariter distantem, locum indicat; hoc ita dicitur, ut omnino significetur locus ab eo, qui medius dicitur, inclusus; cf. G. 3, 466. A. 1, 314. 3, 73. 104. 354.] 565. Amsanctus lacus pestilenti odore.] 567. *Dat. s.*, v. 5, 276.] 568. *spirac. Ditis*, Plin. N. H. 2, 93 „Spiracula vocant Charoneas scrobes mortiferum spiritum exhalantes.“ — *saevi*, cf. vs. 84.] 569. *rupto*, prorumpente et per eas fauces exaestuante Acheronte.] 571. *levabat* Imperfectum spectat ad durantem effectum; ex eo enim tempore lubens sentiebat terra caelumque se levatum eo monstro.]] 572—640. *Turba agrestis caesum Almonem Galaesumque in urbem portat. Cum ea Turnus, Amata, Latini flagitant, ut bellum indicatur Latinis. Rex Latinus his fluctibus oppressus relinquit aliis arbitrium rerum. Iuno ipsa recludit portas Belii. Latium parat arma.*] 577. *in medio igni*, in medio irarum ardore agrestium scilicet opem implorantium, cf. 9, 66.] 578. v. vs. 151.] 579. *Phrygiam*, mollem scilicet habitam admisceri forti generi Latinorum, cf. vs. 151.] 580. *matres*, matronae, coniuges Latinorum, ut v. 392.] 581. *neq. o. l. n. Am.*, coeunt igitur gratificaturi Amatae.] 582. *M. fat.*, proprie fatigant Latinum clamoribus ac precibus bellum poscentes.] 583. *contra o.*, cf. vs. 64 sqq.] 584. *Contra f. d.*, cf. vs. 96 sqq. — *perv. num.*, quasi pervertentes, susque deque

- Mole tenet; scopuli nequiquam et spumea circum  
 590 Saxa fremunt, laterique inlisa refunditur alga.  
 Verum ubi nulla datur caecum exsuperare potestas  
 Consilium, et saevae nutu Iunonis eunt res,  
 Multa deos aurasque pater testatus inanis,  
 Frangimur heu fatis, inquit, ferimurque procella!  
 595 Ipsi has sacrilego pendetis sanguine poenas,  
 O miseri. Te, Turne, nefas, te triste manebit  
 Supplicium, votisque deos venerabere seris.  
 Nam mihi parta quies, omnisque in limine portus;  
 Funere felici spoliior. Nec plura locutus  
 600 Saepsit se tectis, rerumque reliquit habenas.  
 Mos erat Hesperio in Latio, quem protinus urbes  
 Albanæ coluere sacrum, nunc maxuma rerum  
 Roma colit, cum prima movent in proelia Martem,  
 Sive Getis inferre manu lacrimabile bellum  
 605 Hyrcanisve Arabisve parant, seu tendere ad Indos  
 Auroramque sequi Parthosque repossere signa:  
 Sunt geminae Belli portae, sic nomine dicunt,  
 Religione sacrae et saevi formidine Martis;  
 Centum aerei claudunt vectes aeternaque ferri  
 610 Robora, nec custos absistit limine Ianus;  
 Has, ubi certa sedet patribus sententia pugnae,  
 Ipse Quirinali trabea cinctuque Gabino  
 Insignis reserat stridentia limina Consul;  
 Ipse vocat pugnās, sequitur tum cetera pubes,  
 615 Aereaue adsensu conspirant cornua rauco.  
 Hoc et tum Aeneadis indicere bella Latinus  
 More iubebatur tristisque recludere portas.  
 Abstinuit tactu pater aversusque refugit  
 Foeda ministeria et caecis se condidit umbris.

habentes, imperium deorum. | 589. v. 10, 771. | 590. *lat. inl. ref. a.*, i. q. refunditur et inliditur lateri; *refunditur*, ex imo mari excitata funditur in latus rupis, v. G. 2, 29. | 593. *auras*, caelum. — *inanes*, v. G. 4, 196. | 594. *fatis*, quae perditum eum salutaria, quae cepi, consilia. | 595. *sacrilegi* Latini, cf. vs. 583 sq. — *has poen.*, huius sceleris p., v. 2, 171. | 596. *nefas*, v. 2, 229. | 598. Consolatur se Latinus mortis propinquitatem: Te, Turne, manebit poena, non me; nam mihi parta q. — *omn. in l. p.*, securitas omnis mihi in promptu est. | 599. *felici*, i. e. tali, quale ducitur ei, qui in felicitate moritur. | 601. *Mos* secundum Livium 1, 19 a Numa institutus, secundum Virgilium ab Albanis acceptus. — *protinus*, ex quo semel constitutus est hic mos. | 602. *rerum*, v. G. 2, 534. | 603. *prima*, v. G. 3, 130. | 604—6. Pertinent haec ad expeditiones ab Augusto susceptas. | 607. Est aedes Belli binis portis instructa. | 609. *aerei*, v. 1, 698. | 610. *robur* de re durissima firmissimaeque, ut ap. Lucret. 2, 449, *robur saxi* ap. eund. 1, 881. | 612. *Quir. tr.*, v. vs. 187. — *cinctu* G., a Gabiis translato et in sacris servato. Servius „toga sic in tergum reiecta, ut ima eius lacinia a tergo revocata hominem cingat, simul caput tegat et ambiat.“ | 614. *voc. p.*, vocat veniant. — *sequitur*: Consul solebat dicere „Qui rempublicam

- 620 Tum regina deum caelo delapsa morantis  
 Inpulsit ipsa manu portas, et cardine verso  
 Belli ferratos rumpit Saturnia postis.  
 Ardet inexcita Ausonia atque immobilis ante;  
 Pars pedes ire parat campis, pars arduus altis  
 625 Pulverulentus equis furit; omnes arma requirunt.  
 Pars levis clipeos et spicula lucida tergent  
 Arvina pingui, subiguntque in cote secures;  
 Signaque ferre iuvat, sonitusque audire tubarum.\*  
 Quinque adeo magnae positae incudibus urbes  
 630 Tela novant, Atina potens Tiburque superbum,  
 Ardea Crustumerique et turrigeræ Antemnae.  
 Tegmina tuta cavant capitum, flectuntque salignas  
 Umbonum cratis; alii thoracas aenos  
 Aut levis ocreas lento ducunt argento;  
 635 Vomeris huc et falcis honos, huc omnis aratri  
 Cessit amor; recoquunt patrios fornacibus enses.  
 Classica iamque sonant; it bello tessera signum.  
 Hic galeam tectis trepidus rapit; ille frementis  
 Ad iuga cogit equos; clipeumque auroque trilecem  
 640 Loricam induitur fidoque accingitur ense.  
 Pandite nunc Heliconæ, deae, cantusque movete,  
 Qui bello acciti reges, quæ quemque secutæ  
 Conplerint campos acies, quibus Itala iam tum  
 Floruerit terra alma viris, quibus arserit armis;  
 645 Et meministis enim, divæ, et memorare potestis;  
 Ad nos vix tenuis famæ perlabitur aura.

salvam esse vult, me sequatur;" et v. 8, 1.] 623. cf. vs. 45 sq. et v. G. 2, 441.] 624. *pars arduus*, 5, 108 „pars et certare parati.“] 625. *Pulv. furit*, ita rapido impetu fertur, ut oppleatur moto pulvere.] 626. *lucida*, ut fiant lucida, v. 4, 298, itemque clipei; nam levitas gignit nitorem. — *Pars tergent ... subiguntque* v. E. 1, 66.] 629. Neque solum singuli, sed totae adeo urbes incensae sunt eodem studio; v. 4, 533.] 630. Tiburtes cum aliquando auxilium a Romanis petentes sua in illos beneficia iactarent, hoc responsum feruntur a senatu accepisse: Superbi estis. Propterea Tibur h. l. superbum appellari statuit Servius.] 631. v. E. 2, 24.] 637. *tessera*, σύνθημα (*Felicitas* Hirt. de bello Afric. c. 83, *Libertas*, cet.), it, diditur, *signum bello*, quo signo cognoscerent se inter se milites et ab hostibus distinguerent. Sed hoc loco alterum genus tesserae significari videtur, quo mandata ducum ad milites referebantur.] 638 sqq. Donatus „Post classicorum sonum postque nuntium tesserae maior animorum fervor exstiterat.“] 639. v. 3, 467.]] 641—817. *Homeri exemplo* (Il. 2, 484 sqq.) *poeta invocatis ante in re tam obscura Musis recenset copias cum suis quasque ducibus adversus hostem exsunt.*] 641. Iubentur Musae apertis templi in Helicone sacrati foribus prodire ad canendum. — *move* dicitur *carmen*, cuius ex ore *carmen* prodire incipit; Ovid. Met. 14, 20 „carmen ore move sacro,“ et supra ipse Virgil. 1, 262 „fatorum arcana movebo.“] 644. *quib. ars. a.*, quam ardentes et strenuos in armis viros habuerit.] 645. *Et ... enim* per tmesin pro *etenim*.] 646. comparatur tenuitas

- Primus init bellum Tyrrhenis asper ab oris  
 Contemptor divom̄ Mezentius agminaque armat.  
 Filius huic iuxta Lausus, quo pulchrior alter  
 650 Non fuit, excepto Laurentis corpore Turni.  
 Lausus, equum domitor debellatorque ferarum,  
 Ducit Agyllina nequiquam ex urbe secutos  
 Mille viros, dignus, patriis qui laetior esset  
 Inperiis, et cui pater haud Mezentius esset.  
 655 \* Post hos insignem palma per gramina currum  
 Victoresque ostentat equos satus Hercule pulchro  
 Pulcher Aventinus, clipeoque insigne paternum  
 Centum anguis cinctamque gerit serpentibus Hydram;  
 Collis Aventini silva quem Rhea sacerdos  
 660 Furtivum partu sub luminis edidit oras,  
 Mixta deo mulier, postquam Laurentia victor  
 Geryone extincto Tirynthius attigit arva,  
 Tyrrhenoque boves in flumine lavit Hiberas.  
 Pila manu saevosque gerunt in bella dolones,  
 665 Et tereti pugnant mucrone veruque Sabello.  
 Ipse pedes, tegumen torquens inmane leonis,  
 Terribili inpexum saeta, cum dentibus albis  
 Indutus capiti, sic regia tecta subibat,  
 Horridus, Herculeoque humeros innexus amictu.  
 670 \* Tum gemini fratres Tiburtia moenia linquunt,  
 Fratris Tiburti dictam cognomine gentem,  
 Camillusque acerque Coras, Argiva iuventus,  
 Et primam ante aciem densa inter tela feruntur:  
 Ceu duo nubigenae cum vertice montis ab alto  
 675 Descendunt Centauri, Homolen Othrymque nivalem

famae cum tenuitate allabentis aurae.] 647. *Tyrrh. ab oris*, oriundus ex Etruria, cf. 8, 478—493 et v. G. 3, 2.] 648. *Cont. div.* Cato narrat Mezentium Rutulis imperasse, ut sibi offerrent, quas diis primitias offerebant.] 649. cf. Hom. II. 2, 673 sqq.] 652. Agylla, postea Caere dicta. — *nequiq. sec.*, quippe frustra ei adfuturos in pugna cadenti.] 653. *patr. q. laet. e. inp.*, qui non amisisset spem regni propter tyrannidem patris.] 653 sq. *esset* non sine vi eadem sede iteratum, ut *fuisse* 8, 396 sq., Ovid. Tr. 1, 3, 61 sq. „Seythia est, quo mittimur, inquam; Roma relinquenda est; utraque iusta mora est.“ et in idem verbum quinque cola exeunt ap. Cic. pr. Mil. 10.] 655. *ins. p. curr.*, ἀθλοφόρον, qui tum scilicet est ostentui tantum, nam pedibus (vs. 666) subit regiam.] 658. i. e. Hydram centum serpentibus cinctam.] 660. *Furt.*, cf. 4, 171 sq.] 661. *μυρσισα θεῶν*, cf. Hom. II. 21, 143.] 663. *Tyrrh. flum.*, cf. vs. 242.] 664. „Pilum haud paulo quam hasta vehementius ictu missuque telum“ Liv. 9, 19.] 665. *Sab.*, ipsi igitur, quos ducit Aventinus, Sabelli videntur fuisse.] 666. *torqu.*, v. 8, 460.] 668. *sic*, v. 1, 225: cinctus pelle leonina rictumque eius pellis pro galea indutus (cf. 11, 680 sq.), *sic*, i. e. tali sive, ut ipse poeta proximo versu interpretatur, ita horrido habitu, patrem Herculem imitatus, subibat tecta.] 672. *Cat. et Coras* (cum Tiburto) Amphiarai, qui bello Thebano a terra haustus periit, sili.] 674. *nubig.*, cf. 8, 298.] 675. Homole, Othrys, montes Thessaliae.]

Lingentes cursu rapido; dat euntibus ingens  
Silva locum et magno cedunt virgulta fragore.

- Nec Praenestinae fundator defuit urbis,  
Volcano genitum pecora inter agrestia regem  
680 Inventumque focis omnis quem credidit aetas,  
Caeculus. Hunc legio late comitatur agrestis:  
Quique altum Praeneste viri, quique arva Gabinæ  
Iunonis gelidumque Anienem et roscida rivis  
Hernica saxa colunt; quos dives Anagnia pascit,  
685 Quos, Amasene pater. Non illis omnibus arma,  
Nec clipei currusve sonant; pars maxima glandes  
Liventis plumbi spargit; pars spicula gestat  
Bina manu; fulvosque lupi de pelle galeros  
Tegmen habent capiti; vestigia nuda sinistri  
690 Instituire pedis; crudus tegit altera pero.

- At Messapus, equum domitor, Neptunia proles,  
Quem neque fas igni cuiquam nec sternere ferro,  
Iam pridem resides populos desuetaque bello  
Agmina in arma vocat subito ferrumque retractat.  
695 Hi Fescenninas acies Aequosque Faliscos,  
Hi Soractis habent arces Flavinaque arva,  
Et Cimini cum monte lacum lucosque Capenos.  
Ibant aequati numero, regemque canebant:

677. *Silva*: dum ramuli arborum prominentes impetu cursus franguntur. | 678—80. „Mater enixa Caeculum iuxta templum Iovis exposuit, quem virgines aequatum euntes iuxta ignem (in foco s. ara Iovis accensum puta) inventum sustulerunt; unde Vulcani dictus est filius, Caeculus autem ideo, quod oculis exiguis fuit. Hic postea collecta multitudo Praenestinam civitatem in montibus (vs. 682) condidit. Et cum ad ludos vicinos populos invitasset, coepit eos hortari, ut secum habitarent, et pro gloria iactare se filium esse Vulcani. Quod cum illi non crederent, invocato Vulcano, ut eum filium suum comprobaret, omnis illius multitudinis coetus est flamma circumdatus. Quo facto omnes Vulcani filium esse crediderunt. Hinc est „omnis quem credidit aetas“ quasi post dubitationem.“ Haec Servius, auctorem secutus Catonem. | 682. *arva Gab. Iun.*, Servius „Gabinus diu in agris morati tandem Gabios condiderunt; unde perite *arva* dixit, non *moenia*. Illic Iuno religiosissime colitur.“ | 683. *Anienem*, regionem Anieni adjacentem, ut vs. 714 „Qui ... *flumen Himellae* ... colunt.“ Liv. 22, 20 „omnium populorum, qui *Iberum incolunt*.“ Eurip. Phoen. 125 „*Αεγραία δ' ολκεῖ νάματα*.“ et v. E. 7, 66. | 684. *H. s. c.*, significantur ipsi Hernici. — *dives*, cf. vs. 262 et Silius It. 12, 582 sq. | 690. *vestigia* (plantas) nuda statuunt s. ponunt, v. G. 1, 49. | 691. *At* habet vividum quiddam in transeundo ad alia enumeranda, ut G. 1, 401. 2, 447. 3, 87. | 692. *igni*, v. 10, 131. | 695. *Hi Fesc. ac.* ... *habent*, in his sunt Fescennini; sed belli ratione habita dixit *acies* *F.*: ceterum aliter habentur acies, aliter arces; est igitur hoc quoddam genus zeugmatis, v. 1, 426. — *Aequi Falisci* ab oppido Aequo Falisco dicti; hoc autem *Aequum* ex Osco *Aīpo* translatus videtur, quod *altum* significat; *Aequos Fal.* igitur ab urbis in colle sita appellatos statuimus. | 697. *Ciminus* nomen et montis et lacus; hic quidem hodie appellatur Lago di Vico. — *lucus Feroniae* est in agro Capenate situs. | 698. *aequ. num.*, aequalibus ordinibus. — Silius It. 8, 422 sqq.

- Ceu quondam nivei liquida inter nubila cycni  
 700 Cum sese e pastu referunt et longa canoros  
 Dant per colla modos; sonat amnis et Asia longe  
 Pulsa palus.  
 Nec quisquam aeratas acies ex agmine tanto  
 Misceri putet, aeriam sed gurgite ab alto  
 705 Urgueri volucrum raucarum ad litora nubem.  
 Ecce, Sabinorum prisco de sanguine magnum  
 Agmen agens Clausus magnique ipse agminis instar,  
 Claudia nunc a quo diffunditur et tribus et gens  
 Per Latium, postquam in partem data Roma Sabinis.  
 710 Una ingens Amiterna cohors priscique Quirites,  
 Ereti manus omnis oliviferaeque Mutuscae;  
 Qui Nomentum urbem, qui Rosea rura Velini,  
 Qui Tetricae horrentis rupes montemque Severum  
 Casperiamque colunt Forulosque et flumen Himellae;  
 715 Qui Tiberim Fabarimque bibunt, quos frigida misit  
 Nursia, et Hortinae classes populique Latini;  
 Quosque secans infaustum interluit Allia nomen:  
 Quam multi Libyco volvuntur marmore fluctus,  
 Saevus ubi Orion hibernis conditur undis;  
 720 Vel cum sole novo densae torrentur aristae,  
 Aut Hermi campo, aut Lyciae flaventibus arvis.  
 Scuta sonant, pulsuque pedum conterrita tellus.  
 Hinc Agamemnonius, Troiani nominis hostis,  
 Curru iungit Halaesus equos, Turnoque ferocis  
 725 Mille rapit populos, vertunt felicia Baccho

„Ibant et laeti pars Sancum voce canebant Auctorem gentis, pars laudes ore ferebant, Sabe, tuas.“ | 701. *Dant*, v. 5, 276. — *amnis*, Cayster, et v. G. 1, 383. | 702. v. E. 6, 84. | 703 sqq. Nec militum putes tantum quidem agmen, sed nubem migrantium avium, v. 6, 311. | 704. *Misceri* dicuntur, qui in acie congregiuntur ad pugnandum; *misceri ex agm. tanto*, breviter pro: explicari ex agm. t. et misceri cum hoste. | 707. de Clauso cf. Liv. 2, 16. | 710. *Quirites*, Curenses; *prisci*, quo distinguantur a Romanis, qui et ipsi postea dicti sunt Quirites. | 712. *Nomentum*: oblitus est poeta, quae supra scripsit 6, 773. — Ceterum v. vs. 517. | 713. *Severum*, Servius „proprium nomen montis est.“ | 714. v. vs. 683. | 715. cf. Hom. Il. 2, 825. | 716. *Hortinae cl.*, Servius „Hortini equites, qui *classes* dicuntur; unde et eorum tubas classica dicimus, et partes populi classes vocamus.“ — *pop. Lat.*, ut Horta Etruriae est, ita etiam aliqua pars Latii videtur Clausi imperio fuisse subiecta. | 719. Apollon. Rh. 1, 1202 „*χειμερὶν ὁλοοῖο δύσις πέλει Ὠρωπος*.“ | 720. Nulla prope in re plus sibi licere arbitrati sunt poetae, quam in variandis comparationibus. Legitima forma si h. l. uti velles, ita diceres: Vel quam multae aristae novo sole torrentur. Sed accommodavit poeta haec ad similitudinem praegressi enuntii *ubi conditur*, multitudinis autem notionem expressit Adiectivo *densae*. — *sole novo*, novo s. primo aestu solis s. prima aestate. | 721. *Hermi*, v. G. 2, 137. | 722. v. 12, 445. | 723. *Hinc ... iung. equ.*, ex hac (alia) parte venit curru vectus. — *Agamemnonius*, vel filius, vel certe comes Agamemnonis, quo caeso ille in Italiam profugisse fertur. | 725. *rapit Turno*,

- Massica qui rastris, et quos de collibus altis  
 Aurunci misere patres Sidicinaque iuxta  
 Aequora, quique Cales linquunt, amnisque vadosi  
 Accola Volturni, pariterque Saticulus asper  
 730 Oscorumque manus. Teretes sunt aclydes illis  
 Tela; sed haec lento mos est aptare flagello.  
 Laevas cetra tegit; falcati comminus enses.  
 Nec tu carminibus nostris indictus abibis,  
 Oebale, quem generasse Telon Sebethide nymphæ  
 735 Fertur, Telebourn Capreas cum regna teneret,  
 Iam senior; patriis sed non et filius arvis  
 Contentus late iam tum ditione premebat  
 Sarrastis populos et quæ rigat aequora Sarnus,  
 Quique Rufras Batulumque tenent atque arva Celemnæ,  
 740 Et quos maliferae despectant moenia Abellæ,  
 Teutonico ritu soliti torquere cateias;  
 Tegmina quis capitum raptus de subere cortex,  
 Aerataque micant peltæ, micat aereus ensis.  
 Et te montosæ misere in proelia Nersæ,  
 745 Ufens, insignem fama et felicibus armis;  
 Horrida præcipue cui gens, adsuetaque multo  
 Venatu nemorum, duris Aequicula glaebis.  
 Armati terram exercent, semperque recentis  
 Convectare iuvat prædas et vivere rapto.

raptim adducit.] 726. *Mass.*, v. G. 2, 143. | 727. Iunge de collibus altis et iuxta aequora *Sid.*, i. e. in montibus iuxta Sidicinum, campestre oppidum, habitantes, quos miserunt Aurunci. | 729. *nulle populos* ... vs. 725. ... *accola* ... *Saticulus*, ut apud Aesch. Pers. 33 sqq. „ἄλλους δ' ὁ μέγας καὶ πολυθρέμων Νεῖλος ἐπέμψεν· Σοῦσι σκάδης ... Ἀρσάμης ... Ἀριόμαρδος,“ puta: *veniunt cum eo*; et v. 10, 498. | 730. *achydes*, iacula cabitum semis longa (*anderthalb Ellen lang*), utrimque acuminata, cum loræ (*flagello*), quo retrahi possent emissa. | 731. *aptare*, v. 4, 482. | 732. *cetra*, Servius „scutum loreum, quo utuntur Afri et Hispani.“ — *comminus*, quibus utantur ad comminus pugnandum; et v. 1, 639. | 734. *Sebethis*, filia Sebethi fluvii ad Neapolim. | 735. *Telebourn*, v. 2, 242. Teleboæ Acarnania pulsi Taphum, insulam maris Ionii, tenuerunt; inde pars eorum Capreas (hodie *Capri*, in sinu Neapolitano) transit. | 736. *non et*: pater quidem contentus fuerat angustiore regno, sed filius non item. | 737. *premebat*, quippe invitos, cf. 1, 54. 10, 54 et v. vs. 368. | 738. *Sarrastis* p., Sarni (*Sarri*) fluvii accolæ. — *aequ.*, v. vs. 728. | 741. apposita, prægresso Accusativo, certa cum ratione interdum efferuntur per Nominativum; non commode enim dixerit *populos ditione premebat solitos torquere cateias*, quod illud *populos ditione premere* ad civile imperium, hoc *soliti torqu. cat.* ad bellum spectat; aut quis 10, 496 sqq. hoc ferat *rapiens caesam manum et thalamos cruentos*? — *cateia*, quo telo postea Teutones usi sunt, fuit longius genus hastæ; pandam fuisse Silius docet 3, 277; puta sub cuspidē exisse parvum ferrum reflexum, quo clipeus adversarii percussus attineretur. | 742. *rapi* saepe refertur ad celeritatem, itaque Servius „Bene *raptus*, quia *recens* suberis cortex in quamvis formam facile flectitur.“ | 747. *gens Aequ. duris glaeb.*, cui ager est durus difficilisque aratu. Aequicali ad utramque ripam Anienis habitaverunt. | 748.

- 750 Quin et Marruvia venit de gente sacerdos,  
 Fronde super galeam et felici comptus oliva,  
 Archippi regis missu, fortissimus Umbro,  
 Vipereo generi et graviter spirantibus hydrys  
 Spargere qui somnos cantuque manuque solebat,  
 755 Mulcebatque iras et morsus arte levabat.  
 Sed non Dardaniae medicari cuspidis ictum  
 Evaluit, neque eum iuvare in vulnere cantus  
 Somniferi et Marsis quaesitae montibus herbae.  
 Te nemus Anguitiae, vitrea te Fucinus unda,  
 760 Te liquidi flevire lacus.  
 Ibat et Hippolyti proles pulcherrima bello,  
 Virbius, insignem quem mater Aricia misit,  
 Eductum Egeriae lucis humentia circum  
 Litora, pinguis ubi et placabilis ara Dianae.  
 765 Namque ferunt fama Hippolytum, postquam arte novercae  
 Occiderit patriasque explerit sanguine poenas  
 Turbatus distractus equis, ad sidera rursus  
 Aetheria et superas caeli venisse sub auras,  
 Paeoniis revocatum herbis et amore Dianae.  
 770 Tum Pater omnipotens, aliquem indignatus ab umbris  
 Mortalem infernis ad lumina surgere vitae,  
 Ipse repertorem medicinae talis et artis  
 Fulmine Phoebigenam Stygias detrusit ad undas.  
 At Trivia Hippolytum secretis alma recondit  
 775 Sedibus et nymphae Egeriae nemorique relegat,

*Arm.*, cf. 9, 609 sq. | 750. *Marruvium* urbs Marsorum, Silius It. 8, 507. | 751. v. G. 1, 173 et 6, 230. | 752. A Marsya, duce Lydorum, ferunt Marsos nomen traxisse; hunc oppidum Archippen, post lacu Fucino haustam, condidisse. | 753 sqq. De hac Marsorum peritia Silius 8, 497 sqq. „norat Marsica pubes Et bellare manu et chelydrys cantare soporem Vipereumque herbis hebetare et carmine dentem. Acetae prolem Anguitiam (*Medeam*) mala gramina primam Monstravisse (*his*) ferunt tactuque domare venena.“ | 754. sparso papavere aut medicatis frugibus, 6, 420, tum adhibita incantatione sopire viperas, v. 1, 426. | 755. *Mulcebat* manuum contactu, Silius l. l. et 1, 411 sq. „Nec non serpentes diro exarmare veneno Doctus Atyr *tactuque* graves sopire chelydros.“ | 756. cf. 10, 544 sq. | 759. v. E. 1, 39. | 760. *lacus* alii praeter Fucinum. | 761. v. E. 2, 30. | 762. Notabile hic est, quod contra priscam consuetudinem pater (vs. 777) ac filius eodem Virbii nomine appellantur; nam quae paeterea eius rei exempla reperiuntur apud mythologos, ea nihil probant contra veram sinceramque antiquitatem. — *insignem* puta specie armorum. — *mater*, patria urbs, ut *Populonia mater* 10, 172. | 763. *circ. Lit.*, ad lacum Aricinum. | 764. *pinguis*, victimis abundans, *placabilis ara*, quia dea, cui sacra fiunt in ea ara, placabilis est; atque ita appellatur, quo distinguatur ab immani illa Taurica, ad quam hospites mactari solebant. | 765. *novercas*, Phaedrae. | 766. *explere* proprie dicimus iram, cui satisfacimus; explevit igitur patrias poenas Hippolytus eo, quod satis dedit irae patris Thesei poenas filio irrogantis. | 767 sq. *ad sidera ... auras*, i. e. revixisse, cf. vs. 771. 6, 719. 761 sq. | 769. v. 5, 269. — *Dianae*, quae, quasi patrona quaedam castitatis et pudicitiae, hanc veniam ab Aesculapio petiit. | 773. *Phoebig.*, Aesculapium. | 774. *Trivia*, v. vs. 516. | 775. cf. vs.



- Solus ubi in silvis Italis ignobilis aevum  
 Exigeret, versoque ubi nomine Virbius esset.  
 Unde etiam templo Triviae lucisque sacratis  
 Cornipedes arcentur equi, quod litore currum  
 780 Et iuvenem monstris pavidum effudere marinis.  
 Filius ardentis haud setius aequore campi  
 Exercebat equos curruque in bella ruebat.  
 Ipse inter primos praestanti corpore Turnus  
 Vertitur arma tenens, et toto vertice supra est.  
 785 Cui triplici crinita iuba galea alta Chimaeram  
 Sustinet, Aetnaeos efflantem faucibus ignis,  
 Tam magis illa fremens et tristibus effera flammis,  
 Quam magis effuso crudescent sanguine pugnae.  
 At levem clipeum sublatis cornibus Io  
 790 Auro insignibat, iam saetis obsita, iam bos,  
 Argumentum ingens, et custos virginis Argus,  
 Caelataque amnem fundens pater Inachus urna.  
 Insequitur nimbus peditum, clipeataque totis  
 Agmina densentur campis, Argivaeque pubes  
 795 Auruncaeque manus, Rutuli veteresque Sicani  
 Et Sacrae acies et picti scuta Labici;  
 Qui saltus, Tiberine, tuos, sacrumque Numici  
 Litus arant, Rutulosque exercent vomere collis,

763 et v. G. 1, 173. | 779 sq. *everterunt currum et effuderunt iuvenem*, v. 1, 426. | 781. *haud set.*, nihilo minus. | 784. cf. Hom. II. 3, 227. | 785. *Chim.*, Hom. II. 6, 179 sqq. Hes. Th. 323 sq. | 786. *Aetnaeos*, tantos, quantos Aetna evomit, ergo omnino magnos; cf. Hom. II. 5, 4. Portentosa ea res, cuius causa in eo cernitur, quod multo celerique motu incenduntur fulgores rerum radiantium. | 787. *Tam magis ... Quam n.*, cf. G. 3, 309. — *illa*, Chimaera, *fremens ... offera*: in descriptione rerum pro Verbis finitis interdum Participia vel Adiectiva ponantur, ut G. 2, 133. 3, 505. | 789. *Io*, v. G. 3, 153. Praeclare hoc a poeta inventum; spectat enim hoc insigne ad originem Turni Argivam, v. vs. 56 et 372. | 791. *Argumentum* materia (Gallice *le sujet*), quam artifex effingendam sibi sumsit. Quintil. 5, 10, 9 „omnis ad scribendum destinata materia appellatur argumentum; nec mirum, cum id inter opifices quoque vulgatum sit; unde Virgilius *Argum. ingens*.” Cic. Verr. 4, 56 „Ex ebone diligentissime perfecta *argumenta* erant in valvis.” — *ingens*, magnificum. | 792. Finguntur dii fluviorum paulum reclinato corpore humi sedentes fontemque fluvii ex urna effundentes. | 793. *véγος πέλωρ* Hom. II. 4, 274. | 794. *Argiva*, v. vs. 409 sq. | 795. *Aur.*, Aurunci, qui cis Lirim habitabant; qui vs. 727 commemorantur, habitant trans Lirim. — *vet. Sic.*, Servius „bene veteres; nam ubi nunc Roma est, ibi fuerunt Sicani, quos postea pepulerunt Aborigines;” et v. 8, 328. | 796. *Sacrae acies* pro Ardeatibus dictae videntur, quoniam sacra Cybeles a Sacranis suscepta habebant. Certe Sacranorum nomine sacerdotum fuit collegium in ea urbe, qui sacra Cybeles curabant. Ceterum de Sacranis Servius (non eundem, quem ad vs. superiorem, auctorem secutus) ad 11, 317 „Sicani a Liguribus pulsi sunt, Ligures a Sacranis, Sacrani ab Aboriginibus.” — *picti sc.*, v. E. 3, 106. Labicum oppidum prope Tusculum. | 797. *sacrum*, quippe cui praesidet Numicius, cf. vs. 799 sq.; nam agros ipsis diis consecratos arare non

- Circaeumque iugum, quis Iuppiter Anxurus arvis  
 800 Praesidet et viridi gaudens Feronia luco;  
 Qua Saturae iacet atra palus, gelidusque per imas  
 Quaerit iter vallis atque in mare conditur Ufens.  
 Hos super advenit Volsca de gente Camilla,  
 Agmen agens equitum et florentis aere catervas,  
 805 Bellatrix, non illa colo calathisque Minervae  
 Femineas adsueta manus, sed proelia virgo  
 Dura pati cursuque pedum praevertere ventos.  
 Illa vel intactae segetis per summa volaret  
 Gramina, nec teneras cursu laessisset aristas;  
 810 Vel mare per medium fluctu suspensa tument  
 Ferret iter, celeris nec tingeret aequore plantas.  
 Illam omnis tectis agrisque effusa iuventus  
 Turbaque miratur matrum et prospectat euntem,  
 Attonitis inhians animis, ut regius ostro  
 815 Velet honos levis humeros, ut fibula crinem  
 Auro internectat, Lyciam ut gerat ipsa pharetram  
 Et pastorem praefixa cuspide myrtum.

licebat.] 799. *Circ.*, v. vs. 10. — Qui a Volscis colebatur deus Anxurus, nomen videtur dedisse oppido Anxuri, quae postea Terracina dicta. *Praesidere* autem dii dicuntur locis, quae sunt in tutela (*praesidio*) eorum. Servius „Circa hunc tractum Campaniae colebatur puer Iuppiter, qui Auxurus, et Iuno virgo, quae Feronia dicebatur.“] 801 sq. significantur loca, quae sunt circa paludes Pomtinas.] 803. v. vs. 462.] 804. *florentes*, fulgentes, Lucret. 4, 451 „Bina lucernarum *florentia* lumina *flammis*.“ Pind. Ol. 2, 130 „ἀνθεμα χρυσοῦ φλέγει.“] 807. *pati* sc. adsueta.] 808 sq. cf. Hom. Il. 20, 226 sqq. — *intactae*, a falce, qua solae aristae demetebantur, v. 10, 405.] 809. *laessisset*, v. 2, 136.] 811. *Ferret iter*, Ovid. F. 3, 174 „gressus in nova castra fero.“] 814 sq. significatur chlamys purpurea.] 815. Donatus „Crinem eius non ars feminea, sed virilis fibula militarisque nectebat.“] 816. *ipsa*, v. G. 2, 297. — *Lyciam*, v. E. 1, 55.] 817. v. G. 2, 447.

## A E N E I D O S

## LIBER OCTAVUS.

(*Aeneas auxilium petit impetratque ab Euandro, Arcade, qui Pallanteum urbem ad Tiberim condiderat; eiusdem suasu adiungit sibi Etruscos. — Deseruntur a matre, Venere, ad Aeneam arma a Vulcano fabrefacta.*)

- Ut belli signum Laurenti Turnus ab arce  
 Extulit et rauco strepuerunt cornua cantu,  
 Utque acris concussit equos, utque inpulit arma,  
 Extemplo turbati animi, simul omne tumultu  
 5 Coniurat trepido Latium, saevitque iuventus  
 Effera. Ductores primi Messapus et Ufens  
 Contemptorque deum Mezentius undique cogunt  
 Auxilia et latos vastant cultoribus agros.  
 Mittitur et magni Venulus Diomedis ad urbem,  
 10 Qui petat auxilium, et, Latio consistere Teucros,  
 Advectum Aenean classi victosque Penatis  
 Inferre et fatis regem se dicere posci,  
 Edoceat, multasque viro se adiungere gentis

**Aeneid. L. VIII.** 1—101. *Turnus proposito signo belli contrahit undique copias mittitque, qui Diomedem, Arpis regnantem, ad societatem armorum pelliciat. Aeneae de mole belli instantis sollicito deus Tiberinus per quietem apparet, a quo confirmatus auxiliumque Euandri regis implorare iussus ad hunc proficiscitur, inventa ante mactataque ex praecepto Tiberini suae alba, unde urbs Alba Longa postea nomen habuit.* | 1—5. Signo belli proposito Latini proprio duce destituti ... 7, 600. ... suas copias adiangunt copiis Turni. | 1. *belli signum*, vexillum; in castris quidem Romanis id vexillum ante pugnam proponi solitum tunica erat russa in fastigio praetorii extenta. Servius ita fere „Si esset *tumultus* (vs. 4), i. e. bellum *Italicum* vel *Gallicum*, is, qui erat ducturus exercitum, ibat in Capitolium et inde proferens duo vexilla, unum roseum, quod pedites evocabat, alterum caeruleum, quod erat equitum, dicebat: Qui rempublicam salvam esse vult, me sequatur. Et tali tempore non singuli, ut in legitima militia, adigebantur sacramento, sed *omnes simul* (vs. 4), quae dicta est (vs. 5) *coniuratio*.” | 3. *inpulit*, movit cum sono; nam arma eorum, qui armati incedunt, crepare solent inter se collisa; ergo i. q. ubi primum arma sonuerunt. | 4. *animi* Latinorum. | 6 sq. *Messapus* et *Mezentius* copias ex Etruria adducentes, 7, 691. 647 sqq. *Ufens* 7, 745. | 9. cf. 11, 246. Diomedem, postquam Troia deleta Argos revertit, patria pulsus primum Aetoliam petit, deinde Italiam, ubi, victis Messapiis, novum regnum novasque urbes, Beneventum, Brundisium, Arpos, condidit. | 12. cf. 7, 272. | 13. *multas gentes*, mireris, quod poeta non dicit, quae se ei adiunxerint. Fortasse aliquis antiquus scriptor tradidit multos homines ad eius societatem se applicavisse, unde natum Virgilianum illud *multas gentes*. Aliter Donatus „Haec non fuerant facta,

- Dardanio, et late Latio increbrescere nomen.  
 15 Quid struat his coeptis, quem, si fortuna sequatur,  
 Eventum pugnae cupiat, manifestius ipsi,  
 Quam Turno regi aut regi adparere Latino.  
 Talia per Latium. Quae Laomedontius heros  
 Cuncta videns magno curarum fluctuat aestu;  
 20 Atque animum nunc huc celerem, nunc dividit illuc,  
 In partisque rapit varias perque omnia versat:  
 Sicut aquae tremulum labris ubi lumen aenis  
 Sole percussus aut radiantis imagine Lunae  
 Omnia pervolat late loca, iamque sub auras  
 25 Erigitur summique ferit laquearia tecti.  
 Nox erat, et terras animalia fessa per omnis  
 Alituum pecudumque genus sopor altus habebat:  
 Cum pater in ripa gelidique sub aetheris axe  
 Aeneas, tristi turbatus pectora bello,  
 30 Procubuit seramque dedit per membra quietem.  
 Huic deus ipse loci fluvio Tiberinus amoeno  
 Populeas inter senior se attollere frondes  
 Visus; eum tenuis glauco velabat amictu  
 Carbasus, et crinis umbrosa tegebat arundo;  
 35 Tum sic adfari et curas his demere dictis:  
 O sate gente deum, Troianam ex hostibus urbem  
 Qui revehis nobis aeternaque Pergama servas,  
 Exspectate solo Laurenti arvisque Latinis,  
 Hic tibi certa domus, certi, ne absiste, Penates,  
 40 Neu belli terrere minis; tumor omnis et irae  
 Concessere deum.  
 Iamque tibi, ne vana putes haec fingere somnum,

sed idcirco veris admixta sunt, ut pro certis acciperentur.“| 15. *Quid struat...* nempe hoc, ut victo Turno ipsum bello petat.| 16. *ipsi*, sc. cui ille par pari relatum velit.| 18. *per L.*, in Latio geruntur.| 20. v. 4, 285.| 22 sqq. cf. Apoll. Rh. 3, 754 sqq. — *Sicut* comparat res ex media veritate sumptas, *velut* res mente fictas.| 23. *imagine*, quia ipsa eius imago in superficie aquarum conspicitur.| 30. *ded. p. m. q.*, Donatus „corpus quieti concessit.“| 31. *ipse ... visus*, ὡς-θη ἐναγυῆς. — *fluvio*, e fluv.| 32. *senior*, ut fere dii maris ac fluviorum.| 33. *glauco*, qualis est amictus τῶν τε ἐναλλων καὶ τῶν ποταμῶν θείων.| 34. „Carbasus genus lini est; linum vero, ut ait Plinius, melius irrigatione fluminum quam pluvia nascitur; ideo et vestis linea Fluminibus tamquam propria datur.“ Servius.| 35. Versus plenus tranquillitatis et numeris et Verbi Modo (Infinitivo absoluto) indicatae, aptum quoddam subiectae orationi quasi προοιμιον, cf. 2, 775.| 37. *revehis*, cf. 3, 167 sq. 7, 205 sqq. — *aet.*, v. 7, 626.| 38. *Exspect.*, propter deorum vaticinia, cf. vs. 12.| 40. *tumor et irae*, cf. 6, 407. — Ira divina, quae omnem rem Troianam multos per annos vexavit, exhausta est; nec illa nec bellum instans prohibebit certas duraturasque sedes fundare; unam, quae irasci nondum desierat, lunonem Tiberinus sperat precibus votisque superari posse vs. 60. 42. *Iam* interdum refertur ad rem tempore futuro sive proxime instanti, ut hic et 6, 676. 11, 708, sive longius remoto,

- Litoreis ingens inventa sub ilicibus sus,  
 Triginta capitum fetus enixa, iacebit,  
 45 Alba, solo recubans, albi circum ubera nati.  
 Hic locus urbis erit, requies ea certa laborum,  
 Ex quo ter denis urbem redeuntibus annis  
 Ascanius clari condet cognominis Albam.  
 Haud incerta cano. Nunc qua ratione, quod instat,  
 50 Expedias victor, paucis, adverte, docebo.  
 Arcades his oris, genus a Pallante profectum,  
 Qui regem Euandrum comites, qui signa secuti,  
 Delegere locum et posuere in montibus urbem  
 Pallantis proavi de nomine Pallanteum.  
 55 Hi bellum adsidue ducunt cum gente Latina;  
 Hos castris adhibe socios et foedera iunge.  
 Ipse ego te ripis et recto flumine ducam,  
 Adversum remis superes subvectus ut amnem.  
 Surge age, nate dea, primisque cadentibus astris  
 60 Iunoni fer rite preces, iramque minasque  
 Supplicibus supera votis. Mihi victor honorem  
 Persolves. Ego sum, pleno quem flumine cernis  
 Stans ingentem ripas et pinguia culta secantem,  
 Caeruleus Thybris, caelo gratissimus amnis.  
 65 Hic mihi magna domus, celsis caput urbibus exit.  
 Dixit, deinde lacu Fluvius se condidit alto,  
 Ima petens; nox Aenean somnusque reliquit.  
 Surgit, et, aetherii spectans orientia Solis  
 Lumina, rite cavis undam de flumine palmis  
 70 Sustinet, ac talis effundit ad aethera voces:

ut 1, 272, certo eventuram.] 43 sqq. v. 3, 390.] 46. *Hic locus*. In eodem versu 3, 393 est *Is locus*. Nempe Tiberinus loquitur de loco certo sibi que noto, Helenus de incerto sibi que ignoto. — Ceterum cum nova Troia in Latio iam condita sit ab Aenea, cf. 7, 157 sqq., Tiberium apparet ad Lavinium spectare, quo pertinent etiam vs. 47 sq. Inventam autem esse suam illam ad litus maris docent vs. 43 et 83, fortasse dum remos ex silva petunt, cf. vs. 80 sq. Atqui Lavinium aberat aliquantulum a mari; nempe *Hic* (vs. 46) non est urgendum, sed latiore sensu accipiendum: in ista regione.] 47. *Ex quo* (loco) profectus.] 48. *cognominis* ab *alba* sue ducti.] 52. *signa*, eius, Euandri, cf. vs. 60.] 53. *in m.*, in monte, qui aliquanto post dictus est Palatinus; cf. Liv. 1, 5.] 57. v. 6, 901. Liv. 21, 31 „Postero die profectus *adversa ripa Rhodani* mediterranea Galliae petit.“] 59. v. G. 3, 130.] 60. *minas* eius, v. vs. 52.] 62. ut Terent. Andr. 5, 6, 1 „Ego sum, Pamphilus.“] 65. *Hic*, prope ostium, domus est mea (antrum, in quo habitat Tib.), *caput*, fons meus (v. G. 4, 319), est in Etruria, ex quo ortum flumen meum celsas, in collibus sitas, urbes Etruriae praeterlabitur. Hanc interpretationem commendat vs. 75 sq. Alii, commate post *urbibus* posito, domum intelligunt Romam.] 68. precantes sacrificantesque orientem spectabant, cf. 12, 172.] 69. Ex his verbis apparet eum, qui deum fluminis alicuius invocaret, hanc ex eo flumine aquam, dum preces faceret, sublaeta manu tenuisse; et iungo *undam de flumine*.] 70. Alii *Sustulit* pro *Sustinet*.]

- Nymphae, Laurentes Nymphae, genus amnibus unde est,  
 Tuque, o Thybri tuo genitor cum flumine sancto,  
 Accipite Aenean, et tandem arcete periclis.  
 Quo te cumque lacus, miserantem incommoda nostra,  
 75 Fonte tenet, quocumque solo pulcherrimus exis,  
 Semper honore meo, semper celebrabere donis,  
 Corniger Hesperidum Fluvius regnator aquarum.  
 Adsis o tantum et propius tua numina firmes.  
 Sic memorat, geminasque legit de classe biremis  
 80 Remigioque aptat; socios simul instruit armis.  
 Ecce autem subitum atque oculis mirabile monstrum,  
 • Candida per silvam cum fetu concolor albo  
 Procubuit viridique in litore conspicitur sus:  
 Quam pius Aeneas tibi enim, tibi, maxuma Iuno,  
 85 Mactat sacra ferens et cum grege sistit ad aram.  
 Thybris ea fluvium, quam longa est, nocte tumentem  
 Leniit, et tacita refluens ita substitit unda,  
 Mitis ut in morem stagni placidaeque paludis  
 Sterneret aequor aquis, remo ut luctamen abesset.  
 90 Ergo iter inceptum celerant rumore secundo.  
 Labitur uncta vadis abies; mirantur et undae,  
 Miratur nemus insuetum fulgentia longe  
 Scuta virum fluvio pictasque innare carinas.  
 Olli remigio noctemque diemque fatigant,  
 95 Et longos superant flexus, variisque teguntur  
 Arboribus, viridisque secant placido aequore silvas.  
 Sol medium caeli conscenderat igneus orbem,

71. *gen. amn. u. e.*, quia nymphae sunt deae fontium. | 74 sq. *lacus*, quia putabant fontes ex lacubus subterraneis provenire, cf. G. 4, 319 et 359—372. — *exis*, e fonte. | 76. *hon.*, v. 3, 118. | 77. v. G. 4, 371. — *regnator H. aqu.*, princeps fluviorum Italiae, v. G. 1, 482. | 78. *tantum*, ut *μόνον*, optantis est, ut 6, 74. — *propius*, re aliqua magis perspicua. — *numina*, Servius „tua oracula et promissa;“ idem ad 3, 363 „*numine*, oraculo.“ Nempe vis divinae naturae cernitur etiam in vaticinando et declaranda vaticiniis sua voluntate; et v. 2, 691. | 80. v. 4, 482. | 81. v. G. 2, 441. | 82 sq. cf. vs. 43. | 84. Silius 13, 136 „Mactat, Diva, tibi, *tibi enim*, haec gratissima sacra.“ *enim*, δηλαδή, videlicet, ut par est, ut fieri debet aut solet, nostrum *freilich, natürlich*; nempe Iunoni potissimum eam debebat mactare ex praecepto Heleni 3, 437 sqq.; cf. etiam G. 2, 509. A. 6, 317. | 86. *quam longa est*: significatur quidam rei tenor et perpetuitas per Praesens. | 87. *refluens*, repressus nec prolapsus. | 89. *Stern. aeq.*, sternendo efficeret aequor aquis, aquas quasi complanaret, cf. E. 9, 57. | 90. Imitatus est haec Auson. Mosell. 22 „amoena fluente Subterlabentis tacito rumore Mosellae;“ unde intelligimus rumorem secundum h. l. dici lenem strepitum placidi fluminis navigationi obsecundantis. | 91. *uncta*, picata. — *undae*? v. E. 1, 39. | 92. *Miratur*, v. E. 4, 6. | 93. carinas cum scutis virorum fluvio innare; v. 7, 237. — *pictas*, v. 5, 663. | 94. *noctemq. d.*, opus nocturnum diurnumque; *fatigare* est ad satietatem quandam exercere, plurimum laborem impendere: *noctemque d. f.*, plurimum noctu interdiuque laborant; 9, 605 *silvas*

- Cum muros arcemque procul ac rara domorum  
Tecta vident; quae nunc Romana potentia caelo  
100 Aequavit; tum res inopes Euandrus habebat.  
Ocius advertunt proras urbique propinquant.  
Forte die sollemnem illo rex Arcas honorem  
Amphitryoniadae magno divisque ferebat  
Ante urbem in luco. Pallas huic filius una,  
105 Una omnes iuvenum primi pauperque senatus  
Tura dabant, tepidusque cruor fumabat ad aras.  
Ut celsas videre rates, atque inter opacum  
Adlabi nemus, et tacitis incumbere remis,  
Terrentur visu subito, cunctique relictis  
110 Consurgunt mensis. Audax quos rumpere Pallas  
Sacra vetat, raptoque volat telo obvius ipse,  
Et procul e tumultu: Iuvenes, quae caussa subegit  
Ignotas temptare vias? quo tenditis? inquit.  
Qui genus? unde domo? pacemne huc fertis, an arma?  
115 Tum pater Aeneas puppi sic fatur ab alta,  
Paciferaeque manu ramum praetendit olivae:  
Troiu genas ac tela vides inimica Latinis,  
Quos illi bello profugos egere superbo.  
Euandrum petimus. Ferte haec, et dicite lectos  
120 Dardaniae venisse duces, socia arma rogantis.  
Obstipuit tanto percussus nomine Pallas:  
Egredere o quicumque es, ait, coramque parentem  
Adloquere, ac nostris succede penetibus hospes.  
Excepitque manu, dextramque amplexus inhaesit.  
125 Progressi subeunt luco fluviumque relinquunt.  
Tum regem Aeneas dictis adfatur amicis:  
Optume Graiugenum, cui me Fortuna precari  
Et vitta comptos voluit praetendere ramos,  
Non equidem extimui, Danaum quod ductor et Arcas

*fat.*, peragrandis silvis magnopere operam dant. | 98. *rara*, v. 1, 118. | 101. *advert.* ad ripam. || 102—183. *Aeneas Tiberi subvectus Euandrum invenit sacro Herculis anniversario in luco operantem, benigneque exceptus foedus cum rege iungit epulisque ab eo adhibetur.* | 103. *divis*, Servius „cuius deo sacrificaretur, necesse erat post ipsum reliquos invocari;“ cf. 3, 19; etsi id in sacris Herculis fieri negat Varro teste Plutarcho Quaest. Rom. 90. | 104. *huic unā*, una cum hoc. | 105. *iuvenes* et *iuventus* saepe i. q. viri aetatis militaris. | 107 sq. Ut conspexerunt naves *easque* inter nemus adlabi ac *remiges* remis in placido amne erat prope post ipsum aquarum strepitu moventibus incumbere (5, 15) viderunt | 110. *quos*, eos scilicet, qui intererant his epulis, quas utpote sacras interrumpere nefas erat. | 111. *ipse*, solus, ut 11, 217 sq. „Dirum exsecrantur bellum Turnique hymenaeos: *Ipsum* armis *ipsum* que iubent decernere ferro.“ | 113. *ignotas*, quia ipsi sunt peregrini. | 114. *Qui gen.*, *τινες τὸ γένος.* | 116. v. 7, 154. | 118. *superbo*, *ὑβριστικῶ*, quia superbum est, profugos et *ixéras* pellere. | 119. *Ferte*, nuntiate ei. | 121. *tanto*, cf. 1, 565 sq. | 124. *Excepitque*, v. 5, 504. — *inhaesit* ei, *ἐν τ᾽ ἄρα οἱ πῦ χειρὶ* Homer. | 125.

- 130 Quodque ab stirpe fores geminis coniunctus Atridis;  
Sed mea me virtus et sancta oracula divom,  
Cognatique patres, tua terris didita fama,  
Coniungere tibi, et fatis egere volentem.  
Dardanus, Iliacae primus pater urbis et auctor,  
135 Electra, ut Graii perhibent, Atlantide cretus,  
Advehitur Teucros; Electram maxumus Atlas  
Edidit, aetherios humero qui sustinet orbis.  
Vobis Mercurius pater est, quem candida Maia  
Cyllenae gelido conceptum vertice fudit;  
140 At Maiam, auditis si quicquam credimus, Atlas,  
Idem Atlas generat, caeli qui sidera tollit.  
Sic genus amborum scindit se sanguine ab uno.  
His fretus non legatos neque prima per artem  
Temptamenta tui pepigi; me, me ipse meumque  
145 Obieci caput et supplex ad limina veni.  
Gens eadem, quae te, crudeli Daunia bello  
Insequitur; nos si pellant, nihil afore credunt,  
Quin omnem Hesperiam penitus sua sub iuga mittant,  
Et mare, quod supra, teneant, quodque adluit infra.  
150 Accipe daque fidem. Sunt nobis fortia bello  
Pectora, sunt animi et rebus spectata iuventus.  
Dixerat Aeneas. Ille os oculosque loquentis  
Iamdudum et totum lustrabat lumine corpus.  
Tum sic pauca refert: Ut te, fortissime Teucrum,  
155 Accipio adgnoscoque libens! ut verba parentis  
Et vocem Anchisae magni voltumque recordor!  
Nam memini Hesionae visentem regna sororis  
Laomedontiaden Priamum, Salamina petentem,  
Protinus Arcadiae gelidos invisere finis.  
160 Tum mihi prima genas vestibat flore iuventas;

*luco*, cf. v. 104.] 130. Euander et Atridae ab Iove genus suum repetebant.] 131. *orac.*, cf. 6, 96 sq.] 132. *terris did. f.*, Diodor. Sic. 4, 47 „διαδο-  
δεως τῆς γῆμης εἰς ἅπαντα τόπον.“] 133. cum in fatis esset, ut te  
adirem, accessit etiam animi voluntas.] 134. Ilus enim, filius Dardani, con-  
didit Ilium.] 135. si igitur Graii ita tradunt, ne tu quidem, qui es homo Graius,  
negabis Dardani matrem fuisse Electram, filiam Atlantis.] 136. *adv. T.*, ad  
Teucros, i. e. ad Troadem.] 138. *Vobis*, tibi ac per te tuo generi.] 139. *fud.*,  
de facili partu, cf. G. 1, 13.] 141. *generat*, v. E. 8, 45. — *caeli q. s. t.*,  
quamobrem hic iteratur sententia iam vs. 137 proposita?] 143. *per legatos*, v.  
1, 544. — *per art.*, callide cauteque.] 144. *pepigi*, constitui scilicet, *tent. tui*,  
tentavi te s. animum tuum.] 145. *Obi. cap.*, παρεθέμην τὴν χειρᾶν s. τὴν  
ψυχὴν, Hom. Odyss. 2, 237. 3, 74.] 146. *gens Daunia*, Rutuli, quia Daunus  
pater Turni, 12, 22, hostes Euandri in vicinia Pallantei habitantes vs. 474.] 149.  
v. G. 2, 158.] 157. *visentem*, volentem invisere; quaedam Verba frequentativa  
voluntatem et conatum agenda rei significant, ut *captare aves*, *auguria*;  
Catull. 11, 9 sqq. „Sive trans altas gradietur Alpes Caesaris *visens* monumenta  
magi Gallicum Rhenum horribilesque Britannos.“ — *Hesionae* Telamoni Sala-  
minio nuptae.] 160. *flore*, lanugine 10, 324. cf. Hom. Odyss. 11, 319 sq.]



- Mirabarque duces Teucros, mirabar et ipsum  
 Laomedontiaden; sed cunctis altior ibat  
 Anchises. Mihi mens iuvenali ardebat amore  
 Compellare virum et dextrae coniungere dextram;  
 165 Accessi, et cupidus Phenei sub moenia duxi.  
 Ille mihi insignem pharetram Lyciasque sagittas  
 Discedens chlamydemque auro dedit intertextam,  
 Frenaque bina, meus quae nunc habet, aurea, Pallas.  
 Ergo et, quam petitis, iuncta est mihi foedere dextra,  
 170 Et, lux cum primum terris se crastina reddet,  
 Auxilio laetos dimittam opibusque fuvabo.  
 Interea sacra haec, quando huc venistis amici,  
 Annua, quae differre nefas, celebrate faventes  
 Nobiscum, et iam nunc sociorum adsuescite mensis.  
 175 Haec ubi dicta, dapes iubet et sublata reponi  
 Pocula, gramineoque viros locat ipse sedili,  
 Praecipuumque toro et villosi pelle leonis  
 Accipit Aeneas, solioque invitat acerno.  
 Tum lecti iuvenes certatim araeque sacerdos  
 180 Viscera tosta ferunt taurorum, onerantque canistris  
 Dona laboratae Cereris, Bacchumque ministrant.  
 Vescitur Aeneas simul et Troiana iuventus  
 Perpetui tergo bovis et lustralibus extis.  
 Postquam exempta fames et amor compressus edendi,  
 185 Rex Euandrus ait: Non haec sollemnia nobis,  
 Has ex more dapes, hanc tanti numinis aram  
 Vana superstitio veterumque ignara deorum  
 Inposuit: saevis, hospes Troiane, periclis  
 Servati facimus meritosque novamus honores.  
 190 Iam primum saxis suspensam hanc aspice rupem,

165. *Phen.*, Hom. II. 2, 605. | 166. *pharetr.*, puta et ipsam Lyciam, cf. 7, 816. |  
 168. v. E. 1, 54. | 169. *iuncta est m. f. d.*, Servius „antiquis amicitis per  
 Anchisae hospitium.“ | 171. *opibus*, copia rerum bello gerendo utilium. | 173.  
*faventes*, animo ad rite concelebrandam rem sacram composito. | 175. v. G. 4,  
 378. | 177. iunge *Praecipuum toro*; cum ceteri in gramine assideant, praecipuus  
 honor habetur Aeneae, qui in solio toroque ... cf. vs. 368 sq. ... pelle leonina  
 instrato iubetur considerare; Silius 11, 275 sq. „*Praecipuis* multoque procul  
 splendentibus ostro *Accipitur* sublime toris.“ | 178. *solio invitat*, ut 9, 676  
 „*invitant moenibus* hostem;“ v. E. 2, 30. | 179. *arae*, cf. vs. 271. | 180.  
 v. 1, 195. | 183. *Perpet.*, longe porrecto tergo, Hom. II. 7, 321 „*νότοισιν δ'*  
*Αλάρτα διηπυξέεσσι γέραιρεν*“ et v. E. 9, 46. — exta a Romanis in  
 altaribus comburi solebant, praeterquam in sacro Herculis. || 184—305. *Expo-*  
*nitur ab Euandro causa huius sollemnitatis, Cacus ab Hercule oppressus.* —  
*Finis harum caerimoniarum.* | 184. Hom. Odyss. 3, 67. | 186. cf. vs. 271 sq. |  
 187. *Vana superst.*: Lactant. 4, 28 „qui novos sibi ritus adsumebant, ut deorum  
 vice mortuos honorarent, quos ex hominibus in caelum receptos putabant, hos  
 supersticiosos vocabant; eos vero, qui publicos et antiquos deos colerent, religiosos  
 nominabant.“ | 189. *novamus*, novus enim tum fuit is cultus Herculis. | 190.  
*Iam primum* locum habet in primo introitu rerum exponendarum. — *saxis susp.*

- Disiectae procul ut moles, desertaque montis  
 Stat domus, et scopuli ingentem traxere ruinam.  
 Hic spelunca fuit, vasto submota recessu,  
 Semihominis Caci facies quam dira tenebat,  
 195 Solis inaccessam radiis; semperque recenti  
 Caede tepebat humus, foribusque adfixa superbis  
 Ora virum tristi pendebant pallida tabo.  
 Huic monstro Volcanus erat pater: illius atros  
 Ore vomens ignis magna se mole ferebat.  
 200 Attulit et nobis aliquando optantibus aetas  
 Auxilium adventumque dei. Nam maxumus ultor,  
 Tergemini nece Geryonae spoliisque superbus,  
 Alcides aderat, taurosque hac victor agebat  
 Ingentis, vallemque boves amnemque tenebant.  
 205 At furiis Caci mens efferat, ne quid inausum  
 Aut intractatum scelerisve dolive fuisset,  
 Quattuor a stabulis praestanti corpore tauros  
 Avertit, totidem forma superante iuvenças.  
 Atque hos, ne qua forent pedibus vestigia rectis,  
 210 Cauda in speluncam tractos versisque viarum  
 Indiciis raptos saxo occultabat opaco.  
 Quaerenti nulla ad speluncam signa ferebant.  
 Interea, cum iam stabulis saturata moveret  
 Amphitryoniades armenta abitumque pararet,  
 215 Discessu mugire boves, atque omne querelis  
 Impleri nemo, et colles clamore relinqui.  
 Reddidit una boum vocem vastoque sub antro  
 Mugiit et Caci spem custodita fefellit.  
 Hic vero Alcidae furiis exarserat atro  
 220 Felle dolor; rapit arma manu nodisque gravatum  
 Robur et aerii cursu petit ardua montis.

*rup.*, vix etiam haerentem in saxo subiecto. | ... *adspice* ..., ut *moles disiectae sunt*, v. E. 4, 52. | 193. *v. subm. r.*, longe ab aditu reducta. | 196. *superbis*, quia ora hominum tamquam spolia iis erant affixa, v. 2, 504. | 197. *pallida tabo*, ut tabentia. | 198. *atros*, v. G. 2, 309. | 200. *et nob.*, ut multis antea, quibus Hercules exstiterat vindex iniuriae ultorque, ἀλεξίκακος inde habitus appellatusque. | 204. *amnem*, ripas Tiberis. | 206. Alii *Aut intentatum*. — *fuisset* ex mente Euandri, non Caci, dictum: ni id fecisset, rem audaciae prociectissimae inausam tendiisset. | 207. *a stabulis*, a pascuis, ubi procubuerant; *locum herbidum* appellat Livius 1, 7. | 208. *superante*, tali, ut nihil supra esse possit. | 209. *ped. vest. r.*, idem, quod vestigia rectis pedibus facta. | 210 sq. versa erant indicia viae, quae venientium ex spelunca boum vestigia monstrabat, non in speluncam tendentium. | 212. *signa* eodem modo, quo via, *ferre s. ducere* dicuntur; ergo hoc dicit poeta: quaerenti nulla signa ad speluncam ferentia apparebant. | 213. *stabulis mov.*, v. vs. 207. | 215. *Discessu*, v. 10, 445. | 216. Processerant boves ex valle in proximos colles eosque iam reliquere incipiebant. — *clamore*, v. 2, 823. | 219. *furiis*, prae iracundia, cf. vs. 494. — *exarserat* ... *rapit*: significatur per Praesens praegresso Plusquamperfecto res continuo subsequuta; similis festinatio est 12, 430. | 220. Servius „Felle irascimur secundum

- Tum primum nostri Cacus videre timentem  
 Turbatumque oculis; fugit ilicet ocior Euro  
 Speluncamque petit; pedibus timor addidit alas.  
 225 Ut sese inclusit, ruptisque inmane catenis  
 Deiecit saxum, ferro quod et arte paterna  
 Pendebat, fultosque emuniit obiiice postis,  
 Ecce furens animis aderat Tiryntius, omnemque  
 Accessum lustrans huc ora ferebat et illuc,  
 230 Dentibus infrendens. Ter totum fervidus ira  
 Lustrat Aventini montem; ter saxea temptat  
 Limina nequiquam; ter fessus valle resedit.  
 Stabat acuta silex, praecisis undique saxis  
 Speluncae dorso insurgens, altissima visu,  
 235 Dirarum nidis domus opportuna volucrum.  
 Hanc, ut prona iugo laevum incumbibat ad amnem,  
 Dexter in adversum nitens concussit et imis  
 Avolsam solvit radicibus; inde repente  
 Impulit; impulsu quo maxumus intonat aether,  
 240 Dissultant ripae refluitque exterritus amnis.  
 At specus et Caci detecta adparuit ingens  
 Regia et umbrosae penitus patuere cavernae:  
 Non secus, ac si qua penitus vi terra dehiscens  
 Infernas reseret sedes et regna recludat  
 245 Pallida, dis invisā, superque inmane barathrum  
 Cernatur, trepidentque inmisso lumine Manes.  
 Ergo insperata deprensū in luce repente  
 Inclusumque cavo saxo atque insueta rudentem  
 Desuper Alcides telis premit, omniaque arma  
 250 Advocat et ramis vastisque molaribus instat.  
 Ille autem, neque enim fuga iam super ulla pericli,  
 Faucibus ingentem fumum, mirabile dictu,  
 Evomit involvitque domum caligine caeca,  
 Prospectum eripiens oculis, glomeratque sub antro  
 255 Fumiferam noctem commixtis igne tenebris.  
 Non tulit Alcides animis, seque ipse per ignem  
 Praecipiti iecit saltu, qua plurimus undam  
 Fumus agit nebulaque ingens specus aestuat atra.  
 Hic Cacus in tenebris incendia vana vomentem

physicos, ut splene (Pers. 1, 16) ridemus.“] 227. aditum emuniit, fulciens eum, s. praestruens, obiiice; cf. Ovid. Fast. 1, 563 et eiusd. A. A. 2, 244 „apposita ianua fulta sera.“] 236. *laevum*? at Tiberis Aventino est a dextra. Ergo laevum Herculi puta, cui ex valle ad speluncam Caci redeunti Tiberis ad laevam fuit.] 242. *Regia* domus Caci appellari videtur propter ingentem amplitudinem.] 245. *invisā*, „οὐκ ὁρατὰ ... τὰ τε στυγέουσι θεοὶ περ,“ Hom. Il. 20, 61—65. — *super*, ἄνωθεν, superne.] 248. *insu. rud.*, v. G. 3, 149.] 253. *caeca*, per quam non licet quidquam dispicere.] 256. Non tulit eam indicationem. — *animis*, prae ira.] 257. *iecit*, cf. 10, 683. — *undam*, v. G. 1,

- 260 Corripit in nodum complexus, et angit inhaerens  
 Elisos oculos et siccum sanguine guttur.  
 Panditur extemplo foribus domus atra revolsis,  
 Abstractaeque boves abiurataeque rapinae  
 Caelo ostenduntur, pedibusque informe cadaver  
 265 Protrahitur. Nequeunt expleri corda tuendo  
 Terribilis oculos, voltum villosaque saetis  
 Pectora semiferi atque exstinctos faucibus ignis.  
 Ex illo celebratus honos, laetique minores  
 Servavere diem, primusque Potitius auctor  
 270 Et domus Herculei custos Pinaria sacri.  
 Hanc aram luco statuit, quae Maxuma semper  
 Dicitur nobis, et erit quae maxuma semper.  
 Quare agite, o iuvenes tantarum in munere laudum  
 Cingite fronde comas et pocula porgite dextris  
 275 Communemque vocate deum et date vina volentes.  
 Dixerat: Herculea bicolor cum populus umbra  
 Velavitque comas foliisque innexa pendit,  
 Et sacer inplevit dextram scyphus. Ocius omnes  
 In mensam laeti libant divosque precantur.  
 280 Devexo interea propior fit Vesper Olympo:  
 Iamque sacerdotes primusque Potitius ibant,  
 Pellibus in morem cincti, flammasque ferebant.  
 Instaurant epulas, et mensae grata secundae  
 Dona ferunt, cumulantque oneratis lancibus aras.  
 285 Tum Salii ad cantus incensa altaria circum

472.] 260 sq. elidit fauces Caci arto brachiorum nodo constricti, quo fit, ut elidantur etiam oculi: iunge in *nod. compl.*, non *Corrip. in nod.*] 263. *abiur.*, quas se habere Cacus periurio negaverat.] 267. vident, ut exincti sunt ignes faucium; vulgo dicimus: vident fauces exinctis ignibus.] 269. *prim. auctor*: Potitius, ut tradit Livius 1, 7, ab Euandro ritum huius sacri Graecanicum, ignotum Italo homini, edoctus antistes eius sacri primus fuit, quare per eum potissimum tamquam auctorem id sollemne ad posteros propagatum dici potuit; *ἡγουμένους τῆς τερονουγίας* Potitios appellat Dionys. Archaeol. 1, 40, Pinarios ministros eius sacri esse putabimus.] 271 sq. dicetur, ut vere est eritque, maxima; nullus enim deus habuit maiorem. — *statuit*, quis? v. 6, 734 et cf. Ovid. Fast. 1, 581 sq.] 273. Troianos alloquitur. — *tant. in mun. l.*, in sacrificio Herculi ob egregium illud facinus instituto.] 274. *porgite*, quod libatio fit manu exporrecta.] 275. *vocate*, invoke; *communem* Arcadibus et Troianis foedere iam iunctis, cf. vs. 172—174. 12, 118. — *date v.*, libate Herculi.] 276. v. G. 2, 66. — „Post Urbem conditam lauro coronari solebant Graeco more, qui apud aram Maximam sacra faciebant.“ Servius. — *bicolor*, quia aversa folia albicant.] 278. quare scyphus? v. E. 6, 17.] 279. *libant*, v. 1, 737. — *dū*, v. vs. 103.] 280. *devexo Olympo*, inclinante se caelo, motu diurno circumacto, cf. 2, 250.] 282. *Pell. cincti*, cinctuti Lupercorum more, i. e. subligaculis e pelle circa pudenda cincti, cetera nudi.] 283. v. 7, 146 et G. 2, 101.] 285. *Tum*, non post, sed praeter illos, v. 5, 455. — Salii, quos Numa Martis sacerdotes esse voluit, hic attribuuntur Herculi, itemque Tiburi Albaeque Longae Salii fuerunt eius sacerdotes; cf. Macrob. 3, 12. — Peractis epulis sacrificiis libationibusque hymni in honorem eius dei, ad quem pertineret sacrificii sollem-

- Populeis adsunt evincti tempora ramis,  
 Hic iuvenum chorus, ille senum; qui carmine laudes  
 Herculeas et facta ferunt: ut prima novercae  
 Monstra manu geminosque premens eliserit anguis;  
 290 Ut bello egregias idem disiecerit urbes,  
 Troiamque Oechaliamque; ut duros mille labores  
 Rege sub Eurystheo, fatis Iunonis iniquae,  
 Pertulerit. Tu nubigenas, invicte, bimembris,  
 Hylaeumque Pholumque, manu, tu Cresia mactas  
 295 Prodigia et vastum Nemeae sub rupe leonem.  
 Te Stygii tremuere lacus, te ianitor Orci  
 Ossa super recubans antro semiesa cruento;  
 Nec te ullae facies, non terruit ipse Typhoeus,  
 Arduus arma tenens; non te rationis egyptem  
 300 Lernaes turba capitum circumstetit anguis.  
 Salve, vera Iovis proles, decus addite divis,  
 Et nos et tua dexter adi pede sacra secundo.  
 Talia carminibus celebrant; super omnia Caci  
 Speluncam adiiciunt, spirantemque ignibus ipsum.  
 305 Consonat omne nemus strepitu collesque resulant.  
 Exin se cuncti divinis rebus ad urbem  
 Perfectis referunt. Ibat rex obsitus aevo  
 Et comitem Aenean iuxta natumque tenebat  
 Ingrediens, varioque viam sermone levabat.  
 310 Miratur facilisque oculos fert omnia circum  
 Aeneas, capiturque locis, et singula laetus  
 Exquirisque auditque virum monumenta priorum.

nitas, cantari solebant, cf. Hom. II. 1, 467—474. | 287. Ergo bipartitus fuit chorus et „senes tantum voce laudes Herculis exsequebantur, iuvenes et gestu corporis eius facta monstrabant.“ Servius. — *senes*, viri constantis aetatis; similiter in descriptione civium Romanorum distinguuntur seniores et iuniores. | 288 sq. cf. Theocr. 24, 11 sqq. Ovid. Met. 9, 67. — *prima*, quod infanti Herculi oblata sunt. — Ceterum imitatus haec est Ovidius Met. 4, 11 sqq., nisi potius utrumque poetam ad sollemnem hymnorum formulam se applicavisse existimabimus. | 291. Neptunus fraudem Laomedontis ulturus monstrum marinum immiserat Troadi. Hercules eo interfecto frustratus promisso praemio Troiam expugnavit. — Oechaliam, oppidum Euboeae, propter perfidiam Euryti, qui promissam ei filiam Iolen non dedit, vi captam evertit. | 292. *fat. Iun.*, fatali quadam necessitate, quam odium Iunonis ei imposuerat, cf. Hom. II. 19, 95—133. | 293. cf. Ovid. Met. 12, 536—541. | 294 sp. *Cres. mact. Prod.*, victor es tauri Cretensis, v. E. 8, 45 et cf. Ovid. Met. 4, 23. | 296. v. 6, 392 sqq. Hom. II. 8, 368. | 298. *facies*, monstra, quae apud inferos occurrebant, cf. 6, 285 sqq., in quibus Typhoeus et hydra Lernaes; cf. etiam vs. 194 supra. | 299. *Arduus*, cf. 5, 460. 10, 197. — *rat. egent.*, sc. terrore percussus. | 302. Ovid. Fast. 1, 67 „*Dexter ades ducibus*.“ eiusd. Trist. 5, 3, 57. | 303. *super om.*, v. 7, 462. || 306—368. *Domum abducens secum Aeneam Euander docet, qui qualesque fuerint antiquissimi habitantes eius regionis, ostenditque loca inprimis memorabilia.* | 307. Terent. Eun. 2, 2, 5 „*annis pannisque obsitus*.“ | 310. *faciles*, qui facile se movent, volabiles, Manil. 1, 647 „*Circumfer faciles oculos.*“ |

- Tum rex Euandrus Romanae conditor arcis:  
 Haec nemora indigenae Fauni Nymphaeque tenebant,  
 315 Gensque virum truncis et duro robore nata,  
 Quis neque mos neque cultus erat, nec iungere tauros,  
 Aut componere opes norant, aut parcere parto,  
 Sed rami atque asper victu venatus alebat.  
 Primus ab aetherio venit Saturnus Olympo,  
 320 Arma Iovis fugiens et regnis exsul adeptis.  
 Is genus indocile ac dispersum montibus altis  
 Conposuit, legesque dedit, Latiumque vocari  
 Maluit, his quoniam latuisset tutus in oris.  
 Aurea quae perhibent, illo sub rege fuere  
 325 Saecula: sic placida populos in pace regebat;  
 Deterior donec paulatim ac decolor aetas  
 Et belli rabies et amor successit habendi.  
 Tum manus Ausonia et gentes venere Sicanae,  
 Saepius et nomen posuit Saturnia tellus;  
 330 Tum reges asperque inmani corpore Thybris,  
 A quo post Itali fluvium cognomine Thybrim  
 Diximus; amisit verum vetus Albula nomen.  
 Me pulsum patria pelagique extrema sequentem  
 Fortuna omnipotens et ineluctabile fatum  
 335 His posuere locis, matrisque egere tremenda  
 Carmentis Nymphae monita et deus auctor Apollo.  
 Vix ea dicta: dehinc progressus monstrat et aram  
 Et Carmentalem Romani nomine portam  
 Quam memorant, Nymphae priscum Carmentis honorem,  
 340 Vatis fatidicae, cecinit quae prima futuros  
 Aeneadas magnos et nobile Pallanteum.  
 Hinc lucum ingentem, quem Romulus acer Asylum

313. *Rom. cond. a.*, Pallantei, ubi Virgilii tempore erat Palatium; cf. 9, 9. | 315. cf. Iuven. 6, 11—13. | 316. *mos* nascitur ex certa quadam vitae instituendae regendaeque ratione, *cultus* ex inventione artium. | 317. *comp.*, horreis condere, *opes* ruris, frumentum. | 318. *asper victu v.*, qui praebet victum asperum, multo labore et molestia parandum; cf. 1, 445. | 319—322. Qui soluto sermone utitur, ita fere diceret: *Primus* Saturnus, cum in has terras venisset, homines rudes ac dispersos ad quandam communionem vitae ac societatem vocavit. | 322. *Lat. voc. mal.*, quam Saturniam. | 326. *decolor*, degenerans ab aurea, et mutato quasi colore ferrea facta. | 328. Ausones etiam Aborigines dicti. — *Sicanae*: Siculae appellandae fuerunt, non Sicanae; sed ubicumque veteres illos Siculos, quos intra Tiberim et Lirim habitasse constat inter historicos, commemorat poeta, Sicanorum nomine usus est, qui quidem Hispania pulsī in Siciliam venerunt. | 329. *Sat. t.*, post etiam Oenotria et Italia appellata, et a Graecis Hesperia, Tyrnesia s. Tyrrhenia. | 330. *que*, v. 9, 811. | 333. *pel. extrema*: non poterat non ultima haec ora ea aetate videri Graecis hominibus, quibus terrae ad Occidentem spectantes ignotae essent. — *sequentem*, ut *Italiam sequi* 4, 361. 381. | 337. *aram* vicinam portae Carmentali; fuit etiam templum Carmentis, a matronis Romanis positum religiosissimeque cultum. | 340 sq. cf. Ovid. Fast. 1, 515 sqq. | 342. Asylum „locus, qui nunc saeptus descendentibus (de Capitolio) inter duos

- Rettulit, et gelida monstrat sub rupe Lupercal,  
 Parrhasio dictum Panos de more Lycaeï.  
 345 Nec non et sacri monstrat nemus Argileti,  
 Testaturque locum, et letum docet hospitii Argi.  
 Hinc ad Tarpeiam sedem et Capitolia ducit,  
 Aurea nunc, olim silvestribus horrida dumis.  
 Iam tum religio pavidos terrebat agrestis  
 350 Dira loci; iam tum silvam saxumque tremebant.  
 Hoc nemus, hunc, inquit, frondoso vertice collem,  
 Quis deus incertum est, habitat deus; Arcades ipsum  
 Credunt se vidisse Iovem, cum saepe nigrantem  
 Aegida concuteret dextra, nimbosque cieret.  
 355 Haec duo praeterea disiectis oppida muris,  
 Reliquias veterumque vides monumenta virorum.  
 Hanc Ianus pater, hanc Saturnus condidit arcem;  
 Ianiculum huic, illi fuerat Saturnia nomen.  
 Talibus inter se dictis ad tecta subibant  
 360 Pauperis Euandri, passimque armenta videbant  
 Romanoque foro et lautis mugire Carinis.  
 Ut ventum ad sedes: Haec, inquit, limina victor  
 Alcides subiit, haec illum regia cepit.  
 Aude, hospes, contemnere opes, et te quoque dignum  
 365 Finge deo, rebusque veni non asper egenis.  
 Dixit, et angusti subter fastigia tecti

lucòs est," Liv. 1, 8. | 343. *Rett.* Asylum Graecum est nomen, Graeca res; a Graecis rem nomenque repetit s. rettulit Romulus; itaque recte Servius, ad antiquissimum illud asylum, vel templum vel aram Misericordiae, quo Heraclidæ confugerunt, haec verba pertinere ratus „fecit ad imitationem Atheniensis Asyli.“ — *Lupercal*, antrum sub monte Palatino Pani sacrum. | 344. Id *Lupercal* a *Iupis* appellasse Romani dicuntur, eo more in hoc nomine usi, quo Graeci, qui Panem Lycaeum a vocabulo *λύκος* (non a cognomini monte) nomen habuisse ferebant. — *Parrhasia* oppidum Arcadiae, itaque *Parrhasius* i. q. Arcadicus. | 345. *Argiletum* (Argi letum) locus inter Capitolinum et Aventinum; ibi postea fuerunt tabernae librariorum, sutorum. „Euander Argum quendam excepit hospitio. Qui cum de eius cogitaret interitu, ut ipse regnaret, Euandro haec non sentiente socii intellexerunt et Argum necarunt. Cui Euander et sepulchrum fecit et locum sacravit hospitalitatis causa.“ Haec Servius. | 346. *Test. loc.*, quo tamquam teste crimen laesi iuris hospitalis a se removeat. | 349 sq. *relig. dira loci*, sanctitas loci horrorem incutiens. | 352. *ipsum*, ἐναργῆς, *leibhaftig*. | 353. *saepe*, v. 1, 148. — *nigr.*, nigris nubibus, quae motu aegis efficiuntur, involutam, Hom. II. 4, 167: ἐπισσεύει ἐρεμνὴν ἀγύλδα πᾶσιν. | 354. cum Iuppiter aegide utitur ad homines fulminibus dirisque tempestatibus terrendos, *dextra* manu eam concutit; et, Iuppiter Imperator (quod in nummis Imp. Commodi videre licet) sceptrum dextra gerit, sinistra tenet fulmen. | 358. *fuerat*, v. 7, 532. — *Saturn.*, in monte Capitolino, qui ipse olim Saturnus dictus. | 361. *lautis*, quae Virgillii aetate magnificis domibus erant ornatae. | 363. *cepit*, i. e. tantus cum esset Hercules, tamen non est dedignatus in hanc parvulam inopemque domum devertere; Curt. 7, 8 „orbis terrarum te non *caperet*.“ adde 9, 644. | 364. „sapere aude.“ Horat. Ep. 1, 2, 40. | 365. *asper* adiancto Dativo is dicitur, qui cum asperitate aversatur quidpiam, Sil. It. 12, 348 „asper paci,“ Horat. A. P. 163

- Ingentem Aenean duxit stratisque locavit,  
 Effultum foliis et pelle Libystidis ursae.  
 Nox ruit, et fuscis tellurem amplectitur alis.
- 370 At Venus haud animo nequiquam exterrita mater,  
 Laurentumque minis et duro mota tumultu  
 Vulcanum adloquitur, thalamoque haec coniugis aureo  
 Incipit, et dictis divinum adspirat amorem:  
 Dum bello Argolici vastabant Pergama reges
- 375 Debita casurasque inimicis ignibus arces,  
 Non ullum auxilium miseris, non arma rogavi  
 Artis opisque tuae; nec te, carissime coniunx,  
 Incassumve tuos volui exercere labores,  
 Quamvis et Priami deberem plurima natis,
- 380 Et durum Aeneae flevissem saepe laborem.  
 Nunc Iovis inperiis Rutulorum constitit oris:  
 Ergo eadem supplex venio, et sanctum mihi numen  
 Arma rogo, genetrix nato. Te filia Nerei,  
 Te potuit lacrimis Tithonia flectere coniunx.
- 385 Aspice, qui coeant populi, quae moenia clausis  
 Ferrum acuunt portis in me excidiumque meorum.  
 Dixerat, et niveis hinc atque hinc diva lacertis  
 Cunctantem amplexu molli fovet. Ille repente  
 Accepit solitam flammam, notusque medullas
- 390 Intravit calor et labefacta per ossa cucurrit:  
 Non secus atque olim, tonitru cum rupta corusco  
 Ignea rima micans percurrit lumine nimbos.  
 Sensit laeta dolis et formae conscia coniunx.  
 Tum pater aeterno fatur devinctus amore:
- 395 Quid caussas petis ex alto? fiducia cessit  
 Quo tibi, diva, mei? Similis si cura fuisset,

„monitoribus asper.“| 368. cf. vs. 177.|| 369—453. *Nocte insecuta Venus, sollicita de periculis filio imminentibus, precibus blanditiisque ambit Vulcanum, ut arma fabricetur Aeneae, isque haud cunctatus promittit posteroque mane se accingit ad faciendum promissum.*| 371. *duro*, pleno periculi, cf. 1, 563.| 373. *dict. adsp. am.*, verba facit plena amoris aptaque ad devinciendum amore animum Vulcani. — *divin.*, qualem dea Venus adspirare potest.| 375. *Deb.*, debita (quia fatum ita ferebat) *vastari*, ut 9, 107 „tempora Parcae debita complerant,“ i. e. *conpleri debita*.| 377. *Art. op. t.*, puta: et pulchra et egregia.| 379. *natis*, Paridi, v. E. 6, 42.| 383 sq. Thetis Achilli, ap. Hom. II. 18, 429 sqq., Aurora Memnoni arma petit a Vulcano; et v. 1, 489.| 388. pro simplici *amplectitur* ornati *amplexu m. fovet*.| 390. *labef.*, soluta, calore scilicet, ergo i. q. liquefacta, v. G. 3, 272.| 391. *olim*, v. 5, 125. — *tonitru*, v. 2, 323. — *rupta*, quae apparet ruptis nubibus, ipsas scilicet rumpens, v. 3, 199, „καταρραγείσα βροντή“ Hypoth. Prometh. Aesch. — *Iunge corusco micans lumine*, A. 1, 90 „micat ignibus aether.“| 392. *Ign. rima*, fulgur tenuem faciens sulcum.| 393. *laeta d.*, *δολοφρονέουσα* ap. Hom.| 394. *aet.*, ut pleraque sunt in diis aeterna, ita amor, ut ap. Lucret. 1, 35 „aeterno devictus vulnere amoris;“ ira supra 1, 36, ὕβρις Eurip. Bacch. 9.| 395 sq. Quid causis longe petitis oras id, quod sola gratia obtinere debes?| 396 sq. *fuisse*, v. 7, 653.|



- Tum quoque fas nobis Teucros armare fuisset;  
 Nec Pater omnipotens Troiam nec fata vetabant  
 Stare decemque alios Priamum superesse per annos.  
 400 Et nunc, si bellare paras atque haec tibi mens est,  
 Quidquid in arte mea possum promittere curae,  
 Quod fieri ferro liquidove potest electro,  
 Quantum ignes animaeque valent, absiste precando  
 Viribus indubitare tuis. Ea verba locutus  
 405 Optatos dedit amplexus, placidumque petivit  
 Coniugis infusus gremio per membra soporem.  
 Inde ubi prima quies medio iam noctis abactae  
 Curriculo expulerat somnum, cum femina primum,  
 Cui tolerare colo vitam tenuique Minerva  
 410 Inpositum, cinerem et sopitos suscitavit ignis,  
 Noctem addens operi, famulasque ad lumina longo  
 Exercet penso, castum ut servare cubile  
 Coniugis et possit parvos educere natos:  
 Haud secus Ignipotens nec tempore segnior illo  
 415 Mollibus e stratis opera ad fabrilia surgit.  
 Insula Sicanium iuxta latus Aeoliamque  
 Erigitur Liparen, fumantibus ardua saxis —  
 Quam subter specus et Cycloperum exesa caminis  
 Antra Aetnaea tonant, validique incudibus ictus  
 420 Auditū referunt gemitum, striduntque cavernis  
 Stricturae Chalybum, et fornacibus ignis anhelat —  
 Volcani domus, et Volcania nomine tellus.  
 Hoc tunc Ignipotens caelo descendit ab alto.  
 Ferrum exercebant vasto Cyclopes in antro,  
 425 Brontesque Steropesque et nudus membra Pyracmon.  
 His informatum manibus iam parte polita  
 Fulmen erat, toto Genitor quae plurima caelo

397. *Tum*, cf. vs. 374. | 399. cf. 7, 313—15. | 402. *electro*, v. G. 3, 522. | 403. *animae*, spiritus folium. — Ceterum observa orationem ἀναχόλουρον, v. G. 3, 464; id enim debebat dicere: Quidquid curae possum promittere ..., *id precari absiste*, i. e. *id promitto*. | 406. v. vs. 30. | 407. *prima*, v. G. 3, 130. — *abactae* ab ascensu et conversae ad descensum. | 408 sqq. cf. Hom. II. 12, 433—35. | 409. *tenui* „exiliter victum praebente“ Serv. — *Min.*, v. G. 1, 295. | 410. cf. vs. 542. Ovid. Met. 8, 641 sq. | 414. Haud secus illo tempore nec segnior surgit Vulc. | 417. *Lip.*, unam ex Aeoliis s. Vulcaniis insulis. | 419. *Aetn.*, talia, qualia sunt Aetnae: ignivoma. — *incud. ictus*, qui fiunt in incudibus, v. 7, 226. | 420. *Aud. ref. gem.*, audiuntur et resonant per antra. | 421. *Str. Chal.*, quales cuduntur ab operis Chalybum, v. G. 1, 58. | 423. *Hoc* antique pro *huc*, et respondet illud Particulis *eo et quo*; quamquam haud scio an Homericam illa exprimere voluerit poeta „πῇ μεμανία κατ’ Οὐλύμπου τόδ’ ἰχάνεις“ Il. 14, 398. Od. 17, 444, „πόθεν τόδε νυκτὸς ἐν ὧρῃ ἐρχη“ Hymn. in Merc. 155, parum feliciter imitatus, quando ea quidem significant: quorsum et unde haec itio? v. 2, 690. | 427. *Fulmen ... quae plurima*, Hom. Odyss. 5, 421 sq. „ἥτος, οἷά τε πολλὰ τρέφει κλυτὸς Ἀμφιτρίτη.“

- Deiicit in terras, pars imperfecta manebat.  
 Tris imbris torti radios, tris nubis aquosae  
 430 Addiderant, rutili tris ignis et alitis Austri.  
 Fulgores nunc terrificos sonitumque metumque  
 Miscebant operi flammisque sequacibus iras.  
 Parte alia Marti currumque rotasque volucris  
 Instabant, quibus ille viros, quibus excitat urbes;  
 435 Aegidaque horrifera, turbatae Palladis arma,  
 Certatim squamis serpentum auroque polibant,  
 Connexosque anguis ipsamque in pectore divae  
 Gorgona, desecto vertentem lumina collo.  
 Tollite cuncta, inquit, coeptosque auferte labores,  
 440 Aetnaei Cyclopes, et huc advertite mentem:  
 Arma acri facienda viro. Nunc viribus usus,  
 Nunc manibus rapidis, omni nunc arte magistra.  
 Praecipitate moras. Nec plura effatus; at illi  
 Ocius incubuere omnes pariterque laborem  
 445 Sortiti. Fluit aes ravis aurique metallum,  
 Volnificusque chalybs vasta fornace liquescit.  
 Ingentem clipeum informant, unum omnia contra  
 Tela Latinorum, septenosque orbibus orbis  
 Impediunt. Alii ventosis follibus auras  
 450 Accipiunt redduntque; alii stridentia tinguunt  
 Aera lacu. Gemit inpositis incudibus antrum.  
 Illi inter sese multa vi brachia tollunt  
 In numerum, versantque tenaci forcipe massam.  
 Haec pater Aeoliis properat dum Lemnius oris,  
 455 Euandrum ex humili tecto lux suscitât alma

429 sqq. In eo fulmine omnia coniuncta reperiuntur, quae in vero fulmine coniuncta esse solent. — *torti*, constricti et coacti in grandinem. | 430. et item tres alitis A.; ceterum v. 2, 649. | 432. *iras*, vim illam, qua fulmen quasi iratum omnia, quae tangit, ignem concipientia perimit flammis sequacibus, i. e. proxima quaeque avidè corripientibus ac longius longiusque serpentibus. | 434. quo curru cum invehitur, concitat viros ad bellum, unde *λαοσσόος* dictus; et cf. vs. 3 sq. | 435. *aegis*, h. l. est lorica Palladis. — *turbatae*, iratae. | 436 sq. ornabant aegidem serpentibus squamarum aurearum (v. G. 1, 173), qui inter se connexi extremam loricae caputque Medusae in media positum ambiebant. | 438. *vert. lum.*, oculos huc et illuc flectentem tamquam vivos; quae res et miraculi plena et terroris; cf. Hom. II. 18, 417 sqq. | 440. *Aetnaei*, cf. vs. 419 et 3, 678. | 441. *usus*, opus est. | 442. *o. arte magistra*, quae docet, quo quidque modo faciendum effingendumque sit: praesidio omnium praeceptorum artis opus est. | 444 sq. iunge omnes pariterque sortiti, non incubuere et sortiti sc. sunt. | 447. v. 7, 470. | 448. *sept. o. o. inped.*, septem laminarum orbes (*πύργας* Hom. II. 18, 481) ita inter se iungunt compinguntque, ut divelli non possint. | 451. *impos.*, v. G. 4, 173. | 453. *In num.*, v. E. 6, 27. || 454—519. *Mane Euander ad Aenean se confert commemorataque virum regni sui tenuitate validius auxilium a Caeritibus Etruscis eum sperare iubet et quadringentos lectos equites Arcadas duce Pallante cum eo ad bellum praefecturos promittit.* | 454. *Aeol.*,

- Et matutini volucrum sub culmine cantus.  
 Consurgit senior, tunicaque inducitur artus  
 Et Tyrrhena pedum circumdat vincula plantis;  
 Tum lateri atque humeris Tegeaeum subligat ensem,  
 460 Demissa ab laeva pantherae terga retorquens.  
 Nec non et gemini custodes limine ab alto  
 Praecedunt gressumque canes comitantur herilem.  
 Hospitis Aeneae sedem et secreta petebat,  
 Sermonum memor et promissi muneris, heros.  
 465 Nec minus Aeneas se matutinus agebat.  
 Filius huic Pallas, illi comes ibat Achates.  
 Congressi iungunt dextras, mediisque residunt  
 Aedibus et licito tandem sermone fruuntur.  
 Rex prior haec:  
 470 Maxume Teucrorum ductor, quo sospite numquam  
 Res equidem Troiae victas aut regna fatebor,  
 Nobis ad belli auxilium pro nomine tanto  
 Exiguae vires: hinc Tusco elaudimur amni,  
 Hinc Rutulus premit, et murum circumsonat armis;  
 475 Sed tibi ego ingentis populos opulentaque regnis  
 Iungere castra paro; quam fors inopina salutem  
 Ostentat. Fatis huc te poscentibus adfers.  
 Haud procul hinc saxo incolitur fundata vetusto  
 Urbis Agyllinae sedes, ubi Lydia quondam  
 480 Gens, bello praeclara, iugis insedit Etruscis.  
 Hanc multos florentem annos rex deinde superbo

v. vs. 417. Lemnos insula Vulcano inprimis grata. | 456. *volucr. s. culm.*, hirundinum. | 457 sqq. cf. Hom. II. 2, 42 sqq. | 458. Servius crepidas significari ait. | 460. *retorqu.*, Servius „a sinistro humero pellem demissam habuit, quam retorquens et in dextram revocans partem se amiciebat;“ cf. 8, 666. | 461. *l. ab alto*: putabimus Euandrum a limine descendisse per gradus aliquos, cf. 2, 442 sq., quamquam ea res videtur humilitati istius casae (vs. 455) parum convenire. | 462. comitamur non solum pone sequendo vel ad latus incedendo, sed etiam praecedendo, cf. 5, 76. | 463. *Aeneas secreta*, cf. G. 4, 403 et v. G. 1, 173. Quae vs. 359—368 leguntur, Aeneam in ipsa regia Euandri noctem transegisse persuadent; sed quae narrantur vs. 461 sq., verbis *Aeneae sedem et secreta* secretam a regia s. separatam significari sedem probant, poetam igitur a se ipso dissidere. | 464. cf. vs. 170 sq. | 465. v. 6, 337. — *matut.*, *ὑπνῳτος*, et v. 4, 303. | 467 sq. *med. Aed.*, v. 2, 512. — *licito*, et quia eo utuntur sine arbitris, et quia res sacra (vs. 172 sqq.) et nox moram fecerat. | 472. *pro nomine*, Servius „pro tui nominis gloria,“ et cf. vs. 121 et 470 sq.; nisi forte: pro mei nominis fama, cf. vs. 132. | 474. v. vs. 146. | 475. *opulenta regnis*, Servius „Tuscia duodecim lucumones (totidem, quot populos) habuit, i. e. reges, quibus unus praecerat,“ isque videtur Mezentius fuisse, id quod probatur vs. 494 sq. et 502. Etrusci autem, postquam Mezentium tuendum suscepit Turnus, vs. 493, castra ad amnem Caeretanum (vs. 597—604) posuerunt, opulenta illa quidem regnis dicta, quia inventus duodecim populorum (regnorum) in his castris consederat. | 478. *saxo vetusto*, Servius „antiquo opere;“ spectat ea res ad muros urbium Etruscarum ingentibus saxis structos, Pelasgicam originem testantes. | 479. *Agyll.*, v. 7, 652. — *Lyd.*, v. 2, 782. | 481. *deinde*, v. 2, 391. |

- Inperio et saevis tenuit Mezentius armis.  
 Quid memorem infandas caedes, quid facta tyranni  
 Effera? di capiti ipsius generique reservent!
- 485 Mortua quin etiam iungebat corpora vivis,  
 Componens manibusque manus atque oribus ora,  
 Tormenti genus, et sanie taboque fluentis  
 Complexu in misero longa sic morte necabat.  
 At fessi tandem cives infanda furentem
- 490 Armati circumsistunt ipsumque domumque,  
 Obtruncant socios, ignem ad fastigia iactant.  
 Ille inter caedem Rutulorum elapsus in agros  
 Confugere et Turni defendier hospititis armis.  
 Ergo omnis furiis surrexit Etruria iustis;
- 495 Regem ad supplicium praesenti Marte reposcunt.  
 His ego te, Aenea, ductorem milibus addam.  
 Toto namque fremunt condensae litore puppes,  
 Signaque ferre iubent; retinet longaevus haruspex  
 Fata canens: O Maeoniae delecta iuventus,
- 500 Flos veterum virtusque virum, quos iustus in hostem  
 Fert dolor et merita accendit Mezentius ira,  
 Nulli fas Italo tantam subiungere gentem:  
 Externos optate duces. Tum Etrusca resedit  
 Hoc acies campo, monitis exterrita divom.
- 505 Ipse oratores ad me regnique coronam  
 Cum sceptro misit mandatque insignia Tarchon,  
 Succedam castris, Tyrrhenaque regna capessam.  
 Sed mihi tarda gelu saeculisque effeta senectus  
 Invidet inperium seraeque ad fortia vires.
- 510 Natum exhortarer, ni mixtus matre Sabella  
 Hinc partem patriae traheret. Tu, cuius et annis  
 Et generi fata indulgent, quem numina poscunt,  
 Ingredere, o, Teucrum atque Italum, fortissime, ductor.  
 Hunc tibi praeterea, spes et solatia nostri,
- 515 Pallanta adiungam; sub te tolerare magistro

484. cf. 2, 190. | 485. Vetustam talis crudelitatis famam confirmat Val. Max. 9, 2, 10, confirmarat ante Cicero, ut Servius auctor est, in Hortensio. | 488. sic, v. 1, 225. | 489. v. G. 3, 149. | 495. praes. M., bello non dilato. | 497. puppes: propter interiectum Tiberim maritimo itinere opus erat exercitui Etrusco in Latium tendenti. | 499. Maeonia vetus nomen Lydiae, cf. vs. 479 sq. | 500. Fl. v. v. vir., praestantia ac virtute maioribus vestris pares. | 503. duces, v. E. 4, 49. | 504. Hoc, qui ibi erat, propinquus scilicet litōri vs. 497 et 555 commemorato. | 505 sqq. oratores misit invitans scilicet (ut) succedam castris. | 508. saeculis, Servius „dicunt saeculum habere triginta annos,“ unde trisaeculisenex Nestor; et cf. G. 2, 295. | 510. mixt. m. Sab., sanguinem genusque mixtum habens cum matre Sabina, cf. 12, 838. | 511. Hinc, ex Italia. | 512. quem ducem num. posc., cf. vs. 503. | 513. Incred., plenum dignitatis verbum, ut 1, 45 „divom incedo regina;“ praeterea cf. E. 4, 48. | 515. sub te magistro: ex more Romano ado-

Militiam et grave Martis opus, tua cernere facta  
Adsuescat, primis et te miretur ab annis.

Arcadas huic equites bis centum, robora pubis  
Lecta, dabo, totidemque suo tibi nomine Pallas.

520 Vix ea fatus erat: defixique ora tenebant

Aeneas Anchisiades et fidus Achates;  
Multaque dura suo tristi cum corde putabant,  
Ni signum caelo Cytherea dedisset aperto.

Namque inproviso vibratus ab aethere fulgor

525 Cum sonitu venit, et ruere omnia visa repente,  
Tyrrhenusque tubae mugire per aethera clangor.  
Suspiciunt; iterum atque iterum fragor increpat ingens.

Arma inter nubem caeli in regione serena  
Per sudum rutilare vident et pulsa tonare.

530 Obstipuere animis alii; sed Troius heros  
Adgnovit sonitum et divae promissa parentis.

Tum memorat: Ne vero, hospes, ne quaere profecto,  
Quem casum portenta ferant: ego poscor Olympo.

Hoc signum cecinit missuram diva creatrix,

535 Si bellum ingrueret, Volcaniaque arma per auras  
Laturam auxilio.

Heu quantae miseris caedes Laurentibus instant!  
Quas poenas mihi, Turne, dabis! quam multa sub undas  
Scuta virum galeasque et fortia corpora volves,

540 Thybri pater! Poscant acies et foedera rumpant!

Haec ubi dicta dedit, solio se tollit ab alto;

Et primum Herculeis sopitas ignibus aras

Excitat, hesternumque Larem parvosque Penatis

lescentes nobiles contubernio ducum utebantur, quorum exemplo discerent bellum administrare.]] 520—607. *Aeneas a Venere prodigio confirmatus remissis ad castra Troiana navibus equos ab Euandro accipit. Euander Pallantem ad bellum euntem graviter commotus dimittit. Iter ad castra Etrusca.* 520. v. 2, 692. — Oratione Euandri tantum abest ut erigatur animus Aeneae, ut (quod Euander minime speraverat) repentina tristitia affligatur. Quod promittitur auxilium, invalidum est; quid speret ab Etruscis, dubium est; praeterea propinquo et ad omnia audenda parato hoste quid non, dum tempus teritur, accidere potest Ascanio castrisque Troianis? En satis potentes causas tristitiae! 522 sq. Multa dura secum putabant, et diutius in ea cogitatione defici perstitissent, Ni Venus cel., v. G. 3, 562; similiter 6, 358 sqq. „iam tuta tenebam: Ni gens crudelis — ferro invasisset.“] 523. *aperto*, v. G. 1, 393.] 526. v. E. 9, 46. *Tyrrhen.*, quia tuba ab Etruscis inventa.] 528 sq. cf. G. 1, 474. — nubes ita ambiebat arma, ut ipsa in sudo effulgerent.] 532. *Ne vero, μή τοιούτῳ*. — Apparet Aeneam non dubitasse, quin Euander rei miraculo contentus casum aliquem filio exitiabilem metueret.] 533. *ego p. Ol.*, v. G. 2, 206. me poscit Olympus in proelia scilicet; cf. vs. 614. 11, 221. ad me ostentum illud ex aethere oblatum spectat.] 534. quando aut ubi id praedixerit, nusquam dictum est; item apud Hom. Il. 21, 277 sq. Odyss. 12, 389 sq.] 535. *Si*: si quando futurum esset, ut ingrueret, v. 5, 64.] 542. *arar sopitae ignibus*, quia habent sopitos ignes, cf. vs. 410. — *Herculeis*, v. E. 9, 46.] 543. Duplex

- Laetus adit; magant lectas de more bidentis  
 545 Euandrus pariter, pariter Troiana iuventus.  
 Post hinc ad navis graditur sociosque revisit;  
 Quorum de numero, qui sese in bella sequantur,  
 Praestantis virtute legit; pars cetera prona  
 Fertur aqua segnisque secundo defluit, amni,  
 550 Nuntia ventura Ascanio rerumque patrisque.  
 Dantur equi Teucris Tyrrhena petentibus arva;  
 Ducunt exsortem Aeneae, quem fulva leonis  
 Pellis obit totum, praefulgens unguibus aureis.  
 Fama volat parvam subito volgata per urbem,  
 555 Ocius ire equites Tyrrheni ad litora regis.  
 Vota metu duplicant matres, propiusque periclo  
 It timor, et maior Martis iam adparet imago.  
 Tum pater Euandrus dextram complexus euntis  
 Haeret, inexpletus lacrimans, ac talia fatur:  
 560 O mihi praeteritos referat si Iuppiter annos,  
 Qualis eram, cum primam aciem Praeneste sub ipsa  
 Stravi scutorumque incendi victor acervos,  
 Et regem hac Erulum dextra sub Tartara misi,  
 Nascenti cui tris animas Feronia mater —  
 565 Horrendum dictu — dederat, terna arma movenda;  
 Ter Leto sternendus erat; cui tum tamen omnis  
 Abstulit haec animas dextra, et totidem exuit armis:  
 Non ego nunc dulci amplexu divellerer usquam,  
 Nate, tuo; neque finitimo Mezentius umquam

a poeta indicatur sacrum, alterum Herculi, alterum diis Euandri familiaribus factum. Herculei ignes resuscitati sunt ii, qui pridie in Ara Maxima accensi fuerant. Nec praetereundi erant dii Euandri domestici, qui liberali Aeneam hospitio exceperat. *Hesternum* autem adit Larem, i. e. quem heri iam adierat, etsi id, ut interdum alia, reticuit poeta.] 547. *qui s. in b. s.*, qui se sequantur, ut eos habeat secum, si forte sit pugnandum; idque evenisse docet liber decimus, cf. 10, 360.] 549. *segnis*, omissa remigatione.] 552. *exs.*, *ἐξαιρετον* Hom. Il. 2, 227 et v. 5, 534.] 555. *Alii ad limina.*] 556. *dupl.*, duplicia faciunt, i. e. solito maiora vovent. — *propius p. it.*, i. e. propius accedit ad periculum, *an die Gefahr tritt die Furcht näher heran, la peur s'approche du péril*; nempe remotiora pericula metuimus, instantia timemus, ergo metus a periculo abest longius, timor propius. Metus autem mentis affectio est, timor animi; ille non excludit spem, hic excludit; matronae igitur vota facientes metuunt tantummodo, quia vota ipsa spem salutis ostendunt.] 557. *mai. Mart. app. im.*, concipiunt animo imaginem terrorum bellicorum iam propius ad ipsam rerum veritatem accedentem.] 558. *euntis*, v. 6, 734.] 559. *Haeret*, v. vs. 124. — *inexpletus lacr.*, alii legunt *inexpletum*, v. G. 1, 163.] 560. cf. Hom. Il. 11, 670 sqq.] 561. *primam*, ergo primo, cui interfui, bello.] 562. Servius „Tarquinius Priscus victis Sabinis in honorem Vulcani eorum arma succendit; quem postea secuti sunt ceteri.“] 564. cf. 7, 800.] 566. *Leto stern.*, tertius casus: sternendo ad Mortem demittendus; 12, 464 „sternere Morti“, 10, 319 „Deiecit Leto“, 5, 691 „Morti demitte“, et cf. 2, 398. *Ἰδὲ ποταψεν* Homerus.] 567. v. G.

- 570 Huic capiti insultans tot ferro saeva dedisset  
Funera, tam multis viduasset civibus urbem.  
At vos, o superi, et divom tu maxume rector  
Iuppiter, Arcadii, quaeso, miserescite regis,  
Et patrias audite preces: Si numina vestra
- 575 Incolumem Pallanta mihi, si fata reservant,  
Si visurus eum vivo et venturus in unum:  
Vitam oro; patior quemvis durare laborem.  
Sin aliquem infandum casum, Fortuna, minaris:  
Nunc, nunc o liceat crudelem abrumpere vitam,
- 580 Dum curae ambiguae, dum spes incerta futuri,  
Dum te, care puer, mea sola et sera voluptas,  
Complexus teneo; gravior neu nuntius auris  
Volneret. Haec genitor digressu dicta supremo  
Fundebat; famuli conlapsum in tecta ferebant.
- 585 Iamque adeo exierat portis equitatus apertis,  
Aeneas inter primos et fidus Achates,  
Inde alii Troiae proceres; ipse agmine Pallas  
In medio, chlamyde et pictis conspectus in armis:  
Qualis ubi Oceani perfusus Lucifer unda,
- 590 Quem Venus ante alios astrorum diligit ignis,  
Extulit os sacrum caelo tenebrasque resolvit.  
Stant pavidae in muris matres oculisque sequuntur  
Pulveream nubem et fulgentis aere catervas.  
Olli per dumos, qua proxuma meta viarum,
- 595 Armati tendunt; it clamor, et agmine facto  
Quadrupedante putrem sonitu quatit ungula campum.  
Est ingens gelidum lucus prope Caeritis amnem,  
Religione patrum late sacer; undique colles  
Includere cavi et nigra nemus abiete cingunt.

3, 283. | 570. *Huic capiti*, mihi, v. 2, 292 et cf. 11, 399. | 576. *vent. in un.*, conventurus. | 577. *lab.*, et „senectus ipsa morbus est,” ut ait Terentius. — *Alii patiar.* | 578. *aliquem casum*, non quicumque is est, sed certum unumque, quem, quia atrocissimus est patri, simul etiam ominis causa, non indicat nominatim, mortem filii. | 579. *crudelem* sc. tua morte futuram, v. 2, 368. | 581. *sera v.*, ut *παῖς τὴλύγετος*. | 583. *digr.*, v. 10, 445. | 585. *Iamq. adeo*, v. 4, 533. | 588. *pictis*, auro argentoque distinctis, nisi verum est, quod Servius antiquum auctorem secutus scribit, Arcadas usos esse scutis, in quibus imagines deorum pictae essent; cf. etiam 12, 281. 7, 796. 11, 660. — *conspectus*, conspicuus, Liv. 21, 4 de Hannibale „Vestitus nihil inter aequales excellens; arma atque equi conspiciébantur.” | 589. *λελουμένος Ὠκεανοῖο* Hom. II. 5, 6. | 594. *Olli*, v. 1, 254. — *qua pr. m. v.*, qua brevissimo itinere pervenitur eo, quo tendunt. | 595. *Armati* est Substantivum h. l., ut saepe, apud historicos maxime; et *Olli* ... *Armati* eo modo dictum est, de quo exposuimus ad G. 4, 457. — *agmine* f. v. 1, 82. | 596. *Quadrup.*, qui excitatur a currente quadrupede; cf. Sil. It. 12, 564. — *putrem*, qui resolutus est in pulverem. — Ceterum attende sonum verborum citatosque numeros rei adprime convenientes, eosdemque comparum cum tarditate antegressorum *Olli per dumos* ... *Armati tendunt.* | 599.

- 600 Silvano fama est veteris sacrasse Pelasgos,  
 Arvorum pecorisque deo, lucumque diemque,  
 Qui primi finis aliquando habuere Latinos.  
 Haud procul hinc Tarcho et Tyrrheni tuta tenebant  
 Castra locis, celsoque omnis de colle videri  
 605 Iam poterat legio, et latis tendebat in arvis.  
 \* Huc pater Aeneas et bello lecta iuventus  
 Succedunt, fessique et equos et corpora curant.  
 At Venus aethrios inter dea candida nimbos  
 Dona ferens aderat; natumque in valle reducta  
 610 Ut procul et gelido secretum flumine vidit,  
 Talibus adfata est dictis seque obtulit ultro:  
 En perfecta mei promissa coniugis arte  
 Munera; ne, mox aut Laurentis, nate, superbos,  
 Aut acrem dubites in proelia poscere Turnum.  
 615 Dixit et amplexus nati Cytherea petivit;  
 Arma sub adversa posuit radiantia quercu.  
 Ille, deae donis et tanto laetus honore,  
 Expleri nequit atque oculos per singula volvit,  
 Miraturque interque manus et brachia versat  
 620 Terribilem cristis galeam flammisque vomentem,  
 Fatiferumque ensem, lorica ex aere rigentem,  
 Sanguineam, ingentem, qualis cum caerula nubes  
 Solis inardescit radiis longeque refulget;  
 Tum levis ocreas electro auroque recocto,  
 625 Hastamque, et clipei non enarrabile textum.  
 Illic res Italas Romanorumque triumphos,

*cavi*, cavam efficientes vallem, v. G. 2, 391. — *nemus* est Accusativus et significat illum ipsum, qui modo commemoratus est, lucum. Et iunges *cingunt abiete*, ex quo per se intelligitur lucum illum alii arboribus constitisse; v. 7, 83. | 601. *diem*, sollemnia quotannis stato die redeuntia. | 604. *locis tuta*, videntur ea castra ex parte fluvio ... vs. 610. ... cincta fuisse atque ita tutiora reddita; neque enim in colle habebant castra, sed in campo, vs. 504. — *de colle*: etsi is silvoscus fuit, potuit tamen aliquo loco aut nudus esse aut per abrupta pospectum aperire. | 605. v. 4, 63 et 2, 29. | 606 sq. *Huc ... succed.*, cf. vs. 507. | 608—731. *Venus arma a Vulcano facta desert ad filium, qui eximiam eorum pulchritudinem non potest satis admirari, imprimis clipei, in quo pars rerum Romanorum ab ortu Romuli Remique usque ad Augustum deducta cernebatur.* | 608. *aether. nimb.*, Servius „aerem numinum, scilicet purgatorem, qui circa deos est.“ | 609. *red.* v. 6, 703. | 610. Alii *egelido*, cf. vs. 610. — *procul et secretum*, ut G. 3, 238 „Longius ex altoque,“ et v. G. 2, 290. — *secretum flumine*, solum, secreto loco, ad flumen, v. 7, 226. | 612. *prom.*, cf. vs. 531. 535. | 617. *honore*, insigni pulchritudine et splendore armorum, cf. G. 2, 404. 3, 290. | 619. *int. manus*, v. 2, 681. | 620. Hom. Il. 5, 4 „*δαίε οἱ ἐκ κόρυθός τε καὶ ἀσπίδος ἀνάματον πῦρ.*“ | 622. *Sanguin.*, rutilam, quippe ex aere factam. — *qualis cum*, v. E. 8, 85. | 624. *electro*, v. 5, 663. G. 3, 522. — *recocto*, Servius „saepe purgato, quia, quanto plus coquitur, eo melius fit,“ *πανεφθ* Hes. Sc. 208. | 626 sqq. Conferri cum his possunt descriptiones clipeorum fabrefactorum Herculis apud Hesiodum et Achillis apud Homerum Il.



- Haud vatum ignarus venturique inscius aevi,  
 Fecerat Ignipotens; illic genus omne futurae  
 Stirpis ab Ascanio, pugnataque in ordine bella.  
 630 Fecerat et viridi fetam Mavortis in antro  
 Procubuisse lupam; geminos huic ubera circum  
 Ludere pendentis pueros, et lambere matrem  
 Inpavidos; illam tereti cervice reflexam  
 Mulcere alternos et corpora fingere lingua.  
 635 Nec procul hinc Romam et raptas sine more Sabinas  
 Consessu caveae, magnis Circensibus actis,  
 Addiderat, subitoque novum consurgere bellum  
 Romulidis Tatíoque seni Curibusque severis.  
 Post idem inter se posito certamine reges  
 640 Armati Iovis ante aram paterasque tenentes  
 Stabant et caesa iungebant foedera porca.  
 Haud procul inde citae Mettum in diversa quadrigae  
 Distulerant — at tu dictis, Albane, maneres! —  
 Raptabatque viri mendacis viscera Tullus  
 645 Per silvam, et sparsi rorabant sanguine vepres.  
 Nec non Tarquinium eiectum Porsenna iubebat  
 Accipere, ingentique urbem obsidione premebat,  
 Aeneadae in ferrum pro libertate ruebant.  
 Illum indignanti similem, similemque minanti  
 650 Aspiceres, pontem auderet quia vellere Cocles,  
 Et fluvium vinclis innaret Cloelia ruptis.  
 In summo custos Tarpeiae Manlius arcis

18, 483 sqq.] 627. *vatum*, fatorum, quae vates dii cecinerant; alii *fatum*.]  
 630. *et*, praeter cetera. — Quae exposita sunt vss. 630—674, ea omnia in ora  
 clipei efficta erant, res Augusti (675 sqq.) in medio.] 632. cf. Liv. 1, 4.] 632 sqq.  
 Ovid. Fast. 2, 418 sq. de eadem lupa „fingit lingua corpora bina sua. Marte  
 satos scires: timor a fuit.“] 634. translatum hoc a consuetudine bestiarum,  
 pullos lingua mulcentium, ut munda et levia fiant corpora.] 635. *sine more*,  
 quippe violato iure gentium.] 636. *caveae*, circo hic tribuitur cavea, quae pro-  
 pria est theatri. — *Circens.*, Consualibus id factum esse ait Livius 1, 9. Ludi  
 autem Consualia iam Tarquinio Prisco rege cesserunt ludis Circensibus, quos  
*magnos* poeta appellare videtur a Ludis Magnis, quos ideo quidam magnos dictos  
 putant, „quod Conso consiliorum secretorumque deo, i. e. Neptuno, et Diis  
 Magnis, i. e. Laribus urbis Romae, dati sunt, quibus ludis aiunt raptas Sabinas,  
 ut videatur propter hoc dicere Virgilius: magnis Circensibus actis.“ Haec  
 Ascon. Pedianus, interpres Ciceronis.] 637. *consurgere* sc. *fecerat*, quod  
 latet in verbo *Addiderat*, et cf. vs. 630 sqq.] 638. *sev.*, severissima Sabini  
 utebantur disciplina, cf. G. 2, 532.] 641. foedera icebantur caeso porco porcave;  
 formulam antiquam in ea re sollemnem exhibet Liv. 1, 24. Ceterum v. G. 1, 479.]  
 642 sqq. cf. Liv. 1, 27. 28.] 643. v. 2, 160. velles manere *tum*, *cum te*  
*distulerunt*, v. 11, 153.] 646 sqq. cf. Liv. 2. 9 sqq.] 647. v. G. 2, 441.]  
 651. *vinclis ruptis*, Servius „atqui obsides non ligabantur; sed vincla pro custodiis  
 accipiamus;“ itaque Cloelia frustrata custodes dicitur a Liv. 2, 13.] 652 sqq.  
 Comprehendit iam poeta, quae in *summo* clipeo (in summa eius ora) expressa  
 erant, ipsis etiam locis inter se iuncta, arcem Tarpeiam, Manlium, Capitolium

- Stabat pro templo et Capitolia celsa tenebat,  
 Romuleoque recens horrebat regia culmo.  
 655 Atque hic auratis volitans argenteus anser  
 Porticibus Gallos in limine adesse canebat;  
 Galli per dumos aderant arcemque tenebant,  
 Defensî tenebris et dono noctis opacae;  
 Aurea caesaries ollis, atque aurea vestis;  
 660 Virgatis lucent sagulis; tum lactea colla  
 Auro innectuntur; duo quisque Alpina coruscant  
 Gaesa manu, scutis protecti corpora longis.  
 Hic exsultantis Salios, nudoſque Lupercos,  
 Lanigerosque apices, et lapsa ancilia caelo  
 665 Extuderat; castae ducebant sacra per urbem  
 Pilentis matres in mollibus. Hinc procul addit  
 Tartareas etiam sedes, alta ostia Ditis,  
 Et scelerum poenas, et te, Catilina, minaci  
 Pendentem scopulo Furiarumque ora trementem;  
 670 Secretosque pios; his dantem iura Catonem.  
 Haec inter tumidi late maris ibat imago,  
 Aurea, sed fluctu spumabant caerulea cano;  
 Et circum argento clari delphines in orbem  
 Aequora verrebant caudis aestumque secabant;  
 675 In medio classis aeratas, Actia bella,

cum casa Romuli, Gallos denique in Capitolium escendentes. | 653. *pro templo Iovis Capitolini*; Ovid. Trist. 1, 2, 5 „Mulciber in Troiam, *pro Troia stabat Apollo*.“ | 654. *recens*: nempe culmi, quibus tecta erat casa Romuli, in auro efficti erant a Vulcano, flavi igitur et recentium speciem habentes, quales fuerunt, quibus Romulus illam texit; hinc *Romuleo culmo*. Ceterum his verbis fortasse illud tangitur oblique a poeta, quod Romani casam illam eiusque tectum, cum opus erat, reficere consueverunt. | 655. *hic*, in summo vs. 652. — *auratis*, nempe auro expressis a Vulcano. — *volitans*, ut solent anseres irritati. | 657. *ten.*, in eo erat, ut tenerent. | 658. *dono*, beneficio. | 660 sq. quis non meminit aurei torquis a Manlio *Torquato* homini Gallo detracti? cf. Liv. 7, 10. | 663. *Hic*, in alia parte superioris orae repraesentatae erant variae caerimoniae, mota ancilia, quod fiebat Kalendis Martiis, Ovid. Fast. 3, 373 sqq., Lupercalia, Ovid. Fast. 2, 267 sqq., pompa matronarum. — *nudos*, cinctos Ovid. F. 5, 101, cincti tantum subligaculo ex pelle caprina facto. | 664. *Lan. ap.*, pileos flaminum cum apice laneo; ergo ipsos flamines. | 665. *sacra*, ut ea, quae Cereri et Carmenti fiebant. | 666. *mollibus*, pensilibus motuque facilibus, v. G. 2, 389. Originem causamque eius honoris matronis habiti refert Liv. 1, 25. — *Hinc procul*, puta in ima parte clipei. | 667. *ostia D.*, quia aditus ad Tartarum patet ex Orco, cf. 6, 577—579. | 668. *minaci*, ruinam usque minanti. | 669. *Pendent.*, affixum. Ceterum v. G. 1, 479. | 670. *Catonem* Uticensem propter morum sanctitatem umbrae in Elysio degentes observant tamquam regem, cuius ad voluntatem arbitriumque libenter se componant. Catonis Censorii s. maioris memoriae satisfactum est a poeta 6, 842. | 671. *Haec inter*, ergo inter superiorem inferioremque partem clipei. Haec igitur in media parte repraesentata sunt. | 673. *arg. clari*, argento candentes. | 675. *In medio mari*, non in medio clipeo, nam quae sunt in medio clipeo, iam vs. 671 tractari coepta sunt. Diversitas locorum a poeta declaratur verbis *In summo* 652, *Hinc procul* 666, *Haec inter* 671, nec sunt separanda, quae separare minime licet, mare et classes. At,

- Cernere erat, totumque instructo Marte videres  
 Fervere Leucaten, auroque effulgere fluctus.  
 Hinc Augustus agens Italos in proelia Caesar  
 Cum Patribus Populoque, Penatibus et magnis Dis,  
 680 Stans celsa in puppi; geminas cui tempora flammas  
 Laeta vomunt, patriumque aperitur vertice sidus.  
 Parte alia ventis et dis Agrippa secundis  
 Arduus agmen agens; cui, belli insigne superbum,  
 Tempora navali fulgent rostrata corona.  
 685 Hinc ope barbarica variisque Antonius armis,  
 Victor ab Aurorae populis et litore rubro,  
 Aegyptum virisque Orientis et ultima secum  
 Bactra vehit; sequiturque, nefas! Aegyptia coniunx.  
 Una omnes ruere, ac totum spumare, reductis  
 690 Convolsum remis rostrisque tridentibus, aequor.  
 Alta petunt; pelago credas innare revolsas  
 Cycladas, aut montis concurrere montibus altos:  
 Tanta mole viri turritis puppibus instant.  
 Stuppea flamma manu telisque volatile ferrum  
 695 Spargitur: arva nova Neptunia caede rubescunt.  
 Regina in mediis patrio vocat agmina sistro;  
 Necdum etiam geminos a tergo respicit anguis;  
 Omnigenumque deum monstra et latrator Anubis

dices, haud ita procul a litore tum pugnatum esse constat, non in medio mari Ionio. Nempe medium h. l. dicitur *id*, quod ab utraque ora clipei pari distat intervallo; et respondent sibi *circum* (vs. 673, i. e. a dextra laevaue) et *In medio*. — *cl. Act. bella*, repraesentantes pugnam Actiacam. | 676. *Marte, classe*. | 677. *Ferv.*, v. 4, 407 et G. 1, 456. — *Leucates*, promontorium Leucadiae non longe remotum ab Actio, oppido et promontorio Acarnaniae. — *auro*, aureo splendore armorum. | 679. v. 3, 12. | 680. galea utrimque fulgorem emittit flammeum, v. vs. 620. | 681. *Laeta*, ad splendorem hoc spectat, ut 1, 591. — Augustus Iulii sideris causa, de quo v. E. 9, 47, stellam in vertice galeae gerebat. — *aperitur*, cf. 3, 275. | 684. *corona rostrata* Agrippa donatus est victo anno 718 Sext. Pompeio, idque insigne tanto gloriosius fuit, quod nulli ante eum datum est. | 685. *Hinc* sc. veniens. — *ope barb.*, v. 7, 284. | 686. *Victor a populis*, qui victoriam ab s. ex iis reportavit; gesserat bellum cum Parthis et Armeniis haud infelicer. | 688. *nefas*, quod Romanus Aegyptiam, Cleopatram, in matrimonium duxerat adeoque in castris secum habebat. | 689. *ruere*, impetu ferri. — Ovid. Met. 11, 461 „*reducunt* ad fortia pectora remos.“ | 691. *Alta petunt* relicta scilicet, in qua fuerant, statione. | 693. *t. puppibus*, qui est sextus casus, ad illustranda illa *tanta mole* adiectum; in soluta oratione diceres „tanta mole navium earumque turritarum instant sibi invicem.“ Turres in puppibus excitare Romanum fuit inventum, habueruntque turritas et Octavianus et Antonius. | 694. *Stupp. fl.*, stuppa incensa, v. 7, 463 et intelliguntur malleoli, cf. Liv. 38, 6. — *telisq. v. f. sparg.*, telorum iactu in omnes partes volat ferrum. | 695. *nova c. rub.*, *incipiunt* caede rubescere, v. E. 8, 29. | 696. Vide acerbiter dicti ex indignitate rei natam; sistri enim usus erat in ludis et choreis apud Aegyptios; cf. Propert. 3, 11, 41—43. — *vocat*, signum sequendi dat, quod apud Romanos classico dabatur. | 697. erant a tergo Cleopatrae duo serpentes caelati, qualis instaret ei vitae exitus, significantes. | 698. *Omnigenae* hi dei appellantur, quia non unam communemque hominum faciem gerebant, sed diversa

- Contra Neptunum et Venerem contraque Minervam  
 700 Tela tenent. Saevit medio in certamine Mavors,  
 Caelatus ferro, tristesque ex aethere Dirae;  
 Et scissa gaudens vadit Discordia palla,  
 Quam cum sanguineo sequitur Bellona flagello.  
 Actius haec cernens arcum intendebat Apollo  
 705 Desuper: omnis eo terrore Aegyptus et Indi,  
 Omnis Arabs, omnes vertebant terga Sabaei.  
 Ipsa videbatur ventis regina vocatis  
 Vela dare et laxos iam iamque inmittere funis.  
 Illam inter caedes pallentem morte futura  
 710 Fecerat Ignipotens undis et Iapyge ferri;  
 Contra autem magno maerentem corpore Nilum,  
 Pandentemque sinus et tota veste vocantem  
 Caeruleum in gremium latebrosaue flumina victos.  
 At Caesar, triplici invecus Romana triumpho  
 715 Moenia, dis Italis votum immortale sacrabat,  
 Maxuma ter centum totam delubra per Urbem.  
 Laetitia ludisque viae plausuque fremebant;  
 Omnibus in templis matrum chorus, omnibus arae;  
 Ante aras terram caesi stravere iuvenci.  
 720 Ipse, sedens niveo candentis limine Phoebi,  
 Dona recognoscit populorum aptatque superbis

capita variorum pecorum, ut videantur ex multiplici genere beluarum nati; quid, quod Apis verus fuit taurus. — *et l. A.*, v. 9, 811. | 701. *ex. aeth.*, volantes igitur, cf. 7, 408; videtur autem poeta ita interpretatus esse Homericum illud *ἡεροφοῖτις Ἐρινός* Il. 19, 87, simulque Hesiodum respexisse Scut. 248 sqq. | 705. *Desuper*, ab Actio, v. 3, 275. — *eo t.*, v. 2, 171. — Antonio omnes fere reges orientales Romano imperio vicini adfuerunt socii, et poetae de Indis adeo loquuntur ab Octaviano devictis, quibus Seras addit Horat. 1, 12, 56. | 707. *videb.*, *ἐωπαῖτο*. — *vent. voc.*, v. 3, 253. | 708. *lax. immitt. f.*: habenae immittuntur (i. e. laxantur) equis, quos ad currendum incitamus; hinc ipsi equi immitti dicuntur 5, 146 sq.; inde *classi immittere habenas* 6, 1, et „palmes laxis per purum immissus habenis“ G. 2, 364; ergo *funes immittere velis* i. q. navium cursum incitare laxatis funibus et rudentibus (10, 229), quo magis turgeant sinus velorum. — *iam iam*, v. 4, 371. — Ceterum haec ad fugam pertinent, quam parat Cleopatra, id quod cum ea, quae modo dicta sunt, testantur, tum illud, quod expanduntur vela, quae ante ipsam pugnam contrahuntur. Itaque bis repraesentata est Cleopatra cum parte classis (item Augustus) in eo clipeo, quod quam commodè fieri potuerit non exputo. | 710. *Iap.*, cf. Horat. Od. 1, 3; 4. | 711. *Contra*, ex adverso. | 714 sq. *inv. moenia*, ut 7, 436. — *triplici tr.*, Dalmatico, Actiaco, Alexandrino, et trinis deinceps diebus triumphavit, cf. Sueton. Aug. c. 22. | 716. *ter centum*, v. 4, 510; plurima templa vel fecit vel refecit Augustus variis temporibus, cf. Sueton. Aug. c. 29. Liv. 4, 20. | 717. Quanta populi Rom. laetitia exceptus sit post reditum Augustus, declarat Vellei. 2, 89. — *ludis* „*compitalitiis*“ ait Servius. | 718. Supplicatio matronarum. — *omnibus arae*, arae, ut vs. proximus docet, in quibus exta cremabantur; eae non in templis erant, sed ante templa; ergo hoc *omnibus* Dativus est. | 720 sqq. sedens sub porticu et aditu templi Apollinis Palatini prospectabat succedentem pompam triumphalem. | 721. *Dona populorum* devictorum, coronas aureas; *recogn.*, recenset, quae sint cuiusque populi; Liv. 26, 49 „Scipio

- Postibus; incedunt victae longo ordine gentes,  
 Quam variae linguis, habitu tam vestis et armis.  
 Hic Nomadum genus et discinctos Mulciber Afros,  
 725 Hic Lelegas Carasque sagittiferosque Gelonos  
 Finxerat; Euphrates ibat iam mollior undis;  
 Extremique hominum Morini, Rhenusque bicornis;  
 Indomitique Dahae, et pontem indignatus Araxes.  
 Talia per clipeum Volcani, dona parentis,  
 730 Miratur, rerumque ignarus imagine gaudet,  
 Attollens humero famamque et fata nepotum.

## A E N E I D O S

## LIBER NONUS.

(Accessus Turni ad castra Troianorum absente Aenea. — Naves Troianorum mutantur in Nymphas marinas. — Nisus et Euryalus. — Oppugnatio castrorum.)

- Atque ea diversa penitus dum parte geruntur,  
 Irim de caelo misit Saturnia Iuno  
 Audacem ad Turnum. Luco tum forte parentis  
 Pulumni Turnus sacrata valle sedebat.  
 5 Ad quem sic roseo Thaumantias ore locuta est:  
 Turne, quod optanti divom promittere nemo  
 Auderet, volvenda dies, en, attulit ultro.  
 Aeneas, urbe et sociis et classe relictâ,

recensuit captivos, quot cuiusque populi essent.“] 724. *disc.*, cf. Liv. 35, 11. — *Afros*, qui in Antonii exercitu fuerant. ] 726. *mollior u.*, leniore amne, ut domitus ab Augusto, et v. G. 3, 30. ] 727. cum Dalmatico ... v. vs. 714. ... coniunctus est triumphus de Morinis populisque quibusdam Galliae et Germaniae. — *Extr. hom.*, longissime versus occidentem habitantes; „Ultimi hominum existimati Morini,“ Plin. N. H. 19, 1, 2. Mela 3, 2. — *Rh. bic.*, i. e. et ipse Rhenus et qui ex eo nascitur Vahalis. ] 628. *Dahae*, populus Scythicus in orientali litore maris Caspii habitans. — *Araxes*, v. G. 3, 30; Servius „Araxi Alexander Magnus pontem fecit, quem fluminis incrementa ruperunt; postea Augustus firmiore ponte eam ligavit, unde ad Augusti gloriam dixit *pontem ind. Arax.*“] 731. *fam. et f. nep.*, ipsum scilicet clipeum, in quo efficta erant fata resque gestae posterorum suorum inprimis memorabiles.

**Aeneid. L. IX.** 1—76. *Interea Turnus monitu Iridis ab Iunone missae cum exercitu accedit ad castra Troianorum; qui cum munimentis se teneant, iaculatur ignem in classem castrorum lateri adiunctam.* ] 4. *parentis*, i. e. abavi, cf. 10, 619. *parens* pro avo Ovid. Met. 5, 237. ] 5. Iris filia Thaumantis, qui est filius Ponti Tellurisque. ] 6. *optanti tibi.* ] 7. *dies*, tempus, quod varias rerum opportunitates affert; *volv.*, v. 1, 269. — *ultro* fit, quod nulla nostra

- Sceptra Palatini sedemque petit Euandri.  
 10 Nec satis: extremas Corythi penetravit ad urbes  
 Lydorumque manum collectos armat agrestis.  
 Quid dubitas? nunc tempus equos, nunc poscere currus.  
 Rumpe moras omnis et turbata arripe castra.  
 Dixit, et in caelum paribus se sustulit alis  
 15 Ingentemque fuga secuit sub nubibus arcum.  
 Adgnovit iuvenis, duplicisque ad sidera palmas  
 Sustulit, et tali fugientem est voce secutus:  
 Iri, decus caeli, quis te mihi nubibus actam  
 Detulit in terras? unde haec tam clara repente  
 20 Tempestas? medium video discedere caelum,  
 Palantisque polo stellas. Sequor omina tanta,  
 Quisquis in arma vocas. Et sic effatus ad undam  
 Processit summoque hausit de gurgite lymphas,  
 Multa deos orans, oneravitque aethera votis.  
 25 Iamque omnis campis exercitus ibat apertis,  
 Dives equum, dives pictai vestis et auri;  
 Messapus primas acies, postrema coercent  
 Tyrrhidae iuvenes; medio dux agmine Turnus;  
 [Vertitur arma tenens, et toto vertice supra est.]  
 30 Ceu septem surgens sedatis amnibus altus  
 Per tacitum Ganges, aut pingui flumine Nilus  
 Cum refluit campis et iam se condidit alveo.  
 Hic subitam nigro glomerari pulvere nubem  
 Prospiciunt Teucri ac tenebras insurgere campis.


opera, nullo nostro consilio se dat, ut 5, 55.] 9. *Sceptra sedemque, regiam.* — *Palat.*, v. 8, 53. — *petit E.*, v. 7, 398. Et Praesens significat rem nondum plane absolutam; nondum enim redierat Aeneas ex eo itinere.] 10. *Cor. urbes*, significatur hic Etruria; v. 3, 170.] 11. *Lydor. m.*, cf. 8, 479 sq. — *agr.*, cf. vs. 608. — Alii *collectosque*.] 13. *turb arr. c.*, turba castra subito scilicet impetu et arripe, v. 3, 477.] 14. *paribus*, v. 4, 252.] 15. v. 5, 658.] 18 sq. *nub. act.*, quia semper, cum apparet in caelo, insistit nubibus.] 20. Discessus caeli in ostentis portentisque habebatur, Cic. de Divinat. 1, 44. 2, 28.] 21. *Sequor*, alii *Sequar*; Praesens indicat rem, quam exsequi consitutum est apud animum nostrum, cf. 10, 442. 12, 13.] 22. v. 5, 504.] 23. precaturi manus ante lavabant; decet enim purum castumque preces concipere.] 26. *pict. v. et a.*, vestis auro intertextae, v. G. 1, 173.] 28. *Tyrrh.*, cf. 7, 484.] 30. Donatus „Silentio fuerat veniendum, ut insperati (vs. 49) effusos et incautos hostes invaderent. Idcirco, quia tacito agmine incedebat Turnus, comparisonem dat poeta duorum fluminum, Gangis et Nili.“ Servius „Intelligemus hunc exercitum primo confuse in campos ruisse, post digestum in ordines, ut sit sequentium fluminum congrua comparatio.“ Uterque recte. — *surgens*, incremens septem fluviorum aqua; et numerantur hodie a geographis septem magna flumina in Gangem influentia; auctus autem undique tanta mole aquarum incedit tacitus et sedatus, more copiosorum fluminum; nam sedati amnes illi dicuntur, quod in Gangem effusi sine turba et strepitu cum Gange labuntur.] 31. *Per tac.*, tacite, et repete verbum *it e* vs. 25.] 32. *refl. c.*, v. G. 4, 88. Et verba *redire, recurrere, reducere, referre*, ut *refluere* h. l. et alia similiter composita, saepe

- 35 Primus ab adversa conclamat mole Caicus:  
 Quis globus, o cives, caligine volvitur atra!  
 Ferte citi ferrum, date tela, ascendite muros,  
 Hostis adest, heia! Ingenti clamore per omnis  
 Condunt se Teuceri portas et moenia conplent.
- 40 Namque ita discedens praeceperat optumus armis  
 Aeneas: si qua interea fortuna fuisset,  
 Neu struere auderent aciem, neu credere campo;  
 Castra modo et tutos servarent aggere muros.  
 Ergo, etsi conferre manum pudor iraque monstrat,
- 45 Obiiciunt portas tamen et praecepta facessunt,  
 Armatique cavis expectant turribus hostem.  
 Turnus, ut ante volans tardum praecesserat agmen,  
 Viginti lectis equitum comitatus et urbi  
 Improvisus adest; maculis quem Thracius albis
- 50 Portat equus cristaque tegit galea aurea rubra.  
 Ecquis erit, mecum, iuvenes, qui primus in hostem —?  
 En, ait. Et iaculum attorquens emittit in auras,  
 Principium pugnae, et campo sese arduus infert.  
 Clamorem excipiunt socii, fremituque sequuntur
- 55 Horrisono; Teucrum mirantur inertia corda:  
 Non aequo dare se campo, non obvia ferre  
 Arma viros, sed castra fovere. Huc turbidus atque huc  
 Lustrat equo muros, aditumque per avia quaerit.  
 Ac veluti pleno lupus insidiatus ovili
- 60 Cum fremit ad caulas, ventos perpressus et imbris,  
 Nocte super media; tuti sub matribus agni  
 Balatum exercent; ille asper et improbus ira  
 Saevit in absentis; collecta fatigat edendi  
 Ex longo rabies et siccae sanguine fauces:
- 65 Haud aliter Rutulo muros et castra tuenti  
 Ignescunt irae; duris dolor ossibus ardet,

ad res, imprimis naturales, referuntur, quae statis vicibus redeunt.] 35. *mole*, turri; *adversa*, quae erat ab ea parte, qua accedebant hostes.] 36. *globus*, conglomerata nubes pulveris.] 37. v. 4, 594.] 38 sq. recipiant se Teuceri intra muros.] 41. si quid accideret, si forte ad pugnandum lacesserentur; et v. 2, 136.] 48. *et*: adest comitatus et adest improvisus.] 49. *Thracius*, v. E. 1, 55.] 51—53. Tangitur his versibus vetus mos Romanus. Postquam Patres, ut bellum fieret, consenserant, mittebant fetialem, qui, tribus pluribusve pueribus praesentibus ... quo spectant illa: *Ecquis erit mecum* ..., hastam sanguine infectam in fines hostium emitteret; Liv. 1, 32. — *qui primus in h.* emittat iaculum; nempe id, quod solus facit Turnus, tribuitur etiam iis, quorum praesentia in eo negotio opus fuit. — *Princip. p.*, signum incepti belli.] 54. *excip.* non eum, sed eam rem.] 57. *fovere*, v. G. 3, 420.] 59. v. 1, 148. — cf. Hom. Od. 6, 130 sqq.] 62. *improb.*, v. G. 1, 119. — ira saevit, cum non possit caedere; Petron. c. 123 „absentem votis interficit hostem.“ adde Val. Fl. 3, 589.] 66 sq. *dolet*, quod non videt, *qua ratione tentet aditum*; v.

- Qua temptet ratione aditus, et quae via clausos  
 Excutiat Teucros vallo atque effundat in aequum.  
 Classem, quae lateri castrorum adiuncta latebat,  
 70 Aggeribus saeptam circum et fluvialibus undis,  
 Invadit, sociosque incendia poscit ovantis,  
 Atque manum pinu flagranti fervidus inplet.  
 Tum vero incumbunt; urgnet praesentia Turni;  
 Atque omnis facibus pubes accingitur atris.  
 75 Diripuerunt focos; piceum fert fumida lumen  
 Taeda et commixtam Vulcanus ad astra favillam.  
 Quis deus, o Musae, tam saeva incendia Teucris  
 Avertit? tantos ratibus quis depulit ignis?  
 Dicite. Prisca fides facto, sed fama perennis.  
 80 Tempore quo primum Phrygia formabat in Ida  
 Aeneas classem et pelagi petere alta parabat,  
 Ipsa deum fertur genetrix Berecynthia magnum  
 Vocibus his adfata Iovem: Da, nate, petenti,  
 Quod tua cara parens domito te poscit Olympo.  
 85 Pineae silva mihi, multos dilecta per annos;  
 Lucus in arce fuit summa, quo sacra ferebant,  
 Nigranti picea trabibusque obscurus acernis:  
 Has ego Dardanio iuveni, cum classis egeret,  
 Laeta dedi; nunc sollicitam timor anxius angit.  
 90 Solve metus, atque hoc precibus sine posse parentem,  
 Neu cursu quassatae ullo neu turbine venti  
 Vincantur; prosit nostris in montibus ortas.  
 Filius huic contra, torquet qui sidera mundi:  
 O genetrix, quo fata vocas? aut quid petis istis?

2, 4. | 67 sq. *et* (si aditus non datur) *quas via* Excutiat T., pro eo, quod vulgo dicitur: qua via (quo modo) excutiantur vel excuti possint. | 69 sq. Puta hanc fuisse locorum faciem:



*a* .. *a* fluvius, *b* .. *b* agger, *c* castra, *d* classis subducta, + .. +  
 .. + sinistra pars castrorum vs. 468. | 72. *pinu*, v. 7, 397. |  
 75. *focos*, sive quos Rutuli extemplo exstraxerunt, sive qui fuerunt in propinquis vicis. — *piceum*, v. 6, 593. || 79—122.

*In tanto discrimine Cybele naves convertit in deas marinas.*

— Ipsa conversio navium veteri fama celebrabatur apud Romanos; exornatio rei tribuitur Musis, veterum obscurarumque rerum notitia accuratio imperientibus animos poetarum. | 79. *Prisca ... perennis*: facti huius antiquissima est fides, et potuisset vitio vetustatis intercipi, sed fama eam per omnes aetates propagavit. Sic fere Donatus. | 81. v. 5. 8. | 81. v. 6, 785. Ida quoque sacra Cybelae. | 84. *dom. Olympo*, ergo cum sis domitis Titanibus rex Olympi possis-que omnia. | 85 sqq. Pineae silva mihi est in Ida, et in vertice (*arce*) eius montis lucus fuit piceis aceribusque consitus. Et ait *fuit*, quia iam caesae erant eae arbores ab Aenea; *ferebant* autem, sc. donec stabat Troia. | 89. Alii *anx. urgnet*. Lucret. 3, 1006 „Quem volucres lacerant atque exest *anxius angor*.“ Cic. Tusc. 4, 12 „Differt *anxietas* ab *angore*; neque enim omnes anxii, qui anguntur aliquando, nec, qui anxii, semper anguntur.“ | 93. v. 4, 269. | 94. *quo f. v.*: „ostendit fata posse aliquatenus trahi, non tamen usquequaque.“



- 95 Mortaline manu factae immortale carinae  
 Fas habeant, certusque incerta pericula lustret  
 Aeneas? cui tanta deo permissa potestas?  
 Immo, ubi defunctae finem portusque tenebunt  
 Ausonios olim, quaecumque evaserit undis  
 100 Dardaniumque ducem Laurentia vexerit arva,  
 Mortalem eripiam formam magnique iubebo  
 Aequoris esse deas, qualis Nereia Doto  
 Et Galatea secant spumantem pectore pontum.  
 Dixerat, idque ratum Stygii per flumina fratris,  
 105 Per pice torrentis atraque voragine ripas  
 Adnuit, et totum nutu tremefecit Olympum.  
 Ergo aderat promissa dies et tempora Parcae  
 Debita conplerant: cum Turni iniuria Matrem  
 Admonuit ratibus sacris depellere taedas.  
 110 Hic primum nova lux oculis offulsit, et ingens  
 Visus ab Aurora caelum transcurrere nimbis  
 Idaeique chori; tum vox horrenda per auras  
 Excidit et Troum Rutulorumque agmina complet:  
 Ne trepidate meas, Teucris, defendere navis,  
 115 Neve armate manus; maria ante exurere Turno,  
 Quam sacras dabitur pinus. Vos ite solutae,  
 Ite deae pelagi; genetrix iubet. Et sua quaeque  
 Continuo puppes abrumpunt vincula ripis  
 Delphinumque modo demersis aequora rostris  
 120 Ima petunt. Hinc virgineae, mirabile monstrum,  
 [Quot prius aeratae steterant ad litora prorae]  
 Reddunt se totidem facies, pontoque feruntur.  
 Obstipuerunt animi Rutulis; conterritus ipse  
 Turbatus Messapus equis; cunctatur et amnis  
 125 Rauca sonans revocatque pedem Tiberinus ab alto.  
 At non audaci Turno fiducia cessit:  
 Ultro animos tollit dictis atque increpat ultro:  
 Troianos haec monstra petunt; his Iuppiter ipse  
 Auxilium solitum eripuit, non tela neque ignis  
 130 Exspectans Rutulos. Ergo maria invia Teucris,

Servius. — *istis navibus*, in gratiam earum. | 96. *Fas immort.*, ius aeternitatis. — *incerta p.*: fatum hanc naturam attribuit mari, ut omnis navigans casibus periculorum obnoxius sit. | 98. *def.*, cf. 6, 83. — Alii *finis*. | 99. *quasc.*, 15 ex 20. | 104. v. 6, 324. | 106. *ripae torrentes* pice sunt fluminis rapidi et pice aestuantis. | 106. cf. Hom. Il. 1, 528 sqq. | 108. *Deb.*, v. 8, 875. | 111 sq. cf. Ovid. Met. 14, 530 sqq. | 112. *Id. ch.*, v. 3, 111. | 117. *Et*, v. 6, 504. | 118. *puppes*, cf. 6, 3—5. | 122. *Redd. se*, rursus emergunt. || 123—167. *Turnus suos eo portento obstupefactos callida interpretatione confirmat et prope iam exaecto die corpora curare vigiliasque agere iubet.* | 124. *Mess.*, cf. 8, 6. | 125. cf. 8, 240. | 127. *Ultro*, v. G. 4, 204. | 129 sq. *tela ignes-*

- Nec spes ulla fugae; rerum pars altera adempta est;  
 Terra autem in nostris manibus: tot milia, gentes  
 Arma ferunt Italiae. Nil me fatalia terrent,  
 Si qua Phryges prae se iactant, responsa deorum:  
 135 Sat fatis Venerique datum, tetigere quod' arva  
 Fertilis Ausoniae Troes. Sunt et mea contra  
 Fata mihi, ferro sceleratam excindere gentem  
 Coniuge praerepta; nec solos tangit Atridas  
 Iste dolor solisque licet capere arma Mycenis.  
 140 Sed periisse semel satis est! — peccare fuisset  
 Ante satis — penitus modo non genus omne perosos  
 Feminum! — Quibus haec medii fiducia valli  
 Fossarumque morae, leti discrimina parva,  
 Dant animos. At non viderunt moenia Troiae  
 145 Neptuni fabricata manu considerare in ignis?  
 Sed vos, o lecti, ferro quis scindere vallum  
 Apparat et mecum invadit trepidantia castra?  
 Non armis mihi Volcani, non mille carinis  
 Est opus in Teucros. Addant se protinus omnes  
 150 Etrusci socios. Tenebras et inertia furta  
 [Palladii, caesis summae custodibus arcis,]  
 Ne timeant; nec equi caeca condemur in alvo;  
 Luce, palam, certum est igni circumdare muros.  
 Haud sibi cum Danais rem faxo et pube Pelasga  
 155 Esse putent, decumum quos distulit Hector in annum.  
 Nunc adeo, melior quoniam pars acta diei,  
 Quod superest, laeti bene gestis corpora rebus

*que*, i. e. faces eminus mittendae. | 131. *rer. p. alt.*, mare s. fuga per mare. | 132. Alii *in manibus nostris*. — *tot*, v. E. 1, 12. | 136 sqq. Ut Graeci Fato volente Troiam everterunt ob raptam Helenam, sic ego ob similem causam Fato auctore hos perimam. | 138. cf. Hom. Il. 9, 340 sqq. | 140 sq. Abrupta et concisa oratio, qualis convenit animo exasperato. — *Sed p. s. s. est*: haec cum ironia quadam dicta sunt, quasi indignum sit bis eosdem perire. — *p. fuisset ante satis*, debuerat illis ante (rapientibus Helenam) satis esse peccare. — *penitus ... Feminum*: Accusativus cum Infinitivo, quo utebantur mirabundi atque indignabundi; Liv. 45, 38 „Literni domicilium et sedem fuisse domitoris Africae! Literni sepulcrum ostendi!“ — *modo, ἄρα*. | 142. *Quibus* cum emphasi quadam, *Atque his*, ut apud Catull. 3, 11. Soph. Oed. R. 399, et v. 3, 10. | 145. *N. f. m.*, cf. Hom. Il. 21, 446 sq. | 146—158. Postquam, contemnens illa munimenta, ne moenia quidem Troiae ab ipso Neptuno fabricata Troianis praesidio fuisse ostendit, expugnaturum se castra promittit, ac suos cohortatur, ut se sequantur; sed ita eos hortatur, non ut statim aggrediantur vallum, sed ut vi ferroque, nulla praeterea arte, rem gerant. Interea consumto prope die corpora curare iubet pugna in crastinum dilata. | 148. *arm. Volc.*, qualia is fecit Achilli. | 150. insidias nocturnas, quales Graeci struxerunt Troianis, cf. 2, 250—255. | 153. *igni*, quo incendamus turres tectaque domorum. | 155. *distulit*, moratus est. | 156. *Nunc adeo*, v. 4, 533. | 157. *Quod superest*, sc. ut fiat; non quod superest dieti; cf. G. 2, 346. — *bene g. reb.*, quod timorem incussistis

- Procurate, viri, et pugnam sperate parari.  
 Interea vigilum excubiis obsidere portas  
 160 Cura datur Messapo et moenia cingere flammis.  
 Bis septem Rutuli, muros qui milite servant,  
 Delecti; ast illos centeni quemque sequuntur  
 Purpurei cristis iuvenes auroque corusci.  
 Discurrunt, variantque vices, fusique per herbam  
 165 Indulgent vino et vertunt crateras aenos.  
 Conlucent ignes; noctem custodia ducit  
 Insomnem ludo.  
 Haec super e vallo prospectant Troes, et armis  
 Alta tenent; nec non trepidi formidine portas  
 170 Explorant, pontisque et propugnacula iungunt,  
 Tela gerunt. Instant Mnestheus acerque Serestus,  
 Quos pater Aeneas, si quando adversa vocarent,  
 Rectores iuvenum et rerum dedit esse magistros.  
 Omnis per muros legio, sortita periculum,  
 175 Excubat exercetque vices, quod cuique tuendum est.  
 Nisus erat portae custos, acerrimus armis,  
 Hyrtacides, comitem Aeneae quem miserat Ida  
 Venatrix, iaculo celerem levibusque sagittis;  
 Et iuxta comes Euryalus, quo pulchrior alter  
 180 Non fuit Aeneadum Troiana neque induit arma,  
 Ora puer prima signans intonsa iuventa.  
 His amor unus erat, pariterque in bella ruebant;  
 Tum quoque communi portam statione tenebant.  
 Nisus ait: Dine hunc ardorem mentibus addunt,  
 185 Euryale, an sua cuique deus fit dira cupido?  
 Aut pugnam, aut aliquid iamdudum invadere magnum

hostibus.] 158. Servius „a me parari sperate, i. e. pugnatu-  
 ros vos scitote, licet hostes muris se teneant.“ Alii *parati*.] 159—161. portas et moenia s.  
 muros hostium scilicet.] 161. *serv.*, v. G. 1, 335.] 164. *Discurrunt* suum  
 quisque praesidium occupaturi; deinde (*variant vices*) alius alii succedit in  
 stationem.] 165. *vertunt*, inclinant, infundentes vinum in pocula.]] 168—223.  
*Dum duces Troiani faciunt, quae pertinent ad tutanda castra, Nisus cum*  
*Euryalo communicat consilium subito sibi natum evadendi per castra hostilia*  
*rerumque nuntium ad Aeneam perferendi.*] 170. Intellige turres ante murum  
 s. vallum positas, pontibus cum muro iunctas, cf. 12, 674 sq.] 171. *gerunt*,  
 afferunt, cf. Liv. 28, 19.] 172. *adv.*, pericula, *voc.*, provocarent ad ipsa sub-  
 eunda ac propulsanda.] 174 sq. ad arcendum periculum milites sortito succe-  
 dentes munus suum quisque obeunt; *vices* munus certo homini certisve hominibus  
 iniunctum; *vices, quod*, vices eius rei, quae cuique tuenda est, s. id muneris,  
 quod c. t. e., et v. E. 2, 71.] 178. *Venatr.*, ergo Nympha, quae fuerat comes  
 Dianae. — *iaculo celerem*, vehementer concitantem iacula, quod est et peritiae  
 et virium, Hom. II. 12, 306 „ἐβλητ' ἐν πρώτοιισι θοῆς ἀπὸ χειρὸς ἀκοντι.“]  
 181. *pr. iuventa*, intellige lanuginem.] 182. v. 5, 308 et 830.] 184 sqq. Magnum  
 aliquid audere gestio sive deo aliquo instigante, sive mei animi impetu.] 185.  
*dira*, quae nos caecos inconsultosque in pericula vocat.] 186. *aliquid*, v. 2, 48.]

- Mens agitat mihi, nec placida contenta quiete est.  
 Cernis, quae Rutulos habeat fiducia rerum:  
 Lumina rara micant; somno vinoque soluti  
 190 Procubuere; silent late loca. Percipe porro,  
 Quid dubitem, et quae nunc animo sententia surgat.  
 Aenean acciri omnes, populusque patresque,  
 Exposcunt, mittique viros, qui certa reportent.  
 Si, tibi quae posco, promittunt, — nam mihi facti  
 195 Fama sat est, — tumulto videor reperire sub illo  
 Posse viam ad muros et moenia Pallantea.  
 Obstipuit magno laudum percussus amore  
 Euryalus; simul his ardentem adfatur amicum:  
 Mene igitur socium summis adiungere rebus,  
 200 Nise, fugis? solum te in tanta pericula mittam?  
 Non ita me genitor, bellis adsuetus Opheltes,  
 Argolicum terrorem inter Troiaeque labores  
 Sublatum erudiit; nec tecum talia gessi,  
 Magnanimum Aenean et fata extrema secutus:  
 205 Est hic, est animus lucis contemptor, et istum  
 Qui vita bene credat emi, quo tendis, honorem.  
 Nisus ad haec: Equidem de te nil tale verebar,  
 Nec fas; non: ita me referat tibi magnus ovantem  
 Iuppiter, aut quicumque oculis haec aspicit aequis.  
 210 Sed si quis — quae multa vides discrimine tali —  
 Si quis in adversum rapiat casusve deusve,  
 Te superesse velim; tua vita dignior aetas.  
 Sit, qui me raptum pugna pretiove redemptum  
 Mandet humo, solita aut si qua id fortuna vetabit,  
 215 Absenti ferat inferias, decoretque sepulchro.  
 Neu matri miserae tanti sim caussa doloris,  
 Quae te sola, puer, multis e matribus ausa  
 Persequitur, magni nec moenia curat Acestae.  
 Ille autem: Caussas nequiquam nectis inanis,

189. Alii *sepulti*.| 191. *dubitem*, animo volvam.| 193. *reportent* non ad ipsos, qui obsidentur, sed ad Aenean; sic recitat, qui scripta vel memoria comprehensa pronuntiat; refert, reportat, qui visa vel audita nuntiat et voce quasi repraesentat, et v. 3, 717.| 194. *posco*, v. vs. 21. — *Si promittunt*, *videor*, v. 2, 349.| 196. v. 2, 234.| 201. cf. Hom. Il. 7, 198 sq.| 203. *talia*, sc. quorum causa repudies me socium.| 204. *fata Aeneae*, *extrema*, quae deleta Troia sunt insecuta.| 205. *hic*, v. 2, 292. — *et ... qui*, et talis, qui *cet*.| 206. *bene*, non magno pretio. — *quo*, ad quem, sc. honorem.| 209. *aequis*, propitiis, ut vs. 234.| 210. cf. 7, 200.| 213. *me raptum p.*, corpus occisi subductum e pugna; notum illud ἐρῶεν νεκρὸς apud Homerum, nota etiam ἄποινα νεκρῶν, cf. Iliad. 24, 137.| 214. *solita Fort.*, qualis etiam ante in tali casu esse consuevit dea illa „saevo laeta negotio,” ut est apud Horat. Od. 3, 29, 49. Val. Fl. 3, 45 „soliti rediere Pelasgi,” non, qui redire, sed qui ante ibi versari soliti erant, nisi forte potius: quales esse solent, perfidi, ut supra 2, 106.| 217. cf. 5, 711—18 et 750.| 219. *nectere* est inter se implicare; quae autem ita implicata

- 220 Nec mea iam mutata loco sententia cedit.  
 Adceleremus, ait. Vigiles simul excitat. Illi  
 Succedunt servantque vices; statione relictā  
 Ipse comes Niso graditur, regemque requirunt.  
 Cetera per terras omnis animalia somno
- 225 Laxabant curas et corda oblita laborum:  
 Ductores Teucrum primi et delecta iuventus  
 Consilium summis regni de rebus habebant,  
 Quid facerent, quisve Aeneae iam nuntius esset.  
 Stant longis adnixa hastis et scuta tenentes
- 230 Castrorum et campi medio. Tum Nisus et una  
 Euryalus confestim alacres admittier orant;  
 Rem magnam, pretiumque morae fore. Primus Iulus  
 Accepit trepidos, ac Nisum dicere iussit.  
 Tum sic Hyrtacides: Audite o mentibus aequis,
- 235 Aeneadae, neve haec nostris spectentur ab annis,  
 Quae ferimus. Rutuli somno vinoque soluti  
 Contigere; locum insidiis conspeximus ipsi,  
 Qui patet in bivio portae, quae proxuma ponto;  
 Interrupti ignes, aterque ad sidera fumus
- 240 Erigitur; si fortuna permittitis uti,  
 Quaesitum Aenean et moenia Pallantea:  
 Mox hic cum spoliis, ingenti caede peracta,  
 Adfore cernetis. Nec nos via fallat euntis:  
 Vidimus obscuris primam sub vallibus urbem

sunt, difficiliora sunt ad solvendum; quare transfertur hoc verbum, ut Graecum *πλέξεν*, ad dolos, fraudes, insidias, quae res difficiles sunt ad expediendum; itaque causas necitero valet i. q. praetexere aliquid. capiendi alterius causa. | 221. *simul*, v. E. 6, 26. | 222. v. vs. 175. | 223. *regem* Ascanium, regium puerum. || 224—313. *Aperiunt Nisus et Euryalus propositum suum ducibus Troianorum forte ad consultandum congressis collaudatique cum promissis praemiorum praesentibusque muneribus exeunt.* | 226. *del. iuv.*, tangitur mos ducum Romanorum, qui praeter legatos tribunosque interdum etiam centuriones omnium ordinum equitesque ad consilium adhibebant. — Alii et omittunt, cf. vs. 309. | 230. Donatus „*campus spatium intra castra constitutum ad tractatus necessarios*,” ergo locus in castris Romanis, qui appellabatur *Principia*. | 231. *Iunge alacres orant et confest. admitti.* | 232. *Rem esse magnam.* — *morae consiliis illorum allatae.* | 233. *trepidos*, festinos. | 234. *aequis*, v. vs. 209. | 235. *spect. ab a.*, Terent. Andr. 4, 1, 22 „*tuum animum ex animo spectavi (iudicavi) meo.*” | 237. *insidiis*, ad fallendos clandestino egressu Rutulos caedemque in castris eorum faciendam. | 238. *in biv.*, quod excipiebat porta castrorum egressos, et cf. vs. 372. | 241. *Quaesitum* Supinum est: ut quaeramus. | 243. *Adfore* (nos scilicet) tempus Infinitivi accommodatum ad tempus Verbi regentis; in soluta oratione dixeris *adesse cernetis*. Ac si de reditu potissimum ageretur, *huc* dicendum fuit, non *hic*; quare *hic adfore cernetis* non est i. q. huc reversos cernetis, sed hic ante ora vestra constitutos; hoc pertinet ad Nisum et Euryalum, *huc* referendum esset ad Aeneam, quem non spoliis insignem reverti interest, sed omnino redire. | 244. *Vid. sub v.*, i. e. *in vallibus versantes* vidimus; *sub* posuit poeta, quod agitur de loco depressiore, v. 1, 680.

- 245 Venatu adsiduo et totum cognovimus amnem.  
 Hic annis gravis atque animi maturus Aletes:  
 Di patrii, quorum semper sub numine Troia est,  
 Non tamen omnino Teucros delere paratis,  
 Cum talis animos iuvenum et tam certa tulistis
- 250 Pectora. — Sic memorans humeros dextrasque tenebat  
 Amborum, et voltum lacrimis atque ora rigabat. —  
 Quae vobis, quae digna, viri, pro laudibus istis  
 Praemia posse rear solvi? pulcherrima primum  
 Di moresque dabunt vestri; tum cetera reddet
- 255 Actutum pius Aeneas atque integer aevi  
 Ascanius, meriti tanti non inmemor umquam.  
 Immo ego vos, cui sola salus genitore reducto,  
 Excipit Ascanius, per magnos, Nise, Penatis  
 Assaracique Larem et canae penetralia Vestae
- 260 Obtestor, — quaecumque mihi fortuna fidesque est,  
 In vestris pono gremiis, — revocate parentem,  
 Reddite conspectum; nihil illo triste recepto.  
 Bina dabo argento perfecta atque aspera signis  
 Pocula, devicta genitor quae cepit Arisba,
- 265 Et tripodas geminos, auri duo magna talenta,  
 Cratera antiquum, quem dat Sidonia Dido;  
 Si vero capere Italiam sceptrisque potiri  
 Contigerit victori et praedae dicere sortem:  
 Vidisti, quo Turnus equo, quibus ibat in armis
- 270 Aureus; ipsum illum, clipeum cristasque rubentis  
 Excipiam sorti, iam nunc tua praemia, Nise.

— *prim. urb.*, i. e. primam urbis partem, obversam illam his vallibus. | 245. *Ven. ads.*, Ablativi absoluti: dum assidue venamur, vidimus urbem et amnem cognovimus. | 246. *annis gr.*, Theocr. 24, 100 „πολλοῖσι βαρὺς πρὸς ἐὼν ἐνιαυτοῖς.“ — *animi m.*, v. G. 4, 491. | 247. v. 2, 703. | 248. *tamen*, v. E. 10, 31. | 249. *Cum tulistis*: Indicativum posuit poeta in re, quam certam exploratamque esse e re nata intelligitur; Cic. Ep. ad Fam. 15, 11, 2 „De tua fide et benevolentia in nos nisi persuasum esset nobis, non conscripsissemus haec tibi; quae profecto, cum istum animum habes, in optimam partem accipies.“ id. pro Mil. c. 36 „Te quidem, cum isto animo es, satis laudare non possum.“ — *tulistis*, protulistis; deorum enim beneficio nascuntur talia ingenia. — *certa*, ad quidvis audendum parata, *entschlossen*. Quod ante indefinite dictum est *talis animos*, illustratur verbis *tam certa pectora*. | 250. Quomodo id fieri potuit? Nempe alteri inhaerebat Aletes post alterum, et sinistram imponebat humero, dextra dextram amplectebatur. | 252. *laud.*, laus apud poetas saepe est virtus factis probata atque illustrata, Ovid. Met. 8, 262 sq. „iam lamentabile Athenae Pendere desiderant Thesae laude tributum.“ | 255. *int. aevi*, in ipso flore aetatis constitutus; et v. G. 4, 491. | 257. *sola s. g. r.*, nulla salus nisi genitore r. | 258 sq. Horum deorum beneficio maxime continebatur salus urbis imperiique. | 259. *canae*, ut antiquissima religione cultae. | 260. *fides*, fiducia rerum. | 263. *asp. s.*, v. 5, 267. | 264. *Arisba*, oppidum Troadis. | 265. *magna*, v. 5, 248. | 266. *quem dat*, i. e. quod donum est Didonis, v. E. 8, 45. | 268. *victori*, sc. mihi, cf. vs. 271. — *dicere s.*, constituere et tribuere suam cuique partem. Alii *ducere*. | 271. *Exc. sorti*, dabo praeter

- Praeterea bis sex genitor lectissima matrum  
 Corpora captivosque dabit, suaque omnibus arma;  
 Insuper his, campi quod rex habet ipse Latinus.
- 275 Te vero, mea quem spatiis propioribus aetas  
 Insequitur, venerande puer, iam pectore toto  
 Accipio et comitem casus conplector in omnis.  
 Nulla meis sine te quaeretur gloria rebus;  
 Seu pacem seu bella geram, tibi maxuma rerum
- 280 Verborumque fides. Contra quem talia fatur  
 Euryalus: Me nulla dies tam fortibus ausis  
 Dissimilem arguerit; tantum fortuna secunda  
 Haud adversa cadat. Sed te super omnia dona  
 Unum oro: genetrix Priami de gente vetusta
- 285 Est mihi, quam miseram tenuit non Ilia tellus  
 Mecum excedentem, non moenia regis Acestae.  
 Hanc ego nunc ignaram huius quodcumque pericli est  
 Inque salutatam linquo; Nox et tua testis  
 Dexterâ, quod nequeam lacrimas perferre parentis.
- 290 At tu, oro, solare inopem et succurre relictâe.  
 Hanc sine me spem ferre tui: audentior ibo  
 In casus omnis. Percussa mente dedere  
 Dardanidae lacrimas; ante omnis pulcher Iulus,  
 Atque animum patriae strinxit pietatis imago.
- 295 Tum sic effatur:  
 Sponde digna tuis ingentibus omnia coeptis.  
 Namque erit ista mihi genetrix, nomenque Creusae

sortem tibi debitam, γέρας ἐξαίρετον, v. 5, 534.] 272. *matrum*, intellige mulieres captivas.] 273. *suaq. o. a.*, et quae cuique eorum sunt arma, αὐτοῖς τεύχεσιν *sua* significat possessionem, Dativus ei Praenomini adiectus indicat, cuius ea possessio sit; cf. 6, 233.] 274. *his* est Ablativus pendens ex *Insuper*. — *quod campi*, agri portio honoris causa a populo regi assignata, τέμενος Hom. II. 6, 193—95. — Ceterum ex multitudine ac magnitudine praemiorum apparet, quam non solum grata, sed in tanto discrimine etiam necessaria videatur opera a Niso Euryaloque promissa.] 277. *comitem* etiam ad *Accipio* referes.] 279 sq. rerum domi forisque gerendarum te maxime utar socio; *rerum* bello agendarum; *verborum*, deliberationis domi instituendae.] 282. *arg.*: Futurum exactum ad opinionem et propositum loquentis spectat: non spero fore (s. non committam), ut arguat; 12, 316. — *tantum f. s. H. a. cadat*, modo fortuna, quae nunc secunda est, haud adversa cadat.] 283. *super*, v. 7, 462.] 286. *exced.*, in soluta oratione diceres „quin mecum excederet;“ Eurip. Phoen. 634 „ὥς τὰχ' οὐκέτι αἰματηρὸν τοῦ μὲν ἀργήσει ξίφος;“ i. e. non cessabit gladius meus, quin cruentus sit. — *moen. Ac.*, cf. 5, 750.] 287. *quodcumque est*, ita loquuntur interdum, qui per simulationem modestiae aut alia de causa rem verbis extenuant, quae magna sibi videtur aut videri debet; cf. 1, 78.] 289. *testis quod*, ut scio quod, Phaedr. 5, 2, 13 „Scio quod virtuti non sit credendum tuae.“] 291. v. E. 10, 13.] 294. *patr. p. imago*, cogitatio suae in patrem Aeneam Aeneaeque in ipsum pietatis, excitata exemplo Euryali matrisque eius.] 296. *Sponde*: Donatus „Quidquid scis convenire meritis tuis, ante ipsam petitionem tu tibi spondere ne dubites, atque ita, ut iam te accepisse confidas.“ Cic. Ep. ad Fam. 15, 21, 2 „Quod ego non modo de me tibi spondere possum, sed de te etiam

- Solum defuerit, nec partum gratia talem  
 Parva manet. Casus factum quicumque sequentur,  
 300 Per caput hoc iuro, per quod pater ante solebat:  
 Quae tibi polliceor reduci rebusque secundis,  
 Haec eadem matrique tuae generique manebunt.  
 Sic ait inlacrimans; humero simul exuit ensem,  
 Auratum, mira quem fecerat arte Lycaon  
 305 Gnosius atque habilem vagina aptarat eburna.  
 Dat Niso Mnestheus pellem horrentisque leonis  
 Exuvias; galeam fidus permutat Aletes.  
 Protinus armati incedunt; quos omnis euntis  
 Primorum manus ad portas, iuvenumque senumque,  
 310 Prosequitur votis. Nec non et pulcher Iulus,  
 Ante annos animumque gerens curamque virilem,  
 Multa patri mandata dabat portanda. Sed aurae  
 Omnia discerpunt et nubibus inrita donant.  
 Egressi superant fossas, noctisque per umbram  
 315 Castra inimica petunt, multis tamen ante futuri  
 Exitio. Passim somno vinoque per herbam  
 Corpora fusa vident, arrectos litore currus,  
 Inter lora rotasque viros, simul arma iacere,  
 Vina simul. Prior Hyrtacides sic ore locutus:  
 320 Euryale, audendum dextra; nunc ipsa vocat res.  
 Hac iter est. Tu, ne qua manus se attollere nobis  
 A tergo possit, custodi et consule longe;  
 Haec ego vasta dabo et lato te limite ducam.  
 Sic memorat vocemque premit; simul ense superbum  
 325 Rhamnetem adgreditur, qui forte tapetibus altis  
 Exstructus toto proflabat pectore somnum,

*mihî.* Alii *Spondeo*.| 298 sq. *partum talem*, i. e. τὸ τετοκέναι υἱὸν τοιοῦτον. Vulgari ratione diceret: Nec parva gratia manet eam, quae talem filium peperit.| 300. *hoc*, v. 2, 292. — *ante*: Nempe id *nunc* ipse facit Ascanius, quod *ante*, si quid sanctissime adiurare vellet, pater solitus fuerat.| 301. *tibi rebusq. sec.*, pro eo, quod vulgo dicimus: tibi rebus secundis utenti.| 302. *maneb.*, servabuntur, integra erunt. Ceterum ominis vitandi causa omittit Ascanius id, quod tacitus cogitat: si non redieris, s. si te fortuna oppresserit.| 305. *habilem* ad educendum, et v. 1, 318. — *vag. apt.*, vagina incluserat, cui aptus esset ensis.| 306. *pell. h. l. exuv.*, pellem villosa leoni detractam.| 307. *permutat* cum galea Euryali.| 313. cf. 10, 652. 11, 795 et 798. Tib. 1, 4, 21 sq. et 3, 6, 27 sq. „venti temeraria vota Aeriae et nubes diripienda ferant.“|| 314–366. *Magna caede dormientium hostium perpetrata Nisus et Euryalus pergunt, quo iter ducebat.*| 315. *inimica*, ipsis futura pernicioosa cum ob moram interpositam (vs. 355) tum ob galeam (vs. 365 et 373) eos prodentem. — *tamen*, v. E. 10, 31. — *ante*, antequam inimica sibi esse castra sentirent.| 317. *arr.*, arrecto temone cum iugo et reclinata ad terram parte currus extrema; verbo: resupinatos, quippe binis rotis instructos.| 322. *consule*, provide.| 323. *vasta d.*, vastata dabo, vastabo, cf. 12, 437. Terent. Andr. 4, 1, 59 „iam hoc tibi *inventum dabo*.“| 324. *vocemq. pr.*, i. e. submissa voce.| 326. *Exstructus tapetibus*, recubans in alte exstructis pulvinis, qui tapetibus instrati erant. —



- Rex idem, et regi Turno gratissimus augur;  
 Sed non augurio potuit depellere pestem.  
 Tris iuxta famulos temere inter tela iacentis
- 330 Armigerumque Remi premit aurigamque sub ipsis  
 Nactus equis, ferroque secatur pendentia colla;  
 Tum caput ipsi aufert domino, truncumque relinquit  
 Sanguine singultantem; atro tepefacta cruore  
 Terra torique madent. Nec non Lamyrumque Lamumque
- 335 Et iuvenem Serranum, illa qui plurima nocte  
 Luserat, insignis facie, multoque iacebat  
 Membra deo victus; felix, si protinus illum  
 Aequasset nocti ludum in lucemque tulisset.  
 Inpastus ceu plena leo per ovilia turbans —
- 340 Suadet enim vesana fames — manditque trahitque  
 Molle pecus mutumque metu; fremit ore cruento.  
 Nec minor Euryali caedes; incensus et ipse  
 Perfurit ac multam in medio sine nomine plebem,  
 Fadumque Herbesumque subit Rhoetumque Abarimque,
- 345 Ignaros; Rhoetum vigilantem et cuncta videntem;  
 Sed magnum metuens se post cratera tegebat:  
 Pectore in adverso totum cui comminus ense  
 Condidit adsurgenti, et multa morte recepit.  
 Purpuream vomit ille animam et cum sanguine mixta
- 350 Vina refert moriens; hic furto fervidus instat.  
 Iamque ad Messapi socios tendebat; ibi ignem  
 Deficere extremum et religatos rite videbat  
 Carpere gramen equos: breviter cum talia Nisus —  
 Sensit enim nimia caede atque cupidine ferri —
- 355 Absistamus, ait; nam lux inimica propinquat.  
 Poenarum exhaustum satis est; via facta per hostis.  
 Multa virum solido argento perfecta relinquunt  
 Armaque craterasque simul pulchrosque tapetas.  
 Euryalus phaleras Rhamnetis et aurea bullis

*profl. somn.*, Theocr. 24, 47 „δμῶας ὕπνον βαρὺν ἐκφυσῶντας.“ | 328. *pestem*, Hom. II. 2, 858 sq.: „καὶ Ἐννομος οἰωνιστὴς· ἀλλ’ οὐκ οἰωνοῖσιν ἐρύσσατο Κῆρα μέλαιναν, ἀλλ’ ἑδάμη“ cet. | 330. *premit*, opprimit. | 334. *Nec non*, puta: interimit. | 336. *Luserat plurima*, lusibus et iocis indulserat. | 337. *deo*, Baccho, v. G. 1, 295. | 339. *Furit Nisus*, ceu leo cet. et cf. Hom. II. 12, 299 sqq. — *turbans*, turbas excitans, κλονέων, ut E. 1, 12 *turbatur*, fit turba. | 343. *in medio* esse dicitur, quidquid adest paratum usuro; ergo hoc loco, qui prope cubantes se trucidandos ei praebent. | 348. *multa m.*, Donatus „ubi vidit hominem plena morte confectum, revocavit gladium;“ Servius „cum multo cruore.“ | 349. *Purp. an.*, sanguinem, quocum vita efflatur; Hom. H. in Apoll. 361 „λείπε δὲ θυμὸν φοινῶν ἀποπνέουσα.“ Soph. Ai. 1390 „θερμαὶ σύριγγες ἄνω φουσῶσι μέλαν μένος.“ | 350. *refert*, ἀναφέρει, relicit. — *furto*, v. 6, 568. | 354. *nimia c. a. cup.*, nimia caedis cupidine; hendiadys. | 356. *Poenar.*, caedis ad ulciscendum hostem factae. | 359. Refertur hoc a poeta ad priscam originem phalararum, quae virtutis bellicae

- 360 Cingula, Tiburti Remulo ditissimus olim  
 Quae mittit dona, hospitio cum iungeret absens,  
 Caedicus; ille suo moriens dat habere nepoti;  
 Post mortem bello Rutuli pugnaque potiti;  
 Haec rapit atque humeris nequiquam fortibus aptat.
- 365 Tum galeam Messapi habilem cristisque decoram  
 Induit. Excedunt castris et tuta capessunt.  
 Interea praemissi equites ex urbe Latina,  
 Cetera dum legio campis instructa moratur,  
 Ibant et Turno regi responsa ferebant,
- 370 Ter centum, scutati omnes, Volscente magistro.  
 Iamque propinquabant castris muroque subibant,  
 Cum procul hos laevo flectentis limite cernunt  
 Et galea Euryalum sublustri noctis in umbra  
 Prodidit inmemorem radiisque adversa refulsit.
- 375 Haud temere est visum. Conclamat ab agmine Volscens:  
 State, viri; quae caussa viae? quive estis in armis?  
 Quove tenetis iter? Nihil illi tendere contra,  
 Sed celerare fugam in silvas et fidere nocti.  
 Obiiciunt equites sese ad divortia nota
- 380 Hinc atque hinc, omnemque abitum custode coronant.  
 Silva fuit late dumis atque ilice nigra  
 Horrida, quam densi conplerant undique sentes;  
 Rara per occultos lucebat semita calles.  
 Euryalum tenebrae ramorum onerosaque praeda

causa militibus ab imperatoribus dabantur: orbiculi quidam aurei argenteive cum toreumatis, qui loris ex humeris pendentibus affixi in pectoralibus (i. e. lorici) gestabantur. Testantur id monumenta vetera; cf. praeterea Sil. It. 15, 255. Sueton. Aug. 25. Tac. Hist. 1, 89. — *aur. b.*, χρυσόχλα, cf. Hom. It. 11, 29 sq. | 361. *mittit*, v. vs. 266. — *iungeret*, v. G. 1, 163. | 362. *nepoti*, „Remulo“, ait Servius; „nam quoties aperte non ponitur nomen filii vel nepotis, cognominem eum esse intelligimus avo vel patri, quorum nomen aperte positum invenimus; et contra si filii vel nepotis positum nomen fuerit, praetermissum autem parentum, cognomines eos intelligamus necesse est.“ et cf. 7, 762. 11, 700. | 363. *Post mortem* Remuli avi venit id cingulum in potestatem Rutulorum, qui caeso in pugna nepote potiti sunt illo. | 364. *nequiq.*, v. 5, 80. | 365. *hab.*, quae facile geri capite potest, aptam capiti; v. 1, 318. || 367—449. *Mors Euryali Nisique.* | 369. *responsa f.*, ab eo scilicet, qui praeerat exercitui versu superiore commemorato; nos ea Francogallico nomine appellamus *Rapport.* — *Alii regis.* | 370. *Ter cent.* Servius „quia Romani equites (*Celeres*) primo trecenti fuerunt. — *Volsc. mag.*, magister equitum dicitur more Romano.“ et v. 11, 603. | 371. *castris* Troianorum. — *Alii muros.* | 372. *flect.*, v. G. 1, 163. — *laevo lim.*, cf. vs. 238. | 374. *inmemor.*, imprudentem, qui aeream, igitur etiam in tenui luce refulgentem, galeam induisset; cautior Diomedes ap. Hom. Il. 10, 258. — *adu.*, ab ea parte, quae (lunae et) venientibus equitibus adversa erat. | 375. *Alii visus.* | 377. *tendere contra*, respondere interpretantur Servius ac Donatus. | 379. *divort.*, diverticula viarum. | 382. *Horrida*, v. 1, 165. — *dumi* sunt altiores, *sentes* humiliores et aculeati. | 383. raris intervallis διαγλαύσσουσιν ἀραπνοί, ut ait Apollon. Rh. 1, 1281. Et *calles* sunt viae pecorum angustae ac saepe salebrosae per silvas saltusque; *semitae*, quae singulis hominibus dant iter;

- 385 Inpediunt, fallitque timor regione viarum.  
Nisus abit; iamque imprudens evaserat hostis  
Atque locos, qui post Albae de nomine dicti  
Albani, tum rex stabula alta Latinus habebat:  
Ut stetit, et frustra absentem respexit amicum.
- 390 Euryale infelix, qua te regione reliqui?  
Quave sequar, rursus perplexum iter omne revolvens  
Fallacis silvae? Simul et vestigia retro  
Observata legit dumisque silentibus errat.  
Audit equos, audit strepitus et signa sequentum.
- 395 Nec longum in medio tempus, cum clamor ad auris  
Pervenit ac videt Euryalum; quem iam manus omnis,  
Fraude loci et noctis, subito turbante tumultu,  
Oppressum rapit et conantem plurima frustra.  
Quid faciat? qua vi iuvenem, quibus audeat armis
- 400 Eripere? an sese medios moriturus in enses  
Inferat et pulchram properet per volnera mortem?  
Ocius adducto torquens hastile lacerto,  
Suspiciens altam Lunam, et sic voce precatur:  
Tu, dea, tu praesens nostro succurre labori,
- 405 Astrorum decus et nemorum Latonia custos;  
Si qua tuis umquam pro me pater Hyrtacus aris  
Dona tulit, si qua ipse meis venatibus auxi,  
Suspendive tholo, aut sacra ad fastigia fixi:  
Hunc sine me turbare globum et rege tela per auras.
- 410 Dixerat, et toto connixus corpore ferrum  
Coniicit. Hasta volans noctis diverberat umbras,  
Et venit aversi in tergum Sulmonis, ibique  
Frangitur, ac fissio transit praecordia ligno.  
Volvitur ille vomens calidum de pectore flumen
- 415 Frigidus, et longis singultibus ilia pulsatur.  
Diversi circumspiciunt. Hoc acrior idem  
Ecce aliud summa telum librabat ab aure.  
Dum trepidunt, iit hasta Tago per tempus utrumque,

Niso et Euryalo eiusmodi calles pro semita fuerunt. | 385. *fall. t. r. v.*, timor faciebat, ut aberraret ab ea via, qua pergere debebat, v. 2, 737. | 386. *imprud.*, quippe immemor Euryali. | 387. *locos*: suspicabimur in ista regione aut Albanis adsignatos fuisse locos (i. e. τόπους, viculos) quosdam ex hostibus captos, aut Romanis hominibus ex agro Albano post dirutam Albam divisos, eosque dici locos Albanos. — Alii *lacus* vel *Ac lucos*. | 388. *stab. a.*, v. 7, 512. | 397. *sub. t. t.*, ergo subito tumultu perturbatum Euryalum. | 403. *et*, quasi *torquet* vel *suspicit* praecesserit. Utantur interdum veteres scriptores tali oratione, quae ipsa perturbata turbatam mentem vel loquentis vel agentis indicet. Sed fortasse Homerum imitatus est poeta Il. 22, 247 „ὥς γὰ μὲν καὶ κερδοσύνη ἡ γῆ σὰτ' Ἀθήνη“, quibus comparare licebit 6, 547 „Tantum effatus et in verbo vestigia torsit.“ | 404. *praesens succ.*, praesenti ope. | 405. *nem. cust.*, utpote eadem credita, quae Diana. | 406 sq. *si*, v. G. 1, 7. — *si auxi*, si alia ipse tuli. | 408. v. E. 7, 30. | 409. *turb. gl.*, sc. ut per eam turbam evadere possit Euryalus. | 416.

- Stridens, traiectoque haesit tepefacta cerebro.  
 420 Saevit atrox Volscens, nec teli conspicit usquam  
 Auctorem, nec quo se ardens inmittere possit.  
 Tu tamen interea calido mihi sanguine poenas  
 Persolves amborum, inquit; simul ense recluso  
 Ibat in Euryalum. Tum vero exterritus, amens,  
 425 Conclamat Nisus; nec se celare tenebris  
 Amplius, aut tantum potuit perferre dolorem:  
 Me, ~~me~~, adsum, qui feci, in me convertite ferrum,  
 O Rutuli! mea fraus omnis; nihil iste nec ausus,  
 Nec potuit; caelum hoc et conscia sidera testor;  
 430 Tantum infelicem nimium dilexit amicum.  
 Talia dicta dabat; sed viribus ensis adactus  
 Transabiit costas et candida pectora rumpit.  
 Volvitur Euryalus Leto, pulchrosque per artus  
 It cruor, inque humeros cervix conlapsa recumbit:  
 435 Purpureus veluti cum flos succisus aratro  
 Languescit moriens, lassove papavera collo  
 Demisere caput, pluvia cum forte gravantur.  
 At Nisus ruit in medios, solumque per omnis  
 Volscentem petit, in solo Volscente moratur.  
 440 Quem circum glomerati hostes hinc comminus atque hinc  
 Proturbant. Instat non setius ac rotat ensem  
 Fulmineum, donec Rutuli clamantis in ore  
 Condidit adverso et moriens animam abstulit hosti.  
 Tum super exanimum sese proiecit amicum  
 445 Confossus, placidaque ibi demum morte quievit.  
 Fortunati ambo! si quid mea carmina possunt,  
 Nulla dies umquam memori vos eximet aevo,  
 Dum domus Aeneae Capitoli immobile saxum  
 Accolet inperiumque pater Romanus habebit.

*Div.*, alii alio. | 421. *ardens*, scilicet ulciscendi cupiditate. | 427. *Me, me*, sc. petite. | 428. *mea fr. o.*, quidquid fraudis in vestram perniciem moliti sumus, meo consilio susceptum est. | 429. *Nec pot.*, propter aetatem. | 430. *Tantum*, nihil ille fecit, nisi *cet.* | 433. Qui proni ex editiore loco cadunt (1, 116, 10, 403, 11, 640, 889) aut stantes erectique deiicuntur sternunturque, volvi dicuntur, 12, 329 „Semineces volvit multos,“ adde 10, 700. Itaque *Volvitur Eur. Leto* idem est, quod *sternitur Morti*, v. 8, 566. | 435. Similiter Catull. 11, 22 sqq. | 436. cf. Hom. II. 8, 306 sq. | 445. qui ante non quieverat, i. e. ab ulciscendi studio non destiterat, destitit (*quievit*) tum demum (exacta ultione) in morte; v. 4, 436. — *placida*, quia ultus erat suum Euryalum. | 446. *Fortunati* propter singularem fidem constantiamque iuvenilis amicitiae mortis etiam testimonio comprobata, dignam praeconio aeterni carminis. | 449. *pat. Rom.*, Augustus; similiter de Imperatore Theodosio Ausonius Praefat. ad Theodos. vs. 21 „Tu modo te iussisse, *pater Romane*, memento.“ et de Augusto Horat. Od. 1, 2, 50 „Hic ames dici Pater atque Princeps.“ Est hoc honoris vocabulum, quare *pater Aeneas* 1, 580 et saepius, de Maecenate Horat. Ep. 1, 7, 37 „audisti rexque *paterque*.“ *ἔσιβε πάτερ* apud Homerum. Etsi autem ipse Augustus non

- 450 Victores praeda Rutuli spoliisque potiti,  
 Volscentem exanimum flentes in castra ferebant.  
 Nec minor in castris luctus Rhamneta reperto  
 Exsanguì et primis una tot caede peremptis,  
 Serranoque Numaque. Ingens concursus ad ipsa  
 455 Corpora seminecisque viros tepidaque recentem  
 Caede locum et plenos spumanti sanguine rivos.  
 Adgnoscent spolia inter se galeamque nitentem  
 Messapi et multo phaleras sudore receptas.  
 Et iam prima novo spargebat lumine terras  
 460 Tithoni croceum linquens Aurora cubile:  
 Iam sole infuso, iam rebus luce reiectis,  
 Turnus in arma viros, armis circumdatus ipse,  
 Suscitât, aeratasque acies in proelia cogit  
 Quisque suas, variisque acuunt rumoribus iras.  
 465 Quin ipsa arrectis — visu miserabile — in hastis  
 Praefigunt capita et multo clamore sequuntur  
 Euryali et Nisi.  
 Aeneadae duri murorum in parte sinistra  
 Opposuerunt aciem, — nam dextera cingitur amni —  
 470 Ingentisque tenent fossas et turribus altis  
 Stant maesti; simul ora virum praefixa movebant,  
 Nota nimis miseris atroque fluentia tabo.  
 Interea pavidam volitans pennata per urbem  
 Nuntia Fama ruit, matrisque adlabitur auris  
 475 Euryali. At subitus miserae calor ossa reliquit;  
 Excussi manibus radii, revolutaque pensa.  
 Evolat infelix, et femineo ululatu,  
 Scissa comam, muros amens atque agmina cursu  
 Prima petit, non illa virum, non illa pericli  
 480 Telorumque memor; caelum dehinc questibus inplet:  
 Hunc ego te, Euryale, aspicio? tune ille senectae  
 Sera meae requies potuisti linquere solam,  
 Crudelis? nec te, sub tanta pericula missum,

erat aeternum regnaturus, tamen penes familiam eius perpetuum imperium fore auguratur poeta.]] 450—502. *In castris utrisque insignis luctus, maxima matris Euryali.* 450. *Rutuli*, potius *Latini*, cf. vs. 367 sqq.; eadem nominum confusio 11, 518. 869. 603. 618 et 629. v. etiam 10, 390. item appellat poeta *Volscos* vs. 505, qui paulo post verius Rutuli appellantur vs. 517 et 519. — *praeda*, quam ceperant de Niso et Euryalo, *spoliis*, quae Euryalus e castris Rutulorum abstulerat, cf. vs. 457. 454. v. 9, 811. 455 sq. *rec. c. locum*, in quo recens caedes facta. 457. *inter se*, Voss: „mit einander,“ ut *inter se colloqui, ludere.* 459. v. 5, 762. 464. *rumores* isti spectant ad fraudem illam nocturnam. 468 sq. v. vs. 69. 470. *tenent f.* proprie muros, quibus subiectae sunt fossae, quarum a transitu arcent hostem. 471. *maesti* propter absentem in eo discrimine Aeneam. 475. v. G. 3, 272. 476. cf. Hom. II. 22, 448. — *revol. p.*, resolvitur (sua sponte), quod modo texuit. 477. v. E. 2, 24. 481. *Hunc*, talem, et mortuum et ita habitum. — *ille ... requies*, quem

- Adfari extremum miserae data copia matri?  
 485 Heu, terra ignota canibus date praeda Latinis  
 Alitibusque iaces! nec te tua funera, mater,  
 Produxi, pressive oculos, aut volnera lavi,  
 Veste tegens, tibi quam noctes festina diesque  
 Urguebam et tela curas solabar anilis.  
 490 Quo sequar? aut quae nunc artus avolsaque membra  
 Et funus lacerum tellus habet? Hoc mihi de te,  
 Nate, refers? hoc sum terraque marique secuta?  
 Figite me, si qua est pietas, in me omnia tela  
 Coniicite, o Rutuli, me primam assumite ferro;  
 495 Aut tu, magne pater divum, miserere, tuoque  
 Invisum hoc detrude caput sub Tartara telo,  
 Quando aliter nequeo crudelem abrumpere vitam.  
 Hoc fletu concussi animi, maestusque per omnis  
 It gemitus; torpent infractae ad proelia vires.  
 500 Illam incendensem luctus Idaeus et Actor  
 Ilionei monitu et multum lacrimantis Iuli  
 Corripiunt interque manus sub tecta reponunt.  
 At tuba terribilem sonitum procul aere canoro  
 Increpuit; sequitur clamor, caelumque remugit.  
 505 Adcelerant acta pariter testudine Volsci;  
 Et fossas implere parant ac vellere vallum.  
 Quaerunt pars aditum et scalis ascendere muros,  
 Qua rara est acies interlucetque corona

sperabam futurum esse senectutis meae requiem, v. 10, 862.] 484. *Adf. extr.*, v. 2, 644.] 485. *date*, Vocativus pro Nominativo, ut 10, 327. 12, 947. Tib. 1, 7, 53, attractus, quemadmodum grammatici loquuntur, a secunda persona Verbi.] 486. *funera*: funeras, ut refert Servius, antiqui eas dicebant, ad quas funus et praecipuus in funere dolor pertinet, ut matrem, sororem. — *tua ἐμπατιχῶς*, ut tua funera sit ea, quae filium funeret lugeatque, cum secundum ordinem naturae filius id matri praestare debeat.] 487. *Produxi*, funus tibi duxi; Luc. 2, 298 „longum producere funus ad tumulos.“] 488. *Veste tegens*, nec veste te texi. Similiter modo quodam negligentiore, ubi Verba finita exspectes, Participia substituantur vs. 734 sq. „Agnoscent faciem invisam atque immania membra *Turbati* subito Aeneadae,“ i. q. eaque re turbantur; 10, 193.] 489. *quam ... urgebam et solabar curas*, i. e. quam urgens solabar curas, cf. 4, 264. 3, 354 „libabant pocula ... paterasque tenebant,“ i. e. tenentes pateras; 10, 83 „figitque volatque,“ i. e. figit volans; adde 10, 330.] 491. *funus*, v. 6, 510. — *hoc*, caput in peritica suffixum vs. 465 sq.] 492. *hoc s. t. m. sec.*, hoc ut mihi eveniret tam longo molestoque itineri operam dedi? *sequi*, διώκειν, ut μεγάλα διώκων Eurip. Bacch. 396 et supra 5, 629 „per mare Italiam sequimur.“] 493. *si q. e. pietas*, si vos, ut fas est, miseret matris inflicis.] 497. *crud.*, v. 2, 368.] 499. *infr.* v. 12, 1.] 500. v. 10, 895.] 501. *Il.*, v. E. 6, 78.] 502. *inter m.*, v. 2, 681.]] 503—589. *Dato signo coepta oppugnatio castrorum cum varia fortuna.*] 503. Litera *t* crebro repetita habet terribile quid, numeri imitantur fractum sonum tubae. Ennius parum convenienter dignitati epici carminis „At tuba terribili sonitu tarantibara dixit.“] 505. v. 2, 441. — *pariter*, quia in ea re pari omnium incessu motuque opus erat, quo aptius scuta inter se connecterentur. — Volsci equites adfuerunt Turno, cf.

- Non tam spissa viris. Telorum effundere contra  
 510 Omne genus Teucris ac duris detrudere contis,  
 Adsueta longo muros defendere bello.  
 Saxa quoque infestoolvebant pondere, si qua  
 Possent tectam aciem perrumpere, cum tamen omnis  
 Ferre iuvat subter densa testudine casus.  
 515 Nec iam sufficiunt. Nam qua globus imminet ingens,  
 Inmanem Teucris molemvolvuntque ruuntque,  
 Quae stravit Rutulos late; armorumque resolvit  
 Tegmina. Nec curant caeco contendere Marte  
 Amplius audaces Rutuli, sed pellere vallo  
 520 Missilibus certant.  
 Parte alia horrendus visu quassabat Etruscam  
 Pinum et fumiferos infert Mezentius ignis;  
 At Messapus equum domitor, Neptunia proles,  
 Rescindit vallum et scalas in moenia poscit.  
 525 Vos, o Calliope, precor, adspirate canenti,  
 Quas ibi tum ferro strages, quae funera Turnus  
 Ediderit, quem quisque virum demiserit Orco;  
 Et mecum ingentis oras evolvite belli.  
 [Et meministis enim, divae, et memorare potestis.]  
 530 Turris erat vasto suspectu et pontibus altis,  
 Opportuna loco; summis quam viribus omnes  
 Expugnare Itali summaque evertere opum vi  
 Certabant, Troes contra defendere saxis  
 Perque cavas densi tela intorquere fenestras.  
 535 Princeps ardentem coniecit lampada Turnus,  
 Et flammam adfixit lateri; quae plurima vento  
 Corripuit tabulas et postibus haesit adesis.  
 Turbati trepidare intus, frustra malorum  
 Velle fugam. Dum se glomerant, retroque residunt  
 540 In partem, quae peste caret, tum pondere turris  
 Procubuit subito et caelum tonat omne fragore.  
 Semineces ad terram, inmani mole secuta,  
 Confixique suis telis et pectora duro

7, 803 sq., quorum nullus in testudine facienda usus; sed v. vs. 450. | 510. *detrud.* hostem. | 512. *inf. pond.*, infesta dicuntur omnia, quae vim hostilem minantur. | 517. *Rut.*, v. vs. 450. | 518. *caeco M.*, tecta acie vs. 513, s. testudine. | 521. *Etruscam*: nempe ipse cum Etruscis, quos dacebat, cf. 7, 652, *faces* castris admovebat. | 525. *Vos, o C.*, unam potissimum ex pluribus Musis nomine appellat, cf. 1, 140. Hom. Od. 12, 81 sq. — *canenti*, canere instituenti, v. 6, 468. | 528. *evolvite*, ἀναπτύσσειν, explicare, *oras* quasi picturae alicuius convolutae, quam cum ambient et complectantur orae, iis ipsis totam illam quasi tabulam, res exhibentem, significari putabis. | 529. v. 7, 645. | 530. v. vs. 170. | 536. *plur. v.*, nutrita et magna facta vento. | 540. *peste*, cf. 5, 683. — *pondere*, nempe dum omnes in eandem partem constipantur, inaequali onere turris subito inclinata procumbit. | 542. *inm. m. sec.*, superincidente in eos turri. |

- Transfossi ligno veniunt. Vix unus Helenor  
 545 Et Lycus elapsi; quorum primaevus Helenor,  
 Maeonio regi quem serva Licymnia furtim  
 Sustulerat vetitisque ad Troiam miserat armis,  
 Ense levis nudo parmaque inglorius alba.  
 Isque ubi se Turni media inter milia vidit,  
 550 Hinc acies atque hinc acies adstare Latinas:  
 Ut fera, quae, densa venantum saepta corona,  
 Contra tela furit, seseque haud nescia morti  
 Iniicit et saltu supra venabula fertur,  
 Haud aliter iuvenis medios moriturus in hostis  
 555 Inruit et, qua tela videt densissima, tendit.  
 At pedibus longe melior Lycus inter et hostis  
 Inter et arma fuga muros tenet, altaque certat  
 Prendere tecta manu sociumque attingere dextras.  
 Quem Turnus, pariter cursu teloque secutus,  
 560 Increpat his victor: Nostrasne evadere, demens,  
 Sperasti te posse manus? simul arripit ipsum  
 Pendentem et magna muri cum parte revellit:  
 Qualis ubi aut leporem aut candenti corpore cycnum  
 Sustulit alta petens pedibus Iovis armiger uncis,  
 565 Quaesitum aut matri multis balatibus agnum  
 Martius a stabulis rapuit lupo. Undique clamor  
 Tollitur; invadunt et fossas aggere conplent;  
 Ardentis taedas alii ad fastigia iactant.  
 Ilioneus saxo atque ingenti fragmine montis  
 570 Lucetium, portae subeuntem ignisque ferentem,  
 Emathiona Liger, Corynaeum sternit Asilas,  
 Hic iaculo bonus, hic longe fallente sagitta;  
 Ortygium Caeneus, victorem Caenea Turnus,  
 Turnus Itym Cloniumque, Dioxippum Promolumque,  
 575 Et Sagarim et summis stantem pro turribus Idan;

546. *Maeonio*, num i. q. Phrygio? cf. 4, 216, an Mesthli aut Antipho? cf. Hom. II. 2, 864. | 547. *vetitis*, vel quae tractare commode nondum posset propter aetatem, vel quae connivente quidem matre, sed iuvito patre sumserat. Aliter Servius „*vetitis* lege militari, qua servi a militia prohibebantur.“ | 548. v. 7, 187. — *levis, πῦλος*. — *parm. i. alba*, „quasi tiro“, ait Servius; idem 11, 711 „*Pura parma*: tunc enim primum in bella descenderat; cum tirones pictas minime gestarent parmas.“ Delectu Romae instituto qui erant inopes natuque minimi, ... ut Helenor ..., legebantur in velites, hastam, gladium, parmae gerentes, quorum ordinem inglorium appellat Sil. 9, 331. | 551 sqq. cf. Hom. II. 12, 41 sqq. | 558. *tecta*, pinnae muri. | 561. *ipsum P.*, ut pendeat, ὥς εἶχε κρεμόμενος. | 562. cf. Hom. II. 12, 397 sqq. | 563. v. E. 8, 85 et cf. Hom. II. 15, 690 sqq. 22, 308 sqq. — Alii *candentem*. | 565. *Quaes.*, v. G. 1, 206. | 566. *Mart.*, Marti sacer. | 567. *aggere*, humo aggesta. | 568. *fastigia*, turrium. | 572. *longe f.*, ex longinquo veniente ac propter celeritatem non provisa. | 575. *pro t.*, i. e. in turri, sed ita, ut pectus et os hostibus, tergum ipsi turri obversum esset, quemadmodum Praetor dicitur pro tribunali sedere, magistratus pro Rostris verba



- Privernum Capys. Hunc primo levis hasta Themillae  
 Strinxerat: ille manum proiecto tegmine demens  
 Ad vulnus tulit; ergo alis adlapsa sagitta  
 Et laevo infix a lateri manus, abditaque intus  
 580 Spiramenta animae letali vulnere rupit.  
 Stabat in egregiis Arcentis filius armis,  
 Pictus acu chlamydem et ferrugine clarus Hibera,  
 Insignis facie, genitor quem miserat Arcens,  
 Eductum matris luco Symaethia circum  
 585 Flumina, pinguis ubi et placabilis ara Palici:  
 Stridentem fundam positis Mezentius hastis  
 Ipse ter adducta circum caput egit habena,  
 Et media adversi liquefacto tempora plumbo  
 Diffidit ac multa porrectum extendit arena.  
 590 Tum primum bello celerem intendisse sagittam  
 Dicitur, ante feras solitus terrere fugacis,  
 Ascanius, fortemque manu fudisse Numanum;  
 Cui Remulo cognomen erat, Turnique minorem  
 Germanam nuper thalamo sociatus habebat.  
 595 Is primam ante aciem digna atque indigna relatu  
 Vociferans tumidusque novo praecordia regno  
 Ibat et ingentem sese clamore ferebat:  
 Non pudet obsidione iterum valloque teneri,  
 Bis capti Phryges, et morti praetendere muros?

ad populum facere.] 578. *alis*, v. 12, 319.] 579. Alii *adfixa*. Cic. Tusc. 5, 24 „sidera certis *infixa* sedibus.“] 580. v. 6, 734.] 581. Nomen *Arcens*, quod non est Graecanicum, videtur indicare hominem ex Sicanorum gente, quae ex Hispania in Siciliam venerat; filium Arcentis putabimus se adiunxisse comitem Aeneae a Sicilia solventi.] 582. *P. a. chl.*, v. E. 3, 106. — *ferr. cl. H.*, splendens purpura Hispana, quae erat nigricantis coloris.] 584. *matris*, sine dubio Symaethidis nymphae, cuius mentionem facit Ovid. Met. 13, 750. — *Symaethus* fluvius in orientali parte Siciliae.] 585. *Palici* possit pro Nominativo Pluralis haberi, ut Appositio efficiatur similis ei, quae est Ecl. 7, 16 „Et certamen erat, Corydon cum Thyrside, magnum;“ sed Genetivum esse Singularis, sane raro usurpati, persuadet Ovid. Ep. ex P. 2, 10, 25 „Vidimus ... Hennaecos saltus et olentia stagna Palici.“ Palici, gemini fratres, sunt dei Siculi, Iovis et Thaliae vel Aetnae filii, quibus olim homines immolabantur, deinde sublata ea saecvltia mitionibus sacrificiis placari coepti sunt; v. 7, 764.] 586. *hastis*, v. 1, 313.] 587. *Ipse*, v. 2, 394. nimirum abhorrere videri poterat funda a persona viri principis. — *adducta*, contenta.] 588. Etsi *adversus* stetit, tamen potuit fieri, ut paulum converso capite tempora percuterentur, cf. vs. 633. — *liquef.*, putabant veteres glandem plumbeam magna vi emissam ipso motu calefieri et liquecere.] 589. *arena* in muro? puta hominem ictum de muro cecidisse.]] 590—663. *Ascanius tum primum attingens bellum rem gerit prospere; laudatus propterea ab Apolline, sed ab eodem a certamine revocatus.*] 593. Causam eius cognominis ignoramus, tacent veteres interpretes. — *Cui erat ... et habebat*, v. G. 3, 283. — *minorem*: maior natu erat Iuturna.] 595. *digna* vs. 603—613, *indigna* vs. 598—602. 614 sqq.; omnino quidquid ei in buccam veniebat, v. 12, 811.] 596. *regno*, matrimonio cum regiae stirpis femina inito.] 597. *ingent.*, cf. 12, 441. — *clamore*, v. 2, 323. — *s. fer.*, v. 5, 373.] 599. *Bis c.*, primum

- 600 En, qui nostra sibi bello connubia poscunt!  
 Quis deus Italiam, quae vos dementia adegit?  
 Non hic Atridae, nec fandi fictor Ulixes.  
 Durum ab stirpe genus natos ad flumina primum  
 Deferimus saevoque gelu duramus et undis;
- 605 Venatu invigilant pueri silvasque fatigant;  
 Flectere ludus equos et spicula tendere cornu.  
 At patiens operum parvoque adsueta iuventus  
 Aut rastris terram domat, aut quatit oppida bello.  
 Omne aevum ferro teritur, versaque iuvenum
- 610 Terga fatigamus hasta; nec tarda senectus  
 Debilitat viris animi mutatque vigorem:  
 Canitiem galea premimus; semperque recentis  
 Comportare iuvat praedas et vivere raptō.  
 Vobis picta croco et fulgenti murice vestis;
- 615 Desidiaē cordi; iuvat indulgere choreis;  
 Et tunicae manicas et habent redimicula mitrae.  
 O vere Phrygiae, neque enim Phryges, ite per alta  
 Dindyma, ubi adsuetis biforem dat tibia cantum.  
 Tympana vos buxusque vocat Berecynthia Matris
- 620 Idaeae: sinite arma viris et cedite ferro.  
 Talia iactantem dictis ac dira canentem  
 Non tulit Ascanius; nervoque obversus equino  
 Contendit telum, diversaue brachia ducens  
 Constitit, ante Iovem supplex per vota precatus:
- 625 Iuppiter omnipotens, audacibus adnue cōeptis.  
 Ipse tibi ad tua templa feram sollemnia dona,

ab Hercule. — Alii *Marti praet.* | 600. En, qui nobiscum (Italī) connubio se iungere poscunt, idque, si dīs placet, bello poscunt! Spectant haec ad Laviniam, quam Turno ereptam ibat Aeneas. | 602. *fandi f.*, ἐπὶ κλοπῆς μύθων Hom. Il. 22, 281. | 603 sqq. En imaginem severissimae disciplinae vitaeque priscorum Italorum! et cf. G. 2, 167 sqq. — *genus* qui Casus? — *primum* in liberis, quos suscipimus, hoc primum facimus, ut eos ad flumina deferamus. | 605. *Ven.*, v. E. 5, 29. — *fat.*, v. 8, 94 et cf. Theocr. 13, 66. | 606. *spic. tend.*, proprie tenditur nervus, Hom. Od. 21, 419 „ἔλκεν νευρὴν γλυφίδας τε,” idem distinctius Il. 4, 122 „ἔλκε δ’ ὁμοῦ γλυφίδας τε λαβὼν καὶ νευρὰ βόεια.” | 609 sq. *versa hasta, σωρωτήρι*, ea utebantur pro stimulo, et cf. 7, 748. | 610. v. G. 4, 453. | 612 sq. Iunge semper iuvat. | 615. *Desidiaē*, Pluralis, ut *discordiaē, insaniae* multaque alia. | 616. *manic.*, cf. Cic. in Cat. 2, 10. — *hab. red.*, ut calanticae feminarum, opinor. — *mitrae*, v. 4, 216. | 617. cf. Hom. Il. 2, 235. 7, 96. | 618. τὰ Δινδύμα ὄρη, Dindymus, mons Phrygiae. — *tibiae biforis* (dextrae sinistraeque communem habentium γλωττίδα) e buxo factae et tympanorum multus usus in sacris Cybeles. | 619. *Berec.*, v. 6, 785. | 620. *ced. f.*, discedit a ferro s. bello. | 621. *iact.*, v. 1, 102. — *dira c.*, acerbissima convicia effundentem; *canere* id quod *loqui*, sed ita, ut non vulgaria loquaris, sed magnum aliquid, ut Aeneas 4, 14 „quae bella exhausta *canebat*,” aut invisum, ut h. l. et 11, 399 „capiti *cane* talia demens Dardanio.” — Ceterum v. G. 1, 479. | 623. *div. br. d.*, ἀμφοτέρῃσι διασχόμενος παλάμῃσιν Apoll.

- Et statuam ante aras aurata fronte iuvenum,  
 Candentem, pariterque caput cum matre ferentem,  
 Iam cornu petat et pedibus qui spargat arenam.
- 630 Audiit et caeli Genitor de parte serena  
 Intonuit laevum; sonat una fatifer arcus.  
 Effugit horrendum stridens adducta sagitta,  
 Perque caput Remuli venit et cava tempora ferro  
 Traiicit. I, verbis virtutem inlude superbis!
- 635 Bis capti Phryges haec Rutulis responsa remittunt.  
 Hoc tantum Ascanius; Teucri clamore sequuntur  
 Laetitiaque fremunt animosque ad sidera tollunt.  
 Aethera tum forte plaga crinitus Apollo  
 Desuper Ausonias acies urbemque videbat,
- 640 Nube sedens, atque his victorem adfatur Iulum:  
 Macte nova virtute, puer; sic itur ad astra,  
 Dis genite et geniture deos. Iure omnia bella  
 Gente sub Assaraci fato ventura resident;  
 Nec te Troia capit. Simul haec effatus ab alto
- 645 Aethere se mittit, spirantis dimovet auras,  
 Ascaniumque petit. Formam tum vertitur oris  
 Antiquum in Buten. Hic Dardanio Anchisae  
 Armiger ante fuit fidusque ad limina custos;  
 Tum comitem Ascanio pater addidit. Ibat Apollo
- 650 Omnia longaevo similis, vocemque coloremque  
 Et crinis albos et saeva sonoribus arma,  
 Atque his ardentem dictis adfatur Iulum:  
 Sit satis, Aenide, telis inpune Numanum

Rh. 3, 283. | 626. *Ipse*, ἐγὼ δ' αὖ. | 627. *aur. fr.*, cf. Hom. Odyss. 3, 384. Tib. 4, 1, 15. | 628. *p. c. c. m. f.*, aequalem matri, iam adultum. | 629. v. E. 3, 87. | 631. *laev.*, v. 2, 693. | 632. *adducta*, chordae enim applicata cum hac adducitur, v. vs. 606. | 633. v. vs. 588. | 634. *verbis superbis*, similiter ut 10, 735. Sunt hae, ut ait Cic. Orat. 24 „immutatione literae quasi quaesitae venustates,” tales, qualis orat. Philipp. 3, 9 „ex oratore arator factus,” et 5, 4 „commentarii commenticii.” v. G. 1, 479. | 636. *seq.*, prosequuntur id factum. | 637. *an. ad s. t.*, fiducia eorum augetur in immensum. | 638. Apollini partes collaudandi Iuli dantur, et quia arti sagittandi praeest (cf. vs. 655) et quod gentem Iuliam praecipuo quodam favore amplectitur. — *crinitus*, cf. Tib. 1, 4, 37 sq. | 639. *urb.*, castra Troianorum. | 641. *nova*, v. E. 8, 29. | 642 sq. Spectant haec ad Augustum, ab Iulo originem generis sui repetentem: merito hoc tuae genti dabitur, ut oriundus ex ea Augustus omnia bella finiat; id quod pertinet ad templum Iani ter ab eo clausum inprimisque ad civilia bella composita, Ovid. Ep. ex P. 1, 2, 126 „Clausit et aeterna civica bella sera.” | 643. *Assar.*, v. 1, 284. | 644. *N. te Tr. c.*, tanta es virtute, ut imperium Troiae parum amplum tibi sit; Philippus ad Alexandrum apud Plutarch. I. p. 667 „ὦ παῖ, ζήτει σεαυτῷ βασιλείαν Ἰσθμὶ Μακεδονία γὰρ σε οὐ χωρεῖ.” — *simul effatus*, v. 10, 856. | 647. *Antiqu.*, cf. Ennii Med. vs. 1 „Antiqua herilis fida custos corporis.” — Ceterum v. E. 2, 24. | 648. v. 10, 253. Servius „Aedituus fuit,” ... domusne custos? ... „quod ingenti honore apud maiores fuit.” | 652. *ardent.*, successu incensum ad alia audenda, cf. vs. 661. | 653. Alii *Aeneada*.

- Oppetiisse tuis; primam hanc tibi magnus Apollo  
 655 Concedit laudem, et paribus non invidet armis;  
 Cetera parce, puer, bello. Sic orsus Apollo  
 Mortalis medio aspectus sermone reliquit,  
 Et procul in tenuem ex oculis evanuit auram.  
 Adgnovere deum procures divinaque tela  
 660 Dardanidae, pharetramque fuga sensere sonantem.  
 Ergo avidum pugnae dictis ac numine Phoebi  
 Ascanium prohibent; ipsi in certamina rursus  
 Succedunt, animasque in aperta pericula mittunt.  
 It clamor totis per propugnacula muris;  
 665 Intendunt acris arcus, amentaque torquent.  
 Sternitur omne solum telis; tum scuta cavaeque  
 Dant sonitum flictu galeae; pugna aspera surgit:  
 Quantus ab occasu veniens pluvialibus Haedis  
 Verberat imber humum; quam multa grandine nimbi  
 670 In vada praecipitant, cum Iuppiter horridus austris  
 Torquet aquosam hiemem et caelo cava nubila rumpit.  
 Pandarus et Bitias, Idaeo Alcanore creti,  
 Quos Iovis eduxit luco silvestris Iaera,  
 Abietibus iuvenes patriis et montibus aequos,  
 675 Portam, quae ducis inperio commissa, recludunt,  
 Freti armis, ultroque invitant moenibus hostem.  
 Ipsi intus dextra ac laeva pro turribus adstant,  
 Armati ferro et cristis capita alta corusci:  
 Quales aeriae liquentia flumina circum,  
 680 Sive Padi ripis, Athesim seu propter amoenum,  
 Consurgunt geminae quercus intonsaque caelo  
 Attollunt capita et sublimi vertice nutant.  
 Inrumpunt, aditus Rutuli ut videre patentis.

655. *par. n. i. a.*, non invidet tibi, quod arcu tam bene usus es, quam solet ipse. | 657. *med. serm. i. q.* simul hoc dicens, nec adiiciens plura aut responsum expectans, cf. 3, 277. 388. 663. | 660. *phar. son.*, Hom. II. 1, 46. | 662. *numine*, divina auctoritate. || 664—777. *Dum ab omni parte acriter pugnatur, Pandarus et Bitias fratres freti sua virtute portam castrorum recludunt. Cadit Bitias a Turno confossus; Pandarus dum claudit portam, imprudens Turnum includit in castra cum magno Troianorum damno.* | 664. *tot. per prop. m.*, i. e. per muros, muri enim ipsi sunt propugnacula castrorum. | 665. *amenta t.*, proprie: hastas per amenta t. | 668. *pluv. Haed.*, Ablativus temporis: cum Haedi, duae stellae in signo Aurigae, in caelo conspiciuntur; horum et sub ortum et occasum graves excitari solent tempestates. | 671. *T. aq. h.*, concitat turbines cum pluvia. | 672 sqq. cf. Hom. II. 12, 127 sqq. | 673. *Iovis luco*, sc. qui erat in Ida. — *silv.*, ergo e numero Oreadam. | 674. cf. Hom. II. 5, 560. | 675. *quae* iis erat *comm.* | 676. *ultro*, ipsi offerentes copiam introeundi, invitant. — *moenibus*, v. 8, 178. | 677. *pro turr.*, Donatus „vice turrium, ut iam non homines dextra ac laeva, sed turres adstare viderentur;“ et *πύργων* Argivorum Ulixes Aiaceum appellat apud Hom. Od. 11, 556. | 679 sqq. Collata hac comparatione cum superiore (vs. 674) operae pretium feceris, si diversitatis notas inter utramque intercedentis quaesieris. | 680. *propt.*, v. E. 8, 87. |

- Continuo Quercens et pulcher Aquicolus armis  
 685 Et praeceps animi Marus et Mavortius Haemon  
 Agminibus totis aut versi terga dedere,  
 Aut ipso portae posuere in limine vitam.  
 Tum magis increscunt animis discordibus irae;  
 Et iam collecti Troes glomerantur eodem,  
 690 Et conferre manum et procurrere longius audent.  
 Ductori Turno, diversa in parte furenti  
 Turbantique viros, perfertur nuntius hostem  
 Fervere caede nova et portas praebere patentis.  
 Deserit inceptum atque inmani concitus ira  
 695 Dardaniam ruit ad portam fratresque superbos.  
 Et primum Antiphaten, is enim se primus agebat,  
 Thebana de matre nothum Sarpedonis alti,  
 Coniecto sternit iaculo; volat Itala cornus  
 Aera per tenerum stomachoque infixā sub altum  
 700 Pectus abit; reddit specus atri vulneris undam  
 Spumantem et fixo ferrum in pulmone tepescit.  
 Tum Meropem atque Erymanta manu, tum sternit Aphidnum;  
 Tum Bitian ardentem oculis animisque frementem,  
 Non iaculo; neque enim iaculo vitam ille dedisset;  
 705 Sed magnum stridens contorta phalarica venit,  
 Fulminis acta modo; quam nec duo taurea terga,  
 Nec duplici squama lorica fidelis et auro  
 Sustinuit; conlapsa ruunt inmania membra.  
 Dat tellus gemitum, et clipeum super intonat ingens.  
 710 Talis in Euboico Baiarum litore quondam  
 Saxea pila cadit, magnis quam molibus ante  
 Constructam ponto iaciunt; sic illa ruinam  
 Prona trahit, penitusque vadis inlisa recumbit;  
 Miscent se maria et nigrae attolluntur arenae;  
 715 Tum sonitu Prochyta alta tremit durumque cubile  
 Inarime Iovis inperiis inposta Typhoeo.

685. *praeceps. an.*, v. G. 4, 491. | 686. *sugerunt cum suo quisque agmine.* | 688. *disc.*,  
 hostilibus, Troianorum puta et Rutulorum. | 693. *nova*, novum in ea re hoc fuit,  
 quod ante Troiani nullam eiusmodi caedem fecerant. | 696. v. 6, 337. | 697.  
*Theb.*, intelligenda est Thebe, oppidum Mysiae. | 699. Quomodo stomacho infixā  
 descendere potuit in profundum pectus? quia hasta via declivi, cuspidē ad partem  
 inferiorem inclinata, ad destinatum pervenit. Similiter hasta sub alterum oculum  
 infixā exit, ubi est rumen, Hom. II. 5, 291 sqq. | 702. *manu*, conminus. | 704. ut  
 iaculum auferre vitam dicitur, ita is, cui auferitur, dare vitam iaculo. Ceterum  
 cf. vs. 706 sq. | 705. *Grat.* 342 „Terribilemque manu vibrata phalarica dextra  
 Dat sonitum.“ | 706. *t. terga*, cf. 10, 482 sq., *βότρυς* apud Homer. | 707. duplici  
 ordine squamarum aurearum, v. G. 1, 173. | 709. *clipeum*, Nominat. gen. neutr. |  
 710. *Eub.*, v. 6, 2. — Alii *Qualis*. | 711. Describitur structura ad arcendam  
 vim maris inventa, constans ex magnis lapidibus (*molibus*) pulvere Puteolano  
 ante inter se conglutinatis. | 712. *ponto*, v. E. 2, 30. G. 4, 562. | 715. *Pro-*  
*chyta*, insula promontorio Campaniae Miseno obiecta. | 716. *Inarime*, Pithecusa

- Hic Mars armipotens animum virisque Latinis  
 Addidit et stimulos acris sub pectore vertit,  
 Inmisitque Fugam Teucris atrumque Timorem.  
 720 Undique conveniunt, quoniam data copia pugnae,  
 Bellatorque animo deus incidit.  
 Pandarus, ut fuso germanum corpore cernit,  
 Et quo sit fortuna loco, qui casus agat res,  
 Portam vi magna converso cardine torquet,  
 725 Obnixus latis humeris, multosque suorum  
 Moenibus exclusos duro in certamine linquit;  
 Ast alios secum includit recipitque ruentis,  
 Demens! qui Rutulum in medio non agmine regem  
 Viderit inrumpentem, ultroque incluserit urbi,  
 730 Inmanem veluti pecora inter inertia tigrim.  
 Continuo nova lux oculis effulsit, et arma  
 Horrendum sonuere; tremunt in vertice cristae  
 Sanguineae, clipeoque micantia fulmina mittit.  
 Adgnoscent faciem invisam atque inmania membra  
 735 Turbati subito Aeneadae. Tum Pandarus ingens  
 Emicat, et mortis fraternae fervidus ira  
 Effatur: Non haec dotalis regia Amatae;  
 Nec muris cohibet patriis media Ardea Turnum.  
 Castra inimica vides; nulla hinc exire potestas.  
 740 Olli subridens sedato pectore Turnus:  
 Incipe, si qua animo virtus, et consere dextram;  
 Hic etiam inventum Priamo narrabis Achillen.  
 Dixerat. Ille rudem nodis et cortice crudo  
 Intorquet summis adnexus viribus hastam;  
 745 Exceperae aerae; vulnus Saturnia Iuno  
 Detorsit veniens, portaeque infigitur hasta.  
 At non hoc telum, mea quod vi dextera versat,  
 Effugies; neque enim is teli nec volneris auctor.  
 Sic ait, et sublatum alte consurgit in ensem,  
 750 Et mediam ferro gemina inter tempora frontem  
 Dividit inpubisque inmani vulnere malas.  
 Fit sonus; ingenti concussa est pondere tellus;  
 Conlapsos artus atque arma cruenta cerebro

insula, quae hodie Ischia appellatur.] 718. *vertit*, v. 6, 101.] 719. cf. 12, 335 sq. Hom. II. 4, 439 sq. 13, 299 „τῷ δὲ (Ἀχίλῃ) φόβος, φίλος υἱός, ἅμα κρατερὸς καὶ ἀταρβής, ἔσπετο,” et cf. 9, 2. — *atrum*, cf. 12, 335 et v. G. 1, 129.] 721. Alii *animos*, cf. 1, 579. 5, 558.] 728. *Demens*, νήπιος Hom.] 729. *ultro*, suā ipse operā, incl.] 730. *pec. inert.*, non habentia, quo se defendant. Ceterum cf. vs. 719.] 731. cf. vs. 703. 12, 101 sq. — Alii *offulsit*.] 733. *Sangu.*, cf. vs. 270. — *clipeo*, puta varie huc et illuc moto, et cf. Hom. II. 5, 4 sqq. 22, 134 sq. — *mittit*, v. 6, 734. Alii *mittunt*.] 735. v. vs. 488.] 737. v. 7, 56 et cf. 7, 423 sq. 11, 369.] 742. cf. 2, 547—549.] 746. *Det.*, cf. Hom. II. 8, 311.] 748. *teli auctor*, qui mittit telum.] 749. v. 6, 734. — *cons.*,

- Sternit humi moriens, atque illi partibus aequis  
 755 Huc caput atque illuc humero ex utroque pependit.  
 Diffugiunt versi trepida formidine Troes.  
 Et, si continuo victorem ea cura subisset,  
 Rumpere claustra manu sociosque inmittere portis,  
 Ultimus ille dies bello gentique fuisset.  
 760 Sed furor ardentem caedisque insana cupido  
 Egit in adversos.  
 Principio Phalerim et succiso poplite Gygen  
 Excipit; hinc raptas fugientibus ingerit hastas  
 In tergum; Iuno viris animumque ministrat.  
 765 Addit Halym comitem et confixa Phegea parma;  
 Ignaros deinde in muris Martemque cientis  
 Alcandrumque Haliumque Noemonaque Prytanimque.  
 Lyncea tendentem contra sociosque vocantem  
 Vibranti gladio connixus ab aggere dexter  
 770 Occupat; huic uno deiectum comminus ictu  
 Cum galea longe iacuit caput. Inde ferarum  
 Vastatorem Amycum, quo non felicior alter  
 Unguere tela manu ferrumque armare veneno;  
 Et Clytium Aeoliden, et amicum Crethea Misis,  
 775 Crethea Musarum comitem, cui carmina semper  
 Et citharae cordi, numerosque intendere nervis;  
 Semper equos atque arma virum pugnasse canebat.  
 Tandem ductores audita caede suorum  
 Conveniunt Teucri, Mnestheus acerbique Serestus,  
 780 Palantisque vident socios hostemque receptum.  
 Et Mnestheus: Quo deinde fugam, quo tenditis? inquit.  
 Quos alios muros, quae iam ultra moenia habetis?  
 Unus homo, et vestris, o cives, undique saeptus  
 Aggeribus, tantas strages inpune per urbem  
 785 Ediderit? iuvenum primos tot miserit Orco?  
 Non infelicis patriae veterumque deorum  
 Et magni Aeneae, segnes, miseretque pudetque?  
 Talibus accensi firmanantur et agmine denso  
 Consistunt. Turnus paulatim excedere pugna  
 790 Et fluvium petere ac partem, quae cingitur unda.  
 Acrius hoc Teucri clamore incumbere magno,

erigens se altius, cf. 12, 728 sq. | 763. raptas de corporibus confixorum. | 764. Alii *tergus*. | 767. cf. Hom. II. 5, 678. — *qué*, v. E. 4, 51. | 769. cf. 10, 23 sq. | 771. *Inde* sc. sternit. | 772. *Vastat.*, v. G. 4, 16. | 773. *manu*, v. G. 2, 247. | 775. Hom. Hymn. 32, 20 „*ἄοιδοι Μουσῶων θεράποντες*“ et *δαίμον Ὑπερβορέων Ἀπόλλωνος θεράποντα* apud Pind. | 776. *num. int. n.*, intentis nervis sonos musicos edere. || 778—818. *Tandem Turnus multitudine hostium proturbatus castrisque excedere coactus in fluvium se deicit salvusque ad suos redit.* | 781. *deinde*, ulterius. | 783. *et, is que saeptus cet.*, v. 5, 851. | 786.

- Et glomerare manum: ceu saevum turba leonem  
 Cum telis premit infensis; at territus ille;  
 Asper, acerba tuens, retro redit; et neque terga  
 795 Ira dare aut virtus patitur, nec tendere contra,  
 Ille quidem hoc cupiens, potis est per tela virosque.  
 Haud aliter retro dubius vestigia Turnus  
 Improperata refert, et mens exaestuat ira.  
 Quin etiam bis tum medios invaserat hostis,  
 800 Bis confusa fuga per muros agmina vertit;  
 Sed manus e castris propere coit omnis in unum,  
 Nec contra viris audet Saturnia Iuno  
 Sufficere; aeriam caelo nam Iuppiter Irim  
 Demisit, germanae haud mollia iussa ferentem,  
 805 Ni Turnus cedat Teucrorum moenibus altis.  
 Ergo nec clipeo iuvenis subsistere tantum  
 Nec dextra valet; iniectis sic undique telis  
 Obruitur. Strepit adsiduo cava tempora circum  
 Tinnitu galea et saxis solida aera fatiscunt;  
 810 Discussaeque iubae capiti; nec sufficit umbo  
 Ictibus; ingeminant hastis et Troes et ipse  
 Fulmineus Mnestheus. Tum toto corpore sudor  
 Liquitur et piceum — nec respirare potestas —  
 Flumen agit, fessos quatit aeger anhelitus artus.  
 815 Tum demum praeceps saltu sese omnibus armis  
 In fluvium dedit. Ille suo cum gurgite flavo  
 Accepit venientem ac mollibus extulit undis,  
 Et laetum sociis abluta caede remisit.

vet. deor., Penatium.] 792. *ceu ... cum*, v. 1, 148.] 794. v. G. 3, 149 et 1, 200. — *Iunge territus ille retro redit*; cedit autem quam truculentus! 796. *Ille*, v. G. 2, 435.] 802. *vir. sufficere*, ut 2, 617 sq.] 804. *germ.*, cf. 12, 830.] 806 sq. *nec clipeo*, excipiens tela, *nec dextra*, pugnans gladio, *tantum*, quantum scilicet opus esset, *subsistere*, resistere et statum suum obtinere poterat: *sic*, adeo, obruitur telis. — Ceterum cum vs. 806—818 confer Hom. Il. 16, 102 sqq.] 811. *ing. hast.*, v. 1, 747.] 811. et alii Troes et potissimum Mnestheus, ut G. 4, 14 „aliaeque volucres Et Procne.“ supra vs. 454 „primis tot peremtis, Serranoque Numaque.“ adde, 7, 535. 8, 330. 698. 12, 399. — *ipse*, dux Troianis ab Aenea relictus, cf. vs. 171—173 et v. 2, 394.] 812. *Fulm.*, cf. 6, 843. 12, 654.] 813. *piceum*, quia pulvere ac sanguine respersus est Turnus.] 815. *omnib. armis*, ἀντις τευχέσιν, ut erat armatus; similiter Phaedrus 5, 7, 36 sqq. „Princeps ligato crure nivea fascia, Niveisque tunicis, niveis etiam calceis, Ab universis capite est protrusus foras,“ i. e. ut erat ligatus, indutus.] 816. cf. 8, 72. — *Iunge Ille cum suo gurgite*, cave iungas *Accepit cum s. g.*] 817. *molles* undae sunt fluvii leniter fluentis, cf. 8, 726.



## A E N E I D O S

## LIBER DECIMUS.

(*Altercatio Veneris et Iunonis in concilio deorum. — Laborantibus Troianis succurrit cum auxiliis Aeneas. — Oritur atrox pugna; occiditur Pallas, filius Euandri, a Turno. Aeneas affligit Italos. Turnum Iuno callide subducit pugnae. Lausus, filius Mezentii, atque ipse Mezentius, fortissimi viri, interimuntur ab Aenea.*)

- Panditur interea domus omnipotentis Olympi,  
 Conciliumque vocat divom pater atque hominum rex  
 Sideream in sedem, terras unde arduus omnis  
 Castraque Dardanidum adspectat populosque Latinos.  
 5 Considunt tectis bipatentibus; incipit ipse:  
 Caelicolae magni, quianam sententia vobis  
 Versa retro, tantumque animis certatis iniquis?  
 Abnueram bello Italiam concurrere Teucris.  
 Quae contra vetitum discordia? quis metus aut hos  
 10 Aut hos arma sequi ferrumque lacessere suasit?  
 Adveniet iustum pugnae, ne arcessite, tempus,  
 Cum fera Karthago Romanis arcibus olim  
 Exitium magnum atque Alpes immittet apertas:  
 Tum certare odiis, tum res rapuisse licebit.  
 15 Nunc sinite; et placitum laeti componite foedus.

**Aeneid. L. X.** 1—117. Iuppiter postridie mane diis ad concilium vocatis queritur bellum se nolente concitatum. Veneris et Iunonis mutuas criminationes. Iuppiter, cum coniugem filiamque inter se reconciliari non posse videat, omisso partium studio omnia se fortunae fatisque hoc die permissurum ait. | 1. Nocti clauditur Olympus, arx deorum caelestis, mane aperitur. — interea, post ea, quae superiore die sunt acta, et ante ea, quae iam instant. — omnipot., Aeschyl. Prom. 397 de Iove: „ἡ τῷ νέον θαυοῦντι παγκρατεῖς ἔδρας.“ | 3 sq. cf. Hom. Il. 19, 128 et 8, 51 sq. | 4. Dard., v. 2, 242. | 5. bipat., fores binarum valvarum habentibus, cf. 2, 330. Ovid. Met. 2, 4. | 8. Abnueram, id quod probatur verbis Iunonis 7, 312. Sed non possunt haec cum iis conciliari, quae 1, 261—263 leguntur, ac videtur poeta oblitus esse, quae Iovem loqui ibi fecit. | 9 sq. aut hos aut hos, oblique significantur Iuno et Venus, haec rebus Aeneae, illa Carthagini metuens, cf. 1, 23 et 257. | 13. Alp. i. ap., exercitum immittet per Alpes apertas venientem. | 14. ut res repetere, id quod faciebant Fetiales, Virgilii aetate omnino significat postulare, ut satisfiat populo iniuria aliqua ab exteris affecto, ita res rapere h. l. nihil aliud esse videtur, quam hostilia facere. | 15. sinite, ἔστε, Aesch. Prom. 340 „καὶ νῦν ἔασον μηδὲ σοι μελησάτω.“ Plant. Cas. 3, 2, 14 „Vin' vocem? CL. Sine; nolo, si occupata est.“ — et plac. l. c. f., laeti (libenti animo) ad concordiam con-

- Iuppiter haec paucis; at non Venus aurea contra  
 Pauca refert:  
 O Pater, o hominum rerumque aeterna potestas!  
 Namque aliud quid sit, quod iam inplorare queamus?  
 20 Cernis, ut insultent Rutuli Turnusque feratur  
 Per medios insignis equis tumidusque secundo  
 Marte ruat? Non clausa tegunt iam moenia Teucros:  
 Quin intra portas atque ipsis proelia miscent  
 Aggeribus murorum et inundant sanguine fossae.  
 25 Aeneas ignarus abest. Numquamne levari  
 Obsidione sines? muris iterum imminet hostis  
 Nascentis Troiae, nec non exercitus alter;  
 Atque iterum in Teucros Aetolis surget ab Arpis  
 Tydides. Equidem credo, mea volnera restant  
 30 Et tua progenies mortalia demoror arma!  
 Si sine pace tua atque invito numine Troes  
 Italiam petiere: luant peccata, neque illos  
 Iuveris auxilio; sin tot responsa secuti,  
 Quae Superi Manesque dabant: cur nunc tua quisquam  
 35 Vertere iussa potest? aut cur nova condere fata?  
 Quid repetam exustas Erycino in litore classis?  
 Quid tempestatum regem, ventosque furentis  
 Aeolia excitos? aut actam nubibus Irim?  
 Nunc etiam Manis — haec intemptata manebat  
 40 Sors rerum — movet, et superis inmissa repente  
 Allecto, medias Italum bacchata per urbes.  
 Nil super inperio moveor; speravimus ista,  
 Dum fortuna fuit; vincant, quos vincere mavis.  
 Si nulla est regio, Teucris quam det tua coniunx

sentite; nam *placita* dicuntur, in quae consensimus.] 16. *V. aur.*, cf. Hom. II. 3, 64.] 18. *potest.*, similiter Iuven. 10, 100 „Fidenarum Gabiorumque esse potestas.“ — Ceterum cf. 12, 829.] 24. *Agg. m.*, cf. 9, 769. — Alii *fossas*, cf. 11, 382.] 26. *hostis*, Turnum puta.] 28. cf. 8, 9; metuit hoc Venus, quod tamen factum non est, cf. 11, 225 sqq. — *Aetolis*, quia ipse Diomedes erat Aetolus.] 30. et ego moram facio bello, quippe non desaevituro, priusquam ipsa, filia tua (ut olim ad Troiam, Hom. II. 5, 330—336), mortalium armorum vim sensero.] 34. *Manes*, ut 2, 294 sq. 780 sqq. 5, 729 sqq.] 38. *act. nub. Irim*: cave haec ad vs. 2 libri noni reteras; illud enim, quod subiicitur, *Nunc etiam* rem postremo (ergo post ea, quae memorantur vs. 36—38) factam indicat; at Allecto excitam legimus libro septimo. Seriem rerum si sequi voluisset poeta, sic ordinanda haec erant: *tempestatum regem* 1, 51 sqq., *actam nubibus Irim* 5, 606, *exustas E. in l. naves* 5, 660 sqq. Similiter quae E. 6, 41 sq. proponuntur, sic se deinceps excipiunt: *regna Saturnia, lapides Pyrrhae, furtum Promethei, Caucasias volucres*. Nempe temporum ordo, si non ipsa res exigit, ut servetur, saepe negligitur non solum a poetis, sed etiam ab historicis, Tac. Hist. 1, 50 „Pharsaliam, Philippos, Perusiam, Mutinam.“] 40. *movet*, Inno, quae vs. 34 voc. *quisquam* significatur.] 41. Servius „*Bacchata p. urbes*: perfurit; et bene *bacchata*, quia per simulationem sacrorum Liberi patris matres egerat in furorem.“ cf. 7, 341 sqq.] 42. *inperio* ab Iove promisso 1, 257 sqq.

- 45 Dura, per eversae, genitor, fumantia Troiae  
 Excidia obtestor: liceat dimittere ab armis  
 Incolumem Ascanium, liceat superesse nepotem.  
 Aeneas sane ignotis iactetur in undis,  
 Et, quaecumque viam dederit Fortuna, sequatur:  
 50 Hunc tegere et dirae valeam subducere pugnae.  
 Est Amathus, est celsa Paphus atque alta Cythera,  
 Idaliaeque domus: positis inglorius armis  
 Exigat hic aevum. Magna ditione iubeto  
 Karthago premat Ausoniam; nihil urbibus inde  
 55 Obstat Tyriis. Quid pestem evadere belli  
 Iuvat et Argolicos medium fugisse per ignis,  
 Totque maris vastaeque exhausta pericula terrae,  
 Dum Latium Teucris recidivaque Pergama quaerunt?  
 Non satius cineres patriae insedissem supremos  
 60 Atque solum, quo Troia fuit? Xanthum et Simoenta  
 Redde, oro, miseris, iterumque revolvere casus  
 Da, pater, Iliacos Teucris.

Tum regia Iuno

- Acta furore gravi: Quid me alta silentia cogis  
 Rumpere et obductum verbis volgare dolorem?  
 65 Aenean hominum quisquam divomque subegit  
 Bella sequi, aut hostem regi se inferre Latino?  
 Italiam petiit fatis auctoribus; esto;  
 Cassandrae impulsus furiis: num linqere castra  
 Hortati sumus, aut vitam committere ventis?  
 70 Num puero summam belli, num credere muros?  
 Tyrrhenamque fidem aut gentis agitare quietas?  
 Quis deus in fraudem, quae dura potentia nostri  
 Egit? ubi hic Iuno, demissave nubibus Iris?  
 Indignum est Italos Troiam circumdare flammis  
 75 Nascentem, et patria Turnum consistere terra,  
 Cui Pylumnus avus, cui diva Venilia mater:  
 Quid, face Troianos atra vim ferre Latinis,  
 Arva aliena iugo premere atque avertere praedas?

ad id promissum spectat, quod sequitur, *ista*.] 48. *sane*, nihil repugno, quin  
*cet*.] 51. *Paphus*, v. G. 3, 189.] 54. *premat*, v. 7, 737. — *inde*, ab Ausonia;  
 nihil ab Italia timendum erit Carthagini, si non Troiani imperio Italiae potiti  
 fuerint.] 61. *rev. c.*, v. 1, 9; erat autem metuendum, ne, si restitueretur Ilium,  
 denuo bellum Troianis inferrent Graeci.] 68. *Cass. i. fur.*, cf. 3, 183 sqq. irri-  
 sionem, quae est in his verbis, facile sentis.] 69. *ventis*, dum in Tiberi navigans  
 ad Euandrum proficiscitur.] 71. *Tyrrh. fidem agitare*, sollicitando ad societatem  
 ineundam percellere Tyrrhenos.] 72. *fraudem*, malum.] 76. *avus*, verius  
*abavus*, cf. vs. 619.] 77. *Quid est?* minusne indignum est? — Invidiose autem  
 Troianis exprobrat Iuno, quae fieri solent in bello, etsi non fuerant facta; simi-  
 liter Veneri tribuit vs. 82 sq., quae ab aliis diis acta erant.] 78. *Arva a. i.*  
*pr.*, videtur ad 7, 157 respici ritusque ille significari, quo locum urbi condendae

- Quid, soceros legere et gremiis abducere pactas,  
 80 Pacem orare manu, praefigere puppibus arma?  
 Tu potes Aenean manibus subducere Graium  
 Proque viro nebulam et ventos obtendere inanis,  
 Et potes in totidem classem convertere Nymphas:  
 Nos aliquid Rutulos contra iuvisse nefandum est?  
 85 Aeneas ignarus abest: ignarus et absit;  
 Est Paphus, Idaliumque tibi, sunt alta Cythera;  
 Quid gravidam bellis urbem et corda aspera temptas?  
 Nosne tibi fluxas Phrygiae res vertere fundo  
 Conamur? nos? an miseros qui Troas Achivis  
 90 Obiecit? Quae caussa fuit, consurgere in arma  
 Europamque Asianque et foedera solvere furto?  
 Me duce Dardanius Spartam expugnavit adulter,  
 Aut ego tela dedi, fovive Cupidine bella?  
 Tum decuit metuisse tuis; nunc sera querelis  
 95 Haud iustis adsurgis et inrita iurgia iactas.  
 Talibus orabat Iuno, cunctique fremebant  
 Caelicolae adsensu vario; ceu flamina prima  
 Cum deprensa fremunt silvis et caeca volutant  
 Murmura, venturos nautis prodentia ventos.  
 100 Tum Pater omnipotens, rerum cui prima potestas,  
 Infit; eo dicente deum domus alta silescit,  
 Et tremefacta solo tellus; silet arduus aether;  
 Tum Zephyri posuere; premit placida aequora pontus.  
 Accipite ergo animis atque haec mea figite dicta.  
 105 Quandoquidem Ausonios coniungi foedere Teucris  
 Haud licitum, nec vestra capit discordia finem:  
 Quae cuique est fortuna hodie, quam quisque secat spem,  
 Tros Rutulusve fuat, nullo discrimine habebo,  
 Seu fatis Italum castra obsidione tenentur,

capiebant designabantque.] 79. *soceros*, v. 2, 457. — *pactas* aliis scilicet, puta Laviniam, v. 6, 322.] 80. *Pac. or. m.*, praetentis manu ramis vittatis sollempni more pacem orare, cf. 7, 154. 237. — *praef. p. a.*, v. 1, 119; spectant haec ad iter ad Euandrum cum armatis factum, quae res non pacis erat, sed belli signum.] 81. cf. Hom. II. 5, 315 sqq.] 82 sq. v. vs. 77 et cf. Hom. II. 20, 318 sqq. — *inan.*, v. G. 4, 196.] 87. *gravidam b.*, secundam bellis, bellicosam.] 88. *vert. fundo*, funditus evertere.] 89. *qui*, Paris, sed oblique significatur ipsa Venus.] 91. *furto*, furtivo raptu Helenae.] 92. *Sp. exp.*, amare dictum, tamquam Spartam expugnavit remque magnam gesserit, qui scilicet pudicitiam eripuit mulieri Spartanæ; et sumsit hoc poeta fortasse, ut alia quaedam, a Cicerone, qui orat. pro Coel. c. 20 scribit „adulter expugnavit pudicitiam.“] 93. *fov. Cup. b.*, feci, ut traheretur bellum per Cupidinem, Paride scilicet Helenam reddere nolente.] 95. *surgis ad querelas iactandas*; et v. 1, 102.] 96. *orab.*, v. 7, 446.] 97. *ass. var.*, aliis Iunoni, aliis Veneri assentientibus.] 98. *depr.*, „detenta“ Servius.] 100. *prima*, alii *summa*.] 102. *solo*, penitus.] 103. *pos.*, v. 7, 27.] 107 sq. Quae cuique hodie spes est aut fortuna, non intercedam (nihil curans, Tros sit an Italus), quin ea utatur. — *spem secare*, v. 12, 368 et compara Graecum illud *οὐδὲ ληπίδος τέλει*.] 109. Sive Troianis (vs. 109. 110)

- 110 Sive errore malo Troiae monitisque sinistris.  
Nec Rutulos solvo. Sua cuique exorsa laborem  
Fortunamque ferent. Rex Iuppiter omnibus idem.  
Fata viam invenient. Stygii per flumina fratris,  
Per pice torrentis atraque voragine ripas
- 115 Adnuat et totum nutu tremefecit Olympum.  
Hic finis fandi. Solio tum Iuppiter aureo  
Surgit, caelicolae medium quem ad limina ducunt.  
Interea Rutuli portis circum omnibus instant  
Sternere caede viros et moenia cingere flammis.
- 120 At legio Aeneadum vallis obsessa tenetur,  
Nec spes ulla fugae. Miseri stant turribus altis  
Nequiquam et rara muros cinxere corona:  
Asius Imbrasides Hicetaoniusque Thymoetes  
Assaracique duo et senior cum Castore Thymbris,
- 125 Prima acies; hos germani Sarpedonis ambo,  
Et Clarus et Themon, Lycia comitantur ab alta.  
Fert ingens toto connixus corpore saxum,  
Haud partem exiguum montis, Lyrnesius Acmon,  
Nec Clytio genitore minor, nec fratre Menestheo.
- 130 Hi iaculis, illi certant defendere saxis,  
Molirique ignem, nervoque aptare sagittas.  
Ipse inter medios, Veneris iustissima cura,  
Dardanius caput, ecce, puer detectus honestum,  
Qualis gemma, micat, fulvum quae dividit aurum,
- 135 Aut collo decus aut capiti; vel quale per artem  
Inclusum buxo aut Oricia terebintho  
Lucet ebur; fusos cervix cui lactea crinis  
Accipit et molli subnectit circulus auro.  
Te quoque magnanimae viderunt, Ismare, gentes

adversa sunt fata, sive (vs. 111) Rutulis. — *S. f. It.*, seu fato Italici propitio. | 110. sive quia Troiani oracula male interpretati aut falsis vaticiniis (cf. vs. 68) decepti sunt. | 111. *Nec R. s.*, nec Rutulos libero hac condicione, ut, quidquid fata decreverint, id iis eveniat. — *labor. Fort.*, vel cladem vel victoriam, v. G. 1, 419. | 112. *omn. idem*, aequus omnibus. | 113 sq. v. 6, 324 et 9, 105. | 117. *med. ad lim. d.*, repetitum id ex more senatorum Consulem prosequendum. | 118—162. *Castra oppugnantur a Rutulis, defenduntur a Troianis. Aeneas interea rebus in Etruria ex animi sententia confectis cum valido exercitu sociorum ad suos revehitur.* | 119. *m. c. fl.*, undique inferre ignes. | 120. *Iunge vallis tenetur*, obsessa tenetur intra vallos, cf. vs. 236. | 122. *Nequiquam*, quippe parum spei in suis armis habentes. | 125. *Pr. ac.*: erant illi e principibus fortissimisque. | 126. *alta*, mentuosa | 131. *que*, v. 1, 701. — ignibus missilibus utebantur et in acie (ut ap. Sil. 9, 335. 577) et in vallo (ut Saguntini ap. Liv. 21, 8) constituti. | 133. *hon.*, v. G. 2, 392. | 135. *collo* — *capiti*, monili aut diademati insertum. | 136. cf. Hom. Od. 6, 232. intelliges pocula e buxo aut terebintho facta et ebore distincta. Ceterum v. E. 2, 24. — *Oricus*, oppidum Epiri; gignitur ibi terebinthus nigrum lignum habens. | 138. *molli*, tenui lentoque, cf. vs. 818. | 139. *magn. gentes*, Lydos intelliges, ipsius comites; similiter Lycii memorantur inter socios Aeneae 1, 113; et dictum hoc, ut *μεγάθυμοι Ἀχαιοί*

- 140 Volnera dirigere et calamos armare veneno,  
 Maeonia generose domo, ubi pinguis culta  
 Exercentque viri Pactolusque inrigat auro.  
 Aduit et Mnestheus, quem pulsi pristina Turni  
 Aggere moerorum sublimem gloria tollit,  
 145 Et Capys: hinc nomen Campanae ducitur urbi.  
 Illi inter sese duri certamina belli  
 Contulerant: media Aeneas freta nocte secabat.  
 Namque, ut ab Euandro castris ingressus Etruscis,  
 Regem adit et regi memorat nomenque genusque;  
 150 Quidve petat, quidve ipse ferat; Mezentius arma  
 Quae sibi conciliet, violentaque pectora Turni  
 Edocet; humanis quae sit fiducia rebus,  
 Admonet, inmiscetque preces. Haud fit mora; Tarchon  
 Iungit opes, foedusque ferit; tum libera fati  
 155 Classem conscendit iussis gens Lydia divom,  
 Externo commissa duci. Aeneia puppis  
 Prima tenet, rostro Phrygios subiuncta leones;  
 Imminet Ida super, profugis gratissima Teucris.  
 Hic magnus sedet Aeneas secumque volutat  
 160 Eventus belli varios; Pallasque sinistro  
 Adfixus lateri iam quaerit sidera, opacae  
 Noctis iter, iam quae passus terraeque marique.  
 Pandite nunc Helicon, deae, cantusque movete,  
 Quae manus interea Tuscis comitetur ab oris  
 165 Aenean, armetque rates, pelagoque vehatur.  
 Massicus aerata princeps secat aequora Tigri;

apud Homerum.] 141. *M. g. d.*, oris ex nobili genere in Lydia; et v. 4, 36.] 142. *Pact.* fluvius aurifer Lydiae.] 145. *Camp. u.*, *Κανὴν*, Capuae, Liv. 4, 37.] 147. Ordo rerum (quibus interponuntur vs. 148—214) constituitur vs. 147, 219 sq., 256 sqq.] 148. cf. 8, 603 sqq. — *ingressus est.*] 150. *Quidve* ... *quidve* libri manuscripti omnes cum Servio et Carisio; ex grammatica ratione scriptum oportebat *Quidque* ... *quidque*. Sed videtur poeta ita locutus interrogantis ratione habita; Tarchonti enim ex more quaerenti ex Aenea, quis vocetur, qui sit, quidve petat feratve, memorat ea Aeneas. — „*quid petat*, scilicet auxilium; *quid ferat*, vicissitudinem auxilii.“ Servius. — *Mez.*, cf. 8, 493 sq. 7, 647 sqq.] 152. admonet vicissitudinis rerum humanarum; fieri posse, ut Mezentius exsul in regnum redeat, Tarchon ipse indigeat auxilii.] 154. ut *voti liber* is dicitur, qui solvit votum, sic *liber fati*, qui fecit, quod voluit fatum; cf. 8, 499 sqq.] 156. v. E. 10, 13.] 156—158. *puppis*, ut saepe, omnino navis. — *Pr. t.*, cf. 5, 338. — Ida est parasemon s. insigne, unde navis appellabatur, v. 5, 116; hoc cum rostro in prora est, leones autem ita rostro subiuncti erant, ut ipsum rostrum in leonum faciem exiret; Servius ad vs. 166 „*Aerata tigri*, cuius rostrum erat in similitudinem tigridis.“ Donatus „habens in rostro leones iunctos;“ et Servius h. l. „Vult pro iugo rostrum navis fuisse,“ ubi *iugum* significat par leonum iunctarum. Ceterum Ida et leones videntur ostendere tutelam eius navis fuisse Cybelon, cf. vs. 252 sq.] 161. quaerit ex Aenea nomina siderum, iter per opacam noctem monstrantium.]] 163—214. *Recensentur auxilia cum Aenea venientia, triginta navibus vecta*; et v. 7, 641.] 166. *aer.*, aeneum rostrum atque insigne

- Sub quo mille manus iuvenum, qui moenia Clusi,  
 Quique urbem liquere Cosas; quis tela sagittae  
 Gorytique leves humeris et letifer arcus.
- 170 Una torvus Abas; huic totum insignibus armis  
 Agmen et aurato fulgebat Apolline puppis.  
 Sescentos illi dederat Populonia mater  
 Expertos belli iuvenes; ast Ilva trecentos  
 Insula, inexhaustis Chalybum generosa metallis.
- 175 Tertius, ille hominum divomque interpretas Asilas,  
 Cui pecudum fibrae, caeli cui sidera parent  
 Et linguae volucrum et praesagi fulminis ignes,  
 Mille rapit densos acie atque horrentibus hastis.  
 Hos parere iubent Alpheae ab origine Pisae,
- 180 Urbs Etrusca solo. Sequitur pulcherrimus Astyr,  
 Astyr equo fidens et versicoloribus armis.  
 Ter centum adiiciunt, — mens omnibus una sequendi —  
 Qui Caerete domo, qui sunt Minionis in arvis,  
 Et Pyrgi veteres, intempestaeque Graviscae.
- 185 Non ego te, Ligurum ductor fortissime bello,  
 Transierim, Cinyre, et paucis comitate Cupavo,  
 Cuius olorinae surgunt de vertice pennae —  
 Crimen amor vestrum — formaeque insigne paternae.  
 Namque ferunt luctu Cycnum Phaethontis amati,
- 190 Populeas inter frondes umbramque sororum  
 Dum canit et maestum Musa solatur amorem,  
 Canentem molli pluma duxisse senectam,

tigridis habente; aliter Servius modo laud. | 171. Apollo tutela navis erat. | 172. *mater*, v. 7, 762. | 174. *Chalyb.*, v. G. 1, 56. | 175. *h. d. int.*, tamquam medius et internuntius inter deos atque homines. | 176. *parent*, apparent, videlicet ita, ut voluntas deorum ex istis appareat Asilae. | 178. *dens. ac.*, milites gravis armaturae, qui densis ordinibus pugnant, „πολέμου στίφος παρέχοντες“ Aesch. Pers. 20. | 179. *Pisae* originem habent a Pisa, Elidis urbe; *Alphæus* fluvius Elidis. | 180. *E. solo*, situ Etrusca. — *Sequitur*, post tertium (Asilam) quarto loco Astyr agmen navium ducit. | 181. *vers. a.*, *τεύχεα ποικίλα χαλκῷ* Hom. | 182. *mens ... seq.*, qui omnes eodem studio ardent ad bellum eundi. | 183. *C. d.*, v. 4, 36. Similiter Herod. 5, 92, 7 „*Ἡετῶν, δῆμου μὲν ἐκ Πέτρης ἐόν*“ et 9, 73 „*Σωφάνης ἐκ δῆμου Δεκελεῖθεν*.“ Orell. Inscr. lat. 3708 „Flaminius domo Catina.“ — *Caere* sive Agylla. At Lausus (7, 652) „ducit Agyllina ... ex urbe ... mille viros“ quasi Caere et Turno et Aeneae praestet auxilium. Nempe isti Lausum fugientem secuti sunt, hi vero communi odio et consilio totius civitatis in Mezentium arma commoverunt. Haec fere Servius. | 184. *intemp.*, „pestilentes“; nam, ut ait Cato, ideo Graviscae dictae sunt, quod gravem aerem sustinent.“ Servius. | 187 sq. Cupavo cristam pennarum olorinarum in galea habebat idque insigne gerebat ob patrem Cycnum in olorem mutatum. — *Crimen amor vestrum*: amor, quo Phaethontem amicam suum Cycnus amplexus fuerat, opprobrio vobis est, o pennae olorinae; is enim amor causa fuit Cycni in olorem conversi; Ovid. Met. 2, 367 sqq. | 190. *sorum*, non suarum, sed Phaethontis, Heliadum in populos mutatarum. | 192. quia senes albo sunt sive cano capillo, is ipse color vocabulo senectae denotatur. |

- Linquentem terras et sidera voce sequentem.  
 Filius, aequalis comitatus classe catervas,  
 195 Ingentem remis Centaurum promovet: ille  
 Instat aquae saxumque undis inmane minatur  
 Arduus, et longa sulcat maria alta carina.  
 Ille etiam patriis agmen ciet Ocnus ab oris,  
 Fatidicae Mantus et Tusci filius amnis,  
 200 Qui muros matrisque dedit tibi, Mantua, nomen,  
 Mantua, dives avis; sed non genus omnibus unum:  
 Gens illi triplex, populi sub gente quaterni;  
 Ipsa caput populis; Tusco de sanguine vires.  
 Hinc quoque quingentos in se Mezentius armat,  
 205 Quos patre Benaco velatus arundine glauca  
 Mincius infesta ducebat in aequora pinu.  
 It gravis Aulestes, centenaque arbore fluctum  
 Verberat adsurgens; spumant vada marmore verso.  
 Hunc vehit inmanis Triton et caerulea concha  
 210 Exterrens freta; cui laterum tenuis hispida nanti  
 Frons hominem praefert, in pristim desinit alvus;  
 Spumea semifero sub pectore murmurat unda.  
 Tot lecti proceres ter denis navibus ibant  
 Subsidio Troiae et campos salis aere secabant.  
 215 Iamque dies caelo concesserat, almaque curru  
 Noctivago Phoebe medium pulsabat Olympum:  
 Aeneas — neque enim membris dat cura quietem —

193. v. 9, 488. 2, 323. | 194. Cupavo cum suis comitabatur catervas, quibus Cinyrus praeerat, aequales, i. e. catervas popularium suorum. Aliter Donatus „aequales aut aetate aut armorum culta.“ | 196. Centaurus — id erat insigne navis — ita erat sculptus, ut saxum utraque manu alte sublatum projecturus in fluctus videretur, quasi compressurus impetum turbati maris. | 198—203. *Ille*, v. G. 4, 457. — Manto et Tiberis parentes fuerunt Oeni. Is Mantuam condidit. Mantuanorum triplex erat gens, Graeci, ut videtur, Umbrique, et, quod certum est, Etrusci; ex Etruscis quidem, id quod testatur vs. 203, plurimum roboris traxerat Mantua. Harum gentium quaeque quattuor populos sive civitates comprehendebat; ipsa Mantua duodecima ex numero harum civitatum praeerat ceteris. | 201. *avis*, claris scilicet et potentibus, cf. 7, 56. — *omnibus*, non avis, sed omnino Mantuanis atque iis, quorum caput erat Mantua. | 205. Mincius, i. e. navis, cui erat insigne Mincius fluvius, ortus e lacu Benaco (*Lago di Garda*) tamquam parente; nam licet ex Alpibus profluat, tamen, postquam lacum Benacum transmisit, novus fluvius isque Benaco prognatus haberi potest. | 207. *gravis*, ingens corpore, v. 5, 437. Donatus et quidam apud Servium hoc epitheton, quod proprie pertinet ad navis ponderosam amplitudinem, ad ducem eius navis translatum volunt. | 209. *concha*, qua utitur pro bucina. | 210 sq. *frons praefert* (monstrat) *laterum tenuis hom.*, frons et quae ei subiecta est pars corporis usque ad latera. | 215—275. *Noctu occurrit Aeneae chorus Nympharum, in quas naves etus conversae erant. Ex his una certiorum eum reddit de periculo suorum. Accepit, quod ea discedens addidit, augurio Aeneas mane socios ad pugnam se parare iubet. — Alacritas obsessorum Troianorum conspecta classe, admiratio Rutulorum rei ignarorum.* | 215. Est haec eadem nox, quam poeta



- Ipse sedens clavumque regit velisque ministrat.  
 Atque illi medio in spatio chorus, ecce, suarum  
 220 Occurrit comitum: Nymphae, quas alma Cybebe  
 Numen habere maris Nymphasque e navibus esse  
 Iusserat, innabant pariter fluctusque secabant,  
 Quot prius aeratae steterant ad litora prorae.  
 Adgnosunt longe regem lustrantque choreis.  
 225 Quarum quae fandi doctissima Cymodocea,  
 Pone sequens dextra puppim tenet, ipsaque dorso  
 Eminent ac laeva tacitis subremigat undis.  
 Tum sic ignarum adloquitur: Vigilasne, deum gens,  
 Aenea? Vigila et velis inmitte rudentis.  
 230 Nos sumus, Idaeae sacro de vertice pinus,  
 Nunc pelagi Nymphae, classis tua. Perfidus ut nos  
 Praecipitis ferro Rutulus flammaque premebat,  
 Rupimus invitae tua vincula, teque per aequor  
 Quaerimus. Hanc genetrix faciem miserata refecit,  
 235 Et dedit esse deas aevumque agitare sub undis.  
 At puer Ascanius muro fossisque tenetur  
 Tela inter media atque horrentis Marte Latinos.  
 Iam loca iussa tenet forti permixtus Etrusco  
 Arcas eques; medias illis opponere turmas,  
 240 Ne castris iungant, certa est sententia Turno.  
 Surge age, et Aurora socios veniente vocari  
 Primus in arma iube, et clipeum cape, quem dedit ipse  
 Invictum Ignipotens atque oras ambiit auro.  
 Crastina lux, mea si non inrita dicta putaris,  
 245 Ingentis Rutulae spectabit caedis acervos.  
 Dixerat; et dextra discedens inpulit altam,  
 Haud ignara modi, puppim: fugit illa per undas  
 Ocior et iaculo et ventos aequante sagitta.  
 Inde aliae celerant cursus. Stupet inscius ipse

attigit vs. 147 et 162. | 218. *vel. min.*, v. 6, 302. | 219. *Atque*, v. E. 7, 7. | 220. *comes* de animantibus dicitur; hic comites appellantur, quae ante fuerant naves, quia desierant inanimatae esse. | 221. *e nav.*, i. e. quae ante naves fuerant; Manil. 4, 46 „*ex* exsule consul.“ | 222. *prorae*, cur non puppes? fortasse, quia eae naves, confecto Aeneae itinere, non rursus exiturae erant; v. vs. 268. | 226. *ipsa*, v. G. 2, 297. | 228. *deum g.*, *διογενές*. | 229. *vel. inm.* r., v. 8, 708. | 231. *Perfidus*, cf. 7, 595 sq. | 232. *Praecipites*, puta in litore stantes acclivi et ad praecipitandum facili. | 233. *tua*, quibus tu nos religasti, cf. 7, 106. | 234. *ref.*, v. G. 2, 29. | 237. *horr. M.*, v. G. 1, 295 et supra vs. 178. | 238. Dum Aeneas auxilia peditum Etruscorum adducit, Patas, Euandri filius, cum equitibus Arcadibus Etruscisque terrestri itinere ad castra Troianorum contenderat. — Alii *tenent*. | 239. *medias*, inter loca illa et castra. | 240. *iungant*, v. G. 1, 163. | 242. *Primus*, sic, ut nihil sit, quod prius agas. — *clipeum cape*, cf. vs. 261 sqq. | 243. v. G. 2, 283. | 247. *H. i. m.*, i. e. iusto quodam, non nimio, libramento. | 249. *aliae* Nymphae, alia quidem aliam navem incitante. |

- 250 Tros Anchisiades; animos tamen omine tollit.  
 Tum breviter supera adspectans convexa precatur:  
 Alma parens Idaea deum, cui Dindyma cordi  
 Turrigeraeque urbes biuigique ad frena leones,  
 Tu mihi nunc pugnae princeps, tu rite propinques  
 255 Augurium, Phrygibusque adsis pede, diva, secundo.  
 Tantum effatus. Et interea revoluta ruebat  
 Matura iam luce dies, noctemque fugarat:  
 Principio sociis edicit, signa sequantur,  
 Atque animos aptent armis, pugnaeque parent se.  
 260 Iamque in conspectu Teucros habet et sua castra,  
 Stans celsa in puppi: clipeum cum deinde sinistra  
 Extulit ardentem. Clamorem ad sidera tollunt  
 Dardanidae e muris; spes addita suscitatur iras;  
 Tela manu iaciunt; quales sub nubibus atris  
 265 Strymoniae dant signa grues atque aethera tranant  
 Cum sonitu fugiuntque Notos clamore secundo.  
 At Rutulo regi ducibusque ea mira videri  
 Ausoniis, donec versas ad litora puppis  
 Respiciunt, totumque adlabi classibus aequor.  
 270 Ardet apex capiti, cristisque a vertice flamma  
 Funditur, et vastos umbo vomit aureus ignis:  
 Non secus, ac liquida si quando nocte cometae  
 Sanguinei lugubre rubent, aut Sirius ardor,  
 Ille sitim morbosque ferens mortalibus aegris,  
 275 Nascitur et laevo contristat lumine caelum.

250. omine ex subita celeritate navium capto. | 252. *Dind.*, v. 9, 618. | 253. *ad fr. l.*, qui frenentur currumque Cybelae vehant; similiter *servi ad lecticam* et 9, 648 *ad limina custos*. | 254. *p. pr.*, prima impellis me ad pugnam. — *propinques*, matures eventum. — *rite*, „καὶ τὰδ' ὁρθῶς ἐμπέδα κατουρῶει“ Soph. Trach. 823 de eventu vaticinii. | 255. cf. 8, 302 et G. 1, 11. | 256. *Et*, v. 2, 801. Praeterea v. vs. 147. | 258. *s. sq.*, exsequantur ea, quae per signa imperentur. | 259. *an. apt. a.*, animos adiciant intentosque habeant armis. | 264—266. Comparatur Troianorum alacritas cum alacritate gruum verno tempore ad notas circa Strymonem sedes revertentium. — *signa* laetitiae scilicet atque alacritatis. — *clam. sec.*, v. 8, 90 et cf. Hom. Il. 3, 3 sqq. | 268. *puppis*. Qui in portum intrabant, plerumque remis inhibebant navem, i. e. convertabant navem et, dum mutata sessione (μετακαθίσαντες) remiges puppim, non, ut ante, proram spectant, convertebant etiam remigationem, id quod Graeci dicunt *πρὸς μὲν πρὸς σάσαι*, i. e. versus puppim remigare, quo fiebat, ut puppis adverteretur litori, retinaculo illa quidem deliganda, prora obverteretur pelago ancoraque stabiliretur; cf. 3, 277. 6, 3—5. Ea res habebat id commodi, ut et vectores expeditiore uterentur egressu, et, cum rursus navigandum esset, non opus esset convertenda nave. | 269. mare ipsum, quam longe prospectus patet, navibus tectum, videtur adfluere ad litus cum classibus. | 270. *apex*, conus, cui crista inserta. — *capiti* Aeneae. — Alii *capitis* et *ac vertice*. | 274. Ille ortu suo fert sitim morbosque, aestum febresque; et cf. Hom. Il. 22, 26—31. | 275. *contristare* caelum ille dicitur, quod, qui eum vident in caelo fulgentem et

- Haud tamen audaci Turno fiducia cessit  
 Litora praecipere et venientis pellere terra.  
 [Ultero animos tollit dictis, atque increpat ultro:]  
 Quod votis optastis, adest, perfringere dextra.
- 280 In manibus Mars ipse, viri. Nunc coniugis esto  
 Quisque suae tectique memor; nunc magna referto  
 Facta, patrum laudes. Ultero occurramus ad undam,  
 Dum trepidi, egressique labant vestigia prima.  
 Audentis Fortuna iuvat.
- 285 Haec ait, et secum versat, quos ducere contra,  
 Vel quibus obsessos possit concredere muros.  
 Interea Aeneas socios de puppibus altis  
 Pontibus exponit. Multi servare recursus  
 Languentis pelagi et brevibus se credere saltu;
- 290 Per remos alii. Speculatus litora Tarchon,  
 Qua vada non spirant nec fracta remurmurat unda,  
 Sed mare inoffensum crescenti adlabitur aestu,  
 Advertit subito proras, sociosque precatur:  
 Nunc, o lecta manus, validis incumbite remis:
- 295 Tollite, ferte rates; inimicam findite rostris  
 Hanc terram, sulcumque sibi premat ipsa carina.  
 Frangere nec tali puppim statione recuso,  
 Arrepta tellure semel. Quae talia postquam

infaustum aliquid minantem, sollicitudine anguntur s. contristantur.]] 276—361. *Turnus, dum Aeneas copias suas exponit, una parte exercitus ad obsidenda castra relicta, cum altera conatur egredientes hostes litore prohibere. Aeneas primus invadit Rutulos. Diu accipiti Marte res geritur.*] 279. v. 3, 265. — Antea castra oppugnant, iam ... id quod optarant ... potestas facta est *perfringendi* dextra, i. e. comminus perrumpendi aciem hostilem; et facilius est in aequo campo victoria.] 280. iam iustae ac verae pugnae copia vobis datur; hoc est illud *in manibus Mars ipse*. — Alii *viris*. — Ceterum cf. Hom. II. 15, 662 sqq.] 281. *referto*, renovato imitando.] 282. *ultro*, antequam ipsi nos aggrediantur.] 283. *labant v.*, v. E. 3, 106.] 287 sqq. Ubi vadosa sunt litora, eo sub accessum maris appellere naves solent nautae, quemadmodum hoc loco, non sub recessum. Sed etiam accessus tempore fiunt quidam recursus maris; ita enim aestuat mare, ut alternis vicibus fluctus procurrat adversus litus et recurrat; ac sub accessum quidem alter fluctus semper maior est priore, sub recessum alter priore semper minor. Iam Aeneas suos pontibus, ἀποβάθραις, i. e. scalis quibusdam ad naves appositis navesque cum litore coniungentibus, eo loco exposuisse putandus est, ubi paulo altius esset litus, cf. vs. 653 sq., nec inundaretur mari. Multi eius morae impatientes, cum fluctus in mare relaberetur (vs. 288) languesceretque, desiliunt in breviam et vada, ex quibus ante redeuntem proximum fluctum evadant in terram; alii remis nitentes seque libantes perveniunt in siccum. Tarchon denique depressiorem speculatus magisque vadosam partem litoris, ubi aestus non invenit, quo offendatur frangaturque, eo naves remis propelli iubet, ut sulco in ipsa arena facto sedeant, quo fit, ut iam expeditior sit egressus.] 288. *serv.*, v. G. 1, 335.] 291. *spirant*, v. G. 1, 827. — *remurm.*, repellitur cum murmure.] 292. *cresc.*, ergo longius serpenti latiusque se per litus explicanti, cf. vs. 301 sq.] 295. *Tollite*, quo fortius remigatur, eo altius surgit prora. — *ferre*, celeriter propellite.] 298. *Arr.*, v. 3, 477.]

- Effatus Tarchon, socii consurgere tonsis  
 300 Spumantisque rates arvis inferre Latinis,  
 Donec rostra tenent siccum et sedere carinae  
 Omnes innocuae. Sed non puppis tua, Tarchon.  
 Namque inflicta vadis dorso dum pendet iniquo,  
 Anceps sustentata diu, fluctusque fatigat,  
 305 Solvitur, atque viros mediis exponit in undis;  
 Fragmina remorum quos et fluitantia transtra  
 Impediunt, retrahitque pedem simul unda relabens.  
 Nec Turnum segnis retinet mora; sed rapit acer  
 Totam aciem in Teucros et contra in litore sistit.  
 310 Signa canunt. Primus turmas invasit agrestis  
 Aeneas, omen pugnae, stravitque Latinos,  
 Occiso Therone, virum qui maxumus ultro  
 Aenean petit. Huic gladio perque aerea suta,  
 Per tunicam squalentem auro, latus haurit apertum.  
 315 Inde Lichan ferit, exsectum iam matre perempta,  
 Et tibi, Phoebe, sacrum, casus evadere ferri  
 Quod licuit parvo. Nec longe, Cissea durum  
 Inmanemque Gyan, sternentis agmina clava,  
 Deiecit Leto; nihil illos Herculis arma,  
 320 Nec validae iuvare manus genitorque Melampus,  
 Alcidae comes usque, gravis dum terra labores.

301. *sedere* (sedent) Perfect. verbi *sidere*, v. 3, 565. | 303. *dorso*: Servius „dorsum est durior arena, quae remeantibus fluctibus plerumque densatur et in modum saxi indurescit, quod a nautis *pulvinus* vocatur.“ | 304 *Anceps*, dum nec stat nec cadit, nutans. — *fl. fat.*, fluctibus se omni vi oppugnandam praebet, ut labore paene fatigari fluctus videantur. | 307. fluctus reciprocatus retrahit eiectos nec ad litus accedere patitur. | 309. Bipartitum fuisse exercitum cum vs. 285 sq. ostendit, tum multo post demum facta (vs. 604 sq.) eruptio obsessorum probat; quare *totam* ita intelliges, ut contra morem nullam partem eorum, quos ipse ducebat Turnus, in subsidiis ab eo collocatam esse existimes. | 310. *agrest.*, Latinos puta, qui per agros dispersi habitabant, cf. 7, 573. 8, 8. 11, 367. | 311. *omen pugnae* ex felici successu; tum ipsi Latini contra omina pugnabant 7, 583 sq. Liv. 22, 29 „principium simul omenque belli.“ | 312. *ultro*, prior et non laecessitus. | 313 sq. *perque* ... *Per*, v. E. 4, 6. — Gell. N. A. 2, 6 „*tunicam squalentem auro*. Id significat copiam densitatemque auri in squamarum speciem intexti. *Squalere* enim dictum est a squamarum crebritate asperitateque, quae in serpentum pisciumque coriis visuntur.“ Itaque G. 4, 13 *picti squalentia terga lucerti*, qui multas in tergo habent maculas tamquam squamas; G. 4 91. *maculis auro squalentibus ardens* poeta ipse interpretatur paulo post (vs. 93) *rutilis clarus squamis*. Hinc intelliges, quid sit *lorica auro squalens* A. 12, 87, i. e. rigens multis aureis squamis, quo ducit etiam 11, 488 „*rutilum thoraca indutus aenis* Horrebat squamis.“ — *haur.*, v. 2, 600 et G. 3, 105. — *apertum*, scilicet viâ ad latus vi gladii patefactâ. | 316. Servius „Omnes, qui secto matris ventre procreantur, ideo sunt Apollini consecrati, quia deus est medicinae, per quam lucem sortiuntur.“ | 317. *Nec longe* sc. inde (est), i. e. ab eo loco, quo Lichas occisus est; similis structura verborum G. 2, 80 „*Nec longum tempus* et ... exiit arbos.“ | 319. *Leto*, v. 8, 566. | 320. Is Melampus, cum Hercule in haec loca secutus esset, cf. 8, 201 sqq. et 10, 779 sq., ibi

- Praebuit. Ecce Pharo, voces dum iactat inertis,  
 Intorquens iaculum clamanti sistit in ore.  
 Tu quoque, flaventem prima lanugine malas  
 325 Dum sequeris Clytium infelix, nova gaudia, Cydon,  
 Dardania stratus dextra, securus amorum,  
 Qui iuvenum tibi semper erant, miserande iaceres,  
 Ni fratrum stipata cohors foret obvia, Phorci  
 Progenies, septem numero, septenaque tela  
 330 Coniiciunt; partim galea clipeoque resultant  
 Inrita, deflexit partim stringentia corpus  
 Alma Venus. Fidum Aeneas adfatur Achaten:  
 Suggere tela mihi; non ullum dextera frustra  
 Torserit in Rutulos, steterunt quae in corpore Graium  
 335 Iliacis campis. Tum magnam corripit hastam,  
 Et iacit; illa volans clipei transverberat aera  
 Maeonis, et thoraca simul cum pectore rumpit.  
 Huic frater subit Alcanor, fratremque ruentem  
 Sustentat dextra: traiecto missa lacerto  
 340 Protinus hasta fugit servatque cruenta tenorem,  
 Dexteraque ex humero nervis moribunda pependit.  
 Tum Numitor iaculo fratris de corpore raptò  
 Aenean petiit; sed non et figere contra  
 Est licitum, magnique femur perstrinxit Achatae.  
 345 Hic Curibus, fidens primaevo corpore, Clausus  
 Advenit et rigida Dryopem ferit eminus hasta  
 Sub mentum, graviter pressa, pariterque loquentis  
 Vocem animamque rapit traiecto gutture; at ille  
 Fronte ferit terram et crassum vomit ore cruorem.  
 350 Tris quoque Threicios Boreae de gente suprema,  
 Et tris, quos Idas pater et patria Ismara mittit,  
 Per varios sternit casus. Accurrit Halaesus  
 Auruncaequae manus; subit et Neptunia proles,  
 Insignis Messapus equis. Expellere tendunt  
 355 Nunc hi, nunc illi; certatur limine in ipso  
 Ausoniae. Magno discordes aethere venti  
 Proelia ceu tollunt animis et viribus aequis;  
 Non ipsi inter se, non nubila, non mare cedit;  
 Anceps pugna diu; stant obnixa omnia contra:

restitisse et in Latio consedissee putandus est. | 322. *inertis*, quibus nihil proficitar; cf. 9, 634, 11, 380 sq. | 324. *flav. malas*, v. E. 3, 106. | 325. *gaudia*, cf. E. 2, 2. | 326. *sec. am.*, nihil amplius curans amores iuvenum. | 327. v. 9, 435. | 330. *Coni.*, v. 9, 489. | 334. Futurum exactum significat certam de eventa persuasionem. — *corpore*, ut *animo* 9, 721, *humero* 5, 558, pro *humeris* cet. et v. G. 4, 227. | 339 sqq. altera hasta transfigit lacertum Alcanoris. | 345. *Curibus Clausus*, v. 4, 36 et cf. 7, 706 sq. | 347. *pressa*, impressa. | 350. *B. d. g. s.*, quibus Boreas ultimus auctor generis, cf. 7, 49. | 351. v. E. 6, 80. | 353. cf. 7, 723 sqq. et 691. | 358. Alii *cedunt*. | 359. *stant obn.* o. c. i. e.

- 360 Haud aliter Troianae acies aciesque Latinae  
Concurrunt; haeret pede pes densusque viro vir.  
At parte ex alia, qua saxa rotantia late  
Impulerat torrens arbustaque diruta ripis,  
Arcadas, insuefos acies inferre pedestris,  
365 Ut vidit Pallas Latio dare terga sequaci, —  
Aspera quis natura loci dimittere quando  
Suasit equos, — unum quod rebus restat egenis,  
Nunc prece, nunc dictis virtutem accendit amaris:  
Quo fugitis, socii? per vos et fortia facta,  
370 Per ducis Euandri nomen devictaque bella,  
Spemque meam, patriae quae nunc subit aemula laudi,  
Fidite ne pedibus. Ferro rumpenda per hostis  
Est via. Qua globus ille virum densissimus urguet,  
Hac vos et Pallanta ducem patria alta reposcit.  
375 Numina nulla premunt; mortali urguemur ab hoste  
Mortales; totidem nobis animaeque manusque.  
Ecce, maris magna claudit nos obice pontus;  
Deest iam terra fugae: pelagus Troiamne petemus?  
Haec ait et medius densos prorumpit in hostis.  
380 Obvius huic primum, fatis adductus iniquis,  
Fit Lagus; hunc, magno vellit dum pondere saxum,  
Intorto figit telo, discrimina costis  
Per medium qua spina dabat; hastamque receptat

omnia constanter obnituntur nec quidquam cedit; iunge *contra obnixæ*, ut *contra* sit adverbium ex abundantia quadam poetica adiectum. Alii *obnixi*.| 360. *Troi. ac.*, v. 8, 547. | 361. cf. Hom. II. 13, 130 sq. — *haeret pede p.* nove dictum pro *haeret pedi p.* vs. 845 „corpore inhaeret.“ || 362—438. *Arcades ab hostibus pulsi Pallantis monitu ac fortitudine ad redintegrandum proelium accenduntur, auxiliante parte Troianorum. Mulli ab utraque parte cadunt; in his Halaeus.* | 362 sqq. Alio loco (cf. vs. 238 sq.), ubi torrens nescio quis in Tiberim se effundebat, acies equitum Arcadum erat instructa; hos dimissis propter iniquitatem locorum equis pedestri certamine contendere ausos pellunt Rutuli. | 362. *rotantia saxa*, v. G. 1, 163. | 365. *sequax* non qui sequitur, sed qui non desistit sequi. | 366. *quando*, aliquando, non in perpetuum, sed dum conficiantur cum natura loci. | 367. *egenis*, eo adactis, ut iam inopia esset consilii. | 369. Ordo est: „oro vos et per fortia facta (*vestra* scilicet) et per nomen Euandri.“ Quod assumendum est *oro*, latet in illo *ne fide*: cf. vs. 597 sq. Solent autem et Graeci et Romani pronomem eum indicans, quem obtestamur (*vos* h. l.), medium collocare inter eam praepositionem (*per*), qua obtestamur, atque eam rem, ex illa praepositione pendente, per quam obtestamur. Eurip. Med. 325 „Μὴ πρὸς σὲ γούνων“, i. e. *λίσσομαι σὲ πρὸς γούνων, μὴ ἐξελάσῃς με*. Terent. Andr. 3, 3, 6 „Per te deos oro.“ — De omisso altero et v. vs. 314. | 371. *subit*, quia, qui aemulatur, succedit in laudem eius, quem aemulatur. | 377. *pontus*, i. e. profunditas illa, qua facile mergimur, claudit nos *maris*, in quo propter naturam eius sisti nequit, tamquam obice, Hom. II. 21, 58 sq. „οὐδέ μιν ἔσχεν πόντος ἄλός πολίης.“ Aesch. Pers. 106 „θαλάσσης πόντιον ἄλσος.“ | 378. *Deest*, v. E. 7, 7. — aut pelagus petendum, aut nova Troia; hanc quidem debebant petere, ut se coniungerent cum Troianis. | 383. *dabát*, v. E. 1, 39. — *receptat*,

- Ossibus haerentem. Quem non super occupat Hisbo,  
 385 Ille quidem hoc sperans; nam Pallas ante ruentem,  
 Dum furit, incautum crudeli morte sodalis,  
 Excipit atque ensem tumido in pulmone recondit.  
 Hinc Sthenelum petit et Rhoeti de gente vetusta  
 Anchemolum, thalamos ausum incestare novercae.  
 390 Vos etiam gemini Rutulis cecidistis in arvis,  
 Daucia, Laride Thymerque, simillima proles,  
 Indiscreta suis, gratusque parentibus error;  
 At nunc dura dedit vobis discrimina Pallas:  
 Nam tibi, Thymbre, caput Euandrius abstulit ensis;  
 395 Te decisa suum, Laride, dextera quaerit,  
 Semianimesque micant digiti ferrumque retractant.  
 Arcadas, accensos monitu et praeclara tuentis  
 Facta viri, mixtus dolor et pudor armat in hostis.  
 Tum Pallas biugis fugientem Rhoetea praeter  
 400 Traiicit. Hoc spatium tantumque morae fuit Ilo;  
 Ilo namque procul validam direxerat hastam:  
 Quam medius Rhoeteus intercipit, optume Teuthra,  
 Te fugiens fratremque Tyren; curruque volutus  
 Caedit semianimis Rutulorum calcibus arva.  
 405 Ac velut, optato ventis aestate coortis,  
 Dispersa inmittit silvis incendia pastor;  
 Correptis subito mediis extenditur una  
 Horrida per latos acies Volcania campos;  
 Ille sedens victor flammas despectat ovantis:  
 410 Non aliter socium virtus coit omnis in unum,  
 Teque iuvat, Palla. Sed bellis acer Halaesus  
 Tendit in adversos, seque in sua colligit arma.  
 Hic mactat Ladona Pheretaque Demodocumque;  
 Strymonio dextram fulgenti deripit ense

v. 8, 157.] 384. *super* ea re, i. e. dum id conatur Pallas.] 385. *Ille q.*, v. G. 2, 435. — *Iunge ante ... Excipit.*] 386. *inc. morte*, quem ira ex nece sodalis concepta incautum fecerat.] 388. *Rhoeti*, regis Marruviorum.] 389. *nov.*, Casperiae; quare iram patris veritus ad Daunum, patrem Turni, perfugit.] 390. *Rut.*, cf. vs. 404 et v. 9, 450.] 391. *Daucia proles*, nescitur cuius Dauci.] 394. *Thymbre* (cf. vs. 391) a Graeco Nominativo Θύμβρος. — *caput*, v. vs. 383.] 395. *suum* dominum.] 398. *dolor*, quod admonendi fuerant, *pudor*, quod videbant praeclare facta ducis adolescentuli.] 399. *Iunge haec in unum: praeterfugientem.*] 400. Ergo post Rhoeteum statim interficit illum.] 401. *Ilo*, v. E. 2, 30.] 404. cf. vs. 730 sq.] 405 sqq. Pallad. 9, 4 „Nunc (Augusto mense) urenda sunt pascua, ut et altorum fruticum festinatio reprimatur ad stirpes, et incensis aridis nova laetius herba succedat.“ adde Colum. 6, 23, 2. Luc. 9, 182 sqq. et cf. 12, 521 sqq. Imitatur haec Silius 7, 364 sqq. „quam multa videt, fervoribus atris Cum Calabros urunt ad pingua pabula (i. e. quo nova gramina proveniant) saltus Vertice Gargani residents incendia pastor.“] 409. *victor*, v. 2, 329.] 412. *seque i. s. c. a.*, totum se scuto tegit, cf. vs. 802. 12,

- 415 Elatam in iugulum; saxo ferit ora Thoantis,  
 Ossaue dispersit cerebro permixta cruento.  
 Fata canens silvis genitor celarat Halaesum;  
 Ut senior leto canentia lumina solvit,  
 Iniecere manum Parcae, telisque sacrarunt
- 420 Euandri. Quem sic Pallas petit ante precatus:  
 Da nunc, Thybri pater, ferro, quod missile libro,  
 Fortunam atque viam duri per pectus Halaesi.  
 Haec arma exuviasque viri tua quercus habebit.  
 Audiit illa deus; dum textit Imaona Halaesus,
- 425 Arcadio infelix telo dat pectus inermum.  
 At non caede viri tanta perterrita Lausus,  
 Pars ingens belli, sinit agmina: primus Abantem  
 Oppositum interemit, pugnae nodumque moramque.  
 Sternitur Arcadiae proles, sternuntur Etrusci,
- 430 Et vos, o Graiis inperdita corpora, Teucri.  
 Agmina concurrunt ducibusque et viribus aequis.  
 Extremi addensent acies; nec turba moveri  
 Tela manusque sinit. Hinc Pallas instat et arguet,  
 Hinc contra Lausus, nec multum discrepat aetas,
- 435 Egregii forma; sed quis fortuna negarat  
 In patriam reditus. Ipsos concurrere passus  
 Haud tamen inter se magni regnator Olympi;  
 Mox illos sua fata manent maiore sub hoste.  
 Interea soror alma monet succedere Lauso
- 440 Turnum, qui volucri curru medium secat agmen.  
 Ut vidit socios: Tempus desistere pugnae;  
 Solus ego in Pallanta feror; soli mihi Pallas  
 Debetur; cuperem ipse parens spectator adesset.  
 Haec ait; et socii cesserunt aequore iusso.
- 445 At, Rutulum abscessu, iuvenis tum, iussa superba

491 sq. | 415. Halaesi iugulo vulnus minabatur Strymonius elata cum telo manu. |  
 417. Halaesi parens filium, cui sciebat fatale esse, ut in bello caderet, quo id  
 caveret, silvis et saltibus abdiderat, ut vitam coleret pastoritiam, secretam ab  
 armis. | 419. Callim. Ep. 2, 5 „αἰ δὲ τεὰ ζῶουσιν ἀηδόνες, ἧσιν ὁ πάντων  
 ἀρπακτὴρ Αἰδὼς οὐκ ἐπὶ χεῖρα βαλεῖ.“ quamquam Virgilium ad iniectionem  
 manuum ex iure Romano spectasse putabimus; Servius „manus iniectio dicitur,  
 quoties nulla iudicis auctoritate expectata rem nobis debitam vindicamus.“ | 420.  
*Euandri*, cf. vs. 394. | 423. *Quod si feceris*, haec arma in quercu tibi  
 sacra suspendam; v. G. 3, 562. — Ceterum cf. 11, 5 sqq. | 426. v. 1, 385. —  
*tanta*, v. E. 9, 46. | 427. *belli*, pugnantium, cf. vs. 737. — *primus*, v. E. 6, 1. |  
 428. ut nodus difficilis est ad solvendum, ita Abas difficilem hostibus impedi-  
 tamque reddebat victoriam, eamque, id quod per *moram* significatur, differebat. |  
 432. Qui extremis ordinibus collocati sunt, urgent priores ordines eoque con-  
 densant aciem ita, ut arma vix possint moveri. | 439—509. *Mors Pallantis*. |  
 439. *soror*, Iuturna nympha. — Alii *succurrere*. | 441. *pugnae* qui casus? Alii  
*pugnâ*. | 442. *feror*, v. 9, 21. | 443. *parens*, Euander, cf. vs. 450. | 444. c.  
*aequ. i.*, cedunt ea parte campi, qua cedere iussi sunt. | 445. *abscessu*, cum



- Miratus, stupet in Turno, corpusque per ingens  
 Lumina volvit obitque truci procul omnia visu,  
 Talibus et dictis it contra dicta tyranni:  
 Aut spoliis ego iam raptis laudabor opimis,  
 450 Aut leto insigni; sorti pater aequus utrique est.  
 Tolle minas. Fatus medium procedit in aequor.  
 Frigidus Arcadibus coit in praecordia sanguis.  
 Desiluit Turnus biugis; pedes apparat ire  
 Comminus. Utque leo, specula cum vidit ab alta  
 455 Stare procul campis meditantem in proelia taurum,  
 Advolat: haud alia est Turni venientis imago.  
 Hunc ubi contiguum missae fore credidit hastae,  
 Ire prior Pallas, si qua fors adiuvet ausum  
 Viribus inparibus, magnumque ita ad aethera fatur:  
 460 Per patris hospitium et mensas, quas advena adisti,  
 Te precor, Alcide, coeptis ingentibus adsis.  
 Cernat semineci sibi me rapere arma cruenta,  
 Victoremque ferant morientia lumina Turni.  
 Audiit Alcides iuvenem, magnumque sub imo  
 465 Corde premit gemitum lacrimasque effundit inanis.  
 Tum Genitor natum dictis adfatur amicis:  
 Stat sua cuique dies; breve et inreparabile tempus  
 Omnibus est vitae; sed famam extendere factis,  
 Hoc virtutis opus. Troiae sub moenibus altis  
 470 Tot gnati cecidere deum; quin occidit una  
 Sarpedon, mea progenies. Etiam sua Turnum  
 Fata vocant, metasque dati pervenit ad aevi.  
 Sic ait, atque oculos Rutulorum reiecit arvis.  
 At Pallas magnis emittit viribus hastam,  
 475 Vaginaque cava fulgentem deripit ense.  
 Illa volans, humeri surgunt qua tegmina summa,  
 Incidit, atque, viam clipei molita per oras,  
 Tandem etiam magno strinxit de corpore Turni.  
 Hic Turnus ferro praefixum robur acuto

abscessissent, ut Sil. It. 9, 487 „remeantis in aethera divae *abscessu* revocat mentes Gradvus;“ Cic. pro lege Manil. c. 8 „eius *adventu* maximae Mithridatis copiae omnibus rebus instructae fuerunt,“ i. e. cum adveniret Lucullus; et cf. supra 8, 215. 583. — *tum* referendum est ad *abscessu*, tamquam si scriptum sit: Rutulis *submotis* iuvenis *tum* mirabundus stupet,“ de qua re v. 2, 391. Liv. 24, 45 „perpetrato bello *tum* esse consultandum.“ | 449. cf. Hom. Il. 22, 253. | 450. victoriam egregiamque mortem aequae probabit pater Euander; cf. vs. 443. | 455. *med. in pr.*, exercentem se ad pugnam, G. 3, 232—234. | 458. *prior ire*, praevertere, *φθίσσαι*. — *si*, v. E. 6, 57. | 460. cf. 8, 362 sq. | 464 sq. dolet graviter animo Hercules, sed reprimit et continet eum dolorem. | 465. *inanes*, nihil profuturas. | 468. cf. 6, 807. Sil. It. 9, 375 sqq. | 473. *oc. Rut. rei. arvis*, ne videat miserandam Pallantis caedem. Ceterum v. G. 4, 88. | 476. *hum. tegm. s.* quae sint, docet vs. proximus. | 478. *str. de corpore*

- 480 In Pallanta diu librans iacit, atque ita fatur:  
 Aspice, num mage sit nostrum penetrabile telum.  
 Dixerat; at clipeum, tot ferri terga, tot aeris,  
 Quem pellis totiens obeat circumdata tauri,  
 Vibranti cuspis medium transverberat ictu,  
 485 Loricaeque moras et pectus perforat ingens.  
 Ille rapit calidum frustra de vulnere telum:  
 Una eademque via sanguis animusque sequuntur.  
 Corruit in vulnus; sonitum super arma dedere;  
 Et terram hostilem moriens petit ore cruento.  
 490 Quem Turnus super adsistens:  
 Arcades, haec, inquit, memores mea dicta referte  
 Euandro: Qualem meruit, Pallanta remitto.  
 Quisquis honos tumuli, quidquid solamen humandi est,  
 Largior. Haud illi stabunt Aeneia parvo  
 495 Hospitia. Et laevo pressit pede, talia fatus,  
 Exanimem, rapiens immania pondera baltei  
 Inpressumque nefas: una sub nocte iugali  
 Caesa manus iuvenum foede, thalamique cruenti;  
 Quae Clonus Eurytides multo caelaverat auro;  
 500 Quo nunc Turnus ovat spolio gaudetque potitus.  
 Nescia mens hominum fati sortisque futurae,  
 Et seryare modum, rebus sublata secundis!  
 Turno tempus erit, magno cum optaverit emptum  
 Intactum Pallanta et cum spolia ista diemque  
 505 Oderit. At socii multo gemitu lacrimisque  
 Inpositum scuto referunt Pallanta frequentes.  
 O dolor atque decus magnum reditue parenti!  
 Haec te prima dies bello dedit, haec eadem aufert,  
 Cum tamen ingentis Rutulorum linquis acervos!  
 510 Nec iam fama mali tanti, sed certior auctor  
 Advolat Aeneae, tenui discrimine leti  
 Esse suos; tempus, versis succurrere Teucris.  
 Proxima quaeque metit gladio latumque per agmen  
 Ardens limitem agit ferro, te, Turne, superbum

*ἐπέγραψε τοῦ σώματος.* | 482 sq. licet tot ferri aerisque laminis, tot  
 coris constet. | 488. „ἀράβησε δὲ τεύχε' ἐπ' αὐτῷ.“ | 489. cf. Hom. II.  
 11, 749. | 490. „λὰξ ἐν στηθεσι βαίνων.“ | 492. *meruit*, sc. ut sibi re-  
 mitterem. | 495. *Et*, v. 5, 504. | 496. *baltei*, v. E. 6, 78. | 498. *Caesa*  
*manus ... thalami cruenti* recte consultoque scripsit poeta, i. e. impressum  
 autem (caelatum in balteo) nefas fuit caesa manus *cet.*; grammatica lex  
 postulat Accusativos; et v. 7, 741. — significatur facinus Danaidum. | -500. v.  
 G. 2, 510. | 503. Respicitur ad 12, 940 sqq. Praeterea cf. 2, 104. | 509. *tamen*,  
 v. E. 10, 81. || 510—606. *Aeneas dum audita caede Pallantis Turnum quaerit*,  
*multos vivos capit, inferias Pallanti, multos interimit; postremo qui obsessi*  
*fuerant Troiani, erumpunt castris.* | 511. *ten. discr. l. e. s.*, non multum  
 abesse a morte, sive, ut ait Donatus, inter ipsos et mortem modicum esse morae

- 515 Caede nova quaerens. Pallas, Euander, in ipsis  
Omnia sunt oculis, mensae, quas advena primas  
Tunc adiit, dextraeque datae. Sulmone creatos  
Quattuor hic iuvenes, totidem, quos educat Ufens,  
Viventis rapit, inferias quos immolet umbris
- 520 Captivoque rogi perfundat sanguine flammās.  
Inde Mago procul infensam contenderat hastam.  
Ille astu subit; at tremibunda supervolat hasta;  
Et genua amplectens effatur talia supplex:  
Per patrios Manis et spes surgentis Iuli
- 525 Te precor, hanc animam serves gnatoque patrique.  
Est domus alta; iacent penitus defossa talenta  
Caelati argenti; sunt auri pondera facti  
Infectique mihi. Non hic victoria Teucrum  
Vertitur aut anima una dabit discrimina tanta.
- 530 Dixerat. Aeneas contra cui talia reddit:  
Argenti atque auri memoras quae multa talenta,  
Gnatis parce tuis. Belli commercia Turnus  
Sustulit ista prior iam tum Pallante perempto.  
Hoc patris Anchisae Manes, hoc sentit Iulus.
- 535 Sic fatus galeam laeva tenet atque reflexa  
Cervice orantis capulo tenus adplicat ense.  
Nec procul Haemonides, Phoebi Triviaeque sacerdos,  
Infula cui sacra redimibat tempora vitta,  
Totus conlucens veste atque insignibus armis.
- 540 Quem congressus agit campo, lapsumque superstans  
Immolat, ingentique umbra tegit; arma Serestus  
Lecta refert humeris, tibi, rex Gradive, tropaeum.  
Instaurant acies Volcani stirpe creatus  
Caeculus et veniens Marsorum montibus Umbro.
- 545 Dardanides contra furit. Anxuris ense sinistram

discrimen s. intervallum.] 516. cf. 8, 169. 175 sqq.] 517. *Sulmone*, oppidone an homine? cf. 9, 412.] 518. *educat*, v. E. 8, 45.] 519. *umbris*, Manibus Pallantis, et cf. Hom. 21, 26 sq. 23, 175 sq. Sueton. Octav. 15.] 520. *quo*, v. G. 3, 283. — *captivo*, captivorum, ut *caeso* (caesorum) *sanguine* 11, 82.] 522. *astu subit*, per astutiam subsidit et accedit ad Aeneam, Hom. II. 21, 68 „ὁ δ' ἐνέδραμε καὶ λάβε γούναν χύμας.“] 524. cf. vs. 534.] 525. *gnato* meo scilicet, cf. vs. 532.] 526. cf. Hom. II. 6, 46. 10, 378.] 528. *hic*, in me, in mea caede, v. 2, 292.] 529. *aut*, v. 2, 779.] 532. cf. vs. 525 et v. E. 8, 7. — *parce*, serva. — *B. c. T.*, cet., cf. Hom. II. 21, 103 sqq.] 533. *tam t. P. p.*, iam tum, cum Pallantem interemit; et cf. vs. 517 „mensae, quas advena primas Tunc adiit.“ prorsus similiter Liv. 1, 41 „Anci liberi iam tum comprehensis sceleris ministris, ut vivere regem nuntiatum est, exsulatum ierant.“] 541. *ing. u. t.*, facit, ut eum s. oculos eius umbra tegat; ea vero, cuius causa mors est, umbra *ingens* dicitur, quod nulla est tenebriosior aut magis perpetua.] 542. *legere* spolia dicuntur, qui ea detrahunt caeso hosti.] 543. *Inst. ac.*, restituant proelium a percussis Latinis iam omitti coeptum.] 545 sqq. Hoc dicit poeta „Postquam Anxurem inutilem pugnae reddidit Aeneas, Tarquitus, exasperatus

- Et totum clipei ferro deiecerat orbem; —  
 Dixerat ille aliquid magnum, vimque adfore verbo  
 Crediderat, caeloque animum fortasse ferebat,  
 Canitiemque sibi et longos promiserat annos; —  
 550 Tarquitus exsultans contra fulgentibus armis,  
 Silvicolae Fauno Dryope quem nympa crearat,  
 Obvius ardenti sese obtulit. Ille reducta  
 Loricam clipeique ingens onus inpedit hasta;  
 Tum caput orantis nequiquam et multa parantis  
 555 Dicere deturbat terrae, truncumque tepentem  
 Provolvens super haec inimico pectore fatur:  
 Istic nunc, metuende, iace. Non te optima mater  
 Condet humo patrioque onerabit membra sepulchro:  
 Alitibus linquere feris, aut gurgite mersum  
 560 Unda feret, piscesque inpasti volnera lambent.  
 Protinus Antaeum et Lucam, prima agmina Turni,  
 Persequitur, fortemque Numam, fulvumque Camertem,  
 Magnanimo Volscente satum, ditissimus agri  
 Qui fuit Ausonidum et tacitis regnavit Amyclis.  
 565 Aegaeon qualis, centum cui bracchia dicunt  
 Centenasque manus, quinquaginta oribus ignem  
 Pectoribusque arsisse, Iovis cum fulmina contra  
 Tot paribus streperet clipeis, tot stringeret enses:  
 Sic toto Aeneas desaevit in aequore victor,  
 570 Ut semel intepuit mucro. Quin ecce Niphaei

scilicet huius viri casu, obvium se illi tulit.“| 546. Videtur poeta non *totum* scripsisse, sed *tortum*, orbem ex tortilibus laminis rotundatum, quo significaret Homericam illam ἀσπίδα εὐκυκλον. | 548. *cael. a. f. f.*, iunge *fortasse caelo*: et fortasse usque ad caelum spe efferebat animum, nimirum cupiens maiora, quam decebat mortalem, tamque insignem sperans victoriam; Horat. Od. 1, 3, 37 sq. „Nil mortalibus arduum est: *Caelum* ipsum *petimus* stultitia.“ *fortasse*, nostrum *wohl*, Graecum πού, prodit indignationem poetae, quod ita immoderatam spem aleret Anxur; Hom. Il. 5, 472 sqq. „Ἐτορ, ... φῆς, που ἄτερ λῶν πόλιν ἐξέμεν ἢ δ' ἐπικούρων οἶος σὺν γαμβροῖσι κασιγνήτοισι τε σοῖσιν.“ | 549. *longos annos*, longam aetatem s. multos annos, ut 11, 907 *longis passibus*, i. e. longo spatio s. multis passibus. | 550. *exsultans*, nos: *sich tummelnd*, et v. 10, 813. | 552. *reducta*: hastam Aeneas quo validius emitteret, longe reducto brachio vibravit, v. 5, 478, atque perforato clipeo ita loricae infixit, ut, cum retrahi non posset, clipeus et lorica inter se colligarentur. | 555. *terrae*, v. E. 2, 30. | 556. *super*, insuper. | 558. *Alii humi*. | 560. cf. Hom. Il. 21, 122 sqq. | 561. *pr. agm.*, qui, virtute praestantes, inter primos pugnabant, πρόμαχοι. | 562. *fulvus* a colore capilli dicitur. | 564. *Auson.*, v. 2, 242. — *Amyclae*, oppidum inter Tarracinam et Caietam, tacitae dicuntur vel quod olim deleta a serpentibus civitate desertae fuerunt, vel quod hoc oppidum cum iis Amyclis confudit poeta, quod erat in Laconica *tacendoque* periit; nam hostium adventu saepe temere nuntiato cum vere hostis venisset, nullo nuntiante et tacentibus omnibus oppidum captum est. | 565 sq. verba sic ordinanda: *qualis cum Aegaeon*, cui dicunt *fuisse c. br.*, ... *contra fulmina Iovis streperet*, cet. — Aegaeonem s. Briareum, unum ex centimanis, poeta h. l. in numerum Gigantum adscribit; v. 6, 287. | 568.

- Quadriugis in equos adversaque pectora tendit.  
 Atque illi, longe gradientem et dira frementem  
 Ut videre, metu versi retroque ruentes  
 Effunduntque ducem, rapiuntque ad litora currus.  
 575 Interea biiugis infert se Lucagus albis  
 In medios, fraterque Liger; sed frater habenis  
 Flectit equos, strictum rotat acer Lucagus ensem.  
 Haud tulit Aeneas tanto fervore furentis:  
 Inruit, adversaque ingens adparuit hasta.  
 580 Cui Liger:  
 Non Diomedis equos, nec currum cernis Achilli,  
 Aut Phrygiae campos: nunc belli finis et aevi  
 His dabitur terris. Vesano talia late  
 Dicta volant Ligeri. Sed non et Troius heros  
 585 Dicta parat \*contra; iaculum nam torquet in hostem.\*  
 Lucagus ut pronus pendens in verbera telo  
 Admonuit biiugos, proiecto dum pede laevo  
 Aptat se pugnae, subit oras hasta per imas  
 Fulgentis clipei, tum laevum perforat inguen;  
 590 Excussus curru moribundus volvitur arvis.  
 Quem pius Aeneas dictis adfatur amaris:  
 Lucage, nulla tuos currus fuga segnis equorum  
 Prodidit aut vanae vertere ex hostibus umbrae;  
 Ipse rotis saliens iuga deseris. Haec ita fatus  
 595 Arripuit biiugos; frater tendebat inertis  
 Infelix palmas, curru delapsus eodem:  
 Per te, per qui te talem genuere parentes,  
 Vir Troiane, sine hanc animam et miserere precantis.  
 Pluribus oranti Aeneas: Haud talia dudum  
 600 Dicta dabas. Morere et fratrem ne desere frater.  
 Tum, latebras animae, pectus mucrone recludit.  
 Talia per campos edebat funera ductor  
 Dardanius, torrentis aquae vel turbinis atri  
 More furens. Tandem erumpunt et castra relinquunt  
 605 Ascanius puer et nequiquam obsessa iuventus.

*tot paribus, totidem (numero paribus).|* 572. *longe gr.*, cf. Hom. II. 7, 213. — *dira fr.*, v. G. 3, 149. | 576. cf. Hom. II. 11, 101 sqq. | 586. cf. G. 3, 106 sq. | 592. *nulla*, v. 2, 583. | 593. *Iunge: vanae ex hostibus umbrae*, i. e. vanis terriculis ex hoste venientibus; *vertere*, everterunt; nempe consternati equi (cf. Hom. II. 8, 86) everterunt currum, quare vs. 590 Lucagus *excussus*, Liger vs. 596 *delapsus*, currus autem vs. 593 prodi dicitur, quippe quo everso facile potiri possit Aeneas vs. 595. | 594. Similis sarcasmus apud Hom. II. 16, 745. | 595. Alii *inermis*. | 597. v. vs. 369 et 2, 142. | 599. *dudum*, cf. vs. 581—583. | 601. ordo est: *pectus, latebras animae*; similiter II, 508 „decus Italiae virgo,“ pro *virgo, dec. It.* || 606—688. *Interea Iunoni hoc largitur Iuppiter, ut Turnum fuga seducat, invitum a proelio fatoque suo in*

- Iunonem interea compellat Iuppiter ultro.  
 O germana mihi atque eadem gratissima coniunx,  
 Ut rebare, Venus — nec te sententia fallit —  
 Troianas sustentat opes, non vivida bello  
 610 Dextra viris animusque ferox patiensque pericli.  
 Cui Iuno submissa: Quid, o pulcherrime coniunx,  
 Sollicitas aegram et tua tristitia iussa timentem?  
 Si mihi, quae quondam fuerat, quamque esse decebat,  
 Vis in amore foret, non hoc mihi namque negares,  
 615 Omnipotens, quin et pugnae subducere Turnum  
 Et Dauno possem incolumem servare parenti.  
 Nunc pereat, Teucrisque pio det sanguine poenas.  
 Ille tamen nostra deducit origine nomen,  
 Pilumnusque illi quartus pater; et tua larga  
 620 Saepe manu multisque oneravit limina donis.  
 Cui rex aetherii breviter sic fatus Olympi;  
 Si mora praesentis leti tempusque caduco  
 Oratur iuveni, meque hoc ita ponere sentis,  
 Tolle fuga Turnum atque instantibus eripe fatis.  
 625 Hactenus indulsisse vacat. Sin altior istis  
 Sub precibus venia ulla latet, totumque moveri  
 Mutarive putas bellum, spes pascis inanis.  
 Et Iuno adlacrimans: Quid, si, quae voce gravaris,  
 Mente dares, atque haec Turno rata vita maneret?  
 630 Nunc manet insontem gravis exitus; aut ego veri  
 Vana feror. Quod ut o potius formidine falsa  
 Ludar, et in melius tua, qui potes, orsa reflectas!  
 Haec ubi dicta dedit, caelo se protinus alto  
 Misit, agens hiemem nimbo succincta per auras,  
 635 Iliacamque aciem et Laurentia castra petivit.

*breve tempus per dolum subtrahat.* | 606. *ultro*, v. vs. 312. | 607. cf. 1, 46 sq. | 608. spectant haec verba plena amaritudinis ad orationem Iunonis vs. 63 sqq. | 609. *pulcherr.*, referes hoc ad dignitatem oris plenam maiestatis. | 610. *viris* Dativus possessionem indicans: quae est viris, Troianis; Xenoph. Cyrop. 4, 6, 4 „*τὸν μόνον μοι παῖδα*,” qui mihi est unicus. | 612. *tristitia*, Donatus „imperiosa et quae prohibentis habeant minas.” | 614. Iunge *mihi namque*, nostrum *mir gerade*, *ἐμοίγε δὲ*, mihi, quae sum coniux tua; et v. 8, 84. | 618. *nomen*, quia nominatur inter eos, qui diis prognati sunt. | 619. *Pil.*, Saturni filius. — *quart. p.*, abavus. | 623. *meq. h. i. p. s.*, si ea est tua sententia (i. e. si hoc vis), ut hoc ita constituam. | 625. *vacat*, liberum est. — Sin maioris beneficii concessio, *altior venia*, a te petitur. | 626. *moveri*, tolli, Donatus „poni.” | 629. *haec*, pro qua intercedo. | 630. *veri vana*, cf. 7, 440. | 631. *feror*, v. 4, 110. — *Quod*, qua in re s. quod attinet ad id, utinam frustra metuum! Crebriora talia, quale *Quod si*, *Quod nisi*. | 632. *qui potes*: num igitur tollere fata potest Iuppiter? minime; differre exitus rerum a fato constitutos licet, cf. 7, 314 sq., id quod facit Iuppiter vs. 624. Potuit autem Turno vitam servare Iuppiter, si ille quiesceret; nam fuit fatale, ut id bellum causa mortis Turno existeret; atqui haud ignoravit Iuppiter eum non esse quieturum. Iuno autem non illud orat, ut fata rescindantur, sed ut salvis fatis Turnus ab armis discedat. | 634. *agens h.*,

- Tum dea nube cava tenuem sine viribus umbram  
 In faciem Aeneae — visu mirabile monstrum —  
 Dardaniis ornat telis, clipeumque iubasque  
 Divini adsimulat capitis, dat inania verba,  
 640 Dat sine mente sonum, gressusque effingit euntis:  
 Morte obita qualis fama est volitare figuras,  
 Aut quae sopitos deludunt somnia sensus.  
 At primas laeta ante acies exsultat imago,  
 Inritatque virum telis et voce lacessit.  
 645 Instat cui Turnus, stridentemque eminus hastam  
 Coniicit; illa dato vertit vestigia tergo.  
 Tum vero Aenean aversum ut cedere Turnus  
 Credidit atque animo spem turbidus hausit inanem:  
 Quo fugis, Aenea? thalamos ne desere pactos;  
 650 Hac dabitur dextra tellus quaesita per undas.  
 Talia vociferans sequitur, strictumque coruscat  
 Mucronem; nec ferre videt sua gaudia ventos.  
 Forte ratis celsi coniuncta crepidine saxi  
 Expositis stabat scalis et ponte parato,  
 655 Qua rex Clusinis advectus Osinius oris.  
 Huc sese trepida Aeneae fugientis imago  
 Coniicit in latebras; nec Turnus segnior instat,  
 Exsuperatque moras et pontis transilit altos.  
 Vix proram attigerat: rumpit Saturnia funem,  
 660 Avolsamque rapit revoluta per aequora navem.  
 Tum levis haud ultra latebras iam quaerit imago,  
 Sed sublime volans nubi se immiscuit atrae.  
 Illum autem Aeneas absentem in proelia poscit.  
 Obvia multa virum demittit corpora Morti:  
 665 Cum Turnum medio interea fert aequore turbo.  
 Respicit ignarus rerum ingratusque salutis  
 Et duplicis cum voce manus ad sidera tendit:  
 Omnipotens genitor, tanton me crimine dignum  
 Duxisti et talis voluisti expendere poenas?  
 670 Quo feror? unde abii? quae me fuga, quemve reducit?  
 Laurentisne iterum muros aut castra videbo?  
 Quid manus illa virum, qui me meaque arma secuti?  
 Quosne — nefas — omnis infanda in morte reliqui,

cum procella. | 636. *n. cava*, v. 2, 360 et 5, 663. | 637. *in faciem*, v. G. 4, 82. Et cf. Hom. II. 5, 449 sq. | 639. *inania* interpretatur poeta ipse verbis subiectis „Dat sine mente sonum.“ | 648. *turbidus*, ipsa scilicet spe. | 652. v. 9, 313. | 654. v. vs. 287. | 655. putabimus Osinium Lartem Clusinorum fuisse, qui sub auspiciis Massici parti exercitus praeesset, cf. vs. 166. | 658. *moras*, *scalarum*. | 660. *revoluta* videtur ad recessum fluctuum pertinere; eo tempore sua sponte abstrahitur navis a litore et in altum abripitur; post, redeunte accessu, rursus defertur ad terram vs. 687 sq. | 667. *cum voce*, i. e. clara voce ita *precans*; et cf. Tibull. 3, 4, 64. | 670. *reducit*, ex acie. | 673. *Quosne* hic vim

- Et nunc palantis video, gemitumque cadentum  
 675 Accipio? Quid ago? aut quae iam satis ima dehiscat  
 Terra mihi? Vos o potius miserescite, venti;  
 In rupes, in saxa — volens vos Turnus adoro —  
 Ferte ratem, saevisque vadis inmittite syrtis,  
 Quo neque me Rutuli, nec conscia fama sequatur.  
 680 Haec memorans animo nunc huc, nunc fluctuat illuc;  
 An sese mucrone ob tantum dedecus amens  
 Induat et crudum per costas exigat ensem;  
 Fluctibus an iaciat mediis et litora nando  
 Curva petat, Teucrumque iterum se reddat in arma.  
 685 Ter conatus utramque viam; ter maxuma Iuno  
 Continuit, iuvenemque animi miserata repressit.  
 Labitur alta secans fluctuque aestuque secundo,  
 Et patris antiquam Dauni defertur ad urbem.  
 At Iovis interea monitis Mezentius ardens  
 690 Succedit pugnae, Teucrosque invadit ovantis.  
 Concurrunt Tyrrhenae acies, atque omnibus uni,  
 Uni odiisque viro telisque frequentibus instant.  
 Ille, velut rupes, vastum quae prodit in aequor,  
 Obvia ventorum furiis expostaque ponto,  
 695 Vim cunctam atque minas perfert caelique marisque,  
 Ipsa inmota manens; prolem Dolichaonis Hebrum  
 Sternit humi, cum quo Latagum Palmumque fugacem,  
 Sed Latagum saxo atque ingenti fragmine montis  
 Occupat os faciemque adversam, poplite Palmum  
 700 Succiso volvi segnem sinit; armaque Lauso  
 Donat habere humeris et vertice figere cristas.  
 Nec non Euanthen Phrygium, Paridisque Mimanta  
 Aequalem comitemque, una quem nocte Theano

habet exprobrandi, ut apud Catull. 64, 180 sqq. „An patris auxilium sperem, quemne ipsa reliqui? ... Coniugis an fido consolor memet amore, *Quine* fugit lentos incurvans gurgite remos?“ | 675. *Quid ago?* h. l. significat cupidum quidem aliquid agendi sed inopem animum, ut 12, 637. — Alii *dehiscet*; at id ipsum miserrimum esse significat, quod, si vel maxime optet, ne *possit* quidem terra devorari, quippe qui per mare vehatur; itaque *potius* ventos implorat. Ceterum v. 4, 24. | 681. *mucrone induat*, Caesar B. G. 7, 73 „quo qui intraverant, se ipsi acutissimis *vallis induebant*.“ Hom. Il. 8, 86 „*κυλινδόμενος περί χαλκῷ*.“ Soph. Ai. 899 „*Ἄλως ... κείται κρυφαῖω φασγάνῳ περιπτυχῆς*.“ | 682. *crud.*, Servius „*cruentum*;“ scilicet qui, dum exigitur, cruentatur. | 683. v. E. 2, 30. | 686. Alii *animo*; v. 6, 332. | 687. secundo maris aestuantis fluctu; et v. vs. 660. | 688. *ad urb.*, Ardeam. | 689—754. *Succedit in locum Turni Mezentius magnamque edit caedem; inclarescit in ea pugna aliorum quoque ex eisdem partibus virtus.* | 689. *Iovis*, qui se utrique parti aequum fore professus est vs. 112. | 690. *Succ.*, cf. vs. 439. 11, 826. | 692. *odiis*, cf. 8, 479 sqq. | 693. *Ille* sc. *immutus manet*, quod adscisces e vs. 696. | 698 sq. Primo hoc tantum dicturus fuerat: *Occupat Latagum*; deinde adiecit eodem usus, ut fieri solet, casu etiam partem: *os faciemque*, cf. 12, 275 sq. Hdm. Il. 7, 14 „*Ἰφίτροον βάλε δουρὶ ... ὤμων*.“ | 700. *volvi*, v. 9, 433. | 703. *secundum*



- In lucem genitori Amyco dedit et face praegnans  
 705 Cisseis regina Parim; Paris urbe paterna  
 Occubat, ignarum Laurens habet ora Mimanta.  
 Ac velut ille canum morsu de montibus altis  
 Actus aper, multos Vesulus quem pinifer annos  
 Defendit, multosque palus Laurentia, silva  
 710 Pastus arundinea, postquam inter retia ventum est,  
 Substitit, infremuitque ferox et inhorruit armos;  
 Nec cuiquam irasci propiusve accedere virtus,  
 Sed iaculis tutisque procul clamoribus instant;  
 Ille autem inpavidus partis cunctatur in omnis,  
 715 Dentibus infrendens, et tergo decutit hastas:  
 Haud aliter, iustae quibus est Mezentius irae,  
 Non ulli est animus stricto concurrere ferro;  
 Missilibus longe et vasto clamore lacessunt.  
 Venerat antiquis Corythi de finibus Acron,  
 720 Graius homo, infectos linquens profugus hymenaeos;  
 Hunc ubi miscentem longē media agmina vidit,  
 Purpureum pennis et pactae coniugis ostro:  
 Inpastus stabula alta leō ceu saepe peragrans,  
 Suadet enim vesana fames, si forte fugacem  
 725 Conspexit capream aut surgentem in cornua cervum,  
 Gaudet, hians inmane, comasque arrexerit, et haeret  
 Visceribus super incumbens; lavit inproba taeter  
 Ora cruor:  
 Sic ruit in densos alacer Mezentius hostis.  
 730 Sternitur infelix Acron et calcibus atram  
 Tundit humum expirans, infractaque tela cruentat.  
 Atque idem fugientem haud est dignatus Oroden

consuetudinem dicendum erat: quem Theano eadem nocte, qua Hecuba Parim, peperit. | 704 sq. v. 7, 319. 320. | 706. *ignarum*, ignotum, ut Ovid. Met. 7, 404 „Thesens proles *ignara* parenti.“ | 707. cf. Hom. Il. 11, 414 sqq. — *ille*, v. 7, 110. | 708. *Vesulus*, mons in finibus Ligurum, hodie *il Viso*. | 709. Cum Vesulus et palus Laurentia tanto intervallo inter se distent, apertum est non eundem aprum utroque versu significari; itaque *multosque p. L.*, ita intelliges: et *ille* aper, quem palus L. multos annos defendit. | 710. *inter*, v. E. 2, 3. | 711. *inh. armos*, *φελσσει τοιχας* Hesiod. Scut. 391. | 712. *irasci* de audacia intelligendum; nam ex ira saepe nascitur audacia. | 714. *part. cunct. i. o.*, dubitans, quo potissimum prorumpat. | 716. *irae*, odio. — In scriptis codicibus hi versus hoc ordine leguntur: 714 *Haud aliter*, 715 *Non ulli*, 716 *Missilibus*, 717 *Ille autem*, 718 *Dentibus*. | 719. *Cor.*, v. 3, 170. | 720. *inf.*, *ἀτελέστον*. Nempe repente pulsus patria, Graeca aliqua civitate, sponsam ibi reliquerat. — *profugus*, v. E. 6, 53. — Ceterum cf. Hom. Il. 11, 241 sqq. | 721. *miscentem*, *χλονέοντα*. | 722. *Purp. p.*, cf. 9, 163. *ostro*, cf. 11, 772. 9, 582. | 723 sqq. cf. Hom. Il. 3, 23 sqq. 12, 299 sqq. | 723. *stab. alta*, silvas et ferarum lustra, ut 6, 179. — *ceu saepe*, v. 1, 148. | 725. *surg. i. c.*, Servius „cornibus eminentem“, et cf. 1, 189. | 727. *inpr.*, v. G. 1, 119. | 731. *infr.*, v. 12, 1 et cf. 9, 412 sq. | 732 sqq. Non dignum se putavit, Oroden necessitate aliqua forte

- Sternere, nec iacta caecum dare cuspidē volnus;  
 Obvius adversoque occurrit, seque viro vir  
 735 Contulit, haud furto melior, sed fortibus armis.  
 Tum super abiectum posito pede nixus et hasta:  
 Pars belli haud temnenda, viri, iacet altus Orodes.  
 Conclamant socii laetum paeana secuti.  
 Ille autem exspirans: Non me, quicumque es, inulto,  
 740 Victor, nec longum laetabere; te quoque fata  
 Prospectant paria, atque eadem mox arva tenebis.  
 Ad quem subridens mixta Mezentius ira:  
 Nunc morere. Ast de me divom pater atque hominum rex  
 Viderit. Hoc dicens eduxit corpore telum.  
 745 Olli dura quies oculos et ferreus urguet  
 Somnus; in aeternam clauduntur lumina noctem.  
 Caedicus Alcathoum obruncat, Sacrator Hydaspen,  
 Partheniumque Rapo et praedurum viribus Orsen,  
 Messapus Cloniumque Lycaoniumque Ericeten,  
 750 Illum infrenis equi lapsu tellure iacentem,  
 Hunc peditem pedes. Et Lycius processerat Agis;  
 Quem tamen haud expers Valerus virtutis avitae  
 Deicit; at Thronium Salius, Saliumque Nealces,  
 Insignis iaculo et longe fallente sagitta.
- 755 Iam gravis aequabat luctus et mutua Mavors  
 Funera; caedebant pariter pariterque ruebant  
 Victores victique; neque his fuga nota, neque illis.  
 Di Iovis in tectis iram miserantur inanem  
 Amborum, et tantos mortalibus esse labores;  
 760 Hinc Venus, hinc contra spectat Saturnia Iuno;  
 Pallida Tisiphone media inter milia saevit.  
 At vero ingentem quatiens Mezentius hastam  
 Turbidus ingreditur campo. Quam magnus Orion,  
 Cum pedes incedit medii per maxuma Nerei

in fugam abreptum a tergo caedere, sed honestius existimans cum viro fortissimo (cf. vs. 737) congredi occupat eum cursu, ut adverso occurrat; et v. vs. 757.] 734. *Obvius adversoque*, v. G. 2, 290.] 735. v. 6, 568, tum 9, 634 et G. 1, 479.] 737. v. vs. 427 et 3, 265.] 738. Prosequuntur clamore illum *ἐπευχόμενον*.] 740 sq. Similia vaticinia morientium ap. Hom. II. 16, 852 sqq. 22, 358 sqq., adde Cic. de Divinat. 1, 31.] 744. Ovid. Her. 12, 211 „*Viderit ista deus, qui nunc mea pectora versat*.“ Hom. II. 22, 365 sq.] 745. *Olli*, v. 1, 254. — „*χοιμήσατο χάλκεον ὕπνον*“ Hom. II. 11, 241.] 750. cf. 4, 41.] 751. *proc.*, *προῦμάχεται*.] 754. v. 9, 572.]] 755—832. *Aeneas vulnerat Mezentium, Lausum, qui patrem vulneratum protegit, obruncat.*] 755—761. cf. Hom. II. 11, 70 sqq.] 757. *neque h. f. n. n. illis*. At quomodo haec concordant cum vs. 732? Nempe etsi, ut fit in proeliis, singuli paucique ab utraque parte fugiebant, nulla tamen fuit universa fuga.] 758. *inanem*, quia neutra acies quidquam proficiebat.] 763. *Turbidus* ira, furore; v. vs. 648. — Alii

- 765 Stagna viam scindens, humero supereminet undas,  
 Aut, summis referens annosam montibus ornum,  
 Ingrediturque solo et caput inter nubila condit:  
 Talis se vastis infert Mezentius armis.  
 Huic contra Aeneas, speculatus in agmine longo,
- 770 Obvius ire parat. Manet inperterritus ille,  
 Hostem magnanimum opperiens, et mole sua stat;  
 Atque oculis spatium emensus, quantum satis hastae:  
 Dextra mihi deus et telum, quod missile libro,  
 Nunc adsint! Voveo praedonis corpore raptis
- 775 Indutum spoliis ipsum te, Lause, tropaeum  
 Aeneae. Dixit, stridentemque eminus hastam  
 Iecit; at illa volans clipeo est excussa proculque  
 Egregium Antoren latus inter et ilia figit,  
 Herculis Antoren comitem, qui missus ab Argis
- 780 Haeserat Euandro atque Itala consederat urbe.  
 Sternitur infelix alieno vulnere, caelumque  
 Aspicit et dulcis moriens reminiscitur Argos.  
 Tum pius Aeneas hastam iacit; illa per orbem  
 Aere cavum triplici, per linea terga, tribusque
- 785 Transiit intextum tauris opus, imaque sedit  
 Inguine; sed viris haud pertulit. Ocius ensem  
 Aeneas, viso Tyrrheni sanguine laetus,  
 Eripit a femine et trepidanti fervidus instat.  
 Ingemuit cari graviter genitoris amore,
- 790 Ut vidit, Lausus, lacrimaeque per ora volutae.  
 Hic mortis durae casum tuaque optuma facta,  
 Si qua fidem tanto est operi latura vetustas,  
 Non equidem, nec te, iuvenis memorande, silebo.  
 Ille pedem referens et inutilis inque ligatus
- 795 Cedebat, clipeoque inimicum hostile trahebat.

*campum.* | 766. puta, quando redit ex venatione, cf. Hom. Od. 11, 572 sqq. |  
 771. *mole s. st.*, ipsa moles pondusque corporis facit, ut firmiter stet, tamquam  
 rupes, cf. 7, 589, ut elephant in flumine apud Liv. 21, 28 „ipso pondere  
 stabiles.“ | 773. Mezentius, contemptor deorum; dextram suam hastamque quasi  
 suum numen adesse sibi vult; cf. Stat. Theb. 3, 615. | 775. quale sit tropaeum,  
 docet ipse poeta 11, 5 sqq. Alii tropaea in deorum honorem consecrabant;  
 Mezentius vovet se armis Aeneae induturum esse Lausum filium, ut is tamquam  
 tropaeum adstet. | 779. v. vs. 320. | 781. *alieno*, non sibi intentato. | 784. *Aere*  
 c., concavum ex aere factum; et v. 5, 663. | 785. *tauris*, Hom. Il. 12, 137  
 „βόας αἶας ὑπὸς ἀναγκόμενοι.“ | 788. *trepidanti* in extrahenda hasta, cf.  
 vs. 794 et v. 12, 403. | 791. Donatus „*Duram* mortem ad aetatem rettulit  
 adolescentis.“ | 792 sq. Donatus „Confido te futurum in laude maxima, si libri  
 mei habuerint fidem.“ — *vetustas*, posteritas; Cic. pr. Mil. 35 „De me nulla  
 umquam obmutescet vetustas.“ — *tanto op.*, quippe hominum summorum ac  
 fortissimorum rerumque maximarum famam celebranti. | 794. *inut.*, cf. 2. 647.  
 — *inq. l.*, et illigatus; hasta sedens in inguine colligabat eum cum transfixo

- Proripuit iuvenis seseque inmiscuit armis,  
 Iamque adsurgentis dextra plagamque ferentis  
 Aeneae subiit mucronem, ipsumque morando  
 Sustinuit; socii magno clamore sequuntur,  
 800 Dum genitor nati parma protectus abiret,  
 Telaque coniciunt proturbantque eminus hostem  
 Missilibus. Furit Aeneas, tectusque tenet se.  
 Ac velut effusa si quando grandine nimbi  
 Praecipitant, omnis campis diffugit arator,  
 805 Omnis et agricola et tuta latet arce viator,  
 Aut amnis ripis, aut alti fornice saxi,  
 Dum pluit in terris, ut possint sole reducto  
 Exercere diem: sic obrutus undique telis  
 Aeneas nubem belli, dum detonet omnis,  
 810 Sustinet, et Lausum increpitat Lausoque minatur:  
 Quo moriture ruis maioraque viribus audes?  
 Fallit te incautum pietas tua. Nec minus ille  
 Exsultat demens; saevae iamque altius irae  
 Dardanio surgunt ductori, extremaque Lauso  
 815 Parcae fila legunt: validum namque exigit ensem  
 Per medium Aeneas iuvenem, totumque recondit.  
 Transiit et parmam mucro, levia arma minacis,  
 Et tunicam, molli mater quam neverat auro,  
 Inplevitque sinum sanguis; tum vita per auras  
 820 Concessit maesta ad Manis corpusque reliquit.  
 At vero ut voltum vidit morientis et ora,  
 Ora modis Anchisiades pallentia miris,  
 Ingemuit miserans graviter, dextramque tetendit,  
 Et mentem patriae subiit pietatis imago.  
 825 Quid tibi nunc, miserande puer, pro laudibus istis,  
 Quid pius Aeneas tanta dabit indole dignum?  
 Arma, quibus laetatus, habe tua; teque parentum  
 Manibus et cineri, si qua est ea cura, remitto.

clipeo; Vossius: *verhäftet*.| 796. Alii *Prorupit*.| 798. Servius „Moram ini-  
 ciendo eius impetam lusit.“| 799. sequuntur Lausum cum clamoribus, quales  
 tolluntur ab iis, qui alacri animo vadunt in hostem.| 801. *prot.*, v. 6, 468.|  
 804. *diffugit* iam ante ingruentem, quam praevидit, tempestatem.| 805. Omnis  
 et agricola (in quo est quaedam anadiplosis) tuta latet arce et omnis ...  
 viator. — *arce* (ab arcendo dicta) perfugio.| 806. *amn. rip.*, puta cavo tor-  
 rentis vi effecto.| 807. Verba *in terris* videntur late diffusam (certe istis homi-  
 nibus ita visam) tempestatem indicare.| 808. *Exerc. d.*, exercendo opere trans-  
 igere diem; et v. 8, 94.| 809. *πολέμοιο νέφος* Hom. II. 17, 243.| 811. v.  
 9, 485 et G. 3, 283.| 813. Exsultare dicitur bellator, qui ferociter se agitat.|  
 815. *f. legunt*, collectam pollice (s. e. colo ductam) lanam in filam contor-  
 quent.| 818. *molli*, v. vs. 138.| 819. *vita, ψυχή*. — *maesta*, „ὄν πότμον  
 γόωσα“ Hom., et v. 4, 692.| 824. *patr. piet.*, pii erga patrem amoris.| 825.  
*laud.*, v. 9, 252.| 827. *Arma ... tua*, cf. Hom. II. 6, 417 sq.| 828. *si q. e.*  
*e. c.*, si qua id curas, si tibi gratum est, et v. 7, 4. — Ceterum cf. vs. 491 sqq.|

- Hoc tamen infelix miseram solabere mortem:  
 830 Aeneae magni dextra cadis. Increpat ultro  
 Cunctantis socios et terra sublevat ipsum,  
 Sanguine turpantem comptos de more capillos.  
 Interea genitor Tiberini ad fluminis undam  
 Volnera siccabat lymphis, corpusque levabat  
 835 Arboris adclinis trunco. Procul aerea ramis  
 Dependet galea, et prato gravia arma quiescunt.  
 Stant lecti circum iuvenes; ipse aeger, anhelans  
 Colla fovet, fusus propexam in pectore barbam;  
 Multa super Lauso rogitat, multumque remittit,  
 840 Qui revocent maestique ferant mandata parentis.  
 At Lausum socii exanimem super arma ferebant  
 Flentes, ingentem atque ingenti vulnere victum.  
 Adgnovit longe gemitum praesaga mali mens.  
 Canitiem multo deformat pulvere, et ambas  
 845 Ad caelum tendit palmas, et corpore inhaeret.  
 Tantane me tenuit vivendi, nate, voluptas,  
 Ut pro me hostili paterer succedere dextrae,  
 Quem genui? Tuane haec genitor per volnera servor,  
 Morte tua vivens? Heu, nunc misero mihi demum  
 850 Exitium infelix! nunc alte vólnus adactum!  
 Idem ego, nate, tuum maculavi crimine nomen,  
 Pulsus ob invidiam solio sceptrisque paternis.  
 Debueram patriae poenas odiisque meorum:  
 Omnis per mortis animam sontem ipse dedissem!  
 855 Nunc vivo, neque adhuc homines lucemque relinquo.  
 Sed linquam. Simul hoc dicens attollit in aegrum  
 Se femur et, quamquam vis alto vulnere tardat,  
 Haud deiectus equum duci iubet. Hoc decus illi,  
 Hoc solamen erat; bellis hoc victor abibat  
 860 Omnibus. Adloquitur maerentem et talibus infit:

830. cf. 11, 688. | 832. *compt. de more* Etruscorum scilicet. || 833—908. *Mezentius, qui, caedem Lausi ulcisci cupiens, in pugnam redit, iugulatur ab Aeneâ.* | 834. *siccabat* sistens sanguinem. | 835. *Procul*, v. E. 6, 16. | 838. *C. fov.*, collum lassatum ac deficiens reficit, ita quidem, ut caput trunco arboris acclinat. — *fus. barb.*, v. E. 3, 106. — *in pectore*, ut barba in pectore posita sit. | 839. *Alii multosque r.* | 841. *super a.*, cf. vs. 506. | 844. cf. 12, 611. Hom. Il. 18, 23 sq. | 845. *corp. inh.* (v. vs. 361), prostratus scilicet supra corpus occisi filii, cf. 11, 150. | 847. *host. succ. d.*, meo loco se obicere vulneribus. | 850. *Alii Exsilium.* — *nunc a. v. a.*, tua mors mortiferum mihi reddit vulnus ab Aenea inflictum. | 854. v. 4, 678. utinam ipse (ultro poenis me offerens) omnibus suppliciis mactatus periissem! — *Omn. p. m.*, cf. Hom. Od. 12, 341 sq. | 856. *Iunge simul dicens, ἄμα εἰπὼν*, non simul attollit; Liv. 22, 3 „Haec simul increpans cum ocius signa convelli iuberet;“ infra 12, 758 „Ille simul fugiens Rutulos simul increpat omnis.“ 11, 827 „simul his dictis.“ | 857. *vis tardat*, vires tardantur. | 858. *det.*, deiecto animo. 860 sqq.

- Rhaebe, diu, res si qua diu mortalibus ulla est,  
 Viximus. Aut hodie victor spolia illa cruenta  
 Et caput Aeneae referes Lausique dolorum  
 Ultor eris mecum, aut, aperit si nulla viam vis,  
 865 Occumbes pariter; neque enim, fortissime, credo,  
 Iussa aliena pati et dominos dignabere Teucros.  
 Dixit, et exceptus tergo consueta locavit  
 Membra, manusque ambas iaculis oneravit acutis,  
 Aere caput fulgens, cristaque hirsutus equina.  
 870 Sic cursum in medios rapidus dedit. Aestuatur ingens  
 Uno in corde pudor mixtoque insania luctu,  
 [Et furiis agitatus amor et conscia virtus.]  
 Atque hic Aenean magna ter voce vocavit.  
 Aeneas agnovit enim, laetusque precatur:  
 875 Sic pater ille deum faciat, sic altus Apollo!  
 Incipias conferre manum.  
 Tantum effatus, et infesta subito obuius hasta.  
 Ille autem: Quid me erepto, saevissime, nato  
 Terres? haec via sola fuit, qua perdere posses.  
 880 Nec mortem horremus, nec divom parcimus ulli.  
 Desine: iam venio moriturus et haec tibi porto  
 Dona prius. Dixit, telumque intorsit in hostem;  
 Inde aliud super atque aliud figitque volatque  
 Ingenti gyro; sed sustinet aureus umbo.  
 885 Ter circum adstantem laevos equitavit in orbis,  
 Tela manu iaciens; ter secum Troius heros  
 Inmanem aërato circumfert tegmine silvam.  
 Inde ubi tot traxisse moras, tot spicula taedet  
 Vellere et urguetur pugna congressus iniqua,  
 890 Multa movens animo iam tandem erumpit et inter  
 Bellatoris equi cava tempora coniecit hastam.  
 Tollit se arrectum quadrupes et calcibus auras

Hom. II. 19, 399 sqq.] 861. *ῥαῖβός*, crura habens introrsus spectantia. At laudantur recta crura in equis. Sed raro equum reperiri aiunt periti omnibus numeris perfectum, atque illud quidem vitium etiam in praestantibus equis reperiri.] 862. *illa* rem optatam speratamque significat, ut 9, 481.] 863. *dolorum*, vulneris ac mortis L.] 870. *dedit*, v. 5, 276.] 871. *pudor*, cf. vs. 846—49. — Ceterum v. E. 10, 55.] 874. *agn. enim*: ita annectit poeta his verbis novum enuntiatum, ac si scripsisset *agnovit* (sine enim) *laetusque pr.* Sed illud *enim* hanc habet vim, ut significet id, quod facile existimari possit: „Aeneas agnovit vocem; qui enim non agnosceret vocem eius, quocum iam ante confixerat quemque occidere summopere cupiebat? laetusque precatur.“] 875. Faxint vero dii, ut tecum congrédi liceat!] 877. v. 6, 547.] 879. *Terres*, scilicet ferociter dictis.] 880. „Nec ego, si moriendum est, mortem horreo, nec tibi dii, quos invocas, quidquam profuerint mecum pugnanti.“ Scilicet non ipsis diis, sed ei, qui deos adiutores habet, pareitur.] 889. *volatque*, v. 9, 489.] 889. *iniqua*, pedes contra equitem.] 890. *inter temp.*, in media tempora; Liv. 8, 7 „Spiculum inter aures equi fixit.“] 892. *calcibus* anterioribus; Sil. It. 17, 135 „Quadru-

- Verberet, effusumque equitem super ipse secutus  
 Implicat, eiectoque incumbit cernuus armō.
- 895 Clamore incendunt caelum Troesque Latinique.  
 Advolat Aeneas, vaginaque eripit ensem,  
 Et super haec: Ubi nunc Mezentius acer et illa  
 Effera vis animi? Contra Tyrrhenus, ut auras  
 Suspiciens hausit caelum mentemque recepit:
- 900 Hostis amare, quid increpitas mortemque minaris?  
 Nullum in caede nefas; nec sic ad proelia veni;  
 Nec tecum meus haec pepigit mihi foedera Lausus.  
 Unum hoc, per, si qua est victis venia hostibus, oro:  
 Corpus humo patiāre tegi. Scio acerba meorum
- 905 Circumstare odia: hunc, oro, defende furorem;  
 Et me consortem nati concede sepulchro.  
 Haec loquitur, iuguloque haud inscius accipit ensem,  
 Undantique animam diffundit in arma cruore.

## A E N E I D O S

## LIBER UNDECIMUS.

(*Proximo die tropaeo constituto datisque induciis, qui in pugna ceciderant, sepeliuntur. Funus Pallantis. — Tristia responsa Diomedis, regis Arporum, quem in societatem armorum Latini addiscere conati erant. Drancis et Turni mutua iurgia. — Interea instructa acie accedit ad urbem Aeneas. — Dum Turnus suos in insidiis collocat, alteri parti exercitus praefecta imperiumque eo die cum Turno partita Camilla, regina Volscorum, rem gerit optime. Qua occisa fugiunt Itali ad urbem, quos accepto nuntio sequitur Turnus.*)

Oceanum interea surgens Aurora reliquit:  
 Aeneas, quamquam et sociis dare tempus humanis  
 Praecipitant curae turbataque funere mens est,

pedem elatis pulsantem calcibus auras.“| 893 sq. *sup. i. sec. Impl.*, ipse fusus super effusum equitem facit, ut is expedire se non possit. — *eiecto armō*, Donatus: „porrecto altero crure.“| 895. *incendere*, ut *φλέγειν* et *ἐπιφλέγειν*, saepe refertur ad magnitudinem vel vehementiam rei, quae incendi dicitur, ut *vires*, *luctum* *incendere* 5, 455. 9, 500; iam proprie *clamor* incenditur, poetae autem etiam *caelum* incendi clamore dicunt, i. e. impleri ingenti clamore.| 897. *super*, v. vs. 556.| 899. *hausit oculis*, cf. 12, 945 sq. et v. 1, 546.| 903. v. 2, 142.| 905. v. E. 7, 47. prohibe, ne ita saeviant in me, ut insepultum abiiciant.

**Aeneid. L. XI.** 1—99. *Proximo die Aeneas tropaeum constituit, tum defletum Pallantem multo cum honore ad urbem Euandri deportandum curat.*| 1. *interea*, v. 10, 1.| 3. *Praecip.*, valde urgent. — *turb. fun. m. est*, Servius „funere Pallantis κατ' ἐξοχήν“, nisi forte (uti equidem statuo) ea verba ita

- Vota deum primo victor solvebat Eoo.
- 5 Ingentem quercum decisis undique ramis  
Constituit tumulo fulgentiaque induit arma,  
Mezenti ducis exuvias, tibi, magne, tropaeum,  
Bellipotens; aptat rorantis sanguine cristas  
Telaque trunca viri et bis sex thoraca petitem
- 10 Perfossumque locis, clipeumque ex aere sinistrae  
Subligat, atque ensem collo suspendit eburnum.  
Tum socios, namque omnis eum stipata tegebat  
Turba ducum, sic incipiens hortatur ovanis:  
Maxuma res effecta, viri; timor omnis abesto,
- 15 Quod superest; haec sunt spolia et de rege superbo  
Primitiae, manibusque meis Mezentius hic est.  
Nunc iter ad regem nobis murosque Latinos.  
Arma parate animis, et spe praesumite bellum,  
Ne qua mora ignaros, ubi primum vellere signa
- 20 Adnuerint superi pubemque educere castris,  
Impediat, segnisve metu sententia tardet.  
Interea socios inhumataque corpora terrae  
Mandemus, qui solus honos Acheronte sub imo est.  
Ite, ait, egregias animas, quae sanguine nobis
- 25 Hanc patriam peperere suo, decorate supremis  
Muneribus, maestamque Euandri primus ad urbem  
Mittatur Pallas, quem non virtutis egentem  
Abstulit atra dies et funere mersit acerbo.  
Sic ait inlacrimans recipitque ad limina gressum,
- 30 Corpus ubi exanimi positum Pallantis Aeoctes  
Servabat senior, qui Parrhasio Euandro  
Armiger ante fuit, sed non felicibus aequae  
Tum comes auspiciis caro datus ibat alumno.  
Circum omnis famulumque manus Troianaque turba
- 35 Et maestum Iliades crinem de more solutae.

accipienda sunt, ac si poeta dixerit: eâque curâ turbata mens est. | 4. *V. deum*, v. 3, 717. — *pr. Eoo*, cf. 3, 588. | 6. *tumulo*, Servius „in colle. Sallust. de Pompeio: Devictis Hispanis tropaea in Pyrenaeis ingis constituit.“ | 9. *T. tr.*, fractas hastas, cf. 10, 882 sqq. | 11. *eburn.*, cf. 9, 305. | 15. *Q. s.*, de eo, quod reliquum est belli. — *de rege*, captae de r. | 16. *Primitiae*, quia inchoatum est bellum, nondum confectum. — hic, quem videtis manibus meis constitutum, Mezentius est; cf. vs. 173. | 18 sqq. animi vestri defixi sint in armis parandis (cf. 6, 105), ne, quando pugnandum erit, mora sit in vobis, et ne metus vos segnes reddat, tot estote in cogitatione futuri belli, cf. vs. 491 et 9, 158. | 21. *segn. sententia*, segne consilium. | 23. Homerus: τὸ γὰρ γέρας ἐστὶ θανάσιον. | 27. idem: οὐδέ τι ἀλλῆς δεινόμενον. | 29. Cum corpus Pallantis in domum regiam (vs. 36 et 38) illatum esset, Aeneae, qui proximo mane diis superis votum soluturus esset, cavendum fuit, ne contagione mortui ante funestaretur; quare reddito demum voto domum se recipit, quo post profectionem suam nondum pedem intulerat. | 30. *pos.*, v. 2, 644. | 31. v. 8, 344 et E. 2, 24. | 35. *Iliades*, puta, quae maritos suos secutae erant earumque filiae; sic haec conciliabis cum



- Ut vero Aeneas foribus sese intulit altis,  
 Ingentem gemitum tunsis ad sidera tollunt  
 Pectoribus, maestoque inmugit regia luctu.  
 Ipse, caput nivei fultum Pallantis et ora  
 40 Ut vidit levique patens in pectore volnus  
 Cuspидis Ausoniae, lacrimis ita fatur obortis:  
 Tene, inquit, miserande puer, cum laeta veniret,  
 Invidit Fortuna mihi, ne regna videres  
 Nostra, neque ad sedes victor veherere paternas?  
 45 Non haec Eúandro de te promissa parenti  
 Discedens dederam, cum me complexus euntem  
 Mitteret in magnum imperium, metuensque moneret,  
 Acris esse viros, cum dura proelia gente.  
 Et nunc ille quidem spe multum captus inani  
 50 Fors et vota facit, cumulatque altaria donis;  
 Nos iuvenem exanimum et nil iam caelestibus ullis  
 Debentem vano maesti comitamur honore.  
 Infelix, nati funus crudele videbis!  
 Hi nostri reditus, exspectatique triumphi?  
 55 Haec mea magna fides? At non, Euandre, pudendis  
 Volneribus pulsum aspicies; nec sospite dirum  
 Optabis nato funus pater. Hei mihi, quantum  
 Praesidium Ausonia et quantum tu perdis, Iule!  
 Haec ubi deflevit, tolli miserabile corpus  
 60 Inperat, et toto lectos ex agmine mittit  
 Mille viros, qui supremum comitentur honorem,  
 Intersintque patris lacrimis, solatia luctus  
 Exigua ingentis, misero sed debita patri.  
 Haud segnes alii cratis et molle feretrum  
 65 Arbuteis texunt virgis et vimine querno,  
 Exstructosque toros obtentu frondis inumbrant.  
 Hic iuvenem agresti sublimem stramine ponunt:  
 Qualem virgineo demessum pollice florem  
 Seu mollis violae, seu languentis hyacinthi,  
 70 Cui neque fulgor adhuc nec dum sua forma recessit,  
 Non iam mater alit tellus virisque ministrat.  
 Tum geminas vestes auroque ostroque rigentis  
 Extulit Aeneas, quas illi laeta laborum  
 Ipsa suis quondam manibus Sidonia Dido

9, 217 et 5, 711 sqq. 750. v. 5, 715. | 47. *in m. imp.*, ad parandum magnum imp. | 50. *donis*, prosiciis et ture. | 52. *vano*, quippe qui nihil ipsum iuvat. | 54. *nostri*, a nobis promissi. | 56. *nato* cum infamia *sospite*. | 59. *H. u. d.*, Servius „postquam haec cum lacrimis dixit.“ | 61. *supr. h. c.*, qui ultimum honorem ei haberent comitando. | 67. *agr. stram.*, intellige virentes herbas; Sil. 10, 561 sq. „mollesque virenti stramine composuere toros.“ | 69. v. E. 5, 38 („Pro molli v.“) et 6, 53. | 70. *Cui n. f. adh.*, recessit scilicet; cave suppleas est. | 72. *rig.*, v. 1, 426. | 73. *laeta laborum*, ut ἡβης ταρῆναι, et cf. vs. 280. |

- 75 Fecerat et tenui telas discreverat auro.  
Harum unam iuveni supremum maestus honorem  
Induit, arsurasque comas obnubit amictu;  
Multaque praeterea Laurentis praemia pugnae  
Aggerat et longo praedam iubet ordine duci.
- 80 Addit equos et tela, quibus spoliaverat hostem.  
Vinxerat et post terga manus, quos mitteret umbris  
Inferias, caeso sparsurus sanguine flammam;  
Indutosque iubet truncos hostilibus armis  
Ipsos ferre duces, inimicaque nomina figi.
- 85 Ducitur infelix aevo confectus Acoetes,  
Pectora nunc foedans pugnis, nunc unguibus ora,  
Sternitur et toto proiectus corpore terrae.  
Ducunt et Rutulo perfusos sanguine currus.  
Post bellator equus, positus insignibus, Aethon,
- 90 It lacrimans, guttisque humectat grandibus ora.  
Hastam alii galeamque ferunt; nam cetera Turnus  
Victor habet. Tum maesta phalanx Teucrique sequuntur  
Tyrrhenique omnes et versis Arcades armis.  
Postquam omnis longe comitum processerat ordo,
- 95 Substitit Aeneas, gemituque haec addidit alto:  
Nos alias hinc ad lacrimas eadem horrida belli  
Fata vocant: salve aeternum mihi, maxime Palla,  
Aeternumque vale. Nec plura effatus ad altos  
Tendebat muros gressumque in castra ferebat.
- 100 Iamque oratores aderant ex urbe Latina,  
Velati ramis oleae veniamque rogantes:  
Corpora, per campos ferro quae fusa iacebant,  
Redderet ac tumulo sineret succedere terrae;  
Nullum cum victis certamen et aethere cassis;
- 105 Parceret hospitibus quondam socerisque vocatis.

75. v. G. 3, 283. | 77. *altera veste obnubit comas*; v. 1, 701. | 81. *manus, quos*, v. E. 2, 71. | 82. *caeso sangu.*, v. 10, 520. | 84. *in n. f.*, Servius „dicit affixos tropaeis titulos cum nominibus occisorum.“ | 87. *prae doloris impatientia etiam proicit se caputque foedat pulvere.* — *terrae*, ut *humi*, v. G. 2, 290. | 88. *currus Pallantis*; eum currum rotae per stragem Rutulorum actae multo sanguine resperaserant. | 89. *pos. ins.*, sine phaleris. | 90. cf. Hom. Il. 17, 427. | 93. *omnesne Teucri Tyrrhenique?* ita est; nec adversatur huic rei vs. 60 sq. Nempe *mille viros* Aeneas delegerat, qui Pallantem prosequerentur ad Euandrum patrem; ceteri quoque cum funere processerant e castris, sed cum Aenea substitisse atque illuc revertisse existimandi sunt; et cf. vs. 171. | 95. *haec addidit* post ea scilicet, quae antea fecisse memoratur Aeneas, cf. 2, 593. 12, 358; alii *edidit*. — *gemitu*, v. 2, 323. | 96. Servius „ad ceteros sepeliendos, qui eodem proelio ceciderant.“ | 97. *Salve*, cf. Hom. Il. 23, 19. — Servius „Varro dicit ideo mortuis salve et vale dici, non quod aut valere aut salvi esse possint, sed quod ab his recedimus eos numquam visuri.“ | 100—138. *Oratores Latini inducias duodecim dierum impetrant ab Aenea ad suos sepeliendos.* | 101. *Vel. r.*, v. 7, 154. | 104. *aeth.*, v. 1, 546. | 105. *soceris*: quae ad reges (Latinum h. l.) pertinent, saepe refe-

- Quos bonus Aeneas, haud aspernanda precantis,  
 Prosequitur venia, et verbis haec insuper addit:  
 Quanam vos tanto fortuna indigna, Latini,  
 Implicuit bello, qui nos fugiatis amicos?
- 110 Pacem me exanimis et Martis sorte peremptis  
 Oratis? equidem et vivis concedere vellem.  
 Nec veni, nisi fata locum sedemque dedissent;  
 Nec bellum cum gente gero: rex nostra reliquit  
 Hospitia, et Turni potius se credidit armis.
- 115 Aequius huic Turnum fuerat se opponere morti;  
 Si bellum finire manu, si pellere Teucros  
 Apparat, his mecum decuit concurrere telis;  
 Vixet, cui vitam deus aut sua dextra dedisset.  
 Nunc ite et miseris supponite civibus ignem.
- 120 Dixerat Aeneas. Illi obstipuerunt silentes,  
 Conversique oculos inter se atque ora tenebant.  
 Tum senior semperque odiis et crimine Drances  
 Infensus iuveni Turno sic ore vicissim  
 Orsa refert: O fama ingens, ingentior armis,
- 125 Vir Troiane, quibus caelo te laudibus aequem?  
 Iustitiaene prius mirer, belline laborum?  
 Nos vero haec patriam grati referemus ad urbem,  
 Et te, si qua viam dederit fortuna, Latino  
 Iungemus regi. Quaerat sibi foedera Turnus.
- 130 Quin et fatalis murorum attollere moles  
 Saxaque subvectare humeris Troiana iuvabit.  
 Dixerat haec, unoque omnes eadem ore fremebant.  
 Bis senos pepigere dies, et pace sequestra  
 Per silvas Teucris mixtique inpune Latini
- 135 Erravere iugis. Ferro sonat alta bipenni  
 Fraxinus; evertunt actas ad sidera pinos;  
 Robora nec cuneis et olentem scindere cedrum,  
 Nec plaustris cessant vectare gementibus ornos.  
 Et iam Fama volans, tanti praenuntia luctus,
- 140 Euandrum Euandrique domos et moenia replet,  
 Quae modo victorem Latio Pallanta ferebat.

runtur ad populos.] 111. *Oratis*, v. G. 4, 453.] 115. *huic*, qua illi insontes caesi occubuerunt.] 117. *his telis*; similiter ut *huic morti* vs. 115: decuit Turnum, quo suorum parceret sanguini, mecum decertantem defungi solum hoc (*hesterno*) proelio.] 118. *deus*, v. 7, 498.] 122 sq. qui infensum Turno animum eo probabat, ut hunc semper odiis et criminationibus persequeretur. — *odiis*, dictis vel factis ab odio proficiscentibus, ut *inimicitiae*, *irae*, cet.] 126. ita Graeci *θauμάζω* s. *θαυμάζω* *σε τῆς ἀρετῆς*, et v. vs. 416.] 130. *fat.*, cf. vs. 112.] 131. *Troiana*, ad condendam urbem Troianam, quae tum inchoata tantum erat.] 139—181. *Advectum in urbem patriam corpus Pallantis Euander excipit oratione doloris plena, eademque erga Aeneam eiusque socios plend*

- Arcades ad portas ruere, et de more vetusto  
 Funereas rapuere faces; lucet via longo  
 Ordine flammaram et late discriminat agros.
- 145 Contra turba Phrygum veniens plangentia iungit  
 Agmina. Quae postquam matres succedere tectis  
 Viderunt, maestam incendunt clamoribus urbem.  
 At non Euandrum potis est vis ulla tenere;  
 Sed venit in medios. Feretro Pallanta reposto
- 150 Procubuit super atque haeret lacrimansque gemensque,  
 Et via vix tandem voci laxata dolore est:  
 Non haec, o Palla, dederas promissa parenti!  
 Cautius ut saevo velles te credere Marti!  
 Haud ignarus eram, quantum nova gloria in armis
- 155 Et praedulce decus primo certamine posset.  
 Primitiae iuvenis miserae, bellique propinqui  
 Dura rudimenta! et nulli exaudita deorum  
 Vota precesque meae! tuque, o sanctissima coniunx,  
 Felix morte tua, neque in hunc servata dolorem!
- 160 Contra ego vivendo vici mea fata, superstes  
 Restarem ut genitor. Troum socia arma secutum  
 Obruerent Rutuli telis! animam ipse dedissem,  
 Atque haec pompa domum me, non Pallanta, referret!  
 Nec vos arguerim, Teucri, nec foedera, nec quas
- 165 Iunximus hospitio dexteras: sors ista senectae  
 Debita erat nostrae. Quod si immatura manebat

*gratias.* | 142. *de m. vet.*, Servius „quia antea per noctem cadavera funera-  
 bantur cum faculis.“ Varro „Si filius familias extra Urbem decessit, liberti  
 amicum obuiam procedunt, et sub noctem in urbem infertur cereis faculis prae-  
 lucentibus.“ | 144. *et discr. agr.*, eximit agros ab ea, quae tegit cetera, caligine. |  
 145. alii *iungunt*, v. 4, 142. | 146. *succ. t.*, ingredi urbem. | 147. v. 10, 895. | 149 sq.  
*Iunge super Pallanta.* | 150. *haer.*, v. 10, 845. | 151. *dolore*, v. 2, 412. | 153.  
 In optando, cum significare volumus irritum esse quod optamus, in re praeterita,  
 quae Plusquamperfectum requirere videtur, Imperfectum ita ponitur, ut tempus  
 significetur, quod eo tempore, quo quid factum cupimus, praesens erat „Utinam  
*velles tum*, cum te Marti credidisti, cautius ei credere;“ infra vs. 161 sq.  
 „Troum socia arma secutum *Obruerent* Rutuli telis!“ i. e. me *debabant* telis  
 obruere *tum*, cum te obruerunt; adde 8, 643. | 154. In soluta oratione ita  
 haec adiungeres superiori enuntiato: „Quamquam haud ignarus eram.“ | 156. *Pr-*  
*imitiae*, principia, intellige prima virtutis bellicae specimina. — *b. prop.*, ad quod  
 propter ipsam scilicet propinquitatem missus est; solent autem pericula in pro-  
 pinquo adeunda, errore quodam mentis, minora videri, maiora, quae in longe  
 remotis terris suscipiuntur. | 158. *sanctos*, *sanctissimos* Romani saepe appella-  
 bant eos mortuos, quos summa caritate amplectebantur, ut parentes, coniuges. |  
 160. Consuetus et naturalis fatorum ordo cum sit, ut parentes prius, quam liberi,  
 moriantur, Euander vicit sua fata, diu vivendo ordinem illum pervertens. | 162.  
 v. vs. 153. 4, 678. 10, 854. | 164 sqq. „Non vos, inquit, Troiani, foedusque,  
 quod vobiscum pepigi, arguerim; nam fatalis necessitas hunc casum mihi attulit;  
 vellem etiam, quando semel moriendum fuit Pallanti, maius eum aliquod vobis  
 ante paravisse commodum; quin illud affirmarim, nihil ei honorificentius potuisse

- Mors gnatum, caesis Volscorum milibus ante  
Ducentem in Latium Teucros cecidisse iuaret.  
Quin ego non alio digner te funere, Pallā,  
170 Quam pius Aeneas, et quam magni Phryges, et quam  
Tyrrhenique duces, Tyrrhenum exercitus omnis.  
Magna tropaea ferunt, quos dat tua dextera leto;  
Tu quoque nunc stares inmanis truncus in armis,  
Esset par aetas et idem si robur ab annis,  
175 Turne. Sed infelix Teucros quid demoror armis?  
Vadite et haec memores regi mandata referte:  
Quod vitam moror invisam, Pallante perempto,  
Dextera caussa tua est, Turnum gnatoque patrique  
Quam debere vides. Meritis vacat hic tibi solus  
180 Fortunaeque locus. Non vitae gaudia quaero;  
Nec fas; sed gnato Manis perferre sub imos.  
Aurora interea miseris mortalibus almam  
Extulerat lucem, referens opera atque labores:  
Iam pater Aeneas, iam curvo in litore Tarchon  
185 Constituere pyras. Huc corpora quisque suorum  
More tulere patrum; subiectisque ignibus atris  
Conditur in tenebras altum caligine caelum.  
Ter circum accensos, cincti fulgentibus armis,  
Decurrere rogos; ter maestum funeris ignem  
190 Lustrare in equis, ululatusque ore dedere.  
Spargitur et tellus lacrimis, sparguntur et arma.  
It caelo clamorque virum clangorque tubarum.  
Hinc alii spolia occisis derepta Latinis  
Coniiciunt igni, galeas ensesque decoros  
195 Frenaque ferventisque rotas; pars munera nota,

accidere, quam tale funus, quod ei per Aenean eiusque socios contigit.“] 167. Volsci videntur nominari, quod res ab iis gerendas proximae pugnae poeta reservavit; nam adhuc soli Rutuli Latinique vim Pallantis senserant. Praeterea odium cladesque Volscorum postea nomini Romano infestissimorum tangere poeta videtur. | 168. *in Lat.*, in possessionem imperiumque Latii. | 171. v. E. 4, 6. | 172. v. E. 2, 71. | 173. v. vs. 83 et 5 sq. | 174. v. 1, 544. | 175. *infelix*, ut *miser*, dicitur interdum is, qui parum opportuna vel facit vel loquitur, cf. 2, 42. 5, 671. Soph. Ai. 1269 „δυστήνεις, ποῖ βλέπων ποτ' αὐτὰ καὶ θροεῖς.“ — *dem. armis*, detineo ab armis. | 179. *tibi iunge cum vacat, meritis cum locus*, i. e. locus ad merita, ut 9, 237, „locum insidiis conspeximus ipsi.“ Cic. de imp. Pomp. 24 „praesidia periculis sibi quaerere.“ — Restat tibi, optime de me iam merito, una haec res, qua feliciter peractā demereri me possis. | 180 sq. non vitae, i. e. mibi viventi, quaero gaudia, sed quaero s. cupio filio meo gaudia (iucundum nuntium) ad inferos perferre; et cf. 2, 587. || 182—224. *Troiani, Etrusci, Latini supremis honoribus prosequuntur, quos pugna caesos amiserunt. Praecipuus luctus in urbe Laurentina; Turnus ibidem in magnam invidiam adductus.* | 182. *mis. m.*, v. 2, 268. | 186. *atris*, v. G. 2, 309. | 188. Talis decursio est iam apud Hom. Il. 23, 13. | 189 sq. v. G. 1, 479. | 194. *igni*, v. E. 2, 30. | 195. *ferv.*, Servius „non quae modo fervent, sed quae solent fervere.“ Hoc epitheto haud satis commode delecto usus videtur poeta, ut bellicorum

- Ipsorum clipeos et non felicia tela.  
 Multa boum circa mactantur corpora Morti,  
 Saetigerosque sues raptasque ex omnibus agris  
 In flammam iugulant pecudes. Tum litore toto  
 200 Ardentis spectant socios, semiustaque servant  
 Busta, neque avelli possunt, nox humida donec  
 Invertit caelum stellis ardentibus aptum.  
 Nec minus et miseri diversa in parte Latini  
 Innumeras struxere pyras; et corpora partim  
 205 Multa virum terrae infodiunt, avectaque partim  
 Finitimos tollunt in agros ubique remittunt;  
 Cetera confusaeque ingentem caedis acervum  
 Nec numero nec honore cremant; tunc undique vasti  
 Certatim crebris conlucent ignibus agri.  
 210 Tertia lux gelidam caelo dimoverat umbram:  
 Maerentes altum cinerem et confusa ruebant  
 Ossa focis tepidoque onerabant aggere terrae.  
 Iam vero in tectis, praedivitis urbe Latini,  
 Praecipuus fragor et longi pars maxuma luctus.  
 215 Hic matres miseraeque nurus, hic cara sororum  
 Pectora maerentum, puerique parentibus orbi,  
 Dirum exsecrantur bellum Turnique hymenaeos;  
 Ipsum armis, ipsumque iubent decernere ferro,  
 Qui regnum Italiae et primos sibi poscat honores.  
 220 Ingravat haec saevus Drances, solumque vocari  
 Testatur, solum posci in certamina Turnum.  
 Multa simul contra variis sententia dictis  
 Pro Turno; et magnum reginae nomen obumbrat;  
 Multa virum meritis sustentat fama tropaeis.  
 225 Hos inter motus, medio in flagrante tumultu,  
 Ecce super maesti magna Diomedis ab urbe  
 Legati responsa ferunt: nihil omnibus actum

curruum, quorum quidem summa est concitatio, rotas apertius significaret. — *nota*, significantur arma ab ipsis, dum erant in vivis, geri solita, cf. 6, 221. | 199. v. 12, 214. | 200. *servant*, ut *domum servare* s. non abscedere domo, *οἰκοφυλακείν*. | 201. Donatus „Primo *pyrae* dicuntur et *rogi*; ubi vero arserunt, *busta* vocantur.“ | 202. v. 2, 250 et 4, 482. | 205 sq. partim terrae infodiunt singulos nobiliores ibi, ubi ceciderant, partim avehunt (*tollunt*) in finitimos agros et in suam quemque urbem. | 208. *Nec num. n. h.*, ductum hoc ab eo, quod, quorum nulla esset dignatio, eos Romani nullo numero atque honore esse dicebant. | 210. Servius „mos erat tertia die ossa crematorum legi.“ | 211 sq. eruebant cineres ossaque corporum combustorum e focis, i. e. e cineribus rogorum; cf. Tibull. 2, 3, 17—25. | 212. *tep.*, ab incendio rogorum adhuc tepenti. | 213. *tecta* opponuntur campo, in quo gesta sunt ea, de quibus modo expositum est a poeta. | 220. cf. vs. 115 sqq. | 223. *obumbrat*, tuetur; Liv. 7, 30 „Itaque *umbra* vestri auxilii, Romani, tegi possumus.“ | 225—295. *Venulus, eo ipso tempore Arpis reversus, renuntiat legationem*; cf. 8, 9 sqq. | 226. *super*, v. 7, 462. | 227 sq. *omnibus Tant. inp. op.*, omni eaque maximâ operâ in legationem

- Tantum impensis operum; nil dona neque aurum  
 Nec magnas valuisse preces; alia arma Latinis  
 230 Quaerenda, aut pacem Troiano ab rege petendum.  
 Deficit ingenti luctu rex ipse Latinus.  
 Fatalem Aenean manifesto numine ferri  
 Admonet ira deum tumulique ante ora recentes.  
 Ergo concilium magnum primosque suorum  
 235 Inperio accitos alta intra limina cogit.  
 Olli convenere fluuntque ad regia plenis  
 Tecta viis. Sedet in mediis et maxumus aeo  
 Et primus sceptris, haud laeta fronte, Latinus.  
 Atque hic legatos Aetola ex urbe remissos,  
 240 Quae referant, fari iubet, et responsa reposcit  
 Ordine cuncta suo. Tum facta silentia linguis,  
 Et Venulus dicto parens ita farier infit:  
 Vidimus, o cives, Diomede Argivaeque castra,  
 Atque iter emensi casus superavimus omnis,  
 245 Contigimusque manum, qua concidit Iliæ tellus.  
 Ille urbem Argyripam patriae cognomine gentis  
 Victor Gargani condebat Iapygis arvis.  
 Postquam introgressi et coram data copia fandi,  
 Munera praeferimus, nomen patriamque docemus;  
 250 Qui bellum intulerint, quae caussa attraxerit Arpos.  
 Auditis ille haec placido sic reddidit ore:  
 O fortunatae gentes, Saturnia regna,  
 Antiqui Ausonii, quae vos fortuna quietos  
 Sollicitat, suadetque ignota lacescere bella?  
 255 Quicumque Iliacos ferro violavimus agros, —  
 Mitto ea, quae muris bellando exhausta sub altis,

impensâ; et cf. vs. 244.] 230. Alii *petendam*; Lucret. 1, 112 „Aeternas quoniam poenas in morte timendum.“ Atque etiam Livius (26, 43) in oratione Scipionis maioris hunc archaismum sibi retinendum putavit „ad unam urbem oppugnandum.“] 231. *Deficit* animo.] 232. secundum fata Aeneam venire in Italiam, idque manifesta voluntatis deorum significatione prodi.] 235. *Inperio*, suo iussu.] 238. *pr. sceptr.*, Servius „primus inter sceptriferos; namque apud maiores omnes duces cum sceptris ingrediebantur curiam.“] 241. *cuncta*, ut ne quid reticeretur.] 243. *Diomede* graece formatus Accusativus; *Τυδῆ* Hom. Il. 4, 384, *Ὀδυσῆ* Od. 19, 136. — *Arg. c.*, i. e. urbem ab Argivis conditam munitamque (Argyrippam s. Arpos), cf. vs. 351. 10, 4.] 245. cf. 8, 124. — *tellus*, urbs, ut *χθων*.] 246. *patr. c. g.*, significatur Argos Hippium in Peloponneso; Diomedes autem, patriâ Aetolus, Adrasti filia Aegialea in matrimonium ducta rex Argivorum factus erat.] 247. *Victor*: arma cum Dauno rege adversus Messapios iunxerat ea conditione, ut partem agri eorum acciperet. — *Garganus*, mons Apuliae, quae etiam Iapygia a poetis appellatur.] 249. *praeq.*, prae nobis ferimus, ea primum tradituri.] 250. *attrax.* nos.] 251. *sic*, ut 3, 463, asseverat sententiam loquentis cum fide expressam esse.] 254. *ignota b.*, cum ignotis hominibus, quorum quae sit virtus, quae rerum fiducia, ignoratis.] 255. *violare*, rem sacram nefarie attrectare, unde secutae poenae vs. 258; et significantur Troiani, ut erant *ῥεοοε-*

- Quos Simois premat ille viros — infanda per orbem  
 Supplicia et scelerum poenas expendimus omnes,  
 Vel Priamo miseranda manus; scit triste Minervae  
 260 Sidus et Euboicae cautes ultorque Caphereus.  
 Militia ex illa diversum ad litus abacti  
 Atrides Protei Menelaus adusque columnas  
 Exsulat, Aetnaeos vidit Cycloпас Ulixes.  
 Regna Neoptolemi referam, versosque penatis  
 265 Idomenei? Libycone habitantis litore Locros?  
 Ipse Mycenaеus magnorum ductor Achivom  
 Coniugis infandae prima intra limina dextra  
 Oppetiit; devictam Asiam subsemit adulter.  
 Invidisse deos, patriis ut redditis aris  
 270 Coniugium optatum et pulchram Calydonā viderem?  
 Nunc etiam horribili visu portenta sequuntur,  
 Et socii amissi petierunt aethera pennis  
 Fluminibusque vagantur aves — heu dira meorum  
 Supplicia! — et scopulos lacrimosis vocibus implent.  
 275 Haec adeo ex illo mihi iam speranda fuerunt  
 Tempore, cum ferro caelestia corpora demens  
 Adpetiit et Veneris violavi vulnere dextram.  
 Ne vero, ne me ad talis impellite pugnas.  
 Nec mihi cum Teucris ullum post eruta bellum  
 280 Pergama; nec veterum memini laetorve malorum.  
 Munera, quae patriis ad me portatis ab oris,  
 Vertite ad Aenean. Stetimus tela aspera contra,  
 Contulimusque manus: experto credite, quantus  
 In clipeum adsurgat, quo turbine torqueat hastam.  
 285 Si duo praeterea talis Idaea tulisset

βέστατοι, ita esse θεοφιλέστατοι. | 257. ille de re remota, dort, ἐκεῖ, unde ἐκεῖνος factum. — Ceterum v. G. 4, 393. | 259. Minervae sidus, tempestas a Minerva excitata, cf. 1, 39 sq. sidera autem causae tempestatum existimantur, cf. 4, 578. | 260. ultor refer ad vs. 258. — Caphereus, promontorium Euboeae, naufragiis infame. | 261. div., v. 3, 4. — alii adacti. | 262. Protei, v. E. 6, 78. — Prot. column., Pharum insulam et oras Aegypti, cf. Hom. Odys. 4, 354 sq. et 363—365; eas autem columnas Protei dixit ita, ut extremas terrae plagas significaret, quemadmodum Herculis columnae extremas versus occidentem terras significare solebant. | 264. Regna N., cf. 3, 295 sq. 325 sqq. | 265. Idom., cf. 3, 121 sq. — Locr., Aiakis Oilei comites. | 267. pr. intra l., ipso aedium ingressu. De tempore, loco, ratione perpetrati eius sceleris alii alia tradunt. | 268. Dev. As., i. e. victorem Asiae. — subs., insidiis excepit oppressitque Aegisthus. | 269. repete referam? e vs. 264. | 271. visu, specie; Horat. Serm. 1, 5, 84 „immundo somnia visu.“ | 272. aves Diomedae, cf. Ovid. Met. 14, 494 sqq. | 273. Fluminibus, circum flumina, v. E. 7, 66. | 275. adeo, v. 4, 533. — spor., v. 1, 543. | 277. Hom. Il. 5, 330 sqq. | 280. nec memini, arceo animum a memoria horum laborum s. recuso meminisse; et v. vs. 73. et 126. | 284. qui gladio petebant hostem, altius efferre clipeum solebant atque etiam umbone urgere adversarium, cf. 12, 712 et 724. „umbonibus incussaе ala (axilla) sternuntur



- Terra viros, ultro Inachias venisset ad urbes  
 Dardanus et versis lugeret Graecia fatis.  
 Quidquid apud durae cessatum est moenia Troiae,  
 Hectoris Aeneaeque manu victoria Graium  
 290 Haesit et in decumum vestigia rettulit annum.  
 Ambo animis, ambo insignes praestantibus armis;  
 Hic pietate prior. Coeant in foedera dextrae,  
 Qua datur; ast armis concurrant arma cavete.  
 Et responsa simul quae sint, rex optume, regis  
 295 Audisti, et quae sit magno sententia bello.  
 Vix ea legati: variusque per ora cucurrit  
 Ausonidum turbata fremor; ceu saxa morantur  
 Cum rapidos amnis, fit clauso gurgite murmur,  
 Vicinaeque fremunt ripae crepitantibus undis.  
 300 Ut primum placati animi, et trepida ora quierunt,  
 Praefatus divos solio rex infat ab alto:  
 Ante equidem summa de re statuisset, Latini,  
 Et vellem, et fuerat melius; non tempore tali  
 Cogere concilium, cum muros adsidet hostis.  
 305 Bellum inopportuno, cives, cum gente deorum  
 Invictisque viris gerimus, quos nulla fatigant  
 Proelia, nec victi possunt absistere ferro.  
 Spem si quam adscitis Aetolum habuistis in armis,  
 Ponite; spes sibi quisque; sed haec quam angusta, videtis;  
 310 Cetera qua rerum iaceant perculsa ruina,  
 Ante oculos interque manus sunt omnia vestras.  
 Nec quemquam incuso: potuit quae plurima virtus  
 Esse, fuit; toto certatum est corpore regni.  
 Nunc adeo, quae sit dubiae sententia menti,  
 315 Expediam et paucis — animos adhibete — docebo.  
 Est antiquus ager Tusco mihi proximus amni,  
 Longus in occasum, finis super usque Sicanos;

hostes“ Liv. 9, 41. 30, 34. | 286. *In*, v. 7, 372. | 287. *Dardanus*, Dardanius, Troiani. | 288. *Quidq.*, quantum temporis. | 290. *vestigia* (pedem) *rett.*, dilata est. | 295. *magno bello*, sextus casus: cum bellum sit magnum; s. quae sit sententia, conveniens illa quidem magnitudini belli. || 296—335. *Audita legatione varioque fremitu excepta Latinus rex pacem suadet condicionesque pacis proponit.* | 296 sqq. cf. Hom. 2, 144 sqq. — *Vix ... quae*, v. 2, 692. | 297. *Aus.*, v. 2, 242. | 298. *cl. gurg.*, praeccluso aquarum cursu. | 301. *Praef. div.* Servius „Antiqui, ut Cato, Gracchus, nullam orationem nisi invocatis numinibus inchoabant.“ adde Plin. Paneg. 1. | 305. *gente*, cf. 10, 228. | 307. *nec possunt*, Servius „eos a bellis discedere natura ipsorum non patitur.“ v. G. 3, 453 et cf. Liv. 27, 14. | 308. *Aet.*, v. vs. 246. | 311. manifestum est. | 314. *adeo*, v. 4, 533. — *dubiae*, expendenti omnia. | 316. *Tusc. amni*, cf. G. 1, 499. | 317. longe patens in occasum et trans fines usque Sicanorum productus. De eo agro v. 9, 274. Nec dubium est, quin poeta respexerit ad rem a Catone narratam; Servius „Cato in Originibus dicit Troianos a Latino accepisse agrum, qui est inter Laurentum et castra Troiana; etiam modum agri commemorat, eum habuisse iugera

- Aurunci Rutulique serunt et vomere duros  
 Exercent collis, atque horum asperrima pascunt.  
 320 Haec omnis regio et celsi plaga pinea montis  
 Cedat amicitiae Teucrorum; et foederis aequas  
 Dicamus leges, sociosque in regna vocemus;  
 Considant, si tantus amor, et moenia condant.  
 Sin alios finis aliamque capessere gentem  
 325 Est animus, possuntque solo decedere nostro:  
 Bis denas Italo texamus robore navis,  
 Seu pluris conplere valent; iacet omnis ad undam  
 Materies; ipsi numerumque modumque carinis  
 Praecipiant; nos aera, manus, navalia demus.  
 330 Praeterea, qui dicta ferant et foedera firment,  
 Centum oratores prima de gente Latinos  
 Ire placet pacisque manu praetendere ramos,  
 Munera portantis aurique eborisque talenta  
 Et sellam regni trabeamque insignia nostri.  
 335 Consulite in medium et rebus succurrite fessis.  
 Tum Drances, idem infensus, quem gloria Turni  
 Obliqua invidia stimulisque agitabat amaris,  
 Largus opum, et lingua melior, sed frigida bello  
 Dexterâ, consiliis habitus non futilis auctor,  
 340 Seditione potens; genus huic materna superbum  
 Nobilitas dabat, incertum de patre ferebat;  
 Surgit et his onerat dictis atque aggerat iras:  
 Rem nulli obscuram nostrae nec vocis egentem  
 Consulis, o bone rex; cuncti se scire fatentur,  
 345 Quid fortuna ferat populi; sed dicere mussant.  
 Det libertatem fandi, flatusque remittat,  
 Cuius ob auspiciu infaustum moresque sinistros —

DCC" (rectius alii codd. „duo millia septingenta.“). — *Sican.*, v. 8, 328. | 318. *Aur. Rut. s.*, videtur ager ab his conductus significari, cf. 12, 520. | 321. *aequ.*, ut aequali iure nobiscum utantur, cf. 7, 256 sq. | 324. terram alius gentis capessere. | 325. *possunt*, si licet per fata. | 328. *modum*, τὸ μέτρον, quam longas, altas, amplas esse velint. | 329. *manus*, operas. — *navalia*, picem, ceram, funes, vela, ait Servius. | 331. *pr. d. g.*, genere nobilissimos. | 332. v. 7, 154. | 333. *talenta* de pondere h. l. accipies. | 334. *sell. r.*, sellam curulem; inter dona Masinissae regi a senatu Romano missa fuit „toga praetexta cum curuli sella“ Liv. 31, 11. adde 42, 14. | 335. *in med.*, in communem utilitatem. — *fess.*, v. 3, 145. || 336—375. *Drancis oratio paci amica, Turno inimica.* | 336. Ex consuetudine dicas „infensus, invidus, *idem* largus“ *et.*; retractum est hoc *idem* eodem modo, quo 9, 327 „Rex *idem* et regi Turno gratissimus augur,“ i. e. rex *idem*que augur; adde 3, 80. | 337. *Obl. inv.*, Servius „non ex aperto impugnabat Turnum, sed eum reipublicae simulata defensione lacerabat.“ | 338. *fr. b. Dext.*, v. 5, 754. | 340. *Sed. p.*, potentiam sibi quaerens ex movendis seditionibus. — Incerta fama sororem Latini fert Drancis matrem fuisse, hominem de rure patrem. | 342. *onerat* Turnum. | 345. *ferat*, tamquam faciendum ferat, ergo postulet, fieri iubeat; Cic. Ep. ad Fam. 1, 7, 15 „quid res, quid causa, quid tempus *ferat*, optime perspicies.“ | 347. *auspiciu*, quod more Romano

- Dicam equidem, licet arma mihi mortemque minetur —  
 Lumina tot cecidisse ducum totamque videmus  
 350 Consedis urbem luctu, dum Troia temptat  
 Castra, fugae fidens, et caelum territat armis.  
 Unum etiam donis istis, quae plurima mitti  
 Dardanidis dicique iubes, unum, optume regum,  
 Adicias, nec te ullius violentia vincat,  
 355 Quin natam egregio genero dignisque hymenaeis  
 Des, pater, et pacem hanc aeterno foedere iungas.  
 Quod si tantus habet mentes et pectora terror,  
 Ipsum obtestemur, veniamque oremus ab ipso:  
 Cedat, ius proprium regi patriaeque remittat.  
 360 Quid miseros totiens in aperta pericula civis  
 Proicis, o Latio caput horum et caussa malorum?  
 Nulla salus bello; pacem te poscimus omnes,  
 Turne, simul pacis solum inviolabile pignus.  
 Primus ego, invisum quem tu tibi fingis, et esse  
 365 Nil moror, en supplex venio. Miserere tuorum,  
 Pone animos, et pulsus abi. Sat funera fusi  
 Vidimus, ingentis et desolavimus agros.  
 Aut, si fama movet, si tantum pectore robur  
 Concipis, et si adeo dotalis regia cordi est,  
 370 Aude atque adversum fidens fer pectus in hostem.  
 Scilicet, ut Turno centingat regia coniunx,  
 Nos, animae viles, inhumata infletaque turba,  
 Sternamur campis. Etiam tu, si qua tibi vis,  
 Si patrii quid Martis habes, illum aspice contra,  
 375 Qui vocat.  
 Talibus exarsit dictis violentia Turni;  
 Dat gemitum, rumpitque has imo pectore voces:  
 Larga quidem, Drance, semper tibi copia fandi  
 Tum, cum bella manus poscunt; patribusque vocatis  
 380 Primus ades. Sed non replenda est curia verbis,

erat penes eum, qui bellum administrabat. — *mor. sin.*, significatur pertinacia Turni, qui noluerat obtemperare Latino. | 350. *Consed.*, demersam esse. | 351. *fugae f.*, cf. 10, 665. | 351. *cael. t. armis*, de eo dictum, qui stulte ferox terret omnia, ut ipsum caelum timor occupare videatur. | 353. *dici*, promitti, naves puta agrosque. | 354. *vincat*, tantum valeat, ut te prohibeat, quominus *cet.* | 356. *pater* hic, ut vs. 410, honoris est vocabulum, de quo v. 9, 449, item *mater* 12, 74. | 357. Quodsi, quominus hoc fiat, communis metus Turni obstat. | 359. *proprium*, suum. — *patriae*, cuius quantum intersit, ut Aeneae detur Lavinia, disces ex 7, 96—101. | 363. significatur Laviniae coniugium cum Aenea. | 364. *invisum*, inimicum. — Servius „hoc dicit: Non sum quidem inimicus; sed si velis (putes) esse, non recuso.“ | 366. *puls. a.*, cf. vs. 392 sqq. — *Sat f. Vid.*, *sat videre*, ut *sat esse*, *sat habere*, unius verbi instar est, Theocr. 10, 13 „ἐγὼ δ' ἔχω οὐδ' ἄλλης ὄψεος.“ | 367. v. 10, 310. | 373. Servius „Etiam est hortantis adverbium hoc loco.“ nostrum *doch.* | 374. *adsp. c.*, ἀντὶν εἰσιδέειν Hom. II. 19, 15, quod est signum audaciae. | 375. v. G. 3, 194. | 376—443.

- Quae tuto tibi magna volant, dum distinet hostem  
 Agger moerorum, nec inundant sanguine fossae.  
 Proinde tona eloquio; solitum tibi; meque timoris  
 Argue tu, Drance, quando tot stragis acervos  
 385 Teucrorum tua dextra dedit, passimque tropaeis  
 Insignis agros. Possit quid vivida virtus,  
 Experiare licet; nec longe scilicet hostes  
 Quaerendi nobis; circumstant undique muros.  
 Imus in adversos! quid cessas? an tibi Mavors  
 390 Ventosa in lingua pedibusque fugacibus istis  
 Semper erit?  
 Pulsus ego? aut quisquam merito, foedissime, pulsum  
 Arguet, Iliaco tumidum qui crescere Thybrim  
 Sanguine et Euandri totam cum stirpe videbit  
 395 Procubuisse domum, atque exutos Arcadas armis?  
 Haud ita me experti Bitias et Pandarus ingens,  
 Et quos mille die victor sub Tartara misi,  
 Inclusus muris hostilique aggere saeptus.  
 „Nulla salus bello.“ Capiti cane talia, demens,  
 400 Dardanio rebusque tuis. Proinde omnia magno  
 Ne cessa turbare metu atque extollere viris  
 Gentis bis victae, contra premere arma Latini.  
 Nunc et Myrmidonum proceres Phrygia arma tremescunt,  
 Nunc et Tydides et Larissaeus Achilles,  
 405 Amnis et Hadriacas retro fugit Aufidus undas.  
 Vel cum se pavidum contra mea iurgia fingit  
 Artificis scelus et formidine crimen acerbatur:  
 Numquam animam talem dextra hac — absiste moveri —  
 Amittes; habitet tecum et sit pectore in isto.  
 410 Nunc ad te et tua magna, pater, consulta revertor.

*Turni oratio confutans argumenta criminationesque Drancis.* | 382. cf. 10, 24. | 389. *Imus in adv.* inest vis exhortandi in ea enuntiatione: age eamus. | 396. cf. 9, 672 sqq. | 397. *die*, intra unum diem, ut *menſe*, *anno*. | 399. *cane*, v. 9, 621. | 400. *Proinde*, quoniam ita sentis, nullam a bello salutem sperari posse. | 402. v. 9, 599. | 405. *Amnis ... undas*: proverbialis sermo de eo, quod fieri nequit. Quod Euripides universe dixit „*ἄνω πῶτα μὲν ἐπεὶ ὡς ἔοικε πηγάς*“, id ad certum fluvium transtulit Virgilius, quia Aufidus, qui est Apuliae, regnum Diomedis (Tydidæ) attigit; certe campi Diomedei qui sunt ad Aufidum, ab illo habent nomen. | 406 sq. Simillime Horat. Epod. 12, 13 „*Vel mea cum saevis agitat fastidia verbis*“. Utroque loco *vel* eam habet potestatem, ut transiri ad aliud quid indicet; *cum* ponitur in repraesentanda rerum memoria, quemadmodum in his: *vidi cum*, *audivi cum*, et cf. vs. 348. Donatus supplet apodosin „quale illud scelerati commentum est;“ et v. G. 3, 562; sed rectius versum 408 sq. pro apodosi accipies, aut si quid est supplendum, supple, quod aliquando omittitur, *scito*, ἴσθι, ut apud Liv. 2, 12 „Quandoquidem est apud te virtuti honos, ... trecenti coniuravimus“, i. e. scito trecentos coniurasse. — Ceterum hoc dicit Turnus: nihil Dranci metuendum fuisse, nisi iurgia; quod cum probe sciret Drances, tamen eum de caede ab illo sibi intentanda suspicionem iniecisſe et

- Si nullam nostris ultra spem ponis in armis,  
 Si tam deserti sumus, et semel agmine verso  
 Funditus occidimus, neque habet Fortuna regressum,  
 Oremus pacem et dextras tendamus inertis.
- 415 Quamquam o si solitae quicquam virtutis adesses!  
 Ille mihi ante alios fortunatusque laborum  
 Egregiusque animi, qui, ne quid tale videret,  
 Procubuit moriens et humum semel ore momordit.  
 Sin et opes nobis et adhuc intacta iuventus,
- 420 Auxilioque urbes Italae populique supersunt,  
 Sin et Troianis cum multo gloria venit  
 Sanguine: — sunt illis sua funera, parque per omnis  
 Tempestas — cur indecores in limine primo  
 Deficimus? cur ante tubam tremor occupat artus?
- 425 Multa dies varique labor mutabilis aevi  
 Rettulit in melius; multos alterna revisens  
 Lusit et in solido rursus Fortuna locavit.  
 Non erit auxilio nobis Aetolus et Arpi:  
 At Messapus erit felixque Tolumnius et quos
- 430 Tot populi misere duces; nec parva sequetur  
 Gloria delectos Latio et Laurentibus agris.  
 Est et Volscorum egregia de gente Camilla,  
 Agmen agens equitum et florentis aere catervas.  
 Quod si me solum Teucri in certamina poscunt,
- 435 Idque placet, tantumque bonis communibus obsto,  
 Non adeo has exosa manus Victoria fugit,  
 Ut tanta quicquam pro spe temptare recusem.  
 Ibo animis contra, vel magnum praestet Achillen  
 Factaque Volcani manibus paria induat arma
- 440 Ille licet. Vobis animam hanc soceroque Latino  
 Turnus ego, haud ulli veterum virtute secundus,

simulata formidine acerbissimum crimen commentum esse. | 412. *des.*, cf. vs. 419 sq. 428 sqq. | 415 sqq. „Utinam tamen solitae virtutis quidquam adesses! quae cui adest, is eum iudicat felicissimum, qui ante conceptum dedecus occubuit.“ Sed hoc ita dicit Turnus, ut a generali sententia oratio ad unum ipsum deflectat. | 416. *mihi*, iudicio meo, cf. G. 1, 491. — *fort. laborum*, τοῦ πολυπόνου βίου; „et est, ait Servius, Graecum εὐτυχεῖς τῶν πόνων;“ similiter μακαρίζειν τινα τινος. | 417. *Egreg. an.*, qui est egregii animi, v. G. 4, 491. | 418. *semel* dicitur de eo, quod, cum semel factum est, mutari iam nequit; Propert. 4, 11, 3 „Cum *semel* infernas intrarunt funera leges.“ — Homerus: ὁδὰς ἔλεν οὐδας. | 420. *Italae*, cf. vs. 428 sqq. — *supers.*, v. E. 6, 6. | 424. *Def.*, v. vs. 231. — *ante tubam* auditam. | 425. *var. l. m. ae.*, labor alio tempore alius, i. e. qui ante irritus fuit, post prospere procedit. | 426 sq. Fortuna, vices rerum alternans ac modo peior, modo melior veniens, eundem nunc decipit, nunc iuvat. | 428. v. vs. 246. | 430. Alii *nec tarda s.* | 433. v. 7, 804. | 437. *tanta pro spe*, ut dicar solus commodum publicum (bona communia) tuitus esse. | 438. *animis*, fidenti fortique animo. — *praestet*, exhibeat, par ei sit. | 439. *paria* armis

Devoſi. „Solum Aeneas vocat.“ Et vocet oro;  
Nec Drances potius, ſive eſt haec ira deorum,  
Morte luat, ſive eſt virtus et gloria, tollat.

- 445 Illi haec inter ſe dubiis de rebus agebant  
Certantes: caſtra Aeneas aciemque movebat.  
Nuntius ingenti per regia tecta tumultu  
Ecce ruit, magnisque urbem terroribus inplet:  
Inſtructos acie Tiberino a flumine Teucros  
450 Tyrrhenamque manum totis descendere campis.  
Extemplo turbati animi concuſſaque volgi  
Pectora et arrectae ſtimulis haud mollibus irae.  
Arma manu trepidi poſcunt; fremit arma iuventus,  
Flent maesti muſſantque patres. Hic undique clamor  
455 Diſſenſu vario magnus ſe tollit ad auras:  
Haud ſecus, atque alto in luco cum forte catervae  
Conſedere avium, piſcoſove amne Padusae  
Dant ſonitum rauci per ſtagna loquacia cycni.  
Immo, ait, o cives, arrepto tempore Turnus,  
460 Cogite concilium et pacem laudate ſedentes:  
Illi armis in regna ruunt. Nec plura locutus  
Corripuit ſeſe et tectis citus extulit altis.  
Tu, Voluſe, armari Volſcorum edice maniplis;  
Duc, ait, et Rutulos. Equitem, Meſſapus, in armis,  
465 Et cum fratre Coras, latis diffundite campis.  
Pars aditus urbis firmet, turrisque capessat;  
Cetera, qua iuſſo, mecum manus inferat arma.  
Ilicet in muros tota diſcurritur urbe.  
Concilium ipſe pater et magna incepta Latinus  
470 Deſerit ac tristi turbatus tempore differt,  
Multaque ſe incuſat, qui non acceperit ultro  
Dardanium Aenean generumque adſciverit urbi.

Achillis.] 448 ſq. acerba irriſio: nec Drances potius pugnet cum Aenea et, ſive qua ira deorum intercedit in hoc certamine, eam iram morte ſua luat, ſive parata eſt virtutis gloria, eam gloriam auferat.]] 445—531. *Interea repente allato nuntio Aenean inſtructa acie adventare trepidatur tota urbe; concilium dirimitur; concurritur ad defendenda moenia. Turnus arrepta pugnandi opportunitate Camillam cum Meſſapo equitibus praeficit praemiſſisque hoſtium equitibus opponit; ipſe, itineri Aeneas inſidiaturus, montes ſilvaſque occupat.*] 452. cf. vs. 728.] 453. manu, Servius „praeter vocem geſtum etiam flagitantis expreſſit.“] 458. loqu., cf. 12, 475.] 459. Immo, Donatus „Quid trepidatis? inquit, habetis tempus otioſum; ſedete potius et bona pacis quietemque laudate, dum illi armis optata poſſideant.“ — *arr. temp.*, ſtatim uſus commoditate rei; Luc. 10, 508 „tempore rapto Caesar ſemper feliciter uſus.“] 461. Illi, dum vos eſtis otioſi, rem gerunt armis, quibus ſcilicet gerenda ſunt talia.] 464 ſq. *Meſſapus et Coras* Nominativi pro Vocativis Graeco exemplo. — *in arm.* v. 5, 440.] 465. *cum fr.*, Catillo, 7, 762.] 467. *iuſſo*, iuſſero.] 472. *urbi*,

- Praefodiunt alii portas, aut saxa sudesque  
 Subvectant. Bello dat signum rauca cruentum  
 475 Bucina. Tum muros varia cinxere corona  
 Matronae puerique; vocat labor ultimus omnis.  
 Nec non ad templum summasque ad Palladis arces  
 Subvehitur magna matrum regina caterva,  
 Dona ferens, iuxtaque comes Lavinia virgo,  
 480 Causa mali tanti, oculos delecta decoros.  
 Succedunt matres et templum ture vaporant,  
 Et maestas alto fundunt de limine voces:  
 Armipotens, praeses belli, Tritonia virgo,  
 Frange manu telum Phrygii praedonis, et ipsum  
 485 Pronum sterne solo portisque effunde sub altis.  
 Cingitur ipse furens certatim in proelia Turnus.  
 Iamque adèo Rutulum thoraca indutus aenis  
 Horrebat squamis, surasque incluserat auro,  
 Tempora nudus adhuc, laterique accinxerat ensem,  
 490 Fulgebatque alta decurrens aureus arce,  
 Exsultatque animis, et spe iam praecipit hostem:  
 Qualis ubi abruptis fugit praesepia vinclis  
 Tandem liber equus, campoque potitus aperto  
 Aut ille in pastus armentaque tendit equarum,  
 495 Aut adsuetus aquae perfundi flumine noto  
 Emicat, arrectisque fremit cervicibus alte  
 Luxurians, luduntque iubae per colla, per armos.  
 Obvia cui, Volscorum acie comitante, Camilla  
 Occurrit, portisque ab equo regina sub ipsis  
 500 Desiluit, quam tota cohors imitata relictis  
 Ad terram defluxit equis; tum talia fatur:  
 Turne, sui merito si qua est fiducia forti,  
 Audeo et Aeneadam promitto occurrere turmae  
 Solaque Tyrrhenos equites ire obvia contra.  
 505 Me sine prima manu temptare pericula belli;  
 Tu pedes ad muros subsiste et moenia serva.  
 Turnus ad haec, oculos horrenda in virgine fixus:

in urbem, in regnum, v. 7, 367.] 473. cf. vs. 894.] 476. *lab. ult.*, summum discrimen.] 477. v. 2, 319. Ceterum cf. Hom. II. 6, 1269 sqq.] 478. v. 7, 284.] 480. v. E. 3, 106.] 481. *Succ.*, quo? ] 482. *de lim.*, ex more in introitu templi preces suat.] 483. cf. Hom. II. 6, 305 sqq.] 487. *adeo*, v. 4, 533. — Rutulos thoracas tum praestantissimos in Italia habitos esse poeta videtur significare, ut Attici in Graecia inprimis laudabantur.] 490. *aureus*, ita fulgebant arma eius, ut aurum.] 491. *Eas. a.*, v. 2, 386. — *spe praec. h.*, Servius „ante praec-occupat hostis adventum;“ et v. vs. 18.] 492 sqq. cf. Hom. II. 6, 506 sqq.] 494. *illo*, v. G. 2, 435.] 496. *lunge alte arrectis*.] 497. *Lux.*, ferociens, *κλυδών* Hom. I. 1.] 500. *Desil.*, Servius „hoc ad honorem Turni refertur.“] 504. promitto et Troianis equitibus *sola* occurrere, et *sola* obvia ire Tyrrhenis; v. 6, 716 et 2, 432.] 506. pedes cum peditatu.] 507. *oculos fixus*, ut vs. 480.]

- O decus Italiae virgo, quas dicere grates,  
 Quasve referre parem? sed nunc, est omnia quando  
 510 Iste animus supra, mecum partire laborem.  
 Aeneas, ut fama fidem missique reportant  
 Exploratores, equitum levia improbus arma  
 Praemisit, quaterent campos; ipse ardua montis  
 Per deserta iugo superans adventat ad urbem.  
 515 Furta paro belli convexo in tramite silvae,  
 Ut bivias armato obsidam milite fauces.  
 Tu Tyrrhenum equitem collatis excipe signis;  
 Tecum acer Messapus erit turmaeque Latinae  
 Tiburtique manus; ducis et tu concipe curam.  
 520 Sic ait, et paribus Messapum in proelia dictis  
 Hortatur sociosque duces, et pergit in hostem.  
 Est curvo anfractu valles, adcommoda fraudi  
 Armorumque dolis, quam densis frondibus atrum  
 Urguet utrimque latus, tenuis quo semita ducit  
 525 Angustaeque ferunt fauces aditusque maligni.  
 Hanc super in speculis summoque in vertice montis  
 Planities ignota iacet, tutique recessus,  
 Seu dextra laevaque velis occurrere pugnae,  
 Sive instare iugis et grandia volvere saxa.  
 530 Huc iuvenis nota fertur regione viarum,  
 Arripuitque locum et silvis insedit iniquis.  
 Velocem interea superis in sedibus Opim,  
 Unam ex virginibus sociis sacraque caterva,  
 Compellabat et has tristis Latonia voces  
 535 Ore dabat: Graditur bellum ad crudele Camilla,  
 O virgo, et nostris nequiquam cingitur armis,

508. v. 10, 601.] 509. Iunge *supra omnia*, et v. 12, 839.] 511. *fidem*, nuntium.] 512 sq. *inpr.*, ἀρχαῖος πολέμου, v. G. 1, 119. — „*levia arma*, expeditos equites, praemisit ad hoc solum, ut iaculis (lege *ungulis*) verberent campos ostentationis causa et propter tegendam fraudem,” Donatus.] 514. *iugo ea superans*, ergo: per iugum ardui desertique montis appropinquat.] 515 sq. cf. 522—531.] 519. *Tib.*, cf. 7, 671. — *et tu*, ut ego illa, sic tu hac parte praesto copiis, cf. vs. 510.] 521. *et*, v. 5, 504.] 522. *vallis*, per quam agmen ducendum erat Aeneae, cf. vs. 904 sq.] 524. *quo*, quam in vallem.] 525. *mal.*, Donatus „difficiles atque contrarii gradientibus.”] 526. *in spec.*, περιστέτω ἐν χώρῃ Homer., cf. E. 8, 59.] 527. *tuti rec.*, locus a conspectu remotus nullique periculo expositus. — Alii *receptus*.] 528. sive dextra aut sinistra parte venienti hosti occurrere velis.] 529. *inst. i.*, consistere in iugis.] 530. *reg.* v. 2, 737.] 731. *Arr. L.*, v. 3, 477. — *iniqu.*, per quas iter facere periculosum futurum esset Aeneae. || 532—596. *Interea Diana instanti Camillas interitu commota Opim* (unam e Nymphis napaeis, Threissam vs. 858) *ad ulciscendum eius interfectorem excitat.* — *Metabus et Camilla.*] 532. *sup. in sed.*, in Olympo, quo etiam Nymphae veniunt, vel ad concilium deorum vocatae, Hom. Il. 20, 8, vel nuntium aliquem ferentes, Hom. Od. 12, 374 sq.] 534. *has tristes voc.*, ut haec tristitia dicta 2, 115.] 536. *nostris*, cf. vs. 652 et 844.]



- Cara mihi ante alias. Neque enim novus iste Dianae  
 Venit amor subitaque animum dulcedine movit.  
 Pulsus ob invidiam regno virisque superbas  
 540 Priverno antiqua Metabus cum excederet urbe,  
 Infantem fugiens media inter proelia belli  
 Sustulit exsilio comitem, matrisque vocavit  
 Nomine Casmillae, mutata parte, Camillam.  
 Ipse sinu prae se portans iuga longa petebat  
 545 Solorum nemorum; tela undique saeva premebant  
 Et circumfuso volitabant milite Volsci.  
 Ecce, fugae medio, summis Amasenus abundans  
 Spumabat ripis; tantus se nubibus imber  
 Ruperat. Ille, innare parans, infantis amore  
 550 Tardatur, caroque oneri timet. Omnia secum  
 Versanti subito vix haec sententia sedit:  
 Telum inmane, manu valida quod forte gerebat  
 Bellator, solidum nodis et robore cocto,  
 Huic natam, libro et silvestri subere clausam,  
 555 Implicat atque habilem mediae circumligat hastae;  
 Quam dextra ingenti librans ita ad aethera fatur:  
 Alma, tibi hanc, nemorum cultrix, Latonia virgo,  
 Ipse pater famulam voveo: tua prima per auras  
 Tela tenens supplex hostem fugit. Accipe, testor,  
 560 Diva tuam, quae nunc dubiis committitur auris.  
 Dixit, et adducto contortum hastile lacerto  
 Inmittit: sonuere undae; rapidum super amnem  
 Infelix fugit in iaculo stridente Camilla.  
 At Metabus, magna propius iam urgente caterva,  
 565 Dat sese fluviò, atque hastam cum virgine victor.  
 Gramineo, donum Triviae, de caespite vellit.  
 Non illum tectis ullae, non moenibus urbes  
 Accepere, neque ipse manus feritate dedisset:

539. *vir. sup.*, superbum potentiae usum. | 548. *tant.*, v. 5, 404. | 549. *Rup.*, v. G. 3, 428. | 551. *Iunge versanti subito*; sic Servius et Donatus; *vix* indicat Metabum, quod consilium ceperit, id sine mora executum esse; 10, 659 „Vix proram attigerat; rumpit Saturnia funem;“ adde 12, 650. — *haec* statim expositum iri significat, quae sit ea sententia. | 552. *Tel. inmane* ... *Huic*: est haec perturbatio structurae verborum (*ἀνακολουθία*, v. G. 3, 464) praeclare accommodata ad significandam Metabi trepidationem. | 553. *cocto*, quod duratum est igne, ustulatum. | 554. *clausam*, involutam. | 555. *habilem*, ita ut tractari, facilius librari posset. | 558. Servius „Bene *ipse* pater, quia auctorandi (liberos homines in famulatum dandi) potestatem nisi patres non habent.“ — *prima*, v. E. 6, 1. | 560. *dubiis*, per quas dubia salute fertur. | 562. *son. undae* sibilo emissi teli percussae, „ut aqua quoque ipsa mittentis vim fortitudinemque sensisset“, Donatus. | 565. *victor*, compos voti. | 567. odium Metabi a Volscis manarat ad Etruscos, qui antiquitus Volscis ceterisque circa populis imperitabant, cf. vs. 581. — *tectis* ... *moenibus*, Servius „non in civitatem, non in privatam admissus est domum.“ | 568. *manus dare* dicitur victus, omnino, qui deiecit repugnare et

- Pastorum et solis exegit montibus aevum.  
 570 Hic natam in dumis interque horrentia lustra  
 Armentalis equae mammis et lacte ferino  
 Nutribat, teneris inmulgens ubera labris.  
 Utque pedum primis infans vestigia plantis  
 Institerat, iaculo palmas armavit acuto,  
 575 Spiculaque ex humero parvae suspendit et arcum.  
 Pro crinali auro, pro longae tegmine pallae,  
 Tigridis exuviae per dorsum a vertice pendent.  
 Tela manu iam tum tenera puerilia torsit,  
 Et fundam tereti circum caput egit habena,  
 580 Strymoniamque gruem aut album deiecit olorem.  
 Multae illam frustra Tyrrhena per oppida matres  
 Optavere nurum; sola contenta Diana  
 Aeternum telorum et virginitatis amorem  
 Intemerata colit. Vellem haud correpta fuisset  
 585 Militia tali, conata lacessere Teucros:  
 Cara mihi comitumque foret nunc una mearum.  
 Verum age, quandoquidem fatis urguetur acerbis,  
 Labere, Nympha, polo, finisque invise Latinos,  
 Tristis ubi infausto committitur omine pugna.  
 590 Haec cape, et ultricem pharetra deprome sagittam:  
 Hac, quicumque sacrum violarit vulnere corpus,  
 Tros Italusve, mihi pariter det sanguine poenas.  
 Post ego nube cava miserandae corpus et arma  
 Inspoliata feram tumulo, patriaeque reponam.  
 595 Dixit; at illa levis caeli delapsa per auras  
 Insonuit, nigro circumdata turbine corpus.  
 At manus interea muris Troiana propinquat  
 Etrusciue duces equitumque exercitus omnis,  
 Compositi numero in turmas. Fremit aequore toto  
 600 Insultans sonipes, et pressis pugnat habenis  
 Huc conversus et huc; tum late ferreus hastis  
 Horret ager, campique armis sublimibus ardent.

adversari. Servius „hoc dicit: etiamsi qui eum voluissent suscipere, ille tamen eorum consortia morum feritate fugisset.“ | 569. Pastorum exegit aevum (pastoriam vitam posthac egit) et in solis montibus aevum exegit; v. G. 2, 290. | 570. v. 1, 165. | 571. *ferino*, quia *ferus* interdum i. q. *equus*, ut 2, 51. | 573. *primis*, v. G. 3, 130. — *vest.* ... *Inst.*, insistendo fecerat vestigia. | 574. *armavit*, alii *oneravit*, cf. va. 578. | 576. *crin. auro*, v. 4, 138. | 580. *Strym.*, v. G. 1, 120. Sed arbitrantur avem, quae sit e numero migrantium, haud inepte ab ea terra cognominari, unde venerit. | 581. *Tyrrh.*, v. vs. 567. | 586. Donatus „Si hoc non fecisset, posset adhuc mihi cara et comes esse cum ceteris.“ | 590. *Haec*, arcum puta et pharetram. | 593. *cava*, v. 2, 360. | 594. cf. Hom. Il. 16, 667 sqq. v. E. 2, 30. | 596. *Ins.* celeri volatu auras secando. || 597—647. *Committitur proelium equestre.* | 600. *Habenis* Dativus, ut 4, 38. | 601. *Huc conv. et h.*: equi animosi cum obluctantur frenis, cervicem convertunt modo in unam, modo, a sessore cohibiti, in alteram partem. — *ferreus h. Horret*, proprie diceret: ferreis hastis. | 602. *ardent*

- Nec non Messapus contra celeresque Latini  
 Et cum fratre Coras et virginis ala Camillae  
 605 Adversi campo adparent, hastasque reductis  
 Protendunt longe dextris, et spicula vibrant;  
 Adventusque virum fremitusque ardescit equorum.  
 Iamque intra iactum teli progressus uterque  
 Constiterat: subito erumpunt clamore, furentisque  
 610 Exhortantur equos; fundunt simul undique tela,  
 Crebra nivis ritu, caelumque obtexitur umbra.  
 Continuo adversis Tyrrhenus et acer Aconteus  
 Connixi incurrunt hastis, primique ruinam  
 Dant sonitu ingenti, perfractaque quadrupedantum  
 615 Pectora pectoribus rumpunt; excussus Aconteus  
 Fulminis in morem aut tormento ponderis acti,  
 Praecipitat longe et vitam dispergit in auras.  
 Extemplo turbatae acies versique Latini  
 Reiciunt parmas et equos ad moenia vertunt.  
 620 Troes agunt; princeps turmas inducit Asilas.  
 Iamque propinquabant portis, rursusque Latini  
 Clamorem tollunt et mollia colla reflectunt:  
 Hi fugiunt, penitusque datis referuntur habenis.  
 Qualis ubi alterno procurrens gurgite pontus  
 625 Nunc ruit ad terram, scopulosque superiacit unda  
 Spumeus, extremamque sinu perfundit arenam;  
 Nunc rapidus retro atque aestu revoluta resorbens  
 Saxa fugit, litusque vado labente relinquit.  
 Bis Tusci Rutulos egere ad moenia versos;  
 630 Bis reiecti armis respectant terga tegentes.  
 Tertia sed postquam congressi in proelia totas  
 Implicuere inter se acies, legitque virum vir:  
 Tum vero et gemitus morientum, et sanguine in alto  
 Armaque corporaque et permixti caede virorum

ab eo, quod sunt *δούρατα παμφανόωντα* Hom. II. 5, 619, *λαμπόμενα* 6, 319. | 603. *cel.* Ad nomen Celerum Romuli alludere poetam ait Servius; v. 9, 370. 7, 181. | 604. *c. fratre*, 7, 672. | 605. *hastas*, quibus comminus pugnent, cf. vs. 612 sq. | 606. *longe*, cf. vs. 667, *ἔγχος ἐνδεκάπηχυν* est apud Hom. II. 8, 494. — *spic. v.*, proludentes ad pugnam, Lucan. 7, 82 „Vibrant tela manus; vix signa morantia quisquam expectat.“ Liv. 21, 28. Ceterum alii protendunt hastas, alii spicula vibrant, v. 1, 701. | 607. *Adv. virum ardesc.*, strepitus (quod vocabulum elicies ex eo, quod subiicitur *fremitus*) advenientium increbrescit, et v. 10, 895. | 608. *uterque* exercitus. | 609. v. 12, 875. | 613 sq. *ruinam D.*, cadunt, neuter tamen ab altero ictus, sed conflictu equorum in se ipsos irruentium. | 618. nam e Latinis erat Aconteus. | 620. *As.*, cf. 10, 175 sqq. | 622. *mollia*, qualia sunt domitorum equorum, facilia ad flectendum. | 624. *gurgite*, fluctu *puls.* | 626. *sinu*, fluctu undam iam languentem in sinum spuma praetextum expandente per humile litus. | 627. *revol. saxa*: quae fluctus veniens provolvit, idem recedens revolvit. | 628. *vado l.*: cum vis aquae fluctu provolutae rediit, paulum vadi relinquitur, et ipsum, sed tardius, relabens. | 629. *Rutulos*, v. 9, 450. | 633.

- 635 Semianimes voluntur equi; pugna aspera surgit.  
 Orsilochus Remuli, quando ipsum horrebat adire,  
 Hastam intorsit equo ferrumque sub aure reliquit.  
 Quo sonipes ictu furit arduus, altaque iactat  
 Volneris inpatiens arrecto pectore crura.
- 640 Volvitur ille excussus humi. Catillus Iollan,  
 Ingentemque animis, ingentem corpore et armis  
 Deicit Herminium, nudo cui vertice fulva  
 Caesaries, nudique humeri; nec volnera terrent;  
 Tantus in arma patet. Latos huic hasta per armos
- 645 Acta tremit, duplicatque virum transfixa dolore.  
 Funditur ater ubique cruor; dant funera ferro  
 Certantes, pulchramque petunt per volnera mortem.  
 At medias inter caedes exsultat Amazon,  
 Unum exserta latus pugnae, pharetrata Camilla;
- 650 Et nunc lenta manu spargens hastilia denset,  
 Nunc validam dextra rapit indefessa bipennem;  
 Aureus ex humero sonat arcus et arma Dianae.  
 Illa etiam, si quando in tergum pulsa recessit,  
 Spicula converso fugientia dirigit arcu.
- 655 At circum lectae comites, Larinaque virgo  
 Tullaque et aeratam quatiens Tarpeia securim,  
 Italides, quas ipsa decus sibi dia Camilla  
 Delegit, pacisque bonas bellicue ministras:  
 Quales Threiciae cum flumina Thermodontis
- 660 Pulsant et pictis bellantur Amazones armis,  
 Seu circum Hippolyten, seu cum se Martia curru  
 Penthesilea refert magnoque ululante tumultu  
 Feminea exsultant lunatis agmina peltis.  
 Quem telo primum, quem postremum, aspera virgo,
- 665 Deiciis? aut quot humi morientia corpora fundis?  
 Euneum Clytio primum patre; cuius apertum  
 Adversi longa transverberat abiecte pectus.  
 Sanguinis ille vomens rivos cadit atque cruentam  
 Mandit humum moriensque suo se in volnere versat.
- 670 Tum Lirim, Pagasumque super; quorum alter habenas

v. 1, 639. | 636. *Ors.*, v. vs. 690. | 640. *Volv.*, v. 9, 483. | 644. tanta  
 sui parte expositus est vulneribus. | 645. Hom. II. 18, 618 „ιδρώθη δὲ  
 πρῶτον.“ | 648—724. *Camillae ἀριστέα.* | 649. v. 1, 492. — *pugnae*, ut  
 expeditior esset ad pugnandum. | 650. *lenta*, v. 7, 164. | 654. *fugientia*, a  
 fugiente emissa. | 656. *sec.*, v. 7, 184. Tarpeia quidem est securigera, quem-  
 admodum Amazones. | 658. *pac. bellicue m.*, *Θεραννίδας.* | 659. antiqui  
 poetae Thraciae nomine aliquando terras istas in septemtrionem porrectas signi-  
 ficant, quas Scythae tenebant vel tenere putabantur. | 660. *pulsant* ungulis  
 equorum, transmittentes amnem glacie obductum. — *pict.*, v. 8, 588. — *bell.*, v.  
 G. 2, 425. — Ceterum v. 1, 316. | 661. *Mart.*, Martis ex Otrera filia. | 662.  
*refert se victri*, e proelio. — *ululatus* h. l. est ovantium. | 664. cf. Hom. II.

- Suffosso revolutus equo dum colligit, alter  
 Dum subit ac dextram labenti tendit inermem,  
 Praecipites pariterque ruunt. His addit Amastrum  
 Hipptaden, sequiturque incumbens eminus hasta  
 675 Tereaque Harpalycumque et Demophoonta Chromimque;  
 Quotque emissa manu contorsit spicula virgo,  
 Tot Phrygii cecidere viri. Procul Ornytus armis  
 Ignotis et equo venator Iapyge fertur,  
 Cui pellis latos humeros erepta iuvenco  
 680 Pugnatori operit, caput ingens oris hiatus  
 Et malae texere lupi cum dentibus albis,  
 Agrestisque manus armat sparus; ipse catervis  
 Vertitur in mediis et toto vertice supra est,  
 Hunc illa exceptum, neque enim labor agmine verso,  
 685 Traiicit, et super haec inimico pectore fatur:  
 Silvis te, Tyrrhene, feras agitare putasti?  
 Advenit qui vestra dies muliebribus armis  
 Verba redarguerit. Nomen tamen haud leve patrum  
 Manibus hoc referes, telo cecidisse Camillae.  
 690 Protinus Orsilocho et Buten, duo maxuma Teucrum  
 Corpora: sed Buten aversum cuspidē fixit  
 Loricam galeamque inter, qua colla sedentis  
 Lucent et laevo dependet parma lacerto;  
 Orsilocho, fugiens magnumque agitata per orbem,  
 695 Eludit gyro interior, sequiturque sequentem;  
 Tum validam perque arma viro perque ossa securim,  
 Altior exsurgens, oranti et multa precanti  
 Congeminat; volnus calido rigat ora cerebro.  
 Incidit huic subitoque aspectu territus haesit  
 700 Appenninicolae bellator filius Auni,

5, 703. 8, 273.] 671. Puta rem ita se habuisse: Equus, cum ad certamen ventum esset, tollit se arrectis anterioribus pedibus praebetque Camillae locum, ubi suffodi possit; suffossus cum saeviat intolerantius, sessor sede exturbatus retrorsumque actus (*revolutus*) amittit habenas, quas dum labens recipere (*colligere*) tentat, interficitur a Camilla. — Alii *suffuso*.] 673. v. G. 2, 290.] 674. *incumbens* ostendit nisum emittentis hastam.] 678. *Ign.*, insolitis. — *Jap.*, v. vs. 247.] 680. cf. 10, 891. 12, 716.] 682. *spar.*, leve telum rusticum.] 684. *exceptum*, Gallice *surpris*, ut nihil tale metuentem, 3, 332. 10, 386, tamquam feram, Horat. Od. 3, 12, 12, fugientemque ac non resistantem sine labore traiecit.] 688. quae verba? nempe magniloquentiam istam vs. 686 haud obscure notatam, propriam illam fortasse Etruscorum. — *redarg.*, v. 9, 282.] 693. ergo eo loco fixit hostem, qui erat inter loricam, galeam et parmam a fugiente in tergum reiectam vulnere relictus.] 695. *interior*, cf. 5. 170. Servius „sinisterior, brevior scilicet circulo.“ Sumtum hoc a Circo: interiores dicuntur, qui, dum alii ampliore s. exteriore orbe metam, quae erat certantibus ad sinistram, circumvehebantur, ipsi breviori metaeque proximo cursu ferebantur; Ovid. Am. 3, 2, 12 „Nunc stringam metas interiore rota.“] 700. *Appenn.*, Appenninus mons incipiebat a Genoa, quae est urbs Liguria. — *filius A.*, an et ipse Aunus appellatus

- Haud Ligurum extremus, dum fallere fata sinebant.  
 Isque ubi se nullo iam cursu evadere pugnae  
 Posse neque instantem reginam avertere cernit,  
 Consilio versare dolos ingressus et astu,  
 705 Incipit haec: Quid tam egregium, si femina forti  
 Fidis equo? Dimitte fugam et te comminus aequo  
 • Mecum crede solo pugnaeque accinge pedestri:  
 Iam nosces, ventosa ferat cui gloria laudem.  
 Dixit; at illa furens acrique accensa dolore  
 710 Tradit equum comiti, paribusque resistit in armis,  
 Ense pedes nudo, puraque interrita parma.  
 At iuvenis, vicisse dolo ratus, avolat ipse,  
 Haud mora, conversisque fugax aufertur habenis,  
 Quadrupedemque citum ferrata calce fatigat.  
 715 Vane Ligus, frustraque animis elate superbis,  
 Nequiquam patrias temptasti lubricus artis,  
 Nec fraus te incolumem fallaci perferet Auno.  
 Haec fatur virgo et pernicipibus ignea plantis  
 Transit equum cursu, frenisque adversa prehensis  
 720 Congreditur poenasque inimico ex sanguine sumit:  
 Quam facile accipiter saxo sacer ales ab alto  
 Consequitur pennis sublimem in nube columbam,  
 Comprensamque tenet, pedibusque eviscerat uncis;  
 Tum cruor et volsae labuntur ab aethere plumae.  
 725 At non haec nullis hominum sator atque deorum  
 Observans oculis summo sedet altus Olympo.  
 Tyrrhenum Genitor Tarchonem in proelia saeva  
 Suscitât, et stimulis haud mollibus iniicit iras.  
 Ergo inter caedes cedentiaque agmina Tarchon  
 730 Fertur equo, variisque instigat vocibus alas,  
 Nomine quemque vocans, reficitque in proelia pulsos.  
 Quis metus, o numquam dolituri, o semper inertes

est? v. 9, 362.] 701. *extr.* arte scilicet fallendi; Cato „Ligures omnes fallaces.“ [704. v. 2, 62.] 706. *d. fugam*, omittit equi velocitate uti.] 707. *Mec.*, desiliamus uterque ex equis, cf. vs. 713 sq.] 708. *cui*, puta tibi; quod ad unum referendum erat, more poetico ad universum genus eorum, qui vana gloriatioe delectantur, relatum est; ea enim victoriam afferre solet nemini, qui ea utitur. — *vent. gloria* ex pugnae equestri successu, cuius maior pars equi praestantime debetur. — Alii *gl. fraudem*.] 710. *res.*, v. G. 2, 29.] 711. *Ense*, v. 7, 187. — *para*, inornata, Cic. Verr. 4, 23, 52 „Sic Haluntini excussis deliciis (*emblematis*) cum argento puro domum revertuntur;“ cf. etiam 9, 548.] 714. *ferr.* c., contra usum heroicorum temporum, quae ignorabant calcaria.] 716. v. vs. 701.] 718. *ignea* i. q. valde celeris; Sil. It. 3, 306 „Autololes, levibus gens *ignea* plantis;“ et „*flammea* vestigia“ dixit Catull. 64, 387; v. etiam infra vs. 746 et verba Ciceronis ad 12, 214 laudata.] 721. *sacer*, quia est avis auguralis. — Ceterum cf. Hom. Il. 22, 189 sqq.]] 725—835. *Restituit proelium Tarchon*. — *Mors Camillae*.] 725. cf. Hom. Il. 10, 515.] 728. iniiciens iras eius animo stimulis haud mollibus usus est, quo eas incitaret.] 730. *alas*, cf. vs. 835.] 731. cf. Hom. Il. 10, 68.] 732. *dolituri* ignavia scilicet vestra et

- Tyrrheni, quae tanta animis ignavia venit?  
 Femina palantis agit atque haec agmina vertit?  
 735 Quo ferrum, quidve haec gerimus tela inrita dextris?  
 At non in Venerem segnes nocturnaue bella,  
 Aut, ubi curva choros indixit tibia Bacchi,  
 Exspectare dapes et plenae pocula mensae, —  
 Hic amor, hoc studium — dum sacra secundus haruspex  
 740 Nuntiet ac lucos vocet hostia pinguis in altos.  
 Haec effatus equum in medios, moriturus et ipse,  
 Concitat et Venulo adversum se turbidus infert,  
 Dereptumque ab equo dextra conplectitur hostem  
 Et gremium ante suum multa vi concitus aufert.  
 745 Tollitur in caelum clamor, cunctique Latini  
 Convertere oculos. Volat igneus aequore Tarchon,  
 Arma virumque ferens; tum summa ipsius ab hasta  
 Defringit ferrum et partis rimatur apertas,  
 Qua volnus letale ferat; contra ille repugnans  
 750 Sustinet a iugulo dextram et vim viribus exit.  
 Utque volans alte raptum cum fulva draconem  
 Fert aquila, implicuitque pedes atque unguibus haesit;  
 Saucius at serpens sinuosa volumina versat,  
 Arrectisque horret squamis et sibilat ore,  
 755 Arduus insurgens; illa haud minus urguet obunco  
 Luctantem rostro; simul aethera verberat alis:  
 Haud aliter praedam Tiburtum ex agmine Tarchon  
 Portat ovans. Ducis exemplum eventumque secuti  
 Maeonidae incurrunt. Tum fatis debitus Arruns  
 760 Velocem iaculo et multa prior arte Camillam  
 Circuit et, quae sit fortuna facillima, temptat.  
 Qua se cumque furens medio tulit agmine virgo,  
 Hac Arruns subit et tacitus vestigia lustrat;  
 Qua victrix redit illa pedemque ex hoste reportat,  
 765 Hac iuvenis furtim celeris detorquet habenas.  
 Hos aditus, iamque hos aditus, omnemque pererrat  
 Undique circuitum, et certam quatit improbus hastam.  
 Forte sacer Cybelae Chloereus olimque sacerdos  
 Insignis longe Phrygiis fulgebat in armis,

dedecore; Valer. Fl. 3, 230 sq. „numquamne dolor... subibit Nil ausas sine rege manus?“ Ceterum confer cum hac oratione Hom. Il. 4, 338 sqq. | 737. *Aut ... exspectare*, i. e. nec segnes exspectare s. ad exspectandas dapes. | 739. *secundus*, qui secunda nuntiat ex extis inspectis. | 741. *mor. et i.*, ut suos ad mortem oppotendum vocavit, ita et ipse meri paratus est. | 746. *igneus*, v. vs. 718. Sil. It. 16, 512 „*Theron igneus*.“ | 750. *exit*, cf. 5, 438. | 751. *vol. alte*, αἰετὸς ὑψηλέρης Hom. Il. 12, 201. | 759. *Maeon.*, cf. inter se 8, 479 et 499. — *debitus*, obnoxius, *versallen*. | 760. *prior*, priusquam ipsam feriat; v. 4, 494. | 761. *quae s. f. f.*, quem maxime commodum fortuna aditum offerat ad illam inter- sciendam. | 767. *improb.*, v. G. 1, 119. | 768. *sacer C.*, cf. 6, 484. — *olim*, in

- 770 Spumantemque agitabat equum, quem pellis aenis  
 In plumam squamis auro conserta tegebat.  
 Ipse, peregrina ferrugine clarus et ostro,  
 Spicula torquebat Lycio Gortynia cornu;  
 Aureus ex humero sonat arcus, et aurea vati
- 775 Cassida; tum croceam chlamydemque sinusque crepantis.  
 Carbaseos fulvo in nodum collegerat auro,  
 Pictus acu tunicas et barbara tegmina crurum.  
 Hunc virgo, sive ut templis praefigeret arma  
 Troia, captivo sive ut se ferret in auro,
- 780 Venatrix unum ex omni certamine pugnae  
 Caeca sequebatur, totumque incauta per agmen  
 Femineo praedae et spoliolum ardebat amore:  
 Telum ex insidiis cum tandem tempore capto  
 Concitat et superos Arruns sic voce precatur:
- 785 Summe deum, sancti custos Soractis Apollo,  
 Quem primi colimus, cui pineus ardor acervo  
 Pascitur, et medium freti pietate per ignem  
 Cultores multa premimus vestigia pruna,  
 Da, Pater, hoc nostris aboleri dedecus armis,
- 790 Omnipotens. Non exuvias pulsaeve tropaeum  
 Virginis, aut spolia ulla peto; mihi cetera laudem  
 Facta ferent; haec dira meo dum vulnere pestis  
 Pulsa cadat, patrias remeabo inglorius urbes.  
 Audiit et voti Phoebus succedere partem

patria, cum ea salva esset.] 770 sq. quem equum muniebat pellis ferina squamis, quibus erat obducta, in speciem plumarum ex aere factis (*opus plumatum* dixeris), aureis fibulis subter alvum conserta; significatur equus cataphractus.] 772. v. 9, 582.] 773. v. E. 1, 55. — Omnino hoc loco, qui fuerit ornatus, quae armatura Chlorei, exponitur; itaque vs. 773 non, quid tum maxime manu tractaverit, commemoratur, sed quid, cum usus erat, facere consueverit; quare nihil impedit, quominus vs. 774 aureus (auro ornatus) arcus ex humeris eius pendisse dicatur.] 775 sq. *crepantes* auro scilicet intexto. — Amplae (propterea *fluentes* 1, 820) cum essent eae vestes, fibula aurea sub pectore ita colligebantur s. complicabantur, ut quasi *nodus* quidam efficeretur; ex qua complicatione s. nodo explicabat sese lateque expandebat sinus vestis.] 777. v. E. 3, 106. — *barb. t. cr.*, genus quoddam bracarum, quo utebantur Phryges.] 778. cf. 3, 286—88.] 781. v. G. 4, 82.] 784. *superos*, v. 6, 322.] 785. In summo Soracte colebatur Soranus, qui etiam Dispatet appellatur. Quo tempore Graecorum deorum cultus invectus est in Italiam, Sorani nomen cessit Apollini, isque celebre templum ibi habuit. Plin. N. H. 7, 2, 19 „Haud procul urbe Roma in Faliscorum agro familiae sunt paucae, quae vocantur Hirpi (s. Hirpini); hae sacrificio annuo, quod fit ad montem Soractem Apollini, super ambustam ligni struem ambulantes (terque exta per eam portantes, ut ait Sil. It. 5, 177) non aduruntur.“ — *Summum deorum* interdum appellant, qui praecipuo honore colunt deum aliquem; similiter *prima deum* a Cressa muliere Dictynna appellatur in Ciri vs. 245. Servius „*Summe deum* ex affectu colentis dicitur.“] 786. *primi*, praeter ceteros, v. 3, 437. — *pin. ard.*, v. 7, 463. — *acervo lignorum*.] 788. Varro apud Servium „Ut solent Hirpini, qui ambulaturi per ignes medicamento plantas tingunt.“] 794 sqq. cf. Hom. Il. 16, 249 sqq.]



- 795 *Mente dedit, partem volucris dispersit in auras:*  
*Sterneret ut subita turbatam morte Camillam,*  
*Adnuat oranti; reducem ut patria alta videret,*  
*Non dedit, inque notos vocem vertere procellae.*  
*Ergo, ubi missa manu sonitum dedit hasta per auras,*
- 800 *Convertere animos acris oculosque tulere*  
*Cuncti ad reginam Volsi. Nihil ipsa nec aurae*  
*Nec sonitus memor aut venientis ab aethere teli,*  
*Hasta sub exsertam donec perlata papillam*  
*Haesit, virgineumque alte bibit acta cruorem.*
- 805 *Concurrunt trepidae comites dominamque ruentem*  
*Suscipiunt. Fugit ante omnis exterritus Arruns,*  
*Laetitia mixtoque metu, nec iam amplius hastae*  
*Crederet, nec telis occurrere virginis audet.*  
*Ac velut ille, prius quam tela inimica sequantur,*
- 810 *Continuo in montis sese avius abdidit altis*  
*Occiso pastore lupus magnove iuvenco,*  
*Conscius audacis facti, caudamque remulcens*  
*Subiecit pavitantem utero, silvasque petivit:*  
*Haud secus ex oculis se turbidus abstulit Arruns,*
- 815 *Contentusque fuga mediis se inmiscuit armis.*  
*Illa manu moriens telum trahit; ossa sed inter*  
*Ferreus ad costas alto stat vulnere mucro.*  
*Labitur exsanguis; labuntur frigida leto*  
*Lumina; purpureus quondam color ora reliquit.*
- 820 *Tum sic expirans Accam, ex aequalibus unam,*  
*Adloquitur; fida ante alias quae sola Camillae,*  
*Quicum partiri curas; atque haec ita fatur:*  
*Hactenus, Acca soror, potui; nunc volnus acerbum*  
*Conficit, et tenebris nigrescunt omnia circum.*
- 825 *Effuge et haec Turno mandata novissima perfer:*  
*Succedat pugnae Troianosque arceat urbe.*  
*Iamque vale. Simul his dictis linquebat habenas,*  
*Ad terram non sponte fluens. Tum frigida toto*  
*Paulatim exsolvit se corpore, lentaque colla*
- 830 *Et captum leto posuit caput, arma relinquens,*  
*Vitaeque cum gemitu fugit indignata sub umbras.*  
*Tum vero immensus surgens ferit aurea clamor*

795. v. 9, 313. | 801. *nec aurae* referes ad *per auras* vs. 799 et cf. vs. 863. |  
 803. v. vs. 649. | 806. *Iunge ante omnis eri.* | 809. *ille*, v. 7, 110. Ceterum  
 cf. Hom. II. 15, 586 sq. adde 16, 812 sqq. | 810. *avius*, propiciens se per avia. |  
 815. *Contentus fuga*, ut videtur, id quod *contentū fugā*, quemadmodum dicitur  
*contendo fugere.* | 818. Supra vs. 805 ruentem suscipiunt comites, prohibent  
 igitur, quominus ruat; iam labitur inclinato corpore, inclinantibus quoque se  
 oculis; denique vs. 828 cadit. | 821. *sola*, v. 2, 426. | 822. v. G. 1, 200. |  
 823. *potui*, valui viribus. | 826. *Succ. p.*, v. 10, 690. | 827. *Simul*, v. 10,  
 856. | 829. cf. 4, 703. | 831. v. 4, 492. | 832. *immensus surgens*, v. G. 1, 163. ||

- Sidera; deiecta crudescit pugna Camilla;  
 Incurrunt densi simul omnis copia Teucrum  
 835 Tyrrhenique duces Euandrique Arcades alae.  
 At Triviae custos iamdudum in montibus Opis  
 Alta sedet summis, spectatque interrita pugnas.  
 Utque procul medio iuvenum in clamore furentum  
 Prospexit tristi multatam morte Camillam,  
 840 Ingemuitque deditque has imo pectore voces:  
 Heu nimium, virgo, nimium crudele luisti  
 Supplicium, Teucros conata lacessere bello!  
 Nec tibi desertae in dumis coluisse Dianam  
 Profuit, aut nostras humero gessisse sagittas.  
 845 Non tamen indecorem tua te regina reliquit  
 Extrema iam in morte; neque hoc sine nomine letum  
 Per gentis erit aut famam patieris inultae.  
 Nam quicumque tuum violavit volnere corpus,  
 Morte luët merita. Fuit ingens monte sub alto  
 850 Regis Dercenni terreno ex aggere bustum  
 Antiqui Laurentis, opacae ilice tectum;  
 Hic dea se primum rapido pulcherrima nisu  
 Sistit et Arruntem tumulto speculatur ab alto.  
 Ut vidit laetantem animis ac vana tumentem:  
 855 Cur, inquit, diversus abis? huc dirige gressum,  
 Huc periture veni, capias ut digna Camillae  
 Praemia. Tune etiam telis moriere Dianae?  
 Dixit et aurata volucrem Threissa sagittam  
 Deprompsit pharetra, cornuque infensa tetendit,  
 860 Et duxit longe, donec curvata coirent  
 Inter se capita, et manibus iam tangeret aequis,  
 Laeva aciem ferri, dextra nervoque papillam.  
 Extemplo teli stridorem aurasque sonantis  
 Audiit una Arruns haesitque in corpore ferrum.  
 865 Illum expirantem socii atque extrema gementem  
 Obliti ignoto camporum in pulvere linquunt;  
 Opis ad aetherium pennis aufertur Olymum.

836—867. *Supplicium Arruntis.* | 836. *custos*, quae provideret, ne inultus abiret Arruns, cf. vs. 587 sqq. | 837. *interrita*: spectabat ex alto loco ab ipsaque pugna remoto, ubi nulla subita res eam terrere prospectumque impedire posset. | 843. *desertae*, v. 2, 714. | 844. *nostr.*, cf. vs. 536. | 847. *aut.*, v. vs. 737. | 850. Nihil amplius de hoc rege memoriae proditum. — *terr. ex agg.*, ut apud Hom. II. 7, 86. 23, 255 sq. | 854. Alii *vid. fulgentem armis.* — *vana t.*, v. G. 3, 149. | 856. v. 9, 485. | 857. *Tune* cet.: ne spera te Dianae tela, quae nemo vitare potuit, ease vitaturum. Interrogatio prodit animum irridentis. Nos: *Du wirst doch wohl auch durch Dianens Geschosse sterben?* | 858. *Threissa* Opis; cf. 1, 315 sq. | 861. *aequis*: *aeque* dextrâ pectus ac laevâ cuspidem sagittae tangebant; v. 4, 494. | 864. *una* bis intelligendum: una audiit Arruns, unaque haesit ferrum in e.; ergo uno utrumque momento factum; item bis intelliges simul vs. 908 et 910. | 865. *extr. g.*, v. 2, 690. | 866. *Obl.*, negligentes. ||

- Prima fugit, domina amissa, levis ala Camillae;  
 Turbati fugiunt Rutuli, fugit acer Atinas,  
 870 Disiectique duces desolatique manipli  
 Tuta petunt et equis aversi ad moenia tendunt.  
 Nec quisquam instantis Teucros letumque ferentis  
 Sustentare valet telis, aut sistere contra;  
 Sed laxos referunt humeris languentibus arcus,  
 875 Quadrupedumque putrem cursu quatit ungula campum.  
 Volvitur ad muros caligine turbidus atra  
 Pulvis, et e speculis percussae pectora matres  
 Femineum clamorem ad caeli sidera tollunt.  
 Qui cursu portas primi inrupere patentis,  
 880 Hos inimica super mixto premit agmine turba,  
 Nec miseram effugiant mortem, sed limine in ipso,  
 Moenibus in patriis atque inter tuta domorum  
 Confixi exspirant animas. Pars claudere portas,  
 Nec sociis aperire viam, nec moenibus audent  
 885 Accipere orantis, oriturque miserrima caedes  
 Defendentum armis aditus inque arma ruentum.  
 Exclusi ante oculos lacrimantumque ora parentum  
 Pars in praecipitis fossas urgente ruina  
 Volvitur, inmissis pars caeca et concita frenis  
 890 Arietat in portas et duros obice postis.  
 Ipsae de muris summo certamine matres, —  
 Monstrat amor verus patriae — ut videre Camillam,  
 Tela manu trepidae iaciunt, ac robore duro

868—895. *Fuga turmae femineae Volscorumque* (vs. 498) *Rutulorumque* (Latinorum) *equitum*. — *Matronarum ardor in defendenda patria.* | 868. *lev.*, v. 6, 17. | 869. *Rutuli*, v. 9, 450. | 870. *desolati* a *ducibus*. | 874. *hum. langu.*, quia ipsi homines languebant. | 875. v. 8, 596. | 877. *e spec.*, puta e muris, cf. vs. 475 sq. | 879. *primi* illi distinguuntur ab iis, qui postea veniunt, cum portae clauderentur, aut post clausas portas. | 880 sqq. *super*, insuper, i. e. praeter periculum ab hoste imminens; *mixto*, confuso; *turba* ipsorum Latinorum Volscorumque *inimica* est s. obest sibi (*inimica* hic non est *hostilis*; primi qui intrant urbem, longius absunt ab hostibus); nam cum nimis conferta esset turba fugientium, factum est illud, quod in tali casu accidere solet, ut multi misere perirent, suis aut proximorum telis, quae declinare non licebat, confixi; Sallust. *Histor. l. II.* apud Nonium „Ruuntque pars magna suis met aut proximorum telis“ puta confixi; denique (vs. 885 sq.) qui fugientes socios, ut claudi possint portae, vi arcent ab aditu, vel ipsi ab his obtruncantur, vel obtruncant illos in arma eorum ruentes. | 882. Alii: *intra t. dom.*, num igitur equites ab equitibus interempti in ipsis domibus? | 887. *Exclusi ... Pars*, v. 6, 580. | 888. *urg. r.*, dum urgent se alius super alium ruentes. | 889. *Vol.*, v. 9, 433. | 890. *dur. ob. p.*, non cedentes utpote firmo repagulo munitos. | 891. *summo c.*, ut 5, 197. | 892. *Monstrat*, docet et hortatur, cf. 9, 44. — ut vid. C., i. e. imitantes exemplum Camillae, patriam armis defendere conatae; et explebis sententiam, quemadmodum subiectus versus monstrat, hunc in modum: „ut videre Camillam tela manu iacientem“ | 893. *trepidae*, ut vs. 895 *praecipites*, festinationem ac studium declarat. — Iunge *stipitisbus robore duro*,

- Stipitibus ferrum sudibusque imitantur obustis  
 895 Praecipites, primaeque mori pro moenibus ardent.  
     Interea Turnum in silvis saevissimus inplet  
     Nuntius et iuveni ingentem fert Acca tumultum:  
     Deletas Volscorum acies, cecidisse Camillam,  
     Ingruere infensos hostis, et Marte secundo  
 900 Omnia corripuisse, metum iam ad moenia ferri.  
     Ille furens — et saeva Iovis sic numina poscunt. —  
     Deserit obsessos collis, nemora aspera linquit.  
     Vix e conspectu exierat campumque tenebat,  
     Cum pater Aeneas, saltus ingressus apertos,  
 905 Exsuperatque iugum silvaeque evadit opaca.  
     Sic ambo ad muros rapidi totoque feruntur  
     Agmine, nec longis inter se passibus absunt,  
     Ac simul Aeneas fumantis pulvere campos  
     Prospexit longe Laurentiaque agmina vidit,  
 910 Et saevum Aenean agnovit Turnus in armis  
     Adventumque pedum flatusque audivit equorum.  
     Continuoque ineant pugnas et proelia temptent,  
     Ni roseus fessos iam gurgite Phoebus Hiberno  
     Tinguat equos noctemque die labente reducat.  
 915 Considunt castris ante urbem et moenia vallant.

i. e. ex robore d.] 895. *pro moen.*, i. e. in moenibus obversae hostibus; v. 9, 575. || 896—915. *Turnus audita caede ac fuga suorum deserit locum, quem insederat. Sequitur Aeneas parvo intervallo. Sed ingruens nox cum differre poelium suadeat, castra utrique collocant ante urbem.* | 896. *Turn. implet*, animum Turni totum occupat. | 897. *fert. tum.*, rem nuntiat, qua turbatur eius animus. | 899 sq. *M. s. omnia corr.*, omnem campum victricibus armis tenere. | 901. Hom. II. 1, 5 „*Αἰὼς δ' ἐτελεῖτο βουλή*,” ne scilicet insidiis Turni Aeneas opprimi posset. | 903. *e conspectu* abeunt, qui iam ex eo loco, ubi ante fuerant, conspici nequeunt; 1, 34 „*Vix e conspectu Siculae telluris in altam Vela dabant.*” | 904. *apertos* abitu Turni. | 907. *longis*, v. 10, 549. | 910. „*Et simul agnovit*,” v. vs. 864. — *Iunge Aenean in armis*, v. 5, 440.

## A E N E I D O S

## LIBER DUODECIMUS.

(*Bis victis Italis Turnus paratum se ostendit ad causam singulari certamine dirimendam. Campum metantur ad eam rem foedusque et sacra faciunt. Sed rursus dolo Iunonis et opera Iuturnae, sororis Turni, omnia sunt irrita. Accenditur nova pugna. Multa utrimque clade edita, cum Aeneas ad ipsam urbem arma ignemque admoveret, Turnus ultro se offert Aeneae victusque interficitur.*)

- Turnus ut infractos adverso Marte Latinos  
Defecisse videt, sua nunc promissa reposci,  
Se signari oculis, ultro implacabilis ardet,  
Attollitque animos: Poenorum qualis in arvis,  
5 Saucius ille gravi venantum vulnere pectus,  
Tum demum movet arma leo, gaudetque comantis  
Excutions cervice toros, fixumque latronis  
Inpavidus frangit telum et fremit ore cruento:  
Haud secus accenso gliscit violentia Turno.  
10 Tum sic adfatur regem, atque ita turbidus infit:  
Nulla mora in Turno; nihil est, quod dicta retractent  
Ignavi Aeneadae, nec, quae pepigere, recusent.  
Congredior. Fer sacra, pater, et concipe foedus.  
Aut hac Dardanium dextra sub Tartara mittam,  
15 Desertorem Asiae, — sedeant spectentque Latini —  
Et solus ferro crimen commune refellam;  
Aut habeat victos, cedat Lavinia coniunx.  
Olli sedato respondit corde Latinus:

**Aeneid. L. XII.** 1—80. *Iam Turnus id sibi unum superesse ratus, cum Aenea solo dimicare decernit, nec regis Latini precibus nec lacrimis Amatae reginae retineri potest, quin mittat, qui Aeneam de ea re certiore faciat.* | 1. *infr.*, Participium verbi *infringere*, plane fractos, ut 9, 499. | 2. *Def.*, v. 11, 231. — *sua n. pr. r.*, cf. 11, 438 sqq. et v. G. 2, 29. | 3. *ultro*, nullis a quoquam probris laccessitus, ut supra a Draace 11, 346 sqq., maxime 371 sqq. — *impl. a.*, ardet ira implacabili. | 4 sqq. cf. Hom. II. 5, 136 sqq. 20, 164 sqq. — *illo*, v. G. 2, 435. | 6. *Tum*, refer ad *Saucius*, vulneratus, v. 2, 391. — *movet a.*, v. G. 3, 236. — *gaudet ... Excutions*, v. G. 2, 510. | 7. *latr.*, venatoris, qui illum insidiis exceptit. | 9. *acc.*, cf. 4, 697. | 10. *turb.*, v. 10, 763. | 11. cf. 11, 115 sqq. | 13. *Congr.*, v. 9, 21. — *Fer s.*, cf. vs. 118 sq. 170 sqq. — *pater*, v. E. 9, 66. — *conc. f.*, fac verbis ex more conceptis f.; cf. vs. 197 sqq. | 15. *sedeant L.*, ex more, cf. Hom. II. 3, 68 sqq.; sed cum quadam exprobratione ignaviae adiectum est *spectent*. | 16. Servius „commune fugae ac timoris dedecus (cf. vs. 34) solus meis viribus comprimam.“ | 17. *habeat* in dicionem acceptos. — *cedat*, v. 3, 297. | 18. *sed. c.*, contra ac

- O praestans animi iuvenis, quantum ipse feroci  
 20 Virtute exsuperas, tanto me impensius aequum est  
 Consulere atque omnis metuentem expendere casus.  
 Sunt tibi regna patris Dauni, sunt oppida capta  
 Multa manu; nec non aurumque animusque Latino est.  
 Sunt aliae innuptae Latio et Laurentibus agris,  
 25 Nec genus indecores. Sine me haec haud mollia fatu  
 Sublatis aperire dolis; simul hoc animo hauri:  
 Me natam nulli veterum sociare procorum  
 Fas erat, idque omnes divique hominesque canebant.  
 Victus amore tui, cognato sanguine victus,  
 30 Coniugis et maestae lacrimis, vincla omnia rupi:  
 Promissam eripui genero; arma impia sumpsi.  
 Ex illo qui me casus, quae, Turne, sequantur  
 Bella, vides, quantos primus patiare labores.  
 Bis magna victi pugna vix urbe tuemur  
 35 Spes Italas; recalent nostro Tiberina fluenta  
 Sanguine adhuc, campique ingentes ossibus al bent.  
 Quo referor totiens? quae mentem insania mutat?  
 Si Turno extincto socios sum adscire paratus,  
 Cur non incolumi potius certamina tollo?  
 40 Quid consanguinei Rutuli, quid cetera dicet  
 Italia; ad mortem si te — Fors dicta refutet! —  
 Prodiderim, natam et connubia nostra petentem?  
 Respice res bello varias; miserere parentis  
 Longaevi, quem nunc maestum patria Ardea longe  
 45 Dividit. Haudquaquam dictis violentia Turni

Turnus vs. 10. | 19. *pr. an.*, v. 11, 417. | 23. *aur. an.*, et divitem (cf. 11, 213) et ad largiendum se propensum esse significat. | 24 sq. cf. Hom. II. 9, 395 sq. | 26. *simul h. a. h.*, simul peto abs te, ut hoc ipsum, quod sum dicturus, penitus ad animum tuum admittas. | 28. cf. 7, 58 et 97 sqq. | 29. *cogn. s.*, cf. 7, 366; Venilia, mater Turni, soror erat Amatae. | 30. *v. omn. r.*, et foederis et religionis, cf. vs. sq. idque fecit eo, quod passus est fieri, quae facta sunt, cf. 7, 591 sqq. | 31. cf. 7, 268 sqq. | 33. *primus*, v. 3, 437. | 34. Donatus „extra urbem perierunt omnia, ut vix tueamur, quae retinemus inclusa.“ | 35. *recalet* flumen, quod antea gelidum fuerat; sic *replemus vacua*, *relevamus onustum*, et alia similiter; v. G. 2, 29. | 36. *adhuc*, post priorem ad Tiberim pugnam; *ossibus* eorum, qui altera pugna, campestri, caesi necdum humati ab avibus bestiisque dilacerantur. | 37. *Quo r.*, quo, ad quae consilia, redigor, et v. G. 2, 29. Cur toties consilium muto, foedere cum Troianis semel sancito? Latinus suam sibi ipse inconstantiam exprobrat, haud ignarus ille quidem, quid debeat Troianis ex fato ac foedere, sed animo tamen ad Turni causam inclinatio. | 38. Alii *accire*. | 40. *consanguinei* a Latino appellantur Rutuli propter cognationem Veniliae et Amatae, v. vs. 29; similiter vs. 658 „quos generos vocet,“ Troianos an Rutulos, quia alterutrorum regi in matrimonium daturus est Laviniam. | 43. *res b. v.*, cf. 10, 160. | 44 sq. *cur longe*, cum Ardea haud multum distaret? quia satis longe distabat, quo Daunus prohiberetur, ne suae, senis miseri decrepitiq ue, praesentiae auctoritatisque pondus adiceret ad consilia filii

Flectitur; exsuperat magis, aegrescitque medendo.

Ut primum fari potuit, sic institit ore:

Quam pro me curam geris, hanc precor, optume, pro me  
Deponas, letumque sinas pro laude pacisci.

- 50 Et nos tela, pater, ferrumque haud debile dextra  
Spargimus; et nostro sequitur de vulnere sanguis.  
Longe illi dea mater erit, quae nube fugacem  
Feminea tegat, et vanis sese occulat umbris.

At regina, nova pugnae conterrita sorte,

- 55 Flebat et ardentem generum moritura tenebat:  
Turne, per has ego te lacrimas, per si quis Amatae  
Tangit honos animum, — spes tu nunc una, senectae  
Tu requies miserae; decus inperiumque Latini  
Te penes; in te omnis domus inclinata recumbit —

- 60 Unum oro: desiste manum committere Teucris.  
Qui te cumque manent isto certamine casus,  
Et me, Turne, manent; simul haec invisa relinquam  
Lumina, nec generum Aenean captiva videbo.  
Acceptit vocem lacrimis Lavinia matris

- 65 Flagrantis perfusa genas, cui plurimus ignem  
Subiecit rubor et calefacta per ora cucurrit.  
Indum sanguineo veluti violaverit ostro  
Si quis ebur, aut mixta rubent ubi lilia multa.  
Alba rosa: talis virgo dabat ore colores.

- 70 Illum turbat amor, figitque in virgine voltus.  
Ardet in arma magis, paucisque adfatur Amatam:  
Ne, quaeso, ne me lacrimis, neve omine tanto  
Prosequere in duri certamina Martis euntem,  
O mater; neque enim Turno mora libera mortis.

- 75 Nuntius haec, Idmon, Phrygio mea dicta tyranno  
Haud placitura refer: Cum primum crastina caelo

in melius flectenda. — *Div.*, v. 3, 383. | 46. *medendo*, eo, quod ille ei medetur; v. G. 3, 215. | 48 sq. Servius „quam pro salute mea sollicitudinem geris, hanc pro mea fama et gloria quaeso derelinquas; vir fortis enim gloriosam mortem praeposit salutem.“ cf. 6, 352. | 51. *nostro*, cf. 2, 436, praeterea Hom. II. 20, 437. | 52 sq. Longe illi (puta *auxilium imploranti*, v. G. 3, 562) mater erit, s. frustra invocabit matrem, ut se, cum in fugam coniectus erit, tegat et occulat. | 53. *Feminea*, quippe circumfusa ei a matre. — Ridet Turno originem Aeneae ut fictam propterea *vanam* dicit umbras, cavillans *vanam* spem in eo, quod nullum futurum esset, auxilio collocatam. Ceterum nihil his verbis commune est cum 10, 636—88; meminit poeta Aeneae apud Homerum nube ab Apolline obtenta servati. | 54. *pugnae sorte*, Donatus „genere et condicione pugnandi.“ | 56. v. 2, 142. | 60. *Teucr.*, Aeneae, v. 6, 322. | 63. *Lumina haec*, cf. 3, 600 et 4, 451. | 64. *Iunge lacrimis perfusa*. | 65 sq. rubor prodidit calorem genis subiectum. | 67. cf. Hom. II. 4, 141. | 72. *omine*, ipsis lacrimis ominosis; cf. Hom. II. 24, 218 sq. | 74. *mater*, v. 11, 356. — si mors fatalis instat, non est mihi liberum moras ei iniicere, cf. Hom. II. 6, 487—489. Atque esto hoc liberum aliis, Turno certe, viro scilicet forti mortemque igno-

- Puniceis invecta rotis Aurora rubebit,  
 Non Teucros agat in Rutulos; Teucrum arma quiescant,  
 Et Rutuli: nostro dirimamus sanguine bellum;  
 80 Illo quaeratur coniunx Lavinia campo.  
     Haec ubi dicta dedit: rapidusque in tecta recessit;  
 Poscit equos, gaudetque tuens ante ora frementis,  
 Pilumno quos ipsa decus dedit Orithyia,  
 Qui candore nives anteirent, cursibus auras.  
 85 Circumstant properi aurigae manibusque lacessunt  
 Pectora plausa cavis et colla comantia pectunt.  
 Ipse dehinc auro squalentem alboque orichalco  
 Circumdat loricam humeris; simul aptat habendo  
 Ensemque clipeumque et rubrae cornua cristae;  
 90 Ensem, quem Dauno ignipotens deus ipse parenti  
 Fecerat et Stygia candentem tinxerat unda.  
 Exin, quae mediis ingenti adnixa columnae  
 Aedibus adstabat, validam vi corripit hastam,  
 Actoris Aurunci spoliū, quassatque trementem,  
 95 Vociferans: Nunc, o numquam frustrata vocatus  
 Hasta meos, nunc tempus adest; te inaximus Actor,  
 Te Turni nunc dextra gerit; da sternere corpus  
 Loricamque manu valida lacerare revolsam  
 Semiviri Phrygis et foedare in pulvere crinis  
 100 Vibratos calido ferro murraque madentis.  
 His agitur furiis; totoque ardentis ab ore  
 Scintillae absistunt; oculis micat acribus ignis.

miniae praeferenti, non erit.] 78 sq. Non Teucri Rutulique universi pugnent, sed soli nos.]] 81—160. *Dum Turnus atque Aeneas ad certamen se accingunt, dum Aeneas leges foederis exitu eius pugnae firmandi proponit, dumque sacra parantur ac Troes Italique spectatum veniunt, Iuno excitat Iuturnam nympham, quae aut Turnum morti eripiat, aut rem ex foedere componendam perturbet.*] 81. ubi ... *que*, v. 2, 692. Similiter Plautus Bacch. 2, 3, 44 sq. „forte ut assedi in stega, Dum circumspecto: atque ego lembum conspicio.“] 82. Servius „Solent ex equorum vel maestitia vel alacritate eventum futurum dimicaturi colligere.“] 83. *Pil.*, v. 10, 619. — *Orith.*, v. G. 4, 463; Orithyia uxor Boreae, qui pater erat praestantissimorum equorum, cf. Hom. II. 20, 223 sqq., item Zephyrus Hom. II. 16, 150.] 84. *Qui anteirent*, tales illos quidem, ut anteirent.] 85. *prop. aur.*, ὄρχηρος θεράπωντες. — *lac. Pectora*, cf. G. 3, 186.] 87 sqq. Est haec quaedam ad pugnam proximo mane futuram quasi prolusio, cf. vs. 106 et v. G. 3, 233.] 87. *squal.*, v. 10, 314. — *albo o.*: exstant in Museo Herculansenſi vasa ex albicanti metallo, quod orichalcum putatur, facta.] 88. *habendo*, ad habendum, ut eum commode manu habere et tractare possit.] 89. *cornua*, i. e. galeam cum cornibus sive conis, quibus insertae erant cristae.] 91. cf. 8, 450 sq — Servius „Stygia unda quasi immortalem fecerat.“ Styge tinctum parvum Achillem Thetis adversus vulnera duravit, Stat. Ach. 1, 269.] 92. cf. Hom. Odys. 1, 127 sq.] 94. *Actoris*, Actori ereptum.] 95. quasi numen invocat hastam, et de cultu hastarum cf. Sil. It. 6, 137 sqq. Iustin. 43, 3.] 96. *te m. A.*, sc. gessit; v. G. 2, 1.] 99. *Sem.*, v. 4, 215.] 101 sq. Silius 11, 329 „vibrat ab ore ignis atrox.“ et cf. Hom. II. 1, 104. 19, 365.]



- Mugitus veluti cum prima in proelia taurus  
 Terrificos ciet atque irasci in cornua temptat,  
 105 Arboris obnixus trunco, ventosque lacessit  
 Ictibus, aut sparsa ad pugnam proludit arena.  
 Nec minus interea maternis saevus in armis  
 Aeneas acuit Martem et se suscitatur ira,  
 Oblato gaudens componi foedere bellum.  
 110 Tum socios maestique metum solatur Iuli,  
 Fata docens, regique iubet responsa Latino  
 Certa referre viros, et pacis dicere leges.  
 Postera vix summos spargebat lumine montis  
 Orta dies, cum primum alto se gurgite tollunt  
 115 Solis equi, lucemque elatis naribus efflant:  
 Campum ad certamen magnae sub moenibus urbi  
 Dimensi Rutulique viri Teucrique parabant,  
 In medioque focos et dis communibus aras  
 Gramineas. Alii fontemque ignemque ferebant,  
 120 Velati limo et verbera tempora vincti.  
 Procedit legio Ausonidum, pilataque plenis  
 Agmina se fundunt portis. Hinc Troius omnis  
 Tyrrhenusque ruit variis exercitus armis,  
 Haud secus instructi ferro, quam si aspera Martis  
 125 Pugna vocet. Nec non mediis in milibus ipsi  
 Ductores auro volitant ostroque superbi,  
 Et genus Assaraci Mnestheus, et fortis Asilas,  
 Et Messapus equum domitor, Neptunia proles.  
 Utque dato signo spatia in sua quisque recessit,  
 130 Defigunt telluri hastas et scuta reclinant.  
 Tum studio effusae matres et volgus inermum  
 Invalidique senes turre et tecta domorum  
 Obsedere, alii portis sublimibus adstant.

103. *prima in pr.*, ad ordiendum mox proelium, cf. vs. 735. | 104 sq. v. G. 3, 232 sq. | 105 sq. *vent. l. i.*, cf. 5, 377. | 107. *saev.*, v. 1, 138. | 108. *ac. M.*, Servius „Irritat se ad futura certamina.“ — *se susc. i.*, cf. 5, 454. | 111. *Fata d.*, cf. inprimis 2, 780—784. | 112. *pac. d. l.*, cf. vs. 183 sqq. | 113 sqq. Postquam dies vix ortus est, primo mane campum parant. Verba *tollunt*, *efflant* non sunt pro Imperfectis posita, sed sunt de eo accipienda, quod fit quotidie; ergo *cum primum* i. q. eo tempore, quo primum *cet.* — Solis equi sunt *πυρρνοοι*, ignem (*lucem*) efflantes. | 117. *parab.*, complanabant etc., cf. vs. 770 sq. | 118. *commun.*, per quos uterque, Latinus et Aeneas, iuraturus erat; et cf. 8, 275. | 119. Servius „ad facienda foedera semper aqua et ignis adhibentur.“ | 120. *limo*, puta *limo cinctu*; et limus est vestis, qua ab umbilico usque ad pedes tangebantur popae seminudi; ea in extrema ora habebat purpuram *limam*, i. e. obliquam, transversam. — Servius „Verbera proprie est herba sacra sumpta de loco sacro Capitolii, qua coronabantur Fetiales et Pater patratus foedera facturi vel bella indicturi. Abusive tamen verberas iam vocamus omnes frondes sacratas, ut est laurus, oliva, myrtus.“ | 130. Alii *tellure*, v. G. 2, 290. — *reclinant* ad terram. | 131. *stud. eff.*, magno studio actae, v. G. 2, 352. | 133. *portis*, puta

- At Iuno e summo, qui nunc Albanus habetur, —  
 135 Tum neque nomen erat nec honos aut gloria monti —  
 Prospiciens tumulo campum aspectabat et ambas  
 Laurentum Troumque acies urbemque Latini.  
 Extemplo Turni sic est adfata sororem,  
 Diva deam, stagnis quae fluminibusque sonoris  
 140 Praesidet; hunc illi rex aetheris altus honorem  
 Iuppiter erepta pro virginitate sacravit:  
 Nympha, decus fluviorum, animo gratissima nostro,  
 Scis, ut te cunctis unam, quaecumque Latinae  
 Magnanimi Iovis ingratum ascendere cubile,  
 145 Praetulerim, caelique libens in parte locarim:  
 Disce tuum, ne me incuses, Iuturna, dolorem.  
 Qua visa est Fortuna pati Parcaeque sinebant  
 Cedere res Latio, Turnum et tua moenia texi:  
 Nunc iuvenem inparibus video concurrere fatis,  
 150 Parcarumque dies et vis inimica propinquat.  
 Non pugnam aspicere hanc oculis, non foedera possum.  
 Tu pro germano si quid praesentius audes,  
 Perge; decet. Forsan miseros meliora sequentur.  
 Vix ea: cum lacrimas oculis Iuturna profundit  
 155 Terque quaterque manu pectus percussit honestum.  
 Non lacrimis hoc tempus, ait Saturnia Iuno;  
 Adcelera et fratrem, si quis modus, eripe morti;  
 Aut tu bella cie, conceptumque excute foedus.  
 Auctor ego audendi. Sic exhortata reliquit  
 160 Incertam et tristi turbatam vulnere mentis.  
 Interea reges, ingenti mole Latinus

muris portisque. — *adst.*, v. 1, 152.] 135. *n. nomen e.*, dictus quippe, ut ait Cato, ab Alba post condita. — *honos*, quem postea habuit ex eo, quod ibi feriae Latinae agitantur.] 139. *Diva*: divos antiquitus dictos esse, non deos, Varro testatur. — Non longe a fonte Numicii ad radices montis Albani fuit Iuturnae fons et fluvius et lacus.] 141. *sacr.*, sacrum s. diis convenientem honorem dedit.] 142. *an. grat. n.*, cf. Hom. II. 5, 243.] 144. Usus est hac caesura aliquoties Silius, 12, 146 „Rumpere compagem impositam, ex|pallescere caelum.“ — adde 14, 631 et Horat. Od. 1, 18, 16 „Arcanique fides prodiga per|lucidior vitro.“ — *ingratum*, cuius nulla aut mala gratia est; accipies hoc ita, ut de Iunone malam gratiam pellicibus Iovis referente dictum sit; et v. 7, 425.] 146. *ne me incus.*, tamquam quae parum protexerim Turnum.] 147. *Qua*, Servius „quatenus.“ Sed praestiterit ex particula *qua* particulam *quoad* repetere: „et quoad Parcae sinebant,“ ut G. 4, 9—11 ex *quo* assumendum est *ubi*.] 148. *Lat.*, Latinis.] 149. *inp. fatis*, Aeneae, cuius fata maiora sunt et potiora.] 151. Servius „Numina quoties morituros viderint eos, quibus favent, ab his recedunt.“ — *foed.*, cf. vs. 212.] 152. *audes*, v. 6, 468.] 153. *Perge*, age, fac, cf. 4, 114.] 155. *hon.*, v. G. 2, 392 et supra 8, 617.] 156. *hoc t., nunc tempus est.*] 158. *conc.*, cf. vs. 13; adde 7, 339.]] 161—215. *Feritur foedus.*] 161. *Interea reges ... Latinus ... vehitur*, ut Hom. Odys. 12, 73 „οἱ δὲ δῖον σχόντες, ὁ μὲν οὐρανὸν εὐρὺν ἔκτανε.“ Liv. 24, 20 „Consules Marcellus retro Nolam redit, Fabius in Sompium processit.“ — *ing. mole*, ing.

- Quadriiugo vehitur curru, cui tempora circum  
 Aurati bis sex radii fulgentia cingunt,  
 Solis avi specimen, bigis it Turnus in albis,  
 165 Bina manu lato crispans hastilia ferro.  
 Hinc pater Aeneas, Romanae stirpis origo,  
 Sidereo flagrans clipeo et caelestibus armis,  
 Et iuxta Ascanius, magnae spes altera Romae,  
 Procedunt castris; puraque in veste sacerdos  
 170 Saetigeræ fetum suis intonsamque bidentem  
 Attulit admovitque pecus flagrantibus aris.  
 Illi ad surgentem conversi lumina solem  
 Dant fruges manibus salsas, et tempora ferro  
 Summa notant pecudum, paterisque altaria libant.  
 175 Tum pius Aeneas stricto sic ense precatur:  
 Esto nunc Sol testis et hæc mihi Terra vocanti,  
 Quam propter tantos potui perferre labores,  
 Et Pater omnipotens, et tu Saturnia coniunx,  
 Iam melior, iam, diva, precor; tuque inclute Mavors,  
 180 Cuncta tuo qui bella, pater, sub numine torques;  
 Fontisque Fluviosque voco, quaeque aetheris alti  
 Religio et quae caeruleo sunt numina ponto:  
 Cesserit Ausonio si fors victoria Turno,  
 Convenit Euandri victos discedere ad urbem;  
 185 Cedet Iulus agris; nec post arma ulla rebelles  
 Aeneadae referent, ferrove hæc regna lacescent.  
 Sin nostrum adnuerit nobis Victoria Martem, —  
 Ut potius reor, et potius di numine fiment —  
 Non ego nec Teucris Italos parere iubebo,  
 190 Nec mihi regna peto; paribus se legibus ambæ  
 Invictæ gentes aeterna in foedera mittant.  
 Sacra deosque dabo; socer arma Latinus habeto,

corpore, cf. 2, 557 et 5, 431. | 164. *spec.*, quo ostenditur Solem esse avum Latini, e Marica, puta, quam vel filiam vel neptem Solis fuisse existimabimus; cf. 7, 47—49. Multi, ut ait Servius, Maricam ac Circen eandem esse dicebant. Certe minime hic audiendi, qui tradunt Latinum filium fuisse Ulixis aut Telemachi ex Circe. Ceterum Valer. Fl. 6, 58 „dracones, Matris Horae *specimen*.“ | 169. Donatus „pura, colore albo, nec purpuræ variata picturis.“ cf. 11, 711. | 170. v. 8, 641. | 172. v. 8, 68. — Alii *lumine*. | 173. *D. fr. m. s.*, molam salsam iniiciunt fronti pecudum, v. 4, 517. — *temp. f. S. not.*, cf. 6, 245 sq. | 174. *libant*, libando rigant. | 177. Hom. Il. 1, 162 „ᾧ ἐπι πόλλ' ἐμόγησα.“ | 177. *potui p.*, a me impetravi, ut perferrem. | 179. *Iam m., iam, d. pr.*, quae, si coniecturam facere licet ex rebus praesentibus, iam melior (placata) es et precor ut sis iam melior. | 180. *bella tuo sub n. torqu.*, bella numini tuo subiecta gubernas; *clavum torquere* 5, 177. | 181. v. E. 4, 51 et supra 8, 275. — *quaeq. aeth. R.*, i. e. divum s. sanctum aethera. | 183. *Cess.*, v. 3, 297. | 184. *Conv.*, ex legibus foederis, in quas conventum est, oportet. | 187. *nostr.*, v. G. 4, 22. | 190. cf. 4, 102, 7, 256. | 192. *S. d. d.*, religionem cultumque deorum patriorum, Vestae quidem ac Penatium, 2, 293. 296 sq., se introducturum prodestur Aeneas. | 192 sq. *arma ... Inperium*: significatur his verbis utrumque genus

- Inperium sollemne socer; mihi moenia Teucrici  
Constituent, urbique dabit Lavinia nomen.
- 195 Sic prior Aeneas; sequitur sic deinde Latinus,  
Suspiciens caelum, tenditque ad sidera dextram:  
Haec eadem, Aenea, Terram, Mare, Sidera, iuro,  
Latoniaeque genus duplex, Ianumque bifrontem,  
Vimque deum infernam et duri sacraria Ditis;
- 200 Audiat haec Genitor, qui foedera fulmine sancit.  
Tango aras, medios ignis et numina testor:  
Nulla dies pacem hanc Italis nec foedera rumpet,  
Quo res cumque cadent; nec me vis ulla volentem  
Avertet, non, si tellurem effundat in undas,
- 205 Diluvio miscens, caelumque in Tartara solvat;  
Ut sceptrum hoc — dextra sceptrum nam forte gerebat —  
Numquam fronde levi fundet virgulta nec umbras,  
Cum semel in silvis imo de stirpe recisum  
Matre caret, posuitque comas et brachia ferro;
- 210 Olim arbos; nunc artificis manus aere decoro  
Incluit, patribusque dedit gestare Latinis.  
Talibus inter se firmabant foedera dictis  
Conspectu in medio procerum. Tum rite sacratas  
In flammam iugulant pecudes, et viscera vivis
- 215 Eripiunt cumulantque oneratis lancibus aras.  
At vero Rutulis inpar ea pugna videri  
Iamdudum et vario misceri pectora motu;  
Tum magis, ut propius cernunt non viribus aequis.  
Adiuvat incessu tacito progressus et aram
- 220 Suppliciter venerans demisso lumine Turnus,  
Tabentesque genae et iuvenali in corpore pallor.

imperii, alterum militare, alterum quod dicunt civile. — *soll.*, solitum; ergo salvum esto imperium, quod ante habuit, Latino. | 194. *urbi*, iam 1, 5 significatae. | 197. *Haec ead.*, hos eosdem deos, Terram vs. 176, Mare vs. 182, Sidera vs. 176 et 181. | 199. *Vim*, *ἡρώς*, deum inf., i. e. deorum inferorum, v. E. 9, 46. | 200. *fulm.* *Ζεύς ὀφρύς*, fulmine persequens periuros. | 201. *Tango a.*, v. 4, 219. — *medios*, in medio inter utrumque populum positos. | 205. *Dil. m.*, diluvio facto miscens terram et mare. | 206 sqq. cf. Hom. Il. 1, 234 sqq. | 206. *Ut*, graviter asseverat, *so wahr*. — *forte*, quia hoc quidem sceptrum non fuit insigne illud a regibus geri solitum, v. vs. 211. | 209. *Matre*, arbore, cuius ex radicibus progerminavit, cf. G. 2, 19. — Ceterum v. G. 2, 368. | 211. Servius ad vs. 206 „tenet sceptrum Latinus, non quasi rex, sed quasi pater patratus.“ | 213. *rite s.*, cf. vs. 172—174. | 214. Donatus „In flammam fundebatur sanguis animalium, et antequam morerentur, extrahebantur eorum viscera et aris imponebantur.“ Unde est illud apud Ciceronem de Nat. D. 2, 9 „animadversum saepe est, cum cor animalis alicuius evulsum ita mobiliter palparet, ut imitaretur igneam celeritatem.“ cf. etiam 11, 82 et v. G. 2, 194. || 216—310. *Inturnae artibus rumpitur foedus a Rutulis. Novae pugnae initium.* | 218. *cernunt eos*, id quod repetes e verbis *ea* (eorum) *pugna* vs. 216. — *cernunt propius ex eo*, quod alter prope alteram constitutus est. — *non vir. aequ.*, οὐκ ὄντας ἰσοπάλους. | 219. *Adi.*, augeat motum illam animorum sollicitudo Turni et

- Quem simul ac Iuturna soror crebrescere vidit  
 Sermonem et volgi variare labantia corda,  
 In medias acies, formam adsimulata Camerti, —  
 225 Cui genus a proavis ingens, clarumque paternae  
 Nomen erat virtutis, et ipse acerrimus armis —  
 In medias dat sese acies, haud nescia rerum,  
 Rumoresque serit varios ac talia fatur:  
 Non pudet, o Rutuli, pro cunctis talibus unam  
 230 Obiectare animam? numerone an viribus aequi  
 Non sumus? En, omnes et Troes et Arcades hi sunt  
 Fatalisque manus, infensa Etruria Turno.  
 Vix hostem, alterni si congregiamur, habemus.  
 Ille quidem ad superos, quorum se devovet aris,  
 235 Succedet fama, vivusque per ora feretur;  
 Nos, patria amissa, dominis parere superbis  
 Cogemur, qui nunc lenti consedimus arvis.  
 Talibus incensa est iuvenum sententia dictis  
 Iam magis atque magis, serpitque per agmina murmur;  
 240 Ipsi Laurentes mutati ipsique Latini.  
 Qui sibi iam requiem pugnae rebusque salutem  
 Sperabant, nunc arma volunt, foedusque precantur  
 Infectum, et Turni sortem miserantur iniquam.  
 His aliud maius Iuturna adiungit, et alto  
 245 Dat signum caelo, quo non praesentius ullum  
 Turbavit mentes Italas monstroque fefellit.  
 Namque volans rubra fulvus Iovis ales in aethra  
 Litoreas agitabat aves turbamque sonantem  
 Agminis aligeri: subito cum lapsus ad undas  
 250 Cynum excellentem pedibus rapit inprobus uncis.  
 Arrexere animos Itali, cunctaeque volucres  
 Convertunt clamore fugam, mirabile visu,  
 Aetheraque obscurant pennis, hostemque per auras  
 Facta nube premunt, donec vi victus et ipso

incessu et vultu significata, nata illa ex habitu fidentiaque Aeneae. | 222 sqq. Quae hic Iuturnae, eae sunt Minervae partes apud Hom. II. 4, 86 sqq. | 227. *haud n. r.*, haud ignorans, quid agendum sibi sit et quomodo. | 232. *Fatalis*, quae secundum fata se cum Aenea coniunxit, cf. 8, 498 sqq., cuique (sic enim tacita mente, ipso vocis temperamento prodita, Iuturna cogitasse putanda est) fatale est, cum Aenea superari. — *infensa* propter Mezentium, hospitio a Turno exceptum, 8, 493. | 233. cf. Hom. II. 2, 123 sqq.; vix est satis hostium, ut alterni nostrorum cum singulis hostibus congredi possint. | 234 sq. Turnus quidem immortalem consequetur gloriam divinosque honores, quippe sacris nostrorum deorum tuendis se consecrans; cf. vs. 192. | 235. *vivus*, Tibull. I, 4, 65 „Quem referent Musae, *vivet*, dum“ *cet.* | 238. *sentent.*, ut *ὑπόμνη*, animus. | 240. *Ipsi L.*, non Rutuli soli, cf. vs. 216. 229. | 246. *monstro*, *τῷ* *τεράτει*, s. eo, quod id signum pro vero monstro acceptum est. | 250. *inpr.*, v. G. 1, 119. | 252. *Conv. fugam*, quae ante fugerant, convertant se et redeunt. | 254. *nube*

- 255 Pondere defecit praedamque ex unguibus ales  
 Proiecit fluvio penitusque in nubila fugit.  
 Tum vero augurium Rutuli clamore salutant,  
 Expediuntque manus; primusque Tolumnius augur,  
 Hoc erat, hoc, votis, inquit, quod saepe petivi.  
 260 Accipio, adgnoscoque deos; me, me duce ferrum  
 Corripite, o miseri, quos improbus advena bello  
 Territat, invalidas ut aves, et litora vestra  
 Vi populat. Petet ille fugam, penitusque profundo  
 Vela dabit. Vos unanimi densate catervas  
 265 Et regem vobis pugna defendite raptum.  
 Dixit et adversos telum contorsit in hostis  
 Procurrens; sonitum dat stridula cornus et auras  
 Certa secat. Simul hoc, simul ingens clamor, et omnes  
 Turbati cunei, calefactaque corda tumultu.  
 270 Hasta volans, ut forte novem pulcherrima fratrum  
 Corpora constiterant contra, quos fida crearat  
 Una tot Arcadio coniunx Tyrrhena Gylippo,  
 Horum unum ad medium, teritur qua subtilis auro  
 Balteus et laterum iuncturas fibula mordet,  
 275 Egregium forma iuvenem et fulgentibus armis,  
 Transadigit costas, fulvaeque effundit arena.  
 At fratres, animosa phalanx accensaque luctu,  
 Pars gladios stringunt manibus, pars missile ferrum  
 Corripiunt, caecique ruunt. Quos agmina contra  
 280 Procurrent Laurentum; hinc densi rursus inundant  
 Troes Agyllinique et pictis Arcades armis.  
 Sic omnis amor unus habet decernere ferro.  
 Diripuerunt aras; it toto turbida caelo  
 Tempestas telorum ac ferreus ingruit imber;  
 285 Craterasque focosque ferunt; fugit ipse Latinus  
 Pulsatos referens infecto foedere divos.

*facta*, ut *agmine facto*, v. 1, 82. | 256. *fluvio*, v. E. 2, 30. | 258. proprie arma expediuntur; quod quia per manus fit, ipsae manus hic expediri dicuntur. | 259. *saepe*, i. e. valde, multum, ut *ter felix, terque quaterque beati*. | 260. *Accipio* omen, cf. Ovid. Met. 7, 620. — *deos*, numen et voluntatem deorum. | 263. *prof.*, repetens mare, v. E. 2, 30. | 269. *cunei*, ut *cavea*, 5, 340. adde 5, 664. | 273. *ad med.*, media parte corporis. — *qua* (ubi) ... *alvo*, v. E. 1, 54. — *subtilis*, laneus, vel coriaceus, ut videtur, in quo fortasse lamellae aureae illigatae erant. | 274. *latera* videntur dici ambae extremae partes baltei, quae fibula coniunguntur. | 276. *unum* ... *Transad. costas*, v. 10, 698. | 280. *densi inund.*, densi undarum instar irruunt. | 281. *Agyll.*, v. 7, 652. — *pict.*, v. 8, 588. | 283—286. Summam, quae consecuta est, perturbationem pulchre describit poeta diversas res uno tempore gestas breviter perstringens. *Alii* diripiant aras et torribus pugnant, cf. vs. 298, *alii* torquent iacula, quorum multitudo obumbrat aethera (cf. vs. 578), tamquam vento actae nubes caelum faciant turbidum; *alii*, ministri sacrorum, crateras et focos, altaria ex aere

- Infrenant alii currus, aut corpora saltu  
 Subiiciunt in equos et strictis ensibus adsunt.  
 Messapus regem, regisque insigne gerentem,  
 290. Tyrrhenum Aulesten, avidus confundere foedus,  
 Adverso proterret equo; ruit ille recedens  
 Et miser oppositis a tergo involvitur aris  
 In caput inque humeros. At fervidus advolat hasta  
 Messapus, teloque orantem multa trabali  
 295 Desuper altus equo graviter ferit atque ita fatur:  
 Hoc habet; haec melior magnis data victima divis.  
 Concurrunt Itali spoliantque calentia membra.  
 Obvius ambustum torrem Corynaeus ab ara  
 Corripit et venienti Ebyso plagamque ferenti  
 300 Occupat os flammis; olli ingens barba reluxit,  
 Nidoremque ambusta dedit; super ipse secutus  
 Caesariem laeva turbati corripit hostis,  
 Inpressoque genu nitens terrae adplicat ipsum;  
 Sic rigido latus ense ferit. Podalirius Alsum,  
 305 Pastorem, primaque acie per tela ruentem,  
 Ense sequens nudo superimminet; ille securi  
 Adversi frontem mediam mentumque reducta  
 Dissicit et sparso late rigat arma cruore.  
 Olli dura quies oculos et ferreus urguet  
 310 Somnus; in aeternam clauduntur lumina noctem.  
 At pius Aeneas dextram tendebat inermem  
 Nudato capite, atque suos clamore vocabat:  
 Quo ruitis? quaeve ista repens discordia surgit?  
 O cohibete iras! ictum iam foedus, et omnes  
 315 Conpositae leges; mihi ius concurrere soli;  
 Me sinite, atque auferte metus: ego foedera faxo  
 Firma manu; Turnum debent haec iam mihi sacra.  
 Has inter voces, media inter talia verba,  
 Ecce, viro stridens alis adlapsa sagitta est,  
 320 Incertum, qua pulsa manu, quo turbine adacta,

facta arae imposita, auferunt fugiantque; fugit ipse etiam Latinus referens deos pulsatos, fugatos laesoque foedere violatos.] 287. *currus*, v. G. 1, 514.] 289. *regem*, regulum aliquem Etruscum, Lartem.] 296. *Hoc habet*, sedet vulnus. — *melior*, v. 5, 483.] 308. *ipsum*, v. G. 2, 297.] 307. *red.*, v. 5, 478.] 308. *Dissicit*, v. 7, 339.] 309. v. 10, 745. || 311—382. *Aeneas inermis, dum suos a pugna revocat, sagitta vulneratur. Turnus eo decedente irrui in hostes plurimosque trucidat.*] 311 sq. En pietatem Aeneae, tantum foederis religione confisi, ut vel in foedissima rerum perturbatione non cogitarit de se aut tegendo aut armando. — Arma propter rem sacram deposuerant Aeneas et Turnus, quod ita esse decent *vas*. 165—67 collati cum *va*. 326 et 734—37.] 316. *metus*, ne ad irritum ceciderit hoc foedus. — *faxo* est cum *fide* promittentis, v. 9, 282.] 317. *manu*, pugna cum Turno ineunda. — *Turn. d. h. i. m. s.*, his iam sacris effectum est, ut Turnus debeat mecum congredi, nec opus est vestris armis.] 319.

- Quis tantam Rutulis laudem, casusne deusne,  
Attulerit; pressa est insignis gloria facti,  
Nec sese Aeneae iactavit vulnere quisquam.  
Turnus, ut Aenean cedentem ex agmine vidit  
325 Turbatosque duces, subita spe fervidus ardet;  
Poscit equos atque arma simul, saltuque superbus  
Emicat in currum, et manibus molitur habenas.  
Multa virum volitans dat fortia corpora Leto;  
Seminecis volvit multos, aut agmina curru  
330 Proterit, aut raptas fugientibus ingerit hastas.  
Qualis apud gelidi cum flumina concitus Hebri  
Sanguineus Mavors clipeo increpat, atque furentis  
Bella movens inmittit equos; illi aequiore aperto  
Ante Notos Zephyrumque volant; gemit ultima pulsu  
335 Thraca pedum; circumque atrae Formidinis ora,  
Iraeque, Insidiaeque, dei comitatus, aguntur:  
Talis equos alacer media inter proelia Turnus  
Fumantis sudore quatit, miserabile caesis  
Hostibus insultans; spargit rapida ungula rores  
340 Sanguineos, mixtaque cruor calcatur arena.  
Iamque Neci Sthenelumque dedit Thamyrimque Pholumque,  
Hunc congressus et hunc, illum eminus; eminus ambo  
Imbrasidas, Glaucum atque Laden, quos Imbrasus ipse  
Nutrierat Lycia, paribusque ornaverat armis,  
345 Vel conferre manum, vel equo praevertere ventos.  
Parte alia media Eumedes in proelia fertur,  
Antiqui proles bello praeclara Dolonis,  
Nomine avum referens, animo manibusque parentem,  
Qui quondam, castra ut Danaum speculator adiret,  
350 Ausus Pelidae pretium sibi poscere currus;  
Illum Tydides alio pro talibus ausis  
Adfecit pretio, nec equis adspirat Achillis.  
Hunc procul ut campo Turnus prospexit aperto,  
Ante levi iaculo longum per inane secutus,  
355 Sistit equos biugis et curru desilit atque  
Semianimi lapsoque supervenit, et, pede collo

*alis*, quippe pinnata, πτερόεσσα. | 321. *Alii casusne deusne.* | 322. *Pressa est* silentio. | 326. *superbus*, referes hoc ad animum subita spe ferocem factum. | 329. *volvit*, v. 9, 433. | 330. *raptas*: cum solus currum conscenderit Turnus, Metiscus, auriga eius (vs. 469) videtur pro armigero interim ei fuisse raptasque de corporibus caesorum hastas suggessisse. | 331 sqq. cf. Hom. II. 13, 298 sqq. — *concitus* cursu, ut est vs. 902. — *Hebri*, fluminis Thracii, et v. 3, 13. | 332. *clipeo* hasta percusso, Call. H. in Del. 136 „ἐπὶ δὲ ὁ ἐσμαράγῃσι καὶ ἀσπίδα τυψεν ἀκωνή.“ | 333. *inmitt.*, immissis habenis agit, cf. 5, 146. | 335. *Thraca*, Θράκη. Ceterum v. 9, 719. | 342. *congressus*, collatis manibus. | 345. *ut vel* pedites vel ex equo pugnarent. | 349 sq. cf. Hom. II. 10, 314—327. | 351. cf. Hom. I. 1. vs. 455 sq. | 352 *nec adsp.*, desiit adspirare. | 354. *inane*, spatium. |



- Inpresso, dextrae mucronem extorquet et alto  
Fulgentem tinguunt iugulo atque haec insuper addit:  
En, agros et, quam bello, Troiane, petisti,  
360 Hesperiam metire iacens: haec praemia, qui me  
Ferro ausi temptare, ferunt; sic moenia condunt.  
Huic comitem Asbyten coniecta cuspide mittit,  
Chloreaque Sybarimque Daretaque Thersilochumque  
Et sternacis equi lapsum cervice Thymoeten.  
365 Ac velut Edoni Boreae cum spiritus alto  
Insonat Aegaeo, sequiturque ad litora fluctus;  
Qua venti incubuere, fugam dant nubila caelo:  
Sic Turno, quacumque viam secat, agmina cedunt  
Conversaеque ruunt acies; fert impetus ipsum,  
370 Et cristam adverso curru quatit aura volentem.  
Non tulit instantem Phegeus animisque frementem;  
Obiecit sese ad currum et spumantia frenis  
Ora citatorum dextra detorsit equorum.  
Dum trahitur pendetque iugis, hunc lata reiectum  
375 Lancea consequitur, rumpitque infixā bilicem  
Loricam et summum degustat vulnere corpus.  
Ille tamen clipeo obiecto conversus in hostem  
Ibat et auxilium ducto mucrone petebat:  
Cum rota praecipitem et procursu concitus axis  
380 Impulit effunditque solo, Turnusque secutus  
Imam inter galeam summi thoracis et oras  
Abstulit ense caput, truncumque reliquit arenae.  
Atque ea dum campis victor dat funera Turnus,  
Interea Aenean Mnesteus et fidus Achates  
385 Ascaniusque comes castris statuere cruentum,  
Alternos longa nitentem cuspide gressus.  
Saevit, et infracta luctatur arundine telum

359. *agros*, quos praemium victoriae te accipere posse credebas. | 360. *metire iac.*, sarcasmus; Servius „corpore tuo metire; metiuntur autem agros, qui colonis assignant.“ | 363. *Chloreaque* S., v. 3, 464. | 366 sqq. fluctus sequitur, quo impellitur, et ita actus pertendit ad litora; his respondent verba Turno agmina cedunt, contra ruunt acies his: *fugam dant nubila.* | 367. *fug. d.*, v. 5, 276. | 368. *viam sec.*, ut 6, 900, *τέμνει ὁδόν*, translatum ab itinere maritimo ad terrestre. | 372. *spum. fr. o.*, ora frenos spumantes, i. e. spuma oblitos, habentia. | 374. *reiecit*, dum equos Turni detorquens latus dextrum tegere clipeo non potest, apertum latus ferit lancea. | 375. *bil.*, v. 3, 467. | 379 sq. *praecip.* ... *Imp.*, impulit, ut praecipitaret. | 380. *secutus*, curru desiluit ad eum obtruncandum. || 383—445. *Interea intercedente divina matris opera curatur in castris convalesciturque Aeneas; tum resumptis armis filium ad aemulanda exempla virtutis domestica cohortatus cum omnibus, qui circum ipsum erant, castris exit.* | 385. *comes*: Mnesteo et Achatae Aeneam in castra reducentibus Ascanius se adiungit comitem. | 386. putabimus Aeneam, quoties vulneratum pedem promoveret, claudicasse seque ima hasta (*στυγερῆσι*) nixum sustentasse; Silius 6, 79 „Lapsantes fultum truncata cuspide gressus.“ Valer. Fl. 2, 98 „Alternos aegro cunctantem poplite gressus.“ | 387. „Saevit, ait Servius, quod

- Eripere, auxilioque viam, quae proxuma, poscit:  
 Ense secent lato volnus, telique latebras  
 390 Rescindant penitus seseque in bella remittant.  
 Iamque aderat Phoebo ante alios dilectus Iapis  
 Iasides, acri quondam cui captus amore  
 Ipse suas artis, sua munera, laetus Apollo  
 Augurium citharamque dabat celerisque sagittas.  
 395 Ille, ut depositi proferret fata parentis,  
 Scire potestates herbarum usumque medendi  
 Maluit et mutas agitare inglorius artis.  
 Stabat acerba fremens, ingentem nixus in hastam,  
 Aeneas, magno iuvenum et maerentis Iuli  
 400 Concursu, lacrimis immobilis. Ille retorto  
 Paeonium in morem senior succinctus amictu  
 Multa manu medica Phoebique potentibus herbis  
 Nequiquam trepidat, nequiquam spicula dextra  
 Sollicitat prensatque tenaci forcipe ferrum.  
 405 Nulla viam Fortuna regit; nihil auctor Apollo  
 Subvenit; et saevus campis magis ac magis horror  
 Crebrescit, propiusque malum est. Iam pulvere caelum  
 Stare vident, subeuntque equites et spicula castris  
 Densa cadunt mediis. It tristis ad aethera clamor  
 410 Bellantum iuvenum et duro sub Marte cadentum.  
 Hic Venus, indigno nati concussa dolore,  
 Dictamnum genetrix Cretaea carpit ab Ida,  
 Puberibus caulem foliis et flore comantem  
 Purpureo; non illa feris incognita capris  
 415 Gramina, cum tergo volucres haesere sagittae.

abstractus a bellis sit. Et bene viro forti servat dignitatem, qui nihil molliter facit in tam aspero vulnere; nam ideo ait: *infr. luct. ar. tel. Eripere*. — Iunge *telum infracta arundine*, telum, cuius ferrum, fracta ipso impetu arundine, solum in vulnere relictum est, cf. 9, 413. | 394. *dabat*, dare volebat, offerebat, v. 6, 468. | 395. Servius „*depositi*, desperati. Nam apud veteres consuetudo erat, ut desperati ante ianuas suas collocarentur, vel ut extremum spiritum redderent terrae, vel ut possent a transeuntibus forte curari, qui aliquando simili laboraverant morbo.“ adde Plut. vol. II. p. 1128. E. De simili moro Babylo-  
 niorum, Graecis tum certe ignoto, exponit Herod. 1, 197. | 397. *mutas*, quae silentur, tractantibus nihil prosunt ad gloriam; Silius 3, 519 „*mutum* volvens inglorius aevum.“ — *artis*, Pluralis quia ars medendi multiplex est aliudque malum aliam desiderat curationem. | 398. *ac. fr.*, v. G. 3, 149. | 399. *et*, v. 9, 811. | 400. *Ille ... senior*, v. 5, 521. | 401. *Paeonium* trium syllabarum, Horat. Od. 3, 4, 41 „Vos Iene consilium (*consilium*) et datis“ *cel.* | 403. *trepidat*, cum trepidatione quadam tentat. | 405. F. non regit et adiuvat rationem medendi; *nulla F.*, ut in familiari sermone „nullus Philotimus venit“ Cic. ad Att. 11, 4. *nulla Venus* G. 4, 516. — *auctor* medicae artis. | 407 sq. v. 6, 300. | 413. *Pub.*, adultis, qualibus opus erat ad medendum. | 414 sq. Cic. de Nat. Deor. 2, 50 „Auditum est, capras feras in Creta, cum essent confixae venenatis sagittis, herbam quaerere, quae dictamnus vocaretur, quam cum gustavissent,

- Hoc Venus, obscuro faciem circumdata nimbo,  
 Detulit; hoc fustum labris splendentibus amnem  
 Inficit, occulte medicans, spargitque salubris  
 Ambrosiae sucos et odoriferam panaceam.
- 420 Fovit ea vulnus lympa longaevis lapis  
 Ignorans, subitoque omnis de corpore fugit  
 Quippe dolor, omnis stetit imo vulnere sanguis.  
 Iamque secuta manum, nullo cogente, sagitta  
 Excidit, atque novae rediere in pristina vires.
- 425 Arma citi properate viro! quid statis? lapis  
 Conclamat primusque animos accendit in hostem.  
 Non haec humanis opibus, non arte magistra  
 Proveniunt, neque te, Aenea, mea dextera servat;  
 Maior agit deus atque opera ad maiora remittit.
- 430 Ille avidus pugnae suras incluserat auro  
 Hinc atque hinc, oditque moras, hastamque coruscat.  
 Postquam habilis lateri clipeus loricaque tergo est,  
 Ascanium fuis circum conplectitur armis,  
 Summaque per galeam delibans oscula fatur:
- 435 Disce, puer, virtutem ex me verumque laborem,  
 Fortunam ex aliis. Nunc te mea dextera bello  
 Defensum dabit et magna inter praemia ducet:  
 Tu facito, mox cum matura adoleverit aetas,  
 Sis memor et te animo repetentem exempla tuorum
- 440 Et pater Aeneas et avunculus excitet Hector.  
 Haec ubi dicta dedit, portis sese extulit ingens,  
 Telum inmane manu quatiens; simul agmine denso  
 Antheusque Mnestheusque ruunt, omnisque relictis

sagittas excidere dicunt e corpore.“ 417. v. E. 2, 30. — *amnem*, ut 7, 465. 418. *medic.*, efficiens, ut vim medicam traheret aqua illa. 419. ambrosia vires conciliat, cf. Hom. Il. 19, 352 sq. 420. *fovere*, fomenta sive frigida sive calida admovere. 422. *Quippe, εἰκότως*. — *dolor*, v. E. 9, 66. 427. *a. mag.*, v. 8, 442. 429. Servius „hoc est: hoc agit maior;“ unde conicias hanc visam esse Servio proverbialem locutionem; ita deus pro Appositione habendum, quod languidulum est. Rectius dixeris, cum medicus loquatur, illud *agere* ex media arte sumtum esse, id quod Celsus multis locis probat, ut 7, 2, p. 339 ed. 1785 „Neque tamen fas non est [i. e. fieri potest] nihil cucurbitulam agere,“ i. e. proficere, *opérer.* 7, 4, p. 350 „sive manu, sive medicamentis agetur.“ Ceterum *deus* non est Apollo, cf. vs. 405, praesertim cum Veneris hanc operam fuisse sciamus; *maior* autem est unus ex diis maiorum gentium, ut *χρῆσσορες θεοί* ap. Aesch. Prom. 905 ed. H. 430. *inclus*, v. 8, 219. 432. *habilis est*, accommodatus est, cf. 2, 393. 433. Iunge *circumfusus*; una armis brachiisque conplectitur filium. 435 sq. Ex me pete exemplum virtutis (*ἀνδρίας*) tolerantiaeque magnorum laborum, fortunae ex aliis. Soph. Ai. 550 sq. „ὦ παῖ, γένοιο πατρός εὐτυχέστερος, τὰ δ' ἄλλ' ὅμοιος· καὶ γένοι' ἄν οὐ κακός.“ — verum, qui eo nomine dignus sit. 437. *Def. d.*, v. 9; 323. — *inter pr.*, ad praemia, novum regnum puta, ita, ut te quasi circumfluant res florentissimae; Cic. Catil. 1, 4 „dico te priore nocte venisse *inter* falcarios;“ et cf. E. 2, 3. 438. *mat.*

Turba fluit castris. Tum caeco pulvere campus  
445 Miscetur, pulsuque pedum tremit excita tellus.

Vidit ab adverso venientis aggere Turnus,  
Videre Ausonii, gelidusque per ima cucurrit  
Ossa tremor; prima ante omnis Iuturna Latinos  
Audiit adgnovitque sonum et tremefacta refugit.  
450 Ille volat, campoque atrum rapit agmen aperto.  
Qualis ubi ad terras abrupto sidere nimbus.  
It mare per medium; miseris, heu, praescia longe  
Horrescunt corda agricolis; dabit ille ruinas  
Arboribus, stragemque satis; ruet omnia late;  
455 Ante volant, sonitumque ferunt ad litora venti:  
Talis in adversos ductor Rhoeteius hostis  
Agmen agit; densi cuneis se quisque coactis  
Adglomerant. Ferit ense gravem Thymbraeus Osirim,  
Archetium Mnestheus, Epulontem obtruncat Achates,

*ad.*, ad maturitatem pervenerit et adoleverit. | 444. *caeco*, v. 8, 253. — *pulv.* c. *misc.*, proprie pulvis excitatus miscetur inter se, v. 3, 557; quod quia in campo fit, campus misceri pulvere dicitur. | 445. *tr. exc.*, tremit quasi terrore aliquo excitata et exsultans, ut 7, 722 „pulsuque pedum *conterrita* tellus.“ | 446—499. *Viso cum suis Aenea tremefacti hostes. Caeduntur pellunturque Rutuli, dum Aeneas solum Turnum ad pugnam deposcit. Sed fraude Iuturnae elusus tandem, a Messapo telo petitus, vertitur et ipse ad caedendos obvius.* | 447. v. G. 3, 272. | 450. *atrum*, Servius „pulveris nube coopertum,“ cf. vs. 444. sed verius puto dixeris *atrum* esse „simile densae eoque atrae nubi,“ cf. vs. 457, ut Eustathius *κυάνειον νέφος Τρώων* Hom. II. 16, 66 (*κυανέας φάλαγγας* 4, 282) recte interpretatur *πύκνωσιν στρατιωτικὴν*. | 451 sqq. cf. Hom. II. 4, 275 sqq. Declaratur hoc loco tempestas, simul typhonis proprie dicti et turbinis, qui est species typhonis, signa prae se ferens. Plinius N. H. 2, 48, 132 sq. „Defert hic (*typhon*) secum aliquid abruptum e nube gelida, convolvens versansque et ruinam suam illo (*abruptae nubis*) pondere adgravans ac locum ex loco mutans rapida vertigine, praecipua navigantium pestis, non antemnas modo, verum ipsa navigia contorta frangens. Idem correpta secum in caelum refert sorbetque in excelsum. Quod si maiore depressae nubis eruperit specu, sed minus lato, quam procella, nec sine fragore, turbine vocant, proxuma quaeque prosternentem.“ Communia igitur apud Plinium Virgiliumque haec sunt, ut typhon abruptum ac deferre s. deprimere partem nubis, id quod a Virgilio indicatur verbis *abrupto sidere It mare per medium*, turbo prosternere dicatur, quidquid corripit. Alia species typhonis est prester, de quo idem Plinius l. l. „idem ardentior accensiusque dum furit, prester vocatur, amburens contacta pariter et proterens;“ ac de eodem pretere Lucretius 6, 431 sqq. „Hoc fit ubi interdum non quit vis incita venti Rumpere quam coepit (*rumpere*) nubem, sed deprimit, ut sit in mare de caelo tamquam demissa columna.“ Ut autem siderum quorundam ortus et occasus causae tempestatum existimabantur, ita ipsam tempestatem sidus appellat Virgilius 11, 259, aut, ut b. l., nubem procellosam. Et nimbus h. l. est nubes illa depressa columnaеque similis, cum rapida vertigine ambulans, *typhon* a Francogallis appellata, a nobis *Wasserhose*. | 452. Servius „heu, ut solet, ex sua persona interposuit,“ scilicet contra morem Homeri. | 455. *sonitum*, quo strepit iste nimbus. | 456. *Rhoet.*, v. 3, 108. | 457. Servius „Densentur, ut cuneatim dimicent, in cuneorum modum compositi.“ | 458. *grav.*, v.

- 460 Ufentemque Gyas; cadit ipse Tolumnius augur,  
Primus in adversos telum qui torserat hostis.  
Tollitur in caelum clamor, versique vicissim  
Pulverulenta fuga Rutuli dant terga per agros.  
Ipse neque aversos dignatur sternere Morti,  
465 Nec pede congressos aequo nec tela ferentis  
Insequitur; solum densa in caligine Turnum  
Vestigat lustrans, solum in certamina poscit.  
Hoc concussa metu mentem Iuturna virago  
Aurigam Turni media inter lora Metiscum  
470 Excutit, et longe lapsum teimone relinquit;  
Ipsa subit, manibusque undantis flectit habenas,  
Cuncta gerens, vocemque et corpus et arma Metisci.  
Nigra velut magnas domini cum divitis aedes  
Pervolat et pennis alta atria lustrat hirundo,  
475 Pabula parva legens nidisque loquacibus escas;  
Et nunc porticibus vacuis, nunc humida circum  
Stagna sonat: similis medios Iuturna per hostis  
Fertur equis, rapidoque volans obit omnia curru;  
Iamque hic germanum, iamque hic ostentat ovanter;  
480 Nec conferre manum patitur; volat avia longe.  
Haud minus Aeneas tortos legit obvisus orbis,  
Vestigatque virum et disiecta per agmina magna  
Voce vocat. Quotiens oculos coniecit in hostem,  
Alipedumque fugam cursu temptavit equorum,  
485 Aversos totiens currus Iuturna retorsit.  
Heu, quid agat? Vario nequiquam fluctuat aestu,  
Diversaeque vocant animum in contraria curae.  
Huic Messapus, uti laeva duo forte gerebat  
Lenta, levis cursu, praefixa hastilia ferro,  
490 Horum unum certo contorquens dirigit ictu.  
Substitit Aeneas et se collegit in arma,  
Poplite subsidens; apicem tamen incita summum

10, 207.] 460 sq. cf. vs. 258. 266.] 462 sq. Ominosam mortem Tolumnii consecutus est clamor Troianorum et fuga Rutulorum.] 464. *Ipsa*, Aeneas, v. 2, 394. — *st. M.*, v. 8, 566.] 465 sq. nec insequitur (incessit) comminus accedentes ad aequam (pedestrem igitur) pugnam, nec tela ominis inferentes.] 466. *d. in cal.*, cf. vs. 463.] 468. *Hoc*, v. 2, 171. — *ment. conc.*, v. E. 3, 106.] 469. *med. int. l.*, in media aurigatione.] 473. *aedes*, villam puta aliquam.] 475. *Pab. p. l.*, inter volandum; Plin. N. H. 10, 24, 73 „hirundo sola avium non nisi in volatu pascitur.“] 476. *vac.*, patentibus.] 479. ostentat tantum, non patiens eum usquam morari. — *ovant.*, cf. vs. 616.] 480. Nec patitur eum (curru desilire et) cum quoquam pugnare collato gradu, id quod ipsum afferat moram. — *avia*, cf. vs. 614.] 481. *tort. l. o. o.*, varias implicatasque persequitur vias, quo se putat obvium Turno futurum.] 484. *fug. tempt. e.*, equos fugientes assoqui temptavit; similis brevis (praegnantiam barbare nos appellamus) apud Liv. 8, 33 „silentio nequiquam per praekonem temptato.“] 488. *Huic*, in Aeneam, et v. E. 2, 30.] 489. *Lenta*, v. 7, 164.] 491. v. 10, 412.] 492. *κύψας*

- Hasta tulit, summasque excussit vertice cristas.  
 Tum vero adsurgunt irae; insidiisque subactus,  
 495 Diversos ubi sentit equos currumque referri,  
 Multa Iovem et laesi testatus foederis aras,  
 Iam tandem invadit medios, et Marte secundo  
 Terribilis saevam nullo discrimine caedem  
 Suscitāt, irarumque omnis effundit habenas.  
 500 Quis mihi nunc tot acerba deus, quis carmine caedes  
 Diversas, obitumque ducum, quos aequore toto  
 Inque vicem nunc Turnus agit, nunc Troius heros,  
 Expediat? tanton placuit concurrere motu,  
 Iuppiter, aeterna gentis in pace futuras?  
 505 Aeneas Rutulum Sucronem, — ea prima ruentis  
 Pugna loco statuit Teucros — haud multa morantem,  
 Excipit in latus, et, qua fata celerrima, crudum  
 Transadigit costas et cratis pectoris ensem.  
 Turnus equo deiectum Amycum fratremque Diorem,  
 510 Congressus pedes, hunc venientem cuspidē longa,  
 Hunc mucrone ferit, curruque abscisa duorum  
 Suspendit capita et rorantia sanguine portat.  
 Ille Talon Tanaimque Neci fortemque Cethegum,  
 Tris uno congressu, et maestum mittit Oniten,  
 515 Nomen Echionium matrisque genus Peridia;  
 Hic fratres Lycia missos et Apollinis agris,  
 Et iuvenem exosum nequiquam bella Menoeten,  
 Arcada, piscosae cui circum flumina Lernae  
 Ars fuerat pauperque domus, nec nota potentum  
 520 Munera, conductaque pater tellure serebat.  
 Ac velut inmissi diversis partibus ignes  
 Arentem in silvam et virgulta sonantia lauro;  
 Aut ubi decursu rapido de montibus altis

Hom. II. 21, 69.] 494. *subact.*, victus ira propter insidias a Messapo ei factas.] 496. Alii *testatur.*] 499. Ennius „irarum effunde quadrigas.“]] 500—553. *Strages ab Aenea et Turno edita. Summa vi certatur ab utraque parte.*] 501. *Div.*, diversis locis factas.] 502. *Inque v.*, v. G. 2, 290.] 505. *ruentes*, non fugientes, sed intelliges Aeneam cum suo agmine (cf. vs. 456 sq.) per ordines ruentem, dum insequitur Turnum.] 506. *mor.*, qui Aeneam non multum moratur, non multum ei facessit negotii; alii *moratus.*] 507. *Exc. i. l.*, exceptum vulnerat in latere; cf. 1, 82 et 10, 387. — *qua f. cel.*, cf. Hom. II. 8, 84. — *crudum*, v. 10, 682.] 509. *Dior.*, cf. 5, 297.] 513. *Ille*, Aeneas. — *Neci*, v. 8, 566.] 514. Onites maestus erat natura, *συνθροπός*, contra ac Serranus 9, 335 sq. Cydon 10, 325 sq.] 515. *Nom. Ech.*, ipse erat Echionius, s. Echionides, filius Echionis, ut *Albanum nomen*, i. e. Albanus, 6, 763. — *genus*, cf. 7, 556.] 516. *Hic*, Turnus, *fratres*, Clarum et Themonem, cf. 10, 126. — in Lycia erant Patara cum templo, agris (cf. Xenoph. Anab. 5, 3), oraculo Apollinis.] 520. *Munera*: Menoetes pauper fuit piscator, exosus bellum; potentes Romani contra nihil magis cupiebant, quam bella, imperia et, quas inde sperabant, divitias; haec sunt potentum munera.] 521 sq. de incensis saltibus, s. pascuis silvestribus, v. 10, 405. —

- Dant sonitum spumosi amnes, et in aequora currunt  
 525 Quisque suum populatus iter: non segnius ambo  
 Aeneas Turnusque ruunt per proelia; nunc, nunc  
 Fluctuat ira intus; rumpuntur nescia vinci  
 Pectora; nunc totis in volnera viribus itur.  
 Murranum hic, atavos et avorum antiqua sonantem  
 530 Nomina, per regesque actum genus omne Latinos,  
 Praecipitem scopulo atque ingentis turbine saxi  
 Excutit effunditque solo; hunc lora et iuga subter  
 Provolvere rotas; crebro super ungula pulsu  
 Incita nec domini memorum proculcat equorum.  
 535 Ille ruenti Hyllo animisque inmane frementi  
 Occurrit, telumque aurata ad tempora torquet:  
 Olli per galeam fixo stetit hasta cerebro.  
 Dexterâ nec tua te, Graium fortissime, Cretheu,  
 Eripuit Turno; nec di texere Cupencum,  
 540 Aenea veniente, sui; dedit obvia ferro  
 Pectora, nec misero clipei mora profuit aerei.  
 Te quoque Laurentes viderunt, Aeole, campi  
 Oppetere et late terram consternere tergo;  
 Occidis, Argivæ quem non potuere phalanges  
 545 Sternere nec Priami regnorum eversor Achilles;  
 Hic tibi mortis erant metae, domus alta sub Ida,  
 Lyrnesi domus alta, solo Laurente sepulchrum.  
 Totae adeo conversae acies, omnesque Latini,  
 Omnes Dardanidae, Mnestheus acerque Serestus,  
 550 Et Messapus equum domitor, et fortis Asilas,  
 Tuscorumque phalanx, Euandrique Arcades alae,  
 Pro se quisque viri summa nituntur opum vi;  
 Nec mora, nec requies; vasto certamine tendunt.  
 Hic mentem Aeneae genetrix pulcherrima misit,  
 555 Iret ut ad muros urbiq̃ue adverteret agmen

*virg. s. l.*, v. 6, 404. | 524. *in aequ.*, in campos, cf. vs. 742. | 527. *rump.*, rumpuntur quasi pectora exaestuante ira, quam continere non possunt. | 529. *hic*, Aeneas. — *son.*, iactantem. | 530. descendebat ei genus per continuam seriem regulorum Latinorum. | 532. *Excuit curru.* — excussus curru provolutus est subter iuga et lora (*ζυγόδεσμον, ἐννεάπηχυ* apud Hom. II. 24, 270), quibus iugum ad temonem alligatum erat. | 533. *rotas*, v. G. 3, 114. | 534. *nec memor.*, i. e. immemorum; Liv. 1, 25 „qui *nec procul* aberat.“ Cic. Catil. 2, 4, 8 „Nemo non modo Romae, sed *nec ullo* in angulo totius Italiae.“ et v. E. 9, 6. | 535. *Ille*, Turnus. | 536. *aur. ad temp.*, cf. vs. prox., et 9, 50. | 539. Servius „Sane sciendum *Cupencum* Sabinorum lingua sacerdotem vocari. Ergo bene: Nec dii (eum) texere sui.“ | 541. v. E. 6, 78. | 546. *mort. metae*, ut *θανάτοιο μέλος* apud Homer. II. 3, 309. | 548. *conversae* inter se ad pugnandum. — *omnesq̃. L. Omn. Dard.*, i. e. omnes et Latini et Dardanidae, v. E. 4, 6. | 550. *domitor*, v. E. 9, 66. | 554—613. *Tandem Aeneas instinctu divinae matris, quo citius exitum belli reperiret, copias suas ad urbem oppugnandam ducit. Ibi inter summam omnium trepidationem Amata, Turnum cecidisse rata,*

- Ocius et subita turbaret clade Latinos.  
 Ille, ut vestigans diversa per agmina Turnum  
 Huc atque huc acies circumtulit, aspicit urbem  
 Immunem tanti belli atque inpuere quietam.
- 560 Continuo pugnae accendit maioris imago;  
 Mnesthea Sergestumque vocat fortemque Serestum  
 Ductores, tumulumque capit, qua cetera Teucrum  
 Concurrit legio, nec scuta aut spicula densi  
 Deponunt. Celso medius stans aggere fatur:
- 565 Ne qua meis esto dictis mora; Iuppiter hac stat;  
 Neu quis ob inceptum subitum mihi segnior ito.  
 Urbem hodie, caussam belli, regna ipsa Latini,  
 Ni frenum accipere et victi parere fatentur,  
 Eruam, et aequa solo fumantia culmina ponam.
- 570 Scilicet expectem, libeat dum proelia Turno  
 Nostra pati, rursusque velit concurrere victus?  
 Hoc caput, o cives, haec belli summa nefandi.  
 Ferte faces propere, foedusque repositae flammis.  
 Dixerat, atque animis pariter certantibus omnes
- 575 Dant cuneum, densaque ad muros mole feruntur.  
 Scalae improviso subitusque adparuit ignis.  
 Discurrunt alii ad portas primosque trucidant,  
 Ferrum alii torquent et obumbrant aethera telis.  
 Ipse inter primos dextram sub moenia tendit
- 580 Aeneas, magnaue incusat voce Latinum,  
 Testaturque deos iterum se ad proelia cogi,  
 Bis iam Italos hostis, haec iam altera foedera rumpi.  
 Exoritur trepidos inter discordia civis:  
 Urbem alii reserare iubent et pandere portas
- 585 Dardanidis, ipsumque trahunt in moenia regem;  
 Arma ferunt alii et pergunt defendere muros:  
 Inclusas ut cum latebroso in pumice pastor  
 Vestigavit apes, fumoque inplevit amaro;  
 Illae intus trepidae rerum per cerea castra

*mortem sibi consciscit.* | 556. *clade*, incensa eversaue urbe, cf. vs. 569. | 560. *accendit* animum eius. | 563 sq. *nec ... Deponunt*: en morem Romanorum militum imperatorem concionantem sub armis audientium ad Aeneae tempora relatum. | 565. *Iupp.* h. st., hac parte, a nostra stat causa contra eos, qui foedus violaverunt. | 566. *ob inc. s.*, talia enim, quo periculosiora videntur, eo facilius tardant animos. — *mihi* animum prodit minantis, v. E. 8, 6. | 567. *caus. b.*, quia caput est populi bellum inferentis, cf. vs. 572. | 569. *ponam*, faciam; Soph. Antig. 670 „ἦδ' (ἡ ἀναρχία) ἀναστάτους οἴκους τ' ἐθυσιν.“ | 572. *haec b. s.*, hic vertitur cardo belli; cf. vs. 567. | 575. *D. cun.*, v. vs. 457 et 5, 276. | 577. *pr. tr.*, cf. 2, 334 sq. | 582. prius foedus significatur 7, 285. | 586. *pergunt*, eunt, militare verbum. | 587. cf. G. 4, 44. | 588. Ut Graeci poetae Aoristo utuntur in comparationibus et generalibus sententiis ex usu et consuetudine rerum ante actarum collectis, ita Latini Perfecto; et v. G. 1, 49. | 589. *tr. rer.*, trepidantes



- 590 Discurrunt, magnisque acuunt stridoribus **fras**;  
 Volvitur ater odor tectis; tum murmure caeco  
 Intus saxa sonant; vacuas it fumus ad auras.  
 Accidit haec fessis etiam fortuna Latinis,  
 Quae totam luctu concussit funditus urbem.
- 595 Regina ut tectis venientem prospicit hostem,  
 Incessi muros, ignis ad tecta volare,  
 Nusquam acies contra Rutulas, nulla agmina Turni:  
 Infelix pugnae iuvenem in certamine credit  
 Exstinctum, et, subito mentem turbata dolore,
- 600 Se caussam clamat crimenque caputque malorum,  
 Multaque per maestum demens effata furorem,  
 Purpureos moritura manu discindit amictus,  
 Et nodum informis leti trabe nectit ab alta.  
 Quam cladem miserae postquam acceperere Latinae,
- 605 Filia prima manu flavos Lavinia crinis  
 Et roseas laniata genas, tum cetera circum  
 Turba, furit; resonant late plangoribus aedes.  
 Hinc totam infelix volgatur fama per urbem.  
 Demittunt mentes; it scissa veste Latinus,
- 610 Coniugis attonitus fatis urbisque ruina,  
 Canitiem immundo perfusam pulvere turpans,  
 Multaque se incusat, qui non acceperit ante  
 Dardanium Aenean generumque adsciverit ultro.  
 Interea extremo bellator in aequore Turnus
- 615 Palantis sequitur paucos iam segnior, atque  
 Iam minus atque minus successu laetus equorum.  
 Attulit hunc illi caecis terroribus aura  
 Commixtum clamorem, arrectasque inpulit auris  
 Confusae sonus urbis et inlaetabile murmur.
- 620 Hei mihi! quid tanto turbantur mœnia luctu?  
 Quisve ruit tantus diversa clamor ab urbe?  
 Sic ait, adductisque amens subsistit habenis.  
 Atque huic, in faciem soror ut conversa Metisci  
 Aurigae currumque et equos et lora regebat,
- 625 Talibus occurrit dictis: Hac, Turne, sequamur

et incertae, quid agaat, s. incertae rerum suarum; v. 1, 178.] 591. *at. odor*, v. 7, 463.] 600. *crim.*, ream.] 603. Eurip. Hippol. 802 „*βροχον χρεμαστόν ἄγχονς ἀνῆπατο*.“ — *inform.*, Servius „*nil hac morte deformius*.“ et cf. Sil. It. 1, 166.]] 614—696. *Turnus territus strepitu ab urbe ad aures accidente perspectoque dolo lurnas non passus se diutius circumagi certiorque de statu rerum deque morte Amatae factus retineri iam nequit, quin solus contendat cum solo Aenea.*] 616. *successu equor.*, successu pugnae equestris; ob tarditatem fessorum equorum.] 617. *caecis*, quorum causam ignorabat.] 618. *arrectas* ad audiendum, ut 2, 303. — *impulit*, ut G. 4, 349 „*iterum maternas impulit aures luctus Aristaei*“, „*gravius verbum, quam simplex pepulit*; Cic. de N. D. 2, 57 „*sensus (auditus) a vocibus pulsus*.“ Soph. Ant. 1173.

- Troiugenas, qua prima viam victoria pandit;  
 Sunt alii, qui tecta manu defendere possint.  
 Ingruit Aeneas Italis et proelia miscet,  
 Et nos saeva manu mittamus funera Teucris.
- 630 Nec numero inferior, pugnae nec honore recedes.  
 Turnus ad haec:  
 O soror, et dudum adgnovi, cum prima per artem  
 Foedera turbasti teque haec in bella dedisti,  
 Et nunc nequiquam fallis dea. Sed quis Olympo
- 635 Demissam tantos voluit te ferre labores?  
 An fratris miseri letum ut crudele videres?  
 Nam quid ago? aut quae iam spondet Fortuna salutem?  
 Vidi oculos ante ipse meos me voce vocantem  
 Murranum, quo non superat mihi carior alter,
- 640 Oppetere ingentem atque ingenti vulnere victum.  
 Occidit infelix, ne nostrum dedecus Ufens  
 Aspiceret; Teucris potiuntur corpore et armis.  
 Exscindine domos, id rebus defuit unum,  
 Perpetiar? dextra nec Drancis dicta refellam?
- 645 Terga dabo, et Turnum fugientem haec terra videbit?  
 Usque adeone mori miserum est? Vos o mihi Manes  
 Este boni, quoniam Superis adversa voluntas.  
 Sancta ad vos anima, atque istius inscia culpa  
 Descendam, magnorum haud umquam indignus avorum.
- 650 Vix ea fatus erat: medios volat, ecce, per hostis  
 Vectus equo spumante Saces, adversa sagitta  
 Saucius ora, ruitque inplorans nomine Turnum:  
 Turne, in te suprema salus; miserere tuorum.  
 Fulminat Aeneas armis, summasque minatur
- 655 Deiecturum arces Italum excidioque daturum;  
 Iamque faces ad tecta volant. In te ora Latini,  
 In te oculos referunt; mussat rex ipse Latinus,  
 Quos generos vocet, aut quae sese ad foedera flectat.

„καὶ με φθόγγος οἰκείων κακῶν βάλλει δι' ὧτων.“ | 627. cf. Hom. Il. 13, 312. | 629. *mitt. f. T.*, mittendo tela inferamus mortem Teucris. | 630. *numero* caesorum. | 632. *agnovi* te deam. — *prima*, luturna, quod eius auctoritate foedus est turbatum, v. 4, 548. | 634. *nequ. f.*, frustra latere studes; non fefellit me, haec non hominis alicuius, sed tuo, deae, consilio geri. | 637 sqq. Hoc dicit Turnus: nullam sibi spem salutis relinquere; occisos esse fortissimos homines sibi que coniunctissimos; superesse, ut urbs excindatur, ipse fuga hosti se subtrahat; tanto dedecore potius esse mortem. | 637. *quid a.*, v. 10, 675. | 638. *vocē v.*, v. 4, 681. | 639. *sup.*, cf. 3, 339. | 641. *dedecus*, quod vertitur in praesenti clade Italorum suo (Turni) ductu accepta, et cf. 11, 416 sqq. — Ceterum v. G. 3, 387. | 647. *boni*, v. 1, 734. | 648. *animā*; atque, cf. 3, 464 et v. E. 2, 53. — *culpa*, turpis fugae puta. | 653. *supr. s.*, postrema, quae superest una; Silius 2, 283 „*postrema* salus rerum patriaeque.“ | 657. *mussat*, cunctatur, metuens aperire, quid sentiat, cf. vs. 718. | 658. *Quos generos*, v. vs. 40. |

- Praeterea regina, tui fidissima, dextra  
 660 Occidit ipsa sua, lucemque exterrita fugit.  
 Soli pro portis Messapus et acer Atinas  
 Sustenant acies. Circum hos utrimque phalanges  
 Stant densae, strictisque seges mucronibus horret  
 Ferrea: tu currum deserto in gramine versas.  
 665 Obstipuit varia confusus imagine rerum  
 Turnus, et obtutu tacito stetit; aestuat ingens  
 Uno in corde pudor mixtoque insania luctu  
 Et furiis agitatus amor et conscia virtus.  
 Ut primum discussae umbrae et lux reddita menti,  
 670 Ardentis oculorum orbis ad moenia torsit  
 Turbidus, eque rotis magnam respexit ad urbem.  
 Ecce autem, flammis inter tabulata volutus  
 Ad caelum undabat vertex turrimque tenebat,  
 Turrim, compactis trabibus quam eduxerat ipse  
 675 Subdideratque rotas pontisque instraverat altos.  
 Iam iam fata, soror, superant; absiste morari;  
 Quo deus et quo dura vocat Fortuna, sequamur.  
 Stat conferre manum Aeneae, stat, quidquid acerbi est,  
 Morte pati; neque me indecorem, germana, videbis  
 680 Amplius. Hunc, oro, sine me furere ante furorem.  
 Dixit, et e curru saltum dedit ocius arvis,  
 Perque hostis, per tela ruit, maestamque sororem  
 Deserit, ac rapido cursu media agmina rumpit.  
 Ac veluti montis saxum de vertice praeceps  
 685 Cum ruit avolsu vento, seu turbidus imber  
 Proluit, aut annis solvit sublapsa vetustas;  
 Fertur in abruptum magno mons improbus actu,  
 Exsultatque solo, silvas, armenta, virosque  
 Involvens secum: disiecta per agmina Turnus

662. *acies*, unam auxiliarium Messapus, alteram Rutulorum Atinas. | 664. cf. vs. 614 et v. 2, 714. | 665. *var. im. rer.*, Servius „multiplici auntio, quod regina periit, quod urbs oppugnatur, quo omnes Latini in illum oculos referunt, quod dubitat Latinus, quos generos vocet.“ | 667. *mixto*, v. E. 10, 55. — *insania*, insana pugnandi cupiditas, cf. 7, 461. 550. | 671. v. G. 3, 114. | 672. *tab.*, cf. 2, 464. — *flammis undabat vertex*, quasi undis flammaram consurgebat vertex. | 675. *pontis*, v. 9, 170. | 676. Ex conflagratione turris ab ipso aediæcatae Turnus omen instantis sibi mortis capit. | 678 sq. stat *per mortem oppetendam* subire, quidquid acerbi est in ipsa scilicet morte. | 680. sine, quæso, me hunc, quo ardeo, furorem furere (huic, qua serveo, decertandi cum Aenea cupiditati satisfacere), antequam descendam ad Manes; v. 2, 690; furoris signa cognoscas ex proximis versibus, et similis ante congressum furoris crebra sunt exempla, ut 8, 228. 11, 486. | 681. v. 5, 276 et E. 2, 30. Hom. II. 3, 29. | 684 sqq. cf. Hom. II. 13, 137 sqq. | 684. v. 1, 148. | 685 sq. quod (sive) ventus avellit sive imber proluit (utrumque fit aperta subitaque vi), aut .. *odor auch* .. vetustas solvit, quod fit paulatim ac latenter. | 686. *sublapsa*, quia sensim subrepat vetustas. | 687. *improbus*, vebementissime concitatus, v. G. 1, 119. |

- 690 Sic urbis ruit ad muros, ubi plurima fuso  
Sanguine terra madet striduntque hastilibus aurae;  
Significatque manu, et magno simul incipit ore:  
Parcite iam, Rutuli, et vos tela inhibete, Latini;  
Quaecumque est Fortuna, mea est; me verius unum
- 695 Pro vobis foedus luere et decernere ferro.  
Discessere omnes medii spatiumque dedere.  
At pater Aeneas, audito nomine Turni,  
Deserit et muros, et summas deserit arces,  
Praecipitatque moras omnis, opera omnia rumpit,
- 700 Laetitia exsultans, horrendumque intonat armis:  
Quantus Athos, aut quantus Eryx, aut ipse, coruscis  
Cum fremit ilicibus, quantus, gaudetque nivali  
Vertice se attollens pater Appenninus ad auras.  
Iam vero et Rutuli certatim et Troes et omnes
- 705 Convertere oculos Itali, quique alta tenebant  
Moenia, quique imos pulsabant ariete muros;  
Armaque deposuere humeris. Stupet ipse Latinus  
Ingentis, genitos diversis partibus orbis,  
Inter se coisse viros et cernere ferro.
- 710 Atque illi, ut vacuo patuerunt aequore campi,  
Procursu rapido, coniectis eminus hastis,  
Invadunt Martem clipeis atque aere sonoro.  
Dat gemitum tellus; tum crebros ensibus ictus  
Congeminant; fors et virtus miscentur in unum.
- 715 Ac velut ingenti Sila summove Taburno  
Cum duo conversis inimica in proelia tauri  
Frontibus incurrunt; pavidi cessere magistri;

694. quisquis est exitus huius certaminis, omnis ad me pertinet; *ergo* verius (*iustus*, ut apud Horat. Epist. 1, 7, 98) est me unum Pro v. f. l. || 697—745. *Digladantur inter se Turnus et Aeneas. Turnus fracto gladio inermis fugit.* | 698. *deserit* oppugnationem summarum arcium, turrium; cf. vs. 674. | 699. *Pr. m. o.*, summa cum festinatione profligat omnem moram. | 701 sqq. cf. Hom. 13, 754 Ipsa paulo insolentior structura verborum indicat animum poetae vehementius commotum in magnifica rerum specie mirabilius augenda. Spectat autem haec comparatio cum ad proceritatem, tum ad hiemale tempus sonorasque procillas eo tempore fieri solitas, verbaque *cum fr. ilicibus* respondent horrendo armorum Aeneae sono vs. 700. — *ipse*, per hoc Pronomen Appenninus opponitur Athoni et Eryci ut propinquus et e Latie conspicuus. — *pater* dicitur Appenninus, quia commune est huic monti nomen cum *Iove Appennino* (cf. Inscriptt. Lat. Orell. 1220.), cuius templum exstat ad oppidum, quod *la Scheggia* hodie appellatur, v. G. 1, 163. saepe autem dei cum rebus, quibus praesunt, commiscuntur a poetis, v. G. 1, 295. Hom. II. 21, 143. „*Περὶ θοῖα ... τῇ δὲ πύλῃ Πτολεμὸς βασιλεύς*“, adde vs. 130. 136 et *sanctus Mons* deus Tmolus appellatur ab Ovid. Met. 11, 171; vide etiam descriptionem Atlantis supra 4, 247 sqq. — *gaudet se attollens*, v. G. 2, 510. | 707. *Arma*, clipeos, cf. vs. 130. — Stupefactus ipse, ut ceteri, Latinus oculos adicit tanto tamque memorabili spectaculo. | 712. *Inv. M.*, ineunt pugnam, v. G. 1, 295. — *clipeis*, v. 11, 284. | 713. *Dat g. t.*, „pulsu pedum“ Servius, cf. vs. 334 sq. 9, 709. | 715. v. G. 2, 38 et 3, 219. | 717. *cessere*,

- Stat pecus omne metu mutum, mussantque iuvencae;  
 Quis nemori inperitet, quem tota armenta sequantur;  
 720 Illi inter sese multa vi volnera miscent,  
 Cornuaque obnixa infigunt, et sanguine largo  
 Colla armosque lavant; gemitu nemus omne remugit:  
 Non aliter Tros Aeneas et Daunius heros  
 Concurrunt clipeis; ingens fragor aethera conplet.  
 725 Iuppiter ipse duas aequato examine lances  
 Sustinet et fata inponit diversa duorum,  
 Quem damnet labor, et quo vergat pondere letum.  
 Emicat hic, inpune putans, et corpore toto  
 Alte sublatum consurgit Turnus in ensem,  
 730 Et ferit. Exclamant Troes trepidique Latini,  
 Arrectaeque amborum acies. At perfidus ensis  
 Frangitur, in medioque ardentem deserit ictu,  
 Ni fuga subsidio subeat. Fugit ocior Euro,  
 Ut capulum ignotum dextramque aspexit inermem.  
 735 Fama est, praecipitem, cum prima in proelia iunctos  
 Conscebat equos, patrio mucrone relicto,  
 Dum trepidat, ferrum aurigae rapuisse Metisci;  
 Idque diu, dum terga dabant palantia Teucris,  
 Suffecit; postquam arma dei ad Volcania ventum est,  
 740 Mortalis mucro, glacies ceu futilis, ictu  
 Dissiluit; fulva resplendet fragmen arena.  
 Ergo amens diversa fuga petit aequora Turnus,  
 Et nunc huc, inde huc incertos impicat orbis;

v. vs. 588. | 718. *mussant*, v. vs. 657. | 724. v. vs. 712. | 725. cf. Hom. II. 8, 69 sqq. 22, 209 sqq. — *aequ. ex.*, sic ut examen neutram in partem vergat. | 727. *ut pateat, quem labor* (pugna, ut πόρος) *damnet*, destinat morti; v. G. 3, 562. — *quo v. p. l.*, utro pondere (pondere fatorum Aeneae an Turni) deprimatur lanx letum portendens. — Ceterum frigent haec, vss. 725—727, cum alias ob causas, tum propterea, quod Iovi non ignota esse ea fata dudum multis locis cognovimus; noluit scilicet poeta, nimio ductus imitandi studio, nobilem illam apud Homerum ψυχοσάσσαν tacitus praeterire. | 728. *hic*, dum ita inter se contendunt; interrupto per vss. 725—727 narrationis ordine reditur per hoc Adverbium ad vs. 724. — *inp. putans* id sibi futurum, nactus scilicet opportunitatem ad feriendum forte (vs. 714) sibi oblatam. | 729. v. 9, 749. | 730. *Et ferit*. Egregie declaratur suspensus expectatione metusque animus cum per caesuram post dactylum in principio versus positum, tum per interiecta illa *Exclamant Troes* cet.; et cf. 5, 643. | 732. *ensis* cum deserit *ac proinde prodidisset adversario*, ni cet.; v. G. 3, 562. | 735. *prima in pr.*, i. e. tum, cum iturus erat in proelium, cf. vs. 103. | 736. *patrio*, cf. vs. 90 sq. | 739. *arma dei Volc.*, a. dei Volcani; Soph. Oed. R. 243 „τὸ Πυθιχὸν θεοῦ μαντεῖον.“ Silius 3, 392 „Nebrissa dei Nysaeis conscia sacris.“ similiter ipse Homerus II. 17, 272 „δῆϊον χρὸς χύρμα γενέσθαι Τρωῆσιν.“ i. e. χρὸς δῆϊον Τρώων adde II. 2, 54. Prop. 3 [4] 21, 27 „Librorumque tuos, docte Menandre, sales.“ | 742. *diversa*, quia diversus abit, qui fugit, cf. 11, 855. G. 4, 500. — Ceterum invenit Hectoris fugam cum hac comparare, Hom. II. 22, 186 sqq. | 743. *incert.*,

- Undique enim Teucri densa includere corona,  
 745 Atque hinc vasta palus, hinc ardua moenia cingunt.  
 Nec minus Aeneas, quamquam tardante sagitta  
 Interdum genua inpediunt cursumque recusant,  
 Insequitur, trepidique pedem pede fervidus arguet:  
 Inclusum veluti si quando flumine nactus  
 750 Cervum aut puniceae saeptum formidine pennae  
 Venator cursu canis et latratibus instat;  
 Ille autem, insidiis et ripa territus alta,  
 Mille fugit refugitque vias: at vividus UMBER  
 Haeret hians, iam iamque tenet, similisque tenenti  
 755 Increpuit malis, morsuque elusus inani est.  
 Tum vero exoritur clamor, ripaeque lacusque  
 Responsant circa, et caelum tonat omne tumultu.  
 Ille simul fugiens Rutulos simul increpat omnis,  
 Nomine quemque vocans, notumque efflagitat ensem.  
 760 Aeneas mortem contra praesensque minatur  
 Exitium, si quisquam adeat, terretque trementis,  
 Excisurum urbem minitans, et saucius instat.  
 Quinque orbis explent cursu, totidemque retexunt  
 Huc illuc; neque enim levia aut ludicra petuntur  
 765 Praemia, sed Turni de vita et sanguine certant.  
 Forte sacer Fauno foliis oleaster amaris  
 Hic steterat, nautis olim venerabile lignum,  
 Servati ex undis ubi figere dona solebant  
 Laurenti divo et votas suspendere vestes;  
 770 Sed stirpem Teucri nullo discrimine sacrum  
 Sustulerant, puro ut possent concurrere campo.  
 Hic hasta Aeneae stabat; huc impetus illam  
 Detulerat, fixam et lenta in radice tenebat.  
 Incubuit voluitque manu convellere ferrum  
 775 Dardanides, teloque sequi, quem prendere cursu  
 Non poterat. Tum vero amens formidine Turnus,  
 Faune, precor, miserere, inquit, tuque optuma ferrum

quia nunc huc, nunc illuc nec in certum semper orbem fertur. | 745. *palus*, „quae nunc non apparet.“ Servius. || 746—790. *Insequitur Aeneas. Hastam eius in radice arboris haerentem, postquam Turno suum gladium reddidit Iuturna, Venus extrahit.* | 746. *sagitta*, vulnere e sagitta, cf. vs. 319. — *Alii tardata.* | 749 sqq. cf. Hom. II. 22, 189 sqq. | 750. v. G. 3, 372. | 751. Silius 3, 294 sq.: „cum densa vagis latratibus inplet Venator dumeta Lacon.“ similiter *bellator equus* 10, 891. | 752. *insid.*, i. q. formidine vs. 750. — *et, males aut scriptum*; sed satis visum poetae, talem ἀρπίστην ut putidam aspernanti, haec semel discreta posuisse vs. 750. | 758. *simul fug.*, v. 10, 856. | 764. *levia aut lud.*, quales sunt coronae in ludorum certaminibus. | 767. *lignum*, „humiliter“, ait Servius, quia ex ea arbore solum truncum vetustas reliquisse videatur. | 769. cf. Horat. Od. 1, 5, 13 sqq. | 770. cf. vs. 116 sq. — *stirps* ubi de arbore dicitur apud Virgilium, masculinum est. | 772. *stabat*, v. E. 1, 39. | 773. cf. vs. 711. | 774.

- Terra tene, colui vestros si semper honores,  
 Quos contra Aeneadae bello fecere profanos.  
 780 Dixit, opemque dei non cassa in vota vocavit.  
 Namque diu luctans lentoque in stirpe moratus  
 Viribus haud ullis valuit discludere morsus  
 Roboris Aeneas. Dum nititur acer et instat,  
 Rursus in aurigae faciem mutata Metisci  
 785 Procurrit fratrique ensem dea Daunian reddidit.  
 Quod Venus audaci Nymphae indignata licere,  
 Accessit, telumque alta ab radice revellit.  
 Olli sublimes, armis animisque refectioni,  
 Hic gladio fidens, hic acer et arduus hasta,  
 790 Adstint contra certamina Martis anhelant.  
 Iunonem interea Rex omnipotentis Olympi  
 Adloquitur, fulva pugnas de nube tuentem:  
 Quae iam finis erit, coniunx? quid denique restat?  
 Indigetem Aenean scis ipsa, et scire fateris,  
 795 Deberi caelo, fatisque ad sidera tolli.  
 Quid struis? aut qua spe gelidis in nubibus haeres?  
 Mortalin decuit violari vulnere divum?  
 Aut ensem — quid enim sine te Iuturna valeret? —  
 Ereptum reddi Turno, et vim crescere victis?  
 800 Desine iam tandem, precibusque inflectere nostris;  
 Nec te tantus edat tacitam dolor, et mihi curae  
 Saepe tuo dulci tristes ex ore recurrant.  
 Ventum ad supremum est. Terris agitare vel undis  
 Troianos potuisti, infandum accendere bellum,  
 805 Deformare domum et luctu miscere hymenaeos:  
 Ulterius temptare veto. Sic Iuppiter orsus;  
 Sic dea submisso contra Saturnia voltu:  
 Ista quidem quia nota mihi tua, magne, voluntas,  
 Iuppiter, et Turnum et terras invita reliquit;

cf. Hom. II. 21, 174 sqq.] 779. cf. vs. 770 sq. | 782. *morsus Roboris*, radices, quae forcipis instar cuspidem hastae retinebat. | 789. *ard.*, v. 8, 299. | 790. *Ads. c. cert.*, adstint contra suum quisque adversarium, proprie: Adstint contra sui quisque adversarii certamen. — Alii *certamina*. — *Mars anhelus*, pugna, quae anhelare facit. | 791—842. *Interea Iuppiter leniter obiurgatam Iunonem ulterius saevire vetat. Illa, concesso, quod petit, ne patrium nomen, sermonem, vestitum Latini mulent, placata discedit.* | 791. *omn. O.*, v. 10, 1. | 793. Verbis *Quae iam finis erit* respondet versus 796, verbis *quid denique restat* versus 797—799. | 794. *Indig.*, v. G. 1, 498. | 795. v. G. 4, 325. | 797. decuit te tuo consilio fieri, ut deus futurus vulneraretur a mortali? cf. vs. 319. Negat Iuno id suo suasu factum vs. 813 sqq. | 799. *Ereptum* vi quadam fati. — *victis*, ei, qui habendus iam pro victo; v. E. 3, 7. | 801 sq. Nec tacitam te edat ira, nec proferendis saepe irae causis incommoda mihi, s. depono omnem iram sive occultam sive apertam. *et recurrant*, i. e. *nec recurrant*; negatio enim in principio versus posita spectat etiam ad hoc verbum. Modo autem Iuno tacita irae indulget (id quod tum fiebat), modo (quod saepius) querelis obtundit aures Iovis. | 805.

- 810 Nec tu me aëria solam nunc sede videres  
 Digna indigna pati, sed flammis cincta sub ipsa  
 Starem acie traheremque inimica in proelia Teucros.  
 Iturnam misero, fateor, succurrere fratri  
 Suasi et pro vita maiora audere probavi;
- 815 Non ut tela tamen, non ut contenderet arcum;  
 Adiuro Stygii caput inplacabile fontis,  
 Una superstitio superis quae reddita divis.  
 Et nunc cedo equidem, pugnasque exosa relinquo.  
 Illud te, nulla fati quod lege tenetur,
- 820 Pro Latio obtestor, pro maiestate tuorum:  
 Cum iam connubiis pacem felicibus, esto,  
 Component, cum iam leges et foedera iungent,  
 Ne vetus indigenas nomen mutare Latinos,  
 Neu Troas fieri iubeas Teucrosque vocari,
- 825 Aut vocem mutare viros, aut vertere vestem.  
 Sit Latium, sint Albani per saecula reges,  
 Sit Romana potens Italia virtute propago;  
 Occidit, occideritque sinas cum nomine Troia.  
 Olli subridens hominum rerumque repertor:
- 830 Es germana Iovis Saturnique altera proles:  
 Irarum tantos volvis sub pectore fluctus!  
 Verum age et inceptum frustra submitte furorem:  
 Do, quod vis, et me victusque volensque remitto.  
 Sermonem Ausonii patrium moresque tenebunt,
- 835 Utque est, nomen erit; commixti corpore tantum  
 Subsident Teucris; morem ritusque sacrorum  
 Adiciam; faciamque omnis uno ore Latinos.  
 Hinc genus Ausonio mixtum quod sanguine surget,

*Defi d., cf. vs. 603.* | 810. *Nec*, sc. si illa ignota mihi esset; v. G. 3, 562. | 811. *Digna indigna*, quidvis; similiter *aequa iniqua*, *fanda nefanda*. Sallust. Cat. 11 „avaritia nec copia nec inopia minuitur,” i. e. prorsus nulla re. — *flammis c.*, flammis undique collucens; Silius 12, 727 „Mirantem Superum vultus et *flammea* membra.” | 817. *Superst*, religio, quam habet iusiurandum; et cf. Hom. II. 15, 37 sq. — *reddita*, facta, constituta. | 819. *tenetur lege*, quod fieri vel iubetur lege vel vetatur; Ovid. Met. 10, 203 „Quod quoniam fatali lege tenemur,” i. e. vetamur. | 820. *pro mai. tuor.*, Servius „Respexit ad Saturnum, qui in Italia aliquando regnaverat; inde ait *tuorum*, nam et Latinus inde originem ducit, 7, 48 sq.” | 822. *leges* h. l. sunt condiciones ipsius foederis. | 823 sqq. Ea re declarat poeta, quare in his rebus omnibus (quod sane mirabile videri debebat) nullum vestigium Troianae originis restet apud Romanos. | 825. cf. vs. 834. | 827. Sint Romani, atque ita quidem, ut Italorum virtute pollere videantur, non Troianorum. | 830 sq. „Probas te Iovis sororem Saturnique prolem; nam maximos irarum fluctus animo volvis;” uterque autem, et Saturnus et Iuppiter, saevus erat et iracundus; et v. 5, 404 et E. 1, 12. Iuppiter apud Hom. II. 5, 892 „*μέγος ἐστὶν ἄσχετον, οὐκ ἐνείκετον, Ἥρης.*” — Alii *Et germ.* — *altera*, una ipse Iuppiter, altera Iuno. | 835 sqq. nihil aliud, nisi hoc (*tantum*), concedam Teucris, ut se commisceant cum populo Latino in eoque lateant s. subsident, coniuncto tamen sacrorum Troianorum more rituque cum



- Supra homines, supra ire deos pietate videbis,  
 840 Nec gens ulla tuos aequae celebrabit honores.  
 Adnuat his Iuno et mentem laetata retorsit.  
 Interea excedit caelo nubemque relinquit.  
 His actis aliud Genitor secum ipse volutat,  
 Iuturnamque parat fratris dimittere ab armis.  
 845 Dicuntur geminae pestes cognomine Dirae,  
 Quas et Tartaream Nox intempesta Megaeram  
 Uno eodemque tulit partu, paribusque revinxit  
 Serpentum spiris, ventosasque addidit alas.  
 Hae Iovis ad solium saevique in limine regis  
 850 Adparent, acuuntque metum mortalibus aegris,  
 Si quando letum horrificum morbosque deum rex  
 Molitur, meritas aut bello territat urbes.  
 Harum unam celerem demisit ab aethere summo  
 Iuppiter, inque omen Iuturnae occurrere iussit.  
 855 Illa volat, celerique ad terram turbine fertur.  
 Non secus, ac nervo per nubem impulsa sagitta,  
 Armata saevi Parthus quam felle veneni,  
 Parthus, sive Cydon, telum inmedicabile, torsit,  
 Stridens et celeris incognita transilit umbras:  
 860 Talis se sata Nocte tulit, terrasque petivit.  
 Postquam acies videt Iliacas atque agmina Turni,  
 Alitis in parvae subitam collecta figuram,

veteribus Latinorum sacris, unaque erit totius populi facies. | 839. *supra homines, supra deos*, i. e. *supra omnes*; cf. 11, 509 sq. | 842. *Interea*, dum ita placata est. | 843—886. *Iuppiter, quo Iuturnam a Turno separat, mittit unam ex Diris, quae sumta noctuae specie volitat ante oculos Turni. Eo monstro territa Iuturna cum luctu gemituque discedit a fratre.* | 844. *fr. dim. ab a.*, facere, ut desinat adesse decertanti fratri. | 845. *geminæ*, Allecto et Tisiphone Furiae cum apparent Iovi, Diras cognominatas esse refert Servius 4, 609. — *cogn.*, nomine ex re nato ipsisque conveniente; apud probatos enim scriptores cognomen semper significat nomen aliquo modo adscitum. | 848. *ventosas*, ipsarum concitatione ventum moventes. | 850. *apparere* proprio verbo dicuntur ministri, unde apparitores dicti. | 854. *in omen*, ut omen esset. | 856 sqq. Videtur haec comparatio ad pugnam aliquam a Parthis factam spectare, qualem aliquot abhinc annis Arabum fuisse audivimus per densissimas nebulas (*per nubem, umbras* vs. 859) glandes mortiferas in aciem Francogallicam mittentium. In eo, quo Crassus ille dives cecidit, proelio similiter exitiosus fuit pulvis a Parthis equitibus excitatus, cf. Plut. T. I. p. 558. E. F. Itaque fieri etiam potuit, ut Parthi de industria quaererent nebulosos dies ad committenda proelia. — Cur autem Parthi et Cretenses hic nominantur? | 858. *Parthus ... Parthus s. C.*, cf. 6, 495 sq. G. 1, 10 sq. — *Cydon*, Cydonia, oppido Cretae, oriundus. | 859. *celeres*, celeriter telum transmittentes; et brevi intervallo ter ponitur idem Adiectivum, quo urgeatur rei celeritas. — *incogn.*, non ante visa, quam feriat. | 860. *Talis*, v. 3, 310. | 862. *parvae*, Servius „noctuae dicit, non bubonem, qui maior est.“ *collecta* autem (i. e. contracta) cum ipsum parvitatem quandam indicet, satis fuerat scribere *conversa*; sed solent veteres scriptores vocabula cum Verbis cognatae significationis coniungere, ut Cic. Partit. or. 32 „partitionem distribuere“ et cap. 40 „dividere partitiones“, i. e. facere. Soph. El. 741 „πάντας ἀσφα-

- Quae quondam in bustis aut culminibus desertis  
 Nocte sedens serum canit inportuna per umbras;  
 865 Hanc versa in faciem Turni se pestis ob ora  
 Fertque refertque sonans, clipeumque everberat alis.  
 Illi membra novus solvit formidine torpor,  
 Arrectaeque hōrrore comae et vox faucibus haesit.  
 At, procul ut Dirae stridorem adgnovit et alas,  
 870 Infelix crinis scindit Iuturna solutos,  
 Unguibus ora soror foedans et pectora pugnis.  
 Quid nunc te tua, Turne, potest germana iuvare  
 Aut quid iam durae superat mihi? qua tibi lucem  
 Arte morer? talin possum me opponere monstro?  
 875 Iam iam linquo acies. Ne me terrete timentem,  
 Obscenae volucres; alarum verbera nosco  
 Letalemque sonum; nec fallunt iussa superba  
 Magnanimi Iovis. Haec pro virginitate reponit?  
 Quo vitam dedit aeternam? cur mortis adempta est  
 880 Condicio? possem tantos finire dolores  
 Nunc certe et misero fratri comes ire per umbras.  
 Immortalis ego? aut quicquam mihi dulce meorum  
 Te sine, frater, erit? O quae satis alta dehiscat  
 Terra mihi Manisque deam demittat ad imos!  
 885 Tantum effata caput glauco contextit amictu,  
 Multa gemens, et se fluvio dea condidit alto.  
 Aeneas instat contra telumque coruscat,  
 Ingens, arboreum, et saevo sic pectore fatur:  
 Quae nunc deinde mora est? aut quid iam, Turne, retractas?  
 890 Non cursu, saevis certandum est comminus armis.

λεῖς δρόμους ὠροῦντο. Herod. 7, 51 „πλεῦνα λόγον ἐκτεῖναι.“ —  
*subitam*, v. 7, 67. | 863. cf. 4, 462 sq. | 864. *inport.*, canens importunum, feralē  
 puta, carmen. | 866. v. 4, 438. | 867. *novus*, qualem numquam ante senserat. |  
 869. *strid. et alas*, i. e. stridorem alarum, v. 1, 61. | 873. *durās*, crudeli;  
 culpam, quae erat fortunae, in se transfert Iuturna, ut solent, qui graviter dolent  
 iniquitatem fati, quod praeveritisse cupiant, dummodo potuerint; Silius 13, 656  
 „nam cur Ulla fuere adeo, quibus a te *saevus* abessem, Momenta;“ quem  
 apparet eundem in modum accepisse Virgilianum illud 4, 681 „sic te ut posita  
*crudelis* abessem,“ ubi Donatus „in his casibus te posita alicui ego crudelis et  
 saeva.“ | 875. *terrere timentem*, ut *exhortari furem* 11, 609. | 876. *Obso.*  
 v., i. e. una ex earum genere, quae obscae s. mali omnis sunt, v. E. 3, 7 et  
 G. 1, 470. | 877. *nec f. i. s. M. I.*, intelligo Iovis iussu mihi iam desistendum  
 esse ab incepto, cf. vs. 844. | 878. cf. vs. 141. | 880. *possem*, *ni adempta*  
*esset*, t. f. d.; v. G. 3, 562. | 882. Quid iuvat me immortalitas, vel ea, quae  
 mihi praeterea grata olim fuerant? — *meorum*, meorum rerum. | 883. *O quae*,  
 v. G. 2, 488. — *dehisc.* *Terra mihi*, v. 4, 24. | 885. *Tantum*, nec plus. —  
*cap. cont. am.*, quod est signum luctus. — *glauco*, v. 8, 33. | 886. *fluvio*, v.  
 vs. 139. || 887—952. *Aeneas victoria, mors Turni.* | 888. lunge *Aeneas ingens*,  
 nisi forte poeta imitari voluit Homericum illud ἔγχος βοῖδῷ, μέγα, στιβαρόν.  
 — *arbor.*, cf. vs. 294. | 889. *deinde*, cum res ita se habeant taque ensam recuperaveris. — *retractas*, Cic. Philipp. 14, 14, cum sine ulla retractatione pro

- Verte omnis tete in facies, et contrahe, quidquid  
 Sive animis sive arte vales; opta ardua pennis  
 Astra sequi, clausumque cava te condere terra.  
 Ille caput quassans: Non me tua fervida terrent  
 895 Dicta, ferox; di me terrent et Iuppiter hostis.  
 Nec plura effatus saxum circumspicit ingens,  
 Saxum antiquum, ingens, campo quod forte iacebat,  
 Limes agro positus, litem ut discerneret arvis;  
 Vix illud lecti bis sex cervice subirent,  
 900 Qualia nunc hominum producit corpora tellus;  
 Ille manu raptum trepida torquebat in hostem,  
 Altior insurgens et cursu concitus heros.  
 Sed neque currentem se nec cognoscit euntem  
 Tollentemve manu saxumque inmane moventem;  
 905 Genua labant, gelidus concrevit frigore sanguis.  
 Tum lapis ipse viri vacuum per inane volutus  
 Nec spatium evasit totum, neque pertulit ictum.  
 Ac velut in somnis, oculos ubi languida pressit  
 Nocte quies, nequiquam avidos extendere cursus  
 910 Velle videmur, et in mediis conatibus aegri  
 Succidimus; non lingua valet, non corpore notae  
 Sufficiunt vires, nec vox aut verba sequuntur:  
 Sic Turno, quacumque viam virtute petivit,  
 Successum dea dira negat. Tum pectore sensus  
 915 Vertuntur varii; Rutulos adspectat et urbem,  
 Cunctaturque metu, telumque instare tremescit;  
 Nec, quo se eripiat, nec, qua vi tendat in hostem,  
 Nec currus usquam videt aurigamque sororem.  
 Cunctanti telum Aeneas fatale coruscat,  
 920 Sortitus fortunam oculis, et corpore toto  
 Eminus intorquet. Murali concita numquam  
 Tormento sic saxa fremunt, nec fulmine tanti  
 Dissultant crepitus. Volat atri turbinis instar  
 Exitium dirum hasta ferens, orasque recludit

patria vitam profuderat.“| 891—893. Nihil scilicet te eripiet mihi.| 894. *cap.*  
*q.*, cf. 7, 292.| 897. *antiqu.*, *ἀντὶκὸν μέλανα* Hom. II. 21, 404, quod pro signo  
 antiquitatis accepisse videtur Virgilius. — per iteratum *ingens* mirabiliter augetur  
 magnitudo, cuius notionem animo informavimus.| 898. *lit. ut d. a.*, ut discern-  
 endis inter se arvis omnem de finibus litigandi causam tolleret.| 899 sq. cf.  
 Hom. II. 5, 303 sq. 12, 447 sqq.| 901. *Ille ... heros*, v. G. 4, 457.| 903.  
*non cognoscit se*, desiderat pristinam animi constantiam, pristinas vires, seque  
 plane alium factum sentit, cf. vs. 911 sq. — *currentem* ad saxum petendum. —  
*euntem* contra hostem.| 905. *Genua*, v. G. 1, 397 et de ipsa re v. 1, 92.|  
 906. *inane*, aëra, et v. v. 354.| 907. cf. 10, 786.| 908 sqq. cf. Hom. II. 22,  
 199 sq.| 909. *ext. c.*, cf. Hom. II. 23, 375 et 758. Anacr. 8, 5 „*δρόμον ὄκνον*  
*ἐκτρανύειν*.“| 913. *viam* vincendi.| 920. *fort.*, locum in corpore vulnere oppor-  
 tunum; cf. Hom. II. 22, 321.| 921. *murali Torm.*, ballista, qua muri conquas-

- 925 Loricae et clipei extremos septemplex orbis.  
Per medium stridens transit femur. Incidit ictus  
Ingens ad terram duplicato poplite Turnus.  
Consurgunt gemitu Rutuli, totusque remugit  
Mons circum et vocem late nemora alta remittunt.
- 930 Ille humilis supplexque oculos dextramque precantem  
Protendens, Equidem merui, nec deprecor, inquit;  
Utere sorte tua. Miseri te si qua parentis  
Tangere cura potest, oro, — fuit et tibi talis  
Anchises genitor — Dauni miserere senectae,
- 935 Et me, seu corpus spoliatum lumine mavis,  
Redde meis. Vicisti, et victum tendere palmas  
Ausonii videre; tua est Lavinia coniunx:  
Ulterius ne tende odiis. Stetit acer in armis  
Aeneas, volvens oculos, dextramque repressit;
- 940 Et iam iamque magis cunctantem flectere sermo  
Cooperat, infelix humero cum adparuit alto  
Balteus et notis fulserunt cingula bullis  
Pallantis pueri, victum quem volnere Turnus  
Straverat atque humeris inimicum insigne gerebat.
- 945 Ille, oculis postquam saevi monumenta doloris  
Exuviasque hausit, furiis accensus, et ira  
Terribilis: Tunc hinc spoliis indute meorum  
Eripiare mihi? Pallas te hoc volnere, Pallas  
Immolat et poenam scelerato ex sanguine sumit.
- 950 Hoc dicens ferrum adverso sub pectore condit  
Fervidus. Ast illi solvuntur frigore membra,  
Vitaque cum gemitu fugit indignata sub umbras.

santur.] 925. At quomodo per oras loricae in femur hastam delatam existimabimus? Lorica non pectus solum, sed etiam ventrem tegebat, imae autem parti (id quod antiqua monumenta probant) laminae mobiles aereae alligatae fuisse videntur, femur munientes; per talem laminam putabimus telum in femur adactum.] 926. Iure laudatur poeta, quod noluerit Turnum statim letali ictu vulnerari; sic enim locum sibi reliquit ad declarandam et lenitatem Aeneae in ipsa victoria, vs. 939 sq., et pietatem erga amicum, vs. 945 sqq. — Donatus „*Incidit dixit, in ipsam tantum partem concidit, qua fuerat debilis redditus.*“] 927. *dupl.*, v. 11, 645.] 928. *gemitu*, v. 2, 323.] 930. *oculos dextramque Protendens*, v. 1, 426. cf. 2, 405 sq. Ovid. Met. 14, 734. Valer. Fl. 7, 269 sq. „illi has ego voces, Qua datur, hasque manus, ut possum, a litore tendo.“] 931 sqq. cf. Hom. Il. 22, 338 sqq.] 932 sq. cf. Hom. Il. 24, 486 sq.] 938. *acer*, etiamnum irae plenus, quo spectat illud quoque, quod subiicitur, *volvens oculos*. — *in arm.*, clipeum tenens strictumque gladium, v. 3, 595 | 941. *humero alto*, nam cetera obtegebat clipeus.] 944. *cuiusque insigne gerebat*, v. 3, 382 et G. 3, 283. — *inimicum*, quia gerebat inimicus odioque dignus.] 946. *hausit*, v. 10, 899.] 947. *induta*, cum indutus sis, v. 9, 485. — *meorum*, unius ex meis, v. E. 3, 7.] 952. v. 4, 692.

## INDEX DELECTUS

rerum verborumque in Commentariis explicatorum.

- a, ab*, E. 1, 8. G. 3, 2, 302.  
*abdere*, G. 3, 96.  
*Ablativus*, G. 1, 214. 430.  
 2, 63. 541. 4, 165. A.  
 1, 75. 141. 166. 403.  
 2, 145. 323. 409. 412.  
 3, 503. 618. 4, 36. 128.  
 373. 5, 77. 127. 402.  
 663. 6, 383. 7, 187.  
 226. 284. 8, 693. 9,  
 245. 668. 815. 10, 141.  
 183. 361. 445. 11, 295.  
*absolutus*, A. 1, 737. 5,  
 127.  
*Aborigines*, A. 7, 203.  
*abrumpere*, A. 12, 451.  
*abscondere*, A. 3, 291.  
*ac*, G. 3, 252. *ac veluti*,  
 A. 1, 148.  
*accessus et recessus ma-*  
*ris*, A. 10, 287.  
*Accusativus*, E. 1, 65. 3,  
 106. G. 1, 137. A. 1,  
 524. 2, 690. 3, 284.  
 8, 114. 10, 698. 11,  
 243. 12, 386.  
*Achelous*, G. 1, 9.  
*aclydes*, A. 7, 730.  
*ad*, E. 3, 48. G. 2, 352. 355.  
 A. 2, 443. 7, 519. 10, 253.  
*addere*, A. 11, 95.  
*additus*, A. 6, 90.  
*adeo*, E. 1, 12. G. 2, 323.  
 A. 3, 203. 4, 533.  
*Adiectivum*, G. 1, 290.  
 331. 2, 376. A. 5, 6.  
 7, 787. 10, 520. —  
*cum Participio*, G. 1,  
 163. 3, 28. 4, 19. — *ad-*  
*verbiascens*, A. 2, 53.  
 3, 196. 4, 3. 494. —  
 non *sno* *Nomini ad-*  
*iectum*, E. 9, 46. A. 12,  
 739. — *acerba sonare*,  
*crebra ferire*, *cet.* G.  
 3, 149. A. 2, 690. 5, 19.  
*adire*, A. 5, 379.  
*aditus*, A. 4, 293.  
*admirari*, G. 4, 215.  
*adstare*, A. 1, 152.  
*adsuescere* *c.* *Accus.* A.  
 6, 833.  
*Adverbium temporis*, A.  
 1, 49.  
*aedituus*, A. 9, 648.  
*aegis*, A. 8, 354.  
*aemulus*, A. 5, 415.  
*aena lux*, A. 2, 470.  
*Aequi* *Falisci*, A. 7, 695.  
*aequor*, E. 9, 57.  
*aer arboris*, G. 2, 123.  
 A. 6, 888.  
*aera dissilientia*, G. 3, 363.  
*aereus*, G. 3, 173.  
*aerius*, E. 1, 59. 3, 69.  
*Aeschylus*, G. 4, 227. A.  
 5, 356.  
*aeternus*, A. 8, 394.  
*agere*, A. 5, 793. *verbum*  
*medicorum*, 12, 429.  
*agmen*, G. 1, 322. A. 2,  
 212. 267. 5, 211.  
*agrestes non curant rem-*  
*publ.*, G. 2, 495. —  
*legum iudiciorumque*  
*ignari*, *ib.* 501.  
*alae venantum*, A. 4, 121.  
*albus*, G. 3, 82.  
*Alcimedon*, E. 3, 37.  
*aliquis*, A. 2, 48. 81. 8, 578.  
*alius*, A. 6, 89. 411.  
*Alliteratio*, G. 1, 479. A.  
 9, 634.  
*alter*, E. 8, 39.  
*altum*, G. 1, 142.  
*amantes delitescetes*,  
 E. 3, 65.  
*Ambarvalia*, E. 5, 67. 75.  
 G. 1, 339.  
*ambo*, A. 1, 458. 6, 540.  
*amellus*, G. 4, 277.  
*amnis*, A. 12, 417.  
*amor*, A. 4, 515. 5, 334.  
*ἀναχολουθία*, G. 3, 464.  
 4, 67. 251. A. 1, 237.  
 8, 403. 9, 403. 11, 552.  
*anima*, E. 6, 32. A. 3, 67.  
*animus*, A. 2, 386. 451.  
 4, 414. 8, 256. 11, 438.  
*annus*, E. 4, 4. 12. G.  
 2, 402.  
*Anthologia Gr.*, E. 2, 26.  
*antiquus*, A. 7, 306.  
*anæius angor*, A. 9, 89.  
*aperire*, G. 1, 217. A. 3,  
 275.  
*apes ostentum faciunt*,  
 A. 7, 67.  
*apotheosis Caesaris*  
*praesignificata*, A. 5,  
 523.  
*Appositio*, E. 1, 54. 2,  
 2. 7, 16. A. 2, 139.  
 10, 601.  
*aptare*, G. 2, 359. A. 1,  
 552. 10, 259.  
*aptus*, A. 4, 482.  
*aquilo*, G. 3, 197. A. 5, 2.  
*ara*, E. 5, 66. A. 4, 219.  
 6, 177.

- aratrum*, E. 2, 66.  
*arboreus*, A. 1, 190.  
*ardere* aliquem, E. 2, 1.  
*arena*, G. 4, 293. A. 5, 336.  
*Argiletum*, A. 8, 345.  
*argumentum*, A. 7, 701.  
*argutus*, G. 3, 80.  
*arma* in puppibus, A. 1, 119. — 5, 15, 440.  
*arripere*, A. 3, 477. 11, 459.  
*ars*, A. 5, 359.  
*ars*, G. 2, 535.  
*ἀσχωλισμός*, G. 2, 384.  
*asper*, A. 8, 365.  
*Assyrius*, G. 2, 465.  
*Asylum*, A. 8, 342 sq.  
*at*, A. 2, 535. 7, 363. 691.  
*ater*, G. 1, 129. 2, 309. A. 9, 719. *atrum* agmen, A. 12, 450.  
*atomi*, E. 6, 31.  
*atque*, G. 2, 351. A. 4, 261. 10, 219.  
*attollere* arcem tectis, A. 3, 134.  
*audere in*, A. 2, 347.  
*audire*, G. 1, 514. A. 2, 102.  
*aulaeum*, G. 3, 25.  
*aura*, A. 1, 546. 4, 338. 6, 204. 554.  
*aurea* gens, E. 4, 9.  
*auris*, E. 6, 3. G. 1, 171.  
*Aurorae cursus*, A. 6, 535.  
*auspicia*, A. 4, 102. — *repetere*, A. 2, 178.  
*auster*, E. 2, 58.  
*aul*, A. 2, 779. 3, 162. 5, 68. 12, 685.  
*autumnus*, G. 3, 479.  
*avis dives*, A. 10, 201.  
  
*bacchar*, E. 7, 27.  
*barbaricus*, A. 2, 504.  
*bestiae* in Orco, A. 6, 287.  
*bidens*, A. 4, 57.  
*bonus*, E. 5, 61. A. 1, 195.  
*bovis veneratio*, G. 2, 537.  
*bustum*, A. 11, 201.  
  
*caecus*, G. 2, 503. 3, 210.  
*caelum*, A. 2, 250. 9, 20. G. 3, 261. A. 11, 351.  
*caespes*, G. 4, 273.  
*caesura* post Praepositionem cum Verbo vel Adiectivo compositam, A. 12, 144.  
*callis*, A. 9, 383.  
*Campi*, A. 3, 334.  
*campus*, A. 6, 724. 9, 230.  
*cancer*, G. 4, 48.  
*candidus*, E. 5, 56.  
*canere*, A. 9, 621.  
*cantharus*, E. 6, 17.  
*canus*, A. 5, 744. 9, 259.  
*capere*, A. 8, 363. 9, 644.  
*carpere*, G. 3, 325.  
*castellum*, G. 3, 475.  
*castus*, A. 7, 71.  
*Casus locativus*, A. 6, 332.  
*cateia*, A. 7, 741.  
*carus*, G. 1, 326. 2, 391. A. 2, 360.  
*cedere*, A. 3, 297.  
*celer* iaculo, A. 9, 178.  
*cervus*, A. 1, 184.  
*cetra*, A. 7, 732.  
*Chaos*, A. 4, 510.  
*cicadae*, E. 5, 77.  
*Cicero*, G. 2, 495. 541. A. 1, 340. 544. 4, 678. 12, 862.  
*cimis*, A. 4, 633.  
*circum*, G. 4, 400.  
*clamor* precantum, G. 1, 347.  
*classis*, *classicum*, A. 7, 716.  
*clipeus*, A. 11, 284.  
*Collectiva*, G. 4, 227.  
*colligere se in arma*, A. 10, 412.  
*collocatio verborum*, A. 1, 225. 4, 682. 5, 52. 6, 716.  
*comitari*, A. 8, 462.  
*componere*, G. 4, 189. A. 1, 249. 374.  
*concipere foedus*, A. 12, 13.  
*Conditionalis sententia omissa*, G. 3, 562. A. 6, 358. 8, 522. — *vid. Sententiae*.  
*Coniunctio*, E. 6, 39. G. 2, 519.  
*Coniunctivus*, G. 4, 116. A. 4, 678. 5, 621. 6, 394. 8, 206. 12, 84.  
*coniux*, E. 8, 18.  
*conspectu*, e, A. 11, 903.  
*conspici*, A. 8, 588.  
  
*continuo*, G. 1, 169.  
*Contractio*, E. 6, 78. 7, 7. G. 2, 453. 4, 355.  
*Copulae*, G. 1, 419. 2, 290. A. 5, 504.  
*coquere*, A. 7, 345.  
*cornix*, E. 9, 15.  
*cornua Fluminum*, G. 4, 371.  
*coronae*, G. 1, 304. 347. *tonsa*, G. 3, 21.  
*coronare pocula*, G. 2, 528.  
*Corruptio vocalium*, E. 3, 78. 8, 108.  
*credere*, A. 2, 247.  
*crimen*, A. 12, 600.  
*crudelis*, A. 1, 361. 2, 368. 6, 24. 12, 873.  
*crudus*, A. 10, 682.  
*cuius*, . . . a, . . . um, E. 3, 1.  
*cultus*, A. 8, 316.  
*cum Praepos.*, E. 3, 32. A. 6, 359. — *cum primis*, G. 1, 178.  
*cum Coniunct.*, E. 8, 85. A. 9, 249. 11, 406.  
*cupressus*, G. 2, 443.  
*cura*, E. 1, 58.  
*currere c. Accus.*, E. 4, 46.  
*currus*, G. 1, 514.  
*cuspi*, A. 1, 81.  
  
*damnare votis*, E. 5, 80.  
*dare*, A. 1, 382. 5, 276. 9, 323. *exta*, G. 2, 194.  
*d. se*, G. 1, 287. *da*, i. e. *dic*, E. 1, 18.  
*Dativus*, E. 2, 30. 5, 29. 8, 6. G. 1, 3. 42. 2, 5. 170. 174. 206. 222. 290. 306. 3, 140. 347. 4, 562. A. 1, 266. 2, 245. 315. 348. 713. 3, 46. 5, 550. 8, 104. 178. 718. 9, 273. 704. 10, 610. 11, 416.  
*de*, A. 3, 288. 4, 327. 10, 478.  
*deducere*, E. 6, 5. 8, 29.  
*defendere*, E. 7, 47.  
*defensor*, A. 2, 521.  
*deinde*, A. 1, 195. 2, 391. 5, 14. 741. 9, 781. 12, 889.  
*demittere Morti*, A. 5, 692.  
*a Demonstrativo transitus ad Relativum*, G. 3, 283.

- Demosthenes, A. 1, 327.  
*demum*, G. 3, 280.  
*dentalia*, G. 1, 171.  
*depellere* (agnos.), E. 1, 22.  
 3, 82.  
*depositus*, A. 12, 395.  
*desertus*, A. 2, 714. 4, 42.  
*deus*, A. 4, 651. 7, 498.  
 11, 301. maior, 12, 429.  
*Diana triceps*, A. 4, 511.  
*dies*, A. 5, 50. 64. 9, 7.  
 — *die*, E. 2, 42. G. 1,  
 208. A. 11, 397.  
*diffugere*, A. 2, 226.  
*digna indigna*, A. 12, 811.  
*Dii magni*, A. 3, 12. —  
*d. fluviorum*, A. 7, 792.  
 8, 32. 33. 34. — *d.*  
*morientis*, A. 4, 610. —  
*dii cum rebus*, quibus  
*praesunt*, permixti, A.  
 12, 701. — *flammei*,  
 12, 811.  
*Diomede Accusatus*, A. 11,  
 243.  
*Dirae*, A. 12, 845.  
*dissicere*, A. 7, 339.  
*diversus*, G. 3, 32. 4, 432.  
 A. 2, 298. 3, 4.  
*divinus*, G. 1, 168.  
*donum*, G. 3, 21. A. 2, 189.  
*dorsum vadi*, A. 10, 303.  
*dulcis*, E. 1, 3.  
*dum*, A. 6, 585.  
*dumi*, A. 9, 382.  
*duplex*, G. 3, 87. A. 5,  
 421. 8, 556.  
*durare*, E. 6, 35.  
*durus*, A. 3, 94. 12, 873.  
*e, ex*, G. 1, 393. A. 10, 221.  
*Eclogae quo ordine*  
*scriptae?* E. 1, 1.  
*edere et reddere vocem*,  
 A. 3, 40.  
*effetus*, A. 7, 440.  
*effigies in re magica*,  
 A. 4, 508.  
*effugium*, A. 2, 140.  
*effusus*, G. 2, 352. 4, 492.  
*electrum*, E. 8, 54. G. 3,  
 522.  
*Elisio*, G. 2, 441.  
*Ellipsis*, E. 2, 71. A. 3,  
 319. 6, 36.  
*en*, E. 1, 68. 8, 7.  
*enim*, A. 8, 84. 10, 874.  
*Epexegesis*, G. 2, 241. A.  
 1, 2.  
*Epitheta*, E. 1, 54.  
*equeae*, G. 1, 59.  
*equus Epidaurius*, G. 3, 43.  
*eripere*, A. 2, 619.  
*...es*, Nominum Graecor.  
 in *...es exeuntium de-*  
*clinatio*, G. 3, 91.  
*es omissum*, A. 5, 687.  
*est, esset, fuisset, itera-*  
*tum*, A. 7, 653.  
*et*, E. 1, 66. A. 2, 125.  
 726. 781. 801. 4, 239.  
 5, 113. 851. 6, 547. 9,  
 403. 811. et v. Co-  
*pulae*.  
*etiam*, A. 11, 373.  
*Eudoxus*, E. 3, 40.  
*Euripides*, G. 4, 227. A.  
 1, 248. 462.  
*excantare*, E. 8, 99.  
*excipere*, A. 11, 684. 12,  
 507.  
*excutere Iunonem*, A. 5,  
 679.  
*exta*, A. 8, 183.  
*exustio pascuorum*, A.  
 10, 405.  
*exuviae*, E. 8, 91.  
*facere*, E. 3, 77.  
*facias*, A. 8, 298.  
*facilis*, E. 3, 9. 38. A. 1,  
 445. 8, 310.  
*faculae in fanere*, A.  
 11, 142.  
*fagus*, Nominat. plural.  
 G. 2, 71.  
*fallere*, A. 1, 684. 688.  
 2, 744. 4, 17. 5, 589.  
 7, 350. 9, 385.  
*Fas*, A. 2, 779.  
*fastigata tuguria*, A. 7,  
 512.  
*fatigare*, A. 1, 280. 7,  
 582. 8, 94.  
*fatum*, G. 1, 199. A. 3,  
 717.  
*favere*, A. 8, 173.  
*fel*, A. 8, 220.  
*felix*, E. 5, 65. G. 1, 345.  
 2, 81. 127.  
*fere*, A. 3, 135.  
*ferre*, A. 2, 374. 4, 110.  
 5, 356. 7, 811. 11, 345.  
*ferus*, A. 2, 51.  
*fetus*, G. 4, 231.  
*fervere*, G. 1, 456. A.  
 4, 407.  
*fides*, A. 2, 309. 4, 12.  
 6, 346.  
*fidus*, A. 2, 400.  
*finis*, A. 2, 554. 5, 139.  
*flamma*, A. 2, 586.  
*flavens*, E. 2, 47.  
*florere*, A. 7, 804.  
*flos*, E. 2, 45. A. 8, 160.  
*flumen, fluvius*, E. 7, 66.  
 A. 7, 683. 11, 273.  
*fontes fluviorum*, A. 8, 74.  
*forma*, A. 7, 18.  
*formido*, G. 3, 372.  
*fortasse*, A. 10, 548.  
*forte*, A. 6, 681.  
*forus*, G. 4, 250.  
*fovere*, G. 3, 420. 4, 229.  
 A. 1, 18. 4, 193. 12, 420.  
*fragilis*, E. 8, 82.  
*fretum*, G. 1, 327.  
*fucus*, G. 4, 39.  
*fugere*, E. 1, 4.  
*fulcire*, A. 8, 227.  
*fulgere*, G. 1, 456.  
*fulmen*, A. 2, 649. 5, 319.  
*funda*, G. 1, 141.  
*fundere*, G. 2, 460. A.  
 6, 244.  
*funera prim. Declinat.*  
 A. 9, 486.  
*furari*, A. 5, 845.  
*furere furorem*, cet. A.  
 2, 690.  
*Furiae*, A. 7, 337. 450. 456.  
*furtum*, A. 6, 568.  
*Futurum*, G. 4, 105. A.  
 9, 243. 282. 10, 334.  
*Gabinus cinctus*, A. 7, 612.  
*gener*, A. 2, 344. 7, 98.  
*Genetivus*, E. 1, 33. G. 1,  
 208. 4, 491. A. 4, 654.  
 6, 653. 10, 630. 11,  
 126. 416.  
*genialis lectus*, A. 6, 603.  
*gens*, A. 1, 533.  
*Genus aminin.*, G. 1, 277.  
 A. 5, 122.  
*Gerundium*, E. 8, 71. G.  
 2, 250. 3, 206. 215.  
 A. 2, 6. 11, 230.  
*Gerundivum*, A. 1, 269.  
*glomerare*, G. 2, 311.  
 3, 117.

- orbis*, E. 3, 40. 6, 33.  
     G. 1, 209. 3, 173.  
*ordo*, E. 7, 20. G. 4, 537.  
     A. 5, 349. 773. 7, 276.  
*origo*, G. 3, 473.  
*oscilla*, G. 2, 389.  
*ossa*, G. 3, 272.  
*Ovidius*, A. 1, 1. 262. 4, 336.  
  
*Palicus*, A. 9, 585.  
*pallere*, E. 5, 16. 6, 54, palma, G. 3, 49.  
*Pan*, E. 10, 26.  
*par*, A. 4, 252. — *paria poculorum*, E. 3, 36. 5, 67.  
*parcere*, G. 2, 339.  
*parens*, A. 9, 4.  
*pariter*, A. 5, 587, 830.  
*parma alba*, A. 9, 548.  
*pars*... *et*, E. 1, 66.  
*Participium*, G. 1, 206. 293. 339. 400. 2, 56. 510. 3, 146. A. 1, 385. 2, 377. 5, 6. 7, 787. 9, 286. 488.  
*Particulae retrahendae*, A. 1, 544.  
*pastoris ornatus*, E. 1, 10.  
*pater*, G. 1, 163. A. 9, 449. — *patres Albani*, A. 1, 6.  
*patri*, E. 10, 53. A. 1, 382.  
*Patronymicum*, A. 2, 82.  
*pedem facere*, A. 5, 830.  
*pelagus*, A. 5, 8.  
*pellere*, E. 6, 84. A. 12, 618.  
*pendere*, A. 4, 88.  
*per*, G. 1, 238. A. 4, 56. 6, 743. 9, 31. 10, 369.  
*perditus*, E. 2, 58.  
*Perfectum*, G. 1, 49.  
*pergore*, E. 6, 13. A. 12, 153.  
*perire*, E. 8, 41.  
*perpetuus*, A. 8, 183.  
*perversus*, E. 3, 13.  
*phaleræ*, A. 9, 359.  
*pietas*, A. 1, 544. 2, 506.  
*pilum*, A. 7, 664.  
*Pinarii*, A. 8, 269.  
*pinguis ara*, 7, 764.  
*pinus*, G. 4, 112.  
*plagæ*, A. 4, 131.  
  
*Plautus*, E. 3, 65. A. 1, 49. 4, 261.  
*Plinius min.* E. 9, 6.  
*Pluralis*, E. 3, 7. 6, 42. A. 1, 669. 2, 577. 3, 488. 6, 322. 807. 7, 98. 8, 427. 9, 615.  
     — a Plurali transitus ad Singularum in partitione, A. 12, 161.  
*plurimus*, G. 3, 28.  
*Plusquamperfectum*, A. 2, 136. 7, 532.  
*poetæ*, E. 7, 25. — *eorum ratio loquendi*, E. 6, 46. 9, 19. G. 1, 123. 240. 3, 236. A. 3, 181. 6, 888. 7, 720. 11, 708.  
*polluere*, A. 5, 6.  
*pompa*, G. 3, 22.  
*pontus*, A. 10, 377.  
*poscere ventos*, A. 5, 59.  
*posse*, G. 3, 453. A. 7, 309. 11, 307. 823. 12, 177.  
*potens*, A. 6, 844, 7, 56. 541.  
*potestas*, A. 10, 18.  
*Potitius*, A. 8, 269.  
*Praepositio*, A. 2, 654.  
*praesens*, E. 1, 42.  
*Præcens*, E. 8, 45. A. 1, 99. 316. 7, 363. 8, 86. 219. 9, 9. 21. 12, 113.  
*praeseptia*, A. 7, 17.  
*prester*, A. 12, 451.  
*praetæxere*, A. 4, 500.  
*premere*, G. 1, 157. 2, 346. 4, 297. A. 1, 63. 2, 530. 4, 80. 5, 556. 7, 737. 10, 242. 12, 322.  
*primum*, A. 5, 604.  
*primus*, E. 1, 33. A. 1, 24. 442. 2, 87. 334. 3, 437. 4, 548. 7, 361. 11, 786. 12, 632. — *ubi, postquam, cum, ut, viz* primus, *et*. G. 3, 130.  
*principio*, A. 6, 724.  
*prior*, A. 11, 760.  
*pro*, A. 3, 435. 4, 337. 9, 575.  
*procul*, E. 6, 16.  
*procuratio somniorum*, A. 5, 745.  
  
*productio brevium syllabarum*, E. 1, 39. 4, 50. 6, 53. 9, 66. G. 3, 189. 4, 453. A. 3, 464.  
*Prolepsis*, A. 2, 200. 4, 298.  
*ad Pronomine relativo transitus ad demonstrativum*, A. 7, 63.  
*properare*, G. 1, 260. A. 7, 57.  
*Propertius*, A. 1, 49. 181. 4, 27. 12, 739.  
*proprius*, E. 7, 31.  
*Proverbia*, E. 3, 91. 8. 27. 9, 54. A. 12, 429.  
*pubes*, A. 2, 798.  
*purpureus*, E. 9, 40. G. 4, 373. A. 6, 641. 9, 349.  
*purus*, A. 11, 711. v. *hasta*.  
*putare arbores, vites*, E. 2, 70.  
  
*qua*, G. 1, 90. A. 12, 147. *qualis cum*, E. 8, 85.  
*quam magis*, G. 3, 309.  
*quater*, A. 6, 571.  
*que*, G. 4, 14. A. 2, 801. 3, 329. 8, 93. *que...*  
     *que*, A. 1, 701. — 12, 81.  
*quercus fulgurata*, E. 1, 17.  
*qui cum emphasi*, A. 9, 142.  
*quicunque*, A. 2, 77. 9, 287.  
*quid?* E. 9, 44. G. 3, 264. — *quid ago*, A. 10, 675. — *quid dicam*, *qui*, G. 1, 104. — *quid loquar*, E. 6, 74.  
*quidam*, G. 1, 291.  
*quiescere*, A. 4, 523.  
*quine*, A. 10, 673.  
*quippe*, A. 12, 422.  
*quisquis es*, A. 4, 577. 5, 83.  
*quod*, A. 2, 141. 180. 9, 174. 289. 10, 631.  
*quod superest*, G. 4, 51. A. 9, 157. 11, 15.  
*quondam*, A. 2, 367.  
*quoque et*, A. 1, 5.  
*quos ego!* A. 1, 135.




- rapere*, A. 1, 378. 2, 374. 4, 581. 7, 725. 742. —  
*res r.*, A. 10, 14.  
*re...*, G. 2, 29. 3, 76. 4, 88. A. 3, 717. 9, 32. 193. 12, 35.  
*recto flumine*, A. 8, 57.  
*reddere*, E. 3, 21. G. 2, 194.  
*redire*, G. 3, 351.  
*reducere*, A. 5, 478. 6, 703.  
*refugere*, A. 2, 12.  
*refusus*, G. 2, 163. A. 7, 225.  
*regio viarum*, A. 2, 737.  
*regnum*, A. 9, 596.  
*regum vel cognatio vel affinitas cum populis communicata*, A. 12, 40.  
*relictum rus*, G. 4, 127.  
*religio*, G. 1, 270. A. 3, 362.  
*remigium supplere*, A. 3, 471.  
*remos sortiri*, A. 3, 510.  
*reponere*, G. 4, 378. —  
*repositus*, G. 3, 527.  
*requiescere c. Accus.*, E. 8, 4.  
*requirere*, A. 1, 217.  
*rerum Superlativo adiect.* G. 2, 534.  
*respicere*, A. 2, 615.  
*refia*, A. 4, 131.  
*Reticentia*, E. 3, 8.  
*retro*, G. 1, 200.  
*rex fluviorum*, G. 1, 482. cf. 2, 98.  
*Rhadamanthi munus*, A. 6, 431.  
*Rhaebus*, A. 10, 861.  
*videre*, E. 4, 20.  
*vile*, A. 10, 254.  
*ritus precantum et sacrificantium*, A. 8, 68 sq. 103. 276. 285. 9, 23. 12, 214.  
*rota*, G. 3, 114.  
*ruere*, G. 1, 313. 323. A. 2, 250.  
*rumpere*, G. 3, 328. 428. A. 2, 416. 494. 7, 569. 8, 391.  
*Rutuli*, A. 9, 450.  
*s*, G. 4, 370.  
*sacerdos sorte ductus*, A. 2, 201.  
*sacra*, E. 1, 44. 3, 77. G. 2, 476. A. 2, 239.  
*Sacrani*, A. 7, 796.  
*saeculum*, A. 8, 508.  
*saepe*, A. 1, 148. 12, 259.  
*saetae caprarum*, G. 3, 313.  
*saeuus*, A. 1, 138. 12, 873.  
*Salii*, A. 8, 285.  
*Sallustius*, A. 11, 880.  
*salve*, A. 11, 97.  
*sanguis frigidus*, G. 2, 484. —  
*sanguine et cum s.*, A. 2, 72.  
*sat videre*, A. 11, 366.  
*satur*, G. 2, 197.  
*scaena versatilis*, G. 3, 24.  
*scilicet*, G. 1, 280.  
*scyphus*, E. 6, 17.  
*secare*, A. 10, 107. 12, 368.  
*secundus*, E. 2, 38.  
*securis*, A. 7, 184.  
*sed*, E. 5, 48. — *sed autem*, A. 2, 101. —  
*sed enim*, A. 1, 19. —  
*sed tamen*, E. 1, 19. G. 1, 305.  
*seges*, G. 4, 129.  
*semel*, A. 11, 418.  
*semel posita bis intelligenda*, A. 6, 716. 11, 504. 864.  
*semita*, A. 9, 383.  
*semper*, G. 1, 431.  
*senex*, A. 8, 287.  
*sententiae subintelligendae*, A. 2, 4. 4, 452. 9, 66. 10, 423. 12, 52. 727. (v. *condicionalis sent.*)  
*sentire deum*, cet. A. 3, 359. 7, 434.\*  
*sepulchra*, E. 5, 40.  
*sequax*, G. 2, 374. A. 10, 365.  
*sequi*, E. 2, 63. G. 3, 565. A. 8, 333. 9, 492.  
*sericum*, G. 2, 121.  
*series rerum neglecta*, A. 10, 38.  
*sermo antiquus*, E. 3, 1. G. 1, 454. 456. 2, 425.  
*serpens*, A. 5, 95.  
*serus*, G. 4, 144.  
*servare*, E. 5, 12. G. 4, 383. A. 6, 507. 11, 200.  
*servi pari aetate*, A. 1, 705.  
*seu. vel sive*, A. 5, 68. 12, 685.  
*si*, E. 6, 57. 9, 45. G. 1, 7. A. 2, 348. 5, 64. —  
*si quid*, A. 7, 4. — *si quem* Anthea, A. 1, 181.  
*Sibylla*, E. 4, 4.  
*sic*, E. 9, 30. A. 1, 225. 11, 251.  
*Sicani*, A. 8, 328.  
*siout*, A. 8, 22.  
*sidus*, A. 5, 628. 11, 259.  
*signum belli*, A. 8, 1.  
*Silius*, A. 1, 316. 481. 2, 56. 12, 873.  
*silva*, G. 1, 76.  
*simul*, E. 6, 26. — *cum Participio*, A. 18, 856.  
*sine*, A. 4, 588.  
*sinere*, A. 10, 15.  
*Singularis*, A. 9, 525. 10, 334.  
*sisto*, A. 3, 403.  
*silus*, G. 1, 72. A. 6, 462. 7, 440.  
*soceri*, A. 2, 457.  
*Sol*, A. 4, 607.  
*solitus*, A. 9, 214.  
*sollemnis*, E. 5, 74. A. 2, 202.  
*solox lana*, G. 3, 385.  
*solvere*, G. 4, 302.  
*solus*, A. 1, 664. 2, 426.  
*somnus* = *nox*, A. 1, 470.  
*sonus*, A. 2, 423.  
*Sophocles*, E. 2, 26. G. 1, 347. 4, 457. A. 11, 175. 12, 618.  
*spatium*, E. 6, 31. G. 3, 203.  
*spectare*, G. 1, 96. 197.  
*sperare*, A. 1, 543.  
*spes gregis*, E. 1, 15.  
*spirare*, G. 1, 327. 3, 34.  
*spiritus*, E. 4, 54. A. 4, 336. 6, 726.  
*spissus*, A. 5, 336.  
*spolia opima*, A. 6, 860.  
*spondere*, A. 9, 296.  
*squalere*, A. 10, 313.  
*stabulum*, A. 10, 723.  
*stare*, E. 7, 53. A. 3, 210. 6, 300. 7, 291.  
*Stattius*, A. 1, 546.

- sternere* Leto, Morti, A. 8, 566. — v. *venti*.  
*stirps*, A. 12, 770.  
*stridère*, G. 1, 456.  
*stringere*, G. 1, 317.  
*studto*, A. 4, 641.  
*sub*, A. 7, 378. 9, 244.  
*subitus*, A. 7, 67. •  
*Subiectum primarii enuntiati reiectum in secundarium*, G. 3, 387. 6, 586. — *longius repetendum*, A. 6, 733.  
*sublabi*, G. 1, 200.  
*submittere* tauros, E. 1, 46.  
*Substantivum sine Verbo*, G. 2, 473. A. 1, 639. — e *prae*gresso *Adiectivo adiscendum*, A. 1, 672. — *adiective*, A. 6, 779, 7, 419. 12, 751.  
*succurrere*, A. 2, 317.  
*sūnmus* deorum, A. 11, 785.  
*super*, G. 2, 373. 3, 263. A. 1, 29. 680. 3, 489. 7, 462. 8, 245. 10, 556.  
*superare*, G. 1, 189. 2. 314. A. 2, 207. 8, 208.  
*superbus*, A. 8, 118. 196.  
*superesse*, E. 6, 6. G. 3, 127.  
*Superlativus*, A. 2, 270.  
*superstitio*, A. 8, 187.  
*Supinum*, A. 9, 241.  
*suppositus*, G. 3, 492.  
*suus*, G. 4, 22. 190. cum *Dativo*, 9, 273.  
*Synaeresis*, A. 1, 698.  
*Synecdoche*, E. 6, 35. 10, 5. G. 1, 295.  
*Synesis*, A. 6, 580.  
*t*, A. 9, 503.  
*Tacitus*, A. 1, 150. 2, 369. 4, 336.  
*taenia*, A. 7, 352.  
*talis*, E. 1, 12. A. 1, 370.  
*tamen*, E. 10, 31. A. 1, 247.  
*tantum*, A. 8, 78.  
*tantus*, E. 1, 12.  
*taurus*, A. 10, 785.  
*taxus*, E. 9, 30. G. 2, 257.  
*tollus*, A. 11, 245.  
*temperare*, G. 1, 110.  
*Tempestate*, A. 5, 772.  
*temptare*, E. 1, 50. A. 12, 484.  
*tempus*, E. 7, 35. A. 4, 293.  
*tendere*, A. 9, 606. 12, 930.  
*tenere*, G. 2, 371.  
*Terentius*, G. 3, 330. A. 1, 49. 4, 115.  
*Terra*, E. 8, 93.  
*Thalia*, E. 6, 2.  
*Thracia*, A. 11, 659.  
*tigres et similes bestiae in Thracia*, G. 4, 510.  
*Tisiphone*, A. 6, 574.  
*tmesis*, E. 6, 6. 8, 17. A. 5, 603. 7, 645. 10, 399.  
*tollere*, E. 5, 34.  
*torva* vox, A. 7, 399.  
*tot*, E. 1, 12.  
*trabs*, A. 2, 481.  
*Tragicus vetus*, A. 4, 678.  
*tragoedia*, G. 2, 380.  
*trahea*, G. 1, 164.  
*traiectio verborum*, E. 1, 54. A. 1, 195.  
*tribulum*, G. 1, 164.  
*Troia ludus*, A. 5, 545.  
*tu*, G. 3, 163.  
*tum*, A. 2, 391. 8, 285. 10, 445. 533. — *tum demum*, G. 3, 205. — *tum vero*, A. 5, 720.  
*tumor membrorum*, A. 2, 273.  
*turbo*, A. 12, 451.  
*typhon*, A. 12, 451.  
*ua, ui, = va, vi, vj*, G. 1, 397. 482.  
*ubi sum?* A. 4, 595. — *ubi... que*, A. 12, 81.  
*udus*, A. 7, 533.  
*ultimus*, A. 2, 446. 4, 537.  
*ultra*, G. 4, 203. A. 2, 145. 5, 446. 9, 7. 676. 729. 10, 282. 12, 3.  
*umbra*, A. 6, 743.  
*unus*, A. 1, 15. 664. 2, 426. 5, 308. 704. 6, 784. — *ad unum*, A. 5, 687.  
*urere*, G. 2, 196.  
*urus*, G. 2, 374.  
*usus*, E. 2, 71. G. 1, 133.  
*ut*, A. 2, 283.  
*uterque*, A. 5, 233.  
*vacca*, G. 3, 56.  
*vale*, A. 11, 97.  
*vannus mystica*, G. 1, 165.  
*vastare*, G. 4, 16.  
*vol*, A. 11, 406.  
*vela aequata*, A. 4, 587.  
*velati ramis*, A. 7, 154.  
*velut*, A. 8, 22. — *veluti cum*, cet. A. 1, 148.  
*venae*, E. 6, 15.  
*venenum*, G. 2, 465.  
*venti sternunt mare*, E. 2, 26. — v. *fulminis*, A. 2, 649. — v. *dantur navibus*, A. 3, 61. — 9, 313.  
*Venus*, E. 3, 68.  
*ver apum*, G. 4, 22.  
*verbena*, A. 12, 120.  
*Verbum finitum pro Participio*, A. 9, 489. — *Verbum vel Vocabulum ex alio adiscendum*, E. 2, 15. 3, 33. 4, 16. 8, 49. 9, 1. G. 1, 6. A. 3, 145. 260. 5, 87. 8, 637. 11, 607. — *Verbum repetitum pro repetenda Copula*, E. 4, 6. — *Verba transitiva sine obiecto*, G. 1, 163. 334. A. 5, 766. 10, 857. — *affectum animi significantia*, A. 2, 4. — *frequentativa*, A. 8, 157. — *Verba finita voluntatem tantum vel conatum significantia*, A. 2, 111. 480, 6, 468. — *Vocabula cum Verbis cognatae significationis iuncta*, A. 12, 862. — *Verbis transitivis et intransitivis Accusativus vocabuli cognatae cum illis significationis adiunctis*, A. 2, 690. — *Verbi Numerus*, A. 5, 602.  
*vergere*, A. 6, 244.  
*verti*, A. 7, 101.

- verus*, A. 12, 694.  
*Vesta*, A. 1, 292.  
*vestibulum*, A. 2, 469.  
*vestis* dearum, A. 5, 619.  
*vetustas*, A. 10, 792.  
*vibrare* spicula, A. 11, 606.  
*vices*, A. 2, 433.  
*victor*, G. 3, 9. A. 2, 329. 3, 439.  
*videre*, A. 4, 490.  
*vincere*, G. 1, 180. A. 5, 196.  
*virgea* flamma, cet. A. 7, 463.  
*virgo*, E. 6, 47.  
*viride* antrum, E. 1, 76.  
     stratum, E. 1, 81. *viridis* umbra, E. 9, 20.  
*vis*, G. 1, 198. A. 4, 132.  
*visus*, A. 11, 271.  
*vitea* corona, E. 10, 40.  
*vitta*, A. 3, 370. 7, 403.  
*vitula*, E. 3, 29.  
*vivere*, E. 8, 58.  
*vivus*, G. 3, 449. A. 2, 719.  
*vix*, A. 11, 551. *vix...que, et*, A. 2, 692.  
*vocare*, G. 3, 194. A. 4, 417.  
*Vocativus*, A. 9, 485.  
*voce*, A. 4, 681. 10, 677.  
*volens*, A. 3, 457.  
*volnus*, A. 7, 533.  
*volvere*, G. 1, 163. A. 1, 9. 234. 433. 9, 433.  
*votis et in vota vocare*, A. 5, 234.

LIPSIÆ EX OFFICINA BAERI ET HERMANNI.

472 3.8  
20







16.345  
Carmina breviter enarravit Philipp  
Widener Library 003764526



3 2044 085 242 006